

2
EPISTOLA
ANATOMICA, PROBLEMATICA,
QUARTA & DECIMA.

Authore
MAURITIO à REVERHORST

Med. Doct. & Anatom. Professore.

Ad Virum Clarissimum

FREDERICUM RUYSCHIUM.

DE

Nova Artuum decurtandorum Methodo.



AMSTELÆDAMI,

Apud JOANNEM WOLTERS, 1701.

BRITISH MUSEUM
SALE DUPLICATE
I 7 8 7

9
wo/n

Clarissimo Doctissimoque Viro

FREDERICO RUYSCHIO, &c. &c. &c.

S. P. D.

MAURITIUS à REVERHORST.



Itteræ tuæ nuper ad me datæ gratissimæ fuere, præcipuè quum ex adjectis relationibus circa Methodum secandi Fratris *Jacobi de Beaulieux*, vulgò Eremitæ, intelligere licuerit, qualem successum in suis patientibus, vestrà in civitate, habuerit, quum de illo tam variè apud varios differatur; hi enim Manum ipsius in secando tanquam optimam, dexterrimam & quasi cœlitus datam deprædicant; alii contra ipsam pariter cum famâ ipsius rejiciunt, fœdisque proscindunt convitiis, quum nos tamen æque ac illi, quibus Lugduni Batavorum cura illorum patientum mandata fuerat, fatis felices in curatione fuerimus; quippe è tredecim diversi sexus & ætatis, tam a Calculo, quam diversâ Herniarum specie sectis, non nisi duo fatis cesserunt, ambo quinquagenariis majores; quorum prior a diuturno Vesicæ ulcere, macie confectus, quin & Calculo ipso fatis magno, aspero & inæquali, non nisi cum insigni Hæmorrhagiâ extracto, intra novem hebdomadarum spatium, usque eò pristinæ valetudini fuit restitutus, ut ille, qui antea nimis doloribus, continuisque vigiliis & Vesicæ ulcere attritus, & penè consumptus erat, jam multò obefior appareret, quin etiam jam urinam ad aliquod tempus retineret, & per cubiculum suum obambulare, & mu-

nia sua in ipsâ officinâ (faber enim ferrarius erat) utcunque obiret; adeoque, si in ullo patiente salutis spes affulgeret, hic in nostro fuit, qui tamen ex Incendii alicujus terrore electo suo profiliens, variisque in diæta erroribus commissis, incidit primò in Febrem continuam cum tussi, a qua corporis vehementi agitatione, vulneris labia, jam fere coalita, iterum disrupta fuère, & variæ Calculosæ incrustationes, ab urinâ perfluente sese continuo lateribus apponentes, nostræ curationi remoram injecere, dum interim in urethrâ ipsâ, variis in locis Carunculæ obortæ, liberum urinæ effluxum prohiberent; sic ut reliquis Symptomatibus cum Febri auctis, hic noster patiens vitam cum morte commutaverit: quid autem in corpore ipso latuerit, Cultro Anatomico indagare nobis non licuit: Quid verò notaverimus in altero nostro patiente, itidem ab illo a Calculo secto, cujusque cadaver a nobis inspectum est, a Petro Adriani Verduyn, ejusve Filio absque dubio intellexisti, tam de statu ipsius corporis morbofo, utpotè antea Apoplectico, Mictu cruento, & nonnunquam Urinæ suppressione laborante, nec non Herniâ ejus intestinali, operationis tempore prolabente, ut & altero rene ab ulcere consumpto, cæterisque præter naturam in corpore repertis, & observatis, unde hoc infelix omen satis prævisum fuit: hæc & pleraque alia, hunc casum spectantia, & notatu dignissima, non dubito quin intellexeris, quocirca longiori narratione illâ de re hic supersedebo, cum adhuc ex dictis illis tredecim patientibus, D. T. O. M. sit gloria! undecim qui vivunt valentque, satis de illâ secandi Methodo testari possint; interim nullus etiam dubito, quin suo tempore aliquis Gallus, aut alius, qui ipsius secandi Methodum pernoverit, quique politioris styli est ac dictus Eremita, hanc ejus methodum contra sinistros ejus famæ obtrectatores sit defensurus. uti ex nuperis litteris ex Arce Versailliâ ab ipso ad nos missis non obscure colligere potuimus, ubi simul, sed obscurius, loquitur de novâ Hernias (absque Testis jacturâ) secandi Methodo, quam se jam aliquoties instituisse perhibet, quæque multas ob causas antiquæ præferenda foret, uti

dies docebit : Sed hæc de Eremitâ ejusque litibus, quas uti meas non facio, ita quoque illas componere nolo; progredior ad aliam, & novam quoque, seu nuper propositam in illâ arte (videlicet amputandi) Methodum, quam P. A. Verduyn nuper proposuit, variisque experimentis ab illo tempore, ipsi oblatis, confirmavit, quâ de Methodo tanto lubentius tecum agam, quoniam illam nuper Amstelodami Te presente a P. A. Verduyn, ejusque Genero & Filio, præclaris illis Rei Chirurgicæ luminibus, ipsam institutam vidi, eademque Amputatio apud nos quoque paulo post, non in Manu, non in Juvene, non novâ illâ Methodo, sed in Pede, in Virgine, idque antiquo modo instituta fuit a Stephano de Rouw, & Adolpho Strukery, juvantibus Abrahamo van Kervel, & Everardo van Ourik, Chirurgis apud nostros in suâ arte non parum versatis, spectantibus verò, seu potius patientis curam habentibus, Jacobo de Bye atque me M. D. S.

Casum nostrum prius ego hic exponam, deinde quid a Te, vestro in Casu, desiderem, addam,

Virgo triginta duorum annorum ante hos decem undecimve annos ab ustione dextri pedis circa talum diu malè tractata, & ut in adustis nunc his, nunc illis remediis adhibitis, aluit ab illo tempore, hac in parte, ulcus cum Carie tam Apophysis ipsius ossis Tibiæ, Fibulæque, quam reliquorum adjacentium ossium totius Tarsi, interim jam hac, jam illâ in parte, aliqua curationis spes affulgebat, sed quod ad cæteras corporis functiones rectè sese habebat, & quamvis usu hujus pedis malè affecti (utpotè plerisque Ligamentis, quæ hæc ossa alias continent, jam ab ulcere consumptis digitisque versus terram omninò & præter naturam protractis) destituta esset, tamen beneficio scipionis satis benè sese movebat, adeò ut Scalas quoque prompte conscenderet, cæterisque suis muneribus alacriter fungeretur; interim nescio quo malo lapsum patitur, ex quo ossa illa, præcipuè Calcis, non tantum fracta, sed & tota corporis mole desuper incidente, omninò comminuta fuerunt, cum tanto Sanguinis profluvio, ut vix evasura videretur, quo tamen sublato, & vulnere pro temporis ratione

tractato, nec ullâ restitutionis spe, nec pedis usu affulgente, unanimi consensu in illud omnes convenere, ut ille pes paulò infra Genu rescinderetur; quæ Operatio quamvis dextrâ patiter atque celeri manu instituta fuerit, quinetiam ipsa Curatio satis feliciter pro tempore succederet, optatumque eventum polliceretur, contrarium tamen videre coacti fuimus; nam præter continuos & ferè intolerandos dolores, tam in parte affectâ, quam jam ablatâ, de quibus continuo conquerebatur, incidebat primò ante justum tempus in Mensium fluxum, cum magnis intestinorum Cruciatibus, & assiduis dejectionibus, qui simul ac componebantur ac sistebantur, statim conquerebatur de Faucium anxietate, & Respirandi difficultate, quod in principio pro Passione Hystricâ, utpotè malo ipsi familiari, habebatur; sed Colli dolore, ejusque motu molestiore, & Masticatione æque ac Deglutatione aliquo modo impeditâ, cum aliquâ oris Clausurâ, & Musculorum Faciei distorsione, aliud cogitare cœpere, præcipuè illi, qui una nobiscum ex patientibus, ab Herniâ Intestinali ab Eremitâ Sectis, quique jam salutis proximi videbantur, nihilominus lethale ut plurimum extitisse, fuerant comperti, illi, inquam, qui hoc antea nobiscum notarant, non sine ratione utut laudabilia omnia in vulnere apparerent, nihilominus aliquid finistri ominabantur, præcipuè cum enarrata Symptomata neque externis, neque internis remediis minuerentur, sed contra febris magis intenderetur, quinetiam jam quoque de difficultate tam in reddendâ urinâ, quam in excludendis alvi fæcibus conquereretur, quod malum tamen applicatis Clysteribus aliquo modo levare videbatur; hoc non obstante, doloribus tam in abdomine, quam in parte jam ablatâ (præcipuè ubi Ulcus fuerat, hæc enim pars continuo ipsi in animo versabatur, utpote nervi, nervosæque partes terminum suum jam in vulnere ipso obtinentes, & aëris incommodis aliisque injuriis externis obnoxia, jamque male affectæ, hanc menti ideam obtulere) his, inquam, cum febre & delirio magis auctis, huic nostræ patienti Mors sæpius optata finem dolorum imposuit.

Quid jam dicemus de dextra in operando manu? Curatione ad tempus satis felici? Si tam tristem eventum obtineant; quare non tantum cum Hippocrate in suis Aphorismis notare debemus *Experimentum periculosum esse*, atque idcirco alia excogitanda media, quibus tam infelici successui, cæterisque Symptomatibus enarratis obviam eamus; hæc enim omnia quis dicet non provenire ex Nervorum Nervosarumque partium consensu atque cohæsiōe? Quæ in hac extirpatione vel continui Solutionem patiuntur, vel alio modo malè affectæ, disruptæ, dilaceratæ, vel ab aëris injuriis minus sunt vindicatæ; an non illa Methodus, quam P. A. Verduyn nuper proposuit, quamque in Tua præsentia ab ipso satis feliciter institutam vidi, an non illa, & quibus modis, antiquæ præferenda foret, utpotè ubi Curatione non tam diuturna, neque dolor post operationem tantus, nec tum quoque talis Hæmorrhagiæ metus, nec ossis separatio expectanda venit, & Nervi Nervosæque partes, Tendines earumque Fibræ & Vasa ipsa jam tecta, & a frigore cæterisque molestiis & incommodis externis ab applicatâ Musculosarum partium mole satis conservata videntur: non quod ego hic novam illam Methodum, solum quia nova est, introducere velim, sed quod in curatione sit minus dolorifica, paucioribusque Symptomatibus stipata, an non ideo amplectenda, veterique præferenda videretur?

Jam nihil est quod avidius expectemus, quam ut tua illa Observatio in lucem prodeat, & quid in Curatione ipsâ acciderit, & quot quibusve modis antiquæ Methodo aut præferenda aut postponenda veniat hæc nova, tam respectu doloris, & moræ in Operatione ipsâ, quam reliquorum Symptomatum post ipsam institutam, nec non intumescentiæ illorum Musculorum, quibus Ossium, & reliquarum partium extremitates tegendæ veniunt; quod ad reliqua non dubito, quin Manum ipsam amputatam dexterrimâ tua Methodo contra omnem interitum defensorus, ærique, uti assoles, incidendam daturus sis, idque si fieri possit, formâ naturali, cum alias Judicium non tam accuratè ferri possit, uti in Severino Lib. de nov. observ. absc.

Simi-

similem ferè Casum proponente liquidò apparet : certiores sine dubio nos quoque facies de qualitate illorum tumorum, qui sese in manu offerebant, & an Cartilagineæ, an Ossæ, an verò (uti Cl. Pechlin. Obs. Lib. III. Obs. XLVI. habet) Glandulosæ indolis fuerint, nec non quibus cum partibus co-hæreant, seu potius, unde primum originem sumpserint, cuique natales debuerint, an propriis vasis ab ipsis primordiis, una cum forti imaginatione tempore Gestationis, his tumoribus a naturâ datis, an ex communibus, an ex tendinibus earumque involucris, an ex perioftio, an verò ex osse ipso, tanquam ex fonte, & primâ Scaturigine principium suum duxerint; uno verbo, quid solita tua solertia in eruendis corporum abstrusissimis mysteriis ulterius detexerit, avidi a Te expectamus; interim ut diu vivas, valeasque, & Artem Anatomicam novis & hætenus inauditis tuis inventis ulterius ornas, ex animo precor.

Hagæ-Com. xij. Kalendas
Martii, cio 10 cci.

FREDERICI RUYSCHII
RESPONSIO,

Ad Clarissimum Virum

MAURITIUM à REVERHORST,

Med. Doct. & Anatomia Professore.

SUPER

Nova Artuum decurtandorum Methodo.

Digitized by the Internet Archive
in 2019 with funding from
Wellcome Library



mater imprægnata impensè appetiverat dictas Radices Chrysanthemi Americani, quas tamen impetrare haud potuerat; foetu jam in lucem edito, reperti sunt, uti aiebat anus, exigui tumores in manibus atque pedibus, qui temporis fucceſſu in tantam excreverunt molem, præſertim in ſiniſtra manu, ut brachium diutius ſuſtinere vix potuerit, imò coactus fuerit dextra ſiniſtram ſuffulcire. Tandem, cum unus ex iſtis tumoribus ulcerofus factus, emiſſiſſet aliquoties multum ſanguinis, & patiens manus ponderoſitatem, doloresque immanes diutius perpeti haud poſſet, totius manus extirpationem nobis propoſuit. Nos autem, conſideratis conſiderandis, annuebamus quidem ejus petitioni, aſt vero abſque Magiſtratus conſenſu, variorumque Expertiſſimorum Medicorum & Chirurgorum adſtipulatione, operationem non aggreſſus eſt Magiſter Petrus Verduyn, auxiliantibus ejus Filio, ut & genero Gomaro à Bortel.

Die igitur conſtituta ad dictæ manus amputationem, præſens fuiſti Clariff. Vir, præſentes quoque ſeſe ſiſtère Medici expertiſſimi Vlackveld, Smedingh, Schyn, Valentyn, La Grue, Smit, nec non exercitatiſſimi Chirurghi, Aurick, Deutelius, Pothuiſen, &c. Patiens brodio confortatus, admodum erat animoſus, operationemque perpeſſus eſt fere abſque ejulatu, ut omnes, qui operationi interfuère, admirati fuerint.

1. Humeri pars ſuperior circumducebatur ſplenio quadruplicato, ſuperimpoſito ſplenio longitudinali, lateri interiori brachii & quidem ſecundum longitudinem, ut hujus & funiculi ſeu cinguli conſtrictorii ope, vaſa tutius & minori cum noxa inter operationem comprimi poſſent.

2. Hoc factò Dⁿ. Smith Hafnienſis injungebatur cingulum conſtrictorium bacilli ope leniter, & in operatione ipſa, fortius contorquere, partim ad ſanguinis profuſionem inhibendam, partim ut pro tempore, brachii ſtupor excitaretur, & dolor arceretur.

3. Anſa graciliſſimè circumducebatur cubitus infra juncturam

ram. Hisce peractis , Magister van Bortel , gener Magistri Petri Verduyn , partem musculosam sinistrâ arripiens , dextrâ cultellô ancipiti & mucronatô eam perfodit , quam proximè fieri potuit , ad ossa cubiti & radii. Hæc initio facta latere interiore Brachii , quem locum quoque occupabat Operator dictus. Perfossâ parte musculosa , cultrum ulterius adegit , incisionem continuando donec sufficere videbatur pro vulneris tegmine , & sic ulterius transversim carnem abscindebat. Porro Magister P. Verduyn cæteram partem carnosam circulariter & celeriter incidebat cultro falcato ad ossa usque , & perioestio abrafo , utrumque os ferrâ dividebat : Interim ne caro propendens à cultro aut ferrâ offenderetur Mag. Adrianus Verduyn prospiciebat.

Manu amputatâ & spongiâ madidâ rasurâ ossium ablatâ , vulnus , & per consequens utriusque ossis extremitas tegebatur quidem à dicto Magistro carne propendente & reservata ; ast verò propter carnis contractionem , quæ illicò fit post incisionem , totum vulnus ex voto contegi haud potuit : itaque , quod restabat vulneris , ut & totius membri amputati truncus frustô planô fungi Orbicularis , obducta & contacta fuerunt , super impositâ Vesicâ madidâ , & super eam alterâ madefactâ , quæ priori aliquantò major erat : Hæ binæ Vesicæ , ut firmitus cuti adhærerent , comprimebantur & stabiliebantur circulariter frusto Emplastri conglutinantis , cujus latitudo erat unius uncia , longitudo autem Spithamarum duarum.

Hoc facto tertia quoque Vesica madefacta superimposita fuit , hæmorrhagiæ metu. Ist hæc præcedentibus longior & eodem modo stabilita altius brachium coöperuit.

Hisce ita munitis , lamina concava , splenio quadruplicato intus obducta , membri extremo applicata fuit , ea intentione ut deligatione peracta , famuli manu laminâ comprimeretur truncus , hæmorrhagia inhiberetur , & ligaturæ laxius applicari liceret ; ut autem dicta lamina cava trunco cohæreret , duo frusta Empl. conglutinantis cruciatim adhibita sunt , e-

jusdem naturæ ac supra citatum. Hisce peractis & cingulo constrictorio (Gallicè *Tournequet*) issoluto, membri extremo applicatum fuit alterum splenium ex linteo confectum, præcedenti majus & crassius, illudque firmatum fuit fasciâ simplici capite præditâ.

Deligatione ita peracta composuit se patiens in lecto ad quietem; quam ut facilius acquireret, Emulsio ex hordeo ad Crep. cocto, Sem. Cucum. & Amygdal. præscripta fuit, additâ Syr. Diacodii dimidiâ unciâ; sub noctem sese mediocriter habens & alimentum petens parum dicti brodii exhibitum fuit, & sic sese ad quietem composuit, noctemque transegit satis tranquillam, nullo sanguinis profluvio suborto.

Die insequente brachium bene videbatur constitutum, nullo tumore insigni oblitum, patiens quoque immunis ab omni febre.

Hisce visis consultum duximus, patientem ex ædibus Magistri Verduyn transferre in locum quietiorem, ubi illum inviserunt Magister van Bortel & Verduyn, qui deligationis exteriora abstulerunt, vulnusque mitius deligarunt, id quod levamen patienti adferebat. Tertia die sub meridiem integra deligatio simul cum Vesicis ablata fuit, invenimusque separationem Epidermis, seu Hydatidem onustam humore loturæ carnis æmulo, idque parte anteriore juncturæ cubiti, eaque aperta, reperimus sublitam cutim nonnihil quoque infectam & gangrænam ulteriorem mentientem; eodem quoque tempore patiens non immunis erat ab omni febre, & membri extremitas, justò magis tumefacta: Vulnus tamen magna ex parte carne, quæ in amputatione conservata fuerat, coopertum invenimus, sine sanguinis profluvio. Quia autem omnis hæmorrhagiæ novæ metus nobis nondum erat ademptus, in deligationis renovatione haud omissus fuit Fungus Orbicularis, minutus Empl. Diapalma dissoluti, spleniò quadruplicatò & ligaturâ convenienti.

4. Die pulsus invenimus concitatiorem, & vulnus non minus extumefactum, itaque ablatò fungò leniter tantum ad-

ducebatur caro in amputatione conservata, idque fasciola Empl. Glutinoso oblinita, vulgò futura sicca dicta, porrò totum vulnus tegebatur Empl. Diapalma dissol. plumaceolis, ex linteo carpto confectis, haud neglectis. Die insequente quæ erat quinta ab amputatione, res eodem fere modo sese habuit, nec febris quoque mitior facta: itaque eodem ritu remissius deligatum fuit vulnus, ast verò eo loco, ubi Gangrænæ metus fuerat, sc. circa juncturam cubiti, Gangræna jam prodiit levis, quapropter consultum videbatur cautius prospicere huic symptomati, quam trunci integumento carneo: itaque lenissime tantum adductâ carne reservatâ, Cataplasma ad Gangrænâ sistendam applicatum fuit. Die insequente vulneri prospeximus digestivo Cataplasmate superimposito: die autem 7 truncus non nihil detumuit & vulnus quoque humidius apparebat, interim locus, Gangrænâ obsessus, magis magisque intumuit, doluitque, nec patiens à febre immunis, ita ut magis metueremus abscessum quam Gangrænâ profundior, qui tamen haud supervenit. Altera die, eodem modo res sese habuit, excepto, quod nonnihil mollior pars tumefacta nobis obveniret, die autem 9 haud pejus res sese habuit quoad truncum, Gangræna verò in pejorem statum erat redacta: Itaque post ablutionem cum Sp. Vini calefacto factam, applicati sunt plumaceoli, tetrapharmaco cum digestivo permixto, illiti, nec non in Sp. Vini humectati, superimposito Cataplasmate, Spirit. Vini asperso.

10. Autem die febris remissior facta, trunci vulnus pure cocto oblitum, Gangrænæ tumor quoque minus durus: hoc tempore nihil immutatum fuit circa deligationem, patiens verò eodem die, prima vice questus fuit de dolore pollicis membri detruncati, & præsertim quidem, [cum inopinatò pollicem extendere conaretur aut mentiretur, non autem cum in animo haberet eum flectere; de cæteris digitis nullæ erant querelæ, illud enim distincte interrogavimus.

Die undecima major spes affulgebat, quando quidem omnia

in melius vergebant, pus enim laudabile promanabat de vulnere trunci, tumor diminutus, escaræ periphæria humida cum aliquali separatione : in hac renovatione omiſſa fuit Cataplaſmatis applicatio ſupra truncum, non autem ſupra partem Gangrænâ infectam : Caro autem reſervata, quæ ob ſymptomata ſupra citata, haud ſatis erat adducta, & propterea retracta, jam denuò faſciolis Emplaſtro Glutinoſo oblinitis reducta & vulnus maxima ex parte coöpertum fuit.

Die 12 patientis ſtatus non erat quidem deterior, ſed verò Gangrænam, profundiores egiffe radices, videbamus, utpote ſeparatione partim facta, imò tendines muſculorum non fuiſſe immunes à dicta Gangræna, ita ut varii quoque ſepararentur. Jam à Cataplaſmatis uſu deſtitimus, dicto loco proſpeximus digeſtivo, & carnem reſervatam dictis faſciolis, ut antea, adduximus.

Die 13. patiens immunis erat ab omni febre, placidè dormiverat, cibum appetebat, truncus carnis adductione maxima ex parte coöpertus erat, & quod reſtabat vulnere, applicuimus Unguentum, *ſac totum*, dictum, ut cicatrice ulterius obduceretur vulnus : quicquid autem emortuum & Gangræna infectum fuerat ſub cubiti juncturam, partim forcipe exciſum, partim à natura ſeparatum erat, adhibitis plumaceolis Ung. Digeſtivo, Baſilico permixto, oblitis Diebus inſequentibus melius atque melius ſeſe habere cœpit patiens; imò paucis poſt diebus prorſus fuerunt curatæ dictæ ſolutiones continuæ, quin etiam quò magis appropinquarent earum curationes, eò majores erant querelæ de dolore amputati membri, & nunc quidem circa volam manus, nunc verò de dolore totius manus, & quoties quis leviter tantum compri-meret cicatricem infra juncturam, ubi Gangræna fuerat, ſummis cruciabatur doloribus; interrogatus, qua in parte? rege-rebat indigitis amputatæ manus, compreſſa autem in parte dictæ cicatricis confinio, nullum ſentiebat dolorem.

2. Conſideratione dignum eſſe cenſeo, nos nullam ſenſibilem ſeparationem extremitatum oſſium cubiti, & radii in curatione

ratione offendisse, quia minus aëris injuriis exposita fuerunt dictæ extremitates ossium.

3. Comprimendo trunci extremum, cicatrice obductum, dolor sursum vergebat versus brachium.

4. Truncum flectendo, sibi imaginabatur, quod simul quoque digiti flecterentur, idque sine ullo dolore: pollex verò videbatur illi rigidus & sine motu.

5. Quum dextrâ fricaret, supra juncturam trunci, idque parte exteriori, dicebat nobis, sese non solum sensum motumque hujus fricationis in digitis membri detruncati percipere, verum etiam cum fricaret sese in latere Thoracis sinistro: id quod (quamvis non obscure nobis arguere videatur consensum membranarum, nervorumque in corpore nostro,) magis mirandum, quam explicandum.

6. Contractionem singularem præstare poterat in trunci cicatrice; quam quasi corrugabat, dicens, jam mihi videor digitos flectere, jam denuò extendere.

Hisce à nobis observatis, imposterum expiscandum, utrum dicti dolores, quos videbatur passus in manu extirpata patiens, & à quibus haud immunes sunt homines, quorum artus vulgari modo extirpati sunt semper superveniant patientibus, quibus eo, quo retuli modo, extirpata fuit manus, an verò hisce ansam dederit Gangræna, circa cubiti flexuram prognata, an ex alia causa ortum duxerint, occasione data inquirendum esset, quandoquidem Magister Petrus Verduyn testatur in Epistolari sua Dissertatione, sese quidem bis hanc operationem in pede instituisse, idque eadem methodo, & quod tales dolores Sympatheticos nondum offenderit. Verba ejus hæc sunt, *denique silentio præterire non possum aliud quoddam emolumentum, nequaquam pœnitendum; nimirum quod hoc modo restituti non conquerantur, ut quidem alii, de dolore sympathetico in pede cruris, ablati, &c.*

Hæc sunt Cl. Vir, quæ nobis in, & post exstirpationem, observare licuit. Quid autem de hac exstirpationis methodo sentiam, à me scire cupis, in qua, ut recte censes, *curatio non tam diuturna, neque dolor post exstirpationem tantus, nec*

tum quoque talis hæmorrhagiæ metus, nec ossis separatio expectanda venit, & nervi nervosæque partes, tendines, eorumque fibræ, & vasa ipsa jam tecta, & à frigore cæterisque molestiis & incommodis externis ab applicata Musculosarum partium mole satis conservata videntur, &c.

Hiscæ concessis, ut revera concedenda esse putem, amplectenda videtur hæc nova extirpandi methodus.

Fateor quidem in manus aut brachii amputatione nos semper sollicitos esse, ut tantum membri conservetur, quantum fieri potest, quia ad nonnulla munera obeunda illud inservire potest, & si velimus truncum membri amputati mole carnea tegere, quæ in cubiti extremo nimis exigua, quam ut ea contingi possit, necesse foret in altiore loco membrum decurtare, sicuti, ut fateor, in hoc patiente, factum. Verum enim verò in posterum minus sollicitus ero, de coöpertione trunci carneâ mole; existimo enim sufficere, si truncus tegatur cute manus, quæ toto dorso vel vola manus separari & conservari posset; Contra in pedis exstirpatione necesse est partem detruncatam carne furali integere, uti olim factum à Magistris Exercitatis: Petro Verduyn, Wilhelmo à Vleuten, & Adriano Coenerdingh; dico necesse esse, sc: si per insitionem curari, & parti detruncatæ, non verò genu insistere atque incedere velint homines: caro enim reservata mutilatæ parti pulvinaris loco est.

Circa hanc hætenus inusitatam amputandi methodum, nonnulla adhuc considerata veniunt, &

1^o. Quidem, si in crure facta operatio, & patienti in animo sit per insitionem ulterius curari, an non obstaculo erunt excrecentiæ seu exostoses, quæ in homine vegeto observantur aliquando è trunco emergere.

2^o. Si in cubiti extremo instituenda sit operatio, an cutis, quæ in manu est, sufficiens est pro vulneris integumento?

3^o. An in nova hac methodo major aut minor gangrænæ supervenientis ansa detur?

Quoad 1^{um}, nempe ossium excrecentiam: Resp: in cubiti aut manus amputatione non est cur de ea solliciti simus, mem-

bro enim detruncato non incedit homo : verum enim verò in amputato crure ejusmodi excrescentiæ admodum nocivæ forent, hæ enim carnem conservatam compungerent incedendo continuè, si nempe per insitionem ulterius incedere vellet patiens. Hoc incommodum, si Magister Petrus Verduyn intercurandum inhibere valeat, (sicuti affirmat) idque suo apparatu novo, soluta est isthæc difficultas.

Demonstravit quoque nobis puerum, qui crure amputato, crure artificiali incedit, currit, genu flectit, extenditque pro lubitu. Vide ejus dissertationem Epistolarem de nova Artuum decurtandi ratione Anno 1696 in lucem editam; in qua exhibetur Instrumentum retentivum, ut & lamina excavata, quibus facta amputatione in pede aliquot post diebus, cum dicta excrescentia metuenda sit, trunci extremum ita comprimitur, ut illud incommodum inhibeatur.

Quod ad 2^m. attinet, sc: an cutis manus sufficiens sit pro vulneris integumento, propter retractionem cutis? Resp. si non sufficiat omnino, saltem magna ex parte truncum coöperiet, id quod de vulgari amputatione dici non potest, & quò magis nervi, tendinesque abscissi proprio tegmine conteguntur, eò remissiora expectanda symptomata; præterea curatio citius quoque absolvetur; imò Auctor essem, ut in eo casu carnosum & cutaneum volæ manus arriperemus, & in auxilium vocaremus, pro trunci nervorum ac tendinum tegmine. Præterea amputato membro Chirurgi applicare assolent pulv: adstringentes, quos inter varii Pulv: Escarotica recipiunt ad sanguinis hæmorrhagiam inhibendam, id quod plane rejiciendum censeo, propterea quod illi sua acredine nervosis partibus nocere valeant: in hac autem operatione tale quid non adhibetur, sed vulnus tegitur proprio involucro.

Quod ad 3^m. attinet, sc: an in hac nova methodo, major aut minor Gangrænæ metus adsit? Resp. si non minùs Gangrænæ minatur operatio isthæc nova, saltem haud major erit, hujus symptomatis metus, modo deligatio rite peragatur. Fateor quidem illam in supradicta curatione nobis obvenisse, ve-

rum illud non in trunci extremo, verum circa cubiti flexuram sedem fixit, forsan à ligatura, justò arctius circum ligatâ, id quod multum negotii nobis faceffivit, & hoc præcaveri poterit in posterum, præstabitque laxiorem adhibere ligaturam, & per 12. imò 24 horas truncum manu continere & comprimere, & hoc ut æqualius fieri possit, in auxilium, ut dixi, revocanda lamina excavata, quæ ante compressionem applicanda.

Pergam ulterius ad ea, quæ Cl. Vir me admonet, sc: brachii amputati conservationem, ut & naturali magnitudine delineationem, *cùm alias judicium tam accurate ferri nequeat, uti in Marco Aurelio Severino; de Nov. observ. abscess; similem fere casum proponente; liquido apparet.*

Recte adstruis, objecta naturali magnitudine semper esse delineanda, si quis proposita accurate demonstrare satagit, & hoc quoque in omnibus meis Epistolis Anatomico-Problematicis observavi. Est mihi in animo hanc manum amputatam ita sepelire, ut quicquid in figuris expressum fuerit, semper demonstrari possit. Porro unum ex istis tumoribus in manu existentibus, ut memonisti, examini subjeci, reperique, illum neutiquam esse Glandulosæ indolis, ast Cartilaginosa, imò & Osseæ, eratque quasi ex innumeris minoribus tumoribus partim Cartilaginosis, partim Osseis, compositus; singuli autem eorum denuò ex innumeris minoribus humore succoso, gelatinoso repletis Vid. Tab. xviii. fig. 2. Impossibile autem mihi fuit indagare, an ex ossibus manus, tendinibus, aut perioftio, tanquam ex fonte, & prima scaturigine originem duxerint: Omnia enim ita sunt confusa & connata, ut ulteriori indagini haud fuerit locus; cum illud perscrutarer, sub cute conspicienda sese exhibebant vasa sanguinea, quæ cum ceraceâ materiâ replevissem, distinctè videre licuit eorum cursum, & capacitatem: Venæ per dorsum manus disseminatæ, calami scriptorii capacitatem adæquant: horum ramuli minutissimi à naturali cursu quoque recedunt; quin etiam circa cutem observatum dignum esse censeo, sc:, quod cutis in hac ingenti tumorum excrefcentia, tenuior facta aliquid visui offert, quod in cute sana.

sana non tam accurate occurrit : Imò cutis de sua integritate & compositione aliquid in via amittit, quod cutis incrementum insequi non potest. Id quod jam sese videndum luculenter exhibet, sunt papillæ cutaneæ, extra cutem nonnihil protuberantes : Vid. Tab. xvii. Fig. 4. ut & Fig. 5. Lit. C. ubi ordine naturali dispositæ: illud autem, quod in excrescendo amittit cutis, sunt eadem papillæ cutaneæ, quæ circa basin tumorum non in apice videri possunt. Plura ob cœli serenitatem non addam, illa enim me invitat, ut hisce diebus æri incidi curem, quæ in stomachi structura, ab aliis nondum sunt detecta. Præterea multum molestiæ mihi creavêre hisce diebus, quæ in oculo adhuc sunt ostendenda, puta vasa sanguinea per tunica humoris crySTALLINI disseminata, &c. hæc enim ThesauRO secundo inferere mihi in animo est. Hisce Vale, Vir Celeberrime; & ut artem Anatomicam magis magisque nobiscum promoveas, ex animo optat, Celeberrimi Nominis tui

Cultor

FREDERICUS RUYSCHIUS.

Amstêlod.
10 Juny 1701.

TAB.

TABULÆ XVII. Expositio.

FIGURA I.

- A. Pars Brachii amputati cum manu, in qua pars supina videri potest.
B. Pollex.
C. Index.
D. Digitus Medius.
E. Annularis.
F. Minimus.
* Arteriolæ cutaneæ.

FIGURA II.

Digitum exhibet parte supina, cum suis papillis cutaneis, ordine debito sitis.

FIGURA III.

Demonstrat digitum parte prona.

- A. Papillæ cutaneæ epidermide destitutæ, & confuso ordine compositæ.
B. Pori cutanei, situ, nullum ordinem servantes.
C. Papillæ cutaneæ naturali ordine sitæ.

Circa has Papillas considerandum, sc. eas epidermide artificiosè destitutas, extra cutem nonnihil prominere.

TABULÆ XVIII. Explanatio.


FIGURA I.


Demonstrat partem Brachii suprasitati cum annexa manu, parte supina.

- A. Pollex.
B. Digitus medius.
C. Index.
D. Tumor maximus.
E. Ulcus.
* Arteriolæ cutaneæ.

FIGURA II.

Repræsentat Tumoris maximi portionem abscissam, ut constitutio intrinsecæ compareat, quæ partim cartilaginea, partim cartilaginosa substantiæ amula, cellulosa, & mucaginosa.









n: 439

3

DE MORTE
CAVSSA PARTVS
MEDICA QVIDEM
DISPVATIO

SED FORENSIBVS NEGOTIIS
tractandis necessaria.

Auctore
MARSILIO CAGNATO.



ROMÆ, Apud Aloysium Zannettum. MDCII.

Superiorum Permissu.

THE
MUSEUM
OF
THE
CITY OF
LONDON
1787

THE
MUSEUM
OF
THE
CITY OF
LONDON

BRITISH MUSEUM
SALE DUPLICATE
I 7 8 7

THE
MUSEUM
OF
THE
CITY OF
LONDON


THE
MUSEUM
OF
THE
CITY OF
LONDON

DE MORTE CAVSSA

PARTVS DISPVTATIO

AVCTORE

MARSILIO CAGNATO



N contractibus societatum ab officio no-
men habentium (quod est tam frequens,
quam Vrbi Romæ, & Romanæ curiæ
peculiare) si vita mulieris alicuius no-
minata sit, illius periculo, qui pecuniam
commodat, ea solet exceptio apponi; dum neq; ex partu,
neque caussa partus moriatur; eaq; de caussa sæpe Me-
dici requiruntur, qui cognoscant, & iudicent, *Utrum*
mulier ex huiusmodi caussa interierit. Itaque non erit
minus vtile, quam iucundum inuestigare, & definire,
quæ nam mulieres dici debeant ex partu, & caussa par-
tus decedere. Et quia magna est partus, & gravidita-
tis coniunctio, atque cognatio, & solet in eisdem con-
tractibus exceptio graviditatis adhiberi, & par vtrius-
que ratio videtur esse, de graviditate quoq; differetur.

Videtur autem in primis statuendum,

Utrum partus & graviditas censenda sit res natu-
ralis, an præter naturam, namque, hoc ignorato, non

Grauiditas
videtur mor-
bus.

potest vere, ac firme id, quod proponitur, definiri.

Quæ igitur mulieres vterum gestant, neque non eæ, quæ pariunt, vel peperere, tot affliguntur laboribus, tãque grauiã patiuntur, vt videri possit vtraque res præter naturam. Sane constat, grauidis casus eiusmodi euenire, cuiusmodi passim exercere solent agrotos, horrores scilicet, fastidia, absurdarum rerum appetitionem, vomitiones, doloresque varios, & febres ipsas: quæ, symptomata à Grecis dicta, morbum vt umbra corpora (trita ex Gal. similitudine lib. de symptomat. differ. c. 1.) comitantur. quamobrem grauiditas morbus quidam videri potest, à quo sæpe mulieres interficiuntur.

Partus vide-
tur morbus.

Sed & partum sæpe casus sequuntur grauissimi, & mors ipsa alias dum pariunt, in ipso scilicet partus articulo, alias simulatque peperere, alias serius. solent autem puerperis accidere purgationes immodicæ, vel nullæ, vel non pro naturæ modo, item febres, dolores ad vterum, ad lumbos, ad corpus vniuersum, vlcera, & apostemata, (vt à medicis dici solent) quæ sequitur animi defectio, & nonnumquam interitus. Nec defuerunt, qui diserte, & palam docuerint partum esse morbum, vt Aponensis Conciliatoris diff. 106. ex Auicenna vi. 3. tr. 1. c. 2. quoniam est cuiusdam articuli magna, & singularis disiunctio. itaque & in ægris puerperis decretorios dies nonnulli dicebant observandos in ita ratione à die ipso partus, non à die febris, statuentes febrẽ illam esse partus veluti symptoma. Hipp. autem, tã grauiditatem, quam partum, docuit, statis dierum periodis

dis perinde atq; morbos iudicari. Sed novi etiā quosdā Iu-
risconsultos existimasse pregnantem mulierē agrā esse.

Verum è contrario graviditatem, & partum res es-
se naturales, & naturæ consilio congruenteis, debet ea-
rundem finem considerantibus persuasum esse; nam pro-
creatio est opus maxime naturale, quod & satis est per
se manifestum, & est ab Arist. traditum lib. 2. de ani-
ma loco vulgatissimo, quamobrem tum graviditas, tum
partus est maxime secundum naturam, nec per se um-
quam est præter naturam, sed ita solum, si quid, quod
naturæ aduersetur, ei adiungitur, ut febris, dolor, vlcus
& similia, qui vel morbi sunt, vel casus morborum co-
mites; at graviditas & partus morbi non sunt, cumq;
auctores, cuiusmodi Aponensis diff. 106. & reliqui,
quos enumerare superuacaneum sit, recipiant, partum
alterum esse, alterum non esse naturalem, eo demon-
strant, partum sua natura morbum non esse, cum enim
alter sit naturalis, non potest esse morbus, nam res est
morbus, omnium confessione, præter naturam.

Graviditas
& partus nō
sunt morbi,
sed res na-
turales, &
per se num-
quam præ-
ter naturā.

Nec probatur, esse partum, & graviditatem mor-
bos, argumento ab ijs casibus sumpto, qui gravidita-
tem, partumque sequuntur: nam fastidia, horrores,
vomitus, & reliqua ante memorata, etsi possunt di-
ci symptomata, ut nomen hoc symptoma omnem affe-
ctum significat, (quod & ipsum notum est, ex lib. de
symptom. differ. c. 1. apud Galenum) non tamen est gra-
viditas morbus, nisi translate velimus dicere, morbum
esse naturalem, ut de senio dicebat Arist. lib. 5. de gen.

Symptoma-
ta, gravidita-
tē, & par-
tum comi-
tantia, ut ac-
cipienda.

Graviditas
translate di-
ci potest
morbus.

*animal. c. 4. sed quemadmodum victum, & discipli-
 nas cum labore adipiscimur, quarum tamen consequen-
 darum principia nobis à natura tradita sunt (ne quis
 omnem existimet laborem esse præter naturam; nisi igna-
 nus homo sibi persuadeat, & vitam, & valetudinem,
 & virtutes ab hominis natura alienas, quo nihil ma-
 gis absonum dici, cogitariue potest) ita natura compa-
 ratum est, ut animalium præstantissimum, magno pa-
 rentis labore gestetur utero, & maximis doloribus eda-
 tur in lucem, atq; adeo summum gaudium ex sobole no-
 bilissima singulari laboris, & doloris genere compense-
 tur; hoc, inquam, naturà comparatum est, eoque effici-
 tur, graviditatem, & partum res esse naturales. Quod
 si tandem illa, quæ prægnantes, & puerperæ patiuntur,
 statuamus proprie dici symptomata, non idcirco tamen
 graviditatem dicemus, aut partum esse morbum, sed
 prægnantibus, aut puerperis vere morbum aliquem
 adesse, quem dicta symptomata sequantur, ipsam ve-
 ro graviditatem, atque partum inter causas potius,
 referri oportere, ut paullo post explicabitur. Etenim,
 concepto semine, tamquam re aliena, virtus naturalis
 mulierum præsertim, quæ nondum huic sunt labori ad-
 suetæ, novitate quasi deterrita, suo languidius munere
 fungitur, calore scilicet ventris insito nonnihil fracto,
 & remisso, quæ frigida intemperies quædam est, quam
 sequitur vitiosa concoctio alimenti, quamobrem citan-
 tur vomitus, fastidia, rerum alienarum appetitio, &
 reliqua, quæ dicta sunt, & symptomata vocabantur.*

*Grauiditas,
 & partus
 possunt dici
 causæ mor-
 borum.*

Nec

Nec mouet etiam Iurisprudentum opinio, quoniam è contrario alij non minus probati eiusdem auctores prudentie negarunt grauiditatem esse morbum, immo rem esse naturalem (ut ante dixi) acceperunt, & omnino constituerunt. Itaque non est præter naturam conceptus & grauiditas, sed morbi ab ea exorti, & symptomata, quæ illos comitantur: quæ sæpenumero tam leuia sunt, ut omnino negligantur, & eo solum æstimentur, quo sunt conceptus, & grauiditatis indices, eaq; simpliciter grauiditas naturalis vocatur. aliquando vero tam graua sunt, ut fœtus corrumpatur, & mulier periclitetur, ac nonnumquam moriatur. eaque dici potest grauiditas præter naturam. quibus similia est de partu accipere: non est enim partus morbus: Verum qui casus partum sequuntur, alij verius morbi sunt, alij vero symptomata, quæ morbos sequuntur à partu, tamquam à causa, profectos, nam febres, Ulcera, inflammationes, quæ à partu relinquuntur, morbi proprie sunt, purgamenta vero vel nimia, vel iusto pauciora, aut nulla, dolores, animi defectiones, tamquam symptomata, morbos modo dictos sequuntur. Nec mouet idem Aponensis, cum Auicennam interpretatur, de partu, quasi de morbo, locutum: quoniam dixit, fieri quandam maximam articuli disunctionem; nam licet primo animaduvertere, & declarare, cuiusnam articuli disunctio illa sit, deinde morbus sit, an non. Os igitur uteri insigniter aperiri, hoc est quidem necessarium, & à Galeno cum admiratione traditum lib. xv. c. 7. de usu partium,

Grauiditas aliqua præter naturā.

Symptomata partū sequentia.

Aponensis opinio.

Cuius articuli disunctio in partu fiat.

„ tium , cum inquit , Quod os quidem eo usque aperi-
 „ tur, vt possit fetibus facilem prebere exitum, nemo igno-
 „ rat, sed quo pacto id accidat, mirari possumus, intelli-
 „ gere non possumus. at natura tum hæc, tum alia omnia
 „ in partu animalis admiranda machinatur commenta,
 „ etenim diligenter prouidit, quo pacto foetus, qua conue-
 „ niebat figura, ad collum matricis perueniret, nec minus,
 „ quo pacto, dum ipsum peruaderet, nullam partem sau-
 „ ciaret, neue colon luxaret. Os ergo vteri maxime in
 „ partu pandi necessarium est. quod pari cum admiratio-
 „ ne Auicenna loco eodem repetijt, inquiens, Aperitur ma-
 „ trix apertione tali, cuius similem non valeat efficere in
 „ alia hora. Verum adiecit alterum, cuius mentionem
 „ Galenus non fecit, scilicet, Et necessarium est, vt sepa-
 „ rentur quædam iuncturæ, & sustententur adiutorio
 „ Dei excelsi preparante, vel disponente eas ad illud, dein-
 „ de reuertente eas ex proximo ad continuationem natu-
 „ ralem. vult hic Auicenna, præter vteri apertionem, fie-
 „ ri cuiusdã articuli disiunctionem, & continuitatem in-
 „ tercipi, quem articulum non nominauit, sed iactatur
 „ vulgo, pubis ossa disijungi: hoc tamen, vt sensus testi-
 „ monio caret, ita est à naturæ consilio alienum, quæ tan-
 „ tam adhibuit diligentiam ad coniungendum ossa Ilij in-
 „ teruentu cartilaginis in parte antica, vt hoc solo in-
 „ telligamus, nullam debuisse fieri eiusmodi ossium disiun-
 „ ctionem. contra vero in parte postica eadem Ilij ossa, qua
 „ parte propinquissima sunt, infima scilicet, minime con-
 „ iunguntur, & in feminis quoque (quod Vesalius di-
 „ serce

serte scripsit lib. 1. de hum. corp. fabrica cap. 29.) magis, quam in viris disiunguntur. quo licet intelligere, si qua fiat ossium de sua Sede demotio, in postica fieri parte, Ilij ossibus ad exteriora modice repulsis: itaque & summum parientium dolorem in parte postica circa eadem Ilij, siue coxendicis ossa percipi. testaturq; Ambrosius Paræus lib. 23. cap. 13. se pubis ossa, dissectis à partu statim puerperis, numquam distracta reperisse, Ilij quidem ossa ab osse sacro digiti intervallo diuulsa: & se se interdum difficulter parientibus adstantem auribus sonum diuulsionis, & manu ossium distractionem percepisse. itaque articulorum hæ fuerunt disiunctiones ab Auicenna indicatæ, qui non temere plurium numero dixit, quædam iuncturæ, quia ut Ilij duo sunt ossa inter quæ sacrum os intercedit: ita duos necesse est articulos esse. Sed & Gentilis Auicennæ interpres, & Gabriel Zerbus scribens de partu naturali, hoc de femoris osse, idest, coxendicis, siue Ilij, non de osse pubis, accepit, & probati anatomes auctores hanc omnes sententiam subscribunt. Qualis autem cumque sit ea disiunctio, morbus certe non est: quod nec Auicenna dixit, nec ratione probari potest: Sed è contrario, rem esse naturalem (est autem morbus præter naturam) eo accipimus, quod sponte, ac momento tollitur, nec opem medicam postulat: neque enim Galenus vocat morbum, nisi tempus aliquod affectus permaneat, trito, & peruulgato documento ex lib. de diff. sympt. c. 1. & in verbis ante repetitis ex lib. 15. de usu part. c. 7. satis hoc demonstrauit, cum

naturæ Studium exposuit ad fetus egressum ex vtero, & illarum partium tutelam, per quas egreditur. quo percipitur, partum esse functionem prorsus naturalem. ut omittam interim, mulieres esse non paucas, quæ partus laborem floccifaciunt, eumque se facilius ferre asseuerant, quam cum semel panem conficiendo, aut vestium sordes abluendo laborant. Quodque à nonnullis dicitur, a die partus, tamquam morbi, ineundam dierum, quos vocant decretorios, rationem in affectibus, qui partum sequuntur, hoc ab Hippocratis sententia alienum esse, ostendi in propria de ea re disputatione, ipse enim Hippocrates à die morbi per se, a die partus ex accidenti, supputabat.

Quod vero idem doceat statis dierum periodis morborum instar graviditatem, & partum iudicari; hoc non magis probat, hos morbos esse, quam si fructuum exortum, & maturitatem dicerem morbos esse, & omnium rerum exortum, & perfectionem item esse morbum, si quidem omnia hæc suas habens periodos, ut morbi suas. Auctor est Aristoteles lib. 2. de ortu, & interitu, inquit, omnium est ordo, & omne tempus, & vita mensuratur periodo. Vanum ergo est, si dico, morbum esse quicquid periodo mensuratur. nec Hippocrates voluit significare, partum esse morbum, sed illam periodorum rationem, quam in partu docuerat, morborum similitudine confirmare. Itaque nec graviditas, nec partus morbus est, sed res vtrique per se naturalis est.

Dies decretorij supputandi à die partus per accidens, non per se.

Tria nos rerum genera immutant.

Verum scire expedit, tria esse rerum genera, à quibus

bus permutamur, quorum primum est, in quo, ut uiuamus, necessario versamur quidem, ab eo tamen non ledimur necessario, sed plerumq; iuuamur, ea vero sunt, de quibus Galenus libro art. med. c. 8 s. aer, alimentum, excrementum, somnus cum vigilia, labor cum quiete, animi affectus; alterum vero est, in quo non versamur necessario, sed à quo necessario, cum nobis occurrit, ledimur, ut venenum, verbera, & quæ sunt huiusmodi; tertium est, cui conuenit cum secundo, quoniam in eo non versamur necessario, ut uiuamus, & cum primo, quoniam ab eo, non ledimur necessario, sed pro eius modo alias salutare, alias noxium est. Hæc ipsa est, Venus, à qua non longe abest grauiditas, & partus, sed Veneris commoda & incommoda sunt à nobis explicata libro de Continentia. grauiditatem quoque & partum (etsi labores magni sunt) si pro naturæ fiant modo, salutares esse, cum docemur illarum experimento mulierum, quæ dum liberis operam nauant, melius valent, viduæ vero, & continentes frequenter egrotant: tum suadet grauissimorum auctoritas scriptorum; nam Hippocrates lib. de Virginib. inquit. Ego vero has iubeo, quæ hæc patiuntur, cum viris quam citissime habitare; si enim conceperint sanæ fiunt. quibus illi similis accedit ratio, qua Socrates mortem naturalem docebat esse iucundam, quoniam naturæ lege quadam iucunditas ijs rebus adiungitur, quæ secundum naturam fiunt: sic igitur quæ secundum naturam fiunt, ea salubria quoque esse, censemus. Ergo tum grauiditas, tum partus

Grauiditas,
& partus salutare sunt.

si secundum naturam fiat, salutaris existimandus. Itaque nec moritur mulier vel grauida, vel puerpera si secundum naturam hæc eueniant.

Grauida,
& puerpera
quãdo mori-
atur.

Moriuntur cum alienum quid & præter naturam, & illud graue, contingit: quamobrem tum grauiditas, tum partus dicitur fieri præter naturam.

Origo rerũ
præter natu-
rã in graui-
dis & puer-
peris, inter-
ua.

*Quæ vero aliena contingunt grauidis, alia internam alia externam originem habent: interna est origo, si ob-
hiatum vteri menses grauidis singulis mensibus pro-
deant, si acetabula sint plena pituita, si acris pituita
in ventrem à capite delabatur, & alui fluorem excitet,
si lumborum & ventris dolores oriantur, si biliosa sit,
& inde febres fiant, & regio morbo afficiatur, si repen-
te mammae gracilescant, & lac non appareat, si pitui-
tosa sit, & caput idcirco doleat, febriat, & corpus co-
lore plumbeo perfundatur, si lienosa sit, si vteri flatuosi,
densi, magni, parui, & quacumque ratione ad abor-
tum faciendum proni. Extrinsecus vero nascuntur si-
miles affectus, si mulier onus leuauerit, si percussa fue-
rit, si saltauerit, si abundantius, aut parcius alimen-
ta, potusque acceperit, si timore, & consternatione
correptã fuerit, si vociferata sit, & alias intemperan-
ter vixerit, si quoque præter consuetudinem, acria,
amaraue comederit, aut biberit: nam ex omnibus com-
memoratis fœtus corrumpuntur, & mulieres in peri-
culo versantur. Quod & magistra experientia inno-
tuit, & ab Hippocrate proditum est libro primo de mor-
bis muliebribus.*

Origo ex-
trinsecus re-
rum externa.

Non solum autem ab his fœtus corrumpuntur, & ipsæ prægnantes intereunt, sed nonnumquam eadem hæc ad tempus partus perducuntur, ipsumq; partum difficilem reddunt, quem tamen peculiariter aliæ graues excipiunt affectiones, à quibus & mulieres pereunt: si videlicet purgatio non fiat debita, vel fiat immodica, si secunda non egrediatur. Purgatio vero non fit, quia solent vteri à partu inflammari, & durescere: quapropter occluduntur, & idcirco alias putrefactis purgamentis vlcera in vtero nascuntur, alias venter intumescit, & lien, & crura, & dolores fiunt ad lumbos, & viscera, et ad omnem corporis partem, fiunt quoque rigores, & febres, & deliria, & surditas, & cecitas, & sanguinis vomitus.

Purgatio muliebris cur non fiat

Fiunt vero immodicæ purgationes ore vteri ob violentum fœtus egressum amplificato, & venis quibusdam ruptis, & ea propter etiam febres, rigores, horrores, cibi fastidia, macies, imbecillitas, pallor, tumor. Si secunda intus relicta sit, febres, & dolores fiunt magni, & alias purgamenta fiunt parcius, alias abundantius, quam par est, venter augetur, & durescit, febres & rigores fiunt.

Purgationes immodicæ.

Quæ vero de partu dicta sunt, de abortu quoque dicta putabis, qui nihil aliud esse à multis creditur, quam partus intempestiuus: & ex abortu non secus atque ex partu graua patiuntur, & in simili discrimine versantur: si quidem tum grauidæ, tum puerperæ, & abortum facientes ex dictis incommodis non paucæ moriuntur.

Abortus eadem & partus ratio.

Aliæ tamen citius, aliæ serius pro corporis, & affectione-

Etionis ratione, vt inquit Hippocrates lib. 1. de morb. muliebr. n. 53. & pregnantem biliosam, & agram speciatim dixit lib. eiusdem num. 42. vno & triginta diebus plerumque interire. & n. 44. puerperam pituitosam dixit mori diebus quinque, & quadraginta, deq; alia, cui purgatio non facile procedit lib. eiusd. n. 52. & 53. dicebat, non excedere vnam & vigesimam diem.

Periculū in
teritus ex
partu quam
diu manet.
Purgatio-
nis à partu
tempus.

Periculum scilicet interitus ex partu tamdiu manet, quamdiu purgatio à partu naturaliter procedit, & diutius, si quid præter naturam contingat. Naturaliter autem Hippocrate auctore libro de natura pueri n. 10. & lib. 1. de morb. muliebr. n. 89. Si fœtus fœmina sit purgatio diebus sit duobus, & quadraginta, licet fieri possit citra periculum diebus viginti quinque, si vero masculus sit diebus triginta, licet viginti quoque citra periculum fieri possit; quamquam longius etiam huic purgationi spacium Moses tribuisse legatur, nam edito mare dies tres & triginta, edita femina duplum, scilicet sex & sexaginta constituit Levitici c. 12. quod vero Hippocrates docuit illud est, quod est proditam ab Auicenna 21. 3. tr. 2. c. 33. quodque veluti compendium est eorum, quæ de partu ab Hippocrate tradita sunt, de quibus ante dictum est. Partus, inquit, Auicenna non extenditur in masculis ultra triginta, & in feminis ultra quadraginta dies, & plus parum. & accidunt fœtis ægri tudines plurimæ, sicut fluxus, & retentio sanguinis, quare perducit fluxus sanguinis ad casum virtutis, & perducit retentio menstruorum ad febres

Auicennæ
locus per
penditur.

febres prauas, & apostemata, & multoties accidit,,
 exitura in partu difficili: & quandoque accidit eis in,,
 flatio ventris, & fortasse moriuntur, & sanguis qui,,
 dem partus vehementioris est nigredinis, quam san-,,
 guis menstruorum, & quoniam est retentionis longioris,,
 spacij. Hæc Auicenna, cuius sententiam nec Aponen. diff. Aponen. &
 dicta 108. nec Iacobus de partibus recte accepit; pu- Iacobus de
 tant enim, sermonem hunc esse de tempore partum præ- partibus no-
 gresso, in quo paritura percipit aliquas affectiones, quæ tantur.
 sint futuri partus indices: sed ea vana est interpretatio,
 quam nec rationibus, nec auctoritatibus probarunt. Ve-
 rum loquitur Auicenna de tempore, quod sequitur par-
 tum, & posterior Interpres pro eo, quod vetus interpre-
 ratio habet, Partus non extenditur, habet, enixatio,
 siue enixe tempus non extenditur &c. & est tem-
 pus puerperæ purgationi destinatum, de quo modo ex
 Hippocrate loquebamur. & cum dixit ultra quadra-
 ginta dies, subiunxit ea, & plus parum, ob duos dies,
 quos Hippocrates ultra quadraginta memorauit, in
 quo interpretes Auicenna cecutuisse, iam constat. Il-
 lud recte Aponensis loco antedicto scripsit, Tempus au-
 tem purgationis femellæ quadraginta ponitur diebus,,
 de generatione embrionis &c. scilicet hic est locus Hip-,,
 pocrat. in libro de natura pueri, de quo ante dictum est.

Quod vero adiecit Aponen. ex Leuitico, Mosen ve-
 tuisse, puerperas tamquam immundas ingredi in San-
 ctuarium, nisi post diem octogesimum in partu femina,
 & post quadagesimum in masculo, hoc videtur qua-
 dam

Locus Mo-
 sis.

dam egerē correctione, nam Levitici c. 12. fit mentio in partu masculino dierum triginta trium, & feminino dierum sexaginta sex, & licet fiat mentio dierum septem purgationis in maribus, & quatuordecim in feminis ex quibus cum triginta fiunt quadraginta, & cum sexaginta sex fiunt octoginta, tamen non constat, Mosē voluisse, dictos septem in mare seorsim accipiendos à triginta tribus, & quatuordecim in femina similiter seorsim accipiendos à sexaginta sex, ut ex his fiant octoginta, ex illis autem fiant quadraginta, hoc inquam non constat: cum septem possint cum ipsis triginta tribus tāquā pars quēdā totius eius numeri, & quatuordecim cum sexaginta sex similiter connumerari, Sed hoc obiter.

Iucertum tē
pus morien
di ex partu.

Purgatio sane à partu in maribus est dierum triginta, & in feminis duorum & quadraginta, quod in utroq; tempus est longissimum. hocq; de partu naturali accipiendum est. alias ubi aliquid partui contingit præter naturam, ut potest purgatio ante debitum tempus cessare, ita potest ulterius produci, atque adeo incertum est tempus ex partu moriendi, nam potest mulier in partu tam maris, quam femina intra vigesimum diem à partu interire, ut dictum est lib. 1. epid. sect. 3. de Philini vxore, quæ in ipsa vicesima mortua est, & de vxore Dromeadis, quæ sexta die interiit, & lib. 3. sect. 2. de ea, quæ decumbebat in Mendacium foro, quæ periit die decima quarta. potest quoq; puerperæ egritudo extendi ultra dies dictos triginta in maribus, & quadraginta in feminis: etenim idem Hippocrates lib.

1. Epidem. sect. 3. agrum 5. Epicratis uxorem, cum po-
 stridie à partu febre correpta esset, dicit, perfecte indi-
 catam, hoc est liberatam die octogesima, & lib. 3. sect.
 3. aic in Thaso decumbentem apud frigidam, cum à par-
 tu purgatio facta non esset, & febris acuta corripuis-
 set, mortuam die octogesima (utraque femellam pepe-
 rerat) itaque ægritudinem ex partu perductam docuit
 ad diem usq; octogesimum. Sed non est hic status, & im-
 mutabilis in huiusmodi ægritudinibus temporis termi-
 nus, nam potest multo longior fieri progressio pro ægri-
 tudinis natura: neque enim à partu morbi fiunt dum-
 taxat acuti, sed fiunt multi quoque diuturni, qui ad
 multos menses producuntur; quamobrem intelligimus
 terminum dierum triginta, vel quadraginta, non esse,
 ultra quem ex partus causa mulier non moriatur, sed Tépus, quo
 morbus na-
 scitur ex
 partu.
 ultra quem morbus non fiat, qui sit partui imputandus.
 nam causa partus dumtaxat oriri morbum existima-
 mus, cum intra tempus oritur, quo purgationes à par-
 tu prodire solent, ut dictum est, habita marium & fe-
 minarum ratione. intra id vero tempus quacumque die
 mulier ægrotarit, partus causa, vel occasione incidisse
 in ægritudinem dicenda est, (etsi constaret causam aliam
 quamcumque ad partum accessisse) Hippocrates enim
 aliquando scripsit, ipso die partus ortam esse ægritudi-
 nem ut lib. 3. Epid. sect. 2. agro 12. ut etiam die abor-
 tus dixerat in agro 10. aliquando vero postridie à par-
 tu, ut lib. 1. Epidem. agro 5. & 11. aliquando tertio
 die, ut in eodem 3. Epidem. sect. 3. agro 2. aliquan-
 do

Hippocrat.
partū, abor-
tum, & gra-
uiditatem,
tāquā caus-
sas morbo-
rum quas-
dam recen-
ser.

do die quartodecimo, ut lib. 1. Epidem. sect. 3. agro 4.
Nec dubitandum eas mulieres partus causa, vel
occasione egritudine correptas quoniam Hippocrates
non alia de causa partum memoravit, quam ut caus-
sam indicaret egritudinis, ut cum abortum memorat
lib. eod. 3. sect. 2. agro 10. & 11. & graviditatem ut
lib. 1. sect. 3. agro 13. Sic enim solet, causas egritudi-
num afferre, ut patet ex alijs narrationibus, ac præ-
sertim in mulieribus, quæ vel citra partum, & abor-
tum, & citra graviditatem egrotarunt. sic enim ad fi-
nem lib. 1. Epid. in Melidia paucitatem mensium accu-
savit, & in 3. lib. sect. 3. in Thaso mulierem dixit ex
mærore cum occasione egrotasse, & ex simili causa Dea-
cis uxorem, & in 7. lib. Cleomenis uxorem ex lassitu-
dine, & Pausaniæ filiam ex fungi esu egrotasse narra-
vit. Sed & in alijs multis causas egritudinum recen-
suit, ut lassitudinem, potationem, exercitationem in-
tempestivam, calefactionem, victum prauum, cursum,
venereum, quibus manifestum fit, abortum quoque par-
tum, & graviditatem, tamquam causas egritudinum
narratas esse. Nec dubitandum quia non dixerit ex gra-
uiditate, vel abortu, aut partu morbos exortos, ut di-
xit, ex lassitudine, ex potatione, & similia, nam satis
superque notum existimabat, hasce causas esse morbo-
rum: immo cum in hisce narrationibus memorato par-
tu, aut abortu, aut graviditate causam aliam num-
quam exposuerit, eo indicavit, his se causis acquie-
uisse.

Itaque

Quæ dicantur partus causa interire.

Itaque concludendum est, non solum eas, quæ moriuntur in ipso partus articulo, partus causa interire, sed illas etiam, quæ post partum moriuntur etiam post diem tricesimum, & quadragesimum, dum morbus oriatur ante diem tricesimum, si masculus ortus est, vel ante diem quadragesimum, si nata femina est.

Non tempus mortis, sed ægritudinis principium observandum.

Neque mortis tempus est observandum, & æstimandum, sed ægritudinis principium, cum enim (ut ante dixi) morborum alij breves, alij diuturni sint, omne genus occasione partus nasci potest; cumq; in utroque genere letales morbi sint, & idcirco partus occasione diuturnus, idemque letalis morbus nasci possit, ergo potest mulier occasione partus diu ægrotare, & perire post dies, non solum quadraginta & octoginta, verum etiam post plures menses. Sed ut intelligatur partus causa perierit necne, initium est ægritudinis observandum, & his non est dissimilis ratio abortus. itaque Hippocrates lib. 1. de morb. mul. inquit, Transmutationes, & fines eosdem morbus habet, siue ex fætus corruptione, siue ex partu uteri ulcerati fuerint. De graviditate minus dubitari potest, nam tempus eius statutum est, nec potest mulier effugere, quin pariat, vel abortum faciat, nisi pereat ante partum, vel abortum. atque tunc non est obscurum perierit necne in graviditate.

Abortus similis partui

Ægritudo quænis superueniente in gravidis imputanda graviditati.

Quæres fortasse, utrum quænis ægritudo superueniens mulieri uterum gestanti; quamobrem mulier ea moriatur; imputanda sit graviditati. cui quæstioni ex Hippocratis auctoritate respondendum est, qui Apho-

„ rism. lib. 5. aph. 30. inquit, Mulierem utero geren-
 „ tem morbo corripit acuto, letale. At nonne morbus om-
 nis acutus letalis est? hoc sane Hipp. docuit lib. 1. acut.
 t. 8. cur ergo notat in gravida letalem esse morbum acu-
 tum? sane superflua videtur admonitio, nisi indica-
 re voluit, graviditatem gravius periculum efficere,
 quamobrem, quæ alias potuisset evadere, eo nomine quod
 gravida est, perniciosore morbo correpta, in graviore
 discrimine versetur, quamobrem mortem graviditati
 imputandam Hippocrates voluit. Utque non refert,
 morbum eundem acutum, posse extra graviditatem in-
 terficere; etenim vult nihilominus Hippocrates gravi-
 ditatem causam esse; ita non refert, utero gerentem
 incidere in morbum, non quia prægna sit, sed ex alia
 causa manifesta, ut ex saltatione, ex intemperantia,
 & alijs quibuscumque, nam ostensum est, nullam mu-
 lierem ex graviditate, quæ secundum naturam est, pe-
 rire, sed accedente casu aliquo præter naturam, à caus-
 sa interna, vel externa, quapropter cum mulier gra-
 uida, morbo correpta ex quacumque causa, periclitatur,
 graviditati periculum & mors (si sequatur) imputan-
 da est. & graviditatis exceptioni locus dandus.

Vtrum moriri
 morbus ex
 graviditate
 possit intra
 diem 23. &
 concepisse
 muliere di-
 cto tempo-
 re cognosci.

Sed fuit olim proposita questio, utrum diem intra vi-
 gesimum à primo concubitu mulier incidere in morbum
 possit, qui sit graviditati imputandus: quamobrem, si
 vel intra hos dies moriatur, locum habeat exceptio di-
 cta, quia prægna defuncta sit. Inde autem oritur du-
 bitatio, quod nec tam paucis diebus intelligi possit, mu-
 lierem

lierem concepisse, & utero gerere, nec Galenus visus
 sit voluisse, morbos ex graviditate intra dictos dies ori-
 ri, cum cittam vocatam, pregnantibus familiarem,
 docuerit, non nisi secundo, aut tertio mense fieri lib. I.
 de sympt. caus. c. 7. Verum, intra tempus propositum,
 & fieri morbos, & graviditatem dignosci nihil est, quod
 prohibeat, & debeat dissuadere. Morbis orituris tem- Morborum
ortui nullū
tempus præ-
finitum.
 pus nullum præfinitum est, & quocumque tempore mor-
 borum cause præsto sint, morbi nascuntur, si corpus ad
 egrotandum paratum sit. Si ergo graviditas (ut ante
 dictum est) morborum, pro corporis constitutione, caus-
 sa est, poterit mulier gravida quandocumque morbum
 concipere. Quod si Galenum putes docuisse, primo men-
 se graviditatis Cittam non fieri: tamen non est aliarum
 par ægritudinum ratio. Sed nec Cittam Galenus ne- Cittam fieri
primo etiā
mense.
 gavit primo mense fieri. quinimmo, posse fieri, ex eius-
 dem verbis accipimus, nam loco dicto inquit, Sic affi-
 ciuntur pleræque vsque ad secundum, & tertium men-
 sem, in quarto vero desinunt. quæ verba clare signifi-
 cant terminum, ultra quem Citta non fiat, sed non
 unde incipiat. relinquunt tamen, ut intelligamus pos-
 se oriri primo mense, & ad quartum perducere, legitur
 enim ἀρχὴ τῆς δυνάμεως, καὶ τέλος μηνός, at præpositio ἀρχὴ signi-
 ficat terminum ad quem, non à quo (ut dici solet) cu-
 ius termini, à quo, Galenus mentionem non fecit, ut
 rei notæ, & receptæ: namque cum primum mulier conce-
 pit, eo potest morbo aliquo corripitur, nec minus Citta. cum-
 que hic Galenus subiungat, se locutum de tempore, quo
 fetus

fetus conceptus dicitur græce *ἐμβρυον*, non autem *ἐμβρυον*, nostram interpretationem confirmat, nam Aristoteles lib. 7. de hist. animal. c. 3. docuit, *ἐμβρυον* dici fetum dierum quadraginta, *ἐμβρυον* vero tum hunc, tum iuniorum. ergo non excluditur primus mensis, sed potest illo mulier tum alias, tum Citta egrotare. Quod potest quoque sumi ex Galeni eiusdem ad s. aph. 61. Ubi ait, fastidia nasci in gravidis eadem, qua pica ratione: sed fastidia oriuntur primis diebus ergo, & citta potest, quia ab eisdem causis oritur. Sed accedat Aristotelis testimonium ex eiusd. lib. 7. de hist. an. c. 4. diserte tradentis, gravidis mulieribus accidere corporis totius gravitatem, oculorum caliginem, capitis dolores, his quidem die decimo, his autem tardius, ut magis, minusve à materia superuacanea tentantur. Sed, hoc, demum, Hippocratis fuisse consilium, licet inde accipere, quod morbos pregnantium plerumque describit absque temporis definitione, & quamvis multi sint, qui non nisi fetu adulto fieri possunt, tamen non desunt, qui fieri omni tempore possunt.

Conceptum
primis die-
bus cogno-
sci posse.

Quod vero cognosci possit intra diem vicesimum tertium, mulierem concepisse, & utero gerere, non est difficile ex veterum documentis cognoscere, Hipp. primum s. aph. 62. inquit, Si mulieri cessent purgationes, neque febris, neque rigor superveniat, & fastidia incidunt, iudica ipsam in ventre habere. Cum autem hæc dixerit, potest sepe contingere, ut mulier concipiat, cui menses, cum paucis ab ipso conceptu diebus accedere debuisse,

buissent, non accesserint. itaque accedentibus ad men-
 sium defectum fastidijs, intelligitur in utero habere,
 licet intra diem à conceptu vicesimum. quibus addi quo-
 que potest, experimentum aquæ mulsæ, de quo s. aph.
 41. & lib. de sterilib. insuper Hipp. monuit lib. de ge-
 nitura, & de sterilibus, & Arist. lib. 1. de hist. an. c. 3.
 observandum, utrum, cum vir semen emisserit, sicca
 vulva remaneat: in qua re observanda licet Hippocrates
 desideret mulierem partus peritam, tamen declaravit
 & partus expertem posse hoc idem cognoscere: ait enim,
 hoc ab alijs mulieribus percipi posse, ut fecit cantrix il-
 la, de qua idem Hipp. lib. de natura pueri. demum graui-
 tas corporis, oculorum caligo, capitis dolores dicti su-
 perius ex Arist. docent posse conceptum primis ipsis de-
 cem diebus cognosci, nedum ante vicesimum tertium, ut
 proponitur. Sed ex dictis apparet, posse intra idem tem-
 pus mulierem egrotare, & interire: modo simus me-
 mores, graviditatem non esse per se causam ægritudinum
 & mortis, sed ob adiunctos morbos, qui tamen in gra-
 uidis periculosiores sunt, ut ante dicebatur. Sumendum-
 que est, & inter conceptus diem, & morbi exortum, spa-
 tium, & tempus interponi, quo indicia conceptus appa-
 reant: quod intra decem primos dies fieri potest, ut di-
 ctum est: alias si concipiat simul & egrotet, minime iu-
 dicare hoc signo valemus, eam utero gerere.

Si queratur similiter de abortu, & de partu, scilicet
 utrum quævis ægritudo superveniens puerperæ intra
 dies triginta in fetu masculino, & quadraginta duos in
 femel-

Aegritudo
quæuis pu-
erperæ ad-
ueniens par-
tui impu-
tanda.

Examen hi-
storix li. 1.
Epid. sect.
3. Agro 4.

femella ; ex qua aegritudine moriatur ; sit partui impu-
tanda, necne: respondebo, partum prorsus accusandū: hoc
enim Hippocrates indicauit, cum in libris Epidemicis de
mulieribus, quæ à partu ægrotarunt, satis habuerit di-
cere, peperisse, nec magnam aliarum videatur caussa-
rum rationem habuisse. vti quoq; cum de grauidis ver-
ba fecit: nam lib. 1. Epidem. sect. 3. agro 4. Philini
dixit uxorem peperisse filiam, & purgatione facta ex
præsripto naturæ, cæterisq; recte habentibus, decimo &
quarto à partu die correptam igne (idest febre vt Gal.
interpretatur, ardentissima) cum rigore ; sed eius rei
nullam, præter partum, attulit causam, quam, si ade-
rat, & æstimabatur, prætermittere non debuisset: di-
xit quidem purgationem cessasse, sed ita vt videri pos-
sit, febrem ortam prius, purgationis vero suppressionem
secutam potius, vt symptoma, quam prægressam esse vt
causam. Licet enim Galenus interpretatus sit, huic mu-
lieri ex retenta à partu purgatione morbum & mortem
contigisses tamen hoc Hippocratis verba non significant:
quod ex duobus accipitur, primumque hoc est, dixit, fe-
brem aduenisse, cum esset purgata secundum naturam
& φύσιν καὶ δέξις ὡς φύσιν. Ergo non ex retenta pur-
gatione febris orta. Nec dicendum purgationis nomine
secundina vocatæ eiectionem acceptam: quia hæc inter-
pretatio non est alijs Hippocratis locis consentanea, in
quibus, agendo de mulieribus, reperitur hoc usus vo-
cabulo purgatio καὶ δέξις, pro sanguinis euacuatio-
ne; sic s. Aphorism. 61. si vtero gerenti purgationes
eant,

cant, καὶ δὲ γὰρ οὐκ ἔστιν ἡ καθαρμοὶ, & 62. si non cant purgationes.
 ἢ μὴ πορεύονται καὶ δὲ γὰρ οὐκ, quæ ad secundas referri non va-
 lent. Itaque hoc etiam loco purgationem intelligimus
 sanguinis à partu; quam necesse est perseverasse usque
 ad diem decimumquartum; quod aliquis acciperet ex
 ipsius τὴν διέκθινον καὶ δὲ γὰρ οὐκ ἔστιν ἡ καθαρμοὶ; quod præsentis est
 temporis participium, perinde atque dixisset, dum pur-
 gatio fieret, itaque ut servatum est tempus præsens in
 illis, leuiter agentem, καὶ οὕτως ἔλεγοντο, nam & hoc
 est præsentis temporis participium; sic in hoc ἡ καθαρμοὶ de-
 buisset servari quo intelligitur, purgationem mansisse
 usque ad diem decimumquartum, namque ait Hippo-
 crates, eo die febrem exortam, dum purgatio fieret, &
 alias bene haberet; sed vim dictionis huius non tanti-
 facio; nam Græcorum non me latet in usu temporum
 licentia; & in eadem oratione ἡ καθαρμοὶ, quod est præ-
 sentis temporis verterunt in præteritum, & recte, id est
 cum peperisset; Sed me res mouet ipsa: nam si purgatio
 secundum naturam processit, & alias leuiter habuit,
 hoc usque ad diem, quo cepit egrotare, perseverasse opor-
 tuit: nam si ante illud tempus desisset, dici non potuis-
 set, factam secundum naturam esse: neque contemnen-
 dum, si quis hoc confirmet eo, quod dictum est, apposito
 pharmaco, id est pessario vocato, τὰ ὕδατα ἐκ τῆς μήτρας, secun-
 dum hæc leuata est, hoc est dolores uteri (quos ait die
 decimoquarto exortos) sublatis, purgatione (quam in-
 dicat eodem tempore cohibitam) reuocata, cum reliqua
 remanserint, & mulier defuncta sit. argumento autem

est, febrem à retenta purgatione ortam non esse, quia
 reuocata purgatio nihil opis aduersus febrem attulerit.
 Cum ergo dicitur, huic mulieri, febrem à suppressa pur-
 gatione ortam esse, interpretatio est verbis Hippocra-
 tis minime congrua. Accedit & alterum: Nam Hip-
 ocrates inquit, decimo & quarto die ignis inuasit cum
 rigore. huic cor primum dolebat, & hypocondrium dex-
 trum, muliebrium dolores, purgatio desita est, quibus
 verbis non temere, & absque ordine res enarrauit, nec
 crediderim illud aduerbium, primum, sine caussa appo-
 situm; sed importune appositum esset, nisi cetera ordine
 narrare constituisset, eoque accipiendum, purgationem
 postremo loco narratam pro caussa non receptam ab Hip-
 pocrate, nam caussa ut præcedit, ita priore loco afferri
 debuisset, nisi quis narrata illa quatuor symptomata,
 eodem tempore putet exorta: & illud, primum (græce
 tamen significantius, ἀρχόμενος cum inciperet, scilicet fe-
 brire) dolorem cordis comprehendere, & præcordij dex-
 tri, & muliebrium, & purgationis defectum; tamen
 cuncta hæc febre posteriora euenisse, dictio illa demon-
 strat: eoque efficitur, partum, licet naturalem, aegritu-
 dinis caussam fuisse, non qua naturalis fuit, sed qua
 nonnihil præter naturam latuisse necesse est; ut dictum
 sit ab Hippocrate secundum naturam purgatione facta
 & alias leuiter degentem, quia quod latebat, nondum
 apparuerat, à quo febris oriri potuit die decimoquar-
 to, quam secuta sunt quatuor enarrata symptomata:
 quapropter, si suppressio purgationis febrem induxit, hoc

tamen

tamen debuit partui adscribi, quia purgatio in femina exortu secundum naturam ad diem quadagesimum perducitur, licet possit etiam sine periculo ad diem vigesimum quintum desinere. Cum autem huic mulieri die cessauerit decimoquarto, hoc sine periculo fieri non potuit. Sed non hoc agitur, idque solum admonemur, quod Hippocrates, cum partum memorat, alio causæ genere prætermisso, partum ipsum pro causa accipi, voluerit: non tamen qua naturalis est, licet multis diebus naturalis videatur; quod est dignum animaduersione; nam in alia eiusdem libri narratione, dixit, Epicratis uxorem bi-duo ante partum riguisse vehementer sine calore, tertio die peperisse femellam, & reliqua omnia euenisse pro ratione, καὶ τὰ ἅλλα πάντα καὶ λόγον ἔλθει, si ergo alia omnia secundum rationem, ergo non solum secundarum eiectionem (quod aliqui dixerunt) sed & purgationem à partu factum oportuit secundum rationem: tamen productus est morbus vsque ad diem octogesimum. Ergo morbi causa grauiditas & partus, cum lateret aliquid, quamobrem & rigor ante partum accessit; etsi naturalem fuisse partum significauit. quibus similia leguntur eodem libro de Dromeadis uxore, quæ non quidem riguit ante partum, sed femellam peperit, & alia omnia facta sunt secundum rationem, vt in priore. Verum hæc breui mortua est, nec aliam ob causam, nisi quia partus non erat naturalis, vt videbatur, & latebat anguis in herba, quod euentus docuit. Nec Vallesius persuadeat, facta omnia secundum rationem quia

secundina eiecta, etenim secundinarum eiectio non sunt
 omnia, sed & purgationem secundum rationem à partu
 factam, verba illa, & alia omnia, comprehendunt.
 nec item persuadeat morbum huic accidisse, ob purga-
 tionem suppressam intempestive, nam si primo die par-
 tus omnia secundum rationem evenire, ergo & purga-
 tio. cumque die altera febris orta sit, non ergo à sup-
 pressa expurgatione, ergo à partu, qui non erat, ut vi-
 debatur, naturalis, cum intus laterent, & quiescerent
 morbi semina, quæ non eodem semper tempore germina
 emittunt. Dicemus quidem à suppressa post partum pur-
 gatione, in Thaso egrotasse mulierem, de qua lib. 3.
 Epid. sect. 3. agro 2. cum speciatim scriptum sit à partu
 illam febre correptam, cum purgatio facta non esset,
 ἡ δὲ γὰρ οὐκ ἔστιν ὑπομένειν, quod etiam dicendum de illa, quæ
 libro eodem inferius dicta est in Cyzico gemellos cum
 difficultate peperisse nec valde purgatam esse, οὐ γὰρ ἔστιν ἡ
 δὲ ἀποδείξουσιν, quod & libro 2. sect. 2. totidem verbis pro-
 ditum est. In his ergo Hipp. satis habuit pro causa
 egritudinis partum memorasse ut lib. eiusdem 3. sect.
 2. agro 10. & 11. abortum recensuit (quo ambæ illæ
 mulieres defunctæ sunt) omni ommissa aliarum causa-
 rum mentione. alias tam de viris, quam de mulieri-
 bus agendo, causas attulit nominatim varias, qua-
 rum antea mentio facta est. Itaque graviditatem &
 partum satis idoneas causas (etsi morbus alias causas
 habuisset) & periculi & mortis existimabat, ut an-
 te notatum est. Sed reprehendet hanc (video) senten-
 tiam,

tiam, qui hæc legerit apud Aponensem Conc. diff. 106.

Si febrem post partum contingat fieri naturalem ex malitia regiminis, & uniuersaliter à quacunque causa manifesta, nullo modo computandum à partu, sed à febre solum, cum in nullo dependeat ab eodem, si pauci etiam inter partum & febrem intercedant dies. hæc ibi. quibus verbis significatur aperte, si morbus mulierem post partum naturalem corripiat ob causam manifestam, illam partui non debere imputari. Verum quod Aponen. ait, dies egritudinis post partum naturalem exortæ à die primo egritudinis, non autem partus supputari debere, hoc sane dictum est ex Hippocratis sententia, qui morbi cuiusque dies (etiam post partum præter naturam) à primo die morbi, non à die partus, nisi ex accidenti, ut suo loco explicatum est, numerabat. quod vero ait, si morbus oritur post partum naturalem ex causa manifesta, nullo modo à partu pendere, hoc neque est de sententia Hippocratis dictum, neque alias demonstratum. contra vero superius demonstratum est morbos eosdem graviditati, aut partui accedentes longe esse, quam cum alias fiunt, periculosiores: itaque contra Hippocratis sententiam, falsoque dictum est, eos in nullo à partu pendere. Ergo quacunque prægnante, vel abortiente, aut post abortum, aut pariente, vel post partum defuncta, dum intra dictos dies triginta in maribus, vel duos & quadraginta in feminis, vel si in ipso die trigesimo, aut quadragesimo secundo morbus oritur (quibus exactis diebus iam non dicitur partus causa

Conclusio.

caussa morbus oriri) exceptio locum habebit.

Sed quæri potest, si mulier ex quacumque causa vtero laboraret (quisquis ille morbus sit) atque interim conciperet, & gravida, vel abortu facto, vel à partu moreretur, cui mors huius tribui deberet? num labori primo, ita ut exceptio locum non habeat? nequaquam: si namque cum illo labore ita vixit, ut concipere potuerit, dubio procul absque conceptu vivere diutius potuisset, ergo mors ea tribuetur graviditati, aut abortui, aut partui, & exceptio locum habebit.

Quæri quoque potest, si mulier vtero ex quacumque causa laboret, interimque concipiat, & post abortum, aut partum intra tempus dierum triginta, aut duorum & quadraginta agrotaret, & sanaretur vel intra, vel ultra eosdem dies, atque manente eodem uteri labore aliquot diebus, quotcumque ultra præfatum numerum eodem iterum morbi genere capiatur & pereat, erit ne mors partui, vel abortui tribuenda, quoniam recidiva sit, quæ naturam refert prioris morbi & in eiusdem morbi causas refertur? nequaquam: quoniam ubi sanata semel est post partum, vel abortum, iam est illi statui, in quo fuit ante conceptum, restituta: quo tempore si ex uteri labore periisset, nulla exceptionis ratio habenda fuisset, cum neque gravida esset, neque abortum fecisset, neque peperisset. Similiter igitur eadem prætereunda exceptio est, cum post recuperatam valetudinem iterum agrotat, sed extra tempus puerperarum purgationi assignatum. Neque dicenda est recidiva

cidina simpliciter, quæ in partum, vel abortum referenda sit, quia dictum extra tempus iam nulla vis est, & ratio habenda est nulla partus, vel abortus: cumque sumatur, illam sanitati pristina restitutam, necesse est, vitium illud vetus uteri à noua caussa externa vel interna, vt contingit sæpe sine conceptu, irritatum esse.

Sed quæsitum est illud quoque, si uterus, antea bene & secundum naturam constitutus, dum grauida mulier est, vitium contrahat, aut post abortum, vel partum; egrotetque mulier intra purgationis tempus, si interim occidat, mors ea partui, aut grauiditati tribui debet, vt dictum est: sed sana hæc euadat quandocumque: Si vltra purgationis tempus denuo eodem morbo capiatur, & noua caussa nulla accesserit, erit ne secundus hic morbus grauiditati imputandus, aut partui, adeo vt exceptioni sit locus? omnino, si constet nouam caussam nullam aduenisse, quoniam recidina est, cuius eadem est, & prioris morbi natura, atque cessauerit licet caussa remotior, grauiditas, vel abortus, vel partus, propinqua tamen eadem manet, uteri scilicet vitium à remotioribus illis caussis exortum, in quod sequens morbus referendus est. Verum esse hanc recidinam, & nullam aduenisse caussam internam saltem (si fortasse de externa essemus certi) hoc est ad probandum, & demonstrandum dtfficillimum. Nec similis casus est ei, de quo dictum est ante, si morbo capiatur mulier grauida, vel à partu, aut abortu, accesserit licet alia euideus caussa, & intereat: mortem esse grauiditati,


tati, aut partui imputandam. non est res ea, inquam, similis: nam in hac extat nota causa agnitudo graviditas, aut partus, aut abortus, sed in re proposita nihil est quod doceat esse recidivam, & uteri vitium semper perseverasse, a quo ut prior, ita posterior morbus exortus dici possit: nam etsi potuit perseverare, & interim non esse molestus (ut est in omnibus rebus vicissitudo quædam laboris, & quietis) non est tamen necessarium, & perseverasse vitium illud, & ex eo morbum letalem ortum esse, hoc est ex ijs, quæ nequeunt probari, & demonstrari, propterea que in hoc casu locum exceptio non habebit.

F I N I S.



33

MARSILII CAGNATI DE LIGNO SANCTO PRIMA DISPUTATIO.



*NON est, quod aliquis miretur
amplius, incredibilem opinionum
varietatem in plantarum gene-
ribus diuersarum recognoscendis:
etenim non illæ sunt dumtaxat
huius diuersitatis causse, rerum
genere differentium similitudo,
nominum confusa varietas, linguarum diuersitas, au-
ctorum in ijs describendis negligentia, & aliquorum
(dicere liceat) imperitia: Sed præterea ambitio, ani-
mi contumacia, lucri cupiditas, & insitum quorundam
studium contradicendi, & nouas, licet absurdas, opi-
niones suscitandi. Quod experti nuper sumus, dum
ageretur de ligni cuiusdam, quod sanctum vocatur, re-
cognitione: cum res iamdiu citra controuersiam proba-
ta, & in usum citra omnem suspicionem recepta, ad-
disquisitionem per sciolos nonnullos, rerum cupidos no-*

uarum, reuocata esset. De qua re, postquam in publico congressu diuersorum opiniones exploratae sunt, & audita, necessarium quoque visum est (quod facile quiuisset confiteretur) ea litteris tradere, quae veritatem patefecerent, atque illustrarent.

Dubitatum est igitur de huius ligni tum genere, tum salubri facultate: propterea quod lignum sanctum verum non videatur: Sed (ut quibusdam persuasum est) nouum sit ligni genus, nunc primum Romam delatum, & illud syluestre, ac fabrorum potius opificijs, quam medicinae idoneum. quod minus pingue sit, ut pote ex quo oleum extrahatur minore copia, quam ex ligno ipso sancto. quod ei cortex non adhæreat vehementer, sed facile decidat. quod rimis nonnullis dehiscat. quod ex navigatione vitium aliquod contraxerit. quod ex eo decoctum (ut vocant) conficitur acrius multo, quam ex alio quodam genere, quod solum vere lignum sanctum, & guaiacum à nonnullis creditur. quod demum obseruatum sit illis, qui huius decocto usi sunt, nocuisse. Verum, ut intelligatur, quale sit hoc ligni genus, de ligni sancti nominibus, & differentijs necesse est nonnulla ex auctoribus repetere. Atque illud in primis ex Fallopio, qui libro de morbo gallico cap. 39. inquit, habemus igitur guaiacum, & lignum sanctum, quamuis in consultationibus sumamus has arbores indifferenter: quibus verbis significauit, illud, quod vere guaiacum est, ex descriptione Consalui Ferdinandi, vocari consueuisse lignum sanctum. Quae fuit

Nominum
confusio.

nominum confusio Brasauodi quoque tempestate, qui libro de morbo gallico, differens de guaiaco, inquit, vocatur & lignum sanctum, & palum sanctum, & lignum crucis. hac ille. Cumque iam diu proditum sit lignum, quod ex insula Sancti Dominici ferebatur, dictum esse guaiacum, & quod ex insula Sancti Ioannis dictum esse lignum sanctum, tamen Alphonsus Ferrus scribens de morbo gallico, & ligno sancto, duo hac, & tertium, quod ex insula sanctæ crucis vehebatur, vocauit promiscue lignum sanctum. itaque de nomine certandum non est, statuendumq; ligni sancti nomine guaiacum etiam significari.

Sunt igitur duo iam ligni genera, hoc nomine alterum, cuius fuit Romæ postremis hisce temporibus usus admodum vulgaris, & frequens, meditulliumq; habet nigrum quidem, aut nigrescens ex rufo, sed orbe non magno, nam lato valde circundatur albente circulo (vocamus autem nigrum, licet aliquando color videatur medius nigrum inter & rubrum, & leonatum appellant) alterum vero, cuius non fuit his eisdem temporibus frequens adeo, & vulgaris usus: cuius nigrescens meditullium tantum est, vt albens circulus vix equet digiti crassitudinem. estque in hoc genere varietas aliqua, nam alterum habet medullam altero nigriorem. Sed est genus tertium ab his diuersum, quod nigri quidem habet plurimum, sed partem albam distinctam habet nigris intercurrentibus latis maculis, fere quadrangularibus, quibus externus ille circulus

Ligni sancti
differentia.

ex albo, & nigro distinctus, coronæ cuiusdam speciem exhibet, cuius decoctum amarum quidem, sed absque acritudine percipitur. videtur denique genus quartum esse, quod rufum est fere vniuersum, cortice excepto, quodque in eius medio nigri aliquid apparet. cuius decoctum est sine acrimonia modice amarum, de quo Brasauola locutus est, vt paullo post visuri sumus.

Sed neque de hoc, neque de tertio genere controuersia erat, deque neutro locuti sunt, qui secus opinantur. Sed quesitum est de secundo genere, ac primo. Vtrum sit vnum ligni genus, an duo, quorum alterum sit lignum sanctum, alterum minime: hoc igitur explicandum est, quo etiam vtrum sit præstantius, & efficacius intelligatur.

Lignū pro-
positū utrū
sit lignum
sanctum.

Constat igitur primum, neutrum horum esse genus illud tertium, quod Fallopius negabat reperiri eius tempestate, quoniam illud erat sine vlla nigredine, & substantia constabat tota, vt ille inquit, flaua. cuius tamen generis aliquid Romæ videmus à pharmacopolis exponi, cuius aliud pene nihil habet nigri, aliud minimum. quod non est positum in controuersia. Nec est hoc, de quo differitur, quartum illud à Brasauola descriptum, cuius meditullium fere totum erat rubrum, de quo nihil aliud docere potuit, nisi id, quod pharmacopola quidam Venetijs dicebat, lignum esse Indicum, & saluberrimum, cum alioqui Brasauolus eo numquam se vsum professus sit. nisi decepti sint, quod pro diuerso genere

vere acceperint, illud, cuius meditullium interdum, (vt dictum est) ex nigro vergit ad rubrum, cum vnum sit, atque adeo quartum hoc esset alterum ex dictis: quod est valde probabile, cum facile sit in re noua, & paucis bene cognita, labi, & decipi.

Sed neq; sunt duo illa ligna ex vna & eadem arbo-
re, vt alias quidam existimarunt, qui sibi persuaferunt,
nigriora ligna ex trunco caesa, minus nigra ex ramis:
Non ita res habet, nam, si non conuenientibus oculis rem
exploremus, facies eadem in maioribus lignis, atque in
minoribus apparet, cuius scilicet arboris truncus ha-
bet exiguam nigredinem, eiusdem & rami habent exi-
guam, & cuius truncus amplam habet nigredinem, eius-
dem, & rami amplam habere reperiuntur. ergo non est
arbor vna, sed duas esse necessarium est.

Si queratur, ex his vtrum sit Guaiacum nuncu-
pandum, dicam, vel vtrumque, vel id, quod orbem
internum nigrum habet amplissimum, & albente an-
gusto circulo vestitur: namque huic illa congruunt ada-
missim, quæ de Guaiaco auctores, huius rei studiosi,
iamdiu antea prodiderunt. vtrumque Guaiacum dici
posse, Manardi Ferrariensis auctoritate comprobari
potest, qui, in epistola ad Cracouiensem Episcopum,
vtrumque descripsit: cumque tertium dicat vocari pro-
prie lignum Sanctum, & primum vocet guaiacum; de
secundi nomine nihil dicat; si tertium proprie lignum
sanctum dicitur, reliquum est, vt secundum quoque
Guaiacum dicatur. Quod si cui hæc argumentatio mi-

Nomen Gu-
iacum cui
conueniat.

rus arrideat, saltem Monardus docuit, primum ge-
 nus, cuius pars interior nigra magna est, exterior au-
 tem alba modica, Guaiacum esse, atque adeo lignum
 hoc, cuius est usus Romæ minus hodie frequens, ipsissi-
 mum Guaiacum esse, intelligitur. quodque descriptum
 est à Monarde Hispalensi medico (cui multum hac præ-
 fertim in re tribuendum est) hoc ipsum est, aut nullum,
 cum dicat, Guaiacum habere matricem magnam, &
 nigricantem: cum alterum, cuius est usus hodie fre-
 quentior, matricem, vocatam, nigricantem habeat
 exiguam: quod tamen non negauerim esse ex Guaiaci
 genere, sed equidem dixerim, esse aliud ab eo, quod est
 à Monarde descriptum, ad cuius manus, par est, tan-
 tum illud peruenisse, quod ipse descripsit, qui cum faciat
 illius quoque mentionem, quod ex insula Sancti Ioan-
 nis de portudiute affertur; quod ait esse priori quidem
 simile, sed inferius magnitudine, & propemodum sine
 matrice; hoc non primum est, ut ille ait, nec secundum
 potest esse: nam secundum quoque matricem habet ni-
 grescentem, & eam satis magnam, etsi minorem ea,
 quæ in priore ligno est amplissima: & præterea non est
 arbor priore inferior celsitudine: vidimus enim Romæ,
 atque nunc exstant, crassissima ex eo trunco ligna, quæ
 excelsam non minus priore arborem hanc esse demon-
 strant. Itaque necesse est, statuere, secundum hoc ge-
 nus fuisse Monardo incognitum. Consalvus Ferdinan-
 dus, qui naturalem Indiarum historiam primus scripsit,
 & primus orbi nostro lignorum huiusmodi figuram ver-
 bis

bis exhibuit; cum dicat, Guaiacum non solum nasci in
 insula Sancti Dominici, Sed celebre quoque illud esse,
 magnique aestimatum, quod ex insula beata veheba-
 tur, & Indos alios, atque alios, Guaiacum aliud, at-
 que aliud, ut illis videtur, seligere, dicatque Guaia-
 cum habere materiam propemodum nigram; nec de am-
 plitudine eius, vel angustia, quicquam scribat; locum
 relinquit nobis in relligendi, Guaiaci nonnullam esse
 varietatem, praesertim ex soli varietate, quamobrem
 aliud matricem illam nigram habeat alio vel amplio-
 rem, vel angustiore. itaque relicto tertio ligno; quod
 in insula Sancti Ioannis nascitur, cui peculiariter fuit
 nomen lignum sanctum; duo dicimus esse Guaiaci ge-
 nera in Vrbe, illaque in primis mutuo dissidentia ma-
 tricis nigrescentis amplitudine. Quorum illud, quod
 matricem habet amplissimam, non est nuper in Vrbe
 delatum, sed multos iam ante annos. quod aromatarij
 testantur multi, praesertim seniores, & mercatores; &
 affirmatum est (quod maioris ponderis testimonium est)
 ab homine Romano, medicoque clarissimo; qui cum sum-
 ma laude, & admiratione annos fere quinquaginta
 exercuit in ipsa Vrbe medicinam; Alexandro Petro-
 nio, scribente de morbo gallico iam ante annos triginta
 sex: is enim libri quarti capite primo, caute admodum
 hac lignorum genera describens, quae in Vrbe ad il-
 lud usque tempus delata, testatur, primum ait genus
 vocari Guaiacum, cuius interior pars nigricat, exte-
 rior sub pallida, & veluti lineis quibusdam ad fuscum
 incli-

Lignum de
 quo agitur
 non est no-
 uū in Vrbe.

inclinantibus, ac æque distantibus per longum interse-
cta. alterum vero peculiari nomine carere, cuius pars
exterior magis ad album vergit, neque est tam mani-
festis lineis distincta, interior vero nigrum quidem co-
lorem ostendit, sed minori orbe, quam prius. Ergo li-
gnum hoc aliorum nigerrimum Romam non iam primum,
sed diu ante vidit, & experta est. Sed non Roma solum
verum & reliqua Italia: namque Manardus Ferra-
riensis loco ante dicto duo hæc eadem ligni genera descri-
bit, quemadmodam & tertium, quod totum est album,
ut à Petronio quoque dictum est, cuius generis hodie
quoque trunci quidam visuntur: idque peculiariter li-
gnum sanctum dicebatur, de quo non agitur. Sed &
Brasauolus item Ferrariensis, eadem duo genera co-
gnovit, & testatus est, primum genus proprie Guaia-
cum vocatum esse, cuius est ampla, nigraque medulla.
Qui ergo ligni genus hoc opinantur novum esse, toto aber-
rant cælo, decepti eo, quod mercatores secundum genus
(quod nec nomen habere proprium Petronius ait) Ro-
mam crebrius detulerunt, eique adsueti pharmacopola
quidam, mixtionem magis, quam recognitionem me-
dicamentorum edocti, cum primum degustarunt genus
hoc, diuersitatem admirati, & veritatis ignari, li-
gnum sanctum esse negarunt, quasi sanctum sit alterum,
cuius frequentiore usum cognouerant: cum tamen
neutri nomen hoc à primis auctoribus inditum sit, sed
uni tertio generi, de quo non differitur. inualuit
tamen consuetudo, ut omnia promiscue genera li-
gnum

Error quo-
rundam.

gnum sanctum vocentur, ut ante dixi.

Quod vero quidam sylvestre genus hoc esse dicant, Lignum sanctum omne sylvestre. hoc sane (nisi ioco dictum sit) plane ridiculum est. Si quidem traditum à nemine sit, harum arborum genus solum satum, cultuque, non sponte nasci, nec in sylvis provenire: Hac late colles, campique patentes, Hac omnis, vestitur ager, inquit noster Fracastorius, quamquam poetarum licentia posterius cecinit, Hanc gens illa collit, studioque educere multo Nititur: sed qui rerum Indicarum historiam prodiderunt, de huius ligni cultura ne verbum quidem. atque Consalius Ferdinandus testatus est, tanta copia in insula Sancti Domini provenire, ut eo intelligatur, sponte nasci, & absque cultu: & idcirco sylvestre esse arboris genus: quamobrem vanum sit existimare lignum aliud sylvestre sanctum, & aliud satium esse. posset dici satium, quod translatum in aliud cælum ab Indis remotum, satique ortum est, cuius sunt plantæ Romæ nonnullæ, quarum tamen ligna, neque acrimonia, neque amaritudine possunt cum eo, quod ex Indis affertur, comparari. Sed apud Indos genus aliquod esse satium, hoc neque Consalius dixit, neque alius quisquam eiusmodi auctor historiae. Omne igitur lignum sanctum sylvestre. quod si tandem sit aliqua sylvestris, & satiui differentia, illud potius sylvestre dicendum est, cuius nigrum est angustius meditullium, quoniam ligni eius superficies sepe inequalis, & tuberosa reperitur (ut solent illæ esse arbores, quibus cultura nulla adhibetur)

quam alterius, cuius est amplissimum meditullium, la-
uisque superficies, & minus inaequalis.

Sunt ergo vere duo Guaiaci genera (vel duae species,
si malis ita dicere) alterum quod medulla nigra con-
stat amplissima, alterum, quod eadem constat angustiore.

Oleum ex
Guaiaco.

Nec moueat aliquem, quod Fallopius dicat, oleum
è ligno sancto copiosius exprimi, quam ex Guaiaco: nam
loquebatur de tertio genere, cui peculiare nomen fuit
lignum sanctum, ex Insula Sancti Ioannis, non autem
de secundo, cuius vsus fuit his annis Romae frequen-
tior, ut ante dixi: quamobrem si recuset aliquis ap-
pellare primum genus lignum sanctum, cogitur is &
secundum pariter genus recusare: alioqui compertum
est, oleum ex Guaiaco primi generis copia non minore,
quam ex altero, educi, & sunt haec Antonij Galli ver-
ba, Guaiacum vnguinofum, ut à quo accenso resina
profluat. palus vero crematus nullam, aut per exiguam
exudat pinguedinem. Sed quid si ex eodem penitus ar-
boris genere lignum aliud plus, aliud minus olei effun-
dat? eoque efficiatur, ut ex ligno sancto proprie dicto
alias plus, alias minus olei, quam ex guaiaco extra-
hatur: quamobrem auctores, nondum satis re: quippe
nova, nec de facie satis, neque tam multis experimen-
tis explorata, & cognita; potuerint de re eadem con-
trarium vere affirmare, atque adeo opus sit ex alijs,
non ex olei copia, vel inopia, de Guaiaci, & ligni san-
cti natura, & viribus cognoscere, & iudicare.

Cortex eui
facile deci-
dat.

Nec moueat etiam, quod illi cortex facile decidat,

nec

nec adeo ligno adhaereat, tamquam non illud sit, quod à Fernelio describitur, à quo laudatum illud est, cuius cortex proxime adheret; namque Monardes Hispalensis ait, cum Guaiacum siccatur, corticem facile decidere: Neque à Fernelio damnatur lignum, cuius cortex minus adheret ligno, quasi non idem sit genus, sed ei praefert in eodem genere aliud, cuius cortex adheret magis: quia signum hoc est ligni non verioris, sed recentioris, itaque & utilioris. quæ fuit Fallopij quoque admonitio.

Nec item moueat, quod Vlrichus ab Hutten scripserit, optimum rimas non facere, quas in priore ligno interdum vidimus: quoniam aliud est, lignum tamquam falsum, & adulterinum damnare, quam in eodem genere eligere, quod est optimum. Accedit Vlrichum non negasse rimas, sed tantum, à se nondum visas, professum esse, inquit enim, ut quam minimum hiet, neque enim adhuc vidimus, qui rimas traxisset, & qui vendunt fatiscere negant. hæc ille. sed tempus postea docuit, etiam fatiscere, itaque Fernelius, neque facile videas, quod rimas traxerit. hoc non est simpliciter, & omnino rimas negare. Sed est proditum à Palmario lib. 1. de lue venerea cap. 10. lignum guaiacum sæpe dehisce-
scere, & rimis, ac fissuris diffindi. quod & nos interdum vidimus. itaque rimæ non faciunt generis, siue speciei differentiam.

Quod vero sit lignum hoc fabrorum opificijs accom-
modatum, non est ridendum: quoniam Consalius idem

Rimæ in
Guaiaco.

Guaiacum
opificijs ac
comodatū.

testatus est, ex Guaiaco apud Indos rotarum fieri radios, & instrumenta ad saccharum conficiendum. Nec propterea minus ad usum medicinae recipi debet: namque & Ebenus, opificiorum elegantiae nata, locum habet inter remedia. quod de santalo, & de ligno aloe vocato verum est, ne dicam de margaritis, de hyacintho, zaphi- ro, carbunculo, & alijs gemmis mulierum maxime ornatui nascentibus, nec minus ad morbos curandos conquisitis.

Vitium ex
navigatione.

Utrum autem vitium aliquod ex navigatione contraxerit, de hoc sane dubitare, ad docendum, hoc ligni genus esse, aut non esse lignum sanctum, nihil conducit: cum in eodem prorsus genere, aliud vitio carere, & aliud quoque possit vitiosum esse. Fallopius certe docuit, non posse nos uti lignis huiusmodi recentibus ob longam navigationem: quamobrem, & rancida fiunt. at hoc non est dictum de aliquo peculiari genere, sed generatim, & uniuerse: quia ob regionum distantiam veterascit prius, quam ad nos comportetur. potest etiam cortex ob tenuitatem vitium contrahere, si tangatur à maris aqua. Lignum vero crassum, & solidum non adeo facile, Illud probabile non est, maiorem inde acrimoniam oriri; quæ tamen horum lignorum laus est præcipua.

Acrimonia
in ligno san-
cto laudata.

Quod vero in decocto damnatur acrimonia, quam ob rem & linguam, & fauces pungit, & vellicat; hoc illud est, quo id altero præstantius, & efficacius cense- ri debet ad luem veneream debellandam, sed illud ani-
maduer-

*mauertere pretium operę est, Antonium Gallum, ne-
 gasse; acrimoniam in ligno sancto, cum de ligno loquere-
 tur, ex insula S. Ioannis delato; sed non de Guaiaco, de
 quo nostra est disputatio. sed non est minor de hac re
 auctorum varietas, quam de oleo, & horum ligno-
 rum pinguedine, vt ante dixi. Ioannes Manardus epi-
 stola illa secunda ad Cracouiensem Episcopum dicebat,
 genus tertium, quod nigri nihil habet, ideo præstantius
 esse, quia esset acrius, atque odoratius; cum à Gallo
 contraria de hoc eodem ligno tradita sint. habemus
 tamen ex Manardo. Si, qui lignum hoc damnant,
 iidem fatentur esse, quam alterum acrius; valentius
 quoque esse, si non dicere, saltem sentire, eosdem cogi.
 Cumque alterum, quia minus est acre, ideo multis
 placet; hi sane illud probant, quod est infirmius, & ad-
 uersus contumaces ægritudines minus potens, & gra-
 tię magis videntur studere, quam ægrotorum incolu-
 mitati. quodque acrius est, illud potest aqua temperari,
 quod est minus acre, non potest aquę mixtura maiorem
 acrimoniam recipere. Sed & Antonius Gallus cap. 4.
 lib. de morbo gallico, cum potum vellet mitiorem confi-
 cere, curabat partem nigram demoueri. Sed non est vl-
 lus tam rudis medicus, qui ignoret, ex eodem ligni ge-
 nere, pro varia hominum natura, & morborum, va-
 rium fieri posse, ac debere Decoctum nuncupatum: hoc-
 que præstari etiam, portione aquę dempta, vel addita
 consueuisse. Dotes autem ligni huius esse acrimoniam,
 & amaritudinem, Fallopius diserte docuit in cap. 41.
 inquiring,*

Decoctū li-
 gni sancti
 vt mitius
 fiat.

Dotes ligni
 sancti.

„ inquit, Primum si deradatur statim percipiemus duo,
 „ amarorem quendam, quo explebitur totum os, dein-
 „ de acridinem insignem, quæ stimulat palatum, tertio
 „ si decoquamus in aqua, primum amarescit in ore, dein-
 „ de mordicat. & cap. 44. Si decoctum sit turbulentum,
 „ valde amarum, & acre, bonum est, &c. & huiusmo-
 di decoctum est, quod ex hoc fit ligno, de quo differitur.
 quod omnino profiteor esse præstantius, quoniam præter
 modo dicta, communis auctorum consensus est, illud
 lignum sanctum præferendum, & tamquam optimum
 eligendum, cuius pars maxima nigrescit interior. hoc
 ait etiam Massa scribens de morbo gallico tract. 1. c. 2.
 ait Vlricus ab Hutten cap. 6. Aloisius Robera cap. 4.
 Antonius Gallus in præfatione de ligno sancto. Ioannes
 Baptista Montanus epistola quinta. Benedictus Vi-
 ctorius cap. 4. Fernelius lib. de lue venerea cap. 10. &
 cum eo Palmarius loco dicto. & Fallopius. cap. 44. item
 Monardus, Rinius, Frizimelica, Tomitanus. &
 Mattheolus in opusculo de morbo gallico testatus est,
 Medicis videri valentius, id, quod in superficie santalo-
 rum citrinorum colorem, medio nigrescente, refert. Ac
 si quando idem Mattheolus nigrum minus aestimavit,
 hoc ideo fecit, quoniam sibi finxerat, ligni huius genus
 vnum esse, differre sola ætate: atque ideo nigrum ve-
 rustius, & efficax minus. Sed iam constat, Guaiacum
 esse nigrum natura, non ætate, superiusq; dicta est ratio.

Lignū san-
 ctum opti-
 mum ex cō-
 sensu aucto-
 rum.

Dub. de a-
 crimonie
 vehemētia.

Sed non omitam, quod posset studiosus suspectam
 habere acrimonie vehementiam, quoniam Petronius
 lib.

lib. 4. cap. 1. & 3. modicam tribuit tum Guaiaco, tum ligno sancto acrimoniam: itaque scire licet, si horum comparemus lignorum amaritudinem fellis, & aloes amaritudini, hanc non esse magnam, sed mediocrem: si item eorundem acrimoniam cum scilla acrimonia contulerimus, horum esse modicam: si vero eadem ipsa ligna inter se conferantur, alterius tum amaritudinem tum acrimoniam posse magnam, alterius vero modicam videri, & iure appellari.

Nec illud præteribo: necessario accipiendum esse, hæc Cur varia
de eodem li-
gno dicta. ligni genera differre inter se plurimum, aut solo, aut ætate, aut, fortasse, cædendi tempore, aut post incisionem longo, vel breui temporis curriculo: eoque euenisse, vt de eodem genere varia interdum fuerit auctorum sententia: nam quod pallet intus, & extra, Petronius illud amarius, atque acrius cæteris prodidit, quod & ante Manardus scripserat: quod vero nigri plurimum, albi vero coloris minimum habet, illud omnium minime esse tum acre, tum amarum. At nos hac tempestate obseruauimus sæpius, quod plus habet nigredinis, illud esse longe acrius, sed minus amarum, quam alterum, cuius est minor internus orbis niger, quod pollet amaritudine sine ulla acrimonia: ne dicam, quod Romæ satum est, omni tum acrimonia, tum amaritudine carere. quamobrem si quis de altero genere dubitet ob acrimonię vebementiam, is & de altero dubitare debet, quia caret eadem, qua præditum esse auctores volunt, atque si vera Consalius prodidit de ligni sancti præstan-
tia,

tia, & viribus, quibus superare Guaiacum testatus est, non eo tamen efficitur, lignum, de quo disseritur, Guaiacum non esse.

Experimenⁿ
ta.

Nec demum moueat quemquam, quod dictum sit, lignum hoc, de quo dubium exortum est: nonnullis obfuisse: quia nihil est tam salutare, quod interdum non obfit, si importune exhibeatur, atque adeo modus est castigandus, non autem remedium damnandum: alias (vt omittamus ea, quæ hætenus Romæ visa sunt, quæ infinita sunt) Brasauolus primo genere, quod Guaiacum proprie diximus, & nigrius esse, ait, se frequentissime vsum esse, raro autem altero, quod lignum sanctum peculiariter vocabatur, numquam autem tertio illo, quod rubrum esse scripserat. At vir ille bonus non esset vsus creberrime auxilio periculoso, & cuius vanos successus expertus esset. nec alia de causa tot alij magni nominis auctores lignum hoc, quod & habet medullam plurimam, & acrius est, alteri prætulerunt, quam quod multis sibi compertum erat experimentis.


Nec trepidare debet aliquis, quod Consalius de ligni sancti proprie dicti viribus secus scripserit: quia quod est Indis saluberrimum, potest esse minus salubre in hoc cælo ab Indis valde remoto: potestque lignum sanctum, cum cæsum est, diutina mora vires suas celerius, quam Guaiacum amittere. Sed nec ignoramus in obseruandis rebus, & euentis, quam multa occurrant, quæ doceant, vere proditum à viro maximo, experimentum fallax.

Ergo

Ergo non est unum Guaiaci, siue ligni Sancti genus, sed plura, duo autem vulgatiore, quorum illud est præstantius, quod medulla nigrescentis plurimum habet, & modice albente circulo circumdatum est: atque non sine amarore, pollet magis acrimonia. nullo pacto damnandum, & reiiciendum, immo maxime optandum, ac hortandi mercatores, ut huius, quam alterius, copiam non minorem importent, sinantque tum ipsi, tum pharmacopola, ut medici pro illorum peritia, & prudentia, pro egrorum, inquam, & morbi natura rerum quarumcumque salubrium delictum habeant.



50
MARSILII
CAGNATI
DE LIGNO SANCTO
ALTERA DISPUTATIO.



TSI videri potest de ligno sancto
priori disputatione satis dictum in
eum finem, cuius gratia suscepta
est à nobis hæc disputatio, tamen
supersunt nonnulla, quæ rei, de
qua agitur, studiosos latere mini-
me debent.

Disputatio
nis causa.

Scire igitur licet, ortam esse anno elapso 1601. inter
duos Urbis mercatores litem, propterea quod alter li-
gni sancti, eiusque vsitati, magnum satis pondus alte-
ri vendiderat, qui admonitus: non esse illud lignum
sanctum vsitatum, sed sylvestre quoddam ligni genus,
& illud quidem tamquam in salubre damnandum, &
reiiciendum: recusavit dicti ligni pretium, quod, scripto
etiam cauens, fuerat pollicitus, venditori solvere:
quamobrem orta lis est: cuius dirimendæ caussa perito-
rum consilio petito, ad medicorum collegium res dela-
ta est, quod, re diligenter pensata respondit, lignum pro-
positum

positum ligni sancti speciem esse, & ad morbi gallici curationem, vt alia etiam ligni quedam genera, recipi posse. eoque nomine venditoris caussa superior euasit. Sed eo minime contentus emptor, appellauit, quamobrem commissa res est Camera Apostolicæ præfidi, qui medicis extra Collegium celebrioribus, & aromatarijs multis conuocatis, & singulorum sententijs exquisitis, intellexit venditoris caussam meliorem esse, vno vel altero excepto aromatario, qui emptori fauebat. emptor vero præsentiens caussam hic quoque suam inferiorem reddi, ante quam præses sententiam ferret, nouis oblati summo Pontifici libellis obtinuit, vt denuo à peritis viris de re eadem ageretur. Itaque nomine Sanctissimi ego, qui Protomedici munere fungerer (cum acta sint priora Odoardo Lopio eundem magistratum gerente) Collegium conuocaui nostrum, & extra Collegium medicos, quot quot adesse vellent, inuitaui, & aromatarios, & alios, qui ligni sancti, pro eorum professione, notitiam aliquam habere poterant, quibus omnibus, & singulis datus est dicendi locus, & auditi quicumque aliquid dicere voluerunt; illis vero tandem dimissis, Collegium denuo pronuntiavit, & notario mandauit; vt quod actum erat, hunc in modum describeret.

Facta congregatione in gymnasio Romano, ad quam conuenerunt perillustres, & excellentissimus Dominus Iacobus Bonauentura physicus Secretus S. D. N. Collegium medicorum, atque medici multi extra Collegium, Consules aromatariorum, vna cum pluribus

Decretum
Collegij.

alijs aromatarijs, atque vnus saltem drogherius, ac quidam ex stupharolis vocatis, qui sunt experimentatores ligni sancti, fuit proposita questio.

An lignum, quod dicitur Corradi, sit reale lignum sanctum, ad medicinam adhibendum, nec ne; Auditis igitur sigillatim supradictis omnibus, eorumque rationibus examinatis: insuper visis, & recognitis truncis tam ligni sancti Corradi, quam alterius hactenus vstatis, decoctisque cuiuscumque ligni varijs, ac oleis diligenter examinatis, cum medici omnes extra collegium, & aromatarij pro maiori parte, ac praesertim horum seniores, & peritiores; accedente omnium praedictorum simili consensu, excepto drogherio; amplexi essent partem affirmatiuam, Collegium praedictum (annuente eodem perillustri, & excellentissimo domino Iacobo S. D. N. medico secreto) decreuit, lignum Corradi, de quo disputatum est, esse idem lignum sanctum, quod vulgus ita solet vocare lignum sanctum: atque debere ad vsum medicinae recipi, aduersus eos morbos, quibus lignum sanctum adhiberi solet, nisi quatenus aliquid eius aquae marinae contactu vitium contraxerit, quae medicorum cura debet esse, vt, cum exhibendum est, id, quod vitio caret, eligatur.

Haec igitur hunc in modum acta sunt, non in angulis, non in tenebris, sed in hominum luce, publico, & per quam celebri loco.

Lignum de quo differitur quodnam sit.

Scire insuper licet, lignum dictum Corradi (quod nomen est illius mercatoris, qui lignum vendiderat, de quo

quo lis est orta) esse illud , quod (vt in priori disputa-
 tione dictum est) medullam habet nigram plurimam ,
 circulo angusto albente circumdatam , cuius nomen pro-
 prium , ex traditis ab Hispano , primo historiae horum
 lignorum auctore , esset Guaiacam , si quidem ligni san-
 cti appellatio tamquam propria indita est alteri , quod
 nasci prodiderunt in insula S. Ioannis portus diuitis ,
 cuius angustior est niger orbis ligni medium occupans
 instar medullæ . Verum (vt ante quoque dictum est)
 vulgus vtrumque , & omne aliud simile , lignum san-
 ctum promiscue appellat : qua & nos vtimur appella-
 tione , quia (vt est vetus , & peruulgatum dictum) lo-
 quendum , vt plures .

Cum autem sit euidentis quedam lignorum differen-
 tia , in priore disputatione exposita , non erit accusan-
 dus qui dicat plura esse huius ligni genera , quoniam
 probatissimi quoque auctores in usu vocabuli huius ,
 Genus , saepe normam spreuerunt dialecticam , cum enim
 sit vnum genus , vel rectius vna species animalis ho-
 mo , tamen dici solet hoc & illud hominum genus , certe
 M. Cicero scriptum reliquit , rem eandem saepe alij ge-
 nus , alij partem esse , sic enim homo animalis pars est ,
 Urbani , & Troiani genus : & alibi dixit de Antonio
 duo genera lenonum , & latronum delectarunt : est (in-
 quam) vnum hominum genus , tamen dicuntur homi-
 nes quoque genere differre , vt scilicet differunt vel
 sexu , vel ætate , vel natione , vel officijs , & huiusmo-
 di . immo ipse Arist. lib. 6. de histor. animal. ait canum

Lignifanti
 plura gene-
 ra .

esse

esse plura genera, πλείους γέν, tamen canis pars est, siue species animalis. Quercus est planta, & arboris pars, siue species, tamen Theophrastus lib. 2. de plantis dixit, huius genera alijs quatuor esse, alijs quinque. γέν, ἢ οὐκ οἱ μὲν τέτταρα ποιοῦσιν οἱ δὲ πέντε. quibus similia sunt admodum multa. Longe vero minus arguendus, qui plures esse huius ligni species affirmet, quando inter illa sit talis varietas, atque similitudo, qualem inter plantas alias multas haud dubie esse observatum est, & est in confesso apud omnes. quanta est inter vites dissimilitudo? tamen non negamus esse generis eiusdem species, nec dicimus unam esse veram vitem, alias vero adulterinas, falsasque esse. quid de prunis dicam, de malis, piris, ficibus? quanta varietas, quanta dissimilitudo? idem tamen est nomen, & generis eiusdem parteis esse nemo diffitetur. Quis ergo Zaleucus, aut Charondas legem fixit, unum esse tantum ligni sancti genus, aut speciem unam, falsas esse præter hanc unam reliquas? Consalvus in insula S. Dominici vocatam Guaiacum vidit, & descripsit, deinde in insula S. Ioannis similem huic arborem, non sine aliqua tamen differentia; quamobrem & aliud nomen inditum; nec ausus affirmare eandem esse speciem, sed inquit, Dos arbores ay mas notables, non ait unam arborem, sed duas, non numero differentes, quia sunt numero infinite, sed specie, quamquam testatur, multos opinatos ambas ex eadem esse specie, siue genere. sane si nulla inter illas dissimilitudo extitisset, dubitarum non fuisset, esset

esset ne eadem, an alia arboris species: operis ille differentiam scripsit, quod altera esset in curandis morbis efficacior. ceteris ligni facies etiam diuersa, quia nigrius alterius medullium, non aetate, sed genere, & natura, ut in priore disputatione dictum est. alij saporis quoque & odoris diuersitatem adnotarunt. sed quæ maior, quam inter rosas differentia? rosas tamen esse dicimus frustra itaque certatur, sit ne vnum tantum, an plura ligni sancti, siue Guaiaci genera. & recte statutum est, plura esse. genus, inquam, vnum, plures species, & ex his vnā illam esse, de qua lis orta dicitur.

Sed non miror, nec mirari quisquam debet, litem hæc ortam esse. ante annos quinquaginta Augerius Ferrerius libro primo de pudédagra, cum tria genera ligni Indici ex Manardo retulisset, hæc subiunxit de suo, Si tu officinas, & mercatores adieris, tam confusas inuenies apud eos has differentias, ut quid sit lignum sanctum, quid Guaiacum, monstrantibus illis, discernere nequeas: primum enim genus plerique pro ligno sancto (Manardus scilicet Guaiacum hoc vocabat) & tertium pro Guaiaco (Manardus lignum sanctum vocari dixerat) ostendunt, in quem errorem etiam incidisse constat scriptores quamplurimos. sunt enim qui, quod ipsi lignum sanctum vocant, fuscum, & flauum eligendum censent: quos colores primo, & secundo generi attribuit Manardus. Sunt qui Guaiacum albicans describunt, & ceteris præferunt. Sed posthabita nomen,

Appellatio-
num ligni
sancti con-
fusio.

datu-

claturarum ambiguitate, de rebus ipsis sic statuemus, Tria illa genera pudendagræ convenire, præstare acrius, & odoratius: Minus acre, & minus odoratum, minus calefacere, nec adeo siccare. Præstantius illud calidis, siccisque temperaturis minus convenire, ceteris magis prodesse. Hæc ille sane probabiliter, & quod ait de confusis nomen claturis est omnino verum. Et sunt duo hic animadvertenda alterum non vni standum Consaluo, qui primus ligni huius historiam orbi nostro communicavit, quia nondum novi orbis provinciæ erant perlustratæ omnes, quæ nec hodie sunt, itaque nec omnis medica materia, quæ apud Indos exstat, primis auctoribus satis cognita. alterum, cum diversæ sint, licet eiusdem generis, arbores; ut sunt apud nos prunorum, cerasorum, pirorum & similium diversæ; illas se mutuo superare colore, & sapore, & efficacia, vel ob ætatem, vel ob soli, cælique varietatem, quemadmodum proditum est in primis à Theophrasto, ex cuius libro sexto de plantarum causis, ex capitibus scilicet 17. 22. 26. 27. & 22. quæ huc spectant, studiosis perlegendæ, & huic loco aptandæ relinquo.

Quod vero ad usum medicinæ lignum hoc recipiendum sit, quemadmodum Collegium decrevit, quis est tam non dicam medicinæ ignarus, sed ineptus, qui neget? an nescias, nihil esse in hac rerum universitate, quod in orbe medico locum non habeat? ipsa venena sunt etiam medicamenta, ex animalium quisquilijs, & recrementis medicæ opes auctæ sunt, est in omnium mani-
bus

bus Galeni liber de simplicium medicamentorum facultatibus decimus, & undecimus. quis ergo reiiciat lignum iamdiu receptum, & innumeris experimentis probatum, & in quo nulla vis est, quæ possit obesse, nisi si quid per imprudentiam medicus committat, quod in omni officio, & in cuiusvis medicamenti usu cauendum est maxime. At dicendum semel est. Vbi toties factum est huius ligni periculum, quamobrem insalubrem usum eius cognoscere valeamus? in angulo sane aliquo, in latebris. At contra, prioribus annis Antonij Mariæ Saluiati, & hoc ipso anno Petri Aldobrandini Cardinalium auspicijs, & munificentia, in valetudinario Sancti Iacobi incurabilium (vt vocatur) millia hominum hoc quoque vsti sunt ligno, magno fructu, non solum aduersus luem veneream, sed alias quoque ægrotudines, aduersus quas utiliter administrari consuevit. nec interim quisquam oris, fauciumue, aut ventriculi æstum, incendium, inflammationem, dolorem, aut ex-coriationem sensit. Non tamen omnibus profuit, ac fortasse nonnulli obfuit; Sed hoc est commune vitium non alijs solum Indici ligni generibus, sed omnis generis medicaminibus, quam rem in priore quoque disputatione tetigimus, in qua dicta sunt etiam nonnulla de acrimonia eiusdem ligni, quam vt nimiam ignari quidam, an ignauæ, damnabat. immo licere aquam parare ex pipere, ligno omisso, quasi sanniones risu obstrepebant. Verum, vt acrimoniæ modus ponendus sit, superius, dictum est. Luem vero gallicam non sola ligni Indici acri-

monia oppugnat, sed (vt doctis viris visum est) pinguedo, & lentor cum amarore, quę in pipere non sunt: quod tamen & ipsum calefacit, siccatur, per halitum digerit, atque adeo ad sudorem prouocandum efficax: cuiusmodi sunt multas; neque enim contenta vno liberalis, & munifica natura est, gaudetque varietate, vt profit magis, & delectet, sed nec minus vt hominum ingenia sollicitet, atque exacuat.

Sed redeo ad lignum, in quo non solum acrimoniam (de qua dictum est satis) damnant, sed exiguum quoque amarorem: quamobrem Nicolai Masse testimonium non fuit silentio inuoluendum ex tractatus tertij capite secundo, vbi hac leguntur. Et lignum quod plus
 „ habet de substantia intrinseca nigra, est melius; hac
 „ ibi, paulo vero post, & ad gustum est cum aliquali amaritudinem, sed non manifesta multum. His ergo Massa
 „ plane lignum describit, de quo agitur, in quo acrimonia superat amaritudinem, & nigrum habet meditullium, vt iam satis dictum est. intelligimus autem ex hoc eodem Masse loco, lignum hoc nouum non esse, nec nuper ab Indis delatum, nec esse ob exiguam amaritudinem reijciendum. In curatione vero luis venereę sudor maxime desideratur, cuius prouocandi facultas maxime posita est in acris medicamentis (quę tamen deleteria non sint) hæc enim incidere, & per halitum digerere, optimus auctor Galenus docuit lib. 4. de medicam. simpl. cap. 19. Quicquid vero dicatur de coloris, saporis, & odoris differentia, de corticis crassitie, duri-

tieq;

tieque, de ligni densitate, & pinguedine, numquam aliquis efficiet, ligna ante dicta differre inter se, nisi ut ficus à fico, pirus à piro, nux à nuce differt, & similia.

Iure itaque pronuntiatum est, lignum propositum esse ligni sancti speciem, immo esse vere lignum sanctum, iuxta vulgarem horum lignorum appellationem, cum omnia promiscue eo nomine vulgo appellentur, relicto tamquam barbaro vocabulo Guaiacam. iureq; tandem probatum est, tamquam ad luem veneream curandam aptissimum. De qua re si cum docili ingenio agatur, iam plus satis dictum est, si cum cerebrosis, durisque capitombuss, numquam satis.


F I N I S.





ERRATA.

Pagina 10. versu 19. habens, lege, habent. 16. 5. triginta, lege trigintatribus. 16. 11. septem, lege, septem. 21. 18. secundnm, lege, secundum. 22. 2. interpretationem, lege, interpretationem. 22. 9. oriuntur, lege, oriuntur. ibidem. diebus ergo, lege, diebus, ergo. 27. 17. factum, lege factam. 30. 7. namque, lege, namque. 30. 9. potuisset, lege, potuisset. 30. 26. exceptic, lege, exceptio. 31. 24. euideus, lege, euident. 34. 5. patefecerent, lege, patefacerent. 35. 1. Brasauodi, lege, Brasauoli. 36. 5. quodque in eius, lege, in cuius quoque. 37. 5. lege, decipi. & solent pharmacopoeiae amygdalarum affricu ruborem quendam hic lignis inducere. 40. 10. quemadmodum, lege, quemadmodum. 46. 18. Monardus, lege, Manardus. 53. 24. latronnm, lege, latronum. 56. 20. & 22. lege, & 28. 57. 25. damnabat, lege, damnabant.



EX QVINTO LIBRO variarum obseruationum

MARSILII CAGNATI

NOMINA HÆC PARVM

NOTA ENARRANTVR,

Pharmacopola, Aromatarius, Seplasiarius, Ropopla,
Catholicus, Vnguentarius.



DARMACOPOLA, cum
Græcum sit, Latine dicitur Aro-
matarius (quamquam & hu-
ius origo nominis Græca est,
nec nomen hoc exstat apud au-
ctores) dicitur etiam Seplasia-
rius; quod nomen legitur apud

Lampridium in Heliogabalo; a quo nomine potius du-
ctum puto vulgare hoc, Speciale, quam à speciebus.
quo ab Hermolao Barbaro dissentio. Estque Seplasia,
& Seplasium vox antiquissima, & neutri, & femi-
mini generis, vt Nonius ex Varrone prodidit. Lati-
nis tamen video placuisse magis nomen, pharmacopola,
Horatius, Ambubaiarum collegia, pharmacopola. M. ”
Cic. pro Cluentio, L. Clodium pharmacopolam, qui tum ”
casu larinum venerat, aggreditur. tamen vox est me- ”
re græca, à vendendis pharmacis dicta, vt legitur apud

*Aristophanis interpretem Nebulis. Plinius Seplasiā
 non semel dixit, & ab eo accipimus Seplasarium, &
 pharmacopolam eundem fuisse. nam libri trigesimi-
 quarti capite undecimo, accusat medicos, qui ē sepla-
 sia iampridem facta emplastra, & collyria mercaban-
 tur (par est autem loco exempli collyria, & emplastra
 memorata) quo significat, à seplasię professoribus va-
 ria consueuisse medicamenta parari, & venalia exponi,
 vel in eorum apothecis custodiri. Sed, simplicia quoque
 ab eisdem vendi solita, significavit libri decimi Sexti
 capite decimo, cum dixit, Seplasiā pro thure gemmā
 quamdam ex picea supponere. Seplasium neutro gene-
 re locus olim fuit Capuę, de quo illud ex Varrone No-
 nius retulit, Doti dato insulam Chium, agrum Cecu-
 bum, Seplasia Capuę, macellum Romuli: quamquam
 & genere feminino dicta est à M. Cicer. in Pisonem,
 Seplasia dignus, & Capua, & contra Rullum, & in
 Albana, & Seplasia, quę concursatio percontantium.
 Hermolaus autem Barbarus in castigationibus Plinia-
 nis ad libri tricesimi quarti caput undecimum, inquit,
 Erat ergo Capuę Seplasia, qualis Romę vicus vnguen-
 tarius: ac fortasse Vnguentarij Seplasiā incolebant,
 quod M. Cicero in eadem in Pisonem, cum de Seplasia
 dixisset, subiunxit, Gabinium si vidissent vestri illi
 vnguentarij. certe seplasia locus erat mercibus instru-
 ctus, quę ad luxuriam, & voluptatem plurimum va-
 lerent, itaque Annibalem Valerius Maximus dixit,
 Seplasię delitijs euiratum. Est autem consentaneum, a
 Sepla-*

Seplasia dictos Seplasiarios, qui scilicet illic suas merces venaleis exponerent, & in apothecis custodirent. quæ tamen merces non solum voluptati, sed bonæ quoque valetudini inferuissent: cuiusmodi emplastra, & collyria, quæ Plinius dixit medicos e Seplasia mercari solitos. quorum exemplo accipimus compositiones valetudini dicatas in Seplasia vendi consueuisse, ut simplicia quoque vendebantur, ut ante de thure diximus, & Aristophanes Nebulis gemmas à pharmacopolis vendi indicauit inquiens, ἤδη δὲ τοῖσι φαρμακοπώλαις τὴν λίσσον ταύτην ἐώεας τὴν καλὴν, ubi græcus interpres ait, pharmacopolas proprie dictos, qui pharmaca vendunt, siue sint illa salubria, siue letalia, sed a priscis vocatos etiam pharmacopolas, qui lapillos vendebant pretiosos.

Verum dubitari potest, sit ne idem pharmacopola, quem Galenus lib. 3. cap. 3. & lib. 4. cap. 5. de compositione medicamentorum secundum genera ῥωποπώλην vocauit (quam vocem alibi non usurpauit, quantum memini, nam, qui librum primum de antidotis adducunt, falluntur, quia illic non ῥωποπώλαι, sed μυεσπώλαι legitur) quem latine institorem Andernacus dixit, in illis videlicet verbis, credunt institoribus vetus oleum dare se affirmantibus, πιστεύουσι ῥωποπώλαις, at græci sermonis interpretes aiunt, eo nomine significari unguentarios, & seplasiarios, item, iuxta nominis etymon minutarum, & variarum rerum venditores, cuiusmodi qui nunc Romæ pizzicaroli vulgari nomine vocantur,

qui multum differunt a pharmacopolis.

Quid vero significat apud Galenū libri primi de Antidotis initio, Euphrati medicæ materiæ venditori? nam græce legitur, Euphrati catholico. Sane ignotū est mihi, vnde Rota acceperit, vocem καθολικόν, significare medicæ materiæ venditorem, idest pharmacopolam. significat enim vel rationalem, ut in glossis, vel naturalem, ut apud Lacones Hesychio auctore, vel propinquū, siue agnatū, ut in eisdem glossis. qui catholicum vertunt, vniuersalem, ij demonstrant, se græce nihil scire. At, demum, crediderim, Euphrati illi cognomen hoc, Catholicum, quacumque de causa, inditum. Hæc igitur docent nos, pharmacopolam & Seplasiarium, eundem fuisse. an vero idem fuerit, qui a nobis aromatarius, & vna omnium professio, an potius diuersa, ipsi docebunt aromatarij.

Sed quis nam erat vnguentarius, quæue eius professio? μωερωλά, græce a vendendis vnguentis dictus, quo Galenus vocabulo sæpe vsus est, & eius interpretes pro eo vnguentarium dixerunt. Vnguentarium vero vnguentorum fuisse venditorem, accipere est ex Varronis libro de lingua Latina septimo, cum dicat, Vnguentariam tabernam vocatam, quod in ea venirēt vnguenta, ut vina in vinaria, &c. Non erat autem idem qui Seplasiarius, hic enim emplāstra, & collyria conficiebat, & alia, ut dictum est, quæ medici mercarentur gratia valetudinis, illi vero in vnguentis tantum ad delitias, & voluptatem occupabantur.

De dignitate vero dictorum artificum quid veteres
senserint, conijcere est memoria repetentibus Lycurgū,
& Solonem vnguenta, & vnguentarios expulisse, ut
alibi ex Plutarcho, Seneca, & Athenæo dicebamus: &
M. Tullium libro priore de officijs ea scripsisse, minime
artes hæc probatæ, quæ ministræ sunt voluptatum, ceta-
rij, Lanij, Coqui, Fartores, Piscatores, ut ait Terentius;
Adde his, si placet, Vnguentarios, Saltatores, totumq.
ludum talarium. De pharmacopolis vero illa Horatij
sunt notissima, Ambubaiarum collegia, pharmacopo-
la, & c. Seplasiam vero ut fraudum studiosam Plinius
non semel notavit. & Lampridius de Heliogabalo, pin-
xit se ut cupedinarium, ut Seplasiarium, ut popina-
rium, & c. Nostri vero siue Aromatarij, siue pharmaco-
polæ, siue Seplasiarij, a veteribus illis plurimum diffe-
runt, etenim voluptati non inserviunt, sed valetudini,
ergo non vnguentarij, officio quidem similes pharmaco-
polis, & Seplasiarijs, sed honestate, & dignitate cum
illis non comparandi: est enim Seplasia nostrorum sta-
tis limitibus septa, & legibus firmata, vnde professo-
ribus decus, & Reipublicæ commodum affertur.

Sed cum aliqui vellent de pharmacopolarum digni-
tate aliquid honestius commentari, eos audio existima-
re, nomen pharmacopola, dictum esse de medicis vulga-
ribus, non de ijs, qui officinas aperiunt pharmacis in-
structas venalibus, quor hodie vocamus aromatarios.
hoc vero idcirco sibi persuasum, quod Galenus Mantiū,
ex vetustissimis medicis, pharmacopolam vocauerit

lib. 4. καὶ ὅν, c. 14. eundemque fuisse vulgarem medicum ostendit lib. 2. καὶ τόπας, c. 3. inquit, fuit itaque Archigenes vulgaris medicus, velut & Mantias, & Heraclides empiricus. item lib. 7. καὶ τόπας, c. 3. Pamphilum quemdam vocat pharmacopolam, quem fuisse vulgarem medicum significavit initio lib. 6. de simpl. med. facult. & lib. 1. de dieb. decret. c. 2. inquit, reuera medicum, non pharmacopolam quemdam ex trivio. Verum hac sunt plena erroribus, ac primo Mantiam Galenus non solum cum præclaris medicis recensuit lib. 5. simpl. initio, sed, cum esset Herophilus, præceptorem fuisse Heraclidis Tarentini, qui postea defecit ad empiricos; scripsit ipse Galenus lib. 6. καὶ τόπας, c. 4. & lib. 2. καὶ ὅν, c. 1. ait, eundem Mantiam primum omnium, quos novit scripsisse compositiones multorum laudabilium medicamentorum. quem sit Heraclides Tarentinus, eius discipulus, imitatus non solum in usu pharmacorum, sed etiam in ea artis parte, quæ victus rationem docet: quo nomine sæpius alibi eum laudavit, ut intelligere sit, non fuisse vulgarem, sed egregium, & præstantem medicum. Nec recte accepta sunt illa Galeni fuit Archigenes non vulgaris medicus, veluti & Mantias, & Heraclides. quorum sensus non is est, quem hi arbitrantur, sed omnino contrarius: significant enim, Archigenem non fuisse vulgarem medicum, sicuti nec Mantias nec Heraclides fuere. recta enim dicendi forma requirit, ut comparatio fiat inter similia. Sic idem Galenus lib. 2. καὶ ὅν, c. 1. Post quos alij sane quidam non paucis volu-

7
voluminibus, sicut Mantias, & Heraclides, &c. quibus non significat, Mantiam, & Heraclidem pauca volumina scripsisse; quos multa scripsisse, alibi docuit; sed sicut alios quosdam, ita & Mantiam, & Heraclidem scripsisse non pauca. & hoc est ex sequentibus manifestum, sunt etiam qui uno, aut altero tantum ea conscripserunt. ergo superiora omnia sunt de ijs accipienda, qui non pauca scripserunt. Similiter igitur & Mantias, & Heraclides fuerunt medici non vulgares. cui consentiunt reliqua de eisdem a Galeno dicta. sed, deinde, nusquam Galenus Mantiam vocavit pharmacopolā: & ille locus ex lib. 4. & 2^o c. 14. falso adductus est, quia non est scriptum, Mantiae pharmacopolē, sed pharmacopola, uti græce Μαντίας φαρμακοπῶλης. ut Mantiae sit casus genitiui, pharmacopola vero nominatiui. ex hac vero recta, & vera lectione manifestum est, pharmacopola non esse dictum de Mantia, sed de libro, quem Mantias scripsit eo titulo, Pharmacopola, quod perinde erat, ac si scripsisset, de pharmacopola, iuxta ea, quæ de inscriptionibus librorum, quæ apud veteres in usu fuerunt, Galenus scripsit initio commentarij ad librum Hippocratis de officina medica. ergo non significatur eo nomine vulgaris medicus, sed qui vere est pharmacopola. Pamphilus vero (de quo secundo loco dictum est) fuit quidem pharmacopola, sed nusquam eundem Galenus vocavit medicum. quod si fuisse medicum credamus, quia cum multis medicis à Galeno recensetur lib. 6. simpl. initio, non eo efficitur, nemem, pharmacopola,

la, significare vulgarem medicum, quia non constat, Pā-
 philum medicum, de quo lib. 6. Simpl. & pharmacopolā,
 de quo alibi, eundē fuisse, nisi quoque velit aliquis nos
 docere, Episcopum pro medico vulgari, vel pharmaco-
 pola sumptum, namque Phamphilum alias pro medico
 habitum, alias vocatum pharmacopolam, Aëtius ad fi-
 nem sui voluminis vocauit Episcopum. Nec mouent il-
 la quoq. ex primi lib. de dieb. decret. c. 2. reuera medicū,
 non pharmacopolam quemdam ex triuio. in his enim a-
 liud medicus, & aliud pharmacopola significat, & dā-
 natur medicus, qui in egris curandis officium sibi ven-
 dicat pharmacopolæ, & suum deserit. Nec, demum, apud
 Ciceronem (nam & hoc adduci video) in illa pro Cluen-
 tio, pharmacopola circūforaneus pro medico dictus est.
 nam Cicero prioribus verbis mentionem medici fecerat
 quem illa mulier recusauerat, qua propter pro medico
 circumforaneus pharmacopola adductus. quid ergo co-
 git, vt non accipiamus pharmacopolam proprie, qui tū
 miscendis, tum vendendis pharmacis operam nauat?
 Sed in vocabulis antiquis interpretandis non licet in-
 genio vti, & arbitrio, sed auctorum opus est testimonio.
 itaque & illud temeritatem sapit quandam, quod apud
 Horatium, Amburbaiarum collegia, pharmacopolæ, nul-
 lo auctore, aut teste, medicum, vulgarem licet, interpre-
 tantur.

Sed acutus aliquis, & eruditus fortasse existima-
 ret, doceri posse pharmacopolam, eundem fuisse, & me-
 dicum, quoniam Galenus ad medicorum institutionem

scripsit libros de compositione medicamentorum, in qui-
 bus non tam vires compositionum, quam componendi ra-
 tionem enarrat, & docet, & à se, & ab alijs medicis
 multa medicamina composita esse testatus, quod notum
 est, & in eius commentarijs tam obuium, ut superua-
 caneum omnino sit locum de hac re vel vnum indicare,
 nedum exscribere. ut mirari quoque non liceat, Pli-
 nium lib. 34. cap. 2. accusasse medicos, quod medicami-
 num compositionem seplasiae reliquissent. erat ei scilicet
 sermo de shuama æris, & flore, inquit autem, atq. hac
 omnia medici, quod pace eorum dixisse liceat, ignorant
 pars maior, & nominibus: in tantum a conficiendis
 his medicamentis absunt, quod esse proprium medicorū
 solebat. credunt Seplasiae ea omnibus quidem fraudi-
 bus corrumpenti. facta q. iampridem emplastra, & col-
 lyria mercantur, tabesque mercium. Verum hæc quan-
 tum ad historiam, & priscae consuetudinis memoriam
 dicta sunt optime, ac verissime. Sed his non efficitur,
 quod erat propositum, medicum eundem fuisse, & phar-
 macopolam. Sunt enim officia duo, alterum est vendere,
 & venalia in apothecis pharmaca custodire: & hoc
 fuit proprium pharmacopolarum, ut notatum est ab A-
 ristophanis græco interprete illis verbis ad Nebulas,
 φαρμακοπώλαι κυρίως οἱ τὰ φάρμακα πωροῦσιντες, τὰ γὰρ λυ-
 σιτελοῦντα, & τὰ θανάσιμα, ὅσα δὲ τοῖς παλαῖοις ἢ οἱ τοῦς π-
 μαλφεῖς ἴσθ' ὅτι πολυήμους λίθους πωροῦσιντες. φαρμακοπώ-
 λαι ἤγεροντο. hoc est, Pharmacopola proprie pharmaca
 vendentes, & quæ salubria, & quæ letalia, apud pri-
 scos

scos vero, & qui splendidos, hoc est, pretiosos lapillos
 vendebant, pharmacopola dicebantur. hac ille, qui non
 dixit, ut nec alius quisquam, pharmacopolas fuisse me-
 dicos, vel vulgareis, vel egregios. Sed significauit
 aperte eosdem esse, *Φάρμακα πωλούντας & Φάρμακα πο-
 λλόντας*, id est, pharmacorum venditores, unde no-
 men *Φαρμακοπώλαι* hoc itaque testimonio intelligimus
 vendendi pharmaca officium & nomen conuenire. Al-
 terum est officium componendi medicamenta, scilicet sim-
 plicia miscendo compositiones varias, construere: quod
 sane fuit medicorum, qui ut compositionum inuentores
 fuerunt ita & conditores earundem fuisse olim non ne-
 gantur. fuisse inuentores, quis ignorare potest? ecqui
 plantarum, & aliorum simplicium historiam descripse-
 runt, & de componendi ratione commentaria edide-
 runt? sane ij non pharmacopola aliqui, sed philosophi, ac
 medici magni nominis, Theophrastus, Dioscorides, Ga-
 lenus, Mesueus, Avicenna, ne minus celebres tam
 priscos, quam recenteis memoremus. eosdem vero me-
 dicos pharmaca composuisse, vel proprijs manibus, vel
 per ministros, quibus ipsi assiderent componentibus, do-
 cent ea, quae paulo ante narrata sunt. Sed tandem
 medici visitationibus occupati, & grauioribus cogita-
 tionibus districti a se inuenta, & descripta pharmaca
 componendi munus ipsis pharmacopolis reliquerunt, nisi
 etiam visum sit officium minime congruens ceteris, in
 quibus medici versantur. Sed non est solum medicis ho-
 nestius, verum agris quoque utilius, quo sint parata,

& in promptu omnis generis medicamenta; quæ res pe-
 culiarem quandam exercitationem desiderat: esse vi-
 ros bonos pharmacopolas, qui scite, ac diligenter confi-
 ciant, & venalia in apothecis medicamenta cum fide
 custodiant. Interim tamen nostri muneris nos obliui-
 sci non decet, quorum architectonica (vt dici solet) prin-
 ceptis profectio de cæteris sibi subiectis artibus indi-
 cat, & idcirco, quæ ab illis tractantur, cognoscere debe-
 mus: sicut enim frænorum ars conficiendorum equestri
 subiecta est, ita medicinae subiecta est facultas conficien-
 di medicamina, siue illa sumantur ore, siue foris impo-
 nantur corporibus. Sicut ergo, qui fræno est usus, &
 eques cognoscere debet, vtrum probe confectum sit fræ-
 num, verum materia fræni apta, qua frænum consi-
 stat, & aptum sit, quamobrem equus domino obtem-
 perans reddatur: ita medicamentorum formam, &
 speciem, & materiam agnoscat medicus oportet, si fu-
 turum sit, vt opem ex eis ægroti recipiant. Nec possunt
 sine graui culpa medicorum hæc ignorari, quæ sibi, quã
 pharmacopolis, notiora esse debent: nam quiuis artifex
 de suorum bonitate, & integritate instrumentorum
 cognoscit, & iudicat. Sed de his hæctenus. Vana igitur,
 & falsa est interpretatio eius, qui nomen phar-
 macopola usurpatum commentus est, nullis auctoribus
 ac testibus, ad medicum vel vulgarem, vel egregium
 significandum.

A P P E N D I X

DISPUTATIONIS

DE MORTE

CAVSSA PARTVS

A D I V L I V M B E N I G N V M I. C.

Clarissimum, in Romana schola professorem
primarium, sacrae Consistorialis aulae,
& pauperum aduocatum.

Marfilius Cagnatus.



E R M O ille, quem habuisti mecum
proximis diebus, Iuli ornatissime,
postquam typis data erant, quae de
morte caussa partus scripseram; cum
diceres, videri quidem tibi, me apte
satis ad rei naturam explicandam

scripsisse, sed laxam nimis viam exceptioni; cuius caus-
sa scripseram; fecisse; me adduxit, vt hac ad te perbre-
ui epistola summam fere quandam rei disputatae, & ve-
luti appendicem antea scriptis adiungerem, & adhuc
nonnihil adumbratam sententiam meam, colore quo-
dam inducto, magis exprimerem.

Exceptio igitur, iam recepta, non vt inanis apponi-
tur,

tur, sed ut efficax sit. quo autem pacto efficax sit, hoc definire necesse est. Cum itaq; partus per se causa mortis minime sit; quia res est maxime naturalis; debet partui aliquid accedere, quod valeat per se mortem inducere. Sed considerandum est in primis, duas esse in exceptione particulas, scilicet, ex partu, & causa partus, & prepositionem, ex, in prima particula, significare, quod Iuris Consulti dicunt, causam immediatam, quia contingit mulieres nonnullas, ex partu difficili & laborioso confestim interire, vel quia fetus grandior, quo nomine primiparae praesertim laborant; vel quia egreditur in pedes, vel in nates, pedibus ad caput conuersis, & similia, vel quia fetum in utero extinctum necesse est vi magna extrahere, quem laborem non ferentes aliquae subito intereunt, cuius interitus non alia est causa, quam partus difficilis, ideoque mulier ex partu defuncta dicitur. Altera vero particula, causa partus, non idem significat, quod prima, nec frustra creditur apposita. Diximus autem, partum per se numquam esse causam interitus, sed ex accidenti (ut dici solet) & oportere partui adiungi aliud, quod per se letale sit, & vera sit causa mortis. Verum dicitur, causa partus, quia ad causam illam interitus veram adiuncti partus labores, rem periculosiorem efficiunt, neq; aliud in hac secunda particula nomen, causa, significare potest, quam occasionem; est autem occasio tempus aptum ad aliquid faciendum, vel patiendum; & causam pro occasione accipi, notius est, quam hoc loco debeat explicari.

cari. Quod vero per se potest puerperam interficere, hunc necesse est morbum esse, quem non producit ipse per se partus, sed si quæ caussa morbi ad partum accesserit. quæ tum interna, tum externa potest esse; & morbus potest oriri in ipso partus articulo, vel paullo post eodem die, vel postridie, vel multis post diebus vsque ad trigessimum in maribus, vel quadragesimum secundum in feminis; hi namque termini sunt, intra quos puerpera, eo nomine, quo peperit, obnoxia morbis est. Hisque intelligimas (si attentius inspiciamus) nec ipsum partum difficilem ante dictum per se interficere, sed ob id, quod ei accedit præter naturam, quamobrem cum labore maximo vterus aperitur, & tamquam vulnere magno, & letali afficitur. itaque cum dicitur, ex partu, ad significandum (ut dictum est) causam immediatam, illud potius dicitur, quod videtur, & existimatur, quam quod vere est. Interim igitur, dum rei naturam sequimur, mortem dicimus induci à morbis ad partum accedentibus (à quacumque caussa etiam externa nascentur) si non ultra dictos terminos oriantur; licet ultra producerentur: etenim morborum exortus observandi, non exitus; eaque videtur mens fuisse contrahentium, exceptionem tamdiu locum habituram, quamdiu manet periculum, quod imminet ob partum: manet autem toto dicto tempore, habita sexus ratione. Si vero spatium hoc fæuoris ratione laxum nimis videtur, lege est definiendum, intra quot dies à partu, morbus eiusmodi censendus sit, qui exceptioni locum præbeat. & defi-

niendum quoque, *utrum exceptio recipienda sit, vel
reijcienda, cum morbi à caussis externis intra di-
ctum tempus nascuntur. quorum quia neutrum lege
definitum est, ideo rei naturam consideramus, & se-
quimur.*



typ. in Aula Acad. Nat. Curiosorum 64 A

HISTORIA EPIDEMICA HUNGARIÆ,

in qua

plane singularia cum de aliis, tum de morbis acutis, in
primis vero de febre petechiali, morbillis, variolis,
dysenteria &c. recensentur,

conscripta

ab

ANDREA LOEW,

Nobil. Sempron. Hung.

Phil. & Med. D. Phys. Sempr. Ord. Acad. Cæs.

Leopold. Natur. Curios. Collega.

nunc vero

fidelissime communicata

a Filio

CAROLO FRIDERICO LOEW

Regiæ Legationis Suevicæ Medico

Ordinario.

MVSEVM
BRITAN
NICVM

BRITISH MUSEUM
SALE DUPLICATE
I 7 8 7

Illustrissimæ Societatis Natur. Curios. ad pro-
vehenda artis salutaris, & naturalis scien-
tiæ incrementa

Cæsareis auspiciis in Germania
conditæ

Præfidi

Perillustri, atque Excellentissimo

LUCAE SCHROECKIO,

Phil. & Med. D. Acad. Leopold.

Imper. N. C. Præfidi, S. C. Maj. Archiatro,

Comit. Palat. S. R. I. Nobili, Reip. Patr.

Phys. primario,

Atque

Ceteris Amplissimi Ordinis Sociis, Munerum
splendore, meritorumque in rempublicam & litera-
riam amplitudine Eminentissimis, Dominis, ac Patronis

summopere observandis, obsequii, honoris &
gratæ mentis declarandæ

causa

Hanc Historiam Epidemicam Hungariæ

D. D. D.

C. F. L.



Xpendenti mihi illum, in quo collocati estis, dignitatis gradum, qui literarum, & artis præcipue salutaris decori, ornamentoque datus est, subit animum vereri, ne intempestiva interpellatione, pro favore Vestro, quem ambio, offensionem concitem. Quid enim magis metuendum homini, suæ sibi tenuitatis conscio, & illis Viris obstrepenti, in quibus tantum gravitatis, altissimæque in omni divini, humanique cognitione decoris, scientiæ, quantum prudentiæ, omnium casibus temporum paratissimæ lumen elucet? Hæc autem tanta, tamque exquisitæ scientiæ, prudentiæque laus, quam insigni accessione cumulat singularis comitas, illud efficit, ut in ea, in qua pro commodis publicis excubatis specula, tot meritorum, humano generi utilissimorum, luce collustrati, & explendescentes, cunctorum recte sentientium animos in Vos convertatis, ut observent Vos eruditi, & revereantur. Horum quidem ego cunctis quamquam ingenio, & scientia facile, nemini tamen unquam nec cessi, nec cedam ulla in Vos observantia, quam Vobis non minus debeo, quam profiteor, quippe Amplissimi Ordinis Vestri iudicio perbenigne ornatus, & dignus æstimatus, quem in numerum sociorum Acad. Nat. Cur. cooptaretis. Longum esset, atque ab hoc alienum loco, cetera referre benevolentiae genera, quibus a Te, Excellentissime Præses, aliisque Amplissimi Ordinis Vestri membris sum ornatus: talibus certe, ac tantis, ut nullum gratiæ pro iis referendæ dignum locum

cum reperire possim. Invitat etiam me, &, nisi me tanto honore indignum præbere velim, ad sui venerationem festinare cogit proluxa humanitas, qua me estis profecuti, sive Vos coram, præstita clientis obsequentia, salutarem, sive absens colerem epistolis, meisque subdiffusus rebus, consilio uteretur Vestro, aut opem simul peterem, & sine recusatione impetrarem. Igitur tantis meritis adductus dudum intellexi ad me pertinere, sollicitè contendere, & eniti, ut aliquod grati animi pignus, non sine debita submissione Vobis consecratum aliquando extaret. Diu cogitanti de digna tantis Viris probanda gratæ mentis significatione, beati parentis scriinia excutienti oblata videbatur materia, luce publica non indigna. Huic vero ut sese magis probaret, non alia ratione felicius me consecuturum existimavi, quam si Vestris Amplissimis Nominibus inscriptum opusculum prodiret. Sed tamen vicissim subvereri veniebat in mentem, ne eminentis cujusdam insimulæ audaciæ, qui Vestris Nominibus, in tam alto, splendidoque positis loco, opusculum tam humile, tam nullo expolitum cultu, insignire coner. Nam cum Vos ii sitis, qui acerrimo judicio singula pensitant, & non nisi exquisita arte elaborata suo aspectu dignantur, metuebam, ne apud Vos longe, quam optaverim, minus gratiæ hoc ineam tempore, quo mihi totus ipse displiceo: quid agendum fuerit, serius cognosco: quid actum sit, video, ac, perturbato decoris ordine, post rem affero consilium: tantum abest, ut expectationem Vestram ulla ratione sustinere possim. Jam demum agnosco, habendam fuisse rationem mentis, cum compositæ, cujus est, secum consistere, ac morari: tum circumspectæ, pro qua non decet efferri præcipitis impetu consilii, sed rationem, instruendæ actionis ducem sequi; denique & verecundæ, ut, quorum reverere dignitatem, horum præstantiæ quid conveniat, existimes, horum oculis, quæ sint indigna, sollicitè devites: cum omne judicii, gravitatisque pondus, omniaque ingenii ornamenta postulare sibi videatur ea res, quæ tantis, tamque

intelligentibus rerum arbitris, existimatoribusque probari vellet. Sed vicit tandem omnem dubitationem, quæ ab hoc officii cursu me revocare poterat, par fastigio Vestro humanitas, & comitas, qua bonas mentes permulcetis, & erigitis. Igitur sicut viribus diffido meis, ita religionis conscientia me sustentò, hacque confisus, a Vestra benignitate consilii mei veniam demisse, observanterque peto, sine ulla etiam dubitatione expecto, & quantæ venerationis, tantæ fiduciæ plenus Vobis, Viri Amplissimi &c. &c. præsens opusculum sic offero, ut omnem obsequii cultum Vobis in perpetuum simul obstringam, & plura propriæ diligentiae documenta, in ceterorum annorum constitutionibus, tanto sollicitius observandis promittam, quo citius, & clarius intellexero, non displicere Vobis institutum meum. Reliquum est, ut Vobis spes, fortunasque meas commendem, Vos artis salutaris cultorum præsidio, rebus familiæ Vestræ constanter florentibus salvos semper, & incolumes servari discupiam, idque a DEO immortali omni votorum pietate precandum Vobis ducam, & continenter exorandum,

Vestrorum

Perillustris, Excellentissimique,
Amplissimorum, Nobilissimorumque Nominum

obsequentissimus, observantissimusque

C. F. L.

Con-

Constitutio Epidemica Posoniensis Anno 1688.



Nni tempora, prout variant, suos habere morbos certos jam pridem *libr. 3. Aphor. 21.* recte annotasse *Hippocratem* præsente anno abunde confirmavit experientia. Scilicet *menſe Julii & Auguſti* cum cœlum quaſi flammæſet caloribus, & pluviarum ferme toto illo tempore expers fuiſſet, quibus alias intemperies aëris ſicca temperanda & corrigenda, *Febres* ſolito magis in hac urbe graſſari ceperunt. Quorum principia cum horrore, vomitu, naſea ægrum occuparunt, ſubſequentibus ſtatim caloribus, ſiti, dolore capitis, virium proſtratione ſumma, cardialgia, ut plurimum dies nocteſque durantibus, aſt biduo poſt, adhibitis ſudoriferis, in *intermittentes* ut plurimum febres, modo *tertianas*, modo *quotidianas*, imo *quartanas*, per intervalla ſecundum ſuum typum repetentes, terminantibus. Tantam autem hæ febres benignitatem in ſe fovebant, ut raro adminiſtratis legitimo modo remediis, h. e. *V. S. Anti-febrilibus ex* \ominus *card. ben. abſinth. centaur. min. lap. cancr. chinchin. arcan. dupl. flor. nitr.* aliisque, ultra octiduum ſeſe extenderint, quin penitus remiſerint. Non ſenſerunt has febres tantum proveſtoris ætatis homines, verum etiam infantes lactentes & ablactati, ſine ullo ætatis discrimine. In nonnullis deprehendebantur *continua*, dies nocteſque ægrotos affigentes, & *V. S. ſudoriferis ordinariis, nempe ſpec. de hyacinth. antim. diaph. ſpec. de gemm. frig. mixtura mea ordinaria &c. cum confortantibus* junctis, tractatæ, omnes terminum ſuum elapſo 15. dierum ſpatio benigniſſime abſolventes. Hiſce continuis annumeranda quoque fuit *Pemphix*, vulgo *Neſſel-Kranckheit* dicta, tunc temporis graſſata, quæ ægrotos, (qui quaſi urticæ urentis vim eſſent experti,) excrucia- vit pruritu, tumore permagno variæ magnitudinis in toto corpore, modo imperialis, modo floreni, modo groſſi, modo totius cubiti, ſuperficiem cutis occupante, eamque in veſicas non adeo rubras, ſed magis albas attollente, mox recedente, mox redeunte, aliisque ſymptomatibus febres continuas malignas alias concomitantibus. Quæ febris licet aliis temporibus *benigniſſima* adhibito ſudorifero intra biduum remittere ſoleat; nunc tamen admodum *maligna* more continuarum ſua decurrit tempo-

tempora, propinatis autem *medicamentis diaphoreticis, expellentibus temperatis &c.* DEO benedicente apud omnes felicissime XV. die superata. Observavimus etiam, quod notatu dignum & perrarum, tunc temporis certam febrium speciem, quæ fuit *complicata ex febre quotidiana continua & tertiana*, una die binas habens exacerbationes, altera unicam, quam *Hemitritæum* appellare placuit. Fuit absque horrore, cum continuo calore, ingenti præcordiorum compressione, ut de continuis constrictionibus pectoris conquesti fuerint, siti inexplebili, intensioribus tamen hisce tempore exacerbationis, cum vigiliis, deliriis, diarrhœis, in primis virium prostratione summa, ut semper animi deliquia metuenda fuerint. Febris hæc admodum periculosa continua ingentem reconditam habuit malignitatem; quapropter more aliarum febrium malignarum, v. gr. *V. S. sudoriferis, expellentibus, confortantibus mixtis, ordinariis*, ratione tamen habita symptomatum urgentium, tractata felicissime intra XXI. dies fuit subacta atque ejecta, superstiti quidem adhuc aliquali pectoris compressione, *Laxativo* tamen medicamento sub finem exhibito, penitus sublata.

Constitutio Epidemica Sempronienſis Anni 1697.

NON quivis annus quosvis fovet morbos, multo minus una eademque symptomata. Prouti anni variant tempora, ærisque tempestates, sic quoque morbi, qui nunc benigniores, nunc peiores, multorumque fune-rum nonnunquam causæ existunt. Hoc jam dudum observavit, ac *toto libro III. Aphorismorum* nobis demonstravit maximus Græciæ Doctor, *Hippocrates*. Et quis non videt, diversum æris statum humores modificare morbificos, eosque disponere, pro diversitate locorum aliarumque circumstantiarum, ad producenda symptomata, quandoque graviora, aliquando mitiora. Id videre licuit *anno 1697.* quo *hyemem rigidissimam* experti sumus. Produxit intensissimum illud frigus non solum *varios pectoris morbos, catarrhos, coryzas, gravedines, tussesque vehementiores*, sed & transpiratione impedita, lympham disposuit in coagulum pronam; adventante *vere*, liquatisque macrocosmi humoribus, lymphæ hæctenus torpida apud plurimos varias subiit mutationes; inde in quibusdam *febres tertianæ* subortæ, in plerisque *febres continuæ, pleuritides spuria, malignitatis expertes*; in plurimis, imprimis *sub finem Aprilis, Maji, Junii, Julii*, quo tempore magis efferationes biliosæ ob excessivum calorem ambientem notabantur, *febres petechiales Epidemicæ*. Referam ex morbis, quos hoc anno perlustravi, solum præcipuos. Inceperunt *petechiales* more solito cum rigore,

rigore , caloribus p. n. siti , anxietate præcordiorum , quandoque vomitu , doloribus capitis , insueto artuum languore , sine causa manifesta , cum insigni extremorum lassitudine , ut plurimum quarta , aliquando septima demum die maculæ effloruerunt petechiales , in quibusdam copiosiores majoresque , in quibusdam minores ac parciore. Deliria sexto jam , septimo , octavo morbi die supervenientia , boni fuere ominis. In illis enim decima quarta vehemens notabatur obsurdescentia , & decima quinta caloris , adeoque morbi solutio. Si serius , v. gr. 10. 11. 12. contigerunt deliria , atrociora symptomata , nec non malignitatem prænuuntiarunt summam , nullusque expectandus fuit motus criticus , sed paulatina solutio. Observavi hoc in quamplurimis , in primis in Cive hujus loci primario , ex itinere sexta morbi die reduce. Septima , adhibito uno vel altero *medicamento expellente , bezoardico* , vidi corpus petechiis copiosissimis rubris conspersum ; eodem die notavi summam in somnum propensionem , vix non dispositionem lethargicam. Vesicatoria quippe aliquot applicata ægrum a somno abstrahere non valuerunt , & excitatus licet quandoque comederit , medicamenta *expellentia , sudorifera , epileptica , confortantia* sedulo assumerit , subito nihilominus in somnum recidit , salva manente respiratione ; accesserunt 10. die deliria : excitatus enim ex suo profundo somno , & interrogatus minus apposite , minus ordinate respondit , desubito in somnum relabens. Die undecima & sequentibus supervenerunt motus convulsivi , diarrhœæ , involuntarius urinæ fluxus , summam , symptomata exitiosa. Decima quinta calores p. n. observavi longe remissiores , pulsum naturali similem , somnum autem adhuc profundum. Si exsuscitatus fuit patiens , neminem agnovit , torvis oculis vidit , ad interrogata mullitando , minus intelligenter respondit , floccos frequenter legere continuavit. Morbum igitur hunc in pessimis signis constitutum ex *Hippocr. Coac.* nec non 2. *Aphor.* 27. difficillimum ac periculi plenissimum pronunciaui. Decima septima demum die , suborta obauditione , ad se rediit , stupidus quidem & obliviosus , præteritorum immemor , vires tamen brevi resumit. Vidi in alio subjecto , eundem morbum in optimis signis constitutum , duodecima , rarioribus tunc temporis existentibus jam maculis petechialibus , produxisse *pustulas miliares , parvas , albas , acuminatas* , innumeras , excessivam sanguinis ebullitionem , nec non malignitatem latentem prodentes , & 15. die , prægressis vix momentaneis convulsionibus , funestas. Observavi , malum hoc fuisse *epidemiū* , nullumque ætatis habuisse discrimen , juvenes vero puerosque frequentius invasisse , ac contagium in domo delituisse , aut substituisse , donec in reliquos fere omnes sæviit. Qui valetudinis salutis-

que suæ solliciti fuerunt, ac in tempore, spretis præposteris medicationibus, meam postularunt curam, ad unum omnes convalescunt. Incepi, prævio unico *sudorifero*, pro ætatis diversitate, prima & secunda jam die *a V. S. in brachio*, quam sequenti die pro rei exigentia *in pede*, ante *exanthematum eruptionem*, repeti. *Alexipharmaca*, (malignitatis enim hic summa est habenda ratio,) *sudorifera ex spec. de hyacinth. Liberant. & diaphor. C. C. philos. præpar. lap. bez. orient. mithridat. &c.* mutatis mutandis, singulo octiduo exhibui cum sudoris imperio. Quamprimum mentem adverti vacillantem, imminentis delirii prodromum, *Vesicatoria* nuchæ pedibusque imponi jussi, addidique *pulveribus sudoriferis confortantia*, nec non *epileptica*, *v. gr. pulv. epilept. March. unicorn. mar. specif. cephal. Mich. mag. ungu. alc. perl. &c.* Nimiis vigiliis ac deliriis summis *mistura mea ex mithridatio cum conf. alkerm. pulv. epilept. de gemm. frig. aut analept. &c. Sir. papav. in aqu. solut.* ut plurimum vesperi, & quidem cum fructu obviam veni. *Alvi fluxum stypticis* quandoque singulo triiduo aut quatriiduo exhibitis compescui: obstructionem *enematibus* sustuli. Cum calores p. n. decrescere inceperunt, quod sæpissime sub initium decimi quinti diei contigit, contentus fui solis *pulveribus precipitantibus*, *v. gr. spec. de gemm. frig. & analept. C. C. philos. fl. nitr.* quotidie semel aut bis in usum vocatis. Vinum ac cerevisiam prohibui, concessique solum *aquam ex ras. C. C. ebor. sem fœnicul. rad. scorzon. coctam.* Reliquis symptomatibus ex suis fontibus prospexi. Sub initium quartæ septimanæ, appetitu jam redeunte, ne in priorem morbum reciderent, dedi *Laxativum*. Et hac methodo, DEO sint laudes, omnes petechiis etiam pessime decumbentes, excepta unica persona, servati sunt. *Morbilli* mense *Junio, Julio*, omnes fere pervaserunt domos, & observavi illos *epidemiciter* grassatos, primis quatuor diebus ut plurimum gravissimos, apparente efflorescentia, quæ elapso quatrinduo evanuit, levissimos. Quibus legitima adhibita fuerent remedia, *expellentia* nempe, *sudorifera*, *v. gr. pulv. alexit. lap. bez. C. C. philos. unicorn. mar.* omnes stando quasi ac deambulando morbum evaserunt. Qui in cura sunt neglecti, aut male tractati, etiamsi convalescerent, elapsis aliquot septimanis, aut in *febrem* inciderunt *exanthematicam*, (quam *Rossaliam* nominare solemus, & consistit in maculis rubris, latissimis, in toto corpore densissimis, erysipelas quasi universale referentibus, post quartum diem evanescentibus, & squammularum instar deciditibus, cum ægri alleviatione,) cum caloribus continuis, siti magna, aliquando deliriis, nemini exitiosam; aut reportarunt *tumorem flaculens*

tulementum totius corporis, permultis funestum. Notavi simul, quando unus aut duo in domo morbillos superarunt, decimo demum quarto aut quinto alios ejusdem domus in ægrotantium locum successisse, adeoque morbillosum contagium serpiens a 14. in 14. delituisse ac substituisse. *Mense Junio, Julio*, frequens fuit *Icterus*, cum aliquali alteratione, appetitu dejecto, nausea, siti, oris amaritudine, deturpato cutis, inprimis oculorum, colore, pruritu, urinis croceis, cerevisiæ brunaceæ similibus, turbidis, excrementis quandoque flavis, copiosis, sæpissime albis, cinericiis. Obstructionem ductus choledochi reseravi, bilemque in massam sanguineam, ac in habitum corporis jam derivatam reduxi, ejusque acrimoniam salino-sulphuream excessivam correxi *aperientibus salibus expulv. hepat. Tartar. Vitriolato, sale cichor. acetosell.* additis *granis aliquot diagrydii*. Instar omnium fuerunt *acidula Croatica*, quibus bilem sufficienter dilui, atque felicissime spatio 2. aut 3. hebdomadarum ictericos restitui. Præter *hydopes, calculos, podagram, arthritides &c.* tempore autumnali more solito, *Quartana* prodiit *contumacissima*, quam, si *Venesectione, purgatione*, diebus paroxysmorum instituta, nec non *medicamentis Antifebrilibus chinatis* ter aut quater exhibitis infringere nequivi, reliqui intactam, optime gnarus, multitudine atque frequentia medicamentorum facile ad *Cachexiam ac hydropem* disponi, adeoque magis destrui. *Natura* igitur opus hoc commisi, atque expectavi *æquinoctium vernale*, quo tempore natura, uno vel altero medicamento adjuncta, quandoque per se febrem hanc felicissime subigere solet.

Constitutio Epidemica Sempronensis Anni 1699.

DE Japonibus scribit *Wilhelmus ten Rhyne, Dissert. de Arthrit. in suis notis, p. m. 92.* quod quidem *pestem* ignorent, *variolas* tamen timeant, cum ipsis maxime sint contagiosæ, atque sæva & multiplici hominum strage illorum terras depopulentur, ut major etiam mortalium pars his in Japonia aliquando succumbat, quam peste alibi, atque idcirco præ labis illius metu, parentes liberos, mariti uxores, & quæcunque dulcia sunt vel sanguinis vel thori pignora, relinquant. Unde Japonenses & Sinæ liberis dotati, ubi interrogantur, quot soboles alant? regerunt, totidem, quot variolis jam laborarunt; reliquorum enim vitam in ancipiti locant, adeoque inter permanentes proles non numerant. Idem responsum fere a nobis hoc anno *nonagesimo nono* tulissent Curiosi, si ex uno alterove quæсивissent, quot filios aut filias habeat? Tot nempe, quot jam *variolarum* virulentiam superarunt. Et si enim apud nos *Variola*

non adeo aliquando observantur funestæ, hac tamen *hyeme australi, tepidiori ac humidiori* plus minus existente, illæ, pestis instar, in infantes & adultiores furere cœperunt, eosque pro diversitate tempestatum, magisve vel minus maligni ætheris, nec non humorum in corpore existentium, varie affecerunt. Inceperunt modico cum horrore, quem excepit calor intensus, pulsus fortis, oculi turbidi, sitis intensa, aliquando jactatio inquieta, sternutatio frequens; nonnunquam jam primo aut secundo ebullitionis die apparuit una vel altera pustula in facie, dorso, ut plurimum vero sub finem tertii aut initium quarti diei eruperunt *variola*, primum rubræ, exiles, rotundæ, figura nempe, colore & magnitudine regulari, cum febris symptomatumque, etiamsi hæcenus fuerint gravissima, atque nervoso generi periculosissima, remissione, aut notabili diminutione. Hæ turgidæ maturuerunt brevi, justoque tempore exaruerunt jam incrustatæ. In quibusdam subjectis pustulæ fuerunt admodum raræ, solito tamen majores, hinc inde sparsæ, valde discretæ, ita quidem, ut iisdem affecti in lecto vix contineri potuerint, quin deambulare voluerint, si ipsis concessum fuisset, quæ variolæ mitissimæ ac benignissimæ fuerunt. *Diarrhæa* nec non *hamorrhagia narium*, diebus ebullitionis suborta, omnibus saluti fuit, detracta nempe nimium quantum ebullientis ac æstuantis sanguinis, nec non seminii variolosi parte, quod reliquum fuit variolosum fermentum facilius, inprimis jam laxatis venarum spatiis, evolvi, digeri, expellique potuit; & in his *variolas* observavimus discretas, raras, *benignissimas*, saltim hinc inde sparsas. Qualis enim status humorum ebullientium in corpore, in primis in centro, talis quoque se exseruit & effloruit in extremis, habitu corporis: unde quo pejor materia ebulliens, eo periculosiores & deteriores variolæ. Sic spiritus quandoque a miasmate varioloso irritatos magis, quam oppressos observavimus, qui magno sæpe conamine quisquillas suas ad cutem amandarunt, serumque virulentum repurgarunt felici eventu, tuberculis tam magnitudine, quam colore & figura regularibus enatis. Notavimus è contra spiritus a miasmate hoc varioloso diebus jam ebullitionis obrutos ac fere oppressos, ut amplius se sufficiens expandere nequiverint, multo minus inquinamenta variolosa excutere potuerint. Remansit ergo miasma virulentum in massa sanguinea, quam ad coagulum disposuit. Tangebatur quidem cuticula rubedine quasi erysipelacea, ac tumore afficiebatur, nulla tamen aut fere perpauca apparuere variolarum vestigia, potius loco harum tertia jam die maculæ in facie, dorso, natibus, pedibus, manibus, effloruerunt purpureæ, quæ exacte morsus pulicum aliquo modo obsoletos repræsentarunt, copiosæ,

pioſæ, aut diebus ebullitionis, quarta nempe, antequam ulla adhuc comparuit puſtula, aut ante plenam & ſufficientem variolarum eruptionem, quæ ſemper manſerunt parvæ, ſeſſiles, depreſſæ, confluentes, duræ, ſeptima die lethales. Obſervabatur in his pulſus debilis, catarrhus ſuffocativus, ob nervos affectos, inſultus epileptici, ſubſultus tendinum, deliria, maculæ purpureæ, latiffimæ, ad nigredinem ſpatio aliquot horarum tendentes, ante, aut poſt mortem largiſſimum ſanguinis per alvum profluvium. Certiſſima fane ſummæ inflammationis in maſſa ſanguinea latentis, nec non inſtantis ſphaceli, adeoque indubiæ mortis indicia. Unam habui virginem octennem, in qua maculæ hæ purpureæ jam diſparuerunt, ut aliqualem reconvaſcentiæ ſpem nobis fecerint, aſt tempore maturatiſſionis variolæ confluentes, inprimis in facie, manſerunt ſeſſiles, depreſſæ, duræ, cartilaginofæ quaſi, cutis ipſa eryſipelate fuit affecta, & intenſa rubedine tinctæ, tumida, ſymptomata novis acceſſionibus febrilibus fuerunt exacerbata, quæ tandem XV. die funeſto terminarunt eventu. Unicum habui puerulum 7. annorum, ejusmodi maculis purpureis una cum variolis correptum, qui hæmorrhagia narium copioſa IVta die ſuborta a periculoſiſſimo atque exitiali hoc malo liberatus fuit. Reliqui omnes his *petechiis purpureis* laborantes, etiamſi ex methodo medendi ordinaria & optima, *expellentibus* nempe, *sudoriferis*, *alexipharmacis*, *bezoardicis*, *confortantibus*, *nervinis*, *antepilepticis*, v. gr. *ſpec. liberant. de hyacinth. pulv. pannon. lap. bez. orient. pulv. epilept. C. C. philoſ. unicorn. mar. diſcord. Frac. mithridat. conf. alkerm. &c.* tractati fuerint, mortui ſunt. Sine dubio a veneno varioloſo peſtifero ſanguinis compages nimis fuit ſoluta & jam in fluorem converſa, in primis ſerum acre, virulentum redditum, atque diſpoſitum non ſolum viſceribus, ſed & partibus externis, mediante effloreſcentia, necroſin induxit funeſtam. Neque *gravidæ*, licet alias naturæ conſilio a morbis epidemiis immuniores ſint, quam alii, ab hoc variolarum contagio fuere immunes, imo decuberunt peſſime; hæ ſemper ſexta aut ſeptimana die *abortum* paſſæ ſunt cum *magna Uteri hæmorrhagia*. *Variolæ malignæ* utplurimum inceperunt cum *lumborum & abdominis doloribus*, qui ſi cum erupturientibus jam puſtularum notis remiſerunt, *boni*, ſin minus, *mali* fuerunt ominis; utplurimum enim in his variolæ aut non ſufficienter eruperunt, aut, ſi prodierunt, confluerunt, & tempore maturatiſſionis depreſſæ manſerunt, ſæpe refugerunt & in fauces gulamque copioſæ incubuerunt, *catarrhumque lethalem*, inprimis circa morbi ſtatum, induxerunt. In permultis ſalivationem in eruptione, & poſt eruptionem, obſervavimus copioſam, qualis a mercurio aſſumpto oriri ſolet. *Diarrhæa* diebus

maturationis oborta, *pessima* fuit, natura enim jam debilitata, & in negotio maturationis impedita, deducendo aliorum materiam variolosam succumbere debuit, variolis nempe non bene maturatis, quin potius collapsis, aut *catarrhus*, aut *convulsiones* supervenerunt funestæ. Respiratio anxiosa, interrupta, vel sublimis, imprimis in morbi statu semper fuit convulsiva, & indubitatum signum malignitatis, quæ nullis medicamentis expelli potuit, quin potius humores in suo motu impedivit, atque sic lethaliorem intulit. Observavi in filiolo trium annorum, tempore eruptionis, die tertia & quarta morbi, summam extremorum, pedum nempe, manuum ad carpum usque, nasi refrigerationem, sine ullo sudore, cum pulsu debili, calorem vero in reliquo corpore sufficientem ac præternaturalem. Metui sanguinis recursum, caloris languorem, & necrosin imminuentem, adeoque frigus hoc brevi fore morticinum, in primis materia variolosa in centro retenta minusque expulsa, exhibitis tandem *expellentibus* variis, *bezoardicis*, nec non *lintheis calide applicatis*, spatio bidui rediit ad extrema calor, variolæque prodierunt copiosissimæ cum summa symptomatum alleviatione, & maturatis tandem variolis, vitæ conservatione. Mense Aprili, Majo notabantur morbilli, qui, si ex methodo tractati fuerunt, sudorque successit ex voto, in omnibus *benigni*, neque efflorescentia inflammatoria diutius mansit, quam per quatrimum; quo tempore una cum maculis squammarum ad instar deciduis, calor cessavit penitus. Observavi autem in quibusdam morbillosum hanc inflammationem effloruisse in dorso & facie ad instar herpetis, cum pustulis splendentibus, mox in rubedinem morbillosum ordinariam variæ figuræ abeuntibus. Fuerunt exanthemata hæc morbillosum mali moris, adeoque in cura probe attendenda, & *expellentibus*, *sudoriferis*, *alexipharmacis* sedulo tractanda. Mense Aprili, Majo, Junio frequentes fuerunt *febres petechiales malignæ*, quæ invaserunt cum horrore levi, nec manifesta sanguinis æstuatione, sed calore mitiori, quem aëris injuriis adscripserunt ægroti, neque crediderunt se ægrotare, donec calor, hætenus effectum suum occulens, ingravescere viresque vacillare cœperint, ut jam ægroti decumbere coacti fuerint, magno cum damno suo tamdiu contrahentes. Accessit anxietas præcordiorum, sitis immanis, capitis dolor, vigiliæ, linguæ scabrities, deliria aliaque symptomata. Qui ab initio *Vena-sectiones* admiserunt, medentumque opem implorarunt, atque dicto præscriptove audientes fuerunt, evaserunt omnes; qui vero neglexerunt curam, eamque demum die VI. aut VII. inchoare voluerunt, ii plerumque die XIII. XIV. XV. XVIII. XIX. mortui sunt. Quicumque a *Purgantibus*, credentes, vitium hæere in Ventriculo, curam inceperunt, ad unum omnes

omnes decesserunt, & in illis maculæ observatæ sunt longe majores ac latiores. Qui sudare ad varie assumpta *alexipharmaca*, *diaphoretica*, *expellentia* in incremento & progressu morbi non potuerunt, etiamsi bene ac perite alias tractati fuerint, mortui sunt, mortem vero uno vel altero die præcesserunt *sudores spontanei*, copiosissimi, resolutivi. *Subsultus tendinum* in tangendo pulsu in statu morbi notatus semper *exitialis* fuit. *Convulsiones epileptica*, in primis distorsiones in ore & fronte variæ, *funestissima*. *Sensus hebetior*, si nempe ægroti se non laborare, sed optime valere dixerunt, *manus tremulæ*, *respiratio difficilis ac frequens*, *difficillima citra faucium tumorem deglutitio*, *inevitabilem prænuntiarunt mortem*. *Maculæ quo tardiores in efflorescentia*, eo *peiores*, unde apud quos die demum septima, aut nona, prodierunt, ut plurimum observabantur *funestæ*, fecus, si jam quarta eruperunt. Eædem ex *rubro colore* tendentes in *lividum*, *nigrum*, extremam sanguinis corruptionem indicarunt. Circa *Solstitium*, mense *Junio*, morbus hic fuit *peffimus multisque exitialis*. Causa hujus febris petechialis malignæ, cum calor sæpe, in primis in initio, non adeo sævus fuerit in prava & maligna indole quærenda fuit, quæ citra insignem calorem vi sua corrodebat partes corporis fluidas & solidas corrumpit, dissolvit, destruxit, ac violentia sæpe materiam expulit, modo *per alvum*, crisi imperfecta ac funesta, modo *per insensilem transpirationem*, ubi ægroti, in primis sub finem, sudoribus fere difflexerunt, qui fuerunt resolutivi, peffimi. Sanguinem igitur ac serum in hoc morbo coagulari ac incrassari, sæpissime ex sale corrodebat maligno summam contrahere acrimoniam, ex symptomatibus abunde claret.

Constitutio Epidemica Semproniensis Anni 1700.

HOc anno insueta fere fuit aëris intemperies. Mense *Januario*, *Februuario* temperatum frigus extitit, mense *Martio*, nec non *Aprili* fere toto tempestas nivibus & gelu sæviit, quo tempore grassari cœperunt *febres continue exanthematicæ*, solis *confortantibus*, *blandissimis diaphoreticis remixtis*, tractandæ. Etenim, qui more solito assumerunt & continuarunt *sudorifera*, ex *spec. de hyacinth. Liberant. & diaph. & volat. C.C. mithridat.* illi omnes, viribus exinde exhaustis, & convulsionibus subortis migrarunt ad superos; qui vero in principio tractati sunt *Venasectione*, deinde *blandioribus diaphoreticis*, ut plurimum tamen *confortantibus & epilepticis*, v. gr. *pulv. epilept. M. specif. cephal. pulv. analept. mag. gran. kerm. perlar. C.C. unicorn. mar.*

convalescere omnes. Calores non adeo intensi fuerunt, debilitates vero summæ cum vigiliis, sudoribus spontaneis, pulsu celeri, frequenti, tremoribus nec non motibus convulsivis. *Mense Junio, Julio* plures pluviosæ notabantur dies, quam serenæ; *mensis Augustus & medius September* fuere serenissimi, calidissimi. *Reliquo medio Septembri & toto mense Octobri* tanta pluviarum fuit frequentia, ut post hominum memoriam his mensibus visæ non fuerint crebriores. Si enim de die non pluit, certe de nocte pluit, imo post 14. dies pluviosos vix duo sereni apparuerunt, quos statim pluviae exceperunt continuæ. Per has igitur insuetas anni constitutiones sævierunt *Tusses, rheumatismi, febres*, in primis *quartana*, quæ in vicinis nostris locis fuerunt *epidemica, apoplexia ipsa*; apud infantes frequentes fuerunt *variola erratica*. Senes experti sunt *debilitates summas* instar *februm continuarum*, sed *benignarum, recurrentes*, quæ *solis confortantibus medicatis* cesserunt.

Constitutio Epidemica Semproniensis Anni 1701.

ANnus ineuntis hujus seculi incepit eadem inconstantia, qua ultimus annus seculum finivit. *Januario* quippe & *Februario* frigora uno vel altero die notabantur intensa, tertio vel quarto valde remissa, unde ex insuetis his anni mutationibus ortæ sunt *defluxiones biliosæ in brachia, ossa ischii, pedibus*, summe dolorificæ, utrique sexui infestæ. *Rheumatismi hi biliosi sudoriferis* neutiquam tractari debuerunt, utpote quorum usu dolores semper exacerbati sunt, meliori vero successu *digestivis ex salibus*, v. gr. *pulv. hepat. rubr. & cichor. acetosell. & vitriolat. diagryd. sulphurat.* quotidie adhibitis obtemperarunt, & intra XXIV. dies evanuerunt. *Martius* fuit valde benignus, *Aprilis* vero & *medius mensis Maji* ob frigora infantibus funestus, hi nempe valde infestabantur *Vomitibus, catarrho suffocativo, colicis convulsivis, epilepticis*. In *Junio* nil occurrebat notatu dignum, nisi quod mane hoc & præterito mense rorem in foliis arborum, in primis prunorum, instar mellis, nostrates vocant *Hönigthau*, eumque fructiferum indicare annum credunt, copiosum observaverimus. *Julius* totus exæstuavit, nil tamen mali, quod mirum, produxit, nisi *febres tertianas*, (quæ sexto paroxysmo abierunt,) & in senibus, adultis ac infantibus *pustulas*, sive *exanthemata miliaria*, quæ occuparunt totum corpus cum molestissimo pruritu. Causa sine dubio quærenda in efferationibus biliosis, in primis lymphæ ab externo calore valde intenso evocata, sed facile *refrigerationibus*, v. gr. *spec. de gemm. frig. fl. nitr. lap. canar. &c. & balneis hordeaceis*

ceis repressa ac contemperata. Toto mense *Augusto* calores fuere intensissimi, pluviae paucissimae, fere nullae, noctes simul calidae. Jam valde grassari coeperunt *febres* cum frigore duarum, aliquando trium horarum, insecutus est statim calor ultra 40. horas durans cum capitis dolore, siti, virium prostratione, linguae ac faucium ariditate, vigiliis, quandoque deliriis, ut jurasses *febrem* imminere *continuum*, sed post adhibita *sudorifera*, *Venesectionem*, remisit calor, atque in *intermittentem febrem*, ita tamen, ut vix aliquot horae inter paroxysmum & apyrexiam interjectae fuerint; & sic una febris excepit alteram, afflixitque diu infirmos; rarissime enim ante novum paroxysmum terminavit. Si *Venesectione*, *diaphoreticis* & *precipitantibus*, cum malignitate non caruerit, rite tractabatur, nulli fuit funesta. Febres hae maxime saevierunt mense *Septembri*, quem observavimus calidissimum, siccissimum, sine ullis pluviis. *Mensis Octobris* incepit cum pluviis, quae per aliquot durarunt dies, insequentibus mox caloribus insuetis, ac vix post hominum memoriam notatis. Continuaverunt aestuosissimi dies per *Novembrem* fere totum, ita, ut nullus senum tantae aestatis & autumnii calidi & constantis recordari potuerit, unde optimum & generosissimum crevit vinum, quod tamen successu temporis minus generosum evasit. *Morbi* fuere pauci, iique ut plurimum *ordinarii*. *Sub finem Decembris* exasperatum fuit coelum, & terra frigore obriguit.

Constitutio Epidemica Semproniensis Anno 1702.

HAc hyeme permutata quasi videbantur tempora. Frigora intensa solum durarunt ad sextum *Januarii* diem, septimo supervenerunt pluviae, subsequentibus diebus nebulae, coelum turbidum, mox serena, calida tempora. Toto *Februario*, exceptis vehementissimis ventis, eadem fuit coeli facies, nullum frigus, nullae nives, ut plurimum siccitas, serenitas, ut credidisses, imminere aestatem; nocturno quidem & matutino tempore quandoque aura observabatur frigidiuscula, sole tamen oriente statim fuit temperata, unde jam *medio Februarii* habuimus flores violarum, nec non flores cerasorum acidorum. *Morbi* his mensibus, praeter *catarrhos frequentes* vix notabantur alii. *Martius*, qui insecutus est, fuit siccus, quandoque ventosus, pluviae, quae oboriebantur, fuerunt temperatae, fertiles. Hujus initium *phthisicis*, *hecticis*, *hydropticis* valde fuit funestum. Circa *aquinoctium vernale* inceperunt copiosae inter pueros grassari *febres continuae*, ut plurimum *malignae*, *petechiales*. Invaserunt illos levissimo rigore, lassitudine spontanea, succedente

dente calore non adeo magno, subinde remittente, sed tertio aut quarto die vehementius recurrente, quo ut plurimum in conspectum venerunt exanthemata, deliria brevi post comparuerunt, in quibusdam vehementia, & quidem cum vigiliis, in quibusdam breviora, maculae erant parvae instar morsus pulicum. *Febres hæc epidemica diaphoreticis, precipitantibus & confortantibus temperatis, non sudoriferis fortioribus, tractatae, nulli fuerunt funestae, sed valde contagiosae. In adultioribus, utpote viris, maculas ut plurimum observavimus latas, successerunt statim deliria, convulsiones, epilepsiae, & his fere omnibus decima tertia dies fuit exitialis. Duravit epidemica hæc lues in Junium usque, quæ sine dubio magnis siccitatibus cum Hippocr. 3. Aphor. 7. adscribenda. Aprilis plerumque fuit serenus, calidus, subinde ventosus, frigidus. Hunc excepit Majus frigore quidem moderato, sæpe tamen, præsertim Borea interspirante, rigidiusculo: fuit variabilis, nunc calidus, nunc turbidus, pluviosus, mox frigidus, ventosus, unde vitis justo tardius & inæqualiter gemmas suas protrusit. Frequentes hoc mense fuerunt arthritides vagæ, quæ solo reiterato Laxantium, minus sudoriferorum, usu tractari voluerunt. Julius fuit valde temperatus, calidus, ut & Augustus, si exceperis imbres & tonitrua horrendo fragore & fulguribus, in primis noctu, mense Augusto frequentia, & grandinibus insolitis, quæ aliquoties, præsertim die 12. 13. 18. promontoria nostra fere omnia, & quidem optima, valde destruxerunt, remixta. Fructus omnes horæi valde fuere insipidi, humidi, & ad putredinem proclives. Unde frequentes habuimus febres, primo intuitu continuas mentientes, adhibita tamen Venesectione & sudoriferis, tertio & quarto die in intermittentes tertianas degenerantes, tandem precipitantibus & Laxativo brevi consopitas. September comparuit uno alterove die serenus & amœnus, tertius & quartus serenum diei cœlum noctu tempestuoso tonitru & fulguribus terribilibus foedarunt. Sequentes dies mox sereni, mox turbidi, pluviosi, aliquando frigidi, in primis noctu, & notavimus circa festum Matthæi bis pruinas, sed plane innocuas. Hoc mense habuimus Diarrhœas, dysenterias, quibus, adhibitis rhabarbaro tosto cum myrobalanis, & dein adstringentibus ex corall. fl. ferr. cum mithridat. cito medebamur. Octobris quatuor dies initiales fuerunt sereni, amœni, calidi, his quatri-duum successit frigidum, ventosum, imbridum, nivolum, autumnii præludium, octava mane gelu & pruina nocentissima folia ac uvas nondum maturas in omnibus fere promontoriis decoxerunt, & millena damna fecerunt. Jam remittere cœpit frigus, & cœlum ad aliquot dies inclaruit. Circa medium mensis fere octo turbidi, nebulosi, solis expertes, notabantur*

bantur dies. Tandem circa 20. exortis ventis, nebulisque discussis cœli facies mutari cœpit, æstasque in autumno constans comparuit. Fuit enim ab hoc tempore usque ad sextum *Novembrem* serenitas, cum frigida tamen aura matutina. Septima tota die pluit, octava nix cecidit ingens; successit horridum gelu octiduum fere durans, quod & botros in copia adhuc in promotoriis existentes vix non in lapides convertit. *Medio Novembris* amœnior aura comparuit, caloreque fortiori nives uvasque glacie adstrictas solvit. Hoc tempore frequentes fuerunt *febres*, quæ nullum servarunt typum, quin potius *febres malignas* mentitæ sunt. Invaserunt cum horrere, caloribus primis diebus fere continuis, summo virium languore, capitis dolore, siti, oris amarore, siccitate linguæ. Adhibitis *Venæsectione & sudoriferis blandis*, tertia vel quarta jam die terminarunt in *intermittentes*, quarum paroxysmos *arcana duplicato, sale Card. Ben. cort. chin. de chin.* ac tandem *levi laxativo* suppressimus. In his notatu dignum fuit, quod, etiamsi valde post febres comederunt, vires tamen per longum temporis spatium recuperare nequiverint. His mensibus copiose grassari cœperunt inter pueros & puellas *variola*, quæ observabantur modo *benigna*, modo *maligna*, confluentes, depressæ, adhibitis *blandis diaphoreticis*, sanguinem contemperantibus, v. gr. *pulv. alexit. C.C. philos. pulv. epilept. spec. de hyacinth. unicorn. mar.* aliquando, si exire noluerunt, addito *sale volat. C.C.* nec non *lap. bezoar*, nulli funestæ. Accuratam insuper symptomatum rationem habere debuimus. Sic accidit, ut puerulus V. annorum ex variolis malignis convalescens in *gingivis superioribus* reportaverit *ulcuscula*, quæ primo intuitu ab adstantibus pro *aphthis*, Mundscäule, judicata & tractata sunt, elapso 24. horarum spatio corrosivitate sua magnam jam maxillæ superioris & inferioris occuparunt partem cum summo fœtore & nigredine, maximoque imminentis *sphaceli* periculo. Adhibuimus frequentiores *injectiones ex decoct. rad. aristoloch. iridis flor. mastiche thure, mundificantia, balsamica*, v. gr. *elix. Propr. sine acido, bals. peruv.* quibus tandem corrosivitas, fœtor, nigredo recessit, & puerulus pristinae sanitati restitutus est. Taceo *catarrhos, rheumatismos mense Novembri & Decembri* frequentes. Sine dubio morbi hi ut plurimum ex lymphæ a varia aëris anomalia, nec non erroribus diætæ, v. gr. fructibus horæis hoc anno valde putridis, ad viscedinem & spissitatem disposita quæ in sanguine concervata eundem in tumultuarios motus concitavit deducendi.

Constitutio Epidemica Semproniensis Anni 1703.

A Nni hujus principium aura temperatiori, nivibus stipata illuxit, paulo post successit frigus intensum, quod brevi remisit, & in pluvias abiit. *Februario* gelu sæviit ingens, nivesque ceciderunt sæpissime, mox tamen accedente aura calidiuscula in liquorem solutæ. *Martius* comparuit caloribus amœnissimus, siccissimus, quandoque tamen interveniente Euro, rigidus. *Aprilis* simul præter morem siccus fuit. Habuimus his mensibus ventos vehementes, nives copiosas, quæ terram liquore balsamico sufficienter irrigare potuerunt. *Majus* & *Junius* fuere æstuosissimi cum paucissimis pluviis; unde uvæ circa festum Viti jam fere defloruerunt omnes. Hoc semestri notavimus *febres continuas*, non adeo frequentes, nec malignas, sine dubio, ob vinum nimis leve ac tartareum, quod præterito crevit anno, diureticum, minus sanguinem accendens. *Variolas* habuimus in copia, modo *benignas*, plerumque *malignas*, sessiles, depressas, quæ tamen si rite *bezoardicis temperatis, expellentibus, confortantibus*, v. gr. *pulv. alexit. spec. de hyacinth. antimon. diaph. C. C. philos. præp. pulv. epilept. lap. bez. orient. unicorn. mar. mithridat. &c.* tractatæ sunt, paucissimis, imo fere nullis funestæ. Et licet plurima tunc temporis conspicerentur puerilia funera, causa tamen mortis magis adstantium incuriæ & negligentiae, aut medicastorum præposteræ ac perversæ curæ & imperitiæ, quam malignitati adscribenda. Notatu dignum fuit, me his temporibus inter alios habuisse Comitissam valde sanguineam, corpulentam, jam fere quadragenariam, variolis correptam. Huic sub prima morbi invasione, quæ erat cum rigore, caloribus, cordis compressione, virium languore &c. curavi aperiri *medianam*, præscripsi *bezoardicos expellentes pulveres* more solito, *pulv. alexit. C. C. philos. lap. bez. orient. unicorn. mar. &c.* & ecce præter omnium expectationem tertia & quarta die erupere per totum corpus *variolæ* copiosissimæ, sexta accessit *immodicus mensium fluxus* ad instar puerperæ, retrocesserunt ilico variolæ, quæ absque hoc fuere depressæ, sessiles, confluentes, verbo, pessimi moris. Mutavi medicamenta, dedi frequenter *spec. de hyacinth. corall. rubr. terr. sigill. mithridat. mag. smaragd. pulv. epilept. M.* non omissis *confortantibus*. Fluxus hic immoderatus continuavit octiduum, nec *stypticis* sisti potuit: durante fluxu variolæ non creverunt, nec ad maturitatem tendere voluerunt, sed confluxerunt, majoraque conciliarunt symptomata, etiamsi *expellentia, bezoardica, antepileptica stypticis* semper consideratis-

sime

sime miscuerimus; octiduo elapso fluxuque cohibito tandem parvulæ hæ variolæ, non fastigiatæ, maturitatem receperunt, symptomata remiserunt, & Illustrissima Comitissa a varioloso hoc affectu, periculi pleno, præter omnium opinionem ac spem, liberata est. Variolæ hæ permultorum oculis valde fuerunt infestæ, & modo inflammationem reliquerunt pertinacem, modo humorem deposuerunt contumacem, ac coagulationi vel condensationi aptum. Priori feliciter medebamur aquis ophthalmicis ex aqu. plantag. rosar. chelid. tut. præp. sach. saturn. posteriori inflatione pulveris subtilissimi ex sach. canariens. antim. crud. lap. scissil. præp. perl. præp. & si opus fuit, Vesicatoriis. His mensibus varios atque diversos notavimus hæmoptoicos, tam senes, quam juvenes; in quibusdam enim sanguis ἄφρώς ἤτοι βίαιος ad aliquot libras sine ulla prægressa tussi excretus est, & in his fere nulla adfuit irritatio, sed sanguis floridus lubricavit sibi ipsi viam, & unica irruptione extravasatus per os affectavit exitum; in quibusdam quasi extussiendo sanguis pedetentim rejectus est, in his sine dubio vasa pulmonum fuerunt erosa, & salinæ particulæ massæ sanguineæ inexistentes teneras pulmonum vesiculas stimularunt, inde irritatione facta tussis producta fuit cruenta. His feliciter subvenimus Venesectione & medicamentis adstringentibus ex compos. sperniol. Cr. lap. hæmatit. ocul. cancr. trochisc. de spod. de carabe, addito laudano de tribus in refracta dosi. Si sanguis fuit sedatus, ordinavi pectoralia traumatica cum solventibus mixta, v. g. elix. pectorale cum ess. traumatica, nec non decocta pectoralia ex fl. & fruct. pectoral. usitat. item gelatinam pectoralem ex rasur. C. C. ebor. cum herbis pectoralibus factam, it. decocta ex herb. alchymill. scabios. pyrol. sanicul. millefol. tussilag. pulmonar. heder. terrest. rad. tormentill. sem. anis. fœnic. rad. chin. &c. Mense Junio ex caloribus insolitis, nec non ingurgitatione aquæ frequentiori adultiores æque ac juvenes reportarunt febres tertianas frequentes, sed sumtis salibus absinth. centaur. min. card. ben. cort. peruv. ac tandem purgante brevi curatas. Julius non tam amœnus & serenus fuit, quam pluviosus, nocte dieque frigidus, ventis summe molestus, qui in primis a die quarto ad octavum valde sævierunt, & frumento, quod violentia sua excusserunt, quam maximum intulerunt damnum; circa 24. ad finem usque calidissimi notabantur dies. Augustus incepit cum frigore, pluviis, quæ hoc mense fuerunt copiosæ, flante tamen austro suos alternavit dies, fuitque variabilis & inconstans. September extitit serenissimus, amœnissimus cum insolito aëris fervore, quandoque pluviis intemperiem solis contemperantibus atque terram irrigantibus. Octobris primi octo dies fuerunt pluviosi, frigidi simul, hoc tamen non obstante, tertia & sexta

die observavimus tonitrua & fulgura, elapso octiduo cessarunt pluviae, & subsolanus superveniens radiis solaribus non solum terram madidam siccavit, sed & botros a nimis pluviis jam putrefactos valde exsiccavit, illosque in pulveres fere redegit. Toto *Novembris*, nec non *Decembris* mense coeli temperies notabatur placidissima, ut credidisses verum adesse tempus. Circa natalitia intensum frigus ingruit, terraque congelavit. Frequentes hoc semestre *biliosas* notavimus *febres*, quæ cum rigore, mox caloribus, vomitibus, præcordiorum angustiiis pueros æque ac adultos invaserunt, primoque intuitu *continuas* mentitæ sunt. Duravit calor ut plurimum 40. horas cum dolore capitis, siti vehementi, ariditate linguæ ac faucium, adhibitis vero *Venæsectione*, *diaphoreticis*, remisit, & in *ordinariam tertianam* cum apyrexia degeneravit, atque *antifebrilibus salibus*, nec non *chinatis* rite tractata sexto paroxysmo cessavit. Memini, me plurimos habuisse, qui octavum sustinuerunt paroxysmum, & hi ex febre reportarunt *icterum*. Color hic non adeo flavus, sed saturatior & fuscus fuit, sine dubio a particulis acribus, biliosis, sulphureis, quæ copiosius in sanguine collectæ tandem in habitum corporis sese diffuderunt, cutemque deturpato imbuerunt colore. Alvus in his omnibus sufficienter suoungebatur officio, indicio, porum choledochum in duodemi & jejuni confinio non fuisse obstructum. His feliciter, & quidem intra paucos dies medebamur *pulveribus ex sale cichor. arcan. dupl. aut tartar. Vitriolat. spir. salis coagulat. pulv. hepat.* additis nonnunquam *aliquot granis diagryd. sulphurati*. Verissimum itaque est *Dioclis* monitum, notante *Celso*, prodesse nempe *icterum*, si post *febrem* oritur. His temporibus aliquos notavi *cachecticos*, nec non *hydropicos*, qui in *icterum flavum* inciderunt, quorum superiora corporis marcescebant, & mirum in modum flavescebant, tumentibus interim inferioribus & abdomine. Vesiculæ in horum pedibus obortæ stillabant liquorem summe croceum. Causa sine dubio salibus lixiviosis sulphur sanguinis ita modificantibus adscribenda. Cura ad tenacissimas obstructions tartareas, & dyscrasiam viscerum dirigi debuit, & profuerunt in specie *martialia*, *pulvis cachecticus*, *Tinctura mart. aperit. Myns. spir. aperit. Penot. Purgantia* singulo octiduo semel exhiberi debuerunt, v. gr. *Recipe pulv. rhabarb. ℥j. gialap. ℥ss. Θ absinth. gr. vij. g. g. grij. ol. mac. gttj. M.* Quodsi venter a *laxantibus* observabatur detumescere, bis cum successu singula hebdomada pro exigentia symptomatum & ratione virium propinari potuerunt; sin tumor post purgantium usum in eodem statu mansit, aut infirmus naturæ ductu frequentes dejectiones sine alleviatione habuit, abstinendum fuit a purgantibus. *Diuretica* in his casibus

bus alias omnem absolvere videntur paginam; hic tamen cum summo iudicio & discrimine adhiberi debuerunt, & si unquam, certe hic, urinæ status probe considerandus fuit. *Urina enim cruda, alba, tenuis* testabatur de sanguinis textura valde laxa, & hæc pro medela requirebat *salia lixiviosa*, utpote *sal stipit. fabar. ononid. junip. ebul. absinth. tart. vitriolat. spir. sal. coagul. &c.* *Urina rubra* docuit sanguinis texturam esse valde strictam, atque abundare salibus lixiviosis, unde præscribi debuerunt *salia volatilia*, v. gr. *succin. & volat. tartar. buson. lumbric. terrestr.* in primis *amara, decoctum ex herbis, absinth. mij. eupator. marrub. à ʒʒ. bacc. junip. mij. rhapont. ver. ʒʒ. m. pro infuso &c.* *Scroto tumenti* maxime profuit *decoctum ex fol. rut. absinth. menth. mil. cumin. cum vino* factum, & cum spongia calide applicatum. *Febres petechiales*, quæ observabantur, fuerunt valde *benigne*. Alias, præter morbos ordinarios, *catarrhos* nempe, *tusses, rucedines &c.* nil memoratu dignum occurrit.

Constitutio Epidemica Semproniensis Anni 1704.

Januarius ineuntis hujus anni totus fuit valde frigidus, nivofus; **Februarius** e diverso præter morem temperatus, ut plurimum serenus, aliquando pluviosus, aliquando ventosus, quandoque nivofus. **Martius** incepit cum intenso frigore; solis tamen splendore atque serenitate temperato, quinta nix cecidit copiosa, quæ sexta jam in liquorem abiit, septima supervenit tempestas tumultuaria, valde nivofa, octava dies fugatis nubibus purgatoque aëre mira illuxit serenitate, quæ tempestas pulcherrima, ventis mitioribus remixta, sicca, non solum ad *æquinoctium vernale* duravit, sed & uno quasi tenore in *Aprilem* usque continuavit. Imo **Aprilis** sua natura alias variabilis, hoc anno fuit amœnissimus, serenus, siccus, absque pluviis fere, cum caloribus ad finem usque prope æstivis: die 27. tonitrua & fulgura ingentia cum pluviis habuimus, sol tamen nubiila mox serenavit, unde arbores justo citius folia & flores emisserunt suos. Tertia *mensis Maji* dies incepit cum pluviis, quas secuta sunt frigora, & quinta pruina matutina, quæ vineis nostris maximum damnum intulit, alias totus mensis fuit serenus, calidus, siccus, ventosus. Successit **Junius** serenissimus, siccissimus, pluviarum expers, ventis tamen mixtus. His mensibus, in primis superioribus, Morbona æque ac Bellona apud nos valde sæviit. Hungari quippe a Nostris deditionem civitatis sollicitantes, sed repulsam reportantes rabie velut accensi hinc inde discurrerunt, nobisque excidium minati sunt. Civitatem d. 18. Febr. e longinquo obsidione cin-

xerunt, eam tamen supervenientibus adversis cœli tempestatibus, nivibus
 nempe & ventis insolitis, intra biduum solvere coacti sunt, interim IX.
 septimanis nos undique tenuerunt conclusos, ut nullus exire ausus fuerit.
 Milites Cæsarei frigoribus & militaribus laboribus, inprimis tristi esuritione
 & aquæ potu valde hætenus debilitati, huc tandem in defensionem civita-
 tis dispositi ad novi desuetique cibi ac vini copiam, quæ miseris nostri large
 obtulerunt, gravati in periculosos inciderunt *morbos, castrensibus non
 absimiles*. Conquesti sunt de *languore totius corporis, nausea, sto-
 machi gravedine, caloribus, siti, dolore capitis, vigiliis*, accesse-
 runt *deliria*, aliquando *alvi fluxus*, nonnunquam *petechia*. *Venase-
 ctio* prima aut altera die instituta, nec non *sudorifera ex spec. de hya-
 cinth. C. C. philos. lap. cancr. antim. diaph. &c.* sæpe in herba suppres-
 serunt malum, unde ægri intra quatrimum convaluerunt. *Purgantia
 & Vomitoria*, etiam in principio adhibita, non conduxerunt, morbum
 potius exasperarunt, & malignitatem latentem evocarunt, quam tandem
expellentia, inprimis *mithridatium cum confect. alkerm.* & *confor-
 tantia* diu continuata sustulerunt. Qui methodo ordinaria fuerunt tra-
 ctati, evaserunt omnes periculum; qui autem citius iusto nosocomiis va-
 ledixerunt, etiam si fere nullos in diætâ errores commiserunt, ut plurimum
 in priorem morbum reciderunt. Inter hos unus *febre maligna* laborans
 ex delirio furibundus profiliit e lecto, & per fenestram secundæ contigna-
 tionis sat altæ in fluentum præcipitem sese dedit, in aqua hinc inde discur-
 rit, defatigatus tandem, & exanimis fere in lectum deportatus, adhibitis
alexipharmacis, sudoriferis, confortantibus convaluit. *Morbus hic
 epidemicus* a victu profectus primo mense militibus gregariis inhæsit, bre-
 vi post cives, qui curis, laboribus, frigoribus, excubiis diurnis & noctur-
 nis insuetis defatigati vino harno, generosissimo, dulci, etiam nocturno
 tempore præter morem indulserunt, invasit, atque in *febres malignas
 petechiales* degeneravit. Sanguis quippe una cum reliquis humoribus ex
 erratis vitiosam diathesin nactus facillime malignitatem concipere potuit.
 Inceperunt *mensē Februario* cum languore summo, calore moderato,
 qui in dies crevit, vigiliis, siti intensa, aliisque febrium comitibus sym-
 ptomatibus. In his si exanthemata prodierunt die quarta, evaserunt o-
 mnes rite tractati periculum die XV. secus si maculæ in conspectum ve-
 nerunt die septima: infirmi enim periculosissime tunc temporis debuerunt,
 & 21. demum die mortis periculo liberati sunt. *Mensē Februario* valde
benigna fuerunt *petechia*, *Martio* pejores, *Aprili* pessimæ. Obser-
 vavi in quodam juvene sat robusto petechiis laborante, *pustulas* XIV.
 morbi die exeuntes *pellucidas*, ceu *crystallinas*, partim *milii seminiis*,
 partim

partim *lentis*, imo multas *pisi* magnitudine hinc inde per totum corpus disseminatas, in dorso vero numerosissimas, *aqua plenas*, summe *malignas*; intendebatur enim febris cum anxietatibus, cordis compressionibus, convulsionibus; albescere tandem hæ vesiculæ & suppurare ceperunt, hinc exiccatae jam exaruerunt, & squamatim circa 21. diem deciderunt, quo tempore pauperculus morti jam vicinus, præter omnem spem feliciter enavigavit periculosissimam hanc charybdim. In *fæminis* semper notavi *mensium fluxum*, aliquando *diarrhæam* simul, quæ omnibus fuit *funesta*. *Deliria præmatura* fuerunt *exitiosa*. Sic robustus quidam Vir 45. annorum, quinta morbi die incepit delirare, sexta est mortuus; & fœmina triginta annorum similiter robusta tertia die delirans, quarta est mortua. Horum sanguis prima & secunda morbi die *Venesectione* extractus exhibuit in superficie pituitam densissimam instar crustæ vix separabilem, & croco quasi tinctam; brevi ante mortem bilis utrinque sese diffudit in totum corporis habitum; singula mortis prænuntia. In *febris* hisce *malignis* frequens fuit *attritio* aut *excoriatio in natibus*; non solum a longiori decubitu, quin potius a sanguine suo modo malignitate corrupto deducenda, qui qua data porta, sarcinam suam deponendam & excernendam quæsit. Latuit autem ut plurimum *gangrena* & *sphacellus*, caroque tandem adhibitis adhibendis, v. gr. *unguent. ægyptiac.* ad os usque excidit cum ægrorum levamine. *Mense Februario morbilli* epidemice grassari cœperunt, qui tamen ex methodo tractati *benigni* fuerunt, *instante æquinoctio verno* indies magis invaluerunt, & invaserunt infantes æque ac adultos, & puerperas, cum horrore, caloribus summis, stillicidio lachrymarum copioso, mordaci, oculorum rubore ac tumore, cum tussi ferina, gravitate & compressione pectoris, maculæ effloruerunt ut plurimum secunda morbi die, aliquando quarta, quandoque septima, & persistenter quatuor aut quinque dies. Observavi hoc tempore *morbillo- rum tres species*, *maculas* nempe *latas*, *rubras*, sine pustulis, adeoque *non elevatas*, neque *superficiem cutis superantes*; altera species *cutim solum transparuit*, & hæ duæ species inadvertenter evanuerunt, quas vulgus retrocessisse putabat; tertia prodiit cum *maculis parvis*, *rubris*, quæ in dies auctæ, & *supra cutis superficiem modicum elevata* racematim coaluerunt, quarumque protuberantia, digito leviter admoto, tactu percipi potuit; post quinque dies, morbo jam remittente, maculæ per totum corpus latissimæ & maxime rubentes evanuerunt, atque squamularum forma deciderunt, cute farina quasi conspersa relicta. *Morbilli* quo citius prodierunt, eo benigniores, quo tardius, eo peiores fuerunt. Incessit sæpe hic morbus sub vario schemate, vario stipatus satellitio. Sic

menſe Aprili ad puerperam vocatus deprehendi *morbillos* copioſiſſimos, protuberantes, quibus interſperſæ fuerunt *macula petechiales*, deliravit valde, imo tubarum in vicinia inflatarum cantus & pulſati tympani ſonos, inter difficultates ſomni per phantaſiam oblatos articulate imitata fuit, frequenter riſit, convulſa & aphona tandem jacuit, neminem novit, 15. tamen morbi die, adhibitis *expellentibus alexipharmacis temperatis, cordialibus*, ad ſe rediit, atque debellatis ſymptomatibus graviffimis convaluit. Eodem tempore gratioſam habui puellam 6. annorum, *variolis* veris laborantem, ſupervenerunt nona morbi die, variolis necdum in ſtatu conſtitutis, *morbilli* copioſi, graviffime inde decubuit, ſed ex duplici hoc morbo feliciter emerſit. Veriſſimum igitur eſt Axioma medicum: Qualis humor efferveſcit in corpore, talis effloreſcit in cute. *Morbilli* hi, ſi perite *expellentibus, v. gr. pulv. alexit. de hyacinth. lap. bez. orient. pulv. epilept. C. C. philoſ. antim. diaph. unicorn. mar. cum pectoralibus & confortantibus* mixtis, nec non ſervato ſimul idoneo diætæ caloriſque temperamento, tractati ſunt, omni vacarunt periculo, neminique fuerunt funeſti; neglecta autem, aut præpoſtera vel perverſa morbillorum cura, aut præmatura, ſuperatis jam morbillis, aëris mutatio, vel inordinata rerum non naturalium diætæ, præcipitavit quam plurimos in *tuffim ferinam, febrem continuam, reſpirationem difficilem, pectoris compreſſionem, catarrhum* ita dictum *ſuffocativum, lethalem*. Menſe *Majo & Junio* continuarunt adhuc *morbilli, febres continua, tertiana intermittentes, variola*, quæ *ſporadice* hinc inde vagatæ ſunt, ſed fuerunt ſine malignitate, adeoque convenienter tractatæ, facile curabiles. *Julius* fuit amœniſſimus, ſed cum ſummis caloribus, quarta coorta eſt graviffima tempeſtas cum frequentiffimis tonitribus, flammarumque fulgoribus, nec non grandinibus inſolitæ, quæ in civitate ut plurimum magnitudine juglandis, imo ovi gallinacei, prægreſſo imbre, ceciderunt, ad vineas tamen ſparſim venerunt, adeoque illis exiguum intulerunt damnum. Sub initium *Auguſti* remiſerunt calores, ſed ſexta audiebantur tonitrua terribilia, grandines cadebant inſolitæ, copioſiſſimæ, quæ in optimis noſtris promontoriis & vites & uvas prorsus deſtruxerunt. Jam ſucceſſerunt æſtuoſiſſima tempora, quæ vix ſuſtinere potuimus, neque ſpirarunt eteſiæ, nullæ fuerunt pluvix, quæ fervorem ſolis contemperaſſent, imo eadem aëris conſtitutio erat in *Septembri, Octobri* nec non *Novembri*, ut credidiſſes, autumnum in æſtatem fuiſſe converſum; habuimus quoque d. 25. *Septembris* velperi tonitrua & fulgura ſufficientia, unde in reſiduis promontoriis, quæ a grandine intacta manſerunt, generoſum crevit vinum, imo

imo generosius crevisset, si nobis ob metum tumultuantium Hungarorum serius vindemiare licuisset. Finitis enim jam vindemiis æstuosa & sicca adhuc continuarunt tempora, sine ullis fere pluviis. Sub finem *Novembris* & initium *Decembris* nives deciderunt paucæ, & moderata subsecuta sunt frigora. Mensibus æstivis, *Julio* nempe & *Augusto*, existente cælo maxime æstuoso, *diarrhæa* & *dysenteria* satis fuerunt frequentes, & magis pueros adultiores, senes, minus infantes sporadice affligerunt. Præcessit diarrhæa cum ciborum fastidio, languore totius corporis, siti, dejectionibus copiosissimis, serosis, ut plurimum biliosis, viscosis nec non pituitosis, valde foetidis, mox insecuta est dysenteria cum dejectionibus cruentis & purulentis, numerosis ad 70. 80. intra diem & noctem, aliquando velut momentaneis, ut miseri vix sellam foricariam deserere potuerint, & circa noctem cum majori exacerbatione, ut plurimum caloribus, quamvis non adeo urentibus, pulsu celeri, siti, inquietudine, acuto intestinorum & ani dolore, inani, licet frequenti, desidendi cupiditate, præcordiorum anxietate, vigiliis; in progressu morbi blanda accesserunt deliria, non sine malignitatis nota. Quamdiu sanguis cum materia biliosa, mucosa, purulenta & saniosa, aliquando cum strigmentis & ramentis exivit, tamdiu de vehementibus torminibus & doloribus conquesti sunt. *Dejectiones nigrae, foetidae* in morbi statu, majoris corruptionis denotarunt gradum, indicio manifesto, imminere jam *gangranam* & brevi *sphacelum*, unde in illis dysenteria antea cruenta & torminosa jam observabatur fere indolens, pulsus quasi nullus, extrema frigidissima, sudore copiosissimo resolutivo frigido perfusa. Refrigerationem hanc infirmi non percipiebant, quin potius de calore interno & siti conquesti sunt, imo manibus glaciei instar frigidissimis res aut loca frigida capeßere desiderarunt; & hi omnes, salvis tamen sensibus motuque membrorum illæso, elapsis ut plurimum 48. horis, mortui sunt. Causa hujus affectus adscribenda fuit partim copiosis fructibus horæis, acido-aqueo acri fermentifico foetis, partim caloribus ferventissimis, bile inde acriori lymphæque acidiori & quasi corrosiva reddita. Succi nempe eminenter acres, mordaces neßendo in intestinis diutius, quam par est, moram, primo absterferunt intestinorum mucum, deinde illorum crustam villosam, sive velamentum bombycinum simul abraferunt, & altius penetrando ipsas glandulas eroderunt, atque ulcus, vel quasi tale, instar vesicantium, induxerunt; inde membranis intestinorum sensim sensimque a sale corrosivo erosio vasorumque osculis reßeratis, non solum sanguis frequenter stillavit, sed & tristissimus doloris sensus accessit, imo spasmo-

dica vellicatio, qua intestina spasmo quodam irritata motu quasi vermiculari dolorifice sese torserunt, unde non mirum, successisse tandem inflammationem, gangranam ipsam, nec non lethalem sphacelum. Quo enim major acrimonia, eo major spasmodica fibrarum nervearum irritatio, major fermentifica humorum fusio, glandularum, ductuum & vasorum intestinalium eliquatio, nec non cruoris simul cum plexibus glandulosis ac reliquis intestinorum contentis excretio. Profuerunt sub initium morbi, non obstantibus torminibus & supervacaneis excretionibus, humores acres diluentia, & leviter Evacuante, utpote aqua Laxativa cum aqua cinamomi, in primis rhabarbarum tostum, quod blande laxando simul ob partes terreas admixtas adstringere, & leniter roborare solet, cum myrobalanis & elaeosacch. cinnamomi propinata, nec non clysteres abstersivi ex spec. emoll. hord. vitello ovi, conf. rosar. lacte, aliquoties adhibiti. His praemissis statim deveniendum fuit ad incrassantia, demulcentia, adstringentia cum anodynis mixta, unde singulis quatuor aut quinque horis exhibui pulverem sequentem: Rec. corall. rubr. præp. ʒss. lap. hematit. terr. japon. à gr. viij. theriac. cæl. gr. iij. laud. de trib. grss. M. mutatis tamen mutandis, addidi sæpe terr. sigillat. fl. ferr. bol. armen. pulv. stypt. Cr. smaragd. præpar. crystall. mont. pulv. dysenter. Crat. ex tragacanth. gumm. arab. & corall. constantem, nuc. mosch. &c. inprimis, ubi calores fuerunt ingentes, compos. sperniol. Cr. spec. de gemm. frig. unicorn. mar. spec. de hyacinth. &c. imo moderanda fuerunt medicamenta ad ipsius excretionis, malignitatis & virium modulum. Sæpe videbatur jam alvus adstricta, morbusque sublatus, brevi tamen malum recrudit, & exivit iterum aliquando cum, aliquando sine cruore materia mucosa in minima quantitate cum summis torminibus alvum ad excretionem stimulans; adhibitis autem frequentioribus clysteris ex decoct. hord. cum capit. vervecin. nec non continuatis pulveribus adstringentibus, ex toto cessavit. Tandem, ne propter derafos plexus ilei glandulosos fluxus alvi coeliaco non absimilis remaneat, ordinavi summo cum effectu balsamica, stomachica, bals. peruv. opobals. Tinct. corall. elix. Vitriol. M. pulv. stomach. elect. diacinam. Reg. nuc. in Ind. condit. Et sic dysenterici intra tres septimanas ex integro restituti sunt, quousque etiam a vino abstinere debuerunt, contenti aqua cocta ex rad. tormentill. ras. C. C. ebor. mastich. &c. Quos invasit cum vomitu, hi pessime decubuerunt, & vix servati sunt, optime autem ipsis profuit balsamum peruvian. nec non opobalsamum cum corall. rubr. exhibitum. Ad-

strin-

stringentia, sine præviis *blandis Laxantibus*, in initio & progressu morbi adhibita protraxerunt morbum; tormina exacerbarunt, & post se ut plurimum *febres*, *arthritides*, *pedum tumores*, *lienterias* reliquerunt. *Opiata* hic fere omnem absolverunt paginam, imo fateri debeo, me fere nullum dysentericum sine frequentiori exhibitione *laud. de trib.* commode restituere potuisse; exhiberi autem debuit, antequam dysenteria fuit consummata & plane ulcerosa, aut vasa majuscula exesa, aut sensus doloris jam periit. *Mense Augusto* frequentes habuimus *rheumatismos ad brachia, scapulas, femora, lumbos, coxas* productos, sine ulla rubedine, multo minus tumore, non tam articulis, quam musculorum interstitiis firmissime & diutissime inhærentes, cum motus impotentia, doloribus lancinantibus, profundis, fixis, qui noctu exacerbati somnum impediverunt: infirmi enim loco moveri nequiverunt, & quo statu fere primo jacuerunt ac decubuerunt, in eodem manere debuerunt, & sine cruciatu ac vehementi dolore vix moveri aut attingi poterunt; adfuit simul tensio & caloris acriusculi sensatio cum pulsu frequenti. Vulgus hunc affectum nominare solet *delapsum catarrhorum a capite*, es ist ein Fluß im Arm oder Fuß gefallen. Statuendum potius rheumatismum provenire a sero aut lymphâ acriori, flatulenta, retrogrado motu impedito, in specialem aliquam membranosa, tendinosam, nerveam & musculosa partem delabente, ibique stasin patiente, & partes fibrosas, nerveas tendente, easque tristi sensu vellicante. *Arthritis Vaga* hoc anno frequens fuit. Invasit homines prævio horrore instar febris; membranas ac musculosas articulorum partes dolore, rubore, tumore & movendi impotentia corripuit, vagabunda fuit & ambulatoria, modo hanc, modo illam invasit partem, nulla tamen loco ultra 48. horas fixa mansit, remissionem sæpe, relicto solum tumore, simulavit, at opinione citius, imo vehementius rediit, & priorem locum occupavit, imo memoratu digna in plerisque fuit paroxysmorum invasio dolorumque motus, dum quo tempore humerum, carpum aut digitos dextræ manus, eodem tempore & genua sinistri pedis; & quo tempore sinistri brachii, eodem dextri pedis partes singulari alternatione & saltu dolorifico infestavit. Similiter hic peccavit serum, sive lymphâ acido acris, sed sale volatili intimius foeta, quæ ad periosteum, sive sensibilissimas articulorum mobilium membranas detrusa, eas distendit, vellicavit, ibique sicuti spina infixæ sæviit. Cura *arthritidis Vagæ* & *rheumatismi* una eademque fuit. *Venæsectio*, nisi adfuit magna febris alteratio, intensior arteriarum pulsus, nec non præcordiorum compressio,

pressio, nil profuit, vires potius abstulit. *Purgationes*, utpote turbationes & colliquationes liquorum naturalium exasperarunt magis malum; reiteratus autem *enematum*, in primis *laxantium*, usus, v. gr. *Rec. pulv. hepat. ℥℥. sal. cichor. acetosell. ā. gr. v. diagryd. sulphurat. gr. vj. fecul. ari gr. iv. M.* aut decoctum ex fol. sen. S. S. 3℥℥. rhabarb. 3j. crem. tartar. in aqu. cichor. infus. addita manna & aqua cinnam. summopere profuit, in primis si vespertino tempore pulvis confortans sequens exhibitus fuit: *Recip. pulv. analept. ℥℥. epilept. gr. viij. lap. cancr. prep. gr. vij. laud. de trib. gr. ℞. M.* opiatorum enim vires hic summe deprædicandæ sunt, morbi quidem causam non tollunt, somnum tamen conciliant & dolores mitigant: non autem necessum fuit singulis diebus *opiatis & laxantibus* uti, dirigi & moderari potius pro re nata morbique indole debuit cura. Ab usu *sudoriferorum* nunquam felicem vidi successum. Post inunctionem *spirituosorum*, v. gr. *spir. vin. camph. formic. sal. armoniac. junip. lumbric. &c.* semper notavi dolores osteocopos, adeoque abstinendum fuit a *spirituosis*, nec non *unguinosis*, *emplasticis*. Optime autem, in primis sub finem morbi, profuerunt *Therma Badenses*, aut *balnea acidularum*, imo in ipso morbo *balnea ex aqua dulci cum hordeo* parata. Atque hac methodo tractati felicissime intra 20. aut ad summum, si copia peccavit materia, 40. dies restituti sunt. *Febres* his temporibus habuimus frequentes, quæ utut prima die tragœdiam a pandiculatione, oscitatione, languore, frigore, mox calore satis intenso auspicatæ sunt, cum subsequente secunda die apyrexia, speciem *intermittentis* simulante; supervenientes tamen paroxysmi, qui fuerunt cum languore, pulsu magno, exacerbatione caloris aliorumque symptomatum, confirmarunt intermissionem illam fuisse dolosam, & latuisse sub hoc cinere ignem *continuarum februm*, nec non *malignitatem* ipsam. Expost enim videbantur quandoque, in primis mane, remittere calores, nunquam autem intermiserunt. Crescente morbo, creverunt symptomata, imo convulsiones in statu morbi notavi frequentes. *Deliria serotina*, v. gr. die 11. 12. supervenientia semper fuerunt *exitiosa*. *Febres hæc* more *continuarum Venesectione* in principio, *diaphoreticis*, *bezoardicis*, *confortantibus* tractari debuerunt. Ultimis tribus mensibus, præter *febres tertianas, quartanas, catarrhos*, vix alii notabiles occurrerunt morbi.

Constitutio Epidemica Semproniensis Anni 1705.

Quo clementior anno præterito fuit aëris constitutio, eo rigidior sub ingressum anni 1705. comparuit cœli temperies. *Januarius* quippe incepit gelu congelare aquas, imo continuavit frigus toto hoc mense sine remissione, nives ceciderunt paucae, & spirans Euronotus induxit siccitatem. Nec mitior fuit *Februarius*, quin frigore & gelu longe rigidior, sine ullis nivibus. *Martius* illuxit gratiosa serenitate, & exoptato calore, sed quinta nives ceciderunt magnæ, sexta frigus, quod ad 12. usque duravit diem; circa *aquinoctium vernale*, spirante aëre meridionali, frequentiores habuimus pluvias, fructíferas, quas serena, calida mox infecuta sunt tempora, adeoque Martius utplurimum siccus extitit. *Aprilis* varias sustinuit ventorum mutationes, & frequentiores, vix non quotidianas, in primis circa finem, pluvias, oblectamenta vernalia inhibentes; imo & *Majus* fuit valde inamœnus, frigidus totus, excepto uno aut altero die, pluviosus. Continuavit pluviosa & frigida hæc aëris constitutio ultra *medium Junii*: unde non mirum, uvas circa festum Viti necdum florere incepisse. Circa *solstitium æstivum* temperatior aura & calores desiderati demum redierunt. Morbi, qui in hoc semestre inciderunt, erant varii. In *Januario* & *Februario* continuarunt *febres quartane*, quæ tamen, uno vel altero *Laxativo* adhibito, nec non *chinatis medicamentis cum arcano duplicato*, præter morem utplurimum superari potuerunt, neque ullam laborem post se reliquerunt. Frequentes erant *rheumatismi in pedibus, manibus, scapulis, lumbis*, cum dolore acerbo, sine inflammatione, sine tumore; hi *diaphoretica* sustinere non potuerunt, sed solis *temperatioribus cholagogis*, v. gr. *infusis ex manna, fol. senn. tartaro, cum aqu. cichor. &c. clysteribus, precipitantibus*, nec non *balneis hordeaceis*; & pro re nata, in summa dolorum exacerbatione, *grano dimidio laudani de tribus*, tractari voluerunt. *Catar-rhos* habuimus copiosos, qui in *febres degenerarunt continuas*, non adeo funestas. Servati enim omnes sunt, qui statim ab initio adhibuerunt *Alexipharmaca*, eaque continuarunt. Mense *Februario* jam inceperunt *febres petechiales*, quæ *pleuritides* ab initio mentitæ sunt, inceperunt cum horrore levi; febre lenta, tussis sicca, dolore in pectoris regione, ad scapulas, claviculas adscendente, cum molestia ægri, si in partem sanam decumbere voluit; assumtis autem *suderiferis* evanue-

runt dolores, & quarta, imo in plerisque septima demum eruperunt maculæ. In aliis simularunt *febres intermittentes*. Sic in Virgine quadam XVI. annorum, sanguineo-phlegmatica, tunc temporis ordinario mensium fluxu laborante, notavi tres paroxysmos, more *febris quotidiana intermittentis*, mane cum horripilatione, subsequo calore, circa vesperum intermittente, dolore capitis gravativo, siti, lassitudine &c. quotidie recurrentes, quarto *calores continuos*, prioribus longe intensiores, nec non eruptionem macularum, septima hæmorrhagiam-narium sat largam, decima deliria blanda, manuum tremores, linguæ ac faucium ariditatem molestant, 12. 13. novam copiosorum exanthematum, prioribus jam evanescentibus, eruptionem; & ecce 16. morbi die, non obstante hæmorrhagia, quæ ex alleviatione morbi judicabatur critica, septimâ oborta, obiit. Maximam *malignitatem* exanthematica hæc febris in recessu gessit mense *Martio*, *Aprili*. Incepit cum horripilatione, calor in sanguineo-phlegmaticis, quorum sanguis sero viscido abundat, mitis, sed subdolus; in sanguineis intensior, adfuit languor totius corporis, mox subita virium prostratio, membris quasi lassitudine fractis, aut contusis, sitis non adeo magna, nausea, vomitus, pulsus naturali fere similis, unde magis de languore, quam calore, conquesti sunt; sexta aut septima æstus invaluit, atque malignitatem suam sequentibus diebus prodidit, supervenientibus gravioribus symptomatibus, utpote exanthematum eruptione, cardialgia, pulsu celeri, frequenti, vigiliis, vehementissimis capitis doloribus, deliriis, motibus convulsivis, linguæ ariditate & fissuris &c. *Venesectiones* prima aut altera die institutæ, nec non repetitæ, valde profuerunt, serotinæ omnes nocuerunt. *Laxativa*, etiam sub initium morbi exhibita, rejicienda fuerunt, & memini in his *exanthemata longe latiora* prodisse, quam in aliis, eosque gravissimis symptomatibus, *tremoribus* nempe *totius corporis*, *deliriis furiosis*, tandem *aphonia*, *convulsionibus epilepticis*, tentatos fuisse, omnesque fatis occubuisse: *clysteriis ex humectantibus & emollientibus* confectis, nec non *suppositoriis* alvum adstrictam commodissime referare potuimus. Cura methodica maxime dirigi debuit ad vires, quæ conservari, ad humorum fervorem, qui contemperari, ad malignitatem, quæ corrigi debuerunt. Præstitimus hoc *blandis diaphoreticis*, *bezoardicis*, *cardialibus*, v. gr. pulv. alexit. spec. de hyacinth. C. C. philos. pulv. analept. epilept. lap. bezoard. orient. antimon. diaphor. unicorn. mar. conf. alkerm. mag. perlar. orient. &c. exhibito singulo octi-

horio pulvere uno , aut potiuncula. Sic corpus mansit perspirabile , sanguini sua constitit systasis & crasis , atque malignitas exuperata fuit. *A medicamentis spirituosiss , volatilibus , bezoardicis fortioribus , calidis* , quæ in hoc casu magis obfuisse , quam profuisse , jam a longo tempore in his calidis oris expertus sum , studio abstinui. Vinum omnibus interdixi , *aquam solam ex rad. scorz. ras. C. C. ebor. sem. anis. &c.* concedens. Acutissimos capitis dolores *Vesicatoria* nuchæ apposita sustulerunt. Sæviit vehementer hic morbus æque in adultos , atque gravidas. Sic binas habui , harum una , tertia morbi die , gemellos-vivos , nondum maturos , octimestres , qui intra aliquot dies mortui sunt , peperit ; altera sexta morbi die filium æque octimestrem , qui sex diebus vixit , enixa est. Fortior hic sine dubio sanguinis motio & rarefactio , qua apertæ & laxatæ sunt viæ , partus hos acceleravit , inde puerperæ valde debilitatæ , sed solis *confortantibus , analepticis , bezoardicis blandissimis* , aliisque pro morbi & symptomatum exigentia remixtis , tractatæ , binæ die XV. evaserunt ex morbo hoc gravissimo. Legitima enim & matura medicamentorum applicatio omnibus salutaris fuit , secus , qui a principio neglexerunt remedia. Sic inter alios novi mercatorem , Silesitam , eadem febre detentum , qui fere omnia respuit medicamenta , tandem delirio phrenetico correptus in lecto vix detineri potuit , die 12. demum prodierunt exanthemata , indubia mortis die 14. morbi subsecutæ indicia. In alio pauperculo *petechiali febre* extreme laborante notavi in dorso , brachiis , pedibus , natibus quamplurima *ulcuscula* , elevata , dura , cum intenso dolore , inflammatione , ad instar furunculorum , ichore plena , sed tubercula illa ulcerosa valde fuerunt maligna , naturam *anthracum* æmulantia ; caro enim in circuitu inflammata , tandem sphacelata & corrosa , ubique tota excidit , adhibitis tamen *expellentibus , Alexipharmacis & mundificantibus externis* præter omnium spem sanitati pristinae restitutus est. Ceterum multiplici experientia edoctus ingenue fateor , etiamsi omnia signa fefellerunt , me tamen sequentia in prognosi nunquam decepisse :prehendens nempe in tangendo pulsu *contractionem aut subsultum tendinum* , pro certo mortem prædicere potui. Sic ex *linguæ ariditate , fissuris , asperitate , scabritie , siccitate* , quasi lignum attingeres , *nigredine* , in primis , si retorrido calore cum vicinis faucibus aruit , aut *crusta quadam nigra obducta* , quæ licet sæpius os *fricando & colluendo deterfa* , statim tamen nova *repulavit* , infallibile summæ interiorum partium inflammationis & siderationis,

nis, nec non mortis augurium habuimus. Lingua enim etiam in minima inflammationis suspitione statim resiccare incipit, & crescente inflammatione crescit pariter & siccitas linguæ. Hoc morbi stadium sæpe ultra XV. morbi diem fuit protensum, aliquando felici, aliquando funesto eventu. Sic memini quosdam 16. alios 18. imò 22. demum morbi die fuisse extinctos, alios jam integre restitutos ex levissima causa & errore diætæ *recidivam* reportasse, quæ tandem, inflammatis glandulis, in pectore, in primis pulmonibus sitis & exulceratis, in *hecticos* degeneravit *calores*, longo tamen *medicamentorum pectoralium* usu superabiles. Mense *Majo* *febres petechiales* defævierunt, & evaserunt ex his omnes, qui ex methodo tractati sunt. Eodem tempore *læterus* frequens fuit, qui flavo suo colore deturpavit totum corporis habitum, speciatim vero oculorum politum ebur, nec non tempora. Conquesti sunt de pruritu in cute, maxime dorso, de caloribus transitoriis, lassitudine ulcerosa, doloribus capitis, somniis turbulentis, intensissima siti, inappetentia, oris amaritudine. Alvus plus solito adstrictior, & quæ exierunt excrementa, penitus albescentia, pauca, viscida, urina crassa, turbida, subnigra, in superficie oleaginosa, crocea fuerunt. Utique hic fuit obstructio tubulorum biliferorum, a viscida lymphâ hepatis & acinorum glandulorum, nec non saburra tartarea proveniens: inde bilis ab acido fixiori plus minus austero, torpidior & spissior redita, in motu suo impedita, neque per destinatos canales, tum ad vesiculam, tum per ductum cysticum in ductum choledochum ad intestina delapsa, potius restitans, in venæ cavæ propagines, tanquam fontes suos recessisse, ibique serum cum sanguine, & exinde productos humores, nutritioni & excretioni dicatos, citrino suo colore infecisse necessum fuit. *Martialia*, *rhabarbarina*, *aperientia* non solum ductus illos obstructos feliciter reserarunt, sed & bilem peccantem, atque jam ad habitum corporis delatam eduxerunt per epicrasin, v. gr. *pulv. hepat. cachect. croc. mart. aperit. cum salibus, rhabarb. Alex spir. sal. coagul. sal acetosell. absinth. cichor. tartar. vitriolat. arcan. dupl. rad. curcum. &c.* additis pro re nata, & quidem optimo cum successu, aliquando *granis aliquot diagrydii*. Mense *Junio* continuarunt adhuc *febres continuæ*, sed fuerunt valde *benignæ*. Jam inceperunt *tertiana*, *quartana*, curatu tamen faciles. *Julius* incepit cum caloribus, subinde tamen nubibus exasperatum cælum, in primis die 19. & sequentibus aliquot diebus, flante Borea, frigidam effudit pluviam. Cum Sirii ortu etiam exorti sunt calores, qui cum insolito

solito & vix tolerabili aëris fervore usque post ejus occasum, imo toto mense *Augusto*, sine ulla alternatione, continuarunt, excepto XIX. Augusti, quo cum imbribus, tonitribus & fulgure grandines per mediam horam deciderunt copiosissimi, quæ promontoria nostra fere omnia destruxerunt. Totus *September* aut ventosus, aut frigidus, aut pluviosus fuit, adeo, ut vix quatuor dies sereni toto mense numerari potuissent. *October* extitit amœnus, calidus, siccus, & quamplurimum contulit ad maturitatem uvarum, quæ alioquin immaturæ mansissent. Hinc vinum nec quantitate, nec qualitate laudabile crevit. *Novembris* initium ventosum, utcunque siccum fuit, progressus ad finem usque pulcherrimus, serenus, calidus. Sub initium *Decembris* apparuerunt hyemis indicia, nubibus & nebulis aër turbidus, frigidus, mox insecuta est amœna, serena sine nivibus tempestas, ad finem mensis durans, nobis quidem grata, sed ob hostium furorem valde infausta, ferrea & ignea. Tumultuantes enim Hungari die 24. *Decembris* civitatem nostram arctiori obsidione cinxerunt, eamque circa prandium ex monte Leonhardi globis ignitis continuo ex machinis bellicis majoribus explosis invaserunt. Primam stragem sustinuerunt suburbia (non exclusis V. domibus in civitate interiori existentibus,) quibus flammea hæc procella, aut diversa incendia sacram Christo nascenti noctem in funestam cinerum diem verterunt. Die Nativitatis CHRISTI ignitis suis globis nova incendia facere, atque residuum in cineres redigere, sed frustra, tentarunt; pilis autem suis majoribus igniariis, Bomben, ingens damnum ædificiis intulerunt; tandem biduo post, re infecta, discesserunt. His temporibus, mense nempe *Julio*, *Augusto*, *Septembri*, *Decembri*, adhuc continuarunt *febres continuæ*, *petechiales*, & notavi inter alia honestas duas fœminas, sorores; quarum una mense *Augusto* *febre exanthematica* laborans, die X. morbi acquisivit frequentem *diarrhœam* cum torminibus & doloribus inflammatoriis, vigiliis continuis, caloribus intensissimis, die XII. extrema, sudore resolutivo perfusa, etiamsi de æstu gravissimo, potius anxietatibus, conquesta fuit, frixerunt, 13. mortua. Latuit hic sine dubio *intestinorum sphacelus*. Altera soror mense *Septembri* eadem *febre petechiali* correpta, sumsit sub initium morbi, nil mali suspicans, ante macularum eruptionem, nescio cujus suasu, *Laxativum*, die 10. incepit delirare, adhibitis tamen adhibendis, die 17. calores remiserunt, & mens rediit, imo jam periculum evasisse ab omnibus judicata fuit; die 19. morbi in *femore pedis sinistri* ex insperato prorupit *macula nigerrima, crustacea*,

cea, instar anthracis, magnitudine duplicis grossi, quæ igneo suo fervore latius sese diffudit, carnem subditam exussit, atque die 21. pauperulam e medio viventium sustulit. Mense Decembri in alia foemina 46. annorum observavi easdem maculas petechiales tertia jam die prodeuntes, valde latas, non obstante Venesectione secunda morbi die administrata, tertia incepit delirare, quarta obiit. In his casibus utique peculiaris sanguinis corruptio, & singularis malignitas supponi debuit. Mense Augusto ex flagrantissimo sole aërisque siccitate ortæ sunt diarrhæa, dysenteria cum tenesmo, vomitibus, siti, doloribus abdominis; ut plurimum conjuncti fuerunt calores, inde methodo ordinaria tractari non potuerunt, quin potius alexipharmacis, v. gr. terr. sigillat. Japon. bol. arm. theriac. cæl. spec. de gemm. frig. curam aggre-di debuimus. Ubi nullus adfuit calor, ibi optime profuerunt blande educentia, in primis rhabarb. tostum cum myrobalan. citr. aut aqua laxativa ipsa cum aqua cinnam. sub initium exhibita, aut clysteres abstergentes ex hord. cap. vervec. lacte &c. frequenter applicati. Materiam adhuc resitantem acrem, austeram, acidam, urentem feliciter deinceps absorbentibus, adstringentibus, ac incrassantibus, v. gr. corall. rubr. alabastr. terr. jap. sigillat. crystall. mont. &c. correximus. Sic multum præstitit opobalsamum, nec non oleum nucistæ interne exhibitum; non minorem utilitatem attulit Cataplasma toti abdomini applicatum: Recip. pulv. centinod. burs. pastor. ā. mss. fol. rosar. rubr. balaustr. ana ʒiij. diacydoniat. cum spec. ʒss. nuc. mosch. n. ij. mastich ʒj. caryoph. ʒj. F. Cataplasma, adde ol. myrtin. cydon. mastich. ā. ʒj. M. Hoc mense erysipelata frequentissima fuerunt, sed uno vel altero sudorifero exhibito extincta. Nec his mensibus conticuerunt febres quotidiana, tertiana, quartana, quæ circa finem mensis Octobris valde contumaces extiterunt, senibusque funestæ. Præter alios affectus, rheumatismos nempe, catarrhos, podagricos dolores, odontalgias &c. sequentem notavi casum. Honestam matronam, annorum 45. multarum prolium mater, circa finem mensis Novembris, prægerssis jam a longo tempore spasmi digitorum manus sinistrae, agonizantem puellam in vicinia visitans, eamque morientem conspiciens, valde perterrita concidit epileptica, deportata domum, & in lectum illata tandem ad se rediit præteritorum fere inscia. Ad ipsam vocatus nil intentatum reliqui, aperui venam in brachio dextro, ordinavi clysteres, dedi antepileptica, v. g. pulv. epilept. spec. cephal. M. castoreum, unicorn. mar. ungu. alc. cran. human. aqu. hirund. &c.

castor.

castor. epilept. L. &c. affectum tamen curatius perpendens deprehendi spasmum, vel potius pulsum & subsultum magnum in medio, annulari & auriculari digito sinistræ manus, ubi frequenter & fere indefinenter illorum extremitates ad volam manus retractæ sunt; bihorio elapso, majorem persensit in prædictis digitis subsultum, mox paroxysmum epilepticum; adeoque celer motus tendinum veluti subsultorius, instar pulsus ordinarii, indubitatum instantis paroxysmi fuit præsagium. Sensit autem insecutas exacerbationes omnes manifestam originem traxisse ex extremitatibus trium digitorum sinistræ manus, indeque in momento, quasi volando, auram quandam adscendisse per brachium ad caput, affectoque cerebro, pars corporis sinistri variis motibus valde agitata & concussa fuit, pes tremuit, oculos contorsit, spumeum quiddam circa os apparuit, reflexo capite versus dorsum, adfuit simul omnium sensuum perturbatio. Dira hæc symptomata, si remiserunt, durarunt autem quandoque uno horæ quadrante, quandoque brevius, ægra tandem sopore quasi oppressa jacuit, mox gravi suspirio ad se rediit horum omnium insciã, atque solum de gravitate capitis ac lassitudine membrorum conquesta est, utplurimum, finito paroxysmo, modicum sanguinis ex nimio motu convulsivo in pulmonibus extravasati, ore rejecit. Sæpe velut ab utero suffocata rubebat insigniter, cum lassitudine quadam ac sensim oborientis febriculæ rudimento. Non quidem continenter horrendo hoc symptomate, sed interpolatis vicibus, modo serius, modo ocius, aliquando quotidie, aliquando tota septimana semel, commiseratione digna exagitata fuit, prout venenata hæc materia vel citius, vel tardius, auram suam subtilem, vel spiritus suos volatiles emisit, qui in cerebrum delati irritando sensiles ac nerveas fibrillas celerem illam, inordinatam & in voluntariam concussionem membrorum, cum conspicua mentis labe, ac terribili nervorum contractione illius potissimum corporis partis, ex qua malignus vapor speciatim in cerebrum fuit amandatus, conciliarunt, miseram nostram, si extra lectum fuit, cadere fecerunt. Malum hoc necdum radicatam quo ex toto tolleretur, nihil non tentatum fuit, cum per *cathartica. v. g. pil. coch. de succin. Cr. extr. castor. cum sir. de cichor. c. rhab. &c.* tum per *Vesicatorium*, ad eliciendam materiam peccantem, regioni carpi impositum. Carpum deinde arctiori vinculo circumligari curavimus. Interne quotidie mane sumsit *pulveres epilepticos ex pulv. epilept. M. gr. viij. mag. cran. hum. gr. v. ungu. alc. præp. gr. vij. unicorn. mar. gr. jv. pulv. castor. gr. v.* vespere vero mixturæ sequentis guttas 30. *Rec. Elix. uterin. Cr. ess. suc-*

cin, sal. volat. oleos. ā. ʒj. M. his continuatis remiserunt symptomata, non tamen ex toto cessarunt. Unde sanguinem *cruciatim* ex brachio nempe dextro, & pede sinistro simul & semel detrahi curavi, tandemque *mistur. simpl. cum elix. uterin. Cr. & ess. anod.* exhibui, quorum beneficio malum hoc potissimum, una cum motu tendinum subfultorio in digitis intra tres menses devictum fuit. Pro roboratione membrorum & nervosarum partium, nec non avertendo recidivæ metu, ablegavi ipsam mense *Majo* sequentis anni ad *Thermas Badavino-Austriacas*, & quidem optimo successu. Pristinam enim recuperavit sanitatem. Thermas autem quotannis visitare debet, quod licet deinceps non observaverit, nullum tamen similis morbi indicium per multos annos amplius in conspectum prodiit. Et hæc dicta sunt de morbis, qui hoc anno apud nos observati sunt.

Constitutio Epidemica Semproniensis Anni 1706.

CRedidisses præteriti anni exitu & ferocientium hostium abitu, nos jam calamitatibus, molestiis, periculis vacuos, furoremque hostium erga nos in lenitatem esse conversum. Sed ecce illorum furor mox abiit in rabiem. Cogitantes enim de nostro interitu & civitatis exitio, d. 2. *Januarii* ad pristinam stationem redierunt majoribus machinis, mortariis pluribus & requisitis bellicis probe instructi; 3. die *Januar.* summo mane, continuis tormentorum & pilarum jactibus tam ardentè ædificia pulsarunt, ut fulmina & fulgura de cælo descendisse putasses, imo sparsa missilium flammarum imbre nova incendia excitarunt, & quamplurima civium ædificia immani grandine quassata destruxerunt. Sed cum hostes vidissent, se continuo machinarum bellicarum boatu & fragore inconcusam civium fidem & constantiam nequiquam evertere posse, sexto *Januarii*, summo mane, trino agmine & magno impetu mœnia invaserunt, admotisque quamplurimis scalis, nec non globulis quamplurimis manu injectis, mœnium fastigia, quæ jam attigerunt, transcendissent, nisi nostrorum Civium & inhabitatorum pectora pro muro fuissent, atque continuis scloporum explosionibus, nec non clavis præferratis permultos de muro in subjectas fossas præcipitassent, hostesque pedem, relictis centenis & ultramortuis, in pristinam suam stationem referre coëgissent. Hostis itaque invictam civium constantiam jam expertus, adversis tempestatibus cœli quotidie magis magisque invalescentibus, die 10. *Januarii* obsidionem solvit, recessit, sed a longinquo nos cinxit. Cives interea
insue-

insueras in excubiis sub Jove frigido & humido per aliquot menses constanter continuarunt suas stationes, atque intrepide defenderunt sua mœnia. Alias hic *mensis* valde horridus fuit, frigore tamen quandoque remittente, placidior. Mollior aër sub initium *Februarii* observabatur, in progressu remissum aliquod frigus, sub finem nives, subsequo frigore congelatæ. *Martii* ingressus rigidissimus subito cum sereniori ac blandiori aëre commutabatur, circa *æquinocetium* frequentes fuerunt pluviae, mox nives, mox varii ventorum tumultus, adeoque *Martius* non siccus, sed humidus extitit. *Aprilis* comparuit nivofus, mox tamen serenior & amœnior factus calore suo veris delicias produxit, languentes animos excitavit, & ad finem usque siccus ac calidus permansit; die 30. ingens tempestas cum fulguribus & tonitrubus oborta est, quam præcessit magna papilionum cohors occidentem versus volitans. *Majus* fere totus mane subfrigidus fuit, siccus, circa meridiem calidus, cum paucissimis pluviis. Toto *Junio* grata & exoptata habuimus tempora, calores intensos sæpe venti, quandoque pluviae nocturnæ contemperarunt amœnissimæ. Medardi dies fuit serenissimus, & die S. Viti uvas in omnibus promontoriis jam defloruisse notavimus, inde nostrates præcocem vindemiam augurari solent. Toto *Januario* morbi, præter *catarrhos*, hyemali tempore non infrequentes, nec non *quartanas*, nostris desideratas dederunt inducias. Sub initium *Februarii* febres notavimus *continuas*, malignitatis tamen expertes, *rheumatismos frequentes biliosos*, *defluxiones seroso-biliosas in capite*, maxime *pone aures*, aliquando cum, aliquando sine tumore, cum modica febrili alteratione, summe dolorificas, *suffumigiis ex olibano & cataplasmatibus emollientibus* curatas. Continuarunt illæ in primis mense *Martio*, & invaserunt articulos maximo cum dolore, inflammatione, tumore, senibus, in primis podagricis, exitiosæ: in his rediit *podagra*, sed sine doloribus, quæ retrocedens materiam peccantem ad pectus transtulit, ibique *catarrhos lethales* excitavit. Sed miratu dignum fuit, quod præter hujus mensis indolem nullæ febres *continuae*, exceptis paucis *catarrhalibus*, quæ senibus fuerunt funestæ, obortæ sint, cum tamen fœminæ cum prolibus suis, superioribus mensibus, maximum metum & terrorem ex turbis bellicis conceperint, & pro majori securitate diu noctuque squalida cellaria inhabitare debuerint, cives autem & incolæ omnes in excubiis quam maximos excessus sub Jove frigido & humido in vino commiserint, adeoque humores ad morbos generandos, aut suscipiendos disposuerint, in primis, cum absque hoc *Martius* sit humorum genitor, motorque dolorum. Beneficium hoc adscripsimus vino

ново,

novo, quod præterito crevit anno, levissimo, claro, acido, tartaro crudo abundanti, diuretico: hoc potenter viscidam bilem diluit, solvit eamque per alvum & urinam eduxit, adeoque sanitati nostræ valde proficuum fuit. Aliis annis vina hujus loci nova, ubi calore solis & cœli benignitate ad summam maturitatem pervenerunt, generosa ac potentia tartaro subtili scatent, oleosa sunt, & necdum defœcata, largius hausta bilem a naturali sua crasi dejiciunt, alcalicis suis particulis quam maxime sanguinem accendunt, visciditate autem sua hujus circulum retardant, toti corpori torporem inducunt, caput gravant, constipant, imo particulis suis hamosis salino volatiles maxime activas reprimunt, actiones animales simul lædunt, & varios morbos, in primis *febres continuas, malignas, petechiales* conciliare solent. Mense *Aprili, Majo, Junio*, repullularunt *febres continua, petechiales*, quandoque cum, quandoque sine malignitate, methodo tamen ordinaria feliciter eradicatæ. Inter alia notavi gratiosam filiolum, quinquennem, *febre continua* correptam, cum maximis abdominis doloribus, torminibus, vix non convulsivis, & imminentis *epilepsia* metu; loqui nil potuit, dolorem autem ejulatu expressit, continuarunt calores sine ulla intermissione ad 21. diem. In horrendo illo ejulatu ob metum gravioris mali 11. & 12. morbi die dedi *laudan. de trib. grsß. cum pulv. epilept. M. castor. unicorn. mar. ▽ hirund. c. castor. &c* laudabili cum successu & subsecuta quiete. Durante morbo, & 6. septimanis post morbum, ne verbum eloqui potuit, licet omnia bene intellexerit, & linguam quaqua-versum movere ac volutare, bibere, comedere, deglutire potuerit. Topica præscripsi varia, v. gr. *unguentum ex conf. anacardin. 3ij. alkerm. 3j. extr. castor. gr. viij. ol. succin. gutt. iij.* pro illinitione, & frictione faucium, linguæ & palati. Fomenta ex *infus. majoran. salu. chamomill. hyssop.* collo, in primis laryngi frequenter applicuimus, donec interior laryngis rima a siccitate coarctata ac constricta, aliquantum iterum humectata officio suo fungi potuit, atque sensim & sensim, licet sub initium difficulter, verba articulata expressit. Humores biliosos ex abdomine ad musculos laryngis, inque nervos vocales, metastasi facta, delatos, præter calorem febrilem, interiorem laryngis rimam arefacientem, eosdem affecisse, conjiciendum ex prægressis vehementissimis, vix non convulsivis, abdominis doloribus, in tempore consopitis. Iisdem temporibus observavi in filiolo sexenni *calores continuos* sine ulla intermissione, vix remissione, ad 30. diem & ultra, non obstante legitima medicamentorum administratione, extensos, adeoque non sine malignitate, tandem tamen feliciter superatos. His mensibus *rheumatismos & arthritides vagas* notavimus frequen-

tes, methodo autem nostra superius tradita mox profligatas. Mensis *Julius* fuit æstuosissimus, noctes præter morem calidæ, sine ullis fere pluviis: die 16. cœlum opacis & atris nubibus desubito exasperatum effudit imbrem largissimum cum tonitribus, in vicinia cum grandinibus insolitis, maximo *Rustensium vinearum* damno. Sub ingressum solis in leonem, nisi quandoque grati spirassent etesiæ, calores vix fuissent tolerabiles; tandem ultima hujus, prægressis noctu crebris tonitribus nec non fulguribus, gratiosa ac tepida superveniens pluvia cum amœnissimis & subfrigidis ventis ingentissimum auræ calorem contemperavit, terram refocillavit, & omnia recreavit. In *Augusto* terra per totum mensis cursum fervido solis calore fovebatur, subinde tamen nocturno tempore tepidis pluviis animabatur, inde jam sub initium hujus mensis maturas habuimus uvas. *Ægidii dies* mira & exoptata illuxit serenitate, & serenavit totum mensem, exceptis 17. 18. diebus, qui fuerunt frigidi, ventosi, pluviosi. Per *Octobrem* totum eadem gratiosa serenitas, siccitas & æstus amœnus duravit, cum nebulis matutinis, solis splendore discussis, exceptis 6. 7. & 8. diebus, qui sparserunt pluvias. Hinc vinum crevit generosissimum. Secunda *Novembris* primam demum notavimus pruina, & continuarunt amœnissima, calida illa tempora, præter ætatis anni morem, toto mense, nisi quod 14. 15. intervenerint pluviae, & 24. nives ceciderint ingentes, sequenti tamen die liquefactæ. Eadem cœli tempestas continua, serena nempe, calida, aliquando nebulosa fuit usque ad 17. diem *Decembris*, 18. vero, 19. pluviosa, nec non nivosa; die 20. ingruit gelu, quod post biduum remisit, reliquis diebus pluviae, nebulæ, venti ac calores alternarunt, quæ tempestas, prædominante calore circa Natalitia, *pyrorum flores & turiones sambucinos* elicuit. Mensibus æstivis omnis generis *febres* grassatæ sunt, frequenter autem hinc inde in civitate comparuerunt *febres*, quæ *continuas* mentitæ sunt, nobisque ab initio imposuerunt. Invaserunt hæc cum horripilatione vix sensibili, insequente calore, ultra 30. horas durante, cum vehementi siti, capitis dolore, vigiliis, vomitibus, præcordiorum angustia, anxietatibus, virium prostratione, linguæ ac faucium squalore, ita ut *febrem continuam* fore metuerim; adhibita tamen *Venesectione* in brachio, & repetita in pede, exhibitoque uno vel altero *sudorifero*, remisit calor, & tertio aut quarto die ut plurimum in *intermittentem tertianam duplicem* terminavit; aut inter apyrexiam & paroxysmum brevissimum fuit intervallum, imo, saltem aliquot interjectis horis, nova *febris*, sine ullo frigore, accessio, quæ observabatur una die intensior, & quasi composita ex *tertiana & quotidiana*, altera autem *levior* typum *quotidianam* referens. Ante

paroxysmum dedi *antifebrilia ex salibus*, *arcan. dupl. cort. chin. lap. cancr. &c.* in caloribus vero diuturnis, ob metum latentis malignitatis, nec non ingentem debilitatem, *blanda diaphoretica*, utpote *lap. bez. orient. pulv. analept. M.C.C. philos. magist. perlar. conf. alkerm. &c.* aliquando, in primis ubi *capitis dolores* fuerunt intensi, loco *antifebrilium* præscripsi *spirit. sudoris. ℞. cum spirit. anod. ℞.* & quidem laudabili successu: non enim tantum dolores remiserunt, sed & paroxysmi febriles brevi cessarunt, & utplurimum soluti sunt spatio 15. aut 21. dierum. Febres *tertianæ* circa hæc tempora fuerunt frequentes, sed adeo mites, ut post quintum aut sextum paroxysmum, adhibito *Laxativo*, nec non *antifebrilibus salibus* recesserint. Febribus *continuis* corripiebantur permulti, sed sine gravioribus symptomatibus, & absolverunt jam die 15. suum cursum feliciter; hinc omnes servati, qui non incuria neglecti, sed methodo ordinaria tractati fuerunt. Mense *Julio*, *Augusto*, *Septembri*, *diarrhææ*, *dysenteria* ex radiorum solarium æstu invaserunt quamplurimos, sine ætatis discrimine, cum maximis torminibus, tenesmo, dejectionibus copiosissimis, purulentis, cruentis. Principium curæ sumsimus a *rhobarb. tost. myrobal. citrin.* aliquando ab *aqua laxativa*, in primis si ventriculus cruditatibus labefactatus aut gravatus fuit; acrimoniam humorum temperavimus *absorbentibus*, v. gr. *coralliis rubris*, *terr. sigill. fl. ferr. crystall. mont. &c.* continuas dejectiones & dolores correximus *clysteriis ex decoct. hord. aut oryz. capit. vervec. vitell. sæpe injectis*, nec non *adstringentibus*, *incrassantibus*, *demulcentibus* sæpius exhibitis, v. gr. *pulv. dysent. Cr. terr. catechu &c. mithridat. theriac. cæl. laudan. de trib.* imo fateri debeo, etiamsi singulis 5. aut 6. horis medicamenta *adstringentia* exhibuerim, me tamen sine *opiat*is nihil profecisse, adeoque *Laudanum de trib.* in accisa (refracta) dosi aliis additum & sæpe repetitum hic optimam tulisse opem. In quibusdam observavi neque hæc quicquam profuisse, quin potius infirmos aliquando evomuisse biliosa, indicio, ventriculum una cum primis viis, cruditatibus acribus, biliosis, adeoque causa morbifica adhuc esse repletum, iis bis dedi *rad. Ipecacuanh.* & quidem pro dosi ℞ij. inde frequentiores habuerunt vomitus, pauciores dejectiones, quo facto, reliquum curæ *adstringentibus*, *incrassantibus*, *anodyn*is, v. gr. sequenti *pulvere* aliquoties exhibitio, & singulis 6. horis repetito, Recipe *crystall. mont. corall. rubr. præp. terr. japon. ana gr. viij. theriac. cæl. gr. iij. jv. laudan. de trib. gr. ℞. aliquando gr. j. M.* feliciter peractum fuit.

Tres personas notavi, quæ, absumptis jam roscidis & balsamicis lymphæ particulis, spiculis autem acribus, adeoque doloribus, auctis, tandem, supervenientibus dejectionibus atris, cadaverosum odorem spirantibus, indolentibus, artuum refrigerationibus, mente ac sensu privatæ *gangrena & sphacelo intestinorum* obierunt. In alia matrona 5. diebus ante mortem præcessit *singultus*, omnem *castorinorum & opiatorum* efficaciam eludens, inflammationum & convulsionum internarum, nec non mortis imminentis prænuntius. Mense *Octobri* in scenam prodierunt morbi vitio *renum & vesicæ* orti. Sic in Perillustri quodam Domino, septuagenario, alias robusto, notavi *Ischuriam*, sive totalem urinæ suppressionem, ex *calculo renum* tubulos obstruente, natam. Adfuerunt maximî dolores circa lumbos, vomitus frequentes, angustiae & anxietates præcordiorum, obstinata alvi obstructio, nullus vesicæ tumor, nullus in pube dolor, nulla perinæi gravitas, nulli calores, imo pulsus naturali fere similis. Cathetere flexili sæpe immisso ne gutta urinæ extrahi, aut *calculus* in vesica latens deprehendi potuit. Adhibuimus sæpissime *clysteres emollientes*, *balnea aqua dulcis una cum herb petrosel. matu. parietar. chamomill. melilot. verbasc. stram. aven. &c.* unguenta pro inunctione lumborum, ex *unguent. rosac. ol. scorp. Matth. succ. citr. nitr. præp. &c.* Interne fere quotidie dedi *decoctum ex spec. dialth. Fern. & aperitiv. For. cum fol. senn. mechoacann.* quibus magnam serosorum humorum, alias ad renes tendentium, copiam per alvum eduximus, ne guttam vero urinæ elicere potuimus. Potus ordinarius constabat ex *spec. dialth. Fern. & aperit. For. cum ras. C. C. sem. anis.* Ex diureticis, lithontripticis, pellentibus, sumsit *tinct. sal. tartar. spir. salis dulc bals. sulphuris terebinth. succinat. sal genist. ononid. fabar. spir. salis coagul. tartar. Vitriolat.* aliaque; imo pro exigentia symptomatum, utpote vigiliarum, dolorum, etiam *laudan. de trib.* in refracta dosi, alvoque libera existente; pro corroboratione virium *confortantia*. Sic tandem septima morbi die robore naturæ moti sunt *calculi* ex renibus in ureteres, cum vehementi, lancinante, pungente dolore; ex his brevi delapsi in vesicam urinariam: patente jam exitu parum urinæ, non quidem sine dolore, emisit, mox una cum tribus lapillis, magnitudine fabarum, urinam subcruentam. sine dubio ex laceratis vasculis a calculorum asperitate, excrevit, & post subnigram, tandem, & quidem abunde, pallidam, copiosa materia viscida, sabulosa refertam. Dolores statim post excretionem urinæ evanuerunt omnes, remanente solum lassitudine ulcerosa sensuumque torpore, donec vires suas de-

perditas recollegit, atque ex integro convaluit. In aliis eodem tempore observavi summum *urinae ardorem*, ubi quidem fere nullus urinæ fuit defectus, maximus tamen dolor, & in urethra ignea quasi rosio. In aliis *Stranguriam* animadverti, ubi continuus fuit ad mingendum stimulus, nihil tamen, nisi una vel altera gutta effluxit. His omnibus feliciter medebamur *decocto aperit. For. dialth. Fern. cum fol. senn. clysteriis*, nec non *topicis, balneis*, aliisque superius allegatis. Inter morbos illius temporis etiam occurrit *Passio Iliaca*. Hac corripiebatur quidam Vir-Juvenis, *hernia scrotali* jam ab aliquo tempore laborans, alvi nempe contumacissima obstructione, vomitibus frequentissimis, doloribus circa umbilicum summis, instituta autem repositione, nec non adhibitis crebrioribus *enematibus, aquis laxativis, cataplasmatibus ex decoctis emollientibus*, alvus stimulata sui officii memor copiose excrementa reddidit, evanuerunt dolores, nec non Vomitus, imo jam periculum evasisse ab omnibus judicatus fuit. Sed ecce, diebus aliquot elapsis, nescio quo errore commisso, in eundem morbum recidens, accedente febre, vomitibus stercoreis, obstinata alvi constipatione, sudore frigido in extremis, doloribus atrocissimis, delirio, singultu, virium languore, & ultima die dejectionibus spontaneis, septima recidivæ die, remediis prioribus nunc nihil proficientibus, extinctus est. Jam addam, quæ de *immodico hæmorrhoidum fluxu* notavi. Fuit Vir quinquagenarius, artis pharmaceuticæ peritissimus, ex familia, cujus indigenis masculis hic affectus quasi proprius, ortus. Is jam in ætate sua juvenili fluxum huic sanguineum expertus est, qui si statis & definitis temporibus, singulis nempe mensibus, moderate rediit, sanitati quam maxime profuit; si vero ex voto non successit, statim toti corpori languorem induxit, intestinis tormina, gravitatem circa os sacrum, calores febriles quasi continuos, biliosas capitis defluxiones, oculorum inflammationes &c. conciliavit. In ætate virili sanguis non amplius moderate ad uncias, sicuti ante, & menstruatim, nescio qua sanguinis acrimonia aut viarum laxitate, non periodice, sed singulis fere septimanis, ad libras manavit cum notabili virium dejectione, faciei colore ad viriditatem inclinante, gravitate in coxis, in cruribus magna debilitate, ut vix incedere potuerit. Sisti cito hic fluxus non debuit; sanguis enim statim regurgitavit ad pectus, & *anxietates præcordiorum, respirationem difficilem, palpitationes cordis* induxit. Cum vero immodicus hic fluxus latentem hæcenus *cacochymiam*, nec non acredinem & salsedinem sanguinis insignem prodiderit, imo aut *hydrops*, aut *phthisis*, aut *apoplexia* exinde metuenda, & vires jam laban-

labantes medelam urserint, suasi omnino in brachio *Venasectionem*, roborantia & temperantia, acidula, bilem acrem, lentam, rosivam corrigentia, & per epicrasin educentia, v. gr. *Tinct. rosar. corall. mart. aperit. c. succ. oxalid. M. Tinct. seri lact. caprin. cum tamarind & rhabarb. fact. pulv. hepat. sal. cichor. grana granatorum acidorum succulenta*, quæ masticavit, ejusque succum deglutivit, *pulv. cachect. Qu. lap. cancr. crud. smaragd. præp. corall. mag. perlar. emulsiones ex sem. frig. cum decoct. hord. & julep. rosac. fact. nitrosa ipsa, compos. Sperniol. Cr.* quibus ebullitionem in sanguine nimiam compescuimus; fluxum vero immodicum blandis adstringentibus cohibuimus, v. gr. *Tinct. mart. adstring. lap. hamatit. ess. traumat. sir. de ros. siccis, myrtill. trochisc. de spod. carab. croc. mart. adstring. dent. eq. mar. s. hippopotam. succo urtica express. & depur. infuso millefol. sanguisorba, vino rubro ex infus. carn. cotoneorum*, aliisque in primis topicis, v. gr. *unguento Comitissa*, quo inungi debuerunt hæmorrhoides, & dorsum, aut aliis fomentis, linimentis & fotibus ex *succ. plantag. burs. pastor. verbas. sangu. dracon. thur. terr. sigill. rad. bistort. tormentill. &c. it. vernice*, in qua intinctus fuit pannus lineus & cum ol. rosat. admotus. *Polygonum*, utpote singulare & decantatum euporiston, sub axillis frequenter gestavit. Observari autem diligenter debuit, ne alvus plus solito adstricta fuerit. Hac igitur methodo symptomaticas excretiones temperavimus, atque Pharmacopœum nostrum ad multos annos conservavimus, donec tandem mœrore animi confectus, & viribus jam exhaustus placidissime obiit. Mense *Decembri* luctuosa *epilepsia* notavi phænomena. Puer octennis noctu hora XII. in aream mictum exiens spectrum ibi perspicit, horrore ac terrore plenus summo cum angore & clamore in hypocaustum & lectum veluti furia-tus rediit. Vix sese ad quietem componens tentabatur horrore, sudore frigido, affectibus convulsivis. Mane accersitus deprehendi inordinatam ac involuntariam membrorum concussionem, modo cessantem, modo redeuntem. Affectus hic indies invaluit, & secutæ sunt brevi gravissimæ convulsiones nervosi generis, genarum labrorumque terribiles spasmi, adfuit continuus digitorum, velut aliquid comprehendentium, lusus, contumacissima alvi adstrictio, nulla spuma circa os, oculi manserunt aperti & irretorti, respiratio libera, oris autem distorsio enormis, largo risu mox superveniente; dentes valide coierunt, ut pro infundendis cibis liquidis & medicamentis, instrumento aperiri debuerint, articulata vox periit, & nil, nisi clamor remansit, mentis operatio defecit,

nec sensus nec memoria alicujus rei extitit, sedere, stare, ambulare nequivit, & quando mater ipsum elevare voluit, mox instar globi sese incurvavit, mox in alios incredibiles flexus instar arcus sese præcipitavit; nec paroxysmus inducias concessit, sed duos menses indefinenter fere diu noctuque continuavit. Terrorem morbum hunc convulsivum produxisse, extra omne dubium est, licet non excluderem *vermes*, quorum aliquot ante & in morbo excrevit. In hoc tumultu morbique vehementia pro demulcendis partibus convulsis, vellicatis ac distortis, *antepileptica specifica* sæpissime exhibita, v. gr. *pulv. epilept. M. spec. cephal. Mich. mag. cran. hum. ungu. alc. præp. unicorn. mar. cinnab. nat. castor. aqua epilept. Lang. hirund. c. castor. &c.* nullum præstiterunt emolumentum. Vomitoria cum Laxantibus mixta, v. gr. Recipe: *Aqua laxat. ℥ij. sir. Emet. A. S. 3℥. M.* pro una vice, quæ pro educendis humoribus biliosis, cum acido confermentatis, fixis, binis vicibus exhibui, observavi hic felicissime profuisse. Jam optimo cum successu reiteravi specifica, v. gr. Recip. *specif. cephal. M. gr. vij. pulv. epilept. 3℥. castor. gr. vij. ungu. alc. præp. aut unicorn. mar. gr. v. M.* eaque quotidie bis aut in forma pulveris, aut potionis, additis aquis appropriatis & sirupis, præscripsi, quibus aliquando granum ℥. aut ad summum gr. j. *laudan. de tribus* addidi. *Enemata* multum profuerunt. Atque sic post duorum mensium tædia expugnatus fuit morbus, ut jam puer sui compos stare, ambulare, sedere, cibum ac potum capessere, articulate loqui potuerit. Subsecuto mense *Majo*, ne in posterum recidivaret, misi illum ad *Thermas Badavino - Austriacas*, ex quibus redux immunis jam ab hoc execrando morbo vivit, & quod mirandum, sine ulla mentis aut memoriæ labe. Hoc mense duos notavi *apoplecticos*. Unus octogenarius ex ordine senatorio, prævia vertigine, lassitudine membrorum, desubito *apoplexia* correptus cum sensus ac motus abolitione, pulsu magno, in debilem tandem & frequentem mutato, omnibus in cassum adhibitis, secunda morbi die placidissime obiit. Alter fuit Reverendissimus hujus loci Plebanus, 56. annorum, atque habitus corporis obesioris. Hic, dum nocte Natalitii Domini hora secunda matutina sacris peragendis intentus, præ verecundia, justo diutius retinisset urinam, ab altari reversus de torpore, vertigine, anxietatibus conquestus est, mox domum vectus & in lectum delatus ex regurgitatione seri urinosi ad superiora, *Apoplexia* fortissima cum stertore, spuma ante os, tactus, spatio semiquadrantis, adeoque eadem hora, qua sanus fuit, repente interiit.

*Constitutio Epidemica Sempronienſis An-
ni 1707.*

JANUS bifrons eadem ſerena fronte, qua veterem annum denis ſereniſſimis diebus clauſit, auſpicatus eſt novum totidem ſerenis, calidis, ſiccis diebus, unde ſtatim X. die ingruerunt frigora, mox ſubſecutæ ſunt nives copioſæ, quæ congelatæ ad feſtum purificationis uſque jacuerunt durabiles. Secundus *Februarii* dies totus fuit turbidus, & regula ruſticorum hoc anno veriſſima: Sole nempe micante, die purificante, nix aut frigus erit majus, quam ante. Eo ipſo enim die remiſit frigus, nives liquatæ omnes, ingruerunt pluvix, nebulæ, quæ ultra ſeptimanam inſtiterunt, denſiſſimæ, foetidæ, corporibus noſtris valde infeſtæ; die 17. 18. rigidos habuimus ventos, boræos, qui ſiccarunt terram. Jam ad aliquot dies frigoris vis ſoluta, ſed die 24. Feſto Matthæi intenſior facta in medium *Martii* continuavit; adeoque *Februarius* fere totus ſiccus fuit; Bacchanalia amœniſſima, ſerena, calida, dies Cinerum valde frigidus, ventofus; medio *Martii* ceciderunt nives, mox ſecutæ ſunt pluvix. Æquinoctiale tempus notabatur valde turbidum, pluvioſum, nivolum, lutolum, imo ad finem menſis uſque tumultuaria tempeſtas, mox ventis, mox nivibus, aut pluviis, moleſta, raro ſerena; adeoque *Martius* valde humidus atque ingratus. *Aprilis* incepit cum nivibus, pluviis; mox infeſcuta ſunt frigora, quæ tempeſtas tumultuaria X. continuavit diebus, imo totus menſis magis fuit frigidus, ventofus, quam calidus. Ipſo quoque *Majo* cœlum, ſi paucos amœnos dies exceperis, utplurimum atris inhorruit nubibus, & dies turbido aëre frigidisque ac frequentibus pluviis reddidit minus vernaſes, minus majales, rigidi præter morem extiterunt. Menſe *Junio* longe amœnior ac placidior aura comparuit. Medardi dies valde ſerenus ſine ullis pluviis, & rediit nunc calor intenſiſſimus, imo, quod ex tot aëris viciffitudinibus & cœli inclementia, ſuperioribus menſibus prægreſſa, nullus præſumſſet, multo minus credidiſſet, jam ante diem Viti copioſe uvas in flore deprehendimus: die XVI. ſupervenerunt pluvix gratioſiſſimæ, fructiferæ, mox æſtus increvit, & fere tribus ſeptimanis indefinenter, nulla intercedente pluvia, continuavit, cujus ardore terra valde exiccata dehiſcere, homines autem ob largiores ſudorum effuſiones defatigari debuerunt. Febres *continuae* modo cum, modo ſine exanthematibus, modo benignæ, modo malignæ, prouti apud nos quo-

quotannis observantur epidemicae, ita & hoc semestri fuerunt frequentes, in quam plurimis malignitatis expertes, & methodo ordinaria, superioribus annis jam tradita, tractatae, plerumque die XV. in alio nono, in uno septimo, praegressa eodem die haemorrhagia critica, ex voto solutae. Alios invasit cum maxima malignitate. Sic honesta quaedam foemina, quadragenaria, ex eadem febre die morbi demum XI. incepit delirare, quod alias pro pessimo & fatali signo habeo, XV. recesserunt calores, sed quinque diebus & noctibus insomnibus continuis transactis, valde delira ab assumpto *pulvere epilept. M. mag. marg. perlar. pulv. analept. castor.* nec non grano uno *laudani de tribus*, somno quidem jucundissimo quievit, sed expergefacta in gravissimas incidit convulsiones, cum continuo tendinum insultu variisque labiorum spasmis: tandem XVIII. die, adhibitis frequentioribus *antepilepticis, confortantibus*, nec non *enematibus*, alleviata praeter omnium spem convaluit. Et sicuti serotina deliria latentem produnt malignitatem, si non exitium ipsum, ita praematura funestum semper praesagiunt exitum. Observavi hoc iisdem mensibus in filiolo sex, in juvene XVII. in Viro L. annorum, qui omnes ex febre maligna tertia die inciderunt in continua deliria, sexta convulsi mortui sunt. Alia foemina melancholica, & simul gravida, cujus maritus cum quatuor prolibus simul & semel mense Martio in uno cubiculo, epidemiali hoc morbo decubuerunt, (qui tamen convaluerunt omnes,) eadem febre maligna detenta cum *uvula ac tonsillarum inflammatione* summa, octava recentem enixa est puerum, inde valde debilitata nona delirare incepit, & ex caloribus, viribus exhaustis, emaciato corpore, vigiliis continuis, credebatur certo certius peritura. Sed ea fuit fortitudine, ut sudoriferis, confortantibus, epilepticis, rite tractata calores illos intensos ultra XXX. dies sustinuerit, & periculum evaserit, remanente aliquali mentis labe. Mense Januario singularis contigit casus. Puella XV. annorum ob leves errores commissos matris castigationem verita sibi ipsi mortem consciscere voluit, sumptisque aliquot granis *mercurii sublimati* incidit de subito in continuos vomitus, alvi fluxus cum gravissimis intestinorum torminibus, siti magna, linguae ac faucium ariditate; sed causa horum symptomatum mox patefacta, accersitus exhibui *theriacalia*, in primis *crystall. mont. 3ss. cum ol. amygd. dulc. it. jusscula pingua*, & loco potus ordinarii *lac bubulum* suasi; his acidum venenosum absorptum, acrimonia obtusa, & puella ab interitu vindicata fuit. Venena enim mineralia sola corrosivitate agunt,

ex qua , si non statim ab initio idoneis medicamentis succurratur , *necrosis* , & ex hac sanguinis & feri destructio. Hoc videre licuit in foemina mediæ ætatis , nutrice , cui ab alia *arsenicum citrinum* malitiose in jussulo propinatum fuit , intra paucas horas extincta. Hæc cardialgia , lipothymiis , intensissimis torminibus , vomitibus , alvi dejectionibus cum irritatione acerrima valde agitata , post mortem exhibuit stomachum & intestina partim *gangrenata* , partim *sphacelata* , erosa , sanguinem nigerrimum. Eodem tempore Vir quinquagenario major , sanguineus , diu noctuque per triduum somno profundo , *lethargo* vix absimili , quasi sepultus jacuit , sine ulla alteratione febrili , aut pulsus mutatione , quarta , *Potione Laxativa mannata* sumpta , expersfactus , sibi optime præsens , atque ad interrogata apposite respondens , de *prostratione virium* , & sequenti die in brachio dextro de *tumore* , aliquali *rubore* , sed *dolore* summo valde conquestus , sexta obortis *caloribus* & supervenientibus *deliriis* , atque omnibus incassum adhibitis , *suffocatus* obiit. Hac hyeme *articulorum dolores* sine inflammatione , sine tumoribus , valde grassati sunt , ubi *laxativa* , *aperientia* , *precipitantia* , *decoct.* nempe *aperitivum cum fol. senn. S. S. rhabarb. mann. tartar. lap. cancr. præp. sal acetosell. cichor. diagryd. sulphurat. pulv. hepat. flor. nitr. tartar. Vitriolat. &c.* sæpius adhibita omne absolverunt punctum , & intra quadragesimam medicam morbi vehementiam infregerunt. In honesta quadam foemina iisdem *doloribus* detenta , sed *alvi fluxu* simul laborante , septima die morbum notavi jam solutum. Præstat igitur in his affectibus *alvum* habere magis *laxam* , quam adstrictam. Mense *Februario* in ab lactatis & lactentibus copiosas observavi *febres catarrhales* , quæ invaserunt tenellos cum tussi vehemente , caloribus continuis , ariditate faucium , facie floridiori & rubente , siti , sternutationibus , respiratione frequentiori , in aliquibus inter respirandum cum stertore & sonitu , ut plurimum cum *dentitione*. Profuerunt hic *enemata* sæpe adhibita , *expellentia temperatiora* , aciditatem lymphæ corrigentia , cum *pectoralibus* mixta , v. gr. *pulv. alexit. epilept. spec. diair. antihect. Pot. lap. cancr. C. C. philos. ser. pectorales* , inunctiones ex *ungu. pectoral. rubr. potab. cum ol. irin. anis. dest. &c.* ratione simul habita virium. Atque hac methodo omnes ante nonum diem feliciter ad sanitatem perducti sunt ; *convulsionibus* autem *epilepticis* simul tentati perierunt fere omnes. Vernale tempus *phthisicis* & *hecticis* valde grave , quam plurimis funestum fuit. Sic inter alios officialis , necdum trice-

narius, ex castris sub finem *Novembris* præteriti anni redux, & jam ab aliquo tempore *hectica pulmonari* laborans de tussi vehemente, gravitate pectoris, copiosa materiæ purulentæ expuitione valde conquestus est. Affectum hunc curatius examinans ex rorida partium nutriendarum substantia jam fere consumpta, ex calore non amplius latente, sed jam manifesto, ex pulsu frequentiori & celeri, in primis post pastum, ex urina oleaginosa, ex difficili respiratione ad motum quemvis atque æris alterationes, ex frequentiori tussi, quandoque sicca, quandoque cum sputo purulento, quam ut plurimum, sumptis cibis, secuta est vomitio, *secundum hecticæ febris gradum* jam imminere, atque humorem nutritium in gelatinosam magis substantiam conversum quasi deliquari, sive pulpas carniū hinc inde in corpore manifeste quasi depasci, quæ *species febris Marasmodis* dicitur, judicare debui. Externe pariter & interne adhiberi curavi remedia, quæ alias huic affectui habentur appropriata, *expectorantia, abstersiva, analeptica, refrigerantia, traumatica, obtundentia*, v. gr. *pulver. anonym. spec. diair. lac sulphur. pulv. Haly, lap. cancr. spec. de gemm. frig. pulv. analept. antihect. Pot. spec. pro decoct. flor. & fruct. spec. pectoral.* (quibus quandoque beneficio alvi non succedente, addidi *mannam electam*,) *Sir. de jujub. flor. papav. loch. san. & expert. de pulmon. vulp. conserv. rosar. bellid. tussilag.* emulsionēs ex *seminibus cum decocto hordei, julepo rosaceo & nitro perlato* paratas, *gelatinas ex herbis pectoralibus &c. lac caprillum cum saccharo* mane potum, aliaque; externe *unguent. rubr. potab. pectoral. cum ol. irin.* nec non *emplastra pectoralia* usitata & *cataplasmata*. Cura hæc hyemalis videbatur succedere ex voto, rediit appetitus, redierunt vires, remiserunt calores, non nisi post pastum revertentes. Ast induciæ solum ad breve tempus fuerunt, nulla pax. Insinuavit enim se malum, nobis id minus opinantibus, increverunt calores, sæpe velut paroxysmos febrium æmulantes, supervenerunt sudores nocturni, vel matutini colliquativi, viriū prostrationes, respiratio anhelosa, indicio manifesto, miasmata pulmonum ulcerativa in massam sanguineam copiose delata ibique confermentata, ignem peregrinum internum non solum hætenus fovisse, imo erosione ad glottidem producta, vocem raucam conciliasse, verum etiam alimentarium ac roridum lymphæ nectar acrimonia sua volatili, aut fermento suo putrido penitus inquinasse & destruxisse, ut jam corpus marasmo incurabili consumptum, pedes vero tumidi, & cutis vix ossibus hærens, tanquam funeri suo prope-

modum

modum superfuerit , donec tandem lenta morte tabescens mense *Majo* placidissime obiisset. *Hecticam ex scorbuto calido* natam observavi in juvene XVII. annorum. Is alias melancholicus , vitæ sedentariæ amans , sæpe sensit tumorem in sinistro hypochondrio , aliquando febriles alterationes , brevi transeuntes , palpitationes cordis , frequentes phlegmatis moleste falsi & tonsillis aliisque oris glandulis rejeeti , in primis matutino tempore , excreationes. Facies fuit lurida , pallens , subtumida , maculis copiosis , lividis , granulatis referta , quasi pulvere pyrio afflata , indicio certissimo , liquores vitales a salibus acido-biliosis , acribus , valde jam esse deturpatos , unde particulis sulphureis rarefactis facillime *febris lenta , hectica* , sese insinuare potuit. Calor fuit primo occursum mitis , paulo post acer & mordax , qui semper circa vespertum sub *ichemate febrilis paroxysmi* rediit , sed in inflammatorios calores terminavit ; observabatur jam urina oleoginosa , respiratio difficilis , sitis magna , appetitus prostratus , emaciatus corporis habitus , continua pulmonum oppressio , virium languor , decubitus in dextrum latus valde molestus , tussis cum sputo purulento , spisso , foetido ; corpus sudore tota nocte quasi diffuxit cum pulsu frequenti & marasmo , atque contabescens torpidus fuit , morosus , profundis cogitationibus defixus vix ad interrogata respondit , neque claram , sed non nisi submissam & raucam vocem edere potuit , quod vitio pulmonum sanie repletorum , qui aëris copiam , quo vox formatur , imminuunt , natum. Hoc tamen notandum , quoties alvus fuit concitatio , & ad *diarrhæam* proclivior , toties alleviationem symptomatum sensit patiens. Accessit tandem facies Hippocratica , nares scilicet acutæ , oculi concavi , tempora collapsa , genæ exesæ , malæ protuberantes , scapulæ , claviculæ , costæ prominentes , artus cum reliquis musculosis partibus excarnes , verbo : ossa tegit macies , nec juvat ora cibus , & fuit scelero similis. Adhibuimus ex speciosissimo medicaminum *thoracicarum & scorbuticorum* apparatu satis mature remedia , v. gr. *pulveres pectorales* superius notatos , cum pulv. hepat. rad. ari , tartar. vitriolat. &c. remixtos , linctus , gelatinas , emulsiones , electuaria , infusa , decocta ex *spec. pro decoct. pectoral. flor. & fruct.* nec non herb. *fumar. beccabung. trifol. fibrin. cichor. acetos. hepat. nob. flor. bellid.* aliisque cum *sero lactis* , aliquando cum *aqua* ad formam potus Theæ parata , imo mense *Majo* , cum animadvertissem , hecticos calores aliquantum deferbuisse , *lac caprillum recens* cum modico *sachari* , a quo tamen ob acidum vel salsum ventriculi fermentum , anxietas

tes præcordiorum, hypochondriorum tensiones, adauctam inde febrem, mox abstinere debuit. Nil vero magis profuit in *sudoribus nocturnis*, quam *unguent. resumptiv. infrigid. Gal. cum saccharo saturni* paratum. Atque vehementia & diuturnitas morbi elusit opem & operam omnem, donec tandem medicamentorum pertæsus, accedente extrema virium prostratione, fati necessitatem longiori vita dignas, magno cum parentum luctu persolvisset. Eodem tempore Franciscanus XXX. annorum laboravit *phthisi vera*, sive consumptione partium corporis musculosarum a colliquatione & pulmonum vitio orta, quæ fuit cum compressione pectoris, difficili respirio, sed fere sine febre; huic præmissis *pectoralibus* in primis *antihectico Pot.* aliquando cum *pilulis de cynoglossa* remixtis, exhibitisque subinde *laxantibus mannatis*, decoctis quoque aut jusculis ex *herbis pectoralibus, resolventibus, expectorantibus &c. lactis caprilli* usus optime cessit. Acrimonia enim humorum salina inde fuit temperata, serum dilutum, corpus humectatum, & ad nutritionem dispositum. In aliquibus observavi *febrem hecticam ex Quartana*, ut plurimum autem ex *febris continuis* male judicatis subortam. Harum enim fermentatio & calor p. n. continuatus alimentarium lymphæ rorem absumsit, inde virium habitusque corporis concidentia; acredo vero, quæ alias per vices accessit, & tumultus edidit fermentatione continuata, aucta & quasi domestica facta *febrem hecticam Marasmoden* in uno & altero induxit lethalem. In pueris & puellis III. IV. V. VI. annorum, notavi eodem tempore apud nos alias valde frequentem *Tabis speciem*, quæ fuit cum *abdominis tensione* & intumescencia, calore intrinsecus aucto, pulsu circa vesperum celeriore, inquietudine nocturna, carne flaccida, totius corporis extenuatione, etiam in iis, qui avidissime comederunt, ita quidem, ut carne jam absumpta, ossa omnia prominuerint, sola cute contecta. Faciei color fuit pallidus, subniger & lividus, nulla fere adfuit tussis, nullum sputum, respiratio libera, indicio evidentissimo, hos sine pulmonum corruptione, marcore confectos, causam autem fuisse quærendam in *mesenterii*, ductuum nempe lacteorum, *glandularum* obstructione, nec non humorum corruptorum in abdomine abundantia; utut non negem, *lumbricos* tunc simul in intestinis nasci potuisse, qui quandoque in conspectum venerunt. Unde non mirum, cum universi sanguinis systema sale acri-acido jam scaturierit, corpora debito alimento privata, in tantam incidisse maciem. Huic malo quamplurima opposuimus remedia, in primis *aperientia, mar-*
tialia,

tialia, v. gr. *croc. mart. aperit. cum salibus*, arcan. *dupl. nicrosa*, pulv. *hepat. sal. C. B. tartar. vitriolat antihect. Pot. lap. cancr. rad. ari &c.* aliquando *anthelmintica*, v. gr. *aquam contra verm. cum sir. flor. persic.* aliaque *Topica*, *unguent. contra verm. deoppilat. martiat. ol. cappar. tamarisc. colocynth. spirit. sal. ammon. &c.* sed irritato conatu omnia, donec tandem lenta tabe consumti supremum diem clausissent. *Octimestres* aliquot *partus* his mensibus habuimus, quos tamen omnes spatio V. VI. vel VII. dierum mortuos observavimus. *Julius* incepit cum caloribus, quos tamen quandoque contemperarunt pluviae lenioresque venti, has die X. habuimus copiosas, quas sequentibus XIV. diebus calores exceperunt intensissimi, die XXI. XXII. XXIII. tonitrua horrenda cum fulguribus, quandoque cum, quandoque sine imbribus; a die XXV. ad finem usque variae aëris vicissitudines, mox diversi ventorum tumultus, mox frigora, mox pluviae, rarissime solis splendor. Integer *Augustus*, si sex aut septem dies amœnos per intervalla calidos, exceperis, pluviis & ventis præter ætatis anni indolem, valde rigidus fuit. Pluviae continuarunt ipso *Ægydii die*, sequenti autem, discussis jam nubibus nebulosis, cœlum serenatum gratiora nobis promisit tempora, & secuti sunt XIV. fere dies calidi, sereni, noctes tepidae, viniculturae exoptatae. Medio *Septembris* rursus varias subiit mutationes tempestas, maximae exortae nebulae, solis demum meridiani splendore dissipatae, sed brevi in pluvias fere continuas, aut de die, aut de nocte, in primis *equinoctiali die* abeuntes, quæ cœli inclementia ventosa ac pluviosa in *Octobrem* usque duravit, unde botri nec dum bene maturi aut digesti iusto citius ob excessivum humidum computruerunt, & deciderunt copiose in terram. Quinta *Octobris* spem fecit haud exiguum serenorum temporum, sed octava valde pluit, a qua ad ultimam lunæ quadram, i. e. XVIII. grato solis splendore corpora nostra incaluerunt, quo ipso ingruerunt pluviae, XIX. gelu, XX. nives, quorum casus die XXII. cum procellosis aëris agitationibus ac frigore ingens fuit, earum tamen præceps solutio. Jam imminuerunt *vindemiae*, & vinum, quod collectum fuit ante pluvias aut nives, in *Julium* usque, salibus heterogeneis a mucilagine terrestri & sulphurea quasi ligatis, & in fermentationis negotio sufficienti impeditis, permansit turbidum, mucilaginosum, sed sine foetore; post pluvias autem contraxit foetorem putridum, quem retinuit usque ad depurationem, quæ tandem post annum subsequuta est cum grato colore & sapore. Circa finem *Octobris* autum-

mnalis amoenitas nobis iterum affulsit, quæ toto fere *Novembri*, qui ficcus extitit, continuavit. *December* varius & inconstans fuit, mox frigidus, mox nebulosus, mox pluviosus, unde nives, quæ die Sancti Andreæ ceciderunt, brevi tabuerunt. Hoc semestri frequentes habuimus *febres Tertianas*, quæ ut plurimum sine prævio horrore, potius cum corporis gravitate, præcordiorum angustia, vomitibus, siti, capitis dolore, vigiliis, in primis caloribus intensis inceperunt, & primis IV. diebus magis *continuarum*, quam *intermittentium* genium redoluerunt, donec tandem ad perfectam apyrexiam devenerunt. Initium curæ a *Venesectione* sumsi, atque præscripsi *precipitantia*, *antifebrilia ex lap. cancr. sal. absinth. C. B. centaur. min. arcan. dupl. antimon. diaphor.* tandem die intermissionis *Laxativum*; quibus feliciter sexto, aut ad summum septimo paroxysmo sublatae fuerunt. Nec defuerunt *quotidiana*, *quartana*, facili tamen negotio levatae. Eodem tempore viguerunt *febres continuæ*, acutæ, quæ sub initium videbantur benignæ, tertio tamen & quarto die latentem suam prodiderunt malignitatem; calores enim hæcenus vix considerandi, jam intensiores facti, immanes produxerunt cephalalgias, vehementissimas virium prostrationes, deliria, vigilias, sitim, linguam scabram, fissam, tendinum contractiones, motus convulsivos varios ac inordinatos, quos una cum tremore labiorum in chirurgi hujatis facie observavi frequentes, non tamen, quod mirandum, lethales. R. P. Franciscanis lues hæc fuit popularis, eosque fere omnes hic existentes invasit. Illi enim mustum mendicatum & collectum emissi vino novo turbido ac musto se obruerunt, ac corpus prava victus ratione ad *cachymiam* disposuerunt. Jam reduces cibis luridis esurialibus, promore & exigentia temporis, stomachum onerarunt, indeque has *febres continuas* sibi conciliarunt. *Venesectiones* sub initium administratae optime profuerunt, *diaphoretica expellentia*, v. gr. *antim. diaphor. mithridat. diascord. Frac. spec. de hyacinth. C. C.* cum *confortantibus & antepilepticis* mixtae omne tulerunt punctum, morbumque hunc præcipitem, qui ex symptomatibus gravissimis judicabatur pernicialis, ubique septima die, nulla interveniente notabili crisi, represserunt, atque omnes, (fuerunt illorum undecim,) ex hoc morbo convaluerunt. Fœminas notavi aliquas ætatis provectioris, non gravidas, *fluxu mensium immodica* laborantes, qui ut plurimum, in primis in plethoricis, ad XIV. dies duravit, & intra octiduum rediit cum languore, lassitudine totius corporis, facie pallida, quasi exsanguis,

inappetentia , siti , caloribus , dolore capitis , lumborum , hypochondriorum inflationibus , lipothymiis. Causa immodici hujus fluxus eadem omnino , quæ mensium ordinate fluentium ; & sicuti in hoc sanguis turgescens venulas interiorē vaginæ superficiem adeuntes divellit , ac per harum extremitates ruptas nomine menstruorum nigricans lente promanat , donec subsideat aliquantum ac imminuatur ejus turgescētia , de quo legi meretur *Bobnius æconom. animal. progymnas. 16. pag. 254.* ita in immodico fluxu eadem vasorum vaginalium oscula rupta , necdum occlusa , sed magis hiantia continuo quasi fundunt sanguinem , modo grumosum , modo serosum , pro habitudine sanguinis & seri hic aut in quantitate , aut qualitate , & motu peccantis atque exitum affectantis. Laxior enim & mollior vaginæ compages admittendis & emittendis sanguinis menstrui ordinarii æque , ac extraordinarii , copiis magis accommodatur , quam solidior ac durior uteri substantia. Cum vero affectus hic , si negligitur , ut plurimum *cachexiam* , *hydropem* , *atrophiam* minari soleat , maturavi curam , atque in plethoricis quantitatem sanguinis , indeque natam ferocientem turgescētiā deplevi *Venasectione in brachio* feliciter instituta , excedentem ebullitionem & fermentationem ab humoribus biliosis , acribus , salinis volatilibus , sanguini inductam *uterinis leniter incrassantibus* , & *adstringentibus* , v. gr. *corall. rubr. lap. hematit. trochisc. de carab. de spod. pulv. Heurn. croc. mart. adstring. terr. sigill. imo terreis omnis generis* , *Tinct. antiphthis. Gr. corall. succ. urtica &c.* in malo contumaciori & refractario cum his *adstringentibus sigentia* , i. e. *laudanum de tribus* accisa dosi maritavi. In *hypochondriacis* , *scorbuticis* , ubi sanguinis impetus ex obstructione viscerum , in primis mesenterii , non spontaneus fuit , sed , qua data porta , ruens coactus , ab *Adstringentium* usu *præcordiorum anxietates* , *capitis dolores* , aliaque symptomata hysterica notavi. Hic omnino locum invenerunt *Laxantia* , sed lenissima , extra paroxysmum propinata , v. gr. *decoct. fol. senn. tamarind.* & quod specificum fuit , *rhabarb.* ipsum in substantia deglutitum. Profuerunt quoque , licet per Accidens , cum *confortantibus* mixta , v. gr. *Tinct. tartar. corall. compos. sperniol. Cr.* aliaque *martialia temperata* , acorem simul absorbentia. Pro meliori tandem viscerum & vasorum firmitudine , nec non fibrarum ac pororum coarctatione , optimo cum successu ablegavi illas ad thermas *Badavino - Austriacas* , ex quibus reduces ordinarium , & naturæ convenientem menstruum fluxum expertæ

pertæ sunt. In Perillustri quadam matrona notavi *Tumorem exiguum in pudendis*, qui tamen non extra pudoris sinum propendebat, sed mensibus non fluentibus, quotidie crescebat & intumescibat valde, mensibus autem fluentibus, qui sæpe intempestivo, aliquando immoderato & continuato ad aliquot septimanas fluxu urgebant, detumescibat. Adnatus fuit *uteri orificio*, cujus substantia cum vagina & pudendis absque hoc spongiosa, rugosa & glandulosa est, in qua varii generis humores stagnare & subsistere possunt, inde tumoris incrementum & decrementum. Tentavimus *injectiones cum aqua calcis vivæ, decocta lignorum* aliaque, irrito tamen conatu; suasi tandem *incisionem*, quam reformidarunt *Chirurgi Viennenses*, atque potius naturæ hoc opus committi, quam crudele & anceps sectionis remedium experiri decreverunt. Ejusmodi tumorem utero extrinsecus adnatum, tres libras ponderantem, in virgine XXIV. annorum, felicissime secuit *Chirurgus Halberstadiensis*, cujus mentionem facit *Frider. Hoffmannus in annotat. super Poterii opera, cent. III. cap. 47. pag. m. 332.* & ipse *Poterius eodem loco*, nec non *Blancardus in Collect. Medic. centur. 3. observ. 51. pag. 421.* Sarcoma autem totam uteri vaginam occupans, forasque propendens, atque interno ejus orificio adnatum observavit *Kerkringius Spicileg. Anatom. Observ. 53. pag. 114.* ex uteri orificio interiori varias excrescentias membranaceo-carnosas propendentes *Ruyschius, Centur. Observ. Anatom. chirurg. 6. pag. 12.* nec non *Bartholinus Centur. I. histor. 94. pag. 139. Centur. II. histor. 6. pag. 161. Centur. II. histor. 58. pag. 248.* *Segerus in M. A. C. decen. I. ann. 2. pag. 199.* alique. Laboravit simul *fluore albo*, effluxitque fere indefinenter e pudendis materia purulenta, foetida, sed sine dolore, indicio certissimo, serum seu lympham hic sola peccare copia, deponique in glandulis per uterum illiusque vaginam disseminatis, quæ nimium laxantur, ductus autem excretorii inde valde dilatantur, & sphincteruli, quibus hi ductus claudi recludique solent, a peccantium humorum, qui in vasis sunt fluxiles, jam extra vasa lentescentes & ichorescentes, mucosi, copia magis vel minus resolvuntur. Pro depletione seri excrementitii & viscosi, cum sit plethorica, ordinavi *Venesectionem in brachio, fonticulos, laxantia ex manna, rhabarb. fol. senn. diuretica, terebinthinata nempe & succinata, mag. lap. cancr. decoctum dauci, aperitivum For. &c.* non omissis quandoque *martialibus & tartareis*: Serum corrigere, ejusque qualitatem cum sanguine contemperare,

rare , nec non uterum glandulasque flaccidas roborare volumus *infuso* *ror. mar. cum vino* , *pulv. absorbente Wedel. pulv. ex ebor. unicorn. fossil. off. sep. corall. osteocoll. test. ovorum calcinatis* , *perlis* , *alum. plum. sacchar. saturn. tinctur. corall. essent. lign.* in primis *elix. Propriet. rhabarbarino* mane ad 40. guttas , vesperi vero sequenti pulvere : Recipe *magist. osteocoll. carniol. āā. ʒijʒ. corall. rubr. prepar. margar. prepar. mastich. gumm. arab. off. sep. unicorn. foss. ebor. āā. gr. XV. ol. lign. sassafir. gttij. M.* & dividatur in V. dof. it. Recipe *rad. chin. sarsaparill. ā. ʒj. passul. min. ʒijʒ. mastich. ʒij. alum. plumos. ʒj. semin. anis. ʒj. concis. D. ad nodul. Spec. Säckel zum Wasser sieden* , pro potu ordinario ; nec omisimus *Topica* , inunctiones , suffitus ex *salvia* , *mastiche* , *succino* , *thure* , imo nil intentatum reliquimus , eradicare tamen penitus affectum hunc contumacem non potuimus. Cum autem ex longa praxi constet , *fluorem* hunc *album* quandoque , in primis valde obelis , prout nostra fuit , & jam a lunari tributo fere absoluta , nec adeo enervata , in quibus humores turgent , si non est immodicus , proficuum esse , & pro *fonticulo* microcosmi habendum , qui impedit , ne corpus in majorem excrescat molem , abstinendum jam a medicamentorum usu , & curam ad *thermas majales* differendam duxi. *Hypochondriaci* variis & gravibus symptomatibus his temporibus tentati sunt ; in quibusdam *ventris inferioris viscera* , in aliis *præcordia* , in aliis *cerebri confinia* maxime affici videbantur. Ex multis unicum saltem *hypochondriaci* enarrabo exemplum , in quo syndrome gravissimorum symptomatum apparuit. Vir , ætatis mediæ , temperamenti cholericæ , habitus corporis tenerioris , ipso *æquinoctii autumnalis die* incidit in *ventriculi dolorem* , quem pressio pede secuti sunt æstus vagi , atrocissimi capitis dolores , cordis palpitationes , anxietates præcordiales , dolor & constrictio in pectore , sive gulæ strangulatio , quæ *suffocationem* minabatur , præcordiis enim contractis ; non solum respiratio difficilis , & ad motum quemvis laboriosa fuit , sed & non raro supervenerunt animi deliquia , ex quibus laboribus & angustiis sudor erupit frigidus ; in partibus extremis notabantur spasmi & stupores cum formicationis sensu & tremore undulante , in somno pavores , terrificis insomniis interturbati , continua intestinorum murmura , in ore sapor biliosus , alvus ut plurimum obstructa. Observavi autem ex symptomatum horum confluxu suffocationes has hypochondriacas plerumque fuisse *spasmos* & contractiones partium nervosarum , ortasque a ventosa & humorosa hypochondriorum sentina. Sæpe ex mœstitia nimia , atque diutius continuata , nec non

excessiva lætitia, in has incidit ægritudines. In paroxysmo, præmissis *clysteribus*, eximie profuerunt, & omnibus palmam præripuerunt *castorina* cum *anodynis* mixta, v. gr. *pulv. castor. gr. viij. epilept. M. Æß. specif. cephal. g. v. laudan. de trib. g. j. M. it. mist. simpl. cum ess. castor. anodyna* maritata. Extra paroxysmum in eam maxime incubuimus curam, ut humores viscidos, acidos, obstructionum autores, attenuaremus. Multi in hoc passu multa laudant, atque pro specificis venditant. Nos in tanto medicamentorum apparatu in *martialibus & blandis laxativis*, v. gr. *Rec. Vitriol. mart. g. j. diagryd. sulphurat. g. iij. pulv. hepat. g. vij. ol. carminat. M. gutt. j. M. pro j. vice*, indubitatum semper medelam invenimus, imo hoc pulvere exhibito imminentem sæpe paroxysmum declinavimus; levi enim eguit purgante, quantum vel infans vj. septimanarum, vel minor adhuc ferre posset, sed singulo mense bis eundem *pulverem* in usum vocare debuit, inde alvus octies soluta, & molestissimus affectus sublatus fuit. Non minori voto successerunt *acidula Roitschenses*, quarum usu maximam alleviationem sensit. Jam addam, quæ in Viro ecclesiastica dignitate conspicuo de *Anaudia* notavi. Is LIV. annorum, plethoricus, atque alias *hypochondriaco affectui* obnoxius, jam mense *Julio balbutie lingue* laborare cœpit; non enim tantum in concionibus, sed etiam prælectionibus precum publicarum, quin & in communi conversatione quasdam syllabas & voces inter pronunciandum absorpsit, vel quasi suppressit, ut vix intelligi potuerit, & sumsit hic affectus sensim atque sensim sua incrementa, donec sub finem *Septembris* mane dè repente incidit in *Anaudiam*, sive *impedimentum sermonis*, ut articulate nec duo verba proferre quiverit, cum *stupore digitorum manus dextræ*, memoria factorum & gestorum, imo reminiscencia reflexiva læsa; neque enim scribendo mentem suam exprimere potuit. Linguam quaquaversum movit, volutavit, exporrexit, sapidissime comedit. Graviora metuens *Vena-sectionem in brachio* ordinavi sine mora, nec non medicamenta *nervina, cephalica*, v. gr. *spec. diamosch. dulc. diamb. contr. apoplex. spec. cephal. M. extr. castor. sal. volat. succin. C. C. spir. sal. ammon. cum aqua lil. conv. ess. ambr. lign. aloës, sal. volatile oleosum*, aliaque. Linguam, in primis frenulum, inungi jussi linimento ex *conf. anacardina, alkerm. compl. ol. rut. lavend. cinam. extr. castor.* His frequenter adhibitis adhuc eodem die sese recollegit, atque intelligibilius loqui cœpit, redeunte simul memoria. Sensus motusque linguæ usus semper perstitit integer, loquelam nunquam amisit, quin potius sermonem exteriorem per motum linguæ exprimere, ob aërem tamen minus sufficienter inter-

inter fluctuantes gutturis sinus impulsum & reflexum, non satis intelligibiliter proferre potuit; natum hoc utique vitio *laryngis*, nervorumque sexti paris, qui sunt vocales. Sermo enim impeditus fuit a resolutis aut relaxatis nimium musculorum angustæ laryngis rimæ constringendæ aut angustandæ dicatorum, ligamentis, quorum fibræ sine dubio a sero nimis copiose, vel per arterias, vel per vasa lymphatica ex toto corpore plethorico affluente, flaccidæ redditæ rimulam haud sufficienter pro allisione & extrusione violenta aëris angustare ac disponere valuerunt. Accessit & aliud malum valde suspectum, *faucium constrictio*, suffocationem, sive strangulationem mentiens. Hæc aliquoties, sed derepente venit, ipsiusque fauces quasi laqueo constrinxit, liberamque respirationem inhibuit, brevi tamen remisit. Putabant vitium hæerere in *pulmonibus*, aut *abscessum* inibi latitare, sed falso; potius a particulis acidis & austeris hypochondriacis, mediantibus nervis recurrentibus, musculos faucium in spasmos cogendo, viam idcirco aëri præcludentibus, ne a musculis respirationi inservientibus præ angustia loci facta ex- & impelli queat, deducendum. Cum vero vidisset, se quidem voces & verba, nondum tamen expedite, neque semper integro sensu & phrasi proferre posse, urisit ulteriorem curam, quam ob anni ætatem, *autumno præcipiti*, ipsi denegavi, eamque ad incrementa dierum differre volui. Moræ igitur pertæsus incidit in aliquem, qui perfectam mali curam etiam hoc tempore promisit, deditque inter alia *Vomitorium*, ipso solstitio hyberno imminente, quo id assecutus est, ut quidem magnam humorum saburram, fictitium nempe, aut potius *imaginarium pectoris apostema* Vomitu rejecerit, inde alleviationem ad biduum senserit, paulo post tamen in majorem debilitatem, mentis vacillationem ac torporem, propensionem in somnum, loquelam difficiliorem inciderit. Nec his acquiescere voluit, sed ordinavit *fumisuctionem nicotianæ*, ipsi alias insuetam, nervis infestam imo *nervinis morbis exitiosam*; experientia enim constat, *Apoplexiam* inter *nicotianæ* usum sæpe invasisse, teste *Deckero exercit. Pract. p. m. 89.* & *Richardo Carr, epist. Med. 2. p. 21.* Inde valde obliviosus factus, & sub initium *Februarii* sequentis anni gravissima *apoplexia* tactus, subito interiit.

Constitutio Epidemica Sempronienſis An- ni 1708.

CRedidiſſes hac *hyeme* denuo permutata fuiſſe tempora, atque ad eſſe æſta-
 tem etiam in frigidiffimis alias menſibus. *Januarius* quippe nul-
 lum fovit gelu, nullas nives, fuit ut plurimum pluvioſus, nebulosus, hu-
 midus, nubilus, calidus. *Februarius* quaſi totus calidus, amœnus, ut
 plurimum ſerenus, quandoque pluvioſus, ventosus, & circa finem cum
 modico frigore & nive, quæ tamen altera die evanuit, unde jam medio
 menſe obſervavimus diverſos flores. Huic ad *æquinoc̃tium* fere uſque
 plane ſimilis *Martius*, amœnus nempe, calidus, qui in copia flores eli-
 cuit. Circa *æquinoc̃tium* die XVIII. XIX. XX ſuborti ſunt venti valde
 frigidi, rigidi, qui congelarunt terram, ſed ſub finem menſis aura iterum
 comparuit turbida, pluvioſa. *Aprilis* præter morem illuxit ſerenus, ca-
 lidus, plane æſtivus, raro pluvioſus, ſiccior magis. *Majus* variabilis,
 ad medium uſque frigidus, pluvioſus, a medio ad finem calidus, amœ-
 nus: II. autem, III. & IV. fuerunt pruinae, quæ hinc in vineis damna fe-
 cerunt. Totus *Junius* pluvioſus, *Medardus* quoque & *Joh. Baptiſta*
 effuderunt pluvias, imo nulla dies hujus menſis fuit ſine pluviis. Toto
Januario præter *otalgiam* in Viro, *mictum cruentum* in filiolo quo-
 dam poſt partum, *pleuritidem cum diarrhœa*, nullos fere vidi morbos.
Variolis tamen laborantes habui, quorum unus erat VI. annorum, qui
 eruptis prius tertia morbi die una cum *variolis petechiis purpureis*, quar-
 ta die antea correptus *hemorrhagia narium* mortuus eſt. Menſe *Februa-*
rio obſervavi *Apoplexias fortiffimas*, uti quoque *febres continuas* VII.
 die ſolutas. Hoc menſe fœmina quædam enixa eſt *ſæctum mortuum*, ſe-
 cundina remanſerunt, altera die mortua. *Martio* filiolum quendam Ru-
 ſſenſem *clauſura ani* laborantem habui ſub cura, de quo *Sculteti Arma-*
mentarium videri poteſt: ſuccurri etiam fœminæ *otalgia* laboranti *miſt.*
ſimpl. mixta cum *eff. caſtor.* De doloribus capitis; *Vertigine*, *diar-*
rhœis cum maximis caloribus, *febris tertianis*; *continuis*, *variolis*
 tunc temporis graſſantibus nil adducam. *Aprili*, *Majo*, *Junio* continua-
 runt *variola*, quas tamen modo in filiolo quodam prægreſſa eſt *epilepſia*,
 modo in puella die III. IV. V. ſecuta eſt *hemorrhagia narium*, jam in alia
 die XII. *herpes miliaris*. Quædam *variola* confluebant, quibusdam
 jungebatur ſub initium *diarrhœa*, quibusdam *epilepſia*. *Febres continuæ*
catarrhales, *diarrhœa* quoque his temporibus in conſpectum prodibant.

Menſe

Mense tamen *Junio Variola* epidemice grassantes maxime erant malignæ. Sic eas observavi in aliis cum *maculis purpureis*, in alio cum *vibicibus*, in alio suborti sunt XII. die *furunculi* instar *anthracum*, in aliis *tumores* & *parotides* instar *bubonum*; aliis *palatum*, *gingiva*, *fauces* fuerunt *exesæ*: alios consumpsit *calor hecticus*, inflammatorius, & fuerunt hæ *variolæ* funestæ die X. XXIII. XXVII. Sic malum, sive venenum variolosum in Gratioſo parvulo Ebergényi fuit insanabile, adeoque plus docta valuit arte. Incepit morbus cum *horrore*, quem ingentes exceperunt *calores*, quandoque *deliria*, *sitis magna*, *pulsus celer*, *languores* totius corporis, tertia die eruperunt *variolæ*, quarta *macula petechiales coloris purpurei*, guttarum instar copiose per cutem dispersæ, inde variolarum excretio retardata fuit, quæ tandem omnes coierunt in *unam*, totamque faciem *crusta*, sanie foetidissima referta, contexerunt. Undecima die supervenit *diarrhœa*, brevi tamen confopita, die XII. aliæ effloruerunt *vesicæ*, *aqua limpida flava*, quandoque *sanguine remixto*, plenæ, quæ ordinarias contexerunt *variolas*, magnitudine *ovi columbini*, imo *ovi gallinacei*. Sie haben ausgesehen wie die ordinären Zangen-Blattern, so durch ein *Vesicatorium* aufgezo-gen werden, oder als wenn man sich in heiß-siedend Wasser verbrennt hätte, & iterunt per biduum: die XIV. notavimus in dorso lateris dextri *tumorem*, qui nullo modo maturari potuit, sed resolutus tandem collum occupavit, omnemque maturationem respuit, imo sese resolvit: interea *calores* continuarunt intensi, accessit *tussis* cum expuitione *materiæ purulentæ*, quandoque *sanguinis*, *factor oris* fuit cadaverosus, indicio certissimo, pulmones variolis refertos, valde esse inflammatos, exulceratos, ut plurimum consumptos, si non *sphacelatos* XXIII. demum die pauperculus viribus jam exhaustus obiit. Post mortem observata tota *facies* & *abdomen nigerrimum*, ex quo colligendum, non solum totam massam sanguineam, verum etiam omnia viscera corrosivo hoc veneno varioloso fuisse infecta, & tandem *sphacelata*. *Julius* magis pluviosus fuit, quam serenus. *Augusti* initium æque pluviosum, quinta in-ceperunt *calores*, qui toto mense continuarunt. *Ægidii dies* sine pluviis, & per totum *Septembrem* mira æris siccitas, *calores præfervidi*, intensissimi, etiam nocturno tempore, qui durarunt usque *aquinoctium*, mane ros cecidit, & supervenerunt *nebulæ fructiferæ*. Flavuit ut plurimum hoc tempore auster, bonum alias constantis tempeſtatis signum. *October* ultra medium serenissimus, pulcherrimus, calidus, d. XIX. XX. noctes frigidæ, inde in aliquibus promontoriis botri congelati, superveniente tamen solis splendore statim regelati; - d. XXVII. ante festum Simonis & Judæ ingentes ceciderunt

nives, dies festivus, nempe XXVIII. valde serenus, sed frigidus borealis, XXX. nec non XXXI. iterum nixit, sed tertia nix absumpsit priores, ut jam sine damno vindemias nostras uberiores, præter expectationem, colligere potuerimus, neque nocuerunt nives, potius conservarunt botros a frigore, vinum autem, quod crevit in abundantia, fuit generosissimum, suavissimum, dulce. In *Novembri* aëris temperies longe benignior, & quidem calidior affulsit. *Decembri* aëre mutato ceciderunt d. VII. VIII. X. nives copiosæ, profundæ, mox secuta frigora, & circa finem denuo nives. Mense *Julio* continuarunt *Variola maligna*, neminem tamen, qui X. annum excessit, hoc tempore invaserunt. Accedebant semper cum somno, ita ut nocte dieque dormiverint III. aut IV. diebus. *Augusto* nulli fere morbi visabantur præter *diarrhæas* & *dysenterias*. Circa finem ob continuas aëris siccitates, calores præfervidos, Sirio insigniter urente, inceperunt *febres erratica*, quæ nullum typum servarunt, invaserunt cum aliquali frigore, insequente calore, aliquando ultra XX. aliquando ultra 40. horas durante, post apyrexiam aliquot saltem interjectis horis novus paroxysmus accessit, cum capitis dolore, siti, lingua & faucium squalore, virium debilitate, ita ut febrem continuam fore judicasses, donec tandem transactis aliquot paroxysmis in tertianam ordinariam degeneravit, quod ut plurimum circa septimum diem contigit. Adhibui *V. S. diaphoretica*, precipitantia, quamprimum vero notavi tertianas, aut tertianas duplices, exhibui statim *chinnata cum arcan. dupl.* optimo cum successu. *Septembri* continuarunt *febres tertiana*, sexto paroxysmo solutæ, ubi optime profuerunt *chinnata &c.* De his febribus erraticis vid. M. N. C. Dec. III. ann. VI. p. m. 177. app. nec non H. M. V. p. 300. Inter alia notavi, animi affectus quid possint. Officialis quidam incidit in ejusmodi febres, præcessit horror, secuti sunt calores, qui in IV. durarunt diem continui cum anxietatibus præcordiorum, aut pectoris compressione, ut sæpe in lecto erectus sedere debuerit, cum capitis dolore, siti, deliriis &c. Adhibita *Venesectione in brachio & pede* quinta die remisit calor, qui tandem undecima intermisit, ut jam extra periculum judicatus fuerit. Quid sit, accepto tristi & ingrato nuncio derepente incidit in somnum profundum, & quasi in ecstasin, ut exinde expergefieri non potuerit, tandem applicatis *clysteriis*, nec non *Vesicatoriis* intra XV. horas ad se rediit, omnium rerum inscius, vix loqui valens præ nimis debilitatibus, at eodem die relabatur in priorem somnum profundum, sicque elapsis vix XII. horis, accidentibus *convulsionibus*, sine febre comatosus fati cessit. Pari ratione nobilis matrona, quinquagenaria, temperamenti seroso-biliosi, habitus carno-

carnosioris, in sterili matrimonio semper exsistens, tributum tamen lunare suum accurate, sed largissime persolvens, *hypochondriacis* nec non *hystericis passionibus* valde obnoxia, jam a longo tempore valetudinaria, incidit sub finem *mensis Septembris* in *febrem continua subtilem*, quæ rite tractata degeneravit in *tertianam exquisitam* septimo paroxysmo judicatam. Reliquit autem post se *summam virium prostrationem*, *anorexiam*, *capitis gravitatem*, *anxietates*, *cachexiam* ipsam. Urina, quam hætenus reddidit, fuit turbida, cum sedimento copiosissimo, mucoso, coloris rosei, non tamen foetens. Materiam hanc hypochondriacam, quam natura, optima morborum medicatrix, per ductus urinarios excreta voluit, jam motam, promovimus *digestivis*, *aperientibus*, v. gr. *pulv. hepat. tartar. vitriolat. arcan. dupl. sal. cichor. lap. cancr. tinct. sal. tartar. tandem decoct. aperit. For. cum fol. senn. & manna* acuato. Quinquies inde dejecit, relicta tamen aliquali, sed torminosa in intestinis *hypercatarsi* ad biduum; qua sedata melius sese habuit, atque *ordinarius mensium fluxus* institit. Octiduo post, i. e. quarta *Februarii* observavi pulsum alteratum, iusto celeriores, sexta vespere *affectum soporosum*, propensionem nempe gravem & invincibilem in somnum, re ipsa dormivit, & excitata oculos aperuit, ad interrogata paucis, sed apposite respondit, de nullis doloribus conquesta, mox relapsa in somnum; si adstantes devotas ac pias cantilenas canere inceperunt, ipsa simul expergefata statim cecinit, neque ante cantare destitit, quam inchoatam absolvit stropham, adeoque semper sibi fuit præsens, omnes cognovit, nunquam sensibus neque internis, neque externis, neque motu destituta, sed valde debilitata, & ad actiones more solito obeundas languida, respiratio fuit integra. Calor febrilis notabatur p. n. lentus, acris & mordax, qui vespertino tamen & nocturno tempore intensior, pulsus celer, mollis, facies pallida, subtumida, quasi *leucophlegmatica*, oculi ultimis diebus quasi turbidi, lachrymabundi. Opposui huic *Comati soporoso* varia, v. gr. *castorina*, *cinabarina*, *jovialia*, *sal. volatilia*, *succin. C. C.* cum pulveribus *epilepticis & confortantibus* remixta, nec non *Vesicatorium* nuchæ applicatum, sed sine operatione, imo irritò successu omnia, donec tandem somnus hic p. n. septima die corpus fratri suo morti tradidit. Paulo post mortem e naribus copiose stillavit *ichor serosus*. Verissima igitur manet *observatio Wedelii* *opiologia* inserta, p. m. 46. qua fatetur, se nunquam vidisse *affectum soporosum* vere talem, ubi non adfuisset calor p. n. simul, quod & ipse aliquoties jam in praxi observavi. Eodem mense *Illustrissima Comitissa* gratiosam enixa est

filiam

filiam, quæ lac sugere ex papilla non potuit, sed id per nares summa cum molestia & anxietate reddere debuit. Examinatis faucibus, *columnella & tonsilla cum postica parte palati* abfuerunt, unde lac, quod deglutire non potuit, per nares resultavit. Non diu superstes fuit, tertio enim a nativitate die, accedentibus *motibus convulsivis* fatis cessit. In causas inquisituri, quare natura in formando corpore a recta formatione & scopo deflexit, harumque partium deficientium oblita fuit, sciant, *Illustrissimam matrem libenter & quidem attente ac considerate saepe in distractos canum & felium rictus ludendo inspexisse*, adeoque horum structuram fortiter sibi impressisse. Interim *Wedelianum porisma*, uvulam nempe ad deglutitionem eximie facere, manet verissimum. Parallela aliquo modo hisce exempla, si cui volupe fuerit legere, adeat *Observationes Wedelii recensitas in M. A. N. C. legat Dec. II. Observ. 5. ann. 5. M. A. N. C. p. 12. nec non Sal-muth. observ. med. 6. cent. 3. pag. 115.* ubi similes reperiuntur casus. *Febres erratica* adhucdum *Octobri* continuarunt, calores autem non adeo fuere intensi, interim observavi *hemitritæos*, ubi *febris una die bis venit, & altera semel*. ViceColonellus quidam ex *febre colica biliosa* cum vomitu correptus incidit in *deliria*, ex his in *convulsiones epilepticas*, qui tamen evasit. Sic alius quidam Vir laboravit *febre continua* cum *maximis debilitatibus*, *capitis dolore*, *corrosione & torminibus ventis*, sexta supervenit *fluxus alvi*, septima *icterus*, qui occupavit totum habitum corporis, cum *dejectionibus albis*, *urina saturatiori*, *nigricante*, *oleaginosa*, *proclivitate in somnum*, & solvit calores. Ab initio dedi *diaphoretica* cum *confortantibus* mixta, caloribus vero jam abactis *spec. diacurcum. cum putv. rhabarb. tartar. vitriolat. sal. cickor. trochisc. de eupator &c.* *Novembri* inceperunt grassari *morbilli* ut plurimum *benigni*. *Tusses ferina* atque *catarrhi* fuerunt frequentissimi. Mense *Decembri* continuarunt adhuc *morbilli*, qui tamen sub finem anni maximam induerunt *malignitatem*, fuerunt valde *parvi cum maximis catarrhis*, fuerint &c. Quidam correptus ex *febre maligna cum diarrhæa*, *vomitibus*, *singultu continuo*, tandem adhibitis *V. S. stypticis*, *castoris*, nec non *opiatis*, quæ pro dosi ad *gr. iß.* præscripsi, nona die convaluit præter omnium expectationem.

Constitutio Epidemica Semproniensis An- ni 1709.

Januarius incepit cum frigore, quod a die V. ad XII. valde exasperatum, imo post hominum memoriam acerbissimum fuit, remisit tamen ad aliquot dies, d. XVIII. vero iterum intendebatur, verbo, nives ceciderunt supra nives, gelu supra gelu, & continuavit per totum mensem. Mense *Februario* continuarunt frigora, imo III. & IV. ceciderunt nives copiosissimæ cum horrendo gelu & ventis, ut homo in plateis vix ire potuerit, quam tempestatem nemo unquam observavit, adeoque vera fuit rusticorum observatio: Sole micante, die purificante, nix major erit, quam ante. Sol enim hoc die splendebat. Post *novilunium* remisit gelu, sed rediit die XVIII. XIX. ingens cum nivibus, quod continuavit: die XXV. & XXVI. longe majores ceciderunt nives cum omni tempestatum insolitarum, frigorum & ventorum genere, quæ præcluserunt ubique vias, arbores frigoribus obnoxias deusserunt cunctas. Duravit hoc in *Martium* usque. Continuavit enim & hoc mense gelu una cum nivibus, quæ copiose ceciderunt, ad *æquinoctium* usque, adeoque *hyems hujus anni fuit summa*, tempestas sævissima, *nivis altitudo maxima*, cujus nulla hominum ante nos recordatur memoria. Jam mitesciente hyeme jucundiora & calidiora affulserunt tempora. *Aprilis* enim fuit valde amœnus, serenus, calidus. *Majus* tamen erat frigidus, pluviosus. XVII. die nixit. *Junio* denuo calida, sicca tempestas observabatur. Mense *Januario* continuarunt adhuc *morbilli cum tussibus vehemētissimis, catarrhi; febres continua* septima die solutæ, quæ tamen levissima occasione redierunt. Hoc mense in *puella octenni* observavi *menfes ordinarios*. *Februario* grassabantur *petechiæ, febres continua*, & matrona quædam mortua est *comate somnolento* septima morbi die. *Martio* visebantur *morbilli, herpes miliaris ex puerperio*. *Catarrhi* fuerunt frequentissimi, & apud infantes *cum febre continua*. *Febres continua, petechiales* adultos quoque invadebant, quæ posteriores per totum *Aprilem* observabantur. Mense *Majo* morbi præter *catarrhos, febres intermittentes* fere nulli. Virgo tamen quædam nobilis hoc mense *sphacelo ex colica biliosa* duarum dierum fuit mortua. Erat hæc ipsa virgo XXXII. annorum, atrabilaria, quæ d. IX. *Maji* derepente vesperti incidit in sævissimos & acutissimos *ventris dolores*, qui *dextra*

magis

magis parte cruciarunt, atque modo sursum, modo deorsum iverunt, in primis vero *regionem umbilici usque ad scrobiculum cordis* occuparunt, tanta sævitie, ut existimaverit se veru ignito perfodi, urserunt *vomitibus, anxietates summae*, adfuit *omnimoda excrementorum & flatuum retentio*; ordinavimus frequentes *enematum injectiones*, nec non *aquam laxativam*, quam prima vice rejecit, altera vero retinuit, irritato tamen conatu omnia. Secunda enim die fluxerunt *men- ses coloris nigerrimi*, accessit paulo post *singultus*, mox *totalis fere- tum pulsus*, tum *caloris extinctio*, salvis sensibus motuque membro- rum illæso, quam refrigerationem non percepit, quin potius de intensis- simis caloribus internis, quasi candenti ferro intus adusta fuisset, con- quæsta, manibus glaciei instar rigidissimis subinde loca petiit frigidiora, eademque die, i. e. secunda *Martii* vesperi mentis tamen compos, ve- lociter, sed feliciter humanis rebus erepta est. Succum hic intestinales, in primis biliosi, acres inter plexus nerveos mesentericos, nec non fibras intestinales hærentes, atque in illarum anfractibus conclusi, acrimonia sua tormina & cruciatus excitarunt terribiles, atque in fundum Ventri- culi penetrantes Ventriculum ad vomitus & singultum stimularunt, ar- senicalem autem naturam mox induentes intestina instar mineralis vene- ni assumpti corroserunt, dilacerarunt, atque in ea more perforantis tere- bellæ, aut spinæ infixæ, se infixerunt, inflammationem conciliarunt, & stagnante in capillaribus sanguine, acrimonia sua corrosiva in momento fere intestina sphacelarunt, quasi in ferventissimam aquam immersa fuis- sent. Similes casus vid. apud *Joh. Sophron. Kozack de sale, cap. 6. sect. 15. pag. 260. Dominic. Panarolum Observ. Med. 50. Pentecost. 4. p. m. 139. Segerum observ. 82. dec. I. ann III. M. A. N. C.* Men- se *Junio* morbos nullos observavi, exceptis *febris tertianis*, nec non casu infelici cujusdam Domini, *febre continua* laborantis, quam die IX. exceperunt *terribiles convulsiones epilepticae*, inde secuta *de- liria &c.* Calores intermiserunt, *deliria* vera remanserunt. Sub ini- tium quartæ septimanæ observavi novos calores ex *scorbuto* ortos, cum *maculis scorbuticis purpureis*, *vigiliis continuis*, *deliriis*, nec non *copiosa sanguinis per inferiora* partim grumosi, partim floridi ad tres medias *ejectione*, inde summa virium prostratio, & cum fine quintæ septimanæ mors. *Julius* hujus anni fuit valde ventosus, quandoque præter morem austerus, frigidus, sine pluviis fere. Totus *Augustus* erat valde calidus, exceptis sub finem aliquot diebus, qui fuerunt ven- tosi, frigidi. Frigus quoque observabatur per totum *Septembrem*, qui

qui ut plurimum pluviosus fuit. Ægidii die usque ad prandium pluebat, in Festo Matthæi circa vesperam habuimus ingentia fulgura, tonitrua, pluvias, sed sine grandinibus. Mense *Julio, Augusto, Septembri, Octobri insolita* sine ætatis discrimine sævierunt febres, peculiarem enim habuerunt naturam, invaserunt cum modico *horrore*, mox *caloribus continuis*, ut etiam peritissimi credidissent, adesse *febres continuas malignas, vomitibus, alvi fluxu, siti, doloribus capitis, vigiliis*, V. demum die remittente calore degenerarunt in *intermittentes exquisitas*, quæ pro subjectorum temperamentis, sanguinisque ac humorum constitutione modo contumaciores, modo benigniores fuerunt. Paroxysmum imminens ut plurimum comitabantur frequentes *dejectiones biliosæ*, nec non *Vomitibus* terribiles *cholerae* instar. Evomuerunt quippe modo frusta *pituitæ* coagulata, viscidæ, modo *bilem flavam*, modo *viridem*, modo *vermes* αῖμα & κάρω copiosos, diebus intercalaribus cessarunt vomitus, alvi que fluxus. Versipellis hæc *febris epidemica* quosdam invasit cum *exanthematibus urticae puncturis* similibus, quæ calore retrocedente recesserunt, & calore redeunte redierunt. In duabus personis, una XVII. altera XXX. annorum, observavi his *febribus* supervenisse *apoplexias fortissimas lethales*. Raro servarunt statuta sua tempora, sed quandoque X. XII. horas præponendo & anticipando virulentiam suam ad XXX. aliquot, imo 40. horas exercuerunt, quandoque unus paroxysmus excepit alterum, donec tandem peregrino materiæ miasmate sufficienter dissipato & extincto, septimo, aut ad summum octavo paroxysmo terminatæ sunt, relictis post se *pustulis & fissuris in lingua, inflammatione faucium, abscessibus*, semper autem *virium prostratione* summa. *Vena-sectio* etiam in principio adhibita nil profuit, quin potius *febrilis paroxysmus* post ejus administrationem incrementum sumsit, sanguis autem extractus floridissimus apparuit, & natura magis debilitata fuit. Conduxerunt *blanda diaphoretica*, quæ paroxysmos in ordinem redegerunt, & post tertium paroxysmum *laxantia* die a febre vacuo exhibita. Tandem devenimus ad *antifebrilia*, uti sunt *salia amarissima*, quæ incidunt, serumque attenuant, v. gr. *sal absinth. C. B. centaur. min. arcan. dupl.* nec non *alcalica fixa, pulveres* nempe *insipidos ac terreos*, quales sunt *lap. cancr. specif. febril. Cr.* Omne autem fere punctum absolvit decantatissimus *cort. peruv. cum salibus* mixtus, & *evacuato jam corpore*, i. e. ante accessum V. VI. & paroxysmi propinatus, septimum vel ad summum octavum paroxysmum subegit, atque hac ratione *febrem*

hanc jugulavit. Rimatus causas procatacticas epidemialis hujus febris, aëris anomaliæ & intemperiei, nec non largiori potui propter calorem externum vix tolerandum eam adscribendam duxi. *Augustus* enim, qui fuit calidissimus, poris nimium apertis corpora sudore copioso manare fecit, inde serum absumptum, aut subtractis partibus tenuioribus biliosæ particulæ auctæ, atque hoc modo acrimonia biliosa, fermentifica, irritativa enata, quæ licet a largiori potu dilui, & serum refundi videretur. Ventriculi tamen & intestinorum tonum labefactavit, & ad excernendum *αὐτὸ καὶ κ' ἔτι* plus justo contenta citavit. Utut non negandum, *febres has epidemicas* ex miasmate, aëris sobole, simul aliquid participasse. Non fuerunt *contagiosæ*, imo si rite tractabantur, nulli funestæ, ex incuria tamen & negligentia, aut medicastrosum præpostera & perversa cura ac imperitia accedente *cachexia & hydrope*, multis exitiosæ. Et hæc ratio est, quod in aliquibus locis Hungariæ ex defectu medicorum & medicamentorum, aut perversa, aut neglecta cura hæc febres *malignitatem pestiferam* assumerint, in primis si ex miasmate, aëris sobole, aliquid participarunt. *Febres petechiales*, quæ tamen autumnoprecipiti quotannis sunt frequentissimæ, hoc anno vix observavi, & si vidi, fuerunt *benignæ*. *Diarrhææ atque dysenteria* eodem tempore frequentes quoque fuerunt. Infantes, quos corripiebant, si superarunt *nonum diem*, evaserunt.



DE MELLIS
OPPORTUNA

12
5
Jug

DECENTIVE QUANTITATE

Pro Theriaca, Mithridatoq; componendis

FABII VLMI

PHILOSOPHI AC MEDICI

VENETI

RESPONSI O

*Ad Praclarissimum Philosophorum ac Medicorum
Venetorum Collegium.*

NON PERIBIMVS.



VENETIIS, Apud Petrum Dufinellum,

MDCXVII

Superiorum Permissu, & cum Privilegio.

BRITISH MUSEUM
SALE DUPLICATE
I 7 8 7

PRÆCLARISSIMIS,
ET INTEGRIMIS
CELEBERRIMI VENETI COLLEGII
PHILOSOPHIS, AC MEDICIS
OMNIB. DOMINIS SVIS HVMANISS.

FABIVS VLMVS

Eiusdem Collegij Vnus, & Consiliariorum alter,
Artium Medicinæq; Doctor. S. P. P.



*Errum est Dialecticorum illud axioma, receptissimaq; & infallibilis veritatis ea propositio, talem contradictionis esse naturam, talem conditionē ipsius, ut, si quis iam in alteram eius partem siue spontē, siue aliqua ratione ducatur, nequeat eodem momento temporis in partem alteram inclinari; Ceterum ingenium meum (Amplissimi Patres) primo ab eo die, ex quo præsens de Mellis quantitate legitima, & opportuna pro recta Theriaces compositio-
ne dubietas in examen reuocari cœpit, usque adeo distractum, ac ita sibi met ipsi quasi repugnans fuisse videtur, ut uno, & eodem tempore prorsus nec loqui vellem, neq; silere, unoq; rursus & eodem temporis ferē momento nec manus ad mouere calamo, nec ab eo scribēdi genere, quod*

ram, distrahi, renocariq³ cuperem. Cuius ingenij mei in v-
tranq³ partem, uno simul, & eodem momento temporis in-
clinantis, lubricitatē, dum sapius anxius admodum admi-
rarer; & unde tam insueta cōtingerent, multas etiam per
noctes insomnis, pridieq³ maximē parum ante solis ortum
vigil adhuc meūm ipse diutius inquirerem, & attentius
examinarē; sorte fit (sed præter spem) ut caput aggruari
parumper incipiat, & attentari, palpebra cōcidant, spiri-
tibusq³ diuturna cogitatione fatigatis, et ad sua principia
retractis, sensuū externorum officina claudantur; caloreq³
pariter ad interna corporis viscera recurrente, iā omnis
ab externorum obiectorū præsentia prodiens, & inchoata
sensatio tollatur; ac tandē ex toto palpebrarū tegmentis ob-
ductis oculis, placidissimo, atq³ dulcissimo sensum ac sensum
sopore corripiar. Dū verò tāta, tādiuq³ expectata corporis
(grauib. etiā alijs fessi laboribus) tranquillitate, tanta ani-
mi pace potirer; nullisq³ tunc simulachrorū visis, & imagi-
nib. quæ nos in somno decipere, ludificariq³ solent, mens agi-
tata, quiesceret; ecce repente confusa quedā, & inordina-
ta phāta smata, quæ sese mihi per quietem obijciunt, & (nō
secus ac aliquando contingit, & apparet in nubib.) varias
ocysime formas permutantia, & accipientia, tandē in duo-
rū quorundā inuicem contendentiū, & altercantiū simu-
lachra degenerāt. Horum. n. cæteris omnib. imaginib. eua-
nescentibus, modico post Idola sola conspiciuntur, solaq³ mi-
hi per somnum occurrere, ac obuiam fieri (& satis quidem
audacter, ac importunē) videntur. Erant autem hac inter
se nihil, parumve dissimilia; nā utraq³ unius sedati viri,

Accedunt ambo eiusmodi viri (pro talibus enim, non pro meritis à me, nudisq; simulachris accipiebantur) a quo ferè pariterq; (ut dici solet) pede currentes; & una simul ad me cōuersi, confusa multa loquuntur, garriunt, obstrepunt, increpant, partim etiam obsecrāt, ingenij lubricitatem accusant, & ut in alteram contradictionis partem inclinari, duciq; paterer, importunè contendunt. Hic ab omni scribendi, immo verò dicēdi genere multis me rationibus remorari, seu prorsus auocare conabatur. Ille autem totidē rationib. alijs è contrā, me ad hoc & illud agendum uno, & eodem instanti temporis cohortabatur. Interim ego distinctius quid sibi velint audire, peroptans, conuertor ad eos, precor, ut placidè saltem & amicè loquantur; promittog; me facillimè rationibus potioribus subscripturū, & in contradictionis partem, in quam fortiora me ducent argumenta, fore statim inclinaturum. Adde tamen non prius me illos auscultaturum, quàm qui nā ipsi reuera sint, unde veniant, & num ab alijs fortasse missi, vel spōtè potius ad nos accesserint, explicare non recusauerint. Respondent ambo coniunctissimos esse mihi, modico certè (forteq; nullo) spacio loci seiunctos, nullorum iussu, precibusq; motos esse, sed sponte venisse; meq; totum id (addunt) facile intellecturum, & assequuturum, ubi distinctius eos intueri, & attentius, defixisq; (ut dici solet) in ipsos oculis, amborū vultus, facieiq; totius delineamenta conspexero. Cōuertor iterum ad eos illico, perquisitius inspicio, nec multa tēporis interposita mora, etiam utrūq; perfectè dignosco. Erat enim eorum unus Vlmus ille, quem vos (integerrimi vi-

tatem vocastis quidem, sed non elegistis, aut tanto, quanto
opus erat, consensu, non approbastis. Alter autem erat *¶*
Vlmus, sed quem totidem ante iam mensib. in unum præ
clarissimi collegij vestri consiliarium tum appellastis, tum
etiam tantis, quantis opus, vel satis erat ad hoc, volunta-
tis vestre significationib. delegistis, *¶* confirmastis. Ille qui
de verbis, *¶* nutibus aliquando, orig. saepe digitos admonēs,
irreprehensibile, et nunquam ulli nocuum silentium effica-
cissime commendabat; meq. sacris illius misterijs initiari
precabatur; omninoq. mihi tum à dicendo, cum à scriben-
do supersedendū esse contendebat; alioquin facile malè me
plures (aiebat) accipient; forteq. in multis, *¶* in ijs potis-
simum, accusabunt. Quod primum, scilicet, videar collegij
totius voluntati non me negligentis, sed non eligentis, obse-
qui recusare: deinde verò quod cum amicissimo, *¶* erudi-
tissimo iuvene, non sine alicuius etiam ambitionis suspicio-
ne, cōtendere, *¶* præter oēs amicitiae leges, acerbius agere,
dimicareq. velim. Postremò quod onus superfluum pror-
sus, forteq. penitus etiam vanū, *¶* frustratorium assumā.
Superfluum quidem; eò quoniā doctissime iā, copiosissimeq.
ferè quidquid in huiusmodi re dici potest, ab integerrimo,
¶ præstantissimo Viro D. Hieronymo Thebaldo in concio-
ne, quam habuit coram omnibus ferè nostri collegij Patri-
bus, diebus elapsis, assumptum, examinatum, et ad vivum
usq. resecatum sit. Frustratorium autem, eo quoniam iam
collegij mentis, *¶* futuri iudicij conspiciantur initia: cum
tanta scilicet Theriacæ copia minori mellis quantitate
parata, vel (ea iam à toto collegio veluti suspecta reie-

cta) paranda, potius exordium, aut signum consequuntur
sententia, quam certi alicuius experimenti videatur indi-
cium. Hic autē ē contra verbis, & nutibus itidem sinistra
manu simul os adaperiens, et dextera calamum offerens,
dignitatis & gradus illius, in quo collegium me collocaue-
rat, munus, officium, et partes commemorabat; nec à tan-
tis Patribus in Consiliariū Collegij totius designari, proba-
rive, quid aliud esse monebat, quam in consilium adhibe-
ri, vocariq; semper; consilium autem (cum nihil aliud re-
uera sit, quam excogitata ratio aliquid agendi, vel non) ex-
petiri summopere tunc, et ab omnibus desiderari, cum du-
bia simul, & gravia quedam examinantur, & in contro-
versiam posita sunt; gravissimumq; illud esse nō solum prae-
clarissimo collegio nostro, sed universae reipublicae, & civi-
tati, de quo nunc agitur; vitioq; maxime mihi verten-
dum, & imponendum esse, ni partibus meis & officio, cui
tota mente, totisq; viribus incumbere debeo, quantum
erit in me satisfecero; impium, et execrabile quidpiam, ad-
dēs, me facinus esse perpetraturum, si, quae veritati lumē
aliquod asferre possunt, tacitus pertransibo, et importuno
silentio percurram; cum nihil sit ipsa veritate sacratius,
nil iustius, nil amabilius. Neq; verò timenda, vel multifa-
cienda subaddebat ea esse, quae tam constanter ab altero
obijciebantur. Nam etiam si Patribus illis eo tempore vi-
sum sit peculiare difficultatis huius examen non mihi, sed
alijs imponendum, aut (si placet etiam) credendum esse;
tamen, & eam, quae maximē solet cum dignitate, &
consiliarij gradu coniungi, facultatem, in dubijs omnib. pro-
prian explicandi sententiam, non ademerunt: Immo ve-

ro propterea me forsā ad opus hoc praesignatum deligere
despexerunt, quod intelligerēt, ut ad cetera, sic ad hoc (pe-
culiari dignitatis, et loci ratione) me semper existimandū,
et habendum esse delectum. Multo verò minus aiebat
ex hac indagatione veritatis verendum esse, ne putent ali-
qui me sanctas amicitiae leges violasse, atque tam firma,
confirmataq; iam familiaritati, quae mihi cum eruditissi-
mo iuvene multis abhinc est annis, renunciaſſe; cū nō pro-
pterea quòd aliter ac ille sentiam, amicissimus illi nō sum,
aut inter familiares illius dinumerari non debeo. Quippe
quoniam, quamvis omnes uno consensu constituent ami-
citiam in unione quadam positam esse; Unio tamen hac
ad eādem opinionem nulla necessitate determinatur; cum,
sicuti non repugnat eos, qui sese inuicem grauiter odisse
possunt, eadem in pluribus opinari, sic non inconuenit, ut
illi qui artissimo quoque necessitudinis vinculo iuncti,
colligatiq; sunt, possint aliquando in opinionib. esse diuersi.
Quod autem acerbius, quam amicitiae leges exquirant, cū
amico sim tractaturus; vel nullus unquam, qui nostra vi-
derit, vel si quis fortè, non rectè tamen, sed vanè prorsus,
et imprudenter obijciat. Quemadmodum etiam nullus,
qui rectè nouerit qualia, cum quibus, et qua ratione tra-
ctentur, nos ambitionis insimulabit. Neque verò me remo-
rari, aut ab honesto eiusmodi officio reuocare tot illa de-
bent, quae subtilissimè iam, doctissimeq; sed ore tenus, ab Ex-
cellentissimo D. Thebaldo disputata, et examinata fuisse.
Quandoquidem prater ea, (quorum aliqua poterunt ite-
rum, sed exactius, facilius, et clarius adhuc explicari) nō
deerunt alia consideranda, quae forsā omnem duritiem
cordis

cordis ab illis euellere, auferreque poterunt, quibus ex ijs, quæ iam à viro doctissimo tradita sunt, incepit ipsum cor emolliri parumper, & aliqua ratione mulceri. Postremò verò nec vanum, neque frustratorium officium hoc futurum esse superaddebat, eo quoniã nondum Collegium nostrum in eiusmodi causa sententiam dixit, sed omnia pariter in ancipiti posita sunt, & lis (quemadmodum dici solet) adhuc sub Iudice pēdet. Nam quæ nuperrimè sunt, veluti occasiones experimenti faciundi cuiusdam, Theriaca confecta, solaque mellis illa diuersa quantitate parata, quales existant iam Patres ipsi nouere; quam verò pauci tam illa, quàm alia, (si quæ tamen eo modo parabuntur) nobis emolumenti pro cito, recteque decernendo futura sint, meum esse quoque dicebat (suo loco tamen, suo tempore) demonstrare. Hæc Vlmus ille consiliarius dum loqueretur, nuebatur alter, nutabat, niētabat, totoque corpore mouebatur; nec tandem sustinere, tanta pati que potens, iterum capit obstrepere, & ita vociferari, ut externo quodam veluti strepitu facto, protinus ego quasi perterritus, expauescere, dimoueri que cæperim, & spiritibus iterum ad externorum sensuum instrumenta demissis, ac foris prodeunte calore, statim ad vigiliam ex somno redierim, & pauco temporis intervallo negotijs, & curis eisdem iterum sum restitutus. Veruntamen ubi quacunque mihi per quietem occurrerant, & quorum adhuc imagines videbantur in sensibus veluti relucere, diligentius attendere, examinareque cæpi, cessit omnis admirationis occasio, rem vniuersam facile noui, nec amplius cur in utranque contradictionis partem uno, & eodem momento temporis inclinarer, obstupui.

Vidi siquidem, & intellexi me quodammodo duplicem
esse, duosq; referre diuersos, quamuis unus, et simplex ap-
paream. Ego namque sum ille, quem vos (amplissimi Pa-
tres) ad hanc examinandā difficultatem vocastis quidem,
sed non approbastis. Ego pariter sum alter ille, quem prius
vos ipsi quoque Collegij totius unum ex consiliarijs con-
stituisstis, delegistis, et confirmastis. Quid mirum igitur si
(cum sua cuiq; recte conueniant, & debeantur) eodem
prorsus instanti temporis utranque partem contradi-
ctionis eligerem, negligeremq; probarem, ac reprobarem?
Ceterū ad me cōuersus, et duos illos, qui in uno me reve-
ra positi collocatiq; videbantur, inuicem conferens, ac
utriusque rationes, quibus in proprium sensum & hic, et
ille traducere me conabatur, perquisitè considerans, ubi
valdè probabiliore, & efficaciores posteriores illas fore
dignoui, statim Consiliarij partes elegi, & in probatam
ab illo contradictionis partem inclinari sum passus. Iam
igitur oblatum mihi ab ipso calamum ecce suscipio, &
qualis in eiusmodi re, mea sententia, quale consiliūq;
meum sit, explico, vobisq; (Patres integerrimi) sacro, vo-
neo, donoq; Vos tamen cuncta non ut cōsilia, sed ut amo-
ris, et obsequij germina potius, & debiti mei pignora, ro-
go suscipite, diuq; valete.





FABII VLM I

PHILOSOPHI AC MEDICI,

VENETI

De Mellis opportuna decentive quantitate.

RESPONSIO.



PROOEMIUM.



Cogitabam modo diutius ipse mecum, unde sumpturus in eiusmodi ambiguitatis examine principium essem. Videbatur enim ex vna parte historiam totam, & occasionem difficultatis, utque preclarissimis omnibus huiusce Collegij Patribus (ad quos hæc nostra præ ceteris diriguntur) notissima sit, præsupponendam quidem, nulla verò necessitate repetendam, aut præmittendam à nobis esse. Veruntamen, quoniam hæc eadem nostra, publica (ac proinde alijs quoque communia) futura sunt, necessarium quoque nobis ex altera parte fore videbatur, ut historiam totam exponeremus, & ut à primis, precipuisque tantæ dubitationis occasionibus auspicaremur. Sed in eis etiâ inueniendis, & ijs, qui primi tricarum harum autores extiterint, recognoscendis, adhuc incerti, dubiaque pariter, & ancipiti cogitatione distracti, nondum ubi dicendorum principium facere iure merito, & sine vlla exceptione possemus, ex toto patebat. Susplicabamur etenim Nos, & non sine ratione putabamus duos esse, qui (quanquam non palam & aperte, occulto tamen, & clam) de prioritate contendere, certareque possent; doctissimum. s. & eruditissimum D. Angelum Busti Vidua vocatum, & egregium hominem D. Pompeum Sprechi Pharmacopo-

am ad insignia duorum Aethiopum. Dixi non palam & aperte. Quando
quidem D. Pompeus amicus noster priuatim agens quandoque no-
biscum, profitebatur se multis ante iam annis huiusmodi mellis con-
suetam, & usurpatam à Venetis Pharmacopolis, quantitatem, in com-
positione Theriaces, illegitimam iudicasse, & veluti suspectam, odisse,
conuenienti ratione tamen, promotionem difficultatis huiusmodi, ad
hæc vsque tempora distulisse. E contra vero doctissimus, & eruditissi-
mus Vidua in suæ disputationis præfatione, siue in Epistola dedicati-
ria, se primum errorem hunc (ita enim vocat) obseruasse, dignouisse-
que gloriatur, dum ita scribit: *circa quam maximum hucusque, & non
obseruatum errorem committi cognoui, cum ex vestro decreto ad The-
riaces ac Mithridati cōpositiones simul cum excel. D. Ioan. Bapt. Perada
pridie Kal. Iunij Praeses creatus essem &c.* In qua rerum varietate, diffi-
cultateque, Nos (quidquid de primatu sit, à quo si faciendum initium
esset, certè non esset ab eorum aliquo faciendum; cum ex monumentis
Collegij nostri, vti distinctius omnia suo loco narrabimus, satis appa-
reat, multos ante annos hos consimilem huic apud maiores nostros in-
ductam, & in examen reuocatam esse difficultatem. In qua tamen nihil
ab eis innouatum, nihil sancitum fuisse reperitur: Fortè quoniam rectè
dignouerint, cum de inueterata iam, & antiqua, proficua semper, nec vl-
li nocua, immo verò neque vlla vnquam ratione reprobanda, consuetu-
dine permutanda differitur, non ita temerè pronunciandum, neque nisi
diligentissimè, diutissimeque re tota considerata proferendum iudicium
esse: proindeque dilato negotio, sanctius, & iustius existimauerint, nullo
evidenti constituto decreto, decernere, nulla que aperta facta sanctione,
(sancire nihil innouandum, nihil immutandum esse.) Nos (inquam)
quidquid de primatu sit, ea solum, quæ nostris ijs temporibus succeffe-
re, breuissimis nunc explicanda fore censuimus; & ideo ab eo tempore
solo, quo capit inter Collegij Patres eiusmodi res pertractari (cæteris
propriiori loco remissis) totius modo disputationis huius, & futuri ser-
monis, sumemus exordium. Quo peracto deinde præcipuas rationes ali-
quas afferemus, quibus moti, persuasiq; nos conuenientius, & rectius fo-
re putauimus, si scriptis, & calamo potius, quàm verbis, & lingua, Patri-
bus ijs consilium nostrum, & quidquid animo, ac mente sentimus, vber-
rimè exponeremus. Postremoque totam tractationem hanc in partes
præcipuas aliquas separabimus, & ad tria potissima puncta vniuersam
disputationē hanc reducemus. Primū siquidem in scriptorum autoritate
versabimur: atq; tot autoribus ab eruditissimo iuvene, vt eorum testi-
monijs sua tueretur, adductis, Nos (illis tamen primo recognitis) vel
totidem

totidem alios, aut non pauciores admodum, (& eos forsitan longè maioris existimationis, & dignitatis) qui nostra pari modo tueantur, fideliter opponemus. Deinde verò tum rationibus, tum adductis in aduersum autoritatibus, dilucidè respondebimus. Tertio demum, & vltimo loco essentialia quædam ad eiusmodi dubitationem attinentia maxime, recēsebimus, referemus, & examinabimus. Colligentes ex omnibus difficultate proposita vtraq; ex parte probabilibus rationibus comprobata solummodo, nihil innouandum esse, nihil penitus permutandum. Cum. s. ad confirmatam, & iam probatam consuetudinem aliquā euerendam, demonstratiuæ rationes requirantur, probabiles verò nullo modo sufficiant.

*Explicatur historia, et difficultatis occasio
tangitur. Cap. I.*



V O D igitur ad historiā attinet; ea talis est. Cū pridie Kalen. Iunij currentis anni 1613. Collegij Patres (vt moris est) duos ex eodem collegio viros, & eos quidem eruditissimos, qui magnarum Antidotorū cōpositioni præessent, elegerint, approbauerint, & delegauerint excellentissimū, scilicet, & eruditissimum D. Ioan nem Baptistam Perandam; & excellentissimum, atq; pariter eruditissimum D. Angelum Busti Vidua cognomento nuncupatum: Cumque. D. Vincentius Calcanis Aromatarius tum ad Insignia capitis aurati, tum etiam ad insignia Diui Marci, Theriaces, atque Mithridati confectiōnem, (præmissio publico per triduum apparatu, quemadmodum fieri solet) iā moliri fuisset aggressus; ac Mellis proinde consuetam, pro siccis corporib. vniēdis, quātitatē exhibuisset, & obtulisset; visum est illico D. D. Præsilibus nostris, vniq; potissimum D. Angelo Vidua, tantam mellis copiam, vt quæ proportionē nullo modo respondeat constitutæ à Galeno ex Andromacho quantitati, veluti suspectam, interdicendā, & (quidquid actum hucusquē perpetuo fuerit) tunc temporis respuendam esse. Quo factum fuit, vt, cæteris abnuentibus, atque noue huic opinioni minimè cōsistentibus, statim ac fieri potuit, Collegij Patres omnes conuocati sint (spectabat enim iudicium ad illos.) Quibus non solum exposita, enarrataque fuit ab eruditissimo Vidua difficultas inducta, & occasio difficultatis; verum etiam fuit ab eodem ultra petitū, vt, iuxta Galeni mentem ab ipsis illico, & nulla interposita mora, præscriberetur ea quantitas, & copia mellis, quæ pro Theriaces compositione sufficere,

fulficere, vsurparique posset: cum neque tantillum nobis liceat à Galeni doctrina recedere, ac deuiare. Cuius eruditissimi Iuuenis opinioni (tanquam illi, quæ Galeni nomine exornabatur) cum multi manus & assensum præbere cepissent; ego vero rem hanc maioris, quam videbatur prima fronte, momenti fore cognouerim, rogavi Patres, & omnes Collegij Proceres, ut maturius negotium hoc examinari permitterent, ne (sicuti monuit, & docuit nos aliquando Philosophus) celeriter operantes, veluti non ratiocinantes agere videremur. Erat enim prius diligentius animaduertendum, & perquisitius inuestigandum; numquid aliàs aliquid à maioribus nostris vel apertè statutum, & sancitum sit; vel tacito forsitan, & confirmante ferè silentio, permissum: numquæ sic explicata Galeni mens apud omnes, vel potiores Medicinæ scriptores pro vera Galeni mentè sumeretur (quandoquidem noueram alios aliter illam interpretari.) Quod Seniores intelligentes, existimarunt differendum iudicium esse; proptereaque Nonis Iunij statutum, & à Collegio sancitum fuit, vt vtriusq; Antidoti compositio eo prorsus modo pararetur in posterum, quo toto superiori tempore parata fuerat, donec Antidotarium (multis ante iam annis inchoatum) perficeretur, ac absolueretur, aut aliter à Collegij Patribus decerneretur. Interim ab aliquibus alijs Pharmacopolis, quibus in promptu res erant, vtrique Antidotus consueta fuit Mellis quantitate parata. Cum verò cæperint priuatim etiam inter se Collegij doctores eiusmodi cōtrouersiam examinare, Galeniq; ac etiam aliorum probatorum scriptorum libros euoluere, & quid eorum pluribus, atque potioribus videbatur, expendere; factum est, vt nonnulli magis in vnam, alij verò magis in alteram sententiam declinarent, & ducerentur; multis etiam eorum consuetam illam Mellis quantitatem parum ab ea Galeni recedere sentientibus, & profitentibus; alteris autem longè differre, tertia quæ ferè parte distare constituentibus. Quo factum est vt, instantibus difficultatis huius Autoribus, & alijs ex ijs, qui eisdem dedere manus, (omnibus tamen forte non minus alienis impulsibus, quàm spontè motis) efflagitantibus, ut cito quid esset agendum à Patribus indicaretur, & id, quod Collegiū vel cum Antidotario, vel ante quoque (suo tempore tamen) decreturum esse sponponderat, ocysissime decerneretur, sint iterum (idque pridie Idus Iunij) Collegij Patres in loco solito conuocati. Vbi statim illis oblata fuit syngrapha, in qua D. Pompeus Sprechi pollicebatur apertè, satisque cōfidenter etiā profitebatur se velle Theriacā, sicut in reliquis, ita pariter, quo ad Mellis quantitatem, ad Autorum mentem probè conficere. Quod, vt sibi concederetur, non solum Patres orabat, & hortabatur; verum etiam vt illi festinan-

ter id agerent, instabat, & precabatur. Quæ cum Collegij Patres audirent, optime verò dignouerint, ad huiusmodi rem definiendam, & decernendam maturo opus esse consilio, tutius admodum fore putarunt, si, duobus ex eodem confesso mandarent, ut (quemadmodum etiam in alijs quibusdam rebus examinandis, & inuestigandis obseruari consuevit) diligenter eiusmodi rem, & ambiguitatem expenderent, atque inde Collegio toti, Patribusque referret. Fuerunt autem hæc Collegij verba, decretaque. *eligantur duo, qui diligenter examinare debeant quantitatem Mellis ingredientis Theriacam, & Mithridatum, iuxta mentem scriptorum, qui de ipsis Antidotis scripsere, iuxtaque mentem excellentissimi Collegij.* Quibus ultimis sanè verbis significabatur eos, actus, & monumēta Collegij nostri, propriis quibusdam adnotata libris, cōseruata, ac æternitati commissa, conspecturos esse, ut deinde Patribus referre possent, si quid aliàs forte in eiusmodi re tactum, sancitum, & à maioribus nostris decretum sit. Nam quæso, quid aliud est diligenter examinare quantitatem Mellis Theriacam & Mithridatum ingredientis iuxta Collegij mentem, quā quidquid in eiusmodi re fuerit aliàs in Collegio tactum, indagatum, permissum, & disputatum expendere? immo uerò Patribus ipsis sub ea, qua disputatum est ratione, referre? Prioribus autē verbis innuebāt Patres ab eisdem tam Galeni, cum aliorum quoque probatorum Autorū, qui de Theriaca, Mithridaticaque confectione scripsere, codices studiose euoluendos, & eorum mentem Collegio referendam, & reportandam esse. Electi verò fuerunt ad munus hoc obeundum, Doctissimus, & nunquam satis laudatus vir, excellentissimus D. Ioannes Moratinus, & eruditissimus D. Angelus Vidua. Quorum doctissimorum virorum cum tamen alter iam propriam sententiam dixisset, consiliumque suum explicasset, & omnino probasset, ut inueterata illa cōsuetudo penitus tolleretur, & Mellis ea quantitas permutaretur, & imminueretur: Alter autē is idem esset, qui ambiguitatum harum Autor extiterat, & mordicus opinionem eam tuebatur; non mirum si concordēs in omnibus ambo, iam statim in vnam & eandem iuere sententiam, sique magis in ijs rationibus apportandis, quæ eandem persuadere quopiam modo posse videbantur, quam vel in ijs respondendo, aut aliis, alteri opinioni fauentibus, diligentius inuestigandis, laborauerint, ac insudauerint. Plurimum igitur hi mensium spacio vniuersos Collegij libros, in quibus maiorum nostrorum actiones continentur, euoluere, & multorum aliorum scriptorum mentes inquirere, ac omni (ut inquiunt) adhibita diligentia perscrutari non sunt grauati; postremoque nihil penes hoc à maioribus nostris statutum esse dignoscentes: Quod nam (eorum sen-

rentia) Galeni, potiorumque Medicinæ scriptorum consilium esset, sub vnius de Mellis conuenienti atque legitima quantitate ad Theriacam componendam Disputationis titulo, declararunt, & vniuersam disputationem eam typis depromptam & (vno tamen sub eorum nomine solum) impressam, Collegij Patribus pro respōsione consecrarunt. Hęc ubi peragebantur, ego, quamuis iam totum ab initio munus, & officium hoc intelligerem solum ijs demandari, ac proinde cognoscerem laborandum in huius ambiguitatis examine mihi vel parum, vel non amplius esse (potissimè cum ad onus hoc subeundum initio quoque vocatus, non tamen delectus, aut à Patribus confirmatus essem) dubius tamē adhuc permanebam, & anceps, num prorsus ab omni sollicitudine, omni que inchoato studio rem hanc à capite ad calcem (vt dici solet) examinandi, desistere & supersedere deberem; an potius, omnibus consuetis negotijs adhuc, familiaribusq; studijs vndique spretis, & intermissis, huic eidem inuestigandæ confirmandæque veritati, totus incumberem? & quæ horum relationi (cum iam intelligerem & præuiderem qualis illa futura foret; & quā eos ore tenus Collegio daturos & apportaturos existimabam) obijci & opponi posse cognoscerē, subtilius expenderem, diligentius colligerem, & ad respōsionis vsque tempus in ordinem digesta seruarem; quò scilicet vna, uel altera concione tandem Patribus omnibus veritatem ipsam, nullis ambiguitatum velamētis inuolutam, ostēdere, nullisque falsitatum fucis conspurcatam, ante illorum oculos exhibere, & offerre possem. cum ecce Doctissimus & amicissimus vir, qui nos orat, & petit, vt illi totum negotium hoc relinquamus, in omnibus se causam hanc toto corde totisque viribus tractaturum, & aduersarijs vndiq; responsurum, aperte pollicitus. erat autem hic excellentissimus D. Hieronymus Thebaldus, quem vt honoris causa semper, ita nunc temporis vt testem etiā (quo scilicet noscant omnes me non mentiri) libenter appello. Placuit nobis amicissimo, & ingeniosissimo viro, non semel, sed bis, & pluries ardentem id requirenti, tunc temporis inseruire, & obtemperare. Tanto igitur defensore contentus (erat enim admodum mihi illius eruditio, & intelligentia nota) superfluum existimabam, vt amplius circa difficultatem hanc immorarer; satiusque multò fore putabam, si iā ad consueta studia redirem, atque iterum me ad libros Aristotelis de partibus Animalium interpretādos, accingerem: & ita factum profecto fuit. Post igitur circiter quinque mensium spacium, cum iā instaret prædictus D. Pompeus Sprechi, vt quid in eiusmodi re decernendum esset, iam Patres ipsi decernerent; & constituerent; octauo (ni fallor) Kal. Octobris cōvocato Collegio, Doctissimus Vidua suo & excellentissimi D.

Ioannis Moratini nomine, Patribus Disputationem illam, de qua superius, humaniter obtulit, & vnicuique Doctori peculiatiim libellum, in quo disputatio tota continebatur, lubenti animo, lætaque fronte dilargitus est; ea tamen lege ferè, & eo pacto, vt cum vna post, vel altera die, Patres iterum conuocati, sacris adesse deberent; ea lecta, cōsiderataque, protinus conuenirent, & quid agendum in posterum, nulla amplius interposita mora, decernerent, & cōstituerent. Insueta profecto res ea fuit, nec vnquam ab alijs (quòd ego nouerim) obseruata; nimirum, vt, quæ verbo, Collegio relationes fieri, reportarique solent, nunc scriptis, & publicæ factæ, iam, redderentur. Nos igitur vbi noua, & insueta hæc multorum animos (vt quæ subtilia & artificiosa maxime viderentur) mouisse nouimus; statim (ne sine paritate, & equalibus rationibus causa talis apud ipsos Collegij Patres, veluti proprios iudices, tractaretur; ac proinde non auditis ex equo partibus, sententia pronunciaretur) statim (inquam) altero scilicet eo die, postquam, peractis sacris, in vnum Patres iterum conuenere, multa diximus, & (ita senioribus annuentibus) non permisimus, vt Iudicium (tanta inter actores disparitate reluctante) cōsequeretur: Vtiterius insuper addentes, & omnibus significantes conuenientissimum videri nobis, vt, adductis rationibus, nō alio modo, quam eo prorsus, quo fuerant adductæ, responderetur; id ipsumque nos præstaurus (cœteris tamen abnuentibus, & onus hoc recusantibus) pollicentes. Quod cum iustum, & valde dignum Patribus ipsis, potissimum vero senioribus, videretur; nouissent autem omnes excellentissimum Tebal dum ad eiusmodi rem tum doctissime, tum citò quoque, perficiendam, & peragendam, paratissimum esse; Plures ad eum conuersi; monstrabāt id onus alteri nulli commodius, & iustius imponi posse: alij verò distinctius, & apertius eum hortabantur, & præcabantur, vt propriam, quam verbo sententiam, dicturus erat, calamo scriptisque diceret, & explicaret. Qui tamen illico orandi munere & officio tacite confirmato, vel saltem non recusato, scribendi prouinciam (forte quoniam cum affini, cognatoque viro res agebatur) aperte neglexit. Quapropter ego, qui studia iam isthæc (ita mihi Deus testis sit) intermiseram; quique iam, ne huiusmodi causa sine defensoris paritate tractaretur, huic oneri me subiiceram; oraui Patres, & humanissime petij, vt mihi tantum temporis impertirent, quantum ipsi recte dignouerint homini multis medendi negotijs (saltem ijs, quibus ex pacto tenetur, vt absit iactantia verbis.) impedito, detentoque satis esse. Tandem pluribus renuentibus, & huiusmodi genus respondendi non approbantibus, post varia, multaque & hinc,

& inde considerata, terminum præscribere viginti dierum, cum prius octo decemve, aut quindecim (dure nimis) proposuissent. Eo verò præscripto dierum spacio, vix mihi licuit tot ab eruditissimo iuvene oppositos nobis, & enumeratos autores, (præcipuè qm̄ paucorum quorundā libri tantummodo, locique ab illo citantur) vt opus erat, euoluere, & recognoscere. Quare transacto iam termino dierum illorum; cum Ij, quibus nihil magis cordi fore videbatur, quàm, vt eiusmodi consuetudo penitus tolleretur, instarent, & omni adhibito nixu studerent; vt Patrum consiliū explicaretur, & haberetur; ijs iterum conuocatis, vberissima est habita coram omnibus ferè Collegij Patribus, & doctissima concio ab eruditissimo, & ingeniosissimo viro D. Hieronymo Thebaldo. Sequenti verò die, congregatis iterum omnibus, cum, pro respondendis ijs, quæ superiori die ab excellentissimo Thebaldo disputata fuerè, nonnulla fuerint à doctissimis viris aliquibus in medium adducta; ego verò supplex adhuc exorarem Patres, vt donec ijs, quæ iam inceperam, vltimas manus imponerem, iudicium differre, protrahereque vellent; visum est primis ipsius difficultatis autoribus, (quò fortè sibi met ipsis aliqua saltem ex parte satisfacerent) proponere Patribus, vt cum iam cuncta D. Pompeus pro Theriaca Mithridatoq; conficiendo seruasset, præparata quæ tenuisset, eidem permissuè concederetur, vt medietatem Theriace (quodam tamen addito pacto, nonnullisque conditionibus) conficeret cum mensura mellis proportionata quantitati à Galeno, ex eorū opinione præscriptæ (quæ verò sit eiusmodi quantitas suo loco monstrabitur) Alteram autem medietatem eo modo, quo Venetijs hucusque componi consuevit: Quò, scilicet, post eius fermentationem, sexque transactis mensibus, quæ foret inter vnā, & alteram differentia, dignosci posset: cui propositioni subscribere Patres. In qua tamen explicanda permissua concessione, cum multi ex Patrum confessu (inter quos numerabar & ego) sic intellexerint medietatem illam Theriaces esse parandam, vt in omnibus, quo fieri posset, ad ipsius Galeni consilium & mentem conficeretur, ac proinde præscripta, determinataque vini quantitas à Galeno lib. de vsu Theriaces ad Pamphilianum, iuxta proportionem massæ totius, in hac ipsa quoque susciperetur, & vsurparetur: altero tamen Patrum conuentu, ad eiusmodi (sed sero nimis) difficultatem enodandam, illico, vel parum post cōuocato, declaratum est, solam intellectam esse differentiam illam inter vtramque Theriacam, quo ad copiam mellis; atque ita pares in reliquis omnibus eas ambas esse futuras, vt non ratione sola, sed experiētia duce, securius, & rectius iudicium consequi, & effici possit; ac proinde quæ nam potius inter illas probanda veniat;

ratio iubeat, experimentum verò confirmet. Quanquam forsan inutile multis (vt etiam nobis) eiusmodi experimentum videretur, vt quod vni cuique facile per se pateſcat; cum nemo neſciat eam paulò duriorē euasuram, quæ minori mellis quātitate parabitur; ſicut è contra paulò molliorem eam, quæ maiori: cumque terminus ille ſex menſium pro differentia noſcenda, certi nihil nobis afferre poſſit, quò tuto poſſimus agnoſcere nū tēporis maiori tractu, earū altera nimis exſiccata dureſcat; Quo fit, vt in eiusmodi termināda particula, vno vel altero ſolū ſuperante ſuſfragio Collegij mens apparuerit, declarataq; ſit. Hęc eſt tota ſanè, à primo die, ex quo cepit hæc inter Collegij Patres difficultas agitari, fidelis hiſtoria, quæ, ſcilicet, huic propoſito conuenit, & quam pro nonnullarū rerum dignotione præmitti neceſſum erat. Nā, quæ poſt hæc ſucceſſerē, non ea ſunt, vt hic apponi, referriq; debeant; cum vel nullius, vel pauciſſimi momenti ſint ad huiusmodi, quæ paramus, intelligenda; nec adhuc vltimum aſſequuta finem eſſe videantur. Illud fortasſe non erit (vt quod rem etiam noſtram quoquomodo reſpiciat) inuolutum ſilentio prætereundum, vtramque. ſ. Theriacam illam à D. Pompeo paratā iam Patribus omnibus Collegij noſtri ſuſpectam euaiſſe, nec amplius experimenti loco nobis inferiturā; quinimmo prorſus & ex toto reiectam, ac reprobataſ ab ipſis Collegij Patribus, duobus tantum ſuffragijs abnuentibus, re vera fuiſſe. Cuius rationem explicēt alij: non enim eſt hic locus, vt talia nos diligentius examinare debeamus.

In quo poſita difficultas eiusmodi ſit perquiſitiuſ oſtenditur: & rationes nonnullæ, quibus ad ſcribendum motus eſt Autor, explicantur. Cap. II.



Vamprimū Patribus, & vniuerſo Collegio noſtro ab erudiſſimo Vidua relata, propoſitaq; difficultas ea fuit de legitima mellis pro confectione Theriaces quantitate ſumenda; vnaque ac altera Præceptoris noſtri Galeni ſententia, & autoritate confirmata; cum ſcilicet tam libro de Theriaca ad Piſonem, quàm etiā de eiufdem vſu ad Pamphilianū, & (vt placuit aliquibus) ex Andromacho iuniori quoq; primo de Antidotis, apertiffimè decem mellis ipſius libras pro ſiccis, & aridis corporibus ijs vniendis, quæ ſenior Andromachus carminibus elegiacis ad talis Antidoti compositionem præparari debere, cecinerat, ſatis eſſe, ſtatuerē, ſancireq; videatur: atque vnā ſimul

ab eodem eruditissimo viro petitum, vt eā, qua Veneti pharmacopole
ad hæc vsque tempora, tum in Theriaces, cum etiam in Mitridatios cō-
positione, mellis quantitate sunt vsi, Collegij Patres ad veram Galeni
redigerent, & (superexcedente quocunque resecato) præscriptæ ab ipso
quātitati, coequari decernerēt: statim mihi, qui sicuti certus eram Gale-
ni tempore, & eius manu potissimum, rectè paratam, & optimè semper
compositam fuisse Theriacam; ita quoque temporibus ijs, non expe-
rientia sola, quæ rerum omnium est vera magistra, sed probatorum, &
magni nominis scriptorum quorundam autoritate, fideque, tanta co-
pia mellis, quanta ab eo tempore, ex quo prædicta conficiuntur Vene-
tj Antidota, à nostris Pharmacopolis vsurpari consuevit, æque bene
parari, paratamque diu conseruari, nulla prorsus ratione timeri, aut in-
dubium reuocari posse dignoueram: statim (inquam) illud mihi (quod
aliàs memini, dum Senioris Andromachi Versus, & Galeni locos illos
examinarem, excogitasse) venit in mentem; vel. s. omnino nihil, vel sal-
tem parum admodum interesse, referreque siue vna siue altera mellis
quantitate talis Antidotus conficiatur; dummodo certa constet expe-
rientia rectè parari, & ad summum perfectionis, & proprii vigoris, con-
uenienti consistentia seruata, peruenire posse. Vel, si quicquam refert,
ob alteram trium rationum harum contingere, & vsu venire, vt tam il-
la Galeni, quàm et nostra experimento porbè respondeat, & condecen-
tem illam consistentiam diu retinere, conseruareque possit, quæ huic
Antidoto per sexaginta circiter annos duraturo, quemadmodum Ga-
lenus est testis, à suæ factionis initio conuenit, & iure debetur: Vel quo-
niam. s. Atticum mel, quod à Galeno, & ab omnibus ferè Medicis, qui
Romæ degebant, aut etiam alibi medebantur, vsurpari consuevit, alte-
rius admodum melioris conditionis à nostris esset, & quod non ita faci-
lè processu temporis incrassaretur, aut foret exsiccationi subiectū: Vel
quoniam ea vini quantitas, qua copiosiori Galenum, quàm nostri fa-
ciant, vsu in ipsa Theriaces compositione fuisse, neminem vnquam
sanæ mentis dubitare dignoui: quippe cum licet aliquando scripserit as-
sumendum ipsius esse quod satis est; libro tamen de vsu Theriaces ad
Pamphilianū, id satis ad duos sextarios verbis apertissimis, determina-
uerit, & (quemadmodū placuit alijs) eo primo de Antidotis drachmis
tricentis, & viginti, quæ mensuram eandem efficiunt, eiusdem quantita-
tem quoque præscripserit, maior (inquam) ea vini quantitas, vnā
cum mellis quantitate ab eo nuncupata, vniuersam Theriaces mas-
sam, & totū ipsius corpus adeo conuenientis, & moderatæ cuius-
dam consistentiæ reddebat, vt diutius exsiccationi resisteret, & in

eadem ferè dispositione perpetuo conseruaretur . Quod pauciori sum-
pto vino (quemadmodum forte Falerni defectu , & inopia , modo
solet à nostris Pharmacopolis assumi) nunc ab aliquibus experien-
tia certa probatum, & cognitum est, euenire non posse: Vel tandem quo-
niam decem illæ mellis à Galeno propositæ libræ , si nostrum reducan-
tur ad pondus, non admodum forsan ab ea quantitate , copiaque mel-
lis, quam Veneti Aromatarij in componendis ijs magnis Antidotis, ser-
uata proportionem desumunt, abesse, recedereque videantur. Neq; verò
temerè, nullaq; ratione motus, & autoritate, talia putabam. Nam quòd
vel nihil, vel parum admodum referre censuerim siue pluri, siue minori
quantitate mellis vtamur in harum nobilium Antidotorū compositione
(dum intra certos, & constitutos ab experientia limites cōtineamur)
in causa fuisse Galenus, & maxima quoque Medicorum illorum pars,
quorum compositiones ab ipso, secundo libro de Antidotis describūtur,
& referuntur. Galenus quidem, eo quoniam libro de vsu Theriaces ad
Pamphilianum in fine, postquam decem mellis Attici libras ad perficiē-
dum hoc opus assumendas esse constituit, illico subdit alijs aliter visum
esse, nonnullisque pauciores, vtputa sex, alijs etiam pauciores ijs, nem-
pe quatuor ipsius libras ad eiusdem Antidoti compositionem assume-
re placuisse. Quorum sententiam cum neque reprobet, neque damnet,
consueuerit autem in simplicium aliorum examine, quæ confectiones
eiusmodi magnas ingrediuntur , minima quæque percurrere ; & ex-
cedentem vini quantitatē aliquando damnauerit : mihi sanè vi-
sus est ipse quoque Galenus non multi fecisse, neque admodum re-
ferre putasse (quod spectat ad rectam medicamenti composi-
tionem) siue pluri, siue pauciori quantitate mellis vtamur, & arida corpo-
ra excipiamus. Vanum siquidem, & risu dignum mihi videtur asserere,
& arbitrari Galenum eorum sententiam, quam libro de vsu Theriaces
ad Pamphilianum adduxerat, altero quopiam libro, non amplius tamē
adductam, immo verò neque etiam tactam, reprobare deinde, damnare
que velle, quemadmodū audio nonnullos ipsum existimasse primo de
antidotis cap. 4. subintelligere voluisse, dum ita scribit . *Propterea tales*
Antidotos Romæ conficiunt non solum optimi quique Medici, sed etiā un-
guentarij. Qui tamen si omnes in earum compositione nunc plus, nunc mi-
nus impingant, eas tamen vsui non inutiles conficiunt. Quasi. s. velit etiā
ibi Galenus innuere tales in mellis copia quoque sumēda peccare, & im-
pingere. Cum tamen ne verbum quidem eo loci de mellis quantitate
protulerit, aut eam verterit in controuersiam; sed de simplicium probita-
te, delectuque in Antidotis multæ mixturæ, & cinamomum recipienti-
bus

bus conficiendis, ibidem disputet, & aperte loquatur; in quibus illi nunc plus, nunc verò minus errabant, & impingebât. Adde quòd nec ibi, nec alibi legimus (quòd ego sciam) mellis Theriacâ ingrediētis quantitātē Galenū ipsum vel, vti defectuosā, & diminutā vel, vti nimīā, & superexcedentem, accusasse; quemadmodum primo de Antidotis in vino fecit; cuius cum plus impendio foret ab aliquo in Theriacam, quam spontè præparauit, iniectum; copiam vnā cum vini qualitate damnauit, vt quæ præcipua foret occasio cur Theriaces illa iam acida effecta, redditaque videretur. Huic eidem consilio, cogitationique meæ fauit plurium Medicorum etiam eorum autoritas, quorum cōpositiones (vt dicebamus) Antidotorum quorundam à Galeno secundo illo de Antidotis referuntur. In cunctis enim ferè Theriacis, atque alijs Medicaminibus ab ipsis ad eundem vsum, hoc est, ad lethalia paratis, nulla certa quātitate præscripta, tantum mellis assumendum esse præcipiant, quantum satis fore videtur. Et ipse Damocrates varias eiusdem mensuras in varijs antidotis proposuisse quoque conspicitur: nunc enim duplum ad totum; nunc autem facta ad arida comparatione triplum; nunc triplum ad totum, ad arida corpora quadruplum, nunc verò solū quod sufficit & satis est, addere, & assumere iubet. Secundo siquidem capite secundi libri de Antidotis, quod satis est, docet in Mithridatica confectione mellis assumi dum ait.

Vini, & mellis adde quantum est satis.

Duplum verò iubet accipiendum in alterius Antidoti descriptione, quā vltimam tertio capite eiusdem libri Galenus apponit. Scribit enim.

Omniū pondus Mel Atticum duplicet.

Deinde triplū ad arida præcipit mellis assumi in illa nobilissima Antidoto, quā Charmes mille (vt inquit) vēdebat drachmis Atticis, nec totā librā tamen dabat emptoribus, gratisq; se dedisse putabat. ait enim

Sed mellis aridis pondus triplum omnibus.

Deniq; triplum ad totum, ad arida verò corpora quadruplum; immo verò diuersam mellis quantitatem, & magis ēt indefinitā, in altera eiusdem Antidoti Charmem dicti, descriptione, compositioneq; iubet assumendam ijs verbis.

Mellisq; libras quinas, & paulò magis.

Etenim si præscripta mellis quantitas referatur ad totum, triplam circiter proportionem habet, si verò tantum ad arida corpora referatur & cōparetur, paulisper quadruplam proportionem excedet, etiam si quinæ solum libra sumantur: Siue scilicet melle velit in dissoluendis liquabilibus vtendum esse, quemadmodum excellentissimus Odus, & Socij credidere

didere, & ex versione Iulij Martiani Rotæ colligitur, quæ sic habet.

Confice hoc pacto. Succos dissolue prius.

in melle calido, atque resina optime.

Siue sola resina melle soluta, cæteris vero liquabilibus vino (subintellecto tamen, sed non expresso) quemadmodum legit Andernachus, forteque melius. ait enim

Sic præpara solutis iam liquoribus.

& melle calido resina fusa probe.

Siquidem neque in duobus alijs Antidotis, siue triplum ad sicca sumat, siue duplum ad totum, vini mentionem aliquam effecisse videtur. Hinc etiam factum fortasse fuit, ut post Galeni tempora, nostroque seculo ab aliquibus vtræque Antidotus maiori fuerit, ab alijs verò minori mellis quantitate parata, sic ut nonnullis quoque placuerit in eadem specierum dosi, ad viginti libras usque ponderales ascendere: alijs autem totidem ferè libras quot species omnes, tam. s. arida quam liquabilia corpora, sunt, in compositione Theriaces assumere, non displicuerit. (quanuis ut parum illis liquidior, ita his modico tēporis intervallo siccissima redita sit). Nullus tamen pondus hoc pertransierit; quòd experimento nimirum cognitum sit, ad probum usum accommodari non posse. Omnia siquidem tum Naturæ, tum Artis opera (ut innuit quandoque Philosophus) proprios quosdam limites habent, & intra certos terminos continentur. Quod verò talem naturam, & mellis Attici conditionem (quoniā scilicet plus siccitati resistat, & minus incrassationi subijciatur), existimauerim occasionem esse potuisse, ut illud idem minori mellis quantitate Galenus præstare posset, quod maiori solet à nostris eiusdem mellis quantitate præstari (si minori tamen eiusdem copia Galenus in sua componenda Theriaca sit usus) in causa fuere Doctissimus ille Ruellius, immo verò Galenus ipse. Ruellius quidem, ut qui tertio suo libro de stirpium natura cap. 21. de Attico melle sic inquit. *Porro cum mel omne temporis spacio resiccetur, Atticum manet humectum.* Galenus autem eo quoniam scripserit primo de Antidotis mel quoddam apud suū Genitorem amarum adeò fuisse, ut illi prorsus, quod nascebatur in Ponto quibusdam in locis, ubi Apes ipsum ex Absinthio congregabant, simile videretur, veruntamen illud & Atticum, & præstantissimum quoque fuisse, sed multo tempore inueteratum, amarum sic euasisse: Quod cū inutile ipsi quoque sit visum, ab obitu Patris ad eum usque diem seruatum à se, longe plus amarum, & nigrius, non tamen crassius admodum, redditum esse. nam id, inquit, *mellis optimi præcipuum indicium est.* Quo loci subdit illico in Eleonte Chersonēsi iuxta regionem illam ubi

monumentum est Protesilai, mel natum esse, Quod quamuis diu easdē conditiones haberet, quas & Hymetium, crassius tamē, & conglobatius processu temporis reddebatur. Quod autem sumpta vini maiori copia pro Theriaces compositione (vt in illa Galeni) potuerit ea consistentiam humidiores ab initio nancisci, nactam verò conseruare diutius, quàm si minori pararetur; ac proinde, quòd non ita facilè sic, sicuti, si sine tanto vino, imminuta etiam mellis quantitate, conficeretur, siccitati subiecta foret; ratio, ab ipsa rei natura desumpta, per se sola fat est, vt id ipsum ostendere, & vnicuique persuadere facilè possit. Siquidem vinum actu longè videtur humidius esse, quàm mel: Vt proinde quanuis etiam non tanta sit auctio vini duobus sextarijs apposis in Galeni Theriaca, quanta forsan esset imminutio mellis in nostra, si reduceretur ad decem libras illas vt ponderales, & fiat illius ad hanc in vtroque collatio; supplere tamen actualis humiditas illa vini, mellis quantitati, siue defectui quoquo modo possit. Cum etiam ob rationem alteram valdè probabile videatur, vt, imminuto vino, mellis pondus augeri debeat. Nimirum quoniam, cum iniijciendum sit Theriacæ vinum non austerum, sed dulce (quemadmodum primo de Antidotis visus est consuisse Galenus) quo. s. medicina gratioris gustus efficiatur; cuius etiā sollicitudo in iis, quæ deglutiuntur medicamentis habenda est, vtpotè in quibus amara multa contineantur; conuenit, vt imminuto vino, auctione mellis, simplicium eorum, quæ in vtraque Antidoto qualitatibus amara sumuntur, ingratitudini consulatur. Denique verò quòd ego putaue- rim decem illas Galeni libras si reducantur ad pondus, proximè ad eam quantitatem mellis accedere, quam Aromatarij nostri in ipsius compositione Theriacæ usurpare solēt, occasionem quoque Galenus præbuisse videtur: Quippè qui, cum sexto de compos. med. secundum genera capite octauo (ni fallor) ignorare se fateatur, & ambigat, vtrum Priores illi Medicinæ professores, qui pharmacorum varias quasdam, & vtiles cōpositiones posterioribus tradiderunt, dum liquidorum Medicaminū quantitatem modo per vncias, modo verò per libras explicant, intelligāt illas ponderales, an mensurales; cum perspicuū sit liquidorum corporū, sicut etiam aridorum, alia grauiora, alia verò leuiora fore; ansam quoq; mihi dubitandi præbuisse videtur, & pariter ambigendi, num decē libras illas, quas in Theriaces compositione sumendas præcipit, pro mensuralibus, an verò pro ponderalibus ipse quoque suscepit. Cur enim si superius allegato loco Galenus *Medicos*, inquit, *in libris de medicamentis accuratius scribere oportebat, quales videlicet vncias, vel libras Medicaminum liquidorum immitti vellent, mensurales ne, an ponderum?* Non icebit

licēbit itidem mihi saltem ambigere, & à Galenō requirere, num ponderales, an mensurales intellexerit eas libras esse? Potissimū verò, cum, nō nullorum cautela, respōsioq; statuentium ex alijs in Theriaca positis, & ponderatis, colligi posse libras illas ponderales esse, non mensurales, fuga quædam, & ea tardissima, quæ rationis vim non effugit, esse videatur. Cum. s. etiam illi, de quibus eo loci Galenus, arida cœtera in eisdem medicamentis assumpta, certis ponderibus præfinire, describereq; cōsueverint. Quia tamen neque (Galeni sententia) certis deinde vel vncijs, vel libris ponderalibus liquida descripsisse, determinasseque visi sunt. Quòd autem sic illæ libræ desumptæ, dum reducuntur ad pondus, parū ab ea quantitate recedant, quæ solet à nostris assumi, diligētius proprio loco monstrabitur. Nunc verò satis erit summatim dicere, consueuisse nunc temporis (conformiter ijs, quæ ad hunc vsque diem Venetijs obseruata sunt) Nostros Aromatarios in vtriusque Antidoti scilicet tã Theriaces, quàm Mithridatios cōpositione, pro singulis tribus triturbabiliū, & aridorum corporum vncijs, libram vnā mellis adijcere. Cuius tota dosis, seu pondus ascēdit ad libras circiter quatuordecim, modica solum aliquando varietate notata, prout inter species & arida, ex liquabilibus nonnulla ab aliquibus (vt quæ cum actu siccissima sint, facilè quoq; cōtundi possint) enumerata, reposita q; pondus specierū adaugent; ab alijs verò liquata, vinoque dissoluta, diminuunt. Cui sanè mellis quantitati vel vndique, vel circiter saltem, decem Galeni libræ, si pro mensuralibus accipiantur, respondere, suo loco, quemadmodum dicebamus, facta diligenti computatione, monstrabimus. Hæc omnia, cum satis mihi probabilia viderētur, vt vel singula per se ipsa sumpta seorsum, aliquibus; vel plura simul pluribus ēt, persuadere possent ab inueterata consuetudine recedendū nequaquā esse. Inter ea tñ id vnū maximoperè mihi probabatur, quòd decē illæ Galeni libræ tã pro pōderalibus q̃ etiam pro mensuralibus indifferenter intelligi, & accipi possent. Vt proindè tota eiusmodi incepta disputatio, controuersia quæ vnum ex illis problematibus esset, quorum neutra pars demonstrari, vtraque verò paribus hinc, & inde rationibus, persuaderi forsan, & ex æquo probari possit. In qua tamen rationum paritate, nos aduersarios nostros eatenus etiam exuperamus, quatenus in ipsa re positi, & cōsuetudinis inueteratæ bona possidentes, satis facturi simus, vt in eiusdem possessione seruemur, & maneamus, si tam rationes illas è medio tollamus, quibus ij probare conātur libras eas ponderales esse, quam reliquas etiam, quæ, vt mensuralibus illis acceptis, ostendunt tanti ponderis esse non posse, quanti mellis est ea quantitas, quam Myropolæ Veneti in compositione Theria-

ces assumere, vsurpareq; solent. Hæc autem huius ambiguitatis occasio, & ratio difficultatis sic explicata, quanquam illico mihi maximo per se probaretur, non tamen adhuc per initia tanti mihi videbatur, ut possem audacter, & palam illam exponere, ac publicè profiteri: Quandoquidem etiam si fundamentum illius ab inducto Galeni loco desumeretur, & ipsi rationi videretur innixum, verebar attamen, ne eiusmodi opinio, & autoritatū earum interpretatio, veluti noua, nulliusque probatoris nominis autoritate confirmata, suspecta pluribus videretur. Verū tamen, postquam eiusmodi ambiguitatem in cæteris etiam à Galeno scriptoribus examinare, & inquirere cepimus, & plurimos, eosq; magni nominis, & estimationis, Medicinæ scriptores inuenimus longè maiorem, quàm decem illæ Galeni libræ significet (ubi. s. pro ponderalibus accipiantur) copiam mellis in compositione Theriaces iubentes assumi, & (quod magis est) in celebri Medicorum Bergomensium Antidotario legimus idem hoc à grauissimis Patribus illis excogitatum ante fuisse: cum. s. ita scribant: *Damocrates, Paulus, & Aetius mellis habent libras decem; quarum pondus (si de mensuralibus intelligatur) ad quindecim ascendit libras; quæ triplam ad sicca proportionem paulisper excedunt*, non amplius hæc silentio digna censuimus, sed audaciores effecti, non sumus veriti sententiam nostram alijs exponere, & eam (saltem probabiliter) sustineri posse profiteri, nec vllas esse rationes affirmare, quæ nos ab ea declinare cogant, aut, quæ sententiā alteram, magis etiam quam probabiliter, demonstrare, persuadere vè possint. Vnde etiam factum est, ut, cum in eiusmodi re nihil ex Galeni sententia certi constitui possit, dignum opere fore censuerimus, si in cæteris etiam probati nominis Medicinæ scriptoribus difficultas eiusmodi examinetur, recteque proinde sancitum, & à præclarissimo Collegio nostro duobus propositis, & electis ab ipso doctissimis viris mandatum esse diiudicauerimus, ut non, quæ Galeni solum, (cum. s. ille videatur incertus) sed, quæ probatorum quoque scriptorum aliorum, qui difficultatem eiusmodi pertractarunt, sententia foret, inuestigarent, & diligenter inquirerent, atque vniuerso Collegio deinde referrent, fidissimeque narrarent. In qua re quanto iuuenis eruditissimus artificio, quanta subtilitate, (ne dicam ingeniosa calliditate) sit vsus, in totius disputationis huius progressu patebit.

Interim sequitur, ut, quibus ego rationib. existimaue rim tutius esse scriptura, quam voce sententiam nostram Præclarissimis Collegij Patribus explicare, potiusque calamo, quam lingua contendere, & pro inueterata consuetudine tuenda, nunc agere, quam breuissimè referam.

Quan-

Quamquam autem ex ijs, quæ superius appolita, notataque sunt, potior vna, præcipuaque ratio, qua nos ad id agendum impulsî, immo verò laceßiti fuerimus, colligi possit: nempe, ne causa talis ante Collegij Patres disparibus defensoribus ageretur: huic tamen & alias quasdam non minoris sanè momenti nunc nobis addere placet. Quarum vna primaque sit: Quòd, cum inducta disputatio sine multorum Medicinæ scriptorum testimonijs agitari, tractarive nequeat: conueniat autem testes adducendos condignos esse, nosque in eorum autoritatibus afferendis fore fideles, & nullo modo mentiri, nec fore solum, sed vt tales etiam ab ijs recognosci, quibus demandatum est ius in huiusmodi causa, quibusque tanquam Arbitris, & disceptatoribus vti debemus. Visum est nobis hæc omnia facilius, & certius haberi posse, si causa scriptura, non ore, seu voce coram Patribus ijs tractaretur: manet enim, quæ scripta sunt, cito volant, quæ verbo dicuntur, illa nunquam veluti non scripta negantur; hæc autem sæpè, quasi non dicta, refelluntur: in illis abscondi mendacia vix, immo verò nullo modo, possunt; in ijs autè, omni in malè purgatas audientium aures culpa reiecta, teguntur mendacia, & vna sæpè, vel addita, vel ablata syllaba, quæ falsitatis inhonestata vitio prolata sunt, veritatis ipsius pedibus, reformata gradiuntur. Vnde etiam fit, vt, cum scriptorum autoritates, & testimonia proprijs ex locis adducta, plerunque, vel quoniam falsò, vel quia non bene in eorum monumenti virtute, qui concioni præsunt, maneant insculpta, sed, oratione continuata, subsequentibus alijs, oblitterentur; haud faciliè possint ab Arbitris, & ijs, quibus iudicandi munus est demandatum, (sibi forsan in hoc satisfacere sæpè cupientibus) vt opus esset, ante Iudicij tempus attendi, perfectiusque recognosci; iure nobis, quibus nihil minus est cordi, quam cæteros velle decipere, eiusmodi disputandi modus arriserit. Altera verò, secundaque ratio fuit, quoniam in ipso sermonis impetu, dicendi; fluxu, plerumque irascibilis Animæ Facultates excitantur; & ipsa vis cogitandi, seu Mens, celeri, sibi à virtute phantastica oblatarum imaginum motu, perturbatur, & sic offunditur; vt ratione facultatis vtriusque concitate, & à proprio statu dimotæ, duplici nomine cogamur impingere, ac aberrare; & in re. s. de qua tractatur, & in ijs etiam, cum quibus agitur: volat enim sæpius (quàmquam nobis inuitis, & vndique præter cōsiliū) ambiguum aliquod, nonnunquam etiam & mordax, sed irreuocabile verbum: quibus omnibus non æqui bonique consulentibus illis, in reprobum sensum acceptis, occurrit, vt hinc rixæ postmodum, iurgia, contumeliæ, & apertæ nonnunquam, sæpè etiam occultæ inimicitiae consurgant, & oriantur. Cum itaque veritatis inuestigatio paca-

to egeat animo, & omnis disputatio ab odio, & a cunctis animæ perturbationib. libera prorsus esse debeat, & aliena: Qua ratione Pythagoras discipulis suis mādabat aliquando, vt neq; cerebrum, neque cor ederēt: Quasi diceret, & doceret eos ad veritatis indagationem, neque Mēte cogitationibus perturbata, neque ea vi, in qua irarum æstuat ardor, à sua sede dimota, & cum priori confusa; sed vtrisque pacatis, accedere semper & moueri debere; placuit nobis amicissimè tractaturis, hoc potius, quàm altero proposito sapius à multis, disputationis genere vti. Postrema denique ratio fuit; quoniam, vt ea, quæ disputantur orando, vix vllam permanentiam habent, sed in quodam transitu posita, cito volant, & præterita potius, quàm præsentia vocari, censeriq; solent; ita quæ scriptis, & altero hoc disputandi modo traduntur, diu (saltem pro legentiū arbitrio, voluntate quæ) permanentia, veluti præsentia sumuntur, & in præteritorum numero non recensentur. Iam verò sicuti armonia, dum præsens auribus nostris illabitur, vehementius afficit, quàm dum præterita cogitatur; ita etiam magis, exactiusque ad veritatem agnoscendam ea faciunt, & mouent, quæ scriptis (quoniam scilicet vt dicebamus veluti præsentia sint) quàm ea, quæ siue oratorijs, siue Philosophicis disputationibus, verbo traduntur. Cum enim natura comparatum sit (quemadmodum sapientissimus quidā vir dicebat aliquando) vt res ipsæ multo maiorem, quàm earum nomina, vim habeant: Quæ scriptis illustrata sunt, veluti vitam concipientia, rebus ipsis proximè accedunt; è contra verò quæ verbis; nominibus vtiq; proximiora, quam rebus, existunt. Atque tot non solum excusationis cuiusdam gratia dicta voluimus; sed propter illos etiam, qui nobis imposuere, quòd non rationum euidentijs; aliquibus, sed aliorum precibus, & quorundā seplasiariorū monitis, quorum res in discrimen adductæ videntur, veterem cōficiendi talem apud nostros antidorum, componendiq; normam, liquidis potius vsuri verbis, quàm solidis argumētis, aut probatorum scriptorum autoritatibus, & testimonijs, tueri velimus: tum etiam, vt cum illis amicè quoq; tractemus, quibus hic respondendi modus non probabatur, & quibus insuper partim superfluus (cum scilicet illud idem oratio, sermoq; præstare, ex eorum sententia, possit) partim etiam insuetus, & odiosus, immo verò (quòd magis est) detestabilis, & execrabilis videbatur. Sed iam tempus est, vt ad rem, & primum punctum ex tribus in hoc difficultate propositis accedamus.

*Duas in proposita difficultate præcipuas opiniones reperi-
ri, duasq; nunc temporis à nobis potissimum
esse considerandas. Cap. III.*



Vanquam plures in eiusmodi controuersia tùm recen-
tiorum, cùm etiã veterum Medicorum sententiæ
reperiantur; & præter enumeratas ab aduersarijs, pos-
sent & aliæ de varia mellis quantitate sumenda pro
compositione Theriacæ opiniones adduci: cum (si-
cuti superius innuebamus) neq; defuerint, qui longè
minus quam decem illæ (quomodocunque sumantur) Galeni libræ si-
gnificent, mellis, ad talis antidoti compositionem assumi posse credide-
rint: iamq; Nos ex eiusdem Galeni relatione dixerimus alios maluisse
sex, alios etiã quatuor vniuersæ cõpositioni mellis ipsius libras inij-
cere, & folis ijs arida, triturablelia q̃ue corpora excipere, nec non cum cæ-
teris omnibus liquidis in vnitatem redactis, totam ipsius Theriacæ mas-
sam conficere, & conformare: cumq; doctissimus Rondelletius. 33. cap.
sui libri de ponderibus medicamentorum varias etiã nonnullorum
quorundã sententias referat, qui in Antidotis conficiendis, diuersa, multi-
pliciq; censuerint quantitate mellis vtendum esse. *putant enim*, inquit,
Medicorum aliqui pro qualibet illius libra, binas pulueris, seu specierum
uncias inijci posse, alii verò tres, alij quatuor, quidam etiã quinque, vel
sex, alij denique septem, (qualis forsan fuit Nicolaus, quo loco Galeni à
Rondelletio, vel potius à Typographo nuncupati, reposito, mendum in
litera facile corrigetur.) Quãuis, inquam, plures, & variæ possent in hac
difficultate Medicorum sententiæ referri. Nos tamen breuitati modo cõ-
sulentes, quibusdam illarum veluti longè à Galeni, immo verò potiorũ
omnium Medicinæ scriptorum mentibus, alienis, omnino posthabitis;
coeteras alias ad duas præcipuas atque potissimas tantummodo redigē-
das (quantum, scilicet ad nos attinet) esse censemus, hoc est ad vnã il-
lorum qui decem; & ad aliam quorundã, qui circiter quatuordecim pa-
rumve minus, aut plus, aliquando mellis libras in talis Antidoti confe-
ctione sumendas esse præcipiunt. Ad quod efficiendum duplici quoque
ratione mouemur. Quarum vna, primaq; est; quoniam earum opinio-
num nonnullæ pro diuersis ab aduersarijs acceptæ (si diligentius exami-
nentur, in vnã facile cadunt, & ad vnicam reducuntur: Ita siquidem
contingit in, tertia, ab eruditissimo Iuene primo suæ disputationis ca-

pitè recensita & enumerata sententia; quæ sane parum admodum ab ea quam secundo loco disposuit in ipsa mellis quantitate recedit, immo verò cum illa ferè coincidit. Quàm tamen vafre, artificio mirabili, & ex industria ab eodem arbitror fuisse seiunctam & separatam ab illa, quò, scilicet, consueto nostro parandi modo non parum existimationis, & autoritatis eriperet, atque nulla, nisi Georgij Melechij autoritate suffultos Venetos Aromatarios ostenderet compositionem ipsius Theriacæ prosequi, moliriq; consueuisse. Cum tamen constet (vt priori loco monstrabitur) ex memoratis autoribus secundæ classis, plerosq; fuisse (ni dicam omnes) qui quatuordecim circiter mellis ponderalibus libris; immo etiam qui, additis ijs vncijs quinque, & (vt minima non præteream) duplici drachma, prædictam (parum ab ijs, qui in tertia classe recensentur in pondere differentes) conficiendam Antidotum constituerint. Altera verò, secundæque ratio est; quia non versatur inter nos difficultas circa modicum mellis, in quo fortasse nonnulli secundæ classis, ab ijs, qui tertio loco dinumerantur, euariant; sed circa longè maiorem ipsius quantitatem, tertiamque ferè partem imminuendam, & à consueto pondere detrahendam. In qua re differunt ab ea prima reliquæ tres eodem loco seiunctæ, & explicatæ sententiæ. Ad binas igitur vniuersas horum opiniones tutam redigentes, distinctius modo dicamus vnâ illorum esse, qui præscripto ex Andromacho seniori specierum, hoc est, triturbilium, & aridorum corporum pōderi, triplum circiter mellis addi (Galenum sic interpretantes) sunt arbitrati; vel ad omnium pondus, hoc est, tam aridorum, quàm liquabilium corporum vnâ sumptorum, circiter duplum. Alteram autem eorum, qui triplum ad totum, aut quadruplum mellis ad species, (quod idem est, ac pro singulis tribus puluerum vncijs libram vnâ mellis assumere) commisceri debere (neque forsan à Galeno recedentes) existimarunt. Est enim illud (quod huic nostræ bipartitæ diuisioni maximè videtur accommodatum) supponendum, & nūc animaduertendum differre parum siue dicamus triplum ad totum, siue quadruplum ad species, triturbataq; corpora, siue tres specierum vncias pro libra singula mellis. Diligenti siquidem facta computatione dignoscemus inter primum, & duos alteros, qui in vnum omnino coincidunt, componēdi modos, vel nullam, vel modicam saltem aliquando differentiam in ipsa mellis quantitate reperiri. Quod, si contingit, non alia sanè ratione contingit, nisi quoniam ex ijs, quæ (in ancipiti ferè posita) nata sunt, vt vtroque modo præparari possint, hoc est, tum vino dissolui, tum verò contundi, nonnulli ex nostris Aromatarijs, vt dicebamus, aliqua

conterunt, & inter species enumerant; alij verò dissoluunt, & inter humida seu corpora liquata recensent. parumper igitur auctis speciebus aliquando augetur & mel; imminutis verò minuitur. Cæterum varius hic præparandi modus non est in ipsa compositione Theriaces ex toto damnandus; cum in aliquibus æquè bene perfici possit, (quemadmodū rectè doctissimus Odus, & socij notarunt) & apud veteres etiam variè nonnulla præparari, & ad ipsius Antidoti compositionem vsurpari videantur. Siquidem aliqua ab Andromacho, & à Damocrate colliquabantur, quæ Galenus tritura contundit. Quædam autem è contra Galenus vino macerabat, & emolliebat, quæ nec à Damocrate, neque ab Andromacho macerabantur. Immò verò nonnulla ab ipso quoque Galeno vino madefacta soluuntur, quæ nostri modo contundunt cuiusmodi sunt Napi femina, & Thlapsis; quæ tamen ambo prius ab eodem (vt ipse fatetur) trituratione, contusaque ad eundem usum assumebantur. Ita quoque Galenus Myrrham, & Crocum, vino macerata leuigabat, vt primo de Antidotis cap. 15. scriptum habetur. Quod in croco Damocratem obseruasse quoque colligimus ex illius Antidoti descriptione, quam sanguinis infra, supraque prorumpentis impetum sistere, cohibereque docuit: dum ita. s. ex Andernachi versione scriptum reliquit.

— *Sic para; mundum Crocum*

Perfunde vino dulci, & albo Cretico;

Duos finiens vnà dies vt plurimum;

Quum molle cernas, fragile, mox inditum

Mortario, cochleari leuiga, &c.

Nostri verò Crocum omnes, Myrrham autem nonnulli cõtundunt, neque vino perpetuo dissoluunt. Multo verò minus eiusmodi varietatis præparationis in casu nostro, (nimirum quatenus ad Antidoti consistentiam attinget) est habenda sollicitudo; tum quoniã minima ex vno, vel altero administrandi modo, confurgit in mellis quantitate varietas; tum etiam quoniam vbi, speciebus adauctis, mellis pondus paulisper augetur; vini deinceps quantitas modicum etiam tollitur, & imminuitur. Sicut è contra contundendis, in vino maceratis, & non contusis, vt uini copia paulisper augetur, sic mellis quantitas imminuitur. Cum itaque duæ præcipuæ sint in eiusmodi ambiguitate, sententiæ; vtraque, proprios fautores (& viros quidem insignis autoritatis, & maximi nominis) habuit. Priorem etenim, illorum. i. qui Galeni dictum, prout sibi videtur, interpretantur, & libram vnã tam liquidis, puta vino, & melli, quam aridis corporibus inferuire contendentes, & existimantes, decem illas ex Andromacho iuniori constitutas à Galeno libras, ad certum drachma-

rum

rum numerum (.i. noningētarum & sexaginta) reducere, non pauci sequuntur; de quibus eruditissimus Iuuenis in eo primo capite satis videtur esse loquutus. Alteram autem, illorū. i. qui prædictas, à Galeno quidem, sed non ab Andromacho determinatas, libras, diuersas à ponderalibus esse, ex eiusdem Galeni placitis colligentes, mellis ipsius quantitatem quatuordecim nostris ponderalibus libris, vncijs quinque, vel circiter determinatam, propositis ab Andromacho speciebus, optimè respondere (multiplici, & aliàs adducenda ratione) cōstituere; plures quoque neque minoris existimationis, & dignitatis, quam priores illi, sequuti sunt. Hos igitur omnes, tam priores. i. quam posteriores etiam, nos diligenter examinabimus; & prioribus ab eruditissimo Iuene pro suæ, & sequacium opinionis confirmatione dinumeratis, & adductis autoribus, posteriores alios è diametro paulò post hæc opponemus: vt probabilioribus rationibus ijs ab autoritate desumptis, per initia quoque propositis, cum fautoribus opinionis oppositæ ex æquo certemus; ac proinde statim hæc prima disputationis huiusce capita inspicientibus ostendatur, & constet, nos in hac rationum paritate, vicisse; quoniam, scilicet, nullis vrgentibus, nec aliquid plus aduersarijs ad eorum confirmandam sententiam nobis, habentibus, in euitabili quadam necessitate consequitur, vt vetus ea consuetudo permutanda nō sit. Ad hoc enim semper tota nostra dirigetur oratio; nimirum, vt difficultatis, & ambiguitatis eiusmodi probabilitatem primo demonstremus, vt, ea supposita, & demonstrata, deinde tot illustrium, & præclarissimorū Patrum iudicium pro nobis declaretur, & stet, consuetudo tota probeatur, & nihil penitus innouādum, aut permutādum esse decernatur. Quod tanto magis à vobis (ad quos iterum vertimur, integerrimi Patres) consequuturos esse non diffitemur, quanto certo scimus vndique vobis, & uniuerſis, ad quos hæc nostra peruenerint, perspectum fore futurum semper nos aduersarios nostros, siue in scriptorum, quorum fulcimur autoritatibus, dignitate, & existimatione; siue in rationum euidentijs vis omnis posita fuerit, & ad alterutros collatio fiat, longè lateq; fore superaturos. Sed iam ad eos qui priori sententiæ fauere, recensendos, examinandos, & recognoscendos autores accedamus.



Fautores prioris opinionis ab Aduersarijs adducti, recensentur, et examinatur; ubi nonnulli, qui sententia nostra non autem oppositæ subscribere, recognoscuntur. Primoq; Syluius, & Fuchsius explicantur. Cap. IIII.



Vindecim, Doctissimus Iuuenis primo suæ disputationis capite, præter Galenum, & Andromachum, scriptores enumerat, & veluti certos opinionis illius, quam sequitur, ipse, fautores apponit, Syluium, scilicet, Fuchsium, Rondelletium, Vvecherum, Foesium, Franciscum Alexandrinum, in suo Apollo, Marantam, Romanos Medicos, Bononienses, Florentinos, & Bergomenes (in Antidotario tamen latino idiomate impresso; qd̄ verū, inquit, Bergomensis Medicorum Collegij est Antidotarium) Hieronymum Calestanū Aromatarium, Ioannem Paulum ex Spinellis: A quibus cum parum etiam discesserint Marcus Odus, & Socij, hos inter suos, (& iure quoque) recenset. Postremo Syluaticum, in eadem classe, leui quadam coniectura, reponit. Ceterum Nos, cum inter illos, aliquos primū suspicaremur, ex eorum esse numero, qui sententiam nostram sequuti sunt; deinde verò certiores effecti, furtim hos ipsos surreptos nobis, inter suos prauè, fuisse repositos dignouerimus: opere precij facturos esse censuimus, si, diligentius, quàm ab eruditissimo Iuene factum fuerit, singulas singulorū sententias ex proprijs locis hauserimus: & quos ex prænumeratis autoribus, è nostris fuisse sublatos recognouerimus, iterum, illos (proprijs appositis verbis, locis adductis, nullos decipientes,) veritati, suoque priori candori restituerimus. Quod cum vnico capite, sine tēdiosa prolixitate, præstari nequeat, iustum verò sit, vt eodē ordine, & eadem serie, qua dispositi ab aduersarijs in ea classe, collocati que sunt, à nobis inspiciantur, quos, scilicet, nostros ab alijs ex toto seiungere, & recognoscere valeamus: vniuersam tractationis huiusce partem in proportionata quædam capita seiungentes quæso, iam in præsentī capite (ijs quæ de Syluiō, Rondelletio, Foësiōque inferius, & priori loco coniunctim dicturi sumus, modo posthabitis) à duobus primò propositis hoc est, à Syluiō, & à Fuchsiō principium diligentioris huius examinis efficiamus: ac primū à Syluiō, tanquam à primò recensito, nunc ordiamur.

Hunc acutissimum sanè virum, & in hac de medicamentorum recta parandi ratione disciplina, versatissimum, Galeni doctrinæ propugnaculum, & sectatorem eius acerrimum (quemadmodum sua cuncta, sed

præ cæteris alijs anatomica scripta demonstrant.) Hunc, Hunc inter
eos eruditissimus Iuuenis, qui propriæ, suiq; ipsius opinioni fauere dicū-
tur, primò recenset, & in prima sede reponit. Et (si sic esset) iure quidē.
Sed, bone Deus, quanto decipitur. Hunc statim nos recognouimus no-
strum esse, nostra tueri. Quòd, vt omnibus sine suspitione mendacij per-
suadere, demonstrareque valeamus, oportet, vt sententiā huius, pro-
priaque verba, signato loco, nec non (si Dijs placet, & opus erit) signa-
ta pagina, recensere, transcribereque studeamus. Syluius igitur quarto
libro suæ Methodi de compositione Medicamentorum (incipiam ab eo
loco, qui Iuuenem eruditissimum fortè decepit.) Theriaces composi-
tionem, in qua non Solius Andromachi Iunioris, sed senioris, & Patris, ac
nonnullorum quorundam aliorum, puta Demetrii, vniufque sæpè Da-
mocratis meminisse videtur, accuratè descripsit; sicuti de Damocrate
passim in quorundam simplicium explicatione conspicitur: De Deme-
trio verò præsertim in prima pastillorum scilliticorum determinatione;
dum inquit. *Pastillorum scilliticorum drachmæ quadraginta octo, Andro-
machus. Sed Demetrius tempore Galeni factus etiam Archiatros, tantum
drachmas quadraginta sex miscebat.* Syluius, inquam, eo loci, post-
quam omnia, quæ ad aromata, & alia cuncta eiusmodi Antidoti com-
positionē ingredientia, pertinent, perfecit, & explicauit, tandē ad mellis
quantitatē præsignandā accedens, hæc ait, *mellis Attici drachmas centum
quingenta, seu libras decem. Andromachus.* Ex hoc, arbitror, loco dedu-
xit Aduersarius noster doctissimū Syluium, & in omnibus diligentissimū,
decem mellis libras pro cōpositione Theriaces determinasse. Cui si con-
cessero totum, & ego, deinde verò quæsiero, cū duplex apud Antiquos,
potissimumque Romanos (vt suo loco monstrabo) libra daretur, Men-
suralis vna, quæ liquoribus primo, deinde verò nonnunquam aridis et
corporibus inserviebat: altera verò pōderalis, quæ primò ficcis corpori-
bus, postmodum autem aliquādo liquoribus accommodabatur; de qua
nam putet Syluium intellexisse cum dixit, *mellis attici drachmas cētum
quingenta, seu libras decem. Andromachus?* Statim ipse (ni fallor) in-
trepide respondebit, de Ponderali. Si verò dixerò, cur non de Mensura-
li? hic iterum respondebit, eo quoniam colligit libras ex drachmis, &
nunquam legitur apud Antiquos drachmarum nomine mensuram ali-
quam præsignari, sed bene pondus. Verum vbi rursus obijciam Syluiū,
ex eo drachmarū numero, nullo modo potuisse decem libras illas effice-
re; cum centum quingenta drachmæ constituent libram vnam, semi-
libram, & drachmas sex, quid respondebit? Rursus (arbitror) exem-
ploque respondebit Syluium fuisse deceptum, & in duobus ijs potissi-
mè

me fallum: primò quia textus illius mendum non agnouit; secundò quoniam male numerum drachmarum illarum ad decem libras redegisſe videtur, cum ex nullo Galeni loco drachmas eius pòderi ſinuenire liceat, vt earum cētum quinquaginta decem libras conſtituant. (tot. n. & talia de Syluiò, Rondelletio, & Foefio, primò eiufdem diſputationis capite apud aduerſarium ad verbum ferè ſcripta leguntur.) Sed (vt conuertar ad te mi cariffime) dicas mihi, ſi placet, quomodo tu ex incerta Syluij autoritate, & incerto loco, in quo, te iudicè, bis errauit, tam fiducier colligis præſignatam à Syluiò mellis quantitatem, non aliam eſſe, quàm à te conſtitutam? decemque libras illas ponderalibus reſpondere? Cur nō eadem ratione, decem inquis, & octo mellis vncias, & drachmas ſex, quæ reſultant ex centum, & quinquaginta drachmis, ab illo propoſitis, Syluium pro mellis Theriacam ingrediētis quantitate deſcribenda poſuiſſe? cur drachmas, recensitas, etiam ab illo reſpuiſ, & libras accipis? Quoniam, inquis, Syluius errauit. Sed heu mi Sylui? Qui nam tibi nūc imponuntur errores? Nec mendum textus agnoſcis? neque prima computandi rudimenta calles? Quam fidem in alijs (iſtis de te ſuppoſitis) poſteriores accipient? nullam, ſanè nullam. Verùm quid audio? Conſide Sylui, quia veritas conculcata, ſe ipſa reſurgit. Non erraſti, errarunt ipſi. Et (vt de mendo recognoſcendo nunc ſileam, altero commodiori loco dicturus) in drachmarum reductione, non deliquiſti, quippe, qui ſcribas. *Drachmas centum quinquaginta, ſeu libras decem*, non autem, vt iſti referunt, *ideſt libras decem*, An forte neſciunt, ij particulam, *ſeu*, diſiunctiuam eſſe, qua iungimus ea, quorum ſæpius alterum non utrumque affirmamus? *Ideſt*, autem eſſe particulam explicatiuam, qua non alterum, ſed indifferenter vtrunque tanquam duo non diuerſa perpetuo ſignificamus? vti que neſciunt, aut ſaltem neſcire ſe fingūt. Non eſt igitur, vt ex hac autoritate locoque Syluij (niſi melius intelligatur) certam adhuc mellis quantitatem pro compositione Theriaces vllò modo colligamus: cum æque potuerit de menſuralibus, ac de ponderalibus libris, intellexiſſe. Quòd ſanè tanto magis affirmare, & probabili ſatis cōiectura, perſuaderi poteſt; quanto conſtat Syluium (quem paulo poſt dicam noſtrum,) & libras, & vncias, & (quòd aduerſarijs noſtris admodum graue videtur) drachmas etiam menſurales eiſdem libris dignouiſſe, conſtituiſſe, declaraiſſe, & à ponderalibus diſtinctas eſſe, docuiſſe. Si quidem tertio librorum eorundem in fine iam de ponderibus, & menſuris, quæ Galeno præcipuè, & ætatis noſtræ medicis etiam, in vſu frequentiori ſunt, loquuturus; vbi prius de pòderibus tum Romanis, cum etiam Græcis Atticis ſermonem abſoluit, ad explicandas Romanòrum men-

furas accedens, de Culeo, tanquam omnium ferè mensurarum earum maxima, scribit eum capere libras mensurales mille sexcentas. Deinde verò paulò posterius de Congio loquens, formalibus ijs, ita scribit. *Congius capit sextarios sex Romanos, 6. de comp. phar. p. G. seu libras decem.* Subdit verò de Sextario sic. *Sextarius, quia est Congij sexta pars dictus, capit heminas duas, seu libram, & bessem, id est, octo uncias; siue uncias viginti, mensurales, non pōderales. Nisi liquidorum quem metieris, ut mel grauißimum, oleum leuißimum, vinum (præsertim fuluum, nam nigrum crassius, & grauius) medium expresseris: & sic tot sextarij sunt explicandi, quot sunt res metiendæ.* Sed ut ad minimas, siue minores mensuras, & drachmas etiam deueniamus; audite quæso, quid autor idē paulò posterius, vbi de liquidorum mensuris copiosè differit, & vnicuique mensuræ pondus in tribus liquidis ijs corporibus Oleo, vino, & melle, longè diuersum refert, & confert, scriptum reliquerit. *Acetabulū, inquit, sesquiciathum capit, seu uncias duas, & drachmas duas.* Neque timendum est ipsum de mēsuralibus intellexisse; tum quia de talibus loquutus erat in mensuris alijs; tum etiam quoniam eiusdem mēsuræ pōdus in vnoquoque trium propositorum corporum liquidorum expendens, & eodem loco paulò post explicans; diuersas, & alias ab illis, ponderales uncias, & drachmas inuenit, & in omni liquido corpore certò cōstituit. Siquidem. *Acetabulum, addit, olei pēdet fescunciam, & drachmas tres, seu drachmas quindecim. Vini autem uncias duas, & scriptula duo; mellis uncias tres, & drachmam vnā.* Hæc ille. Quapropter Nos, admodum probabiliori coniectura, putare, & arbitrari debemus Doctissimum Sylium decem librarum earum nomine, potius mensuræ, quam ponderis libras intellexisse; sicuti quoque voluisse credimus, & accepisse Galenum. Atque tot, vt Sylium inter eos, qui vestræ opinioni subscribere, reponi non posse, multo quæ minus in fronte, prima quæ sede collocari debere, demonstremus, dicta sint satis. Nunc superest, vt ex nostris esse probemus, & in mellis hac præscribenda quantitate, nobiscum sentire, iam declaremus. Porro Sylius noster (Nunc enim sic eum appello) cum allegato loco superius Theriacæ compositionem ex Andromacho quidem, sed ex alijs etiam autoribus seiunctim positis, & ijs, in quibus differunt, explicatis, & adnotatis, excerpserit; nec nō decē mellis eas à Galeno constitutas libras indeterminate saltē, neq; .s. mēsurales, neq; pōderales, cōstitutas esse cognouerit; exactius quātitatē eandem eo loci determinare, & explicare despexit; aut saltem non admodū in cuius ordinis, cuiusq; rationis ex libræ forent, inuestigādo laborauit. Siue quoniam tacitè forsan consuetudinem approbare voluerit: siue potius (vt

arbitror) quoniam ipse non admodum ante, se ipsum iam exposuerat, & explicauerat. Siquidem in Antidoto Mithridatio paulo superius ex Andromacho ab ipso descripto, ad internos omnes affectus, & deleteria, in quo tum gummi, tum lachrimae, tum liquores, & opium recipiuntur, mensuram mellis accurate praescripsit, & qualis ea futura foret in ipsa Theriaca, determinauit: Postquam etenim ibi cuncta recensuit, & explicauit; de melle sic ait. *Mellis Attici optimi, quantum sufficit, hoc est, libram unam in pulueris uncias tres; vel si delicatius vis, sed minus efficax, in pulueris uncias duas.* Neque verò contentus ijs, sed, ut eodem modo nos doceat se in compositione Theriaces fore postmodum intellecturum, ita subdit. *eadem est ratio mellis, seu sacchari quantitatis, & puluerum in ceteris Antidotis.* Quid clarius? Quid lucidius in Syluio? Nōne nobis doctissime Iuuenis hunc, quem furto substuleras, & inter tuos repositueras, cōcedes in posterum, ut inter nostros enumerare possimus? Vtique. Paulo sanè longiores oportuit nos in Syluio recognoscendo fuisse; tum quoniam maximus hic in Galeni doctrina vir, maximae auctoritatis, & estimationis existit; tum etiam quoniam multa in eiusdem explicanda sententia circa librarum, & unciarum diuersitatem, lucidius à nobis declaranda suo loco, praelibare primum, ac rudi quodam veluti modo delineare, & pro nonnullis alijs recognoscendis autoribus, quasi praemittere, ac praesupponere necessum erat. Nam (ut summatim dicā) paucissimos Aduersarij nobis scriptores opponunt; qui cū Galeni Theriacam ex Andromacho rescribentes, decem libras quoque mellis assumēdas esse determinent, ita determinēt, ut constet ipsos libras illas ponderales, non autem mensurales esse voluisse: cum ramen omnes ex altera parte, qui mellis copiam, & quantitatem iam enarratam, circiter. s. quatuordecim librarum ponderalium, aut parum quid amplius efficiūt, determinatē demonstrant se intellexisse Galenum (nisi penitus ab ipso recedere profiteantur, quod admodum certè raro, contingit) libras illas pro mensuralibus accepisse: nempe cum mellis mensura librarum decē, aut vnius congiij, ponderi circiter librarum quatuordecim correspondeat, ut euidentius, diligentiori que facta computatione suo loco monstrabimus.

2 Sed Syluio nostro relicto, videamus an Fuchxiū, qui secundo loco succedit, aliqua saltem ex parte, recognoscere valeamus. Hunc sanè vidimus, & in Andromachi senioris describenda Theriaca legimus sumere & ipsum mellis libras decem, quemadmodum Galenus aiebat, sed cum non explicet quas libras intelligat, ponderales nimirum, an mensurales, existimamus, & ipsum eidem subesse modo conditioni, cui dice-

28
bamus hucusque Galenum fuisse subiectum, ut proinde, quicquid de
Galeno statueretur in posterum, illud idem quoque de Fuchxio (immo
verò de reliquis ijs, qui solam Theriacæ descriptionem ex Galeno trā-
scribunt, nec aliquid amplius de melle determinant) iure merito con-
stitui possit. Veruntamen ubi diligentius eiusdem autoris nonnulla cō-
spicimus non admodum nobis præter rationem fore videtur, existima-
re Leonardum Fuchxium in hac intelligenda, præfiniendaque mellis
quantitate, aut incertum omnino fuisse, aut libras illas pro ponderali-
bus non accepisse. Incertum, & ambiguum in huiusmodi re fuisse pro-
pterea. (nec sine ratione) conijcimus, quoniam in ijs annotationibus, &
simplicium quorundam considerationibus, quas post medicamentorū
singulas compositiones addere statim, & apponere solet; ubi de vino,
tantum dixerat sumendum esse, quantum pro liquoribus dissoluendis,
& gummi videbatur fuisse satis; de melle nihil, ne verbum quidem in
medium affert; cum tamen in varijs alijs Antidotis triplum mellis nunc
absolutè, nunc autem ad species (quanquam forsan specierum nomine
corpora quæque nonnunquam intelligat, ut in Theriacæ diathessaron
Ioannis Mesuæ Damasceni descriptione, & eius annotatione colligi-
tur) sumendum esse præcipiat. Plus verò mellis, quam sit mensura decem
librarum ponderalium intellexisse, probabili quadam, & non spernenda
coniectura puto ex adnotationibus eius in Aurea Alexandrina Nico-
lai Myrepsij deduci posse, dum inquit. *Mellis quod satis est, triplum
verò mellis sumitur. Quod semel, addit, meminisse sufficiat.* Quo fit ut
eum illico post, Theriacæ compositionem apponat; non ita præter ra-
tionem mihi videatur asserere, cēsuisse Fuchxium Triplum etiam mei-
lis in Theriaces compositione sumi, usurpariq; posse. Cum certo quoq;
constet eundem non libras solum, & uncias, sed drachmas etiam men-
surales concessisse, & apposuisse; Quandoquidem præter multos alios,
est locus vnus ad hoc satis apertus & clarus in ipso, nimirum, num. 174.
dum explicat ecligma Socratis ad rabidos à Nicolao Myrepsio descri-
ptum, in quo iubet Nicolaus quartam cotylis partem vini veteris inij-
ciendam. Fuchxius autem hæc ait ad verbum. *Cotyle est duplex, Attica
nimirum & Italica. Attica habet uncias italicas, hoc est cornu libralis,
seu mensurales nouem. Italica cotyla non est nisi libra mensuralis. Quam
si intellexit Nicolaus; quartam partem eius constituent uncie mensura-
les tres. Sin de Attica intelligendus venit Nicolaus, quarta pars pende-
bit uncias duas mensurales, & drachmas duas.* Veruntamen quidquid
sit de Fuchxio; de quo probabiliter tantum hæc dici posse putamus; &
& quem (ut fateamur ingenuè) potius inter ambiguos, & incertos adhuc
quam

quam inter certos illius opinionis authores, qui decem mellis libras acceptas pro ponderalibus, in Theriaces compositione suscipiendas esse voluerint, reponi posse suspicamur. Quippe qui cum in Aurea Alexandrina triplū mellis absolutè, nulla. s. ad species habita, aut explicata ratione sumēdam esse docuerit, immo verò (quemadmodum dicebamus) id ipsum intelligendum in omnibus alijs (sub verbis illis, *quod semel meminisse sufficiat*) significare voluerit: in Mitridatio Myrepsij postmodū è contra triplum inquit ad species iniiciendum, & in omnibus addit eādem proportionem (sibi non constans) specierum, & mellis fore seruandam: ac tandem in Theriaca diathessaron Mesues ex quatuor illis simplicibus, myrrha. s. Gentiana, baccis Lauri, aristolochia quæ rotunda cōfecta, triplum non solum ad species, sed etiam ad totum (cum in ea. s. myrrha quoque contundatur) cum Myrepsio præcipit accipiendum. Adde quod si in præscripta ex Andromacho ab ipso Theriaca seruādis esset propositus in Mithridatio specierum, & mellis ordo, sic vt triplum ad species assumeretur; Tunc decem illæ ab eodem propositæ libræ mellis pro ponderalibus intellectæ, nullo modo sufficerent; etenim plus quā vndecim ad vniendas species (vti supputando cognoscitur) requirerentur. Quidquid igitur de Fuchxo sit, veniamus ad alios.

Quæ censeant Rondelletius, Uuecherus, Foehxius, Franciscus Alexādrinus, & Bartholameus Maranta considerantur ubi nonnulli, reliquis vt ambigujs, & incertis præteritis (sed vnus potissimum Vuecherus) tanquam opinione nostræ fautores, recognoscuntur.

Cap.

V.



Ecognito Syluio, nec non de Fuchxio nonnullis adductis, quæ totam sententiam eius reddunt ambiguam; superest, vt iam accedamus ad alios examinandos auctores ab aduersarijs nobis oppositos; & vt in præsentī capite quinque subsequentes, hoc est, post Syluium, & Fuchxium statim enumeratos, percurramus, & videamus, an inter hoc etiam, ex nostris aliquem recognoscere valeamus. Ordiamur autem à Rondelletio.

3 Huius sentētiā veluti ex quodam eius Antidotario desumptam, ab eruditissimo Vidua superiori loco, nimirum primo disputationis il-

lius

huius capite, noui fuisse relatam; cum. s. ita scribat. *Gulielmus Rōdellētius, Ioannes Iacobus Vvecherus, Anutius Foesius in suis Antidotarijs, &c.* Ego verò propterea, quanta potui diligentia sum vsus, vt librum illius Antidotarij cognoscerem, quò deinde rectius locum eundem inspiciere, examinareque possem: Attamen, quantavis adhibita cura, siue cum amicis nostris professoribus Medicinæ, siue librarijs, & bibliopolis, nunquam ab eorum aliquo certi quidquam nobis renunciatum, aut explicatum est. Scimus Rondelletium in fine libelli de pōderibus Medicamentorum nobilis huius Antidoti compositionis castigationē polliceri, & asserere se commodius illam in officina Pharmacopolarum, quam parabat eo tempore, apponere, docereque posse. Quanquā paulò etiam ante in eodem capite videatur innuere, separato sermone, & proprio, vt inquit, opusculo, exactam castigationem eiusdem, & rectum cōpositionis modum se traditurum: Vtrum autem hæc aliquando siue seorsum & separatim, siue cum alijs autoris eiusdem operibus, in lucem prodita, & publica facta fuerint, nos ignorare fatemur; nondumque talia ad manus nostras peruenisse libenter asserimus (non enim omnia vidimus omnes) Addimus tamen in officina Pharmacopolarum nihil nos ex ijs, quæ spectant ad talis Antidoti compositionem, siue (vt vocat ipse) castigationē, adinuenisse. Vnde factum etiam facile fuit, vt in eam sententiam, quam nobis probabant omnes, adduceremur, & hanc pollicitam à Rondelletio Theriacæ castigationem, desiderari, nec in lucem adhuc prodijisse crederemus. Vt ratam autem & fermè certam opinionem hanc deinceps haberemus, effecit Iouberti discipulus, virq; doctissimus ille Ioannes Paulus Zangmaister in præfatione Pharmacopæe Præceptoris eiusdem sui Iouberti. Is enim vbi cathalogum eorum, qui Pharmacopeas scripsere, collegit, de Rondellerio scribit in eius officina Pharmacopolarum posse nonnulla desiderari, (fortassis huic pollicitæ castigationi Theriaces alludens) propterea quoniam id opus subreptitium, non ab autore recognitum, prodierit in lucem. Hæc excusationis cuiusdam gratia dixisse placuit, quò liceat nobis ex alio eiusdem Rondelletij loco sententiam ipsius circa mellis Theriacæ compositionem ingredientis quantitatem, adducere, colligere, ac interpretari. Ego sanè (nisi mihi alius autoris huius locus asseratur aduersus) iurarem inter eos Rondelletium enumerari debere, qui bene decem mellis (Galenū imitati) libras, sufficientem esse quantitatem pro siccis & aridis corporibus vniendis ab Andromacho in Theriaces cōpositione digestis, existimauerint; sed etiam qui libras illas non ponderales, sed mensurales esse censuerint. In quam sententiam facile veni, dum librum suum de
pon-

ponderibus, siue de iusta quantitate & proportionem medicamentorum
lectitarem. Ibi siquidem, postquam Theriaces compositionem ex Ga-
leno rescripsit, & mellis Attici libras decem assumendas esse constituit,
cum multa circa normam, & modum administrationis simplicium eo-
rum, quæ in talis Antidoti compositione sumptitantur, animaduersione
digna recensuerit, tandem in fine libri sic ait. *Hic præterea notare
oportet herbas pondere mensurari, quia sicca usurpantur, item radices
fructus, flores, semina, & lachryas etiã pondere.* De vino, de melle, ni-
hil. Satis apertum & manifestũ, ni fallor, indicatiũ, ipsum existimasse vi-
nũ, & mel mensura, non pondere, in ea Theriaces ex Galeno desumpta
descriptione, dimetiri: nã si ponderib. non mēsuris vini dosis, & mellis
in ea, quam ex Andromacho, & Galeno desumpsit, Theriaces compo-
sitione, præscriberetur; cur non de melle, non de vino Rondelletius nos
admoneret ea pondere metienda, non mensuris determinanda? cum. s.
in ijs dubitari potius, magis quæ pro ratione possit, quàm in radicibus,
fructibus, herbis, aut seminibus? Et quãuis sciam, atq; optimè noscam
ponderis præcautionem adductam, & à Rondelletio tactam eo loci, re-
ferri posse, & ad genus aliud siue mensuræ, siue ponderis, contradistin-
gui, quo fructus etiam aliquando, seminave, radices, & herbæ determi-
nari, præscribi quæ solent; cuiusmodi sunt Aceruus, Manipulus, Fascicu-
lus, & pugillus; vix tamen adduci possum, ut credam virum hunc præ-
clarissimum adeo in minimis illis fuisse diligentem, ut pondus ad pro-
prias rerum earum mensuras contradistinxerit; in maximis autem ijs,
ita deliquisse, ut si putauerit vinum, & mel ponderari, despexerit idip-
sum nos admonere, quemadmodum commonuit in alijs. Quod tanto
minus credendum est, quanto scimus nouisse virum doctissimum hunc,
apud Antiquos, præcipue verò Romanos, liquores omnes mensurari,
non ponderari, pro maiori parte consueuisse, quemadmodum ipse cla-
re testatur de libra loquens eodem libro cap. 9. dum ait. *Præterea licet
olim liquida proprium metiendi modum haberent, libram, quam Mensu-
ralem appellamus, quæ secundum tres dimensiones metitur &c.* Neque
verò nobis obijciat aliquis eiusdem Rondelletij verba, 33. cap. sui libri
de ponderibus medic. superius etiam à nobis adducta: Quo loci de mel-
le loquens sic habet ad verbum. *Quidam verò contendunt in Antido-
tis, & confectionibus in libra una mellis, pulueris uncias duas esse con-
ciendas, alij uncias tres, alij quatuor, alii quinque vel sex, Galenus septē.
Sed tres posteriores doses efficaciora, & vehementiora remedia faciunt,
prima autem debiliora; media erit iustissima.* Potius enim, immo verò
prorsus, hæc verba nostræ, non autem alteri aduersariorum, opinioni,

fauere dicuntur. Cum enim quinque sententias ibi proponat (etenim eos, qui quinque vel sex specierum vncias pro qualibet vna libra mellis accipiendas existimant, sub vno solo membro comprehendit) tres verò dicat posteriores esse reijciendas, quanquam ipsa medicamenta valentiora, vehementiora quæ faciāt, ac primam (quàm sub nomine proinde singulari recensens, solam intelligit) abijciendam quoque constituat, quoniam infirma reddit Antidota; mediam verò determinet eligendam esse, quoniam tutissima; nostram eligit, & sententiam hanc oppositam aduersariorum opinioni, commendat, ac laudat, vt pro singula, scilicet, libra mellis, specierum vncias tres imponamus, & in Antidotorum compositionibus, iniiciamus. Quanquam si per mediam, vtrasque; nimirum, & eam quæ tres, & alteram, quæ quatuor præcipit specierum vncias esse commiscendas, intelligeret, & ambas illas assereret esse tutissimas; nihil haberet aduersus nos; cum, scilicet, ambas æquis, & paribus laudibus prosequutus & ipse, significet vanum esse sine vlla ratione, necessitate quæ ab vna consueta, ad alteram infuetam, & non probatam vel se transire. Quemadmodum neque nobis aliquid ea faciunt, quæ vir idem hic doctissimus subdit inferius, magnam, scilicet, eam quantitatem in antidotis non esse ponendam, quoniam, oporteat illa vehementia fore, faciliusque sit mel, quàm species, addere. Siquidem non ob aliud ea dixit, nisi vt excluderet primam dosim duarum vnciarum, quæ magnam mellis quantitatem admittit. Iam enim mediam in eisdem antidotis, veluti tutissimam, comprobauerat. Atque tot pro Rondelletij recognitione pro nunc, & vt eum nostræ potius, quam eorum opinioni fauere demonstramus.

4 Sequitur vt Ioannem Iacobum Vvecherum, veluti præcipuum vnum nostris, recognoscamus, & vt eundem ab aduersariorum manibus rapiamus. Quem sanè (vt video) Aduersarius noster eruditissimus optabat admodum inter suos, & eos recensere, qui priori, & à se comprobatae sententiæ fauere viderentur; non solum fortè quod hunc maximi nominis, & autoritatis esse persenserit; sed quoniam ipsum optimè quoque de Venetorum Theriaca sentire dignouerit; quippe qui in multis paratis à se compositorum quorundam medicamentorum descriptionibus; præscriptam, sæpè quantitatem ipsius aliquam, aliquando verò aut illius, aut Alexandrinæ (quàm, eadem mellis, ac nostra paratur, proportionem parari, suo loco monstrabimus) sumendam esse præcipiat. Veruntamen cum agnouerit eum nostrum esse, nec, sine manifesto mendacio, inter suos recenseri posse: maluit experiri, si quiret eundem furtim, & clam nostrorum cetera subripere; & de mendacio, furtique suspicione potius periclitari,

quam

quam Autorum suorum (vel pro suis acceptorum) Classen, tanti nominis accessione, non illustrare. Cum itaque duo circumferantur Antidotarij huius exemplaria, vetus vnum impressum anno 1574. In quo Vvecherus ad verbum predictam Galeni ex Andromacho Theriaces compositionem exscripsit, & libras quoque decem mellis apposuit, neque tamen vel quid ipse de tali quantitate sentiret, vel cuius intelligeret ordinis, & rationis eas libras esse, declarauit. Alterum autem ab eodem Autore correctum, ampliatum, & multis locis adauctum, impressum anno 1602. tum Basileæ, tum Venetijs etiam, in quo Vvecherus, ore rotundo, & verbis apertis, quàm mellis quantitatem in Theriaces compositione, sumendam approbet, explicauit: Doctissimus Iuuenis, noster arte neglexit, & recusauit, quid in secundo, correctoque Antidotario Vvecherus in præsentī difficultate statuendum esse censuerit, inquirere, & perscrutari, propterea, (vt aliquam saltem, mendacio detecto, excusationem sibi comparare posset) id ipsum, se non animaduertisse dissimulans, priori solum innixus, est ausus Vvecherū inter eos recensere, qui suæ opinioni fauentes, affirmant decem ad Theriacæ confectionem mellis libras, & eas ponderales, sumendas esse. Ego verò qui vtrunque illius Antidotarium inspexi, & in nouissimo longe plures inueni libras ab eo quàm in primo mellis, pro excipiendis speciebus illis, ab Andromacho seniori præscriptis, assumendas esse iuberi, nulloque modo ipsum sibi met ipsi aduersari, seu repugnare suspicatus; priorem conceptam de libris illis (quod, scilicet, pro mensuralibus accipi possent) huius etiam doctissimi Viri testimonio, & autoritate sententiam, primum apud me confirmaui, deinde verò, vt ea ndem intrepide profiteri possem, mirum in modū sum animatus. Hūc enim ego, cū posterioris editionis secundum librum Antidotarij specialis illius inspicerem; in quo plurima quædam exempla Theriacæ recenset, & ex aliorum sententia quoque rescribit, & in his tantum mellis cōuenire docet, quantum illi præscribunt; nam in Theriaca Andromachi à Medicis Romanis & Bononiensibus correctæ, & præparata, in qua circiter triginta simplicia superaddita inueniuntur; mellis inquit apponi duplum: & in Theriaca Andromachi pariter, sed à Bartolomeo Marāta correctæ, refert mellis optimi, atq; dulcissimi libras decem esse sumendas, aut quantum sufficit ad incorporanda sicca: in propria, & à se descripta compositione Theriaces ex Andromacho seniori alio modo constituentem, & loquentem inueni: Alta siquidem, & aperta voce, (quanquam apud illos hæc vox fuerit in deserto clamantis.) de melle sic ait. *Mellis despumati libras quatuordecim, uncias quinque, drachmas duas.* Neque ijs

contentus, ut nonnullorum recellum a Galeno monstraret, qui mellis amplius adhuc, hoc est, viginti libras accipiebāt, hæc addit. *Galeni aīa- te plus aromata admiscebant ad singulas libras mellis, & medicamen- tum solidius erat, quam nunc sit. Iam enim sumunt libras viginti.* Pote- rat quæso ne Vvecherus ulterius aliquid pro nobis afferre? certe non poterat. Cæterum (ne ipse sibi met ipsi repugnet) oportet, sicuti diceba- mus, ut in suo primo Antidotario decē illas ex Galeno descriptas mel- lis libras existimauerit quatuordecim circiter ponderis capere libras, ac proinde pro mensuralibus intellexerit; vel, ut indifferenter, & indeter- minate eo loci loquutus, sententiam propriam non explicauerit; quam postmodum, & in editione posteriori sic explicauit, ut purum menda- cium sit eum aliter sensisse profiteri; potissimum cum ultimæ nostræ vo- luntates, (ut leges asserunt) ex ultimis actibus iudicentur.

5 Sed aliqua iam de Foëlio quoque dicamus: Quem eodē capite pau- lō post, eruditissimus Iuuenis asserit vno pariter, quo Rondelletius, & Syluius detinebantur, errore teneri; nimirum, quia textus cuiusdā mē- dum neque ipse dignouerit; de qua re postea. Verum (ut aliqua sepa- ratim de illo quoq; nūc dicā) vir hic doctissimus sectione secunda suæ Pharmacopœæ rescribit & ipse Theriacā Iunioris Andromachi; exem- plum tamen rescriptionis eiusdem in omnibus a præceptore Syluio de- sumpsit: ea propter in mellis quantitate quoque tum centum quinquaginta Andromachi drachmas, tum decem Galeni libras apposuit; scri- bit enim & ipse, *drachmas centum quinquaginta, seu libras decem* non autem, *id est, libras decem.* ex quo loco potius apparet incertum, & am- biguum in mellis quantitate determinanda fuisse Foesium; quam cer- tum aliquid constituisse; cum, scilicet, ex vna parte Andromachum viderit centum quinquaginta præscribere drachmas; ex altera verò Galenum decem libras illas determinasse. Quapropter sicuti facile nobis est dice- re, sic etiam tutum alijs est credere, voluisse Foesium sententiæ Syluij sui præceptoris potius alludere, quam firmum aliquid explicitè deter- minasse; propterea quæ forsan & ipsum decem illas Galeni libras pro mensurabilibus accepisse.

6 De Francisco autem Alexādrino (ut fatear ingenuè) quid certi di- cam, vix habeo. Timorem mihi libri titulus intulit, cuius explicationē, quoque dum inspicio, vereor ne radiorum Apollinis illius splēdore de- ficiam. Attamen dum illius de Theriaca sententiā lego, subscribere ne, an potius ab eo recedere debeam, ambigo: cum ipse quoque consilium non dum mihi videatur suum explicasse; sed (uti plures alios esse dice- bam) incertus potius, & in ancipiti positus circa propriam mellis pro Theriaca

Theriaca sumendam quantitatem, exeat. Quippe qui primo facio
eiusdem Apollinis ubi de Theriaca loquitur, ita rutilet, *melle optimo u-*
niantar libris decem, & ex Aetio quoque satisfaciunt. Faciūt enim mul-
ta; atque primum hæc vltima verba, *& ex Aetio quoque satisfaciunt,*
vt de vera terminataque eius opinione nunc ambigam. Secundo facit
ad idem, quòd ibi non explicat cuiusmodi libras intelligat. Tertio, quod
in mensura vini quoque videatur anceps, quippe qui cum in adnota-
tionibus dixerit Andromachum Iuniorem oratione soluta mellis Attici
drachmas nonigenas sexaginta; vini vrò drachmas tricentum viginti
præscripsisse; in descriptione verò talis Antidoti scripserit. *Vini Antiqui*
odorati quantum liquoribus, & gummis dissoluendis satisfecerit sumen-
dum esse, videtur etiam, vt dicebamus, in vini quantitate determinan-
da non certus. Adde quarto, quòd si communem illam, circiter. s. libra-
rum quatuordecim, mellis quantitatem non accepisset, mirū esset, quo-
modo ambitiosus homo, & qui prurigne omnibus contradicendi ve-
xabatur, qui nulli parcit, qui neque Galeno pepercit eo loci, occasione
in eos inuehendi despexerit, qui maiori mellis, in compositione Theria-
ces, quam ipse putauerit, quantitate sint vsi. Quod tanto magis creden-
dum est, quanto cōstat in descriptione Mithridati incertum eundem in
melle determinando se demonstrasse, dum ita scribit. *Mellis mensuram*
conuenientē Alijs libras nouē, uncias octo, drachmas duas. Quæ sanè do-
sis triplo respōdet ad totū. Quapropter & hunc inter ambiguos incertos-
que, non sine ratione, reponere, enumerareque possumus. (Quanquam
nihil fortasse referret, ac parū esset si, prodigi potius quā liberales effecti,
concederemus hunc illis, & inter suos recenseri posse permetteremus.

7. Maioris sane momenti, & existimationis est autor, qui septimo lo-
co inter hos collocatur, nimirum doctissimus Bartholomeus ille Marā-
ta, qui forte collocandus erat in primo. Cuius autoritas, in vna simpli-
cium medicamentorum dignotione potissimum, maxima semper apud
me fuit. Maxima quoque foret in Theriaces compositione, nisi in ali-
quibus cōsultò, & ex intento recederet à Galeno, forteque ab ipso An-
dromacho seniori. Cuius cū Galenus elegiacos versus, veluti accommo-
datissimos ad nobiles illas describendas antidotos summe probauerit,
qm̄ vix fieri possit, vt iam mensurarū ac ponderū assignatione non cara-
chtherib. sed amplo, & explicato noīe præsignata, error aliquis cōmit-
tatur; Vir hic doctissimus non solū in pondere, mēsuravè, sed in simpli-
ciū quorūdam nomine quoq; in carminibus elegiacis Andromachi se-
nioris aliqua permutari potuisse, immo verò iam actu permutata, vitia-
taque fuisse disputauit. Quare si minus apud me fidei, si minoris existi-
matio-

rationis erit eius autoritas, totum in eam, quam communi Præceptorum
nostro Galeno debemus, obseruationem, & reuerentiam, referatur. Scio
ipsum locis adductis, potissimum verò secundò libro cap. 8. nobis aduer
sari. Veruntamen, dum attentius rem ipsam expendo, non inuenio sic
ipsum nobis aduersum, vt omnino desperem aliquid etiam commodi
ex eiusdem doctrina nos esse consequuturos. Quâuis enim primo libro
cap. 6. videatur asserere facile sibi videri, & in eam totum sententiam
ire, conuenientem mellis quantitatem Andromacho fuisse decem præ
scriptas illas à Galeno libras: quippe qui putet vniuersam ipsius The
riacæ massam (vt vocat) seu corpus totum ad pondus sexdecim circi
ter librarum posse ad eiusdem Andromachi mentem præfiniri; ita vt
quatuor specierum vnciæ circiter, pro qualibet libra mellis accipiatur:
quo casu validius, inquit, & efficacius reddi medicamentum oportet. Vi
deo tamen eundem virum, eodem loco ferè, aliam aridorum, siccorum
que corporum proportionem considerasse; in qua nimirum pro singu
lis tribus specierum vncijs libram vnâ mellis admisceri posse fatetur.
Hæc sunt eius verba, quæ nos, nè seriem orationis permutemus, Latina
potius, quàm vulgari, & Italica à se cōscripta lingua, referre maluimus.
*Due hinc circa totum compositum considerationes oriuntur. Prima est, ut
in hoc Antidoto mixtionis ea communis, & ab omnibus recepta regula
usu veniat, & obseruetur; ut mel, scilicet, relatum ad pulueres nondum il
li commixtos, quadruplicis rationem habeat, & quadrupla proportionem
mensuretur (nam quoties vnâ, simulq; cum pulueribus acciperetur, quin
tuplam mel relationem, aut habitudinem ad ipsos haberet) nimirum, ut
in qualibet libra mellis corporum aridorum vnciæ tres misceantur. Vnde
compositum totum mediocris naturæ resultat, videlicet, neque admodum
vigorosum, & validum, neq; virtutis inualide, ac imbecillis. Video pa
riter ipsum altera proposita proportionis consideratione, videlicet, in
qua plures specierum, ac puluerum vnciæ tribus, pro singula mellis libra
sumuntur; circa finem eiusdem capituli, vbi nonnulla, quoq; de vino per
miscuit, aperte fateri ex duabus considerationibus illis, duobusque mo
dis à se propositis, vtrumque persuaderi, proprijsque rationibus (cum
vtrunque non desint) probari posse; proptereaq; num vnus, aut verior,
aut tutior, sibi que magis ex corde sit, ac altero carior, discernere tūc re
calare; cum nequeat ad eorum alterum, sine alterius etiam probatione
conuerti. Video quin etiā ipsum cap. 4. libri prioris, vbi cuidam à se
propositæ dubitationi de certa vini quātitate minimè determināda, re
spondere conatur, dum sermonis incepti feriē cōuertit ad mel, affirma
re, & asserere, quoniam ipsum certa corporum aridorū materia præci
pue*

ne sit, minime repugnare, aut incōuenire, si certa quantitas eius deter-
minetur, & præscribatur. cum diuturna satis, inquit, experientia cogni-
tum sit quadruplam mellis quantitatem ad specierum pondus, antequā
inuicem vniantur, post vnionem autem quintuplam, esse determinan-
dam. Quibus omnibus cum, & alia quædam in alijs librorum eorundē
adnotata locis, æquo modo respondeant; sufficiat nobis hæc adduxisse
solummodo (ne breuis vna disputatio tot aliorum transcriptis verbis
in volumen abeat) quò tandem ex ijs, quæ à doctissimo viro passim lo-
cis adductis, tradita sunt, colligamus non ita nobis in eo libro circa mel-
lis quantitatem pro recta compositione Theriaces illū aduersari, quin
etiam multa pro nobis affirmet, & liberè fateatur experientia certa com-
probatum esse quadruplam mellis proportionem illam ad species, secū-
dum se ipsas impermixtim acceptas, optimam esse, & reprobari nul-
lo modo posse, Quod idem est, ac si dicat, in singulis tribus specierū vn-
cijs libram mellis admiscendam, seu pro perfecta vtrorūque mixtione
sumendam esse. Quemadmodum ipse se ipsum non semel, & in vno lo-
co, sed sæpius, & multis alijs in locis, explicasse videtur.

*De Romanis, & Bononiensibus Medicis, de Florentinis
de Bergomensibus. Vbi Collegium Bergomense nostræ
potius, quàm oppositæ sententiæ fauere demonstratur.*

Cap. VI.



Equuntur quatuor Medicorum Collegia ab eruditissi-
mo Iuene pro suæ opinionis confirmatione nuncupa-
ta, Romanum, scilicet, Bononiense, Florentinum, &
Bergomense. Quod igitur spectat ad Medicos Roma-
nos, & Bononienses, fateri fas est decem & illos mel-
lis assumendas esse libras determinasse; quemadmo-
dū omnes, qui solis descriptionibus, nullis additis animaduersionibus,
nullis adnotationibus, Antidotaria sua confecere, aut aliunde mutuati
sunt. Quare cum præclarissimorum quoque virorum horum Antidota-
ria, non alia parata ratione sint, proinde quæ & ipsi Andromachi senio-
ris ex Galeno Theriaces compositionem ex toto rescripserint, non mi-
rum, si decem libras ij quoque mellis, nō alias alteras quàm Galeni su-
mentes, & intelligentes, apposuerunt. Quæ tamen libræ num pondera-
les, an mensurales existant, vsquequò clarius eorum sententia manife-
stetur

stetur, nos eadem ratione, qua, de Galeno loquentes, dubitari posse dicebamus, in ijs etiam intelligendis ambigendum esse, neque ex eorum Antidotarijs certi quidquam haberi posse, cōfirmabimus. Quemadmodum etiam, num, vt in ipsis descriptum est, Theriaces compositionem nuuc temporis moliantur, statutas libras illas accipientes, affirmare nō audemus: cum Vvecherum audierimus correctam ab vtrisque Theriacam, eam esse constituentem, in qua triginta circiter addita, & superimposita simplicia conspiciuntur: Quam etiam, loco superius à nobis adducto, rescripsit. Veruntamen vtcunque sit, ad alios iam veniamus.


10 Sequuntur hos Medici Florentini; de quibus quid dicam? Tria mihi sunt illorum Antidotaria. Quorum vnum, ni fallor, est illud, cuius meminit Iuuenis eruditissimus sub vnus receptarij nomine impressi Venetijs à Valgrisio, dum quartæ constitutæ ab eodem eo loco sententiæ, recenset autores. Qui. s. ad quadruplum omnium pondus, vel libras circiter viginti sumendas esse mellis existimarunt. In quo (lingua tamen Italica, vulgariq̃ue, vt inquit, mandato typis) ita sanè de melle scriptum inuenio. *Mellis despumati libras decem.* Quibus verbis hæc statim adduntur. *Galenī tempore plus aromatum admiscebant ad singulas libras mellis, & medicamentum solidius reddebatur, quàm modo fit. Sumantur mellis libræ viginti.* Alterū est à viro doctissimo Carolo Clusio ex Italico sermone latinitate donatū; immo verò & ab ipso summè probatum. In quo pariter eadem mellis præscripta quantitas reperitur, & eadem verba subaddita, atque statim adnotata leguntur. Tertium recentius est, Italoq̃ue sermone confectum, quo posteriori, priori fortè (quanquam in paucissimis hæc omnia differant) derelicto, sunt vsi postmodum, & ad hæc vsque tempora, ni fallor, vtuntur. In eo tota pariter ipsius Theriaces descriptio talis, qualis in alijs, præter vltima illa addita verba, *Galenī tempore plus aromatum assumebāt, &c.* reperitur. Quo fit, vt ex ijs omnibus verè colligam illos etiam Theriaces ex Galeno compositionem rescripsisse; forte verò, nec ea vti; (cum in duobus prioribus illis dixerint Antidotarijs, aliter nunc parari solere, quàm ætate Galeni pararetur) atque illos ad opus hoc non viginti, sed quatuordecim circiter, nobiscum libras mellis assumere. Neque sola eiusmodi coniectura, quæ sanè levis esset, ad hoc (vsquedum tamen certior efficiar) existimandum, & credendum adducor: sed ex præscripta in eodem, posterioriq̃ue Antidotario generali rubrica, communique tum electuarijs omnibus, tum magnis Antidotis, in qua. s. ita scribunt. *Aromatū quantitas inspergenda plerunque in ipsa cōpositione reperitur expressa. Quòd si expressa non sit, & simpliciter additum fuerit, mellis, aut sacchari quantum sa-*

is est: *uncia tres aromatu in singulas sacchari, aut mellis libras sumen-*
da erunt, & in electarijs gustui iucundis uncia due. Neque verò dicendū
est, Theriacam sub electarijs illis duplici nomine non contineri, tum. s.
quoniam mellis quantitas in ea præscribatur; tum etiam ob id, quoniā
magna, & nobilia eiusmodi Antidota, sua dignitate, seiungātur ab alijs,
& cum illis enumerari non soleant. Nam, quatenus attinere videtur ad
primum, dicimus nos ab Andromacho seniori, cuius Theriaces compo-
sitionem imitamur, parareq; profitemur, mellis quātitatē nō præfiniri:
quādoquidē ipse mellis, dicit, assumendū. *quod satis est*: Fortè verò nec à
Iuniori (de qua re suo loco) postremò neq; à Galeno: quippe qui, quāq;
decem libras dixerit mellis accipiendas: quoniam tamen & ipse prius
dixerat; *quod satis est*; neque admodum clarè nobis significauerat cu-
iusne generis illæ forent, mensurales ne, an ponderales, accipitur mellis
quantitas in magnarum earum Antidotorū compositione veluti inde-
terminata. Quæ sanè si ab autoribus intelligeretur, veluti à Galeno præ-
cise præscripta, communis vtique, & vna sola, vel omnium, vel potiorū
saltem eorum, sentētia foret in mellis, pro Theriacæ compositione, quā-
titate determinanda. Addamus ijs, quod cum idem, ac par iudicium de
Mithridatica cōfectione, ac de Theriaca sit (ob quod à Collegio nostro
mandatum est duobus viris illis excellētissimis, vt vnus, & alterius an-
tidoti in mellis inuenienda quātitate rationem haberent) In Mithrida-
to verò mel ipsum non determinetur, sed quantum satis est assumi Da-
mocrates, & Galenus apertè nos doceant; sequitur, vt in eo specierum
vnciæ tres ex Antidotario Florentino, præclarissimorumque Medico-
rum illorum iussu, pro mellis singula libra sumendæ sint. Quod ipsum
in Theriaca pari modo seruandum, & agendum erit. Quod autem spe-
ctat ad alterum; non excipi Theriacā eo loci demonstrant antecedentia,
& consequentia verba, dum primo. s. Patres illi sic inquirunt. *electariorū,*
quæ Grecis Antidota appellantur, multæ sunt differentie. Nos verò in
electaria gustatu grata, & iucunda diuidemus; in electaria amara, & in-
grata; in electuaria purgantia, & laxantia, in Theriacas, & electaria
opium accipientia; quæ omnia secundum hunc ordinem suo loco describe-
mus. Hæc illi. Qui deinde, vt ostendant, se sub regulis, & rubricis illis v-
niuersalibus etiam hæc eadem antidota fuisse complexos, de tempore,
quo eiusmodi electaria conseruantur, & permanent in suo vigore lo-
quentes, de Theriaca quoque loquuntur, dum ita scribunt. *Theriaca ad*
vigesimum annum durat, &c. Quare non est, vt Medicos Florentinos
adhuc inter fautores alterius opinionis ita fiduciter reponamus, & enu-
meremus.

11 Sed quæso iam accedamus ad Bergomenſes. Scribit vir doctiſſimus, & eruditiffimus vndecimo loco ſibi ſuffragari Collegium Bergomenſe Latinum, non aut aliud, quod Italico ſermone multis in locis deprauatū, ad manus quorundā delatū eſt. Sed forte præſtat eiufdē verba referre. & *Bergomenſes*, inquit in eodem capite, in *Antidotario Latino idiomaſe impreſſo*, quod verum *Bergomenſis Medicorum Collegij eſt Antidotarium*. Inuenitur enim aliud ab *Aromatario* quodam à *Latino in Italicum ſermonem cōuerſum*, & quibusdam in locis deprauatum, ut in *Theriaceſe deſcriptione* ubi de *Melle* loquitur. Hæc ille. Sed quæſo videamus, an ita ſit. Hæc ſunt Bergomenſis Antidotarij latino idiomaſe impreſſi, in eadē ciuitate, editione ſecūda ſub anno 1581. formalia verba. *Theriaceæ Andromachi Senioris Galene ſeu tranquillitas vocata, ex Galeno. Recipe trociſcorum Scilliticorū drachmas quadraginta octo*. Sequūtur autem & reliqua, ab omnibus comuni quodam ordine ex Galeni, & Andromachi ſenioris deſcriptione deſumpta. Quibus enumeratis, & ſecūdum proprias claſſes appoſitis, & diſtributis, de melle ſtatim eiufmodi verba leguntur. *Mellis Attici recentis, vel alterius optimi dulciſſimi, acerrimi, & odoratiſſimi drachmas noningenta, & ſexaginta, ſeu libræ decem*. Haſtenus quidem habemus ipſum Bergomenſe Collegium prædictam ad vnguem Galeni ex Andromacho Theriaceæ compoſitionem reſcripſiſſe; neque potuiſſe niſi decem pro quantitate ſpecierum ibi reſcripta, mellis Attici, vel alterius, libras appoſuiſſe. Quod totum, etiam ad vnguē in vulgari, ſiue Italico poſt hoc impreſſo ſermone, reſcribitur. Ceterum Iuuenis eruditiffimus id, quod Bergomenſe Collegium nondum explicauerat, & indeterminatē produxerat, poſthabitis adnotationibus eiufdem Collegij, ſtatim, & incōſulto produxit, & explicauit, decem videlicet libras illas ponderales eſſe: forte quoniam colliguntur ex numero drachmarum noningētarum, & ſexaginta; nam eæ reducuntur ad vncias centum, & viginti, quæ decē ponderales libras efficiunt: atque ſic præclariffimorum virorum Collegium illud exiſtimat intellexiſſe. Sed dicam ego. Qui ſcit, aut Quis adhuc perfecte dignouit, an celebre Collegium illud pro drachmis etiam, & ex cōſequenti pro libris, ponderales, vel menſurales aſſumpſerit, aut intellexerit? Profectò nullus, niſi diligentius ea, quæ ab ipſis præclariffimis viris adduntur, inſpiciat, & accurate conſideret: Non dum enim Collegium, ſe declaraue rat. Neque ſufficiens ex drachmarum numero coniectura deſumitur: Quando conſtet(quidquid ſit de Galeno de quo ſuo loco) Bergomenſe Collegium non ſolum libras, & vncias, ſed drachmas etiam, & ſcriptula menſuralia nouiſſe, conſideraſſe, conceſſiſſe, &

communi quodam fere consensu receperunt; quænamque in pondere-
rum, ac mensurarum explicatione ex veterum tam Græcorum, quam
Romanorum, & Arabum, necnon etiam Neotericorum probatorum
traditione, desumpta, & in calce eiusdē apposita libri, conspicitur. Quod
vno tantum, aut altero transcripto loco probare non erit (ad aliquo-
rum duritiem cordis emolliendam) fortassis ab re. Pagina 458. dum ad
minores liquidorū mēsuras exponendas Collegiū illud accedit, de Mi-
stro, seu Chema parua Paul. sic ait. *Cyathi semis, sex mēsurales drach-
ma sex, & semis, & semiscriptulum*. De semiuncia verò mensurali sic
ait. *Semiuncia mensuralis liquidorum drachmæ quatuor*. De Ligula ve-
rò, & Cochleari columellæ sic. *Liquidorum, & Aridorum mensurales
drachmæ tres, & scriptulum*. Cum itaque mi Dilectissime, (vt iterum
veniam ad te) Bergomense Collegium non explicauerit adhuc, quas
drachmas, quasve libras intellexisse, in ea pura Theriaces Galeni ex
Andromachorecriptione, voluerit; non est, vt eius testimonio, & auto-
ritate coneris sententiæ tuæ probabilitatem ostendere. Verumtamen
audio, quid illico mihi responsurus es. Primo dices in altera, priorique
Antidotarij Bergomensis æditione talia te non legisse: posterioremque
ad manus tuas forte non peruenisse, excusationis alicuius gratia, dissi-
mulabis. Secundò verò subaddes neque etiam nos eiusdem Collegij tē-
stimonio, & autoritate, posse sententiam nostram aliqua ex parte mu-
niri. Sed primum, tanto Iuvene indignum est. Vt enim nihil nobis cū
prima editione, in qua nihil certi Collegium explicauerat; cum se post-
modum in secunda declaret; & posteriores actiones (vt dicebamus) eg-
sint, quæ semper pro voluntatibus vltimis accipiuntur: Ita non est, vt tu,
qui Antidotarium illud Italicū ex latino redditum inspexisti, dissimu-
les te credidisse non aliam, quam primam editionem illam adinueniri.
Quippe qui, cum rectè noueris multa, quæ in vulgari traductione lege-
bantur, non ijs è directò responderè, quæ in priori editione latina conti-
nebantur; suspicari saltem, & vereri debebas, aliud esse vulgari, & Itali-
cæ illius traductionis exemplar: cum vix credendum sit clarissimorum
virorum illorum Collegium vnquam pati potuisse, vt aliter quam ab
illo sancitū fuerit in decretione latina, ab aliquo (quisquis ille sit) tradu-
ctore vulgari, aut Italico sermone referatur. Quod autem secundo lo-
co te responsurum agnoueram, falsum esse nunc audi. Collegium idem
eodem loco ferè sic in adnotationibus habet. *Damocrates, Paulus, &
Aetius mellis habent li'ras decem; quarum pondus (si de mensuralibus
intelligatur) ad quindecim ascendet libras, quæ triplam ad totū propor-
tionem paulisper excedunt. Quomodo confecta antidotus, vt paulo imbe-*

*ad siccitatem auferendam mel addere oportnerit, ut quandoque Gale-
nus consuluit. Hæc eadem verba in Antidotario è Latino in Italicum
sermonem conuerso, non ab Aromatario, sed à præclarissimo viro artiũ
& Medicinæ doctore, iamque (vt audio) doctoratus insignibus in hoc
almo nostro Collegio decorato, scripta, & ad vnguem transcripta legũ-
tur. Cuius viri doctissimi patrociniũ suscipere, superfluum esse (cum
viuat adhuc, nec aliorum opere egeat) existimans, iterum ad eius-
dem Collegij verba me confero. Quæ fatis, ni fallor, ostendunt
Sapientissimos viros illos fauere potius opinioni nostræ, quàm secus, &
decẽ Galeni libras pro mensuralib. accipi posse censuisse, forteq;, & ip-
sos vt sic accepisse: Quia tunc non opus erit, inquiunt, ad siccitatẽ aufe-
rendam mellis aliquid addidisse. Neque verò perturbent nos eorum
consequentia verba, dum inquiunt Antidotum paulo imbecilliorẽ
euadere. Quia certum est, & nullus ignorat, quòd, vbi in minori mellis
quantitate plus specierum ingreditur, medicamentum validius reddi-
tur, quàm vbi in maiori minus specierum assumitur. Validius, inquam,
si tota vtriusque medicamenti massa consideretur, & inuicem confera-
tur; aut vnus, & eiusdem quantitas eadem accipiatur: nam si paulisper
illius, in quo minor specierum dosis assumitur, quantitas augeatur, vali-
dum æque medicamẽtum efficietur, vt quod eandem specierum copiã,
& multitudinem, in quibus virtus Antidoti tota residet, proportionẽ
contineat, quã etiã alterum cõplectebatur. Quapropter cum eiusmodi
imbecillitas (vt illi quoq; præclarissimi viri dicebant) modica sit; facilẽ,
paulò eiusdem medicamẽti maiori portione sumpta, corrigitur, & emẽ-
datur. Sed quid dico sumpta maiori paulò corrigitur? Sumpta consue-
ta, iamque per tot annos, experientia duce, ab omnibus approbata, ta-
lis Antidoti dosi, si quæ sit eius modica (eo modo considerata, dũ. s. cõ-
paratur ad alterum maiori specierum quantitate paratum) infirmitas,
& imbecillitas, sublata iã, & ex vsu cognoscitur emendata. Quam for-
tẽ, si validiori nunc specierum ad singulas mellis libras incremento, &
additione pararetur Antidotus, immutare necessum esset. Quod, etiam
si nobis, & omnibus in arte peritis efficere non foret arduũ, in ijs tamen,
qui sine Medicorum consilio, & ex vsu potius antidotum hanc assume-
re consueuerunt; non sine vel mortis, vel morbi periculo præstari posset.*



*Quatuor vltimi, ex quindecim enumeratis ab aduersarijs
rjs. autoribus, considerantur. Vbi vera Siluatici opi-
nio explicatur, & approbatur. Cap. VII.*



Vper sunt, ex quindecim illis ab aduersarijs enume-
ratis autoribus, quatuor vltimi considerandi, nimi-
rum, Calestanus, Spinellus, Oddus, & postremo Sil-
uaticus. Primus igitur inter hos, inter omnes verò
duodecimus, testis adductus pro prioris opinionis
confirmatione, Hieronymus est Calestanus, vir sa-
nè non ignarus, sed cuius me parum mouet autori-
tas, quippe quem nec fuisse Medicum habeam, nec nisi experiētia qua-
dam talia se dignouisse profiteri, non ignorem. Verum in hoc, tot Aro-
matariorum Venetorum numero; tot peritis artificibus in hac arte po-
tius, quàm vni Calestano, credidisse præstat; qui longa satis obseruatio-
ne, & experientia norunt tutius esse non maiorem aromatum, siue pul-
uerum quantitatem pro singula mellis ponderali libra, quam trium vn-
ciarum assumere; quoniam (vt etiam ab alijs fide dignis relatum est) tē-
poris tractu solidius euadit Antidotum, cui mellis postmodum aliquid
commisceri necessum est. Quod sanè, præter id quod inualidius reddit
ipsum Antidotum (vti Damocrates vltimis versibus ijs in suæ Theria-
ces descriptione cecinerat) ex Andernachi versione.

*Da potioni, nec recens factum nimis,
Nec rursus medicamentum, quod peraruit,
Sin longiori hoc fuerit spacio temporis,
Subferuefacito rursus addens paululum
Mellis, simulque abunde temporis terens,
Tandemque habebis vtile, quod valuit nihil
Sed inferius eo, quod miscueris semel.*

Præter id, inquam, alia quoque parit incommoda, & occasionem impijs
hominibus affert in totum genus humanum (apparenti quadam excu-
satione) peccandi.

13 Sequitur, & post Calestanum affertur autoritas, & testimonium
Ioannis Pauli cuiusdam ex Spinellis, de quo pauca loquar, cum pauca
mihi cum illo sint. Vix hominem noui, sed credo doctissimum; aureas
lectiones eius amplector, diligentiam commendo, laudo Theriacen;
suspicio virum, cui nulla sint ignota simplicia, vel non inuentu facilia,
ex ijs, quæ ad huiusmodi Antidoti compositionem requiruntur. Qui
proinde

promittit namque adhibitis vtatur, vera, propria, legitimaque cuncta possideat; Falernum seruet Mel Atticum habeat, & recta mellis ac vini mensura, seu pondere, semper vtatur. Quæ tamen nos eatenus, vt vera recipimus, quatenus vera sunt, & vt ab alijs (qui pauci sunt, forteque nullus) vera creduntur. Hunc itaque nos, inter nostros ob id non reponendum, tibi pro certo, veroque sententiæ tuæ fautore, coautoreque sponte concedimus, & vnà cū superiori cōdonamus. Addimus tñ, tantū abesse, vt huius monitis, & autoritate, celeberrimū Collegiū nostrū ad aliquid innouandū persuaderi, quin potius ad veterem, & iam cōfirmatam cōsuetudinem approbandam, accendi, inflammarique debeat: Tum quia maiorū nostrorū, & Patrum autoritas, existimatio, & dignitas, denigranda nō est; quos impiū sanè foret asserere, aut opinari vel modicū, in medicamentorū componendorū rōne fuisse versatos; vel adeo cecos, & parū accuratos extitisse, vt quāta mellis quātitate, copiaque tūc ēt in cōponēda Theriaca ad singulas specierū vncias Veneri seplasiarij debuerint vti, non nouerint. Cum non in tenebris, aut in occulto, non furtim vnamquam, sed palam, publice, solemniterque, nec non maiori, quàm modo fiat apparatu, primis temporibus componi consueuerit: & iam aliàs in nostri Collegij monumentis appareat ab aliquibus dubitatum etiam de tali, cōuenientiue quantitate mellis pro vtriusque Antidoti compositione quandoque fuisse; neque tamen aliquid innouatum. Extat enim præcipua inter cōteras huiusce rei memoria in actibus admodum illustris Equitis, & excellentissimi viri D. D. Thomæ Philologi Rauenas in libro (ni fallor) E. pag. 116. dum ipse Collegij Præses seu Prior (vt inquiunt) creatus à Patribus ad Theriaces compositionem vnà cum suis consiliarijs vocatus, adesset anno 1565. ad Theriaces, inquam, ab Aromatario ad insignia Medici compositionem efficiendam, & præparandam. In qua præter alia, quæ vir doctissimus diligenter obseruanda, ne fraus committeretur, & animaduertenda fore docuerat, illud vnum vltimo loco his ferè verbis formalibus notatum reliquit. *Quinto prospiciendum perquisitius est, vt pro qualibet libra mellis tres specierum vncie (posthabitis gummis, & liquabilibus alijs,) accipiantur.* Vt proinde nostros maiores, & Patres in hoc excusare, sit eos accusare. Tum etiam quia, si præclarissimum Collegium nostrum aliquid in eiusmodi cōtroversia noui statueret, quod ad illius aures esset, ac si sententiam eius approbasse videretur; vnius hominis ignoti ferè, sibi que nimium arrogantis, minus honeste de tanto Collegio loquentis, castigationes indecenter admitteret, & occasionē, ac ansam tā petulāti viro præberet (si viuit adhuc) vt iterū, & audacius in idem Collegium peccare nō vereretur.

14 Doctissimum Marcum Coddum & Receptorem
celeberrimumque doctissimorum Philosophorum, & Medicorum Col-
legium Patauinum utique magnificimus; & nullum maius existima-
mus pro prioris, & oppositæ nobis opinionis comprobatione, quam tot
excellentissimorum virorum testimonium, adduci posse. Veruntamen
vti scimus, & nouimus eos certam vini, mellisque copiam pro Theria-
ca conficienda determinasse, rigoroſeque nimis, duas drachmas à duo-
bus vini sextarijs, & quadraginta quatuor itidem drachmas à decem
mellis decocti, vel despumati libris ademisse; atque genus id talē Anti-
dotum conficiendi, modum hunc parandi Theriacam, aliquando expe-
rimento subiicere voluisse, duplumque mellis ad vnguem assumendum
esse statuiffe. Ita nescimus, an modò, præscripta vini, mellisque copia in
conficienda Theriaca Myropole Patavini contatur. Quando vini Fa-
lerni defectu, tanta nostri maluatici dosis apud omnes suspecta sit. & ex
perimento sensato, iam apud aliquos constiterit sine vini quantitate
præscripta, decem libris pōderalibus mellis assumptis, totam illius An-
tidoti hunc in modum confecti, massam, processu temporis, puta trium
circiter, vel quatuor annorum, valde ficcari; sic, vt ad propriū incremē-
tum, (quod spatium sit annorum plurium, si Galeno credimus) consistē-
tia, vt oportet, vix permutata, peruenire nullo modo possit.

15 Superest ultimo loco Lumen ætatis nostræ Ioannes Baptista Sil-
uaticus recognoscendus. Hunc sanè Iuuenis noster eruditissimus inter
suos postremum enumerat, formalibus ijsque recenset. *Ioannes Bap-
tista Siluaticus lib. 1. cap. 10. & si certam quātitatem statuere non videat-
ur, sed sufficientem tantummodo suscipiendam esse profiteatur: hanc ni-
hilominus sufficientem quantitatem, vel libris decem proximam, vel ip-
sas libras decem determinare videtur, ex rationibus, quibus opinionem
suam confirmare nititur, inquit enim. Confirmant hanc nostram asser-
tionem vel maxime Aetius, qui dixit Mellis libras decem, aut quod satis
est. Galenus item libro de Theriaca ad Pisonem cap. 14. sic loquutus est.
Postea cum liquidis sicca admiscueris, Mellis quantum satis esse videtur
infundes; satis autē esse videntur libræ decē. Ex quibus verbis patet ip-
sum, & si certā, quantitatem præscribere nolit, parum tamen aut nihil à
decem libris discedere. Hæc ille. Nos autē longè diuerſe doctissimi vi-
ri Siluatici sententiam legimus, ac interpretamur. Et sicuti certo scimus
eum non ob aliud arbitrari non esse necessum, vt certa mellis quantitas
pro Theriaca determinetur, nisi quia mel ad cōsistentiam compositio-
ni tribuendum (vt inquit) ad eandem conseruandam, & ad medicamē-
ta omnia probe vnienda soleat imponi: & in ijs medicamentis, in qui-
bus*

strictè quātitas eius decerni debeat, quin ea multis de causis possit paulo minus, plusve adaugeri, & imminui. Ita non facile ad id credendum adducimur, vt cum aduersarijs existimare debeamus id paulò minus, plusve adaugeri, & imminui ab illo propositum, recessum ita modicum significare Siluatico, vt solum paucam vnciarum quarundam, earumque non multarum, diuersitatem in se contineat, & claudat: cum certè possint sub illo quoque recessu librarum pondera quædam intelligi, & contineri: proindeque decem, & duodecim, & plures etiam mellis libras assumere pro Theriaces compositione, apud ipsum nullo modo repugnet. Atque id non solum, quoniam rationes è quibus eruditissimus Iuuenis noster sententiam eius ad sensum hunc redigendam, & explicandam esse colligebat, nullo modo cōcludunt. Verum etiam ob alias pretermissas ab Aduersario nostro rationes, quib. eo capite sententiā suā cōprobare Siluaticus, & corroborare pari modo conatur: ac ob alias etiā à nobis ex eisdem locis, & Siluatici verbis, æqua lance deductas. Nam quòd rationes, ex quibus doctissimus Iuuenis ita sententiam eius intelligendam esse colligebat, inualidæ sint; nos, ab ipsa rei natura ratiocinatione desumpta, sic demonstramus. Et quatenus ad Aetium attinet, Quem constat ex opinione Siluatici mellis quantitatem non determinasse, cum dixerit, *libras decem, aut quod satis est*. Arbitramur vnicuique patere (cum id ipsa rei natura ratioque doceat) in dubium reuocari nullo modo posse, quoties vnicuique, semper, & in omni loco decem illæ propositæ ab Aetio libræ sufficerēt; vanum, atque superfluum omnino fuisse illud addere *vel quod satis est*, vbi verò non satis essent, sed longè plures exigenterentur, ex hac Aetij autoritate non esse nobis aliqua ratione vetitum, vt quod satis est, nempè quatuordecim etiam libras si fuerit opus, ab eiusdem autoris scopo non recedentes, assumere pari modo valeamus. Nam si, *satis*, illud, ad libras circiter decem determinatè referri, & eius nomine significari constitueretur: non benè Siluaticus assertionem suam (vt clarius ex eiusdem opinionis explicatione constabit inferius) ex hac Aetij autoritate, testimonioque confirmaret. Quæadmodum neque ex altero eo Galeni loco de Theriaca ad Pisonem, sic intellecto, eius assertio confirmationem, aut robur aliquod habere posset. Nam quæsò, Quis, vbi Galenus affirmet, & asserat tātum mellis sumendum esse, quantum est satis, deinde verò determinet illud, *satis*, ad libras decem, ex eius autoritate sic intellecta, deducet indeterminatam mellis quantitatem ab ipso proponi sic, vt imminui & augeri possit, siue multa, siue modica fieri debeat adauctio? Nullus profecto. Quapropter

pter non sic oportet existimare Syluaticum virum doctissimum & oculatissimum Galeni sententiam accepisse & intellexisse, dum ex ea putat se propriam assertionem confirmare posse; sed ita potius interpretari voluisse, quasi Galenus etiam indeterminatè loquatur, & asserat, tantum in conficienda Theriaca mellis esse sumendum, quantum perito cōpositori, & artifice sat esse videatur. Quod varia tamen eius intentione, variari, diminui, & augeri potest, prout maiorem, minoremve tali consistentiā Antidoto præbere cupit; vel prout etiā forte sub alia, & alia regione, cælique statu illius compositionem est egressurus, maiorive, seu minori vini copia quoque in eiusdem apparatu fuerit vsurus, aut quatenus tādē delicatius, & gratius Antidotū est paraturus: Cum tamen decem illæ Galeno libræ sufficerent, vt eo loco, & eo tempore, taliq̃ue modo paratum Antidotum idem conficere posset. Patet autem sic & Aetij, & Galeni intellectas autoritates (vt, scilicet, illud, *quod satis est*, veluti distinctum à decem libris accipiatur) assertionem Siluatici confirmare quidem corroborareq̃ue posse; recessum autem à pondere librarum decem (quoties tamen Siluatico pro ponderalib. acciperentur) quid indeterminatum, ac proinde non modicum, sed effatu dignum aliquod includere, ac præferre. Rem hanc se se hunc in modum habere, atque ita potius isthanc Siluatici de mellis indeterminata quantitate sententiam, explicandam esse, quàm vt aduersarij nostri constituebant, rationes aliæ quibus vltèrius eo loci doctissimus vir propriam assertionem adhuc confirmare conatur, ab illis consultò forte non tactæ, demonstrant. Quarum vna colligitur ex verbis illis, dum ita loquitur. *confirmant hoc idem innumera ferè medicamenta recensitis de causis mel excipientia, nulla eius seruata ponderis quantitate determinata.* ex ijs enim facile potest vnusquisque deducere qualis eius in hoc assertio fuerit, & quomodo veniat explicanda. Nam siue de vno particulari, & eodem medicamento vario modo, quod spectat ad mellis quantitatem, effecto, ac à pluribus varia quadam eiusdem copia confecto, & ad seipsum relato, sit sermo; siue de pluribus medicamentis collatis inuicem, non eandem mellis quantitatem accipientibus, Siluatici verba veniant intelligenda; constat differentiam hanc, & id plus, minusve augeri, & imminui posse, ab autore propositum, non circa modicam mellis quantitatem attendi, sed circa longè maiorem, quàm Iuuenis eruditissimus opinabatur. Nam si de vno solo, pro varia cōponentis intentione plus minusve mellis assumente, medicamento, loquamur; Quæso qui nescit apud peritos Artifices atque plurimos, forteq̃ue probatiores, Pharmacopæarū scriptores, communem regulam illam acceptam esse, si sit validius, & efficacius medica-

mentum efficiendum, & à compositore parandum, tres esse species vncias ad singulas mellis libras iniiciendas, sin verò gratius, & delicatius, tantummodo binas esse sumendas? Iam verò constat tunc mellis hanc differentiam non esse modicam, sed effatu dignam; & eam fortasse respicere, de qua iam instituta, & incepta hæc inter nos altercatio fuisse videtur. Sin autem varia medicamēta, quæ variè apud autores parari solent, & multi generis, ac rationis existunt, variā quoq; mellis quantitatem accipiētia sumantur: Quæso, Quis ambiget tantūde, & fortè quoq; longè maiorem, circa mellis eiusmodi quantitatem, differentiam in ipsis adinueniri, notari, præscribiq; posse? cum sint inter illa, quæ mellis duplum, alia verò, quæ triplum, & quadruplum etiam eius admittunt? Confirmant hanc nostram Siluaticæ mentis explicationem, & intelligentiam, altera ab eodem adducta, priorique loco subaddita ratio, dum inquit. *Adde, quòd, si Theriaca temporis processu nimium exsiccata mel adhuc adijci potest, ut reformetur eius consistentia; iam non est ut de mellis quantitate adeo solliciti simus.* Patet autem additionem mellis ad consistentiam hanc reformandam, non modicam esse. Quæ proinde si, ne progressu temporis exsicicaretur Antidotus, per initia compositionis illius decē libris illis (quemadmodū addi posse videtur sub verbis illis inuisse Siluaticus) adderetur nō certe modicum, aut vnciarū quarundā, accessum ad eas decē effici libras, sed valde magnū, necessum esset; ut norunt ij, qui talia quādoq; (sed utinam instante solū necessitate) pararūt. Quæ sanè cuncta multo magis adhuc ex ijs, quæ per totā partē & seriem Sermonis illius, quem circa mellis quantitatem, ut eam pro conficienda Theriaca non determinatam esse demonstret, Siluaticus habet, confirmari possunt. Is enim, ubi talis ab eo, & ab alijs quoque, propositæ difficultatis, rationem illam induxit; quòd apud veteres varia, & inconstans mellis quantitas inueniatur assumpta: quādoquidem cum senior Andromachus, cui cūcta in Theriaces compositione, Galeno teste, sūt referēda, & eum insequuti Damocrates in prima descriptione, & Aui-cēnas in tertia, nec non & alij plerique, nullam ipsius quātitatem reuera determinent: Iunior tamen Andromachus drachmas centum, & sexaginta mellis assumpsit. Damocrates Galenus, & alij decem libras instituendas, & accipiendas esse voluerunt; Nicolaus verò Myrepsius tantummodo sex; ac aliam alij quantitatem eius præfinierunt; ut non sit præter rationem ob id, ac sine causa talis proposita ab ipso, & inducta iam dubitatio. Is, inquam, huius, cum deinde solutionem, & veterū scriptorum omnium Concilium in eo totum positum esse voluerit, quòd mellis indeterminata sit quātitas, & nihil intersit plus ne vel minus accipia-

cipiatur, ut illi cœteri que sumplere, satis ostendit id plus, & minus apud
eum esse, non modicum, putat drachmarum, & vnciarum quarundam,
sed longe multo maiorem, ac plurimum quoque librarum, recessum à de-
cem: cum, scilicet, ne dum recentiores, sed etiam veteres illi Medicinæ
scriptores in ea mellis quantitate valde dissentiant, & (sicuti facta inter
cētum sexaginta nouem Andromachi drachmas, libras decem Galeni,
sexq; Myrepsij propositas à Siluatico, proportionem comparatione que
patet) in plurimum librarum pondere, mensura que differant. Quapro-
pter iam colligamus existimasse Siluaticum certam nō esse mellis quā-
titatem pro theriaces compositione constituendam, neque ita determi-
nandam, quin ea possit pro varia componentis intēione mutari, vide-
licet usque ad certum gradum augeri, & imminui, neque decē pro sco-
po libras ita sibi proposuisse, ut parum ab illis recedendum esse censue-
rit, siue in excessu, siue in defectu mutatio fiat. Cœterum id, (quod ali-
qui forsan, ut vim nostrarum rationum effugiant, sub fingere sibi posse
putabunt, hoc est, cēsuisse Siluaticum, ubi per mellis additionem à decē
propositis à Galeno libris sit recedendum, non nisi modice recedendum
esse; sed ubi sit ab eisdem aliquid subtrahendum, & adimendum, nō re-
pugnare, quin maior admodum ipsius quantitas subtrahi possit) Id, in-
quam, nihil ad propositum hoc attinere videtur, nihil ad hanc Siluati-
ci mentis explicationem habere momenti. Quippe cum nobis satis fue-
rit modo probasse non ita modicum recessum illum à decem libris pro-
positis ab Aduersarijs, fuisse Siluatico, ut solum drachmarum, & vncia-
rum quarundam diuersitatem, siue in excessu, siue in defectu mutatio
fiat, præferre, significare que possit: & par constet omnino iudicium in
utroque, nimirum excessu, defectu que de Siluatici opinione fieri neces-
sum esse. Nempe qui, si decem libras illas ut sic intellectas, sibi pro sco-
po tantummodo proposuisset; cum non solum veteres illos, sed recen-
tiores Medicos etiam, exacte nouerit in hac mellis præscribenda quan-
titate varios, admodum que diuersos existere, cum sint qui decē; qui ter-
tiam ferè partem adhuc supra decem, nec non & alij, qui circiter vigin-
ti libras eius assumant; horum sententias utique reiecisset, tanquam il-
las, que longe à proposito sibi scopo aberrarent; nec indeterminate cō-
stituisset referre parum, si plus, vel minus mellis ad talem componendā
antidotum accipiatur. Quæ cuncta tamen, ut toties diximus, sana men-
te sunt intelligenda videlicet, ut intra certos gradus, & limites consista-
mus; hoc est, ut tantum plus, vel minus mellis assumi possit, quantū cer-
ta constet experientia satis esse, sufficere que, ut illo modo confectum,
& præparatum Antidotum conuenientem illico consistentiam adipi-

icatur; adeptam vero retineat, diuque coheret: de qua re iuo loco. Plura forsan, quā opus esset in vnius Autoris, qui, & si doctissimus, & admirabilis, non tamen Hippocrates aut Galenus est, explicanda sententia, sunt à nobis adducta. Sed ij consulto non temere factum id esse cognoscent, qui iam, ex iis, quæ in superioribus declarata sunt, audierunt, & intellexerunt hanc vnam nobis præ cæteris omnibus sententiā cordi perpetuo fuisse; parumque nos arbitrari referre, siue plus, siue minus (dummodo certos intra propositos limites illos, quos docuit experientia, contineamur) in compositionibus iis mellis addatur, aut detrahatur. Cui sententiæ videtur Collegium nostrum, aut saltem eiusdem præclarissimi Collegij Prior, vnà cum suis consiliarijs, octuaginta iam circiter elapsis annis, assensum, & vota præbuisse. Nimirum, Qui; cum anno 1531. fuisset inter aromatarios Venetos, & D. Cechinum Rauēnatem, & ipsum aromatarium, vt arbitror in hac eadem ciuitate, consimilis (sed in Mithridato, controuersia suborta, velletque dictus D. Cechinus, eadem inani gloriola ductus in illius antidoti confectione quatuor ad minus, præter omnem consuetudinem, specierum vncias pro libra singula mellis iniicere: illi autem omnes è contra non esse permutandam, aut violandam, vsque tunc etiam inueteratam, & nunquam interruptam, consuetudinem (& iure) contenderent; statutumque fuerit per clarissimos veteris Iustitiæ Iudices ab antiqua non esse cōsuetudine recedendum, Idque Cechinus pronunciatum non bene ferens, ad Principes ciuitatis accesserit, & petierit ab illis, vt Medici in ea re, veluti qui sanius iudicium proferre possent, consularentur; fuissentque Prior, & consiliarij (sic illi Cechino, s. Principibus ciuitatis annuētibus) ac omnis Medicorū Magistratus, ad Principes cōuocati, & circa mellis eiusmodi quantitatem interrogati; sic responderunt. *Plus minusve mellis additum, aut ademptum exiguum admodum momētum habet, quia dosim medicamentorum augere, minuereve in Medicatiū tota sit potestate. Sed aliud in his Antidotis est, quod longe maiori indiget consideratione, longeque maius ad salutem momentum habet; nunquid ea, s. quæ nunc in Mithridato, & in Theriaca simplicia medicamenta reponuntur, sint illa, quæ Autores eorum in ipsum Antidotum imponenda fore præceperunt. Si quid autem innouandum sit, hinc exordiendum est, Mellis enim quantitas pro regionum ac cæli qualitate variari potest, proptereaque cuncti ferè Medicina scriptores mellis quantū satis est, iubent imponendū esse. Tot illi. Quo fit, vt cum in posterum ea, quæ pro deperditis simplicibus substituenda tam in Mithridato, quam in Theriaca senioris Andromachi videbantur, ab eodem præclarissimo Collegio substituta (iuxta propositum*

de melle verò sancitum nihil, sed, in ipsa potissimum confectione Mitridatica; tantum, quantum satis est assumendum esse remanserit, & in eiusdem Collegij monumentis aliquando notatum sit, videatur insuper Collegium totum eiusmodi responsioni dedisse manus, & post innumeros annos assensum eidem pari modo præbuisse. (Nisi forte sit etiam in actis eiusdem nostri Collegij monitum & subsignatum circiter triplum mellis ad totum, qualis est hodierna inueterataque consuetudo, sumendum, sicuti viros quosdā excellentissimos nobis aliquando retulisse meminimus, nō appareat autem, eo quia non solum integra quædam Collegij nostri monumenta deperdita sint, libri quidā prorsus amissi, sed et quoniam excisæ, demptæ, & euulsæ nonnullis in locis librorum Collegij, paginæ quædam ex toto sint: Sicut in actis Illustris Equitis & præclarissimi viri D. D. Tho. Philologi Rauēnas à nobis, & in locis, ac libris alijs ab alijs obseruatū est.) Veruntamen quidquid de rebus eiusmodi sit, quas non desperamus adhuc vna die nos recognoscere, & ex traditis monumentis ab alijs intelligere posse, rationabilis admodum nostra, & Siluatici hæc opinio fore videtur. Cuique Galenus. 6. de comp. pharm. secundum locos fortassis arrisit, in descriptione cuiusdā stomatichi medicamenti, cuius compositio vel in musto ad compagem mellis redactio, vel in ipso quoque melle paratur. *Hoc, inquit, si preciosius velis efficere, inicies etiam cassiæ corticem, aut nardum indicam, aut malabathri folia; sufficit autem drachma vna singulorum ex iis tribus, ad tantam medicamenti symmetriā ad commensurationem, iuxta quam libra mellis vna conicitur. Nihil verò laseris (addit) si ad singulas drachmas adhuc dimidiā apponas, ut in totū quatuor drachmæ, & dimidia fiant.* Quasi dicat seruata quoque specierū symmetria referre parum, an paulò maior aut minor mellis quantitas, & copia sumatur. Quod & alijs multis innuisse videtur in locis, dum certa mellis quantitate recēsit, statim addit *vel quod satis est.* Remanet, ut pro fine capitis huius pro tot autorū examine, proque Siluatici assertionis explicatione, (cuius opinionē aliquando nos vberius forsan, & absolutius comprobare conabimur) ad te Iuuenis eruditissime, conuertamur; & quod tuum est tibi concedētes, ex quindecim propositis à te scriptoribus, sublati nostris, ambiguis & incertis in iudicium reuocatis, reliquos veluti proprios assertionis tuæ sectatores, tibi sponte ac humaniter relinquamus. In qua re tamen, si forte fiat, ut ex ijs adductis à te, vel ex alijs etiā nondum adductis, vnus aut alter distinctius alibi se ipsum explicans, ex voto tibi respondeat, & suffragetur; non proinde volumus, ut putes vnquam nos in huiusmodi

causa,

causa, te plus obmutuisse, vel amplius quam vnius aut alterius testimonium lucratum esse, fore concessuros. Interim tu nostros, qui modo sequentur, attende; studeque num tu quoque, par pari referens, aliquos recognoscere, & ex nostrorum subripere numero, ac inter primæ, tuæque classis autores, apponere, accommodare ve possis.

*Varij Magni nominis afferuntur Medicina scriptores,
qui veriore alteram sententiam, à Galeno non recedentes sequuti sunt. Cap. VIII.*



X tot igitur propositis, ac nobis oppositis, Medicinæ scriptoribus, selectis nostris, ijs autē, qui Galeni Theriacam ex Andromacho rescribentes, & easdem Galeni libras accipientes, nondum tamen quas intellexerint explicarūt, velut incertis, & ambiguis adhuc, in iudicium iterum conuocatis; iam tempus est, vt ad eos insignis, atq; probati nominis enumerandos autores, qui veteri huic, nostræq; opinioni iam subscripsere, deueniamus. In qua re tamen non ita nos diligentes erimus, & operosi, vt infructuose minima quæque sine vlla necessitate respiciamus. Non igitur vtrum mellis illud triplum ad totum quatuordecim ipsius libris, quinque vncijs, duabusque drachmis; aut tribus vncijs specierum pro singula eiusdem libra sumendis, ex toto (modica. s. quauis vnciarum differentia considerata) respondeat, nunc adamussim inuestigabimus, aut secretiori subiiciemus examini. Cum pauci cuiusdam momenti, sicuti dicebamus, in ijs, si quis recte distinxerit, & computauerit, diuersitas agnosci possit; & inter nos altercatio iam instituta; proposita que huic excellentissimorum virorum confessui dubietas, quò recta. s. illorum, sinceraque mente determinetur, non sit in minimis ijs, sed in maximis, vt puta in quatuor circiter libris à consueto pondere subtrahendis. Hinc est, vt sicuti recte pro nobis, ita etiam iure contra vos, omnes illi Medicinæ scriptores induci debeant, & iure possint, qui vel in ea talis Antidoti compositione res aridorum corporum, seu puluerum vncias pro libra singula mellis assumunt, vel præcisius adhuc, ad eam senioris Andromachi triturabilium corporum dosim, quatuordecim circiter libras, & vncias aliquas; aut triplum ad totum, optime respondere proportionarique constituerunt: Nec illi solum; sed si qui sint præter hos alij, qui copiosam magis adhuc affirmant ad opus hoc, mellis quantitatem vsurpari posse.

Horum

Horum igitur, qui sua nobis autoritate fauere, suoq; testimonio sententiam nostram confirmare possunt, triplex in vniuersum, & probatorum fanè, magnique nominis, Autorum ordo reperitur. Sunt enim plures, qui communi cuidam in cæteris ferè cunctis medicamentis, in quibus Mel ea ratione, qua superiori capite cum Siluatico dicebamus, speciebus adiungitur, acceptæ, constitutæque regulæ innixi, nobis inferuiunt, & opitulantur; dum, scilicet, in cunctis iis electarijs asserrunt, & quasi nunquã violanda lege, constituunt pro libra singula mellis tres esse, nec plures, specierum vncias accipiendas. Alteri verò secundo reperiuntur, Qui tantam mellis quantitatem in Antidotorum quorundam eiusdem ferè cum Theriaca conditionis, atque naturæ, descriptione sumentes, eatenus nobis auxiliantur, & fauent, quatenus certa coniectura demonstrant non aliam mellis ad species in Theriaces compositione quoque proportionem, ex eorum sententia constituendam esse. Postremo sunt alij, Qui in huius Antidoti confectiõne, & apparatu, præcisè, tantum mellis, quantum nos dicebamus, assumendum esse putantes, distinctius adhuc, & euidentius nostra cõfirmant. In triplici hoc iam proprius, & singularius enumerãdo, tantorum hominũ ordine, qui singulari suo testimonio nobis auxiliantur, & prosunt, non esset ab re, neque præter rationem omnino, si statim à prioribus illis, primoque dinumeratis, sumeremus exordium. Qui tamen (cum varij, diuersiq; sint, ac omnes illi ferè, qui de rebus ad pharmacopæam attinentibus, pro ratione loquenti, dignum aliquid æternitati mandarunt) quoniã proprijs, & singulis separatim nominibus, vix sine tedio, & orationis incommodo vocari possent; vna sola fanè, communiq; voce, consimul omnes in testimonium, & iudicium à nobis nuncuparentur, nisi propositæ difficultatis explicationem indagaturi, ambiguitates alias in medium potius adducere, & suscitare velle videremur. Cũ. s. testes ij, nostris ab aduersarijs, vt audio, rationem aliquam diuersitatis inter alia medicamenta, & magnas, ac nobiles confectiões has afferentibus (puta quòd illa nec succos, nec lachrimas, neque gummas habeant, quæ veluti liquabilia, & humida corpora, minus mellis addendum indicant) despiciantur, & parui fiant: Immo verò, cum eorum nos etiam fide, testimonioq; vix egeamus, nec desint alij præter hos, vndiq; irrecusabiles, & nullo mō respuendi testes. Quanquã forte non esset arduũ, & graue nobis ostendere (quidquid alij censuerint) nihil ad mellis quantitatem imminuendam gummi, succos, & lachrimas, sed succos præ cæteris ipsos (quamquam in compositionibus ijs actu sicci sumantur) indicantis, aut cogēsis habere. Et ex altera parte quoque nōnulla possent inter opiata medicamenta

dicamenta referri, prædictis omnibus neque destituta liquoribus, quæ tamen eandem, quam ea communis regula docet, mellis quantitatem ad species collata, sibi determinant: qualia forte sunt Aurea Alexadrina, Efdra, & huiusmodi conditionis alia nonnulla. Quæ cum minori, quàm ipsa Theriaca, tempore quoque ab ambientis iniuria feruentur, nec proprias vires, ac integras facultates tam diu, quàm illa, retineant, quopiam etiam modo (si licet hic à minori ad maius argumentari) demonstrat minus in illis impendere periculi, si non ita copiosa mellis quantitate parentur, quam in Theriaca, cui multo, diuturniori que tempore est opus, ut possit ad culmen vigoris, & summum insitæ sibi, & ex omnium commixtione suborientis, perfectionis ascendere. Quo sanè tēporis longiori spacio, qua mora, timendum, ne mellis ipsius defectu siccetur, & hyeme potissimum, nec non frigidis regionibus illis, ad quas tanta copia deferri solet, are scat. Veruntamen ne, sicuti dicebamus, ex vna questione, consulto quasi trahamur in alteram; & ut cum amicis, & carissimis nostris humaniter etiam, & amice tractemus, libenter hos prætermittimus, & ex toto modo relinquimus.

Quamquam autem, inceptum ordinem consequentes iure prioribus ijs prætermisissis, Secundi statim testes occurrerent; & forent ij, qui Theriacam, aut aliud Antidotum ad illius instar, & simili, quo Theriaca, modo, parantes, (siue simplicibus permutatis aliquibus, siue etiam additis nonnullis alijs) eadem proposita toties copia mellis ad arida simul vnienda, permiscendaque corpora semper vtuntur, primo loco ponendi, & à nobis ante reliquos adducendi. Quoniam tamen ij neque veluti principales, sed potius vti consequentes, & secundarij quasi contestes, ut cum aduersarijs nostris quoque contendant, in iudicium placide vocabuntur, tertio iam recensitis à nobis, concesso loco, post illos accedent. Nec iniuria, siquidem ij, quos vltimò recensuimus, veluti qui legitimam ipsius Andromachi, Galeni que Theriacam describentes, affirmant hac ipsa consueta quatuordecim librarum vnciarum quinque, vel circiter mellis opus esse quantitate pro speciebus, & aridis corporibus vniendis illis, quæ ab Andromacho seniori, & à Galeno determinata, præscripta que sunt, verè sua nobis autoritate fauebunt, & primum in eiusmodi negotio locum iure merito sibi vindicabunt.

Veruntamen ut non amplius eos, quos recognouimus, & quorum testimonies adduximus, Siluium, scilicet, Vvecherum, Collegium Bergomense, forteque Rôdelletium, atque Siluaticum, ad idem opus bis convocemus, exordium quæsumus sumamus ab illis, quos Iuuenis noster eruditissimus in secunda classe reposuit, & artificiose contradistinxit ab ijs, quos

quos omni, præterquam, Georgij Melichij, subsidio, tutriciq; manu de-
stitutos, in tertia classe, veluti à secunda (nulla tamen apud nos necessi-
tate) distincta, superfluè locauit.

1 Primus itaque (vt eodem quoque nos pede gradiamur) occurrit
Valerius Cordus, doctissimus sanè vir, & in hac materia diligētissimus,
ac versatissimus: Quē proinde tanti Gabriel Falopius Medicorum sui
temporis facile primus, fecisse videtur, vt libro de cōpositione Medica-
mentorum apertè dixerit, se iure, relictis omnibus alijs, qui materiam
hanc pertractarunt (eum. s. eorum plurimos aut defecisse, aut falsa medi-
camenta descripsisse dignouerit) Valerium Cordum amplecti, sectariq;
voluisse. Occurrit, inquam, is primus; & cum eo totum Collegium No-
rimbergense. Illius enim præclarissimi Collegij Medici, decreto Sena-
tus, maxima diligentia, & indicibili cura dispēsatorium Cordi recogno-
uerunt. Qui cum Senatui iam retulissent nihil absolutius, atque emen-
datius in hoc descriptionum genere, Typis inuulgatum adinueniri, tūc
Senatores librum illius non solum publicum faciendum esse, sed etiam
(vt ex libri præfatione colligitur) Pharmacopolis omnibus, quò deinceps
ipsum vt lumen quoddam consequerentur, offerendum forè decre-
uere.

2 Hoc igitur Collegium, hic vir duplicem eo libro Theriacæ com-
positionem, & apparatus induxit. Alterum cui circumscriptionem talē
imposuit. *Theriaca secundum descriptionem Andromachi.* In qua de
melle loquens hæc ait, *mellis despumati optimi triplū, hoc est, libras qua-
tuordecim uncias sex.* Alterum autem paulò posterius, ijs verbis. *The-
riaca Andromachi senioris ē carmine eiusdem elegiaco translata.* In cu-
ius mellis præscribenda quantitate deinde tam accuratè, tamquē mi-
nutim proportionem mellis ad species examinasse vī; vt, cum in ea tum
Abrotanū tum ēt Acorū ad octo simul drachmarū pondus, desideretur,
à priori mellis quantitate voluerit tres uncias esse subtrahendas, & solū
libras quatuordecim, cum tribus vncijs accipiēdas, ac in omnium mix-
tione tantummodo fore ponendas. Quæ cuncta non immutata, sed pro
ratis, & firmis habita, Celebre Collegium illud ad hæc vsque tempora
iussit, & iubet, vt à suis Myropolis obseruentur, & ne tantillum quidem
aut permutentur, aut vitientur; Quemadmodum ex vltima illius Di-
spensatorij (Collegij Medicorum eiusdem Reipublicæ Norimbergensis
opera adaucti, mendatiq;) editione sub anno 1612. vnicuique conspi-
cere, & intelligere non erit arduum.

3 Post duplices testes adductos, nimirum, Valerium Cordum, & Col-
legium Norimbergense, succedit Medicorum pariter omnium Augu-

nam Collegij præclarissimi testimonium. Qui in prima compositione earum, quas Narcoticas, siue opiatas appellât, Theriaces Andromachi senioris ex Galeno descriptionem apponentes, ita de melle loquuntur. *mellis d. spumati triplum, i. libras quatuordecim, uncias quinque, drachmas duas.* Non est autem subticendum, aut prætereundum, quod autor ipsius Antidotarij, vel quintæ forsân æditionis illius in annotationibus habet. Is enim qui, quales eæ fuerint Galeni decem libræ mellis, determinate non nouerat, & num ponderales, an verò mensurales essent, incertus, decem tñ esse dignouerat; ne quis eū, inconsulto Galeno, Theriacā descripsisse putaret, hæc ait. *Mellis triplum accipio in hac cōpositione, ut in cæteris plerisq̃, licet Galenus ex Andromacho, Foesius, Fuchsius, Rondellctius, & alij pleriq̃ libras tantū decē apponant.* Quasi dicat, quas libras intelligant non expresse determinantes. Impium siquidem esset existimare celeberrimum Collegium illud à Galeno & ab alijs Medicinæ scriptoribus recēsitis ab ipso, recedere, & nulla præmissa ratione, spontè, voluntariè que declinare.

4. Quarto loco Ioannis Pontani testimonium accedat. Quod gratis nobis ab aduersarijs (nisi tamen circunforaneum illum, & circulatorum Pontanum intelligant) condonatum accipimus. Nos enim, ut vera semper fateamur, ignoramus autorem: nam in Ioannis Iouiani Pontani varijs operibus, quantum pro temporis angustia potuimus, diligenter inspectis, nihil, quod spectet ad ipsius Theriacæ compositionem adinuuenimus. Non ita autem mirandum nos ignotum autorem, cuius neq; cognomen, neque libri, neque locus aliquis ubi talia loquatur, adducitur, ex solo nomine recognoscere non potuisse.

5. Ioannem verò Placotomum, qui testis est quintus, in suo dispensatorio vidimus triplum mellis Attici assumi iubere. Ex cuius autoritate putamus sententiam nostram non parum emolumentū consequuturam; cum hic in præfatione scribat se nullum certum, & solum autorem fuisse sequutum, sed eos omnes, quos optimos existimauit, & tales fuisse dignouit inuicem contulisse; deinde verò quæ sibi meliora visa sunt, selegisse.

6. Sextus testis, à nobis etiam adductus, erit Ioseph Quercetanus in Pharmacopœa restituta, dum Magnæ Theriaces Andromachi descriptionem vulgarem affert. In qua cum certè nonnulla ponat, quâquam ea modica sint, quæ in vsuali Theriaca ex Galeno, & Andromacho nō reperiuntur, forsitan iustius, & rectius inter eos reponendus, & enumerandus esset, qui tandem, uti contestes, in causam hanc vocabuntur. Veruntamen, quoniam huic ab eruditissimo Iuene hic et locus adscribi-

ur; placuit nobis eundem eodem quoque loco recipere. Scribit igitur de melle loquens. *mellis despumati triplum, i. libras quatuordecim, & uncias quinque, & drachmas duas*. Ita siquidem intelligendum est; & emendanda litera, quæ pro quatuordecim libris, *quatuor*, solas, corrupta, refert, vna tamen cum *uncijs quinque duabusq; drachmis*. Cum. n. ipse Theriacam recenseat Andromachi, vulgari sumpta, & accepta descriptione, in qua pluribus pondus hoc mellis quatuordecim librarum numero circiter, præsignari consueuerat; credendum est, triplum illud mellis eiusdem ab eo nuncupatum, non ad quatuor libras Parisienses (quod. s. tanti nostras excedant, cum minime id verum sit) esse referendum, sed ipsam literam fuisse corruptam, & vitio typographi bina prætermittas syllabas esse; proptereaque legendum fore nō *quatuor*, sed *quatuordecim* libras, cum reliquis vncijs; & drachmis, quæ simul omnes acceptæ, triplum explicatum ab ipso conficiunt.

7 8 Magnifanè, multiq; faciendus est testis, qui septimo loco succedit. Hic est Doctissimus ille Ioannes Renodæus Medicus Parisiensis, & Regius, cuius auctoritatem, cuiusque consilium Parisiensium Medicorū Collegium approbasse visum est. Hic in Officinæ suæ Pharmacopæorū tertio volumine, Theriacā Andromachi senioris ex Galeno describens, de melle sic ait. *Mellis Narbonensis, aut alius optimi triplum, seu libras quatuordecim & semis*. Quam eandem, in Mithridato describendo Damocratis ex Galeno, pari modo præscripsit: Triplum enim, & in illo dixit, seu libras nouem, & vncias quatuor.

9 Sequitur Vnicus pro pharmacopolis Venetis ab aduersarijs testis adductus, Georgius Melichius, Qui tametsi Aromatarius & ipse, in simplicium tamen dignotione versatissimus, & in compositione Medicamentorum diligentissimus habitus est: Cuius Theriacam Prosperus ille Borgarucius Medicus, & ipse Regius ac non ignotus, in suo Pharmacopæorum Theatro quinta distinctione probauit, & præ ceteris alijs mirum in modum commendauit. Hic fanè tres aridorum corporum, & puluerum vncias pro libra singula mellis accipiendas affirmans, parum in tota quantitate recedit ab enumeratis Autoribus, qui triplum ad totum accipiendum esse constituerunt. Qui modicus tamen, & (quatenus ad propositam attinet ambiguitatem) nullius momenti recessus, contingit aliquando, vt dicebamus, ob id, quod nō ita certus, ac necessarius est numerus eorum, quæ solui, macerariq; vino solent, quin & eorum aliqua tundi, & in puluerem redigi possint, quemadmodum etiā aliquando contigisse Galeno notatum, & animaduersum à nobis in superioribus est.

10 His usque nunc ab eruditissimo vidua quoque recentitis Autoribus; nos etiam alios (& illos sanè grauissimos) testes addamus: Quos astutè potius quàm negligenter, aduersarium nostrum omisisse nō inficiamur; potissimum cum quorundam horum meminerit, quāquam eos neque singularius enumerasse, neque cum alijs etiam reponere voluisse, visus sit. Et vt ab Aromatariorum Thesauro sumamus exordium, illius Autorem Paulum Suardum decimo loco, pro decimoteste, collocabimus. Cuius autoritas paruifacienda nō est, vt quæ, scilicet, fidem aliquam à præclarissimis Collegij Mediolanēsis Medicis, quibus ab Autore dicatum fuit, suscipere videatur. Describitur in eo libro Theriaca Andromachi iuxta descriptionem quandam (vt autor asserit) in libello de Venenis à Gentili cōscripto, repertam. Quam se Magnus ille Gētilis profitebatur ex quodā Andromachi manu scripto libello mutuatū esse. Est autem descriptio vel eadē, vel parum à vulgari dissimilis, in qua de melle loquens, hæc ait. *Mellis de spumati libras decem.* Ego verò dum ita legerem, existimabam hunc etiam virum inter autores incertos reponi posse, immo verò de facto reponendum, vt qui, non explicet quasnam libras intelligat, quasve putauerit Andromachum intellexisse. Veruntamen vbi diligentius adhuc progressus vltèrius, quæ sequebātur attendi; facile noui doctissimum virum nostræ ferè subscripsisse sententiæ, vel libras illas, pro mensuralibus accepisse. Quandoquidem ita subdit. *Et nota quod pro qualibet libra mellis sunt uncia tres predictarum specierum, & hoc voluit bonus Andromachus, & apponi debet, vbi Theriaca sit habitura virtutem, &c.* Quoniam autem computatione facta, & ad calculum melle, speciebusque reuocatis, non mihi bene singulis decem libris illis assumptis, tres aridorū, seu puluerum vnciæ respondere posse videbantur, pendebat Animus, & dubius adhuc existimabā potuisse cōtingere, vt error, à tribus, ad quatuor vncias, impressoris incuria subortus esset; ac proinde legēdum, pro qualibet libra mellis quatuor specierum vncias commisceri debere; atque sic locum illum emendandum esse. Veruntamē, vbi illud idem ad verbum in alio vulgari, & Italico impresso sermone, scriptum inueni reuera cognoui non aliam, quam explicatam à nobis, illius Autoris sententiam, & mentem constitui posse.

11 Confirmauit autem opinionem nostram, & ne mendum amplius in eo textu, siue vncijs illis, fore crederemus, vndecimus testis effecit, nimirum autor luminis Apothecariorum, Quiricus ille de Augustis de Torthona, Medicus quoque suo tempore nominis alicuius; Is enim eiusdem luminis distinctione secunda, quo loci de electarijs amaris ser-

monem habet, eandem eundemque rere verbis Theriacæ descriptionem apposuit. Quam ipse quoque testatur in quodam libello Gentilis, de venenis inscripto, reperijisse; immo verò, quam etiam addit & ipse, falsum esse Gentilem se, ex quodam manuscripto libello siue senioris, siue iunioris Andromachi, fore mutuatum. Posita verò descriptione (simplicium tamen ingredientium pondere variato, cum. s. initio trociscorū scilliticorum libram assumat, & deinde reliqua, proportionem seruata, cuncta recenseat) de melle tandem hæc ait. *Mellis cocti, & despumati Rub. & lib. 23.* Quam deinde dosim (ignotam mihi) distinctius explicans, ita subdit. *Quod est pro qualibet libra mellis uncias tres specierum predictarum, & hoc voluit bonus Andromachus, & apponi debet, ubi Theriaca impositam sibi facultatem, & vim à scriptoribus, est assequutura.*

Subdit autem autor idem secundā, ac alteram Theriacæ descriptionem, quam etiā Galeni vocat. In qua pari modo, nec sanè solum semel, sed bis etiam, & pluries, ipsos lectores admonet, tres puluerum, seu specierum illarum uncias, esse pro libra singula mellis accipiendas.

Hi sunt ex autoribus illis, præcipui duo, quos tetigit (licet pro se non ita tutò produxerit) Iuuenis noster eruditissimus in calce primi capituli disputationis illius, dum ita scripsit. *Non me latet præter citatos autores in capitis fronte, alios etiam posse ad præcitatas sententias adaptari, ut sunt Iacobus de Manlijs in suo luminari maiore, Quiricus Augustinus Terihonensis in lumine apothecariorum, Paulus Suardus in Thesaurō Aromatariorum & alij.* Ceterum, vtrum ij possint in fronte capitis quasi prioris illius, quam Aduersarij nostri sequuntur, sententiæ fautores, apponi; iudicent alij. Num verò, quoniam parum suas ab Andromachi ex Galeno relata descriptione, diuersas habeant, inter contestes potius, quam inter præcipuos testes sint reponendi nos non moramur.

12 Sed quæso iam duodecimus testis accedat. Erit autem hic doctissimus ille Bernardus Dessenius Cornemburgius, Medicus Colonienfis; quem noster aduersarius ambiguum vocat, ac ita dubiè fuisse loquutum affirmat, ut ex ijs, quæ apud ipsum scripta leguntur, quam, ex tot recensitis opinionibus circa mellis quantitatem pro conficienda Theriaca, sententiam conscriptari maluerit, nec bene colligi, nec euidenter intelligi possit. Cum tamen sic aperte loquatur, ac ita nos propriam sententiam (ni fallor) edoceat: ut nisi Iuuenis noster eruditissimus oscitanter, & cursim, quæ primò suo de Medicamentorum compositione librò notata, nobis que ab ipso significata fuere, legisset, facile noscere, & intelligere potuisset, eum triplum mellis ad totum (ut moris est) in talis An-

id est confectione iunendum, & coniiciendum esse præcepisse. Si qui-
dem Is, ubi Theriacam Iunioris Andromachi ex viperis, *Galene* dictâ,
rescripsisset ad vnguem; & mellis drachmas centum, & quinquaginta
suscipiendas esse (quemadmodum in ea Iunioris Andromachi descri-
ptione pedestri, corrupta forsan litera, legitur) docuit. Iam cæteris sim-
plicibus omnibus diligenter examinatis, de melle tandem hæc ad ver-
bum scripta reliquit. *Mellis Attici drachmas centum quinquaginta. Eæ
constituunt uncias medicinales decem & octo, & drachmas sex. Siquis
autem vellet quadruplum mellis iuxta Andromachum accipere, erunt li-
bræ medicæ duæ, & uncia una.* Quid clarius? Quæso ne poterat in ea
drachmarum ambiguitate, certius, & euidentius sententiam propriam
doctissimus Dessenius nobis exponere, & explicare? Miror (Dilectissi-
me mi, vt iterum seriem orationis ad te cōuertam) miror profectò quō-
tu, qui in Logisticè, siue in subducendi ratione peritus, ex certa dosi pa-
stillorum scilliticorum vicies multiplicata, mellis tui quantitatem illā
doces adinuenire; non noueris Dessenium nostrū, ubi ducētis redditis il-
lis Andromachi drachmis per quartæ partis additionē, videlicet, quin-
quagintarum (tot enim drachmas efficiunt, libræ duæ medicæ, & vn-
cia ab ipso relatæ) quadruplum effici mellis ad totam simplicium do-
sim, quæ compositionem Theriaces ingrediuntur, affirmat, velle quoq;
nobis innuere, immo verò distinctè significare, suppositum illum cētum
& quinquaginta drachmarum numerum ab Andromacho præsigna-
tum, tripli rationem habere? ac proinde tātum mellis ipsum existima-
se ex Andromachi placitis esse sumendum? Quod, si quæ sint, quidve si-
gnificent apud Andromachum eæ centum, & quinquaginta drachmæ
subinferas ignotum esse; propterea quæ incertum in mellis quantitate
reddi Dessenium. Non bene (mihi credas) argumentaris. Neque enim
modò quid voluerit per illas Andromachus, quidque Dessenius per
libras has medicas intellexerit; aut quomodo duæ libræ cum uncia, qua-
druplum mellis efficiant, inquirimus, & disputamus. Sed quam putaue-
rit vir acutissimus suscipiendam esse mellis quantitatem vt rectè The-
riaca parari, componiq; possit; & num in illa determinanda, præscribē-
da quæ dubius, & incertus existat, hoc illud est, quod inquirimus, hoc il-
lud, de quo nunc disputamus. In qua re patet sic ipsum sententiam suā
explicasse, vt inter ambiguos, & varios enumerari nullo modo possit;
quippe qui triplum censeat accipiendum, de quadruplo verò indeter-
minatè loquatur. Quam eandem tripli proportionem ad totum in Mi-
thridatica confectione quoque sumptitandam esse voluisse, cognoscent
omnes, qui non ad pauca respicientes, priora verba tantummodo ex iis,
quæ

quæ in Mithridatico Dalmocratis, & adnotationibus in illud habet, decipient; siquidem ij primo se ipsos in eius intelligenda sententia, deinde verò cæteros etiam in eadem explicanda, decipient; sed attentius quoque cætera perlegent, & examinabunt; ad calculumque totam propositam ab eo mellis copiam, & simplicium omnium Antidotum illud ingrediendum pondus, iterum reuocabunt. Cum enim primo dixisset, & asseruisset conuenientem mensuram mellis esse triplum ad species; distinctius explicans totam mellis ipsius quantitatem, & pondus hæc ait. *hoc est libra nouem, & media, atque vncia tres.* Quod sanè pōdus sicuti triplum ad totum (quemadmodum facta diligenti computatione patet) re vera constituit, Ita, communiori nomine, speciebus acceptis, hoc est, pro totis corporibus ijs, ex quibus Mithridatica illa confectio parari solet, quemadmodum forte sumpsit hic autor, triplum ad species vocari potest.

13 Hoc idem decimotertiò confirmat totum Coloniensium Medicorum Collegium in vsuali pro pharmacopæis dispensario, Reipublicæ illius, Senatus commissione, concinnato: hoc enim præclarissimorum Virorum illorum Collegium, ij Reipublicæ illius Senatores in opiatis electuarijs de Theriaca loquentes, vbi talem, & ipsi iunioris Andromachi Antidotum, *Galene*, dictum, rescribentes ad vnguem, vini iusserunt tres libras, & vncias quatuor, esse sumendas, mellis autem Hispanici libras decem: in singulorum simplicium ordine disponendo deinde, *Valerij Cordi* consilium recipientes, & approbantes, de melle tandem hunc in modum adnotatum, & scriptum reliquere. *Mellis optimi, & Aromatici, quale è Lithuania Daniicum affertur. Despumetur id sedulo: despumari postremo mellis, sume libras quatuordecim vncias sex, &c.*

14 Sed quæso, mi doctissimè, Ioannis illius Guinterij Andernachi testimonium, quod erit decimum quartū, vbi reliquisti? Vidisti ne, quæ feribit hic Autor secundo suo commentario de veteri, & noua medicina faciunda, dialogo septimo? Si vidisti, cur & hunc vnà cum alijs non adduxisti, cur Patribus ijs abscondisti? cur, sicuti tuæ partes erant, & tibi ab excellentissimo Collegio tantum impositum, & mandatū fuerat, nō reuelasti? Si non vidisti, Quæ incuria? parcas; Quæ negligētia? Cur Ioānem Paulum de Spinellis? cur Calestanum? & nō etiam Andernachum virum grauem, & tanti nominis, consuluisti? Dicam ego. Non incuria, non negligentia, prætermissa huius auctoris a te fuit. Quis enim nescit te probatorum auctorum esse studiosissimum? Sed præstitit dissimulasse, ac tanti viri non meminisse; nimis enim est grauis autor, magnæ nimis existimationis, & dignitatis existit: & plus ab hoc vno solo verbaris incommodi,

continui, quam continui ab omnib. alijs a te recentitis, coniequi pos-
se. Sed quod abscondisti, nunc reuelabo, quod tacuisti nunc non filebo.
Audite Patres, quid Magnus ille Galeni discipulus, & fidelis interpres
de Theriaca paulò superius allegato loco loquatur. *Theriaca*, inquit,
Andromachi ex libris Galeni descripta, refert autem compositionem
illius ad vnguem, vt ex Andromacho Galenus habet: vbi de melle, po-
steaquam totam. s. compositionis illius normam explicauit, hæc ait.
Mellis Attici despumati libras quatuordecim uncias sex. Neque verò
contentus ijs; ne forte quis ipsum à Galeno recedere suspicaretur; in ob-
seruationibus statim, & illico subdit. *Recentiores, vt Auicennas, & Ni-*
colaus, non nihil in descriptione Theriaces euariant, & quadam etiam
omittunt. Hæc autem est vera Andromachi compositio, quam Galenus in
Antidotis recenset. Notandum in ea veteres plus aliorum medicamento-
rum, minus autem mellis, quam recentiores, Theriaca indidisse; eoq; il-
lam solidiorem extitisse. Olim enim quatuordecim tantum libra addebä-
tur, nunc autem viginti iuduntur &c. Quid clarius, & in Galeno? Id
ipsum iterum in compositionis Theriacæ docendo, recensendoque mo-
do, repetit, atque verbis ferè confirmat eisdem, ait enim. *Tandem omnia*
mellis optimi, quale ex Lithuania affertur, & probè expurgati, libris qua-
tuordecim, & uncis sex excipientur, tot ille,

15 Quam sententiã sequitur, & veluti testis decimus quintus, maxi-
mè comprobat, non minoris existimationis, nec ignotioris in Medicina
nominis, elegantissimus Ioannes Fernelius, septimo libro suæ Thera-
peutices siue medendi methodi cap. de Antidotis humidis; Is. n. vbi The-
riacam Andromachi senioris virulentarum bestiarum ictibus, & exitia-
libus venenis aduersam, recēset ad vnguem, de melle scribit. *mellis opti-*
mi, & expumati triplum. i. libras quatuordecim, uncias tres. Quam pro-
portionem inquit accommodatam, atque ita symmetriam esse, vt ad
summam dosẽ illius (quæ circiter est à scriptulis quatuor ad sesqui-
drachmam) contineat scriptulum pulueris vnum; quemadmodũ qua-
tuor scriptuli deinde totius compositionis illius opij granum vnum ac-
cipiunt, continent, & complectuntur.

Quatuor adhuc pro capitis huius absolutione supersunt adducendi
contestes. Sunt autem ij, Ioānes Manardus, Arnaldus Villanouannus,
Petrus Andreas Mathiolus, & omnes Ægyptij, qui ad hæc vsque tem-
pora Theriacem, sed parumper immutatam à nostra, conficere solent.
Omnes igitur ij, potissimum verò Priores, quamquam Galeni, aut An-
dromachi Theriacæ descriptionem non afferant, neque compositionem
eius edoceant: ex ea tamen proportionẽ specierum, seu corporum tri-
turabilium

curabimur ad mel, quam in proprijs quibundam a se præscriptis Antidotis, ad venena potentissimis, assumendam esse constituunt; satis indicant, & evidenti coniectura demonstrant, se in Andromachi ex Galeno componenda Theriaca, non alia mellis ad species vsuros esse proportionē, non aliam existimasse sumendam esse quantitatem.

16 Porro Manardus in eiusmodi re duobus in locis sententiam, ac propriam sui ipsius mentem nobis innuisse, immo verò (secundo loco potissimum) luculentius etiam explicasse videtur. Primum quidem in 6. suarū epistolarum medicina. libro, sed epistola 3. Quo loci seu scribat, seu potius cuidam epistolæ, ut arbitror, Francisci Caballi respondeat; Qui tūc temporis Theriacam magno cum apparatu in amplissima isthac Venetiarum Vrbe, obsequentium, ut ait, seplasiariorū Venetorum manu (erat enim Medicus & insignis) cōposuerat, & præparauerat, dum plura Manardus, quæ sibi persuadere posse videbātur, defectuosam in multis Theriacæ compositionem illam existimandam & habēdam esse, recenseret; Ostendit & innuit mellis quantitatem (quæ semper fuit eadem, mutata nūquam) sibi minimè fuisse suspectam: cum. s. in multis simplicibus medicamentis affirmet occasionem oriri, præberi quæ sibi, ne possit ex toto fateri, & amicissimo viro consentire Theriaces compositionem, tunc temporis eius opera, præsentia quæ preparatam, & absolutā, aliquo vitio carere; nimirum, quia multa ex illam ingredientium numero, simplicia medicamenta sint prorsus nobis ignota, vel iam fortasse defierint, & obsoleuerint. Quòd si maiori quoque mellis quātitate putasset in eiusdem cōpositione Caballum, & Venetos Aromatarios eos vsos esse, quam iustum sibi fore videretur, utiq; & hanc, vnā cum causis, & rationibus alijs, Caballo, quò iustius eam reprobareret, & non immerito demonstraret suspectam sibi fuisse, rescripsisset, & enumerasset. Ceterum, ut quam vetus, & antiqua sit hæc tali modo componendi Theriacam Venetijs consuetudo, noscatur, existimo nō ab re fore, quo fuerit anno, quo tempore hæc à Manardo ipsi Caballo epistola missa, referre. Fuit igitur, sicuti legitur apud eundem, Anno Domini M. D. IV. die sexta mēsis Aprilis. centum. s. nouem quæ, ac ferè, dum hæc scribebamus, decem transactis annis, Alter autem & euidentior sanè locus in eodem est lib. 5. earundem epistolarum epistola tertia. Vbi loco Theriacæ describit Antidotum simile, sed immutatis aliquibus, Antidoto ex sanguinibus, cuius meminere Galenus, Paulus, & alij: huius autem in fine, sic ait, *Fiat tenuissimus puluisculus ex omnibus, & cum quadruplo mellis electi bene q; spumati commisceatur, & vase Argenti purissimi, veluti Thesaurus, conseruetur.*

17. *Antidotus* autem, v. *h*anobannus eandem proportionem in sua *Theriac*a (cuius etiam meminit Collegium Norimbergense) seruasse videtur: quanquam saccharo potius quam melle velit excipiedos pulueres esse: Immo, verò si pulueres tantum accipiantur, longè maiorem.

18. Petrus Andreas insuper Mathiolus in præfatione sexti sui cōmentarij in libros Dioseoridis Anazarbei, vbi p̄seruatiuū illud Antidotū, cuius etiam meminit Collegium idem Norimbergense, *Theriac*es instar, conficere docet, & in quo tot simplicia, gummi, lachrimas, succosque varios, & multiplicis rationis iniecit, de melle, quo species, & pulueres iubebat excipi, & vniri debere, sermonē habens, tantum illius assumendum esse præscripsit, quantum (vt vnicuique facta diligenti computatione constabit) ac si dixisset tres specierum, & puluerum eorum vncias pro mellis vnaquaque libra coniiciendas, & addendas esse.

19. Denique, vt huic capiti finem, & terminum iam imponamus, rem, & opinionem nostram omnium Ægyptiorum Medicorum cōsuetudine, consensuque cōfirmemus. Hi siquidē sua illa in Antidoto, quā, sub Andromachi *Theriacæ* nomine, conficere, præparareque solent; & in qua (sicuti libro quarto de Ægypt. medicina cap. 9. doctissimus, & eruditissimus vir D. Prosperus Alpinus diligentissimè notatū reliquit) totidem ferè simplicia, variatis tamē aliquibus, assumi volunt; de melle postremo loquentes, tres, illius optimi, partes accipi iubent; quòd idē est, ac si dixissent triplum ad totum. Coeterum quanuis hos ab Andromacho seniori quopiam modo recedere, ac in ipsa mellis quātitate differre, vir ille doctissimus, 12. cap. eiusdē libri demonstret; ea tamē differentia tota videtur in eo forè constituta, quòd illi determinauerint quātitatem ad triplum, Andromachus autem sit indeterminate loquutus. Atque tot sunt, tanti que nominis Autores, qui nostræ huic opinioni certo fauentes, tuis, à nobis, (quorū plurimi, vt dicebamus, inter ambiguos reponi poterant,) obijciuntur, & contraponuntur, vt in hac, nō dicam amplius paritate, sed scriptorum, & numero & nomine disparitate, iam noscant omnes, vicisse nos, ac proinde nihil innouandum, sed in antiqua, & inueterata consuetudine persistendum; cum neque Galeni autoritas, velut ambigua, neque ceterorum Medicinæ scriptorum testimonia, vti pauca, pauci que momenti, sufficiant; nec vllum ex tali cōsuetudine subortum incommodum cogat; vt aliqua nunc immutare pro voluntate, seu potius quorundam impetu solum, & animi concitatione, non autem aliqua, nisi minus quam probabili, ratione persuasi, debeamus.

*Rationes, quæ ab Aduersariis colligi possunt, ut propriam
sententiam comprobent, & tue antur, in ordinem, &
ad certum numerum rediguntur, ac recensentur.*

Cap. V I I I I.



Empus est, ut aduersariorum nostrorum tela, quibus non præclare solummodo, sed feliciter etiam, & prospero euentu nobiscum pugnasse gloriantur, non modo retundere, verum etiam dirumpere penitus, & omni ex parte diruere, labefactareque studeamus. Sed præstat etiam (ut quibus armis ij pugnet, vnusquisque cognoscat) rationes eorum suboscure pronunciatas, lucidiores primum efficere, dispersas autem in vnum colligere, & congregare. Quantum igitur nobis ex multis, sed ijs potissimum, quæ ab eruditissimo Vidua, secundo, & tertio capite suæ disputationis allata fuere, deducere licuit; Duo sunt fundamenta præcipua, quibus innixi putarunt Aduersarij nostri tum facile posse se ipsos ab ijs, quæ sibi obijci posse dignouerant, illesos vndique custodire, seruareque; tum etiam inde iacula in nos contorquentes, admodum graues omnibus nostris, & insanabiles plagas infligere.

Primum fundamentum illorum est; Quod decem libræ mellis à Galeno pro talis Antidoti compositione propositæ, mensurales constitui nequeant, sed ponderales prorsus existant. Alterum autem, quod etiam si pro mensuralibus acciperentur, non tamen, vbi reducerentur ad pondus, tantæ quantitati, copiæque mellis, quanta solent Veneti Aromatarij in ijs componendis Antidotis vti, responderent, sed longè minori. Primum ex duobus ijs fundamentis, multipliciter Iuuenis noster eruditissimus probaturus, dū secundo suæ disputationis allegato capite quibusdā rationibus à se formatis, & sibi metipsi, ni fallor, à semetipso tantū oppositis, respondere conatur; nonnulla simul aduersus nos tela iacit; atque illico bina quædam, quæ nostra putat (cum à se tamē pro voluntate cōficta sint nunquam à nobis, neque per somnum excogitata) supposita, repobat. Primum inquit, immo etiam probans (sed oleum prorsus & operam ludens) non esse verum absolute statuere libras mensurales, ita vocatas, ponderales exuperare. Multoque minus, veluti necessarium assumi, secundo subaddens, decem mellis nuncupatas à Galeno libras, eò quoniam mel inter liquores recenseri soleat, mensurales esse, pondera-

les verò dici non posse. Quibus duobus, veluti constitutis a nobis fundamentis, initio spretis, & tanquam falsis omnino reiectis, ac reprobatis, priorem hanc ad prioris sui fundamenti probationem, rationem adducit, qua proprie magis, & doctius demonstrare conatur non posse decem illas propositas à Galeno libras, nisi quatenus signa sunt corporum grauitatis, & ponderis, non autem quantitatis, & molis, intelligi, & explicari. Cum enim indifferenter, & indeterminate librarum nomen, dum ad liquores, seu liquida corpora comparatur, tam eorum pondus, quam etiam molem, siue mensuram innuere, significareque possit; quæadmodum ex Galeno 6. de compositione medicamentorum secundum genera cap. 8. colligitur, Vbi Medicos inquit in præscribendis Medicamentis, dum liquidorum corporum libras, & uncias vsurpandas esse præcipiunt, accuratiores fuisse debere, dilucidioresque in explicando, num ponderales, an mensurales libras illas, & uncias intelligendas esse voluerint: immo verò quemadmodum Galenus idem obseruasse quædoque videtur (nimirum Qui liquida sæpè pondere prefinire, determinareque sine illo signo, *pondo*, consueuerit: sicuti primo de localium med. comp. primo quoque capite patet: vbi iubet ad libram vnā Romanam olei, vnciam vnā Euphorbij, quæ pars, vt inquit, duodecima est Olei, forè coniiciendam, & immiscendam) Credendum utique, ac rationabili coniectura constituendum est libras illas, quæ indifferenter, & pondus, & mensuram præferre possunt, tunc solum pondus significare, & ad illud determinari solummodo, cum in rerum descriptione præcedit, vel subsequitur aliquid, vnde, quasi certo quodam signo, deduci, cognoscique potest ponderales eas libras esse, non mensurales. Rei cuius exemplum pulchrè demonstrat autoritas illa superius adducta: Cum enim asserat ibi Galenus vnciam vnā, & ponderalem, Euphorbij, duodecimam esse partem olei totius; clare constat, ex illo subaddito, libram eam olei, quanquam signum illud, *pondo*, non habeat annexum, ponderalem esse, non mensuralem. Iam verò patet in descriptione Theriaces cætera cuncta pondere dimetita tum ab Andromacho, tum à Galeno fuisse. Quare cum statim post illa, Galenus decem libras mellis enumeret; credendum est ipsum illas vt ponderales, non autem veluti mensurales, accipere, intelligereque voluisse.

Confirmat hanc ipsam rationem vltcrius, eo quoniam, si verum esset, vt illæ decem mellis à Galeno propositæ libræ, quia corporis liquidi sunt, mensuræ signa, non ponderis dici deberent; tunc sequeretur, vt etiam cætera, quæ in ipsius Theriacæ compositione sumuntur, & liquida sunt, mensura, non pondere præsignata, determinataque ab ipso An-

Andromacho, & a Galeno rudent. Quod nullo modo permitti, nullo modo concedi debet: alioquin maxima, in talis Antidoti compositione, confusio contingeret, ac oriretur. Quis enim est cecus ita, ne videat in vna tunc, & eadem simplicium medicamentorum dispositione, seu classe, in qua liquida, & arida continentur (vt in tertia contingit de opobalsamo, & siccis alijs) nonnulla sub eadem proposita dosi, confuse nimis, pondere, vt arida; quædam verò mensura, quemadmodum liquida, accipienda, recognoscenda que fore?

Tertia, quæ ex eodem capite ratio colligitur, ex mira quadam simplicium omnium adinuicem proportionem, symmetria que desumitur. Primi siquidem quatuor ordines, primæque simplicium Medicamentorum in huius Antidoti ab Andromacho seniori descriptione nobis communicata, positæ, distributæque classes, duplam, si fiat à posteriori ad superiorem assensus, siue potius (vt rectius, & clarius dicamus nos) dimidiam proportionis rationem habent. Quintus etiam ordo quarto respondet, quia constat ex duobus tertijs ponderis eius: Qui, si deinde conferatur ad sextum, duplam ad illum proportionem capere, continereque dicitur. Quare etiam conuenit, vt aliquam mel cognitionem ad cætera seruet; aliquamve in eiusmodi compositione symmetriam habeat, & vni saltem simplicium ingrediendum Theriacam ordini, armonica proportionem respondeat. Quæ cum vix alia censeretur possit, quam ea, cuius vir hic doctissimus vltimo suæ disputationis capite meminit: vbi, scilicet, vices multiplicata pastillorum scilliticorum dosi, qui in primo ordine collocantur, symmetricam mellis quantitatem asserit inueniri; hæc autem ad decem ponderales tantummodo libras determinetur: immo vero Quæ sic accepta, si cum altero liquore, nimirum vino, ac illius quantitate conferatur, triplam (vt omnia tandem aliqua ratione sibi respondeant) proportionem et habebit. Concludendum erit omnino, non aliam quam propositam, & intellectam mellis quantitatem, in Theriaces compositione sumendam esse.

Quantum, Quod ex eodem capite quoque desumi potest, argumentum, hoc esto. Si mellis ea quantitas, quam decem libræ pro ponderalibus acceptæ determinant, tanquam modica, suspecta foret, ac proinde non admittenda; Profectò non altera potiori ratione credendum id ipsum ab ijs, qui sententiam hanc consequuntur existimari, constituique posse, nisi quoniam sic libris illis acceptis, ex modica mellis talis antidoti compositionem ingredientis, quantitate, putent imminere periculum, ne temporis aliquo tractu, processuque medicamentum id exsicceetur, ac vsui propterea reddatur ineptum. Iam verò constat eiusmodi suspicionem irra-

tionabilem, temerariam, & vanam esse. Quare etiam minime dicendum
erit præscriptam à Galeno quantitatem illam librarum decem vt pon-
derales existunt, modicam esse, nec fore satis, vt diu medicamentum à
siccitate præseruare possit. Minorem huius argumenti propositionem,
duplici medio, nimirum autoritate, & experimento, comprobare conā-
tur. Autoritas, Galeni Principis Medicorum, est; Qui non solum libro
de Theriaca ad Pisonem cap. 14. nos admonet nobilissimum Antido-
tum hoc sexagesimum (vt ita dixerim) annum incolume videre posse,
& ad illud vsque tempus efficacia, proprioque robore conseruato, per-
durare: sed etiā qui libro de eiusdē vsu ad Pamphilianum affirmet idē
Antidotum, quando trigesimū sextū annum nondum attigerit, nuncu-
pari, censerique recens. Quare si magnum hoc medicamentum ea mel-
lis dosi, copiaque solum, à Galeno confectum, per tot annorum spaciū
seruatur incolume, & nō arefcit; non est, vt vereamur, nè, quoties etiam
à nobis hoc modo paretur, siccitatem sit ampliore, aut citius, quam
Galeni tempore, contracturum. Quæ sane ratio tanto fortius pugnat,
& robur habet aduersus nos, quanto certo constat per paucissimos an-
nos Theriacam apud nostros seruari Pharmacopolas, vt proximū mi-
raculo futurum sit, si tantillum eius inueniatur, quod trigesimum annū
attingat. Solent enim, inquit, vt plurimum Veneti Aromatarij vel an-
no singulo, vel biennio, aut ad summum triennio, maximam illius confi-
cere quantitatem; & eodem fere temporis interstitio totam consumere,
ac distribuere. Quod si quis addit, Damocratem nobis obijceret primo
de Antidotis 16. capite cōsulentem, immo verò docentem etiam, quo-
modo iam exsiccatæ Theriacæ mel addere debeamus; quasi nimirū di-
gnoscat & ipse, fateaturque medicamentum eo modo paratum, siccita-
ti reddi subiectum: Nos respondebimus id fieri posse, sed non eo tempo-
re, quo, Quicunque sententiam oppositam consequuntur, sunt opinati,
sed, potius, vt idem visus est innuisse Damocrates, sexagesimo ab initio
suæ factionis anno transacto, ac antea nunquam. Quod ex eodem quo-
que Galeni loco, videlicet, ad Pisonem quartodecimo, colligitur: quip-
pe qui clarè testetur Antidotum ad eum annum vsque, virtutem, ac in-
sitam sibi facultatem, & efficaciam obtinere, conseruareque; verum im-
becille post tempus illud, non tamen inutile omnino, & ineptum vndi-
que reddi; eo itaque tēpore non inconuenit ipsi mel addere, quo ad ali-
quid etiam probum, & aptum medicamentum euadat. Quandoquidem
si fieri posset, vt ante præscriptum illud tot annorum tempus, siccitatē
aliquam adipisci, contrahereque posset, consonum rationi videtur exi-
stimare Galenum, in omnibus diligentissimū, id inuolutum silentio non

præter hunc; sed illius aliquando meminisse. Ceterum minorem eandem
propositæ rationis propositionem, experimento deinde confirmare, &
persuadere conatur; non solum quoniam excellentium Aromatariorum
quorundam fides apud eum sunt; qui se ad Galeni mentem Theriacem
composuisse, nec tamen illam exaruisse, vel effatu dignâ siccitatem con-
traxisse testantur: sed etiam quoniam extant impressa, vulgataque
iam opuscula quædam, è quibus clare cognoscitur tali modo paratam
Antidotum optimam esse, diuque seruari. *Quidam etenim, inquit, Vē-*
draminus Menegazzi nuncupatus, Aromatarius Vicentinus ad Fortune
signum in opusculo impresso Vincentia sub anno 1587. asserit se Theria-
cam composuisse, in qua ad singulam mellis libram uncias quatuor, &
drachmas duas specierum immiscuit. Franciscus quoque Sartorius in The-
riaca ab ipso Bononia cōposita in Xenodochio. S. Mariae dolgo dictæ, dat-
la Morte, 15. Augusti 1612. se libras decem sumpsisse scribit in impresso
libello Bononiæ 1613. Tandem excellentissimi, & probatissimi Viri D.
Ioannis Moratini testimonium adducit, qui nostro vniuerso Collegio
Theriacam ita paratam, nouem annorum, quæ corpus, perfectissimum
seruabat, ostendit.

Quinta ratio, quæ ex eodem capite pari modo colligi potest, hæc erit.
Omnis abusus tollendus, nec quantumuis inueteratus, permittendus est.
Consuetudo Theriacam tanta mellis quantitate parandi; quidam abu-
sus, & corruptela censeretur debet, eo quoniam longè videtur à mente Ga-
leni, & Andromachi senioris aliena. Quare non est, vt in ea diutius,
remere quæ persistamus, sed abolenda penitus, & veluti dierum malorum
inueterata, tollenda. Nam si, propterea quoniam inueterata, censemus
illam seruandam adhuc, & immutandam nequaquam esse; cur non ma-
gis Galeni mos, consuetudo quæ; longè vetustior, & magis inueterata ser-
uanda, custodienda, probanda quæ à nobis erit?

Sexta verò ratio colligitur, atque ab eodem tertio, disputationis il-
lius capite satis abundè declaratur. Quæ longa verborum seriè proposi-
ta, breuius hunc in modum formari potest. Mel in Theriaca præter cæ-
tera munera, quæ præstare solet, illud præcipuum sumit officium, & ad
hoc potissimum comparatur, vt omnia quæ medicamēto coniiciuntur,
reducatur ad vnā communem vñionem, quo. f. apte fermentari, & ad
eam alterationem suscipiendam Antidotus idonea reddi, peruenire quæ
possit, quæ, vel proximè ad mixtionem accedit, vel à vera, perfecta quæ
mixtione non differt: quam Aristoteles miscibilium alteratorum vñio-
nem propterea vocabat. Iam verò mel, vt id ipsum præstare possit, non
multa debet copia sumi, sed satis est, vt sub ea quantitate tantummodo
accipia-

acceptatur; Quam Tumor & Filius Andromachus determinauit (cum
s. probabile sit arbitrari sic ab Andromacho Seniori Patreque; sibi fuisse
communicatam.) Modo verò Filius, vt ex illius descriptione constat,
decem libras ponderales assumendas esse præcepit. Quapropter decem
illæ solum libræ mellis ad opus hoc satis erunt, nec maior quãtitas eius,
nisi vane prorsus, erit vsurpanda. Quod tanto magis credendũ est, quã-
to cõstat Damocratem, Critonem, & Galenum (qui hæc omnia refert
se ab alijs scriptorib. accepisse 14. de Theriaca ad Pisonem, sub verbis
illis. *Sicut Autorum litteræ præcipiunt.*) sic Imperatoribus composuisse.
Siquidem, addit, hæc omnia præstantissima Antidota, quæ tanto artifi-
cio, tamquẽ mirabili modo distributa simplicia compositionem eorum
ingredientia continent, vt neque mellis ipsius, neque alicuius alterius
correctione egeant, paucò debent excipi melle, ne. s. à copiosiori vis, &
facultas eorum obtundatur, & hebetetur, ac proinde sit impedimento,
quo minus perfecta cunctorum alteratio, vnio, mixtio, fermentatioque
fieri possit: non enim ita secundum minima adinuicem ingredientia se
tangerent, copiosiori interposito melle, quam si pauciori, conuenienti-
que eiusdem quantitate fuissent excepta.

Quod ex Galeno superius ad Pamphilianum adducto loco confir-
matur, quippe qui scribat eãdem Antidotum sex ab aliquibus, ab alijs,
etiam quatuor mellis tantummodo libris assumptis, parari consueuisse.
Et ex secũdo quoque libro de Antidotis, vbi Damocrates in Mithri-
datio scribit tantum mellis esse sumendum, quantum est satis; satis au-
tem esse, quantum hæc aptè simul vniri, coniungi que possint. Vnde etiã
(inquit) patet Andromachum, atque Galenum mel potius addere, quã
imminuere: vt proinde si ab eorum descriptionibus esset recedendũ, im-
minuenda potius, quam augenda in Theriaces compositione quantitas
illius esset. Concludit autem, & ex Galeno desumens 12. cap. de The-
riaca ad Pisonẽ, qui statuit vnus alicuius simplicis improbitatem sæpè
reliqua omnia corrumpere, neque solam improbitatem, sed imbecillita-
tem; argumentatur multo magis timendum esse, ne tanta mellis addita
quantitate, tota medicamenti proportio tollatur, & armonia pereat.
Quando etiam constet proportionem in manifestis qualitatibus ipsis,
ex mellis variata quantitate variari, quemadmodum ex Alchindi sub-
tilitatibus comprobare conatur.

Septima, & vltima ratio, vi cuius existimant Aduersarii primum il-
lud fundamentum à se constitutum firmitus adhuc, immo verò prorsus
immobile reddi posse, colligitur ex secundo capite disputationis eiusdẽ.
Quam tamen Nos postremam esse volumus, quoniam vltimum secũ-
corum

eorum conatum avert, & ab ipsis Achilles hoc est, inuperabilis, eximi-
matur. Est autē hęc Librę decem mellis à Galeno pro talis Antidoti
compositione determinatę, numerum drachmarū Iunioris Androma-
chi de mellis in eodem Antidoto quantitate sumenda consequuntur, &
ex drachmarum summa, computatione q̃; colliguntur, sicuti, factō cal-
culo diligenti, cognoscitur: Siquidem cum Iunior Andromachus tam
vini, quā mellis, non variato drachmarum pondere, copiam, quanti-
tatemq̃; præfinierit (vt primo de Antidotis Galenus habet) sicut in
vino tricentas viginti drachmas, sic in melle noningentas sexaginta
præscripsit. Quę sanē, singulis vncijs octo, quemadmodum Galenus se-
pius affirmat, tributis, & accommodatis, centū, & viginti conficiunt vn-
cias; quę decem libras (cum. s. quęlibet libra duodecim vnciarum exi-
stat) efformant. Iam verò drachmę, ab Andromacho positę pondera-
les existunt: tū quia conuenit rationi putare talis eas ordinis, & gene-
ris esse, qualis cęterorum medicamentorum drachmę fuere; tum etiam
quoniam drachma nulla mensuralis est, cuius nullibi aut à Galeno, aut
ab alijs mentio fit: Quippe cum semper inueniamus Galenum, & alios
per drachmam Denarium intellexisse Romanum; quod ponderi, non
autem mensurę refertur, vt proinde somnijs proximum esse videatur
asserere drachmas eiusmodi conditionis, & ordinis adinueniri. Quapro-
pter oportet, vt librę quoque mellis illę, ponderales existant.

Ceterum alterum fundamentum, hoc est, Posito libras illas à Gale-
no nuncupatas, ponderales esse non posse, sed mensurales existere, non
sequi tamen, vt tantum mellis, si reducantur ad pondus, quantū in An-
tidoto componendo solent Aromatarij Veneti sumere, contineant, &
capiant; primum autoritate, deinde verò & experiētia comprobare co-
nantur. Ac proinde statim Autoris libri de ponderibus sententiam af-
ferunt. Qui statuit, suoq̃; testimonio clare fatetur decem libras mellis
mensurales, si reducantur ad pondus, solas duodecim, cum dimidia con-
ficere, & constituere. Addunt verò secundo, experimēto factō se digno-
uisse eas esse tantum vndecim ponderales, & vncias octo. Atque tot ar-
gumenta, tot arma, bellicaq̃; eorum tormenta sunt, quibus aduersus
Antiquam, & iam à maioribus nostris, Collegijq̃; Patribus approba-
tam (saltem quia cognitam & non reprobata) consuetudinem insur-
gentes, existimāt nos, qui patrociniū illius accepimus, vel iam uictos,
vel sic ad minus ab illis obsestos; vt pristinę libertati restitui, aut illos
amplius eijcere, fugareq̃; nullo modo valeamus.

*Fundamenta nonnulla pro tollendis inanijs rationibus
iaciuntur . Et breuis de Romanorum mensuris ali-
quibus habetur oratio. Cap: X.*



VT infixas nobis ab aduersarijs (quanquam leues) delinire plagas, illataque nostris vulnere blande simul, ac tuto, curare possimus; quò. s. nos vnà secum reualescentes, ac pristinis ex toto viribus recuperatis, antiquam, & non dum apud nos violatam, aut interruptam consuetudinem, cuius patrocinium suscepimus, facilius ab obsidione, & inimicorum insidijs liberemus; rem dignam opere facturos esse censuimus, si auxiliaria medicamina prius inuenire, ac ea cerata, seu linimenta, quæ citam nobis sanitatem, & certam sunt allatura, nunc preparare, & ad vsum aliquem reuocare studuerimus. Quæ sanè cū superficiarijs ferè, cutaneisq; solū, ac ijs vulnusculis, quæ neq; detergentibus, aut expurgantib. immo neq; lineamentis ex filis immittēdis in illa, quo patentia, & aperta seruentur, sed solis vnientibus, & agglutinantib. ad summū egent, applicanda sint; vtiq;ue satis erit, si ex eorum genere (& illa modica) parabūtur, quæ vel, *Epulotica*, nempè generantia cutem; vel *escarotica*. s. cicatricem superinducentia, dici, nuncupariq;ue solent. Breuem igitur de liquidorum, & aridorum mensuris orationem (veluti primum eorum medicaminum apparatus) ex Galeni doctrina desumptam, instituamus; vt inde sanitati fores aperiantur, & via facilis plana que nobis aduersariorum argumenta tollendi, & in nihilum redigendi patefcat. De Mensuris, inquam, non tamen omnibus; neque Regionum omnium:

Non quidem omnibus; quando plures earum, tāquam illæ, quæ maximæ capacitatis alicuius existunt; cuiusmodi sunt inter cœtera culeus, amphora, & vrna, nullius ferè in factitanda medicina sint vsus. Neq; etiam omnium Regionum, aut Nationum; cum non ardua solum, sed impossibilis huiusmodi prouincia sit, in qua plurimi lapsi sunt, & in durissimos scopulos impigerunt. Infinita siquidem, vt innuebat ignotus Autor libelli de pōderibus adscripti Galeno, pro Regionum, ac Nationum varietate, corporum quantitatem dimetiēdi diuersitas, multiplex, neq; rationis vnus, liquida, & arida ponderandi, mensurandiq; consuetudo, non permittit, vt vna possit de ponderibus, & mesuris haberi methodus, aut vna certa communis, & infallibilis in vniuersis regula tradi. Quòd tantò quoque difficilius esse dignoscitur, quantò constat, & ex quo-

quorundam traditis monumentis habetur, eadem Nationes antiquan-
do in mensuris etiam mores, & proprias consuetudines permutasse. Nō
solus enim fuit alius modus, & mos liquida mensurandi Romanis, alius
Atticis, alius Ephesijs, alius Alexandrinis (vt Barbaros alios modo prę-
teream, & Arabas) ac alius alijs, verum etiam, pro temporum quorun-
dam varietate, Regnis, Prouincijs, Ciuitatibusque debellatis, ac aliorū
subiectis Imperio, quandoq; contigit, vt veteri cōsuetudine quasi post-
habita, varias mensurandi normas Prouincię dominatę receperint, &
ab Imperijs, quibus iacuere subiectę, mensurarum quandoque nomina
solum, earundem variata capacitate, sint mutuata. Ita (ni fallor) scri-
ptum Galenus primo de comp. med. secundum genera cap. 16. reliquit,
neque Sextarij nomen, neque mensuram apud Athenienses in vsu fuis-
se, sed postquam orbi imperare Romani cęperunt, nomen illud ab om-
nibus, qui Gręca lingua utebantur, vsurpatum esse: mensuram verò va-
riatam, nec ab aliquibus similem prorsus, & æqualē ipsi Romanę mē-
surę, sed à diuersis diuersę fuisse capacitatis effectam. Vnde, quęadmo-
dum ab eodem. 9. de compositione med. secundum locos habetur, erat
Asclepiadi quandoque Sextarius vnciarum octo, nonnūquam, vt legi-
tur sexto de comp. per genera, vnciarum trium. De Romanorum itaq;
solis, neque tamen, vt dicebamus, illorum omnibus, sed ijs potissimum
mensuris, à nobis nunc temporis instituetur oratio, quę Regionis illius
pręcipuę, proprięque videbantur, & quibus vti sæpissimē in medica-
mentorum compositionibus Romani Medici consueuere. Sunt autem
hęc, Libra, Sextarius, Vncia; sicuti primo de cōpositione per genera ca.
15. Galenus idem ijs verbis testatus est. *Eius nempe Regionis illa sunt
nomina, Libra, sextarius, vncia.* In ijs igitur nos explicandis toti versa-
bimur, distinctius tamen de drachmis aliqua, nūc solummodo tacta, suo
loco declaraturi. Quibus sanē mensuris habitis, & intellectis, non erit
arduum cęterarum quarundam alicuius etiam vsus in medicina faciū-
da, sed vnius potissimum Heminae sæpius acceptę, nuncupatęque certā
apud Romanos capacitatem, vt docuit Galenus, agnoscere, & intellige-
re. Cęterum quanuis in omnibus mensuris explicandis, Agricolaę, &
alijs à Sextario placuerit, tanquam à certa, propria, nec non etiam ma-
gis à Medicis vsitata mensura, principium sumere, & inde cęterarum
tam superiorū, quàm inferiorum capacitatis rationem, & normam col-
ligere, & explicare: visum est tamen, & placuit nobis in his à Libra, &
ab vncia, quatenus mensurę sunt, cum in sextario contineantur, & sint
veluti partes illius compositionem efficientes, & integrantes; tanquam
à notioris, & certioris, quoque capacitatis, incipere, & vniuersi sermo-

Galeno docere, declarareque valeamus, distinguendum est primò nomen ipsius libræ, & eiusdem multiplicitas est explicanda; quandoquidē sic in communi conceptum, & vniuersalissime sumptum, æquiucum, multiplex, nec vnius, & eiusdem conditionis, atque naturæ videtur. Idque non solum quoniam sub eadem nominis huius appellatione multa, quæ valde secundum rationem essentiæ ab inuicem differunt, continentur: Siquidem præter multas illius significationes admodum varias, solet aliquando pro quodam instrumēto fabрили sumi, siue Geometrica machina, qua Marium, Fontium, Lacuum, & aliorum consimilis fere naturæ corporum, altitudinem dimetitur; Verum etiam quoniam, dū propriè magis accipitur, cognominationem (vt primo de compos. per genera quartodecimo, Galenus inquit) ad pōderalem relatum libram, & mēsuralem, habet homonymam. Consuevit enim, sicuti habetur 13. cap. eiusdem libri, diuersa ratione, & æquiuoce, ponderalis corporum solidorum, & mensuralis liquidorum libra à Romanis appellari. Cum enim primò libra, quæ & As, & Assis ab aliquibus dicebatur, instrumētum significet illud, quo rerum pondus, & grauitas præfiniri & agnosci cōsueuerat; Quæ deinde secabatur in vncias duodecim: (quāq̃ in partes alias etiam, puta sextantes, quadrantes, trientes, selibras, dodrantes, & alteras aliquas, diuidi solet) sintque non solum in corporibus metiendis grauitates, & leuitates, sed et moles, & multitudines considerandæ: Inuēta postmodū, & ab illis excogitata mēsuram fuit, qua diuersorū corporum, potissimum, verò liquidorum, diuersę grauitatis, & leuitatis, multitudo, seu moles agnosci, determinarique possit. Hanc autem mēsuram, libram pariter nuncupauerunt, & in duodecim quoque partes, velut in duodecim vncias partiti sunt. Indicauit vtrunque Galenus, qui paulò superius allegato loco ponderales vncias ad corporum grauitatem, mēsurales autem ad eorundem molem, & multitudinem indicandam constitutas esse docebat. Et qui tertio librorum eorundem cap. tertio clarissime testabatur mensuram apud Romanos effectam reperiri, qua metiuntur oleum; & hāc infectam, discretamque lineis totam illā in duodecim partibus diuidentibus, esse; atque integram mensuram ab eis libram, duodecimam verò portionem eius, vnciam appellari. Cum itaq; isthæc liquidorum mensuralis à Romanis vocata libra in æquas partes, ac ponderalis, hoc est, in vncias duodecim pari modo partiatur; sequitur, vt, ea ratione qua libræ, sic etiam vnciæ nomen, æquiucum, nec vnius, & eiusdem significationis existat: Idque non solum, quia soleat vncia inter ea quoque mensurarum genera recenferi, quibus iura finium,

notat Alexander etiam ab Alexandro lib. secundo, genialium dierum, sextula, quæ triginta pedum mensura dicitur, sexta vnciæ pars) verum etiam quoniam tam de duodecima libræ ponderalis, quàm mensuralis portione, nō eadem ratione tamen, prædicatur: Quod totum nos à Galeno fumentes, inferius exemplis, ijsque clarissimis, demonstrabimus. Ex hac nominis huius analogia, similitudineq; tum à libra, tum ab vncijs ponderalibus, ad libram, & vncias mensurales accommodata, contingit, & iure sequitur, vt non solum in easdem, aut similes alteras alias partes libra mensuralis secerni possit, in quas secabatur & ponderalis, hoc est, in sextantes, quadrantes, trientes, & reliquas: Verum etiam vt, cum quælibet vncia ponderalis in octo deinde partes diuidi soleat, quas drachmas appellant; ipsa quoque mensuralis vncia vocata, si in octo partes diuidatur æquales (in quas eam diuisisse Galenum suo loco monstrabimus) in octo pari modo diuisa drachmas esse dicatur, & vt, quemadmodum eę, mensuralis vnciæ partes, & portiones existunt; ita mensurales drachmæ vocari, & apud omnes sine controuersia pro talibus accipi, computarique debeant. Vt proinde nomen ipsius quoque drachmæ, diuersæ cuiusdam rationis, & æquiucum esse dicatur, vtpote quod, præter alias quasdam significationes admodum ab ijs, de quibus nos alienas, de mensurali, ponderalique diuersimode prædicetur. Diximus, *præter alias significationes*, eo quoniam in prioribus Iurium, Possessionum, & Aquarum mensuris, ex illius vnciæ diuisione pari modo drachmæ colliguntur, & inter minores mensuras tum ipsæ drachmæ, tū etiam scrupula dinumerantur. Vt enim partem minimam scriptulū appellabant, quæ quanquam inter mensuras minima foret, nihilominus continebat longitudinem & latitudinem decem pedum; sic, ex tot scrupulis asseriebant siciliquam confici, quæ quartam vnciæ partem efformat, hoc est, vt idem adnotauit Alexander, drachmas duas; in octo. s. pari modo partes vnciam & ipsi, velut in octo drachmas, secantes & diuidentes. Veruntamen hac mensuralium drachmarum consideratione (ne. s. nimis caput hoc protrahatur vt crescat) alio, priorique forsan loco remissa; redeamus ad libras mensurales, & vncias; atque iterum cū Galeno dicamus præter capaciores liquidorum mensuras alias, Romanos Medicos mensurales eiusmodi libras, & vncias in medicamentorum quorundam compositionibus vsurpasse, & ad vsum aliquem accommodasse. Sed cur liquidorum mensuram hanc, cum ponderalis sola libra sufficeret, & satis esse videretur, Romani Medici excogitarunt, & simul ad eundem vsum accommodarunt? Existimauit Doctissimus vir Hie-

tionē medicamentorum excogitatam fuisse mensuram propter maiore
negotiādi facilitatē oportebat. *n. inquit, ut inuenirentur expedita men-
suræ, ne. s. cogeretur negociatores cōtinuo conterere tēpus in rebus metiē-
dis ad lancem.* Sed alia nos ratione putamus id ipsum (quatenus saltem
ad vsum attinet medicinæ) fuisse paratum. Quanquam enim adducta
ab excellentissimo præceptore nostro mensurarum inueniendarum oc-
casio, rationem aliquam, si re feratur ad modum negociandi, videatur
habere, pro quo summæ, & maximæ capacitatis illæ mēsuræ deservie-
bant, & assu mebantur; In ipsa tamen medicina faciunda, in quā rarissi-
mē tantæ capacitatis, quantæ tres illæ superius enumeratæ mensuræ
sunt, assumuntur, sed mediæ potius, & minores aliæ sæpissimē, ut pu-
ta, sicuti dicebamus, Sextarius, Libra, Hemina, Vncia, Cyathus, & Co-
chleare nonnunquam: alia ratione credendum est factum esse, ut ad v-
sum medicinæ fuerint mensuræ quoque pro liquidis potissimum me-
tiendis corporibus, accommodatæ. Quæ sanè ratio (mea, immo verò
Galenī sententia) non altera fuit; nisi quoniam, cum in medicamento-
rum compositionibus symmetriæ, variæque simplicium ingredientium
proportiones requirantur, necessariæque sint; atque tales non solū pō-
dus, sed molem etiam, & multitudinem corporis quandoque respiciāt;
utique sicuti certus, ac facilis modus aderat coæquandi simplicia medi-
camenta ratione ponderis, seu propriæ gravitatis, & leuitatis, ac veram
illorum dosim, quæ sibi in vnius, aut alterius antidoti compositione
responderere debent inueniendi, quod efficiebatur in Lance: Ita certus fa-
cilis, & infallibilis modus erat inueniendus, quo eorundem moles, aut
multitudo coæquari, dupla, dimidia, aut alicuius alterius proportionis
cum altera reddi, pararique posset. Quod optime, & longe facilius, quā
Pondus, Mensura præstabat. Indicauit isthanc mensurandi necessitatē
abunde Galenus. 6. de compositione medicamentorum secundum lo-
cos cap. 1. dum mediorum Pharmacorum compositionem examinat.
Quo loci, cum alibi, sicuti primo de compositione per genera, docuisset
ponderales siue libras, siue vncias, corporum decernere gravitatem, mē-
surales verò molē, hæc ad verbum scripta reliquit. *Audito autem me di-
ligenter animaduertens quibus vtor verbis in symmetria seu commensu-
ratione medicamentorum, quæ inuicem permiscētur. Iam enim præcepi
quintuplum esse debere multitudinem ipsum succum ad mel, quod nihil
differt ab eo, si dicam mole quintuplum ipsum esse oportere. Vtrius enim
modo dicatur, mensurare oportet pharmaca permiscenda. At verò
si pondere iubeam quintuplum esse hoc pharmacum, per lancem utique fa-
cere*

ex quibus abunde dignoscitur pro mole corporum, & rerum permiscē-
darum multitudine metienda, oportuisse mensuras constitutæ cuiusdā
capacitatis adinuenire, quibus, seu quarum ope facilius, & certius, quā
per lancem, ea posset corporum miscendorum symmetria, quæ non ex
eorum grauitate, sed ex copia, multitudineque sumi debet, determina-
ri, & ad componendi medicamenti necessitatem, & vsum accommoda-
ri. Hinc factum est, vt quamuis (sicuti tertio de comp. secundum Gen.
cap. 3. scribitur) metallica, & vt alibi dicitur, corpora arida lancē, oleū
autē, & liquida sæpius mensura determinantur: aliquando tamen ari-
da mensurentur, & liquida pondere præfiniantur. Quatenus. s. vel pro-
portio ponderis, seu grauitatis, vel molis, & multitudinis in ea medica-
menti cōpositione sumi, seruarique debet. Fuerunt igitur ad opus hoc,
& ad vsum vnā cum alijs moderatæ cuiusdam capacitatis, Libra quo-
que Sextarius, & Vncia, propriæ Regionis illius mensuræ, repertæ, & à
Romanis medicis excogitatæ. Ceterum harum aliquas, sed vnā præ-
cipuè Libram, seu Libræ mensuram ex cornea materia, forteque ex ip-
sismet Boum cornibus parumper expolitis, effectam, & paratam ab il-
lis esse, Galenus locupletissimus testis existit: Quippe qui primo, de cō-
pos. med. secundum genera cap. 13. sic inquit. *Mēsuralis libra corporū
liquidorum, quæ permulta in tota vrbe ex materia cornea constat. capite
verò. 17. dum Album Asclepiadis emplastrum explicat, ita scribat. Hoc
pharmacum Olei modicum hobet ceu ad metallicorum proportionem, s.
quis heminam statuat valere uncijs nouem Romanis, quæ in cornibus cō-
suetis libralibus descriptæ sunt. & 6. de comp. per genera 8. Ego sanè olei
libram Romæ nuncupatam, quam per insecta cornua metiuntur, &c.* Ne-
que mirum; cum referat Athenæus vndecimo libro diptosophistarum
cap. 8. Antiquos, & primos illos, ex cornibus bouinis etiam bibere soli-
tos fuisse perhiberi, cornutūque propterea Dionysium iuniorem effin-
xisse nō nullos, & Taurum poetas aliquos eum appellasse; taurinaque
facie pictum alicubi reperiri: quoniam. s. potator esset insignis, & qui (si-
cuti retulit Alexander idem ab Alexandro 5. suo libro genialium die-
rum) vsque adeo vino marcidus quādoque fuerit, vt ad nonaginta dies
mero incaluerit. Verum & alias ex eadem materia præter solius vnus
libræ mensuram, amplioris capacitatis in vfu fuisse, non sine ratione di-
ligentissimus Georgius Agricola ex Horatij quibusdam carminibus se-
cundi sermonem libri secunda satyra colligi, vt intelligi posse disputa-
uit, dum ita cecinit

Cuius odorem olei nequeas perferre, (licebit

Ille repotia natales, aliosve dierum

Festos albatu celebrat,) cornu ipse bilibri

Caulibus instillat veteris non parcus aceti.

Is enim videtur bilibrem, hoc est duarum librarum mensuram corneam recensere. In cuius loci explicatione cum Acron Interpres (vt idē quoque notauit Agricola) scribat in venalibus cornua reperiri, quę olei quātitatē sextarij mensura, capiant; deducere, & intelligere licet, cornua diuersę capacitatis in vfu fuisse, saltem quę, Librale, de quo Galenus, Bilibrę, de quo Horatius, & Sextarij mensura, videlicet, viginti vnciarum, de quo Acron. Nisi tamen putauerit Autor hic (vti falsò Rhodiginus, & alij cęsuere) Romanum sextarium mensuram esse bilibrem, hoc est, viginti quatuor, non autem solas viginti mensurales vncias capere, & continere. Quo casu duę tātum hucusque mensurę corneę paterent, libralis vna, altera verò bilibris. Quanquam sextarij mensuram, viginti apud Romanos vnciarum, ex cornea materia reperiri, quodammodo nobis visus sit innuisse quoque Galenus eo primo de comp. medicam. secund. genera. cap. 16. dum scribit. *Apud Romanos sextarius libram vnā semissem, & sextam illius partem pēdet, vt omnes simul iunctę vncia sint viginti, quas plurimum cornibus metiūtur, incisīs extrinsecus lineis quibusdam orbicularibus.* tot enim vncias, libralis vna mēsurā, non continebat. Neque verò miretur aliquis, aut suspicetur id esse non posse, quoniam parua sint boum cornua, neque tantę capacitatis, vt duas liquidorum corporum libras tuto capere, continereque possint: Cum idem Athenęus ibidem referat ex Theopōpo, Reges Paeonum pocula magna ex cornubus facere solitos, quibus labra vel auro, vel argento operiebant: quoniā. s. egregię magnitudinis bouū cornua apud illos nascātur; & ita, vt vel tres, vel etiam quatuor Choas capiant. Vt cunque verò de sextario sit, certum est ex Galeno mensuralem liquidorum eiusmodi libram apud Romanos in vfu fuisse, & eam vncias duodecim continere mensurales, quę longē differunt à ponderalibus, & sola nominis communione, vel proportionē quadam, & analogia, cum prioribus illis, quemadmodum etiam librę cum libris conuenire dicuntur: Pro quibus inuicem distinguendis, & separādis, mos erat medicamenta scribentibus, vt, cum ponderalem intelligi vellent, & in alicuius medicamenti compositione talem libram assumēdam fore cęferent, adderent signum eiusmodi. *pondo.* quod etiam nulli coniunctū, sed per se sumptum, libram vnā, & eam ponderalem præferebat. cū

verò

vero mensuralem intingebant sumptitandam fore libram, *mensura*, pariter addito nomine distinctè significabant; vel sublato tātum eo signo, *pondo*, illud idem confuse tamen; aliquando protendebant. Quanquam etiam reperiatur libra pro pondere sine vlla posita additione, sine vlllo signo. Ponderis libram, addito signo illo, *pondo*, Galenū, & alios præscribere consueuisse, demonstrant omnes ferè medicamentorum descriptiones in cunctis septem de pharmacorum compositione secundum genera libris ab eodē Gal. relatę. Mēsuræ verò libras, & uncias cū addita noīs explicatione sepe quoq; Galenū assumendas esse præcepisse, multa pariter, & à se, & ab alijs cōscripta medicamēta demōstrāt. Nā si de libra loquamur, habemus primo de cōposit. med. sec. genera cap. 13. Galenum in albo Attali Emphastro tali modo loquentē. *Argenti spuma, & cerussa singulorum libra pondo, olei verò duarum librarum mensura*. Qui deinde lib. 2. c. 12. de ruffo quodam medicamento verba faciens, inquit, *si mediocriser emplastrum coquere voles, tantam olei mensuram, quantum Argenti pondus esse sufficit. Libram enim olei mensuralem Romanorum in argenti spuma libram ponderalem inijciemus*. Quibus verbis consimilia quædam. 6. de comp. per genera cap. 8. subaddidit. *expertus*, inquiens, *plerunque sum, cum argenti spumam ex oleo coxissem, mediocre ipsius mixtionem, si libræ argenti spumæ ponderales sint, mensuralibus olei pares fieri*. Quod idem pluribus alijs eiusdem locis confirmari posset, in quibus mensurales præscripsit in medicamentorū quorūdam, compositione cum explicatione, *mensura*, libras olei sumendas esse, nec olei solum, sed liquidorum aliorū, vti, 2. eod. lib. c. 22. in aceto cognoscitur, dum in barbaro Galeni scribit. *Aceti heminas sex, quæ valent libras quinque*. intelligit enim libras mēsurales, Hemina Romanam accipiens, quæ decem est unciarum mensuralium, vt ipse clarissimè quandoque docuit. nulla siquidē alia sumptione poterunt sex heminæ, quinque libras aceti conficere. Sed hæc de Libra sufficiant. Quod si de mensuralibus vncijs quoque loquamur, non deerunt euidētia pariter Galeni testimonia, quibus ipsum ijs cum explicatione, & indubitanter in medicamentorum quorundam compositionibus vsum esse facillime dignoscemus: non solum enim mensuras aliquas per unciarum mensuralium capacitatem explicauit, vt in hemina primo de comp. per genera 17. dum Asclepiadis album perpendit emplastrum, apparet, in quo cū duas heminas olei præcipiat Asclepiades sumendas esse, Galenus hæc habet. *Hoc pharmacum olei modicum continet, si quis heminam statuat valere vncijs nouem Romanis, quæ in cornibus cōsuetis libralibus descriptæ sunt*. Quod in eadem mensura quoque sæpius ab eo repetitur, dum

ferat decem, Atticos nouem, alios duodecim, alios etiam sexdecim vnciarum, *mensuralium*, facere. Non solum, inquam, in ijs, & alijs mensuris, vncias mensurales, veluti contentas in illis (quemadmodum etiā in libra) recensuit, & nominauit: verum etiam expressius adhuc eandem separatim ab alijs meminisse videtur. Etenim. 6. illo de comp. per genera cap. 8. sic ait. *si tres olei mensurales vncias, cum tribus Argenti spuma ponderalibus temperabis. & iterum, consentaneum est igitur Andromachum nouem vncijs mēsuralibus oleum vicini immitti iubere.* atque iterum clarius octauo de comp. per locos, dum de cerato quodam ex aloe, mastice, cera pontica amara, & vnguento nardino confecto, loquēs, hęc ait, *Componitur hieme ad octo drachmas cera, uncia una mensurali Romana vnguenti nardini coniecta, æstate autem ad septem drachmas eadem vnguenti portione.* Atque tot in libris & vncijs dum certo aliquo posito signo adinuicem distinguuntur. Nam vbi deinde contingat, vt sine vlllo signo, quod pondus, vel mensuram protendere possit, libræ, & vnciarum mentio fiat: quanquā placuerit aliquibus eas (deficiente plus vsitata declarationis ea nota, *pondo*) pro mensuralibus accipiendas esse constituere: quoniam tamen aliquando reperitur etiam, vt dicebamus, libra pro pondere sine vlla explicationis aliqua nota; & vtriusque signi, tam. s. pondus, quā etiam mensuram significantis, eadem ratio videtur esse; nos non audemus sic vnciarum, vel libræ nomen sine vlla posito adiectione, statuere mensuræ magisque ponderis esse; sed potius incertum, indifferens, ambiguumq; nomen fore censemus, & quod vtriusque tam. s. mensuræ, quam ponderi adscribi, referrique possit: Cum ipsum quoque Galenum adducto loco superius. 6. de comp. per genera 8. sic indifferenter accipisse cognouerimus, dum Medicos inquit liquidorū vncias, & libras in medicaminibus immitti iubentes, nec explicātes, an illas ponderales, vel mensurales intelligant, parum accuratos extitisse, propterea que nobis ambigēdi locum, & occasionem vtro duorum modorum debeant intelligi, reliquisse.

His breuiter itaque de Libris, & Vncijs quatenus liquidorū mensuræ sunt, explicatis, ad Sextarium deueniamus; & ex Galeni doctrina sumentes (quidquid alij, cum nihil nobis modo cum illis, existimauerint) illum mensuram esse, vigintique mensurales vncias capere, sextam fore congiij partem, & duas heminas continere Romanas, quam breuissime demonstramus: vt ijs declaratis, & intellectis facile deinde suo loco possimus, mensurales libras reducentes ad pondus, quæ sint illæ Galeni decem mellis in compositione Theriacis propositæ libræ, colligere, & certa post-

ea potissimum experientia duce cognoscere & explicare. Sed præstat nonnulla primum de Sextario Galeni verba referre, ex quibus dictorum plurima colliguntur, deinde distinctius, & speciatim magis, ea cuncta paucissimis confirmare. Scribit igitur primo de comp. med. sec. gener. capite 16. Galenus ad verbum. *Ceterum Sextarij Romani Heram meminisse puto, nam apud Athenienses neque mensura, neque nomen hoc erat. Nunc ex quo Romani imperare orbi caperunt, nomen Sextarij apud omnes, qui Græca lingua utuntur, existit: ipsa verò mensura Romana equalis non est. Quippe alij aliam sextarij mensuram usurpant. Apud Romanos Sextarius libram unam semissem, & sextam eius partem pendet, ut omnes simul iunctæ uncie sint viginti, quas plurimum cornibus metiuntur incisus extrinsecus lineis quibusdam orbicularibus. Nonnulli falsò Romanum Sextarium opinati sunt octodecim mensuralibus uncis valere. Videtur igitur & Heras cuius Heminam scribit Sextarii dimidiū indicare. An verò nouem uncias ex librari cornu, vel decem innuat, etiam nūm ignoratur. Hæc ille. Quæ sane verba primo demonstrant Sextarium mensurā esse, nempe qui constet ex uncis, quas cornib. metiuntur, immo, verò qui clare, *mensura*, nomine à Galeno vocetur; cum dicat apud Athenienses neque nomen neq; *mensuram* hanc extitisse; deinde verò nomen, & mensuram quoque, sed variata parumper capacitate, receptam; cum alij, scilicet, aliam sextarij mēsuram usurpauerint. Quā veritatem non solum Phānius, seu quisquis ille sit de mensuris, & ponderibus autor, sæpè confirmavit: tunc verò potissimum cum Sextarium in totidem docuit partiri Cyathos, in quot uncias, libra ponderalis illa secabatur. ait enim*

Quod si mensura pondus comparare fas est.

Sextarij cyathus pars est, quæ est uncia libra.

Verum etiam Horatius, qui primo Sermonum libro, satyra prima vini mensuram fuisse Sextarium testatus est; vbi dicit

Nescis quid valeat nummus, quem præbeat usum.

Panis ematur, olus, vini Sextarius. —

Sed hæc (quidquid voluerint aliqui) clariora in Galeno sunt, quàm ut alia diligentiori probatione egeant. Demonstrant eadem hæc verba secūdò Sextarium uncias viginti capere, & eas mensurales. Viginti quidem, quoniam tantas, & non pauciores; ob quod illi, qui octodecim capere crediderunt, ut inquit ibi Galenus, decipiuntur. Quam veritatem cognouerunt, & alij Plures: quanquam non defuerint, qui viginiquatuor unciarum esse cēserunt, & alij, qui longe maioris capacitatis adhuc; atque item alij, qui, longè minoris. Sed nos cum Galeno loquentes

nullo modo desimus ambigere talem, qualem dicebamus, veram eius
esse capacitatem. Mensurales autem non ponderales, eo quoniam capi
viginti, vt scribitur, vncias, ex ijs, quas cornibus metiuntur; quæ certè
mensurales existunt. Quòd tanto magis cognosci potest, quanto verbis
clarissimis Galenus addit eos decipi, qui credunt Sextarium octodecim
solum valere menfuralibus vncijs, vbi de Romano loquamur; capit. n.
viginti; quæ proinde menfurales & ipsæ cenferi debent. Et iure quan-
doquidè nequit vna Sextarij sic incommuni, & ad nullam vel humo-
ris, seu corporis liquidi, vel aridi, & sicci capacitatem contracta natura,
nisi per vncias mensurales, vt quæ cōmunes omnibus fixæ permaneant,
inmutabiles, & inuariabiles; non autem per ponderales, admodum va-
riabiles, præfiniri. tales etenim vnciæ dum alcuius mensuræ capacitati
referuntur, inconstantes, & pro contentorum corporum, (siue illa liqui-
da, siue sicca, & arida fuerint) varietate, variæ, diuersæque cognoscun-
tur. Vt proinde si certarum quarūdam vnciarum ponderalium Sexta-
rius mensura constitueretur, necessum esset pro corporum diuersa graui-
tate, diuersos reperiri Sextarios tū in liquidis, tū in aridis etiam, (Quid-
quid de liquidis Leonardus ille de Portis Iurisconsultus in suo de Sex-
tertio, Pecunijs, ponderibus, & mensuris antiquis excogitauerit) cum
in vtrisque notatu digna diuersitas reperiatur in pondere; & sint inter
liquores, qui tertia, & amplius etiam parte, grauiores aliquibus forè di-
gnoscantur. Quod sicuti institutæ doctrinæ, in qua quæritur communis
vna sextarii natura, repugnat: ita quoque Galeno; mirum in modū ad-
uerfatur: quippe qui statuatur non sextarij solius, sed omnium mensura-
rum, quæ vel sextarij partes existunt; vel à sextario dependent, & com-
ponuntur, eandem cuiuscunque liquoris esse capacitatem, quanquam
inuicem illi pondere, grauitateque differant. Indicauit id primo de cōp.
secund. genera cap. 13. dum Heræ quoddam medicamentum tetigit il-
li consimile, quod ex Attalo paulò supra descripserat; ait enim Heram
verus oleum iniiciendum esse iussisse, atque illi parem aquæ mēsuram,
aut dimidiam esse temperandam. Quam mensuram explicans inde, per
Heminas declarauit: ac si tum olei, tum aquæ sit vna, & eadem mensu-
ræ capacitas, sitque amborum mensura par: quanquam grauitas, & pō-
dus ipsum in vtroque sit dispar. Quorum alia plurima passim apud Ga-
lenum inueniuntur, puta eodem lib. ca. 17. lib. 3. cap. 9. & de Sextario.
7. de comp. secundum locos cap. 4. vbi *Vini Falerni*, scribit, *Sextarium*
unum, Mellis Attisi tantundem, atque de ceteris mensuris alibi pluries.
Sextam verò congii partem esse Sextarium; non est vt multis compro-
bare nitar, cum aperte Galenus lib. 6. de compos. secundum, locos cap.

quitur. *Multitudinem autem succi Congium esse iubet, hoc est, Sextarios sex Romanos. & Phannius inde Sextarij nomen habuisse scribat, dum hæc ait*

A quo Sextarij nomen fecisse priores

Crediderim, quòd eos capiat sex Congius unus.

Et alij quicunque ferè de mensuris ac ponderibùs distinctè scripserunt hoc idem affirmant. Postremo Sextarium duas Heminas cōtinere, atq; Hemina dimidiam esse Sextarij partē, relata superius Galeni verba demōstrant, dum in fine dicebat. *Videtur igitur, & Heras cum Hemina scribit Sextarij dimidium indicare*. confirmant & Phannij carmina, quæ sequuntur:

At cotylas, quas si placeat dixisse licebit

Heminas, recipit geminas Sextarius unus.

Quòd & alij plerique testati sunt. Quanquam Heminae nomen multiplices apud Græcos differentias habeat, & sicuti Galenus inquit eo. 6. de comp. med. secundum Genera cap. 8. *multi, qui de mensuris, & ponderibus scripserunt, novem unciiis Romana libra Hemina medicos in pharmacorum libris aestimasse prodiderint; alii duodecim unciiis, ab eis reputari affirmaverint, sicuti Romæ olei libram de more appellant, & fuerint qui Hemina à Medicis in Pharmacorū cōmentariis sexdecim uncias Romanas pendere docuerint*. Atque tot ea sunt, quæ de Romanorū mensuris ijs, quarum notitia ad præsentis ambiguitatis intelligentiam maximè confert, præmittenda censuimus. Cū de reliquis copiose satis ab alijs disputatum sit.

Perpenduntur rationes adductæ pro confirmatione opinionis oppositæ; & primæ sex è medio colluntur.

Cap. XI.



Ræparatis medicamentis, & ijs ad vsum accommodatis, reliquum est, vt octo nobis, à totidem Aduersariorum telis illata vulnuscule sanare primum; mox etiā, vt illorum arma dirumpere, illa frangere, & emissa iacula prorsus conterere, ac omnes tādē conatus eorū vanos, & irritos reddere studeamus: quo. s. nequeant

amplius eisdem, aut consimilibus armis insurgere, & veterem hāc, temporis diuturnitate, tacitoque omnium consensu probatam consuetudi-

nem

rum placitis argumentis, & rationibus vndique respondere. Quapropter exordientes à prima, sex in presenti capite accipiamus; ac duobus alijs (ne iusto longius caput euadat) seorsum considerandis, modo relictis, prioribus illis, eadem, qua propositæ serie, & à nobis in ordinem digestæ sunt, singillatim nunc temporis occurramus. Illud primum eos omnes, ad quos superior doctissimi Iuuenis disputatio delata fuit, & hæc nostra fortasse peruenient, distinctius nunc admonentes, imposita nobis ab Aduersarijs duo illa supposita, puras esse fictiones eorum, & mera commenta; nulli vel modice in Galeni doctrina versato, aut in mensuralium librarum, & ponderalium differentia noscenda parumper etiam accurato sic imponenda. Quis enim, qui Galenū 6. de compositione Pharmacorum secundum genera cap. octauo, scribentem hæc, legerit. *Ego sanè olei libram Roma, vocatam, quam per dissecta cornua metiuntur, ponderavi quandoque discere cupiens quantum grauitatis pondus contineret, inueni duodecim olei mensurales decem vnciis ponderum æquales.* & quinto eorundem librorum cap. 6. ita loquentem audierit. *Nā Attica, de Hemina loquēs, nouem Italicas uncias conficit, pendunt. n. nouē Italica uncia, quas in cornibus insectis metiuntur, septē uncias ponderales, & semis,* ita stupidus erit, vt non intelligat non semper uncias mensurales, ac proinde nec etiam libras, ponderales ipsas tum uncias, tum libras excedere & superare? Quis ita cæcus, vt, si quandoque libros vtrosque de Pharmacorum compositione, tam. s. secundum genera, quam etiam secundum locos inspexerit, non rectè viderit, non arida solum aliquando mensurari, sed etiam liquida è contra lance præfiniri nonnunquam, & veluti metallica ponderari? Et quæso, Qui difficultatis huiusce rationē ex Galeni verbis exortam, cum Medicos inquit in liquidorum eorum corporum, quæ medicamento alicuius compositionem ingrediuntur, libris, aut vncijs præscribendis, & sine vlla explicationis nota, ponendis, ambiguos nos reddidisse num ponderis, aut mensuræ libras, & uncias liquidorum illas assumere debeamus, intelligens; audebit asserere, & affirmare liquida mensuralibus semper (vt nobis aduersarius imponit) & nunquam ponderalibus libris ab Autoribus definiri? Nullus profectò, Nullus. Quare non sunt à nobis, (vt nec à nostris) isthæc vnquam, neq; per somnum visa, aut excogitata: nec erat, vt Iuuenis eruditissimus in ijs reprobandis olei tantum & operis luderet.

Quibus præmonitis, & declaratis, ad argumēta, & rationes aduersariorum è medio tollendas iam accedentes, ad primam dicimus, maiore si rigoro sumatur) esse verissimā, Galeni doctrinæ conformem, & à nobis

ois concedendum atq; ita sumptum, nullo modo negatum, quippe qui
fateamur indifferēs esse libræ nomen, & quoties nulla explicationis no-
ta, nullo signo, quod pondus, aut mensuram expresse significet, ab auto-
ribus proferatur, toties, vbi de liquidis sermo sit, ambigi posse, num de-
beat ad ponderis, an verò potius ad mensuræ libræ nomen illud exten-
di. Quanquam probabilius, atque ipsius Galeni doctrinæ conformius
(vt rectè docebat Agricola) sit, saltem suspicari, & existimare, vbi signū
illud, *pondo*, defuerit, significari mensuram. Quod forsan ex 22. cap. li-
bri secundi de Pharmacorum compositione per genera colligi potest, in
ea Barbari Galeni descriptione, vbi sex præcipit autor Heminas aceti
sumēdas esse, *quæ valent*, inquit, *libras quinque*, Patet autem libras illas
esse mensurales; quoniam cuiusvis Heminae siue Romanæ, siue Atticæ,
siue alicuius alterius mensura sumatur, nulla capiet libras quinque pon-
derales aceti: neque etiam ipsa Romana, quemadmodum in vino, quod
eiusdem cum aceto ponderis est, diligenti computatione facta, suo loco
monstrabimus. Veruntamen quoniam non ex ijs, quæ, quanquam vt
plurimum contingere possint, necessaria tamen non sunt, solidæ, ac veræ
argumentorum solutiones petendæ sunt; & (sicuti dicebamus) inuenitur
etiam aliquando sine vlla notæ alicuius additione, libra à Latinis vsur-
pata pro pondere: idcirco maiori eiusmodi propositione concessa; nec
non altera eiusdem admissa parte, nimirum quoties adsunt vel præce-
dentia, vel subsequētia signa præferentia, significantiaque Libras si-
ne vlla explicationis nota propositas ab autoribus, ponderales esse, non
posse nos illas nisi pro talibus, non autem pro mensuralibus accipere, &
intelligere, dicimus minorem propositionem, dum in illa statuitur cæ-
tera cuncta in descriptione Theriaces pōdere dimetita, signum esse suf-
ficiens, vt deducatur, & colligatur cætera quoque subsequētia, propte-
rea quæ decem libras mellis a Galeno propositas, ponderales esse, non
autem mensurales, esse falsissimam. Primò, quoniam, sicuti superius etiā
aliquando innuebamus, si sic esset, nō bene Galenus in proposita auto-
ritate 6. de compos. med. sec. genera, cap. 8. veteres illos, compositorum
quorundam medicamentorum autores, in eorum descriptionibus accu-
saret, quod in liquidorū libris explicādis, & vncijs minus accuratū videā-
tur, & nos ambiguos admodū, & incertos vndiq; reddant, an libras illas,
& vncias mēsuræ, vel ponderis intelligere debeamus. Cum. s. ipsi quoq;
cætera, quæ Pharmacorum illorum compositionē ingrediuntur, ponde-
re præfinire, & ad lancē dimetiri consueuerint. Quare, si propositæ post
ea cuncta ponderata, liquidorum corporum libræ, vel vnciæ ab eisdem,
non sunt à Galeno veluti ponderales acceptæ, sed pro ambiguis, & in-
certis

Theriaces ante Mellis libras illas enumerantur, pondere præfinita, & ad lacem dimetita sint, tuto colligere, aut inde veluti certo, sufficientiq; signo, debemus ponderales illas, non mensurales, esse deducere. Secundo quoniam, cum non minus ab ijs, quæ consequuntur, quam à præcedentibus, ex aduersariorum Sententia quoque, signa capi, & argumenta desumi possint, quibus agnoscere, & existimare debeamus, an propositæ liquidorum corporum libræ ponderales, an verò mensurales existant: Vtique nos eadem prorsus, immo forte probabiliori quoque ratione poterimus ex ijs, quæ de vino constituta post mel à Galeno fuere libro de usu Theriaces ad Pamphilianum, elicere, & argumētari libras illas esse mensurales: cum certo constet mensura vinū ab ipso fuisse præfinitum, & ad duorum sextariorum capacitatem esse determinatum. Quod tanto quoque certius, aut probabilius saltem, credendum erit; quanto constat (potissimum si Iulij Martiani Rotæ traductionem accipiamus) cuncta, præter vinū, & mel, quæ in ipsius Theriace cōpositione medicamēta siue simplicia siue cōposita (cuiusmodi pastilli sunt) vsuveniunt, & assumuntur, hoc addito signo, *pondo*, determinata, & nō sine explicationis ea nota, superiori loco relata, & à Galeno, præfinita ex Andromachi sn̄ia fuisse; ipsum autē vinū & mel è diuerso nullo signo, nulla pōderis addita nota determinatum; sed mellis quidem libras decem, vini verò binos sumēdose esse sextarios ab eodem fuisse constitutum.

Quapropter ad alteram, quæ tum secunda principalis ratio, tum verò prioris illius confirmatio nuncupari potest, nunc respondentes, asserimus nunquam nos mellis decem libras illas, ob id quoniam liquoris, aut corporis liquidi sint, mensurales, non autem ponderales fore disputasse: sed cum liquoris vnus ex illis existant, quorum, & cuius proinde (quemadmodum patet ex libris vtrisque de compositione pharmacorum, tam. s. secundū genera, quā ēt secundū locos) mensura, potius quā pondus in compositionibus medicamentorum assumi, præscribiq; solet, sæpius etenim legimus, *mellis Hemina, Cyathū, Sextariumq;*, aut vnum, scilicet, aut etiam plures ab Autoribus præcipi Pharmacis quibusdam iniiciendum, aut permiscendum esse, ambigendum potius fore cēsisse, & æqua pariter ratione dubitandum, num mēsurales, an verò pōderales illę cenferi, constituiq; debeant: cum nulla nos ratio cogat, vt ponderales illas esse concedamus. Quæ cum verissima sint, iure sequitur, vt apud nos non repugnet ailqua ex ijs, quæ in compositione Theriacæ sumuntur, & inter liquida reponi possunt, pondere præfiniri, mēsurā verò nō determinari; Quale præ cæteris oppobalsamum est. Quoniam,

niam, scilicet, eius ad reliqua symmetria, proportioque non ex copia, multitudinè, sed ex pondere potius, & gravitate sumenda compositor talis Antidoti videbatur. Iam verò satis aperte Galenus alio loco docuerat ea, quorum ad alia proportio, symmetriaque ratione gravitatis inveniènda, siue petenda videtur, ponderanda fore, non mēsuranda, per lancemque dimetienda, atq; sic reliquis omnibus, vti medicamenti cōditio, compositioq; postulat, coæquanda. Addimus, quòd quāvis opobalsamum inter liquores enumerari, recenserique possit, non tamen est inter eos reponendum, quorum occasione præcipuè Mensuræ pro medicamentorum compositionibus à Romanis inuentæ, excogitatęque sunt, & à Medicis vsurpari consueverunt: tales enim fuere uel solum, vel maximè, saltem, Oleum, Vinum, Acetum, Aqua, & ea, quę solent ad aquam aliqua ratione referri, postremoq; Mel (quemadmodum omnes illi ferè, qui de ponderibus, & mēsuris eruditè scripsere, nos docuerunt.) Et quamquam, 7. de compos. secund. Genera cap. 14. Vascula quædam oppobalsami, Gleucini Medicamēti descriptione recensentur; id tamen semel, aut bis contingit ad summum; quemadmodū euenit etiam, vt arida quædam, & sicca corpora aliquando vnius, aut alterius mensuræ capacitate determinantur.

Ad alteram verò ex aduersariorum fundamentis, & placitis rationē à nobis tertio loco desumptam; In qua. s. eruditissimus Vidua colligebat, & opinabatur, eam pro conuenienti mellis inueniènda, noscenda ve quantitate, proportionem eius ad primum corpus in compositione recensitum, scilicet. s. pastillos, inspiciendam, & ita seruandam esse, vt vicies eorum multiplicato pondere, deducatur &c. Nos respondemus hęc eius ad pastillos illos proportionem, hanc symmetriam, non esse multiplicandam, vt quę voluntaria prorsus existat, & solo casu contigerit: Quippe cum æquè, multiplicatione variata, & adaucta, respondeant illę eadem librę trociscis viperinis, & tribus alijs simplicibus, quę in eadem classe reposita, sub vna communi dosi sumuntur: Quod & in alijs aliarum classium medicamētis, adhuc adaucta multiplicatione, continget. Quapropter ij, qui viginti librarum pondus conuenientem pro cōponenda Theriaca mellis quantitatē esse constituunt; bis vicies inquit multiplicandam esse dosim, & pondus trociscorum illorum. Qui verò quindecim; præcipient, vt trigesies multiplicetur pondus eorum, & hęc legitimam, eadem prorsus ratione, quantitatem mellis ad talis Antidoti confectiōem esse contendunt. At illi, qui duplum ad totum ad vnguē, vt Oddus & focij, mellis esse sumendum superstitiose disputarunt; non solum hanc, sed alias omnes proportionēs, & symmetrias, præter-

quam duplato ipsius inuetam, receptamque, omnino despicient, ac iri-
debunt. Nos aut qui, sicuti mirā omnium Theriacā ingredientium cor-
porū proportionem adinuicē, admirabilem vniuersorū commēsuratio-
nem, & symmetriā celebratā ab alijs, multifaciendā, & æquis laudibus
extollendā esse perpetuo censuimus; ita quoq; fatemur, & credimus ali-
quā mellis ad reliqua in talis Antidoti cōpositione symmetriā, propor-
tionemq; reperiri: Veruntamen hanc lōge diuersam, & alterā ab ea fo-
re putamus, quam vir eruditissimus excogitauit: quippe qui rectius eā
non ad vnum ex ijs, quæ Theriaces compositionem ingrediuntur, sed
vel ad omnia, vel ad sicca potissimum, & arida corpora referendam es-
se censeamus. Cum enim mel totius medicamenti veluti materia sit, ad
omnia que simul ea corpora coniungenda, coniuncta que diu conseruā-
da conducat, & requiratur; oportet, vt non ad vnum, sed vel ad omnia,
vel ad ea potissimum, quæ, vt simul aptè iungat, & vniat, excipere, reti-
nere que debet, proportione respondeat, & referatur. Quod forte Da-
mocrates indicare voluit in Mithridato cum dixit satis esse tātum mel-
lis, & vini sumere, quantum apte cuncta simul vniri, iungi q; possint (ad
liquabilia. f. vinum referens, ad arida Mel.) Itaque si fiat mellis ad om-
nia comparatio, si proportio quæraturs eius ad cuncta, erit illa, quemad-
modum superius etiā innuebamus, proportio triplā ferè. Quam, si quis
ad vnguem in componenda Theriaca seruare maluerit, nos non mora-
bimur. At verò si ad arida solum, & sicca corpora collatio fiat, ad quæ
mel ipsum præcipuè referendum esse putamus; cum, scilicet, humida, &
liquabilia vino macerata, læuigata que, satis convenientem vnitatem, &
consistentiam adipisci videantur, ac facile proinde ceteris cōiungi pos-
sint; aliam vtique dicimus eius ad illa proportionem (& eā magis quo-
que legitimam, atque rationabilem) esse. Quæ, cum ex duobus accipi
possit, & petri soleat, ex pondere, scilicet, grauitate que, necnon ex mole,
copiā, vel quantitate: Hac nostra constituta mellis, pro componenda
Theriaca dosi, perbelle contingit, vt à quouis altero duorum proportio
sumatur, semper res cadat in idē; proportionis, ac symmetriæ nulla di-
uersitas, nulla permutatio fiat; sed eadē mellis seu quantitas, seu pondus
proportio perpetuo cōsurgat, & quēadmodum vnū alteri, ita alterū vni
perquisite respondeat. Nam si proportio capiatur à grauitate, cum mel
sit quadruplo speciebus ipsis, & siccis corporibus (vt docuere Sera-
pion, & Auicennas aliquando, immo verò vt à nobis obseruatum est)
pōderosius, & grauius; vtique par amborum portio, infallibilis que pro-
portio fuerit, quoties pro singula libra mellis, tres corporum contrito-
rum, ac specierum vnciæ sumentur, & inuicem permiscebuntur. Si verò

fit à copia, seu multitudine Symmetria facienda, & ambo eiusmodi corpora coequanda; tanta mellis, quanta siccorum corporum, & specierum est multitudo, copiaque sumatur; & hæc, eadem ratione prorsus, & eodem modo sibi respondebunt, neque pondus, neque mensura variabitur, aut mutationem, & differentiam aliquam effatu dignam sortietur. Vnde sic optima corporis vtriusque, sicci nimirum seu specierum, ac mellis, unio, permixtioque, minimis scilicet illis suscipientibus, & minimis alijs exceptis inuicem optime coequatis, ac sibi respondētib, orietur: cum Mixtio, quanquam ad minima diuisio non sit, eam nihilominus miscibilium diuisionem ad minima (vt Aristoteles, & potiores Peripatetici docuerunt) præsupponere videatur. Siue igitur tanta copia mellis, tamquæ capax illius Mensura sumatur, quanta specierum, & contritorum corporum est multitudo, & è contrà si quanta copia mellis, tanta siccorum mensura sit (eo modo tamen, quo trita solent, siccaue corpora mensurari, non ipsis aliquali imbutis humiditate, vel à manu comprimente compactis) siue, si tres puluerum vnciæ pro mellis vnaquaque libra sumptitentur, tunc neque pondus à quantitate recedet, neque etià quantitas à pondere deuiabit, sed illa copia semper, ac pondus illud liquoris huius consurget, & orietur, quod tot annorum spacio, tanti que temporis experientia comprobatum est optimè talem Antidotum in hac alma ciuitate perpetuo paratam, exigere, sibi que determinare. Et quanquam nos (vt in superioribus innuebamus) non ita superstiosissimus, vt negemus omnino posse medicamentum hoc etiam minori mellis quantitate parari. Dicimus tamen, & liberè profitemur isthanc inter omnes mellis ad species proportionem, optimam, legitimam, & maxime rationabilem censendam esse, fortasseque fore terminum, ultra quæ in ipsa mellis quantitate præscribenda progredi tutò non licet. Hæc sūt arcana, quibus moti Maiores nostri, tacito illo consensu, talem mellis copiam in vtriusque Antidoti compositione perpetuo sumptam, nō reprobātes, approbare voluisse visi sunt. Hæc si Iuniores intellexissent, nouas eiusmodi ambiguitates non introduxissent. Hæc sanè nos varijs et, & validissimis rationibus persuaderi, confirmari que posse censemur: & ex natura conditione que mixtionis, ac formæ, tot ex simplicium unione, coniunctione que, sicuti Galeno placet, suborientis, & resultantis, facile quoque comprobare studeremus, nisi multa, quæ sanè prius partim explicanda, partim verò supponenda sese nobis offerrent, ab instituto nos morarentur: non solum enim mellis officium, sed viniianus examinandum, & inquirendum à nobis esset; quæ liquabilium pariter, & inter ea lachrymarum, & gummi necessitas in talis Antidoti compositio.

ne roter, videretur inueniendum: ac in super alia plura rigorose li-
biicienda forent examini, & perquisitè consideranda. Quæ quoniã pro-
lixiori sermone tradi, vberiorique oratione doceri deberent, & integrũ
vnum per se ipsa volumen exposcerent, prætereũda potius, & viris do-
ctissimis alijs, qui talia diligentius susceperè tractanda, relinquenda cẽ-
suimus. Cum sola nostra sit intentio nunc rationibus iis, quæ ab aduer-
sarijs propositæ sunt, vel ex eorum fundamentis elici possunt, vndique
satisfacere, non autem nouas suscitare quæstiones, aut modicum etiam
quid extra rem diuagari. Quapropter hæc pro tertiæ rationis imbecilli-
tate demonstranda, dixisse iusticiat.

Ad quartam vero, seu quarto loco recensitam à nobis, rationem eo-
rum: admissio supposito, nempe minori, posse Theriacam mellis quanti-
tate parari; cum, sicuti paulò superius innuebamus, non in illorum hæ-
resi simus, aut ita superstitiosi, vt existimemus sine ea certa, & indiui-
sibili quantitate, mensuraque Mellis nobilissimum hoc Antidotũ haud
confici posse: quanquã putemus nullo altero potiori, meliorique modo
(si sit aliqua vera proportio, symmetiaq; specierũ ad ipsum, aut eius ad
species in compositione seruanda) quàm adducto superius à nobis, illud
idẽ parari posse. Ad eã, inquã, admissio supposito, cõcedimus consequen-
tiã, & præter alias, hac etiam ratione dicimus nos arbitrari nõ esse The-
riacam minori mellis quantitate parandam, quoniam graue censemus
imminere periculũ, ne processu temporis aliquo nimis arescat, & exsicce-
tur. Quare neganda pro responsione nunc nobis est falsitas consequen-
tiæ, vel consequentis. Ad cuius primam probationem, quæ tota ni-
titur auctoritati Galeni tum cap. 14. libri de Theriaca ad Pilonem con-
stituentis Antidotum ad sexagesimum annum incolume cõseruari, vir-
tutem, & efficaciam adhuc habere; tum etiam libro de eiusdem vsu ad
Pamphilianum, docentis, & affirmantis recentem esse Theriacam, quã-
do trigesimum sextum annum nõdum attigerit; quasi velit Galenus in
ijs innuere nunquam, nisi post sexagesimum ætatis annum, accidere, vt
medicamentum ab ipso paratum arescat, & exsicceetur; respondẽtes, di-
cimus primò cõprobationem hãc nullam esse, quippe cum in ea sup-
ponatur id ipsum, quod probandum esset, ac proinde principium petere
videatur. Siquidem nos, qui libras illas mellis assumptas, & a Galeno
determinatas, mensurales esse putamus: existimamus etiam Antidotũ
præseruatum à siccitate fuisse, quoniam vel eadem, vel parum ab ea dif-
ferenti copia mellis à Galeno paratum sit, quam solent nostri Phar-
macopolæ ad eiusdem Antidoti compositionem assumere, & v'sarpare.
Quod si fortassis aliquis etiam, tot annorum experimento solum inni-

xus, hanc nostram, vt a Galeni diuerſam, componendi rationem acciperet, & vnde quaque probaret; propterea quæ libras illas ponderales eſſe concederet; aliter quoque reſpondere poſſet, ac omnem rationem, & cauſam cur illa Galeni Theriaca tot per annos maneret humecta, & à ſiccitate diutius præſeruaretur, aſſerere vel in mellis Attici qualitatem eſſe referendam, vel in vini Falerni copiam, immo verò conditionem, atque naturam; cuius, vel alicuius alterius illi conſimilis inopia, defectuque, tanta non ſolet à noſtris Cretici illius Maluatici, quod Falerni loco nunc ſubrogatur, & ſubſtituitur, in compositione Theriaces copia ſumi, quanta Galeni tempore ſumebatur: timent enim, & iure, ne (cum vinum illud ferè ſemper adulteratum ad nos deferatur) temporis tractu, medicamentum totum aceſcat; ſicuti poſt tertium annum, ex maiori vini quantitate, ab inexperto viro quandoque talis in Antidoti compositione ſumpta, Galenus idem eueniſſe teſtatus eſt. Quod illos, qui talia nunc certo cupiunt (ſed cito nimis) experimento dignoſcere, diligenter attendere; & inde monitos eſſe velim, ne, celeres in faciundo iudicio, decipiantur: dū ſexto tranſacto mēſe facile putant diſcerni, & agnoſci poſſe, nū aliquod conditionis eiufmodi vitium, ſit ipſum Medicamentum in poſterum contracturum. Coeterum, ad eandem conſequentis illius falſitatis comprobationem altero nos, ſecundoque modo reſpondemus; Galenū ſcilicet inquiringes, quoties aſſerit Theriacam aut ad trigefimum ſextum annum uſque recentem, aut ad ſexageſimum integram, & incolumem ſeruari poſſe, toties aliud voluiſſe nobis indicare, quàm prædictam Antidotum tot annorum ſpacio ſemper, & vbique non exſiccari, aut aridam, ſed ab externis, & ambientis iniurijs incolumem, præſeruari: quippe qui rectè nouerit ab immodico ambiētis calore, immo verò & à ſummo frigore, ſepè contingere, vt, quæ ſuapte natura ſunt humidiffima, ea vel humore compreſſo, ſicut à frigore fit, condensentur; vel eodem foras euaporante, reſolutoque, vt à calore, ſiccentur: Quique ſciebat Theriacam Romæ conſectam, alibi quoque componi poſſe, & in calidis admodum Regionibus, ſicut etiam in frigidis, præparari, aut alijs forte præparatā in locis, ad eaſdem Regionem aſſerri, nō repugnare. Quod autem nos putamus, & dicimus illum indicare voluiſſe, nihil aliud eſt, niſi temporis vltimum, & ſummi vigoris ipſius Antidoti terminum demonſtrare; ſeu, quàm ſint vires in eo longeuę, diſtinctius nos edocere. Quas proinde vires eo loco dixit, quanquam remiſſas, nec in eodem gradu, tamen aliquales, ad annum ſexageſimum uſque retinere, conſeruareque poſſe: & quas, non proinde, ſi ſiccaretur, & arida quandoque fieret, prorsus amitteret; cum, additione mellis eaſdem, quanquam imbecilliores, iterū

(vbi Damocrates docuisse videtur) adipisci, recuperareque posset. Ceterum argumentari propterea, quoniam Galenus eiusmodi siccitatis ab ipso medicamento contractæ, vel contrahibilis, nullibi certo meminisse videatur, impossibile fore, vt, si paretur eo modo prorsus, quo parabatur ab ipso (dato. s. non concesso tñ, vt libris illis pro ponderalib. intellectis præpararetur Antidotus) perare scire, siccariq; possit, est error manifestus, & graue peccatum in logica, in qua didicimus nullo modo licere propositionis alicuius veritatem, immo verò neque probabilitatem ex autoritate negatiua colligere. Quemadmodum impium, & indignum esset, vt ideò minus rectè Venetijs eiusmodi Pharmacū pararetur, quoniam soleant (sicuti reuera solent, & magna profecto cum huiusce inclitæ Ciuitatis existimatione, fama; magno cum ipsius honore, addo etiam vtilitate non spernenda ciuium, qui in hac eadem Ciuitate non Theriacæ solius, sed rerum insuper multarum aliarum mercaturā exercent) singulis annis & huius, & Mithridaticæ confectonis copiam, variarum nationum homines, tum mercenarij, tum nobiles etiam, Angli, Germani, Poloni, Galli, postremique (sicuti diebus contigit elapsis) etiā Persæ ad suas reuersi domus, & regiones adducere, aut nondum reuertētes, per alios afferri curare: Vt proinde nullum immineat periculum, ne nimis Antidotus in hac ciuitate, vbi singulo biennio, vel ad summū triennio componi solet, are scat, & exsiccetur. Impium, inquam, & execrabile foret, vt, ob id Pharmacum hoc nobilissimū alio, quàm optimo illo modo pararetur, ac tali, vt sua consistentia seruata, posset quocunq; deportaretur, ad plurimorū annorum spaciū perdurare, & vltimū sui terminū (quantū per nos fieri potest) immutatum attingere. Seruatur enim gloriose Venetorum Theriaca multas apud Nationes eas, vti nobis relatum est, pluribus annis ad multos pariter, & varios vsus incolumis. Vnde si permuata, diminutaque mellis quantitate, deinde cōtingeret, vt citius modo, quàm prius in Regionibus illis, ad quas ea, maxima copia deferri solet, exsiccaretur, & arida fieret, suspecta forsan gentibus illis ea redderetur, & in contemptum prorsus abiret. Vnde spreta, relictaque nostra, Regionum illarum Incolæ alteram melioris cōsistētiæ, diutiusque perdurantem (non sine aliquali, & non spernendo, ciuitatis huius incommodo) à tot alijs Prouincijs, & Ciuitatibus, vbi tanta, quanta nos vtimur (sicut abunde superius demonstratum à nobis est) mellis quantitate, prædictam conficiunt Antidotum, studiose contenderēt. Iam verò, quàm Mentis Damocratis recitatis supra carminibus consulētis, vt si Pharmacū temporis diuturnitate siccesceret, illi Mel adderetur, intelligentiam, & explicationem Iuuenis noster eruditissimus affert,

post sexagesimum annum exsiccatum Antidotum, Melle cōsuleret, im-
mo uerò doceret reformari posse; consuleret, ac nos doceret Theriacam
tunc reformare, cum prorsus Theriaces uires amisit, & ad vltimū per-
ducta senium, immo iam mortua, Theriaca non amplius vocari posset.
Foret autem valde ridiculum hanc post tempus illud refectionem adhuc,
ac reformatam, asserere, & admonere proficuum quidem, & vtilem eua-
suram, sed imbecilliolem attamen, nec ita validam, vti prius erat: quē-
admodum cecinit carminibus ijs, ex Andernachi versione, Demo-
crates.

Tandemq̃ habebis vtile, quod valuit nihil.

Sed inferius eo, quod miscueris semel.

Cum, scilicet, clare Galenus libro de vsu Theriaces ad Pamphilianum,
inueteratam dicat imbecilliolem esse recentem: recentem uerò nuncupet
illam, quæ nondum annum trigessimū sextum excessit: & subdat hāc,
quæ post trigessimū sextum annum ad alios morbos accommodatur,
tunc illis auxiliari, prodesse quæ, cum prædictis non fuerit facta multorū
aliorum annorum accessio. Immo uerò cum libro de Theriaca ad Pifo-
nem 14. scribat aperte potens esse medicamentum ad trigessimū annū
vsque, & in illis affectibus, vbi tanta noxæ causa non est, sufficere dicat,
cum vsus exigit, vel sexagenarium; ac tanti spacij terminum addat ad-
modum exoletum, ac imbecille, pharmacum, reddere. Quare vanum, &
risu dignum monitum illud Damocratis esset, dum post additum Mel
imbecillius, & ad agendum infirmius, ac illo cui semel fuerit iniectum
Mel, inferius reddi medicamentum affirmat, si post sexagesimum annū
addendum illi, non antea, mel intelligeret, & post vltimum senium re-
formandum esse consuleret.

Ad secundam falsitatis eiusdem consequentis confirmationem, quæ
certo quodam experimento demonstrare conantur ita paratum Anti-
dotum plurimo annorum spacio seruari, nulla quæ siccitate contracta,
manere semper humectum: pro quo Doctissimus Vidua multorum te-
stimonia, propriaque eorum manu subscriptas ostensurū fides aliquas,
& (vbi fuerit opus) allaturum se pollicetur, nos respondemus totidem
nobis à pari testimonia fore, totidem aliorum fides, qui iureiurando te-
stantur se experimento sensato nouisse decem illis vt ponderalibus, li-
bris mellis assumpris, & ijs confectam Antidotum, non multorum an-
norum spacio transacto, sic aruisse, vt omnino necessum fuerit ad con-
sistentiam illius reformandam, iterum tantum quantum satis esse vide-
batur mellis adicere, Quo experimento proinde rectius adhuc ipsa ve-

mate inguota, nouis etiam modi relictis inuentis, ad eandem, quam prius
assumebant in talis antidoti compositione mellis quantitatem inijcienda,
reuerſi ſunt. Sufficiet autem inter multos vnus peritiſſimi, & integerrimi
viri teſtimonium adducere D. Galeatii nimirum cognomento Coccapani,
Aromatarii Mantuani, ad Medici (vt vocant) Inſignia. Qui diebus elapſis
indubiè teſtatus eſt Ingenuum virum, & ſicuti eiufdem ſcripta demonſtrant,
non vulgaris eruditionis, Dominum Antonium Berthioli, Sereniſſimi Mantuæ Ducis
Pharmacopolam, compoſuiſſe Theriacam, in qua pro qualibet libra Mellis
quatuor ſpecierum vncias iuſſit immitti. Quæ poſt fermentationem, vt inquit,
annorum quatuor, exaruit ita, tâquè ſicca reddita fuit, vt oportuerit omnino
per incerniculum rarum admodum illam, addito melle, transfundere, & ad
uſum aliquem accommodare. Quapropter hoc anno melius conſulti Ciuitatis
illius aliqui publice, grauiffimorum virorum quorundam interuentu,
aſſiſtentiæque celeberrimorum Medicorum Ciuitatis illius, tribus ſolis
puluerum vncijs ad ſingulam mellis libram iniectis, eandem Antidotum
glorioſe pararunt. Hinc etiam fit, vt publica ab Aduerſarijs ex quibusdam
libellis impreſſis, propoſita exempla, nullius apud nos conſiderationis
exiſtant: Quippe qui fateamur non deſuiſſe quibus aliquândo compositionem,
ſeu componendi rationem illam experiri placuerit. Quare non ſatis eſt illos
in teſtimonium adducere, ſed oportet, vt, quid de medicamento, hoc modo
paratis euenerit, omnibus etiam appareat, & publice conſtet. Iam verò ſicuti,
quæ Sartorius anno 1613. de Theriaca. 1612. ſ. anno conſecta, publice ſcripſit,
nullū conueniens, ob modicum tempus, adhuc teſtimonium aſſerre poſſunt;
cum à quarto poſtiſſimum anno, vel circiter, ſiccitatem euenire pharmaco ſic
præparato, diligenti ſit obſeruatione notatum. Ita, quæ (quanquam antea
multo) memoriæ tradita inueniuntur à Vendrameno Menegazzi, nullius
exiſtimationis cenſeri debent; cum. ſ. non conſtet adhuc, quid illi Medicamento
poſt quartum annum, aut quintum, certiori teſtimonio, quàm ſcriptoris
illius, euenerit. Cui multi forſan (vt ei, qui compositionis eiufmodi modum
ſic affectabat) non ita tutò credendum eſſe (nec ſine ratione) contenderent.
Maiori ſanè fide dignus, & cui maiora quoque credenda forent, vt quæ
inuiolabilis conſcientiæ virū nobiſcum oēs agnoſcant, cenſendus, &
habendus eſt laudatiſſimus, & doctiſſimus vir Dominus Ioannes Moratinus.
Quem tamen nos excuſatos habiturum, & æqui bonique conſulturum fore
non diffitemur; ubi non ſibi, ſed allatæ Theriacæ, tanquam illi, quæ
clam, non publicè, & debitis cærimonijs, non eorum præſentia conſecta
ſit, quorum pro talis Medicamenti compositione

positione requiritur non præsentia solum, sed etiam assensus, nullam enim à nobis haberi præstarique sentiet. Atque tot pro quartæ rationis illius solutione, dicta sufficiant. In qua cum multa contineantur, multa quoque nos reprobare, iustoquæ forsan esse longiores oportuit.

Itaque iam deueniamus ad quintam. Quam sanè nos duplici nomine peccare dicimus, duplicique ratione reijciendam esse censemus primò quoniam principium petit: siquidem id, quod probandum in illa foret, hoc est, modum hunc tanta mellis quantitate componendi Theriacam, à Galeni modo diuersum esse, veluti certum, & comprobatum assumitur. Secundò, quoniam, dum inueteratam consuetudinem hanc Aduersarij nostri, in minori propositione rationis illius, conantur abusum, non autem consuetudinem esse probare; nō rectè nomine *Abusus*, vtuntur; & quid eiusmodi vocabulo significetur ignorare se monstrent. Cum enim duplex nominis huius intelligentia, duplex illius sensus existat; in eorum profecto nullo, qui bene nescit vtrumque, cōsuetudinem hanc nuncupabit abusum. Est enim primus sensus illius, in quo veteres, & Iurisconsulti (quemadmodum legitur apud Vulpianum) res eas, non in vsu, sed in abusu consistere dicunt, quorum vsus, nisi pereant nullus est: accipitur enim tunc verbum, *abutor*, vt significat idem, quòd vtendo consumo: ita Boetius, ita etiam Cicero in Top. Iam verò valde ridiculū esset ob id abusum consuetudinem hanc appellare, quoniam vel ita composito medicamento dum vtimur, pereat illud, & consumetur: vel quòd in ipso compositionis actu exercendo compositio pereat. Alter autem sensus eiusdem nominis, alter illius intellectus est, dum accipitur in malam partem, potissimum verò dum vtimur aliqua re contra id, ad quod est instituta. Quod sine publico, vel priuato alicuius incommodo non contingit. Quo sanè sensu, neque etiam rectè vel ipsa componendi consuetudo, vel compositæ rei vsus, abusus nuncupari potest. Nam si de componendi modo, consuetudineque loquamur; non solum hæc, tanquam ea quæ non est, vt nos opinamur, quod spectat etiam ad mellis quantitatem, ab ea Galeni diuersa, talis appellari nequit: Verum insuper quæque illa fuerit, nec multiplicari, neque seorsum, & ab effectu separata, seiunctaque expendi debet; non enim est, vt de componendi consuetudine valde solliciti simus, dummodo re composita bene, & cum finis illius, ad quem ordinatur, & instituitur adeptione, prospero semper vtamur euentu. Quam verò nostra Theriaca benè, quam multorum commodo semper, nullius autem vnquam incommodo, cum fuerit opus, vtamur, non alios, quam vos me ipsos (Integerrimi Patres) quos iustos etiam expecto Iudices, testes appello. Quis enim vestrum, qui non aliquando,

immo qui non sapius etiam, eiusmodi Antidoti tali modo confectio, atque ita certe, non alia ratione parato, maxima cum ægrotantium, aut indigentium vtilitate sit vsus? Quis ex vobis, qui non ex orco; imminenti que morte plerosque siue interna aliqua veluti venefica qualitate correptos; siue rebus aliquibus tali facultate pollentibus, intus assumptis, aut extrinsecus occurrentibus, in eandem conditionem forte dilapsos, quandoque subtraxerit? Certe nullus. Quare iam desinant Aduersarij modum compositionis hunc accusare; cum ex eo tante facultatis medicamentum exurgat: nec amplius probatam consuetudinem hanc abusum appellēt; cum nullus adhuc, tot ab hinc annis conquestus sit, quod, ex nimia mellis iniecta copia, noxam, aut incommodum aliquod ex illius vsu contraxerit. Quamquam contingere fortasse potuerit, vt de præsignata nonnunquam, & singularis alicuius vnus Antidoto, Theriacave fuerint conquesti plures. Non tamē hac, sed altera potius ratione (quæ admodum euenisse temporibus ijs scio vobis omnibus esse notissimum) nimirum, quoniam furtim, & clā huiusce fuerit compositio dolose parata, vel etiam quoniam ipsa iam Antidoto bene confecta, conuenientissimeq; præparata, sit eadem importuna deinde mellis additione vitata.

Sed iam ad sextam rationem accedamus; quæ videtur & ipsa defectuosa, paucissimi que fore momenti. Quandoquidem in minoris propositionis comprobatione principium petit. Quod euidētius, ac statim, explicata responsione, patebit. Dicimus igitur, concessa maiori, minorem esse falsissimam, & egere probatione. Quippe cum ea, quam nos in compositione Theriaces assumimus, mellis quantitate, peroptime cuncta, præcipue verò sicca & arida corpora, ad vnā communem vñionem reducantur aptissimam fermentationi, & alterationi præcedenti formam, ex omnium (vt cum Galeno loquamur) perfecta commixtione suborientem: neque sit opus, vt mellis quantitas imminuatur, quò minus hoc absolutius perfici possit. Cuius oppositum, quod maxime ab illis probandum esset, quoniam partim, vt notum accipitur, partim etiam medio quodam eiusdē conditionis assumpto, quod. s. æquo modo probari desiderat, demonstratur; videtur ratio, siue minoris propositionis illius confirmatio, ex numero illarum esse, quæ principium petūt. Dum enim inquirunt pro minoris illius comprobatione, mel non alia quantitate sumi debere, quā ea, quæ ab Andromacho Filio Iuniorive, terminata, præscripta que fuit, & addunt hanc ab Andromacho decem ponderalibus libris fuisse definitam; supponunt id, quod probare tenentur, & in quo totius fere difficultatis huiusce nervus positus esse videtur, & collocatus.

conlocatus. Negamus etenim nos ab ipso primario tantam quantitatem
librarum decem ab Andromacho Iuniori fuisse definitam (de qua re ta-
men abundantius in seq. capite sermo fiet) Deinde dato decem ab ip-
so fuisse quoque præscriptas libras, dicimus illas mensurales esse; proin-
deque eiusdem mellis ferè quantitatis esse capaces, quam solent nostri
Aromatarij, pro talis Antidoti confectiōe suscipere, quæque si me-
tiatur ad lancem ponderis erit librarum circiter quatuordecim (vti di-
stinctius quoque suo loco sumus, dum. s. vltimo adductæ rationi respō-
debimus, demonstraturi.) Oportebat autē illos hæc omnia nō veluti pro-
bata supponere, sed veluti semper à nobis negata, immo verò perpetuo
neganda, probare. Quemadmodum erat etiam probandum ab ipsis Da-
mocratem, Critonem, & (quod magis est) Galenum quoque Theriacā,
libris illis acceptis vt ponderalibus, ita semper Imperatoribus compo-
suisse. Postremoque tantam mellis copiam assumptam, quantam assu-
munt Aromatarij nostri, copiosiorē esse, quā pro talis Antidoti cō-
positione conueniat, probandum itidem ab ipsis erat, non supponen-
dum.

Cæterum ad confirmationem rationis eiusdem ex Galeno desum-
ptam, statuente nōnullos eandem Antidotum sex, alios autem quatuor
mellis tantummodo libris assumptis, composuisse; Respondemus isthæc
rationis confirmationem longè magis, & euidentius ipsis, quam nobis
obesse. Primo quoniā rationabilius est arbitrari libras quatuor, aut sex
ab illis assumptas, *mensura*, potius quā *ponderis*, esse. Quandoquidem
multò tūc cætera mel, nō sola copia, multitudineve, sed pōdere quoq; su-
perarent: vt proinde vix posset ex omnium commixtione sub electarij
forma, quæ nequit dura nimis, aut valde solida ī Antidotis ad læthalia
paratis euadere, Theriace confici; Quando cōstet, ex modica sic assum-
pta copia mellis, Pilularum potius corpus, quam electuarij consisten-
tiam, & formam Antidotum forè suscepturum. Quare si decem à Ga-
leno constitutæ libræ conditionis vnus, & eiusdem statuendæ sunt, qua-
lis etiam quatuor, & sex ab illis assumptæ, fuerunt, (vti fuisse credendū
est) erunt profecto mensurales & ipsæ non ponderales. Secundò, Quo-
niā si isthæc præstantissima Antidota (vt inquiunt) pauco excipi mel-
le debent, ne à copiosiori vis, & facultas eorum obtundatur, & sit impe-
dimento, ne mixtio, alteratio, vnio, fermentatioque absolui perfectè pos-
sit, oportet, vt vel Theriaca quatuor composita libris, ad eorum omniū
absolutionem peruenire nequiverit; ac proinde præter rem fuerit, & ex-
tra propositum ab aduersarijs inducta: Vel, vt ea, quæ decē libris à Ga-
leno conficiebatur, maiorem mellis copiam, & quātitatem adeptā, quā

pro perfecta mixtione, & fermentatione conueniat, inuailda fuerit, nullius fere facultatis, & roboris: cum. s. inter vnā, & alterā differentia notabilissima, nempe sex librarum, siue illæ ponderales, siue mensurales existant, intersit. Vel tandem, si tanta, quāta inter vtrasque recensitas Antidotos, differentia mellis habetur, non impedit commixtionem, alterationem, vñionem, & fermentationem; hoc est, si quatuor, sex, & decem libris illis assumptis, fermentari, concoqui alterari, & ad vnā ex omnium commixtione formā adipiscendam, æque bene perducī potest; vt, neque certā ita mellis quantitatem, pro perfecta mixtione sibi determinet; neque illa proinde, quæ inter ponderales, & mensurales intercedit, differentia libras, tanta sit, vt mixtionem, alterationem, ac ipsam medicamentī totius fermentationem impedire possit. Quod si decem libras illas sic acceptas Aduersarij contendunt terminum rectē compositionis statuendas esse, quem pertrāsire nullo modo possimus: Id ipsum probandum erit, & erat ab ipsis, nō supponendum; & adducenda ratio, cur, si rectē quatuor libris, ab alijs medicamentum hoc parabatur: non potius quatuor circiter libras eiusmodi terminum, ac limites compositionis ipsi quoque constituent, & cur neque, decem illis assumptis, imminuat pari modo periculum, ne à copiosiori melle totius medicamenti vis obtundatur, & hebetetur? Sed nos iam alios probabiliore in superioribus perfectioris compositionis terminos, & limites cōstituimus.

Perpenditur Septima ab Aduersarijs adducta ratio, & duplici via tollitur. Vbi nonnulla de drachmis mensuralibus. Cap. XII.



Vpersunt adhuc geminæ, nobis ab Aduersariorum manibus inflictæ, plage sanandæ, binaque pariter illorum tela frangenda; cum, scilicet, remaneant adhuc vltimæ duæ rationes, ab illis adductæ, considerandæ, & è medio tollendæ. In quibus, quoniam vltimum illorum posse reponitur, omnisque victoriæ spes collocatur, oportet nos diligētiores esse, & in eis superandis, ac profligandis ita paratos, vt si contigerit (quemadmodum certo continget) multa, per ipsos assumpta, falsa videri, & à nobis nullo modo probari; Nos ea non simplici (vt solent omnes, & forte sufficeret) negatione refellamus, sed vt negationis, & refutationis illius rationē, & causam; aut testes, eosque probatos, aliquos afferamus. Vt, si qui forte

forte leui quadam apparentia deum, nunc non tam inuicta, quæ con-
suetudini, quam prius tantifecere, renunciauerint, proindeque manus
nouæ istorum opinioni porrexerint, Hi facile noscāt se fuisse deceptos,
atque ideo sponte veritatem ipsam iterum amplexentur, priori candori
restituantur, atque subtiliū quidē, falsarū tamen rationum vanitates
experti, se recognoscāt, & resipiscāt. Ceterū distinctioris, & breuioris do-
ctrinæ gratia, præstat singulam, ex duabus rationibus illis, singulo capi-
tē complectentes, nunc septimam ordine, in sequenti autem octauam,
seorsum accipere, & separatim examinare. Ne verò totas rationes ite-
rum repetamus, sat erit eas siue propositiones rationum earum, siue pro-
rationibus conficiendis, suppositiones, & fundamenta, primum asume-
re, deinde verò circum illa morari parumper, vt, eorum omnium falsi-
tate patefacta, tota statim argumentatio, quæ vel ex illis suppositi-
bus educebatur, vel ex propositionibus formabatur, vndique pereat.

In septima igitur ea ratione duo cōtinētur, vnde totius argumētatio-
nis illius asseritum robur elicitur, atque præsupposita eiusdem vis vni-
uersa dependet: quibus proinde labefactatis, ea tota machina corruet,
& argumentum in nihilum redigetur. Vnum est, Galenum libras decē
mellis in compositione Theriaces assumendas esse docentem, numerū
librarum earum ex certo quodam drachmarum numero, ab Androma-
cho Iuniori constituto, dum de melle pro conficienda Theriaca, loqui-
tur, collegisse. Cum, scilicet, Iunior Andromachus (primo de Antidotis
referente Galeno) noningētas, & sexaginta mellis drachmas pro The-
riaca præscripserit, quæ centum, & viginti conficiunt vncias, à quibus
decem integræ libræ constituuntur. Alterum est, ea cuncta, quæ drach-
mis præfiniuntur, non posse nisi pondere intelligi præfinita fuisse: quo-
niam. s. drachma signum & indicium ponderis esse potest, mensuræ ve-
rò nequaquam: Quippe cum nullus mensurales drachmas vnquam (ni-
si forte per somnum) excogitauerit, nullus earum aliquando memine-
rit; neque prorsus aliquis aut in Galeno, aut in alijs Autoribus locus in-
ueniatur, in quo de mēsuralibus drachmis, veluti de libris & vncijs, ser-
monem ij habuisse videantur. Cæterum nos pro responsione dicimus
vtra inque siue propositionem, siue suppositionē assumptam, falsissimā
esse; & à veritate toto coelo distare. Tantum enim abest (quatenus ad
primam attinet) vt ex certo constituto ab Andromacho Iuniori drach-
marum numero, Galenus numerum decem librarum propositarum
collegerit, vt è diuerso credendum potius, & (non sine ratione) putan-
dum sit numerum drachmarum illarum fuisse ab aliquibus Androma-
cho adscriptum, & ex decem libris, iam à Galeno propositis alibi (facta

impositum, eo modo, quo paulò post declarabimus, pro volūtate, & eorumdem arbitrio pari modo fuisse. Falsa quoque, nec minus à veritate remota secunda, quàm prima suppositio fore videtur: cum nō repugnet, vt. sicuti libra mensuralis apud Romanos in duodecim partes, quas vncias mēsurales appellabant, diuidebatur, sic etiam eius vncia, ponderalis illius instar, in octo partes æquales, veluti in octo drachmas, & eas mensurales, separetur, & sciungatur: immo verò cum luce clarius appareat eiusmodi drachmas non ignotas aliquibus, & ipsi quoque Galeno receptas aliquando fuisse. Ex duplici, ac vtraque eiusmodi propositione negata, duæ quoque responsiones emergunt, quæ rationis huiusce vim vniuersam penitus auferunt, & prorsus euertunt. Quarum quoniam ea, quæ postremæ suppositionis negationem insequitur, aliàs in publica illa concione, coram Patribus ab excellentissimo Viro subtiliter habita, partim audita, partim etiam explicata fuit: altera verò, quæ pendet ex negatione fundamenti prioris, nondum est ab aliquo tacta; propterea nos ab illa sumentes exordium, & ad alteram hanc, quam verissimam esse pari modo censemus, deueniētes, vtranque lucidius, & perquisitius nunc explicabimus. Mensurales, negatas ab aduersarijs, inueniri dariq; drachmas ratio docet, multorum celeberrimorum scriptorum persuadet autoritas, testimoniumque tandem ipsiusmet Galeni confirmat. Ratio docet; eo quoniam, si (quemadmodum superius quoque notatum est) libræ nomen, & vnciarum eatenus de ponderalibus, ac mensuralibus libris, & vncijs homonyma cognominatione prædicatur, quatenus mensurales, sola quadam ad ponderales similitudine nuncupatæ libræ, & in vncias partitæ sunt: Quid prohibet, aut cur non etiam rationi conuenit, vt ad minores vnciarum mensuralium diuisiones deuenientes, & eas in æquas octo particulas diuidentes, eisdem nominibus contamur, & octo drachmas, sed mēsurales, eas itidem appellamus? cum (sicut optimè Michael Neander in synopsi de mensuris quoque monebat) Omnes mensuralis libræ partes siue vnciæ, siue minores vncijs existant, mēsurales constituendæ, nuncupandæque sint? Neque multum refert, aut interest quòd drachma ponderis indicium, & signum esse consueuerit, vt quæ denarium proprie significet, qui semper ad pondus, nunquam autem ad mensuram referri solet. Cum (quidquid de drachma denarioque sit) fateamur & nos ita, propria veraque significatione, cōtingere; quemadmodum etiam in libra contingit & vncijs; Homonyma verò, & æquiuoca acceptione, negemus drachmam omnem ponderis solum, non autem mensuræ signum, indicium, & partem nuncupari posse: cum
sicuti

sicuti nomen vnciarum ad duodecimam libræ partē, vt mensuralis exprimitur, accommodatur; ita etiam drachmæ nomen ad octauam mensuralis vnciæ partem aptari, & accommodari possit. Et tanto magis, quāto tale drachmarum nomen, vt in superioribus demonstratū est, ad alia diffundi, & extendi solet, quæ longè magis à Denario, quam drachma promensura sumpta, recedunt. Nū itaq; rationi repugnat eiusmodi drachmas, vt mensuralis vnciæ partes, mensurales adinueniri. Quod etiam plurimum scriptorum autoritate confirmari potest; quorum quamuis nomine solum, breuitati studentes, adducere satis esset; placuit tamen, & visum est nobis, ne forte quis cum eruditissimo iuvene nos per somnum hos consuluisse, vidisse quæ suspicetur, proprios etiam locos, & propria illorum verba referre. Veruntamen, cum ab ijs, quos obiter quandoque produximus, sermonis exordium sumendum sit, ne iam illorum adducta verba sine vlla necessitate proinde quæ frustra, nunc temporis etiam repetamus, sufficiet horum & nomina, & locos tantum afferre, breuissimeque recensere. Primus igitur inter omnes nobis occurrit doctissimus Syluius 3. libro suæ methodi de compositione medicamentorū in fine: Vbi non obiter, sed ex professo, de ponderibus, & mensuris, quæ Gale-
no præcipuè, & ætatis nostræ medicis etiam in vfu frequentiori sunt, egit. Accedit verò secundo loco Leonardus Fuchsius in suis ad Myrepsium annotationib. numero 174. dū explicat Ecligma Socratis ad tabidos ab ipso Nicolao Myrepsio descriptū. Tertio verò succedit clarissimū Bergomensium Medicorū Collegiū in explicatione ponderū, & mēsurarum; quæ in calce eiusdē apposita libri vel Antidotarij, conspicitur, Hi, sicut ex verbis superius eorū vniuscuiusq; recognitione à nobis adductis apparuit, mensurales eiusmodi drachmas agnouisse, recipisseque visi sunt. Post hos aut & quarto loco Dessenium quasi testē cōuenientissimū, appellamus. Hic enim ultimo suo libro mensuras Atticas explicans, de q, Oribasio scribens, eum inquit recipere selquicyathum, siue vncias duas, & drachmas duas. Quas ipsum, vti mensuræ non ponderis signa dicuntur, intellexisse demonstrant consequentia verba: dum ete nim pondus eiusdē mensuræ, tribus in consuetis liquoribus illis, oleo, vino, & melle distinguit; in eorum nullo par pondus priori mensuræ recenset: Siquidem ait olei pondere fescūciam, & drachmas tres, vel drachmas quindecim; vini vncias duas, & scriptula duo; mellis autem vncias tres, cum vnica drachma. Quæ si non satis alicui fore videantur, vt colligat mensurales huiusmodi drachmas recepisse Dessenium: Is clarius legat eūdem inferiorius de cochleari magno loquētem: illic enim scriptum reliquit cochleare mensuram minimæ cuiusdam esse capacitatis, & quæ recipit drach-

mam vnam, scriptulum medium, grana duo, dualque grani quartas, ad mensuram (sic enim inquit) referendo. Quanquam addat isthanc in minimis ijs non esse necessariam; Quintus inter eos, qui eiusmodi drachmas non recusarunt, occurrit Magnus ille Conradus Gifnerus in quadam ab ipso formata tabella, vbi mensuras apud Græcos, atque Latinos scriptores vsitatas liquidorum, & aridorum, certa quadam ratione disposuit, & ordinauit. Hic enim vir doctissimus, dum minores, ac tandē minimas etiam mensuras, ac earum capacitatē exposuit, centies, & pluries, non solum drachmas, sed scriptula quoq; mensuralia recensuit. Mensuralia dico; propterea, quoniam nullius terminatæ rei capacitatem in mensuris considerauit, ac proinde, neque etiam pondus. Sextus autem testis Michael erit ille Neander, qui paulo superius allegato loco, mensurarum, & ipse capacitates expendens scribit ad verbum. *Cyathus capit unciam vnā, & semis, drachmam vnā, & scriptulum vnum. Ligula verò drachmas tres, & scriptulum vnum.* Vt autem nullus has capacitates vnciarum, drachmarum, & scriptulorum, alio modo, quā veluti mensurarum quarundam, acceptas, & intellectas ab ipso fuisse, suspicari, dubitareque possit, faciunt ea, quæ sequuntur, & illico ab eodem allegato loco subduntur. Scribit etenim fundamentum ibi positæ ab ipso abellæ. Sextarium fuisse Romanum: *Quem, addit, vbi viginti mensurales vncias continere probabimus, satis erit confirmata tabella.* Cū igitur cūcta in illa descripta tabella Neander ad mensurales Sextarij Romani referat vncias, oportet, vt oēs, siue maiores siue minores mensuræ Sextario, per mēsurales vncias, drachmas, & scriptula quoq; describantur. Septimus, & in quo modo quiescemus, testis ad hoc præclarissimus erit Præceptor noster Hieronymus Mercurialis libro 2. de comp. med. ca. 1. Qui de Veterum, Romanorumque mensuris Sermonem habens, vbi maiores per libras, & vncias mensurales explicauit, descendens ad minimas, de cyathoque loquens hunc in modum scriptum reliquit. *Cyathus diuidebatur in quatuor ligulas, seu quatuor cochlearia. Cochlear autē & ligula continebāt drachmas tres mēsurales, &c.* Tot sunt Autores (vt alios quosdam prætereamus) in quorum monumentis mensuraliū drachmarum, veluti partium mensuralis vnciæ, mentionem fieri, naturam explicari, nobisq; declarari dignouimus. Vt proinde facile unicuique patere possit quā falsa sit eruditissimi Iuuenis illa doctrina, quā in ea uita sentētia, dum sic absolutē, & in vniuersum affirmat nullibi Galenum, aut alios, de mensuralibus drachmis, vti de libris, & vncijs, mentionem aliquam effecisse; nec non etiam dum inferius inquit. *Somnari potius quā inueniri, posse mensurales drachmas satis à se fuisse demonstratum.*

Pratum. Cum nos idiplum in præcitatis autoribus, solutis sensibus, per
vigiliamque, non somniâtes, & per quietem legerimus, & inuenerimus.
Sed ecce video, quò tandem Aduersarij nostri se se recipiēt, & fugæ cu-
iusdam locum agnosco. Dicent eiusmodi mensuræ drachmas ex volū-
taria quadam vnciarum partitione subfingi posse, reuera tamen nō in-
ueniri; propterea, quoties drachmarum mentio fit, toties illas intelligi
ponderales. Sed quorsum hæc, dicam ego, viri doctissimi? Quò confugi-
tis? Nō dū igitur intellexistis nō regpugnare drachmarum dari quoque
mensuras? An forte quia quarta quintave grani pars in ponderibus se-
parata quoque non reperitur, signum, & nota ponderis illa non erit? nec
in ponderibus, corporumque grauitatibus præscribendis, aliquādo po-
terit hæc vsu venire? Quod si, cur non etiam drachma, quæ non est in-
sensibilis mensuræ pars, in medicamētis vsurpari poterit? Et si, seorsum
acceptam solum in imaginatione reperiri concederemus, negandum ne
propterea foret eandem in actu, reque ipsa contentā in maioribus mē-
suris alijs, vsu venire, nobisque inferuire posse? nequaquam. Sed nun-
quid inuicem nos altercamur, & quærimus modò, num vna liquoris ali-
cuius proposita drachma, cum mensurari vix possit, vt dicitis, pondere
præfiniri debeat? An potius de noningentis, & sexaginta contendimus;
vt in melle? deque tricentis, & viginti, vt in vino? Quid refert autem ad
pharmacorum compositiones optimas præscribendas, ingredientia, siue
arida, siue liquida sint, per maiores, vel per minores, aut etiam per mi-
nimas explicare mensuras? Profectò nihil: nam ita quoque Galenus in
ponderibus nihil, aut parum referre nos docuit siue per libras, siue per
vncias, siue per drachmas, dummodo cœtera probe respōdeant, corpo-
rum grauitatem determinemus. Sexto siquidem libro de compos. per
genera capit. octauo significabat referre parum, siue sex heminas olei
Ricinini dixerimus Andromachum in Fusco emplastro miscere, siue
vncias quinquaginta quatuor, siue libras Romanæ mensuræ quatuor,
& semis; nam eadem semper, ijs, mensura significatur. Et primo
librorum eorundem cap. decimoquarto, idē esse statuebat dicere librā,
& nonaginta sex denarios; selibram, & drachmas octo supra quadragin-
ta; tres vncias, & drachmas, siue denarios quatuor supra viginti. Vnde
siue libra, subdit, nuncupetur, siue denarij centum, in hoc pharmaca non
mutabuntur, aut variabuntur: Quæ cuncta nonnullis etiam alijs confir-
mauit in locis. Cum igitur saltem mēsurales drachmas in mensuris cō-
tineri maioribus, & in illis actu quodammodo reperiri verissimum sit,
neque referat num per minores, aut minimas mensuras multiplicatas
liquida corpora describātur; sicut nihil interest, si per minora multipli-

cata pondera, arida quoque corpora præhñantur; clare sequitur, vt in vino, melleque præscribendo, nihil intersit, ac nullam proinde sit varietatem passurum Antidotum, siue per Sextarios, siue per Libras, siue per Vncias, siue per Drachmas vtrunque præfiniatur; proptereaque tātum sit Vini, pro recta medicamenti compositione statuere binos Sextarios esse sumendos, atque si diceretur bis capiendas vncias fore viginti, aut Drachmas tricentas supra viginti: Similique ratione sit idem dicere mellis noningentas & sexaginta Drachmas iniiciendas, quemadmodū si diceretur illius vncias centum & viginti sumptitādas esse, seu Libras decem, immo quoque Sextarios sex, aut Cōgium vnum, hæc enim omnia prorsus vnam, & eandem corporis molem, mensuræ verò capacitatem significare videntur. Sed iam rationibus demonstratas, multorumque autoritate comprobatas mensurales eiusmodi drachmas, vno vel altero testimonio quoque Galeni confirmemus. Ex duobus sanè locis collatis inuicem, immo verò seorsum etiam acceptis, clare colligitur, sicut ab alijs quoque monstratum est, cognouisse Galenum, neque verò cognouisse solummodo, sed etiam constituisse tum Libras mensurales, & vncias, tum quoque Drachmas conditionis eiusdem, & mensurales ponendas esse. Quinto. f. de composit. med. sec. genera cap. 6. & sexto pariter librorum eorundem cap. 8. Cum enim priori loco nimirum libro quinto, cap. 6. clarissime hunc in modum scriptum reliquerit: *Siquidem Heras centum octuaginta denarios posuit, in pondus non in mensuram oleum reducens, tanquam Hemina denarios sexaginta pendente. Nam Attica nouem Italicas vncias conficit: pendent enim nouem Italica vncia, quas in cornibus insectis meriuntur, septem vncias ponderales & semis, quæ sexaginta denarios faciunt, singulis vncijs octo denarios recipiētibz, &c.* Cum hæc, inquam, Galenus eo loci scripta reliquerit, visus est vtiq; Drachmas eiusmodi mensurales, tanquam à ponderalibus separatas, considerasse, & ponderales veluti contradistinctas à mensuralibz accepisse. Nam ratio, cur Heras tres illas Heminas olei reducat ad pondus, dum centum posuit & octoginta denarios, non est, quoniam denarios, sed quoniam centum, & octuaginta posuerit: Qui cum olei ponderi, non autem mensuræ respondeant, ostendunt primum in pondus oleū ab Hera fuisse reductum: Sed tacitè quoque secundo demonstrant in mensurales denarios potuisse reduci: cum. si non quoniam in drachmas denariosve, sed quoniam in tantas drachmas, tantosque denarios diuisum est, in pondus asserat Galenus fuisse redactum: Etenim vbi reduceretur in drachmas, denariosve mensurales; & quælibet Hemina nouem vnciarum efficeretur, ducentum & sexdecim drachmæ siue denarij conficerentur.

fieretur. Quod clarius adhuc altero huic collato loco, dignoscitur. Ete-
 nim 6. librorum eorundem cap. 8. distinctius hæc ad verbum Galenus
 idem notata reliquit. *Etenim si nouem vnciarum mensuralium singulas*
Heminas esse statueris (loquitur aut de oleo ricinino, cuius in Ægyptio
 medicamento sex Heminas Andromachus immitti iubebat) *ex tribus,*
septem & viginti uncias produces, si in octo denarios quaque unciam
diuidas, denarios ducentum & sexdecim habebis, si duodecim vncijs sin-
gulam Hemina æstimes, sunt nimirum sex, & triginta uncia, denarij
verò ducenti octoginta octo, singulis vncijs in octo denarijs diuisis, &c.
 Quid clarius? Quid ex Galeno lucidius? Heminas facit aut nouem, aut
 duodecim vnciarum, & mensuralium; has in denarios, seu drachmas, si
 nouem sint vnciarum, ducentum reducit, & sexdecim: si autem duode-
 cim, in ducentū octoginta q; & octo, singulis vncijs in octo diuisis dena-
 rijs; & erunt vnciæ mensurales, sed non denarij? Obstinati prorsus, &
 implacabilis animi se fore monstrabunt quicūque Galeni dogmata sic
 euidencia, & aperta vanis interpretationibus obuelantes, aliorum ocu-
 lis inconspicua reddere, quo minus veritatem ipsam intueri possint, am-
 bitiose studebunt, & conabuntur. E contra verò melioris ij se fore men-
 tis ostendent, qui, mutato consilio, non amplius aut ipsi verebūtur, aut
 alijs persuadere tentabunt, dari quidem mensuræ libras, & vncias, non
 dari Drachmas. In quam sententiam, cum multos iam rationibus ijs
 persuasos deuenisse nouerimus, vt certiores adhuc effecti constantius in
 eadem opinione remaneant, & confirmentur, vltcrius nos primo locū
 alterum in Galeno producemus, ex quo, probabiliter admodū, ij quo-
 que dignoscant aut ipsi, Galeno. s., aut Critoni, cuius refert medicamē-
 tum, mensurales etiam eiusmodi drachmas in vsu fuisse. Secundo verò
 Aduersarios nostros proprijs armis aggrediemur; & idem ex eorū pla-
 citis pari modo deducemus. Porro Galeni locus habetur 5. de Pharma-
 corum compos. secundum partes cap. 7. Qui dum Critonis Medicamē-
 tum ad Varos in facie recenset, hæc ait. *Mellis Attici cyathum unum, si-*
ue drachmas duodecim. Aceti tantundem. In quo sanè Pharmaco, siue
 Crito, siue Galenus ipse loquatur, iubet Autor tantum aceti sumēdum
 esse, quantum etiam mellis. Ceterum æqualitas hæc, vel ad pondus, vel
 ad mensuram est reducenda. Iam verò nequit æqualitas hæc aut ad pō-
 dus, aut ad mensuram in vtraque mellis acceptione reduci, nisi duode-
 cim illæ drachmæ mensurales existāt. Quare non librę solum, & vnciæ,
 sed ipsæ quoque drachmæ mensurales in vsu Critoni, siue Galeno fue-
 re. Minor rationis eiusmodi tali modo probatur: quia si sumatur mellis
 Attici cyathus, & aceti tantundem, erit mensura quidem amborū æqua

his, non autem pondus; cum. I. tertia parte sit grauius aceto mel. At vero si, trāspōsito cyathō, sumantur vtriusque duodecim drachmæ, & eæ ponderales; non erit in hac altera cōpositione cōsimilis vt in prima, proportio mensuræ mellis, & aceti, sed bene ponderis; Qm̄ acetū, vt quod tertia parte leuius est melle, multitudine id ipsum, copiaq; superabit. Quare si debet in vtraq; cōpositione eadē aceti cū melle proportio, & æqualitas cōseruari, fateamur oportet drachmas illas esse mensurales: Qm̄ semper eadē æqualitas inter vtrūque, videlicet inter acetum, & mel, seruabitur, nempe, qm̄ eadē mensura: Quā solam in eo medicamēto seruādā, & inspiciendā esse demonstrat prima illa cyathi mellis, & aceti commixtio. Sed tandē vt nostros aduersarios inuitos ēt, huiusmodi veritatē cōfiteri cogamus; cōcedamus illis Andromachū Iuniorē certo drachmarum numero, vini quoq; Theriacam ingredientis, quantitatem determinasse, tricentasque (vt inquit) & viginti drachmas ipsius assumendas esse iussisse: deinde videamus, quomodo numerus drachmarum hic duos vini sextarios à Galeno præscriptos efficiat; nū. s. ipsis drachmis acceptis pro mensuralibus, an autem pro ponderalibus. Et si constabit id illas, vt ponderales, præstare non posse, sed solum vt mēsurales, colligamus aduersus ipsos non solum dari, sed in vsu quoque positas esse drachmas, quæ corporum molem, non grauitatem, mensuram, non pondus, explicant, & patefaciunt. Sumamus autē probationis rationem ab ipso Galeno, & ex vini pondere colligamus, an duo sextarij conficiant drachmas tricentas, & viginti, seu num drachmæ tricentæ vigintique ponderales efficiāt duos vini Sextarios illos iam à Galeno determinatos. Pēdet, ex 6. de comp. per genera, Libra mensuralis, quæ apud Romanos ex cornea materia confecta, dimetiendis liquoribus accommodabatur, Olei vncias decem; & Hemina Attica nouem vnciarum mensuralium, vt eisdem libris scriptum habetur, olei pendet septem vncias ponderales, & Semis. Cum autem, ex demōstratis à nobis antea, Sextarius Romanus, Autore Galeno, viginti mēsurales capiat vncias, oportet, vt hic, facta diligenti computatione, sumptaque ex libra, & Hemina proportionē, capiat olei ponderales vncias sexdecim, cum dimidia (ni fallor) & scriptula quatuor: Quoniam autem, omnium sententia, & communi consensu, immo etiam experientia sic ostēdente, vinum parte nona grauius est oleo; pendebit vini sextarius vncias decem, & octo, drachmas quatuor, siliquas duas, & semis. Quare duo sextarij vini (sicuti facta duplicatione patet) si reducantur ad pōdus, pendebunt vncias triginta septē, & siliquas quinq; ; hæc aut, si reducantur ad drachmas, efficiūtur centū, & nonaginta sex drachmas, & siliquas quinq; . Iā verò præscripuit,

ipsis autoribus, Iunior Andromachus triceti, & viginti drachmas, quæ vini pondus quatuor & viginti circiter drachmis, exuperat. Ergo si Gal. (vt asserūt) Andromachi drachmas illas reducit ad duos vini sextarios, accipit easdē nō vti ponderales, cū. s. vini ponderi nullo modo rñdeāt, sed veluti mensurales: eo quoniam sic ad unguem mensuræ respondēt: hæc enim, vti dicebamus, mensura capit vncias quadraginta mensurales, ex quibus tricentæ, & viginti drachmæ, non plures, non pauciores exurgunt. Velint igitur, nolint, Aduersarij nostri coguntur asserere dari mensurales eiusmodi drachmas, nec dari solum, sed in vsu fuisse quoq; receptas. Quo fit, vt nulla primum, eorum ratio reddatur, ex falsitate suppositi posterioris illius, ab ipsis assumpti, iam demonstrata.

Sequitur, vt secundò quoque, rationem eandē, ob id nullius esse momenti demonstremus, quoniam ex altera propositione, alterove fundamento falsissimo, & semper à nobis reiecto, perpetuoque reiiciēdo, dependeat. Erat autem fundamentum eorum, & suppositio, Iuniorē Andromachum certam vini, Mellisque copiam constituto quodam drachmarum numero in Theriaces compositione præscripsisse; tātasque mellis drachmas determinasse, quantas, si reducantur ad libras, vt factum fuit à Galeno, constat, ex recta computatione, decem ponderales conficere libras, hoc est drachmas noningentas, & sexaginta, quæ (sicuti dicebamus) vncias centum, & viginti, libras verò decem efficiūt: tricentas insuper vigintique vini pari modo drachmas cōstituisse, quæ, si reducantur ad vncias, eas, quadraginta constituunt, à quibus duo sextarij deinde conficiuntur. Suppositum hoc tanti fecit eruditissimus Vidua noster, vt stultum dixerit esse, cum hæc Iunioris & Filij Andromachi sententia sit, vereri, num eadem quoque Senioris & Patris extiterit; cum præter omnem rationem sit arbitrari Patrem Andromachum singula Filio non reuelasse, Filiumque Patris vestigia nō fuisse sequutum. Veruntamen nos, qui scimus Andromachum Patrem indefinitā mellis quantitatem reliquisse, compositorisque iudicio mensuram illius demandasse; putamus etiam Iuniorem & Filium, vel indeterminatam à Patre quantitatem pari modo recepisse, vel, in ea præscribēda, vestigia Patris non fuisse sequutum. Nec mirum, cum constet in alijs aliquibus eum à seniore, Patreque recessisse, vt in sagapeno, & in Pipere; forsantq; in alijs etiam; de quibus, veluti parum ad nostram rem attinētibus, abū dātius à nobis differēdum nequaquā est. Sed vtinam Filij, Patrum (potissimum verò probatissimorum) dogmata, constitutaque sectarentur. Quandoquidem Iuuenis noster eruditissimus, celeberrimi, & incredibilis doctrinæ viri Patris illius D. Aloysij Vidua, cui res vniuersi nostri

conegit carmine, & supra proprias aliquando maxime cordi fore videbantur; sententiam, tacitumque saltem consensum amplexaretur, neque nouarum difficultatum harū Autor euaderet, aut efficeretur. Quippe cum iam Patrem illius, atque ceteros maiores nostros, hanc mellis quantitatem Aromatarios Venetos in magnis componendis Antidotis perpetuo sumere consueuisse, non ignorasse, sed tacita consensione, tacitoque silentio comprobasse demonstraerimus. Sed iam redeamus ad pensum, & hanc ex Andromacho iuniori suppositionem assumptā, dicamus iterum falsissimam esse: Quandoquidem in pedestri illius Antidoti descriptione ex Andromacho Iuniori à Galeno relata, nulla vini quantitatis, immo verò nulla prorsus vini mentio fit; mellis autem quantitas drachmis tantummodo centum, & quinquaginta præfinitur. Quæ si vera sunt, quemadmodum illa verissima fore nunc nunc demonstra-
bimus; perit illorum Achilles, & omnis victoriæ spes ablata videtur. Neque enim amplius sequetur libras decem à Galeno propositas, ponderales esse statuendas ob id, quoniam ex tantis drachmis, quæ ponderis signa sunt, colligantur: sed potius ex aduerso verū erit asserere drachmas illas ab Andromacho Iuniori numero centū, & quinquaginta propositas, ab ijs, qui textū, & literā, quā corruptā esse cognouerunt, emendare studuere, ad numerū noningentarum, & sexaginta fuisse redactas, vt eas, decem constitutis à Galeno libris, coequarent: tot enim drachmæ resultant ex illis, & in tot illæ, singulis vncijs in drachmas octo diuisis, separantur, & distinguuntur. Porro talem, qualem dicebamus, ab Andromacho Iuniori copiam mellis esse præfinitam, aut saltem noningentas illas, & sexaginta drachmas ab illo non fuisse præscriptas, litera, & textus ipse græcus ostendit; Probatoris nominis Autores nonnulli confirmāt; & probabile saltem, à Galeno testimonium deduci potest. Ostendit id textus græcus, tum qui Basileæ, tum verò qui Venetijs ab Aldo reperitur impressus. Siquidem in vtroque talia verba leguntur μέλιτος ἄττικον δ' ραχμας. π'. τὸ δ' ἐ' ὀροβον δ' ραχμας π'. quod est, *mellis Attici drachmas centum & quinquaginta; erui drachmas octoginta*. Cōfirmāt id ipsum Autores, qui literam, vt iacet, accipientes centum scribunt & quinquaginta drachmas mellis & ipsi. Sic enim vertit Andernachus græcarum literarum professor insignis; qui, vt fidus agnosceretur interpres, transtulit etiam, & in suo latino textu, drachmas illas erui octoginta rescripsit. Ita Dessenius de melle legit (vt intellexistis) Ita Syluius Foësius & Rondelletius. Doctissimus autem Syluaticus habet drachmas centum, & sexaginta nouem. forte quoniam sic in altero quopiam exemplari græco scriptum inuenerat. Veruntamen audio quid statim nobis

Iuuenis hic eruditissimus respondebit. Est error, inquit, manifestus in
litera; estque notandus hic error in Syluio, Rondelletio, & Foessio, qui
quomodo textus corrigendus esset, non cognouerunt: In Siluatico verò
suspiciandum impressoris errore contigisse, vt Andromachum scripse-
rit drachmas centum & sexaginta nouem mellis pro theriaca determi-
nasse. Verum, quidquid de Siluatico sit, in quo si fuit Impressoris culpa
commisus error, in eò putandum erit esse commissum, quod centum, &
quingenta drachmas dixisse debebat, cū sic in grecis omnibus, quos
ego viderim, exemplaribus inueniatur: de cæteris non negamus, immo
verò fatemur vnanimis in drachmarum illarum numero, manifestum
errorem esse; propterea que nos luculentius inde colligimus non consta-
re, quem certò numerum Iunior Andromachus drachmarum mellis cō-
stituire voluerit. Quis enim iūre iurando testabitur vnquam illum tri-
centas, & viginti pro vino, noningentas autem & sexaginta pro melle
drachmas scribere voluisse? Qui scit, num ille, si per lācem, & drachmas
ponderis & grauitatis symmetriā mellis ad reliqua, & proportionem ad
arida facere, nobisque indicare volebat, initio scripserit mille tricentas,
& quadraginta drachmas mellis assumendas esse? quæ libras circiter
quatuordecim ponderales efficerent. Oportebat autem, si vim aliquam
erat Aduersariorum habitura ratio, vt certo constaret: Filium Andro-
machū tantas præscripsisse drachmas, quantas decem libræ conficiunt,
capiunt, & continent; non autem, vt incertum esset quantas ipse præfi-
nire voluerit, quemadmodum ex errore colligitur incertum esse. At sub-
det iterum Vidua doctissimus. Iam in Latino Codice textus emēdatus
apparet, & errore quocunq; sublato legitur apud omnes, *mellis drach-
mas noningentas & sexaginta*. Verum. Sed quid ad nos? Nam (vt con-
uertar iterum ad te, mi carissime, atque rem hanc amicissime simul ani-
moque pacato tractemus) dicas oro. Quem putas literam textus hanc
emendasse? Quave motu eum ratione, quove Auto: e duce, sic correxi-
se? Nullum certè, quàm vel Interpretem, vel reuiforem Impressoris, lo-
cum hunc emendasse respondebis. Vel igitur id sponte fecit, vel aliqua
ratione, vel Andromacho, Galenove Autore? Forſan dices Androma-
cho? Nunquam, corruptis enim characteribus, notis que deprauatis,
centum habet Græcus Andromachus drachmas & quingenta. For-
ſan Galeno? minime, siquidem nullibi Galenum de melle pro theriaces
compositione loquentem inuenies drachmas noningentas, & sexaginta
sumendas esse iussisse. Vel igitur sponte fuit ab Interprete, loco centū &
quingenta drachmarum, numerus ille noningentarum, & sexaginta
repositus; atque sic Argumentum vanum prorsus, & risu dignius, quam
confuta-

confutatione redderetur. Vel aliqua factum id ab illo ratione fuit. Sed unde, dicā ego, desumpsit rationem, ut potius ita, quam alio modo corrigeret? Puto neque te, neque mortalium aliquem alteram rationē correctionis eiusmodi afferre posse, nisi quia scribit Galenus alibi decem libras mellis in Theriaca sufficere, & cum libræ decem, si diuidantur in drachmas, noningentas illas, & sexaginta conficiant, oporteat, quò locus hic, ubi mel ab Andromacho non per libras, sed per drachmas est diffinitum, alteri loco Galeni respōdeat, numerū cētum, & quinquaginta, ad noningētas, & sexaginta reducere. Bene quidē. Sed dicas iterū: putas ne decē à Galeno libras prædefinitas mensurales esse vel pōderales? Si dixeris mensurales, manus porrigam, amplexabor te, & osculabor, ac statim drachmas etiā illas mensurales esse deducam. Si verò dixeris, ut hæc effugias, ponderales esse. Statim inferam prius libras illas, etiam apud te, ponderales esse, quam drachmas; etiam earū ratione drachmas, non autem drachmarum ratione libras tales esse constitutas, velis, aut nolis, confiteri cogeris. Qualis igitur, quantiūq; roboris erit tunc tua ratio? Quam vanus, & irritus labor erit, ac tantus verborum apparatus, in quo demonstrare conaris drachmas omnes esse ponderales? cum non ex drachmis, & eorum numero decem libræ Galeni formatæ constitutæque sint, sed ex libris confectæ (ne conficte dicam) terminatæque drachmæ? Colligamus igitur, nos ab Andromacho Iuniori nō plus habere, quod attinet ad mellis quantitatem, quam habuerimus à Seniori, cum. s. numerus drachmarum ille, veluti corruptus, nihil certi nobis insinuet, nihil certi demōstret. Ut proinde iure Galenus aliquando pedestrē orationem in mensurarum tradēdo numero, periculofam, & incertam appellet, equestrem laudet, & hanc Iunioris Andromachi suspectam habeat, & vitiatam in aliquibus fore demonstrat. Quæ pro dictorum confirmatione sanē, proq; capitis huius conclusione, referre nō reusabo. Itaque 7. de compositione Pharmacorum secundum genera capite 9. Galenus Menecratem laudat, quòd librum medicamentorum scripserit syllabis integris, postpositis omnibus numerorum notis. Quod, ideò subdit effecisse Menecratem; *quoniam sepe quibusdam non modo nolentibus contingit errorem in scripturis efficere, committereque; verum etiam per inuidiam volentibus, dum, o, literam, θ, faciunt per mediam rotundam lineam alia per transversum ducta: lotam verò literam, alia similiter transversim apposita: sicut etiam una linea ex, γ, & ρ, derasa, littera, ι, characterem relinqui contingit. Pari modo ex multis literis, alijs appositione, alijs compositione, alijs ablatione, mutari notas, seu characteres eas indicantes accidit, &c.* Idcirco paulo posterius eo loci

Damocratem laudat, quod libros Medicamentorum metris descripserit: Quæ (sicuti primo quoque libro de Antidotis scriptum reliquit) non solum, quod facile memoria teneri; sed etiam, quoniam pondera, atque mensuræ in eisdem adulterari, mutari vè nequeunt, valde conducunt. Sed omnium maximè faciunt ad nos ea, quæ Galenus primo de antidotis cap. quinto, priusquam Senioris Andromachi carmina, & prosaicam Iunioris Theriaces descriptionem afferat, scripta reliquit, si conferantur cum ijs, quæ post descriptiones relatas utrasque, scribuntur ab ipso. Cū enim quinto illo capite sic ex Andernachi versione dixisset. *Quoniam verò nonnulla perperam scripta sunt, dum quidam, ubi, petentibus scripturam exhibent, sponte mentiuntur; aliqui verò pervertunt quæ à nonnullis acceperunt exemplaria; isti libri, qui in bibliothecis sunt repositi, numerorum notas habentes, ex facili pervertuntur, dum, e, quod est quinque mutatur in, θ, idest nouem, & in, ο, sed &, ι, in, υ, unius littera appositum, quemadmodum, & alterius ablatione.* Quapropter ego, sicut Menecrates librum conscripsit titulum imponens Hologrammatos, Autrocator, quasi dicas, integris literis descriptis Imperator, in quo septem, duabus Syllabis scripta sunt, non per, ζ, solum, viginti, tribus syllabis, non per, χ, duntaxat, exprimit, triginta, quatuor syllabis effert, non per, λ, tantum, aliāq, similiter: ita faciam, & ego. At laudo etiam Andromachū, qui carmine Theriacam ipsam, quemadmodum alij nonnulli, descripsit. Damocrates etiam alia omnia numeris inclusit, recte nimirum faciens: minimè siquidem fraudulentis possunt eas pervertere, &c. Cum hæc, inquā, priusquam descriptiones illas rescripsisset, ita Galenus eo loci notasset; post utrasque deinde, tam, scilicet, Senioris equestrem, quam Iunioris pedestrem, descriptiones allatas, cum vidisset Andromachum Iuniorem piperis nigri drachmas habuisse viginti quatuor, longi verò sex: seniore est contra longi viginti quatuor, sed nigri sex; totā huiusmodi inter utroque differentiam censens in numerorum corruptelam referri posse; sic ait. *Ceterum in uno inter se discrepant, quoniam metrica scriptura viginti quatuor drachmas longi piperis obtinet, pedestris autem sex.* Quia verò, sicuti dixi, multa exemplaria vitiatas medicamentorum quantitates habent; ideo primum quidem integris literis ipsum conscripsi, Menecratem imitatus, deinde autem post hoc, etiā numeris expressas apposui. Quibus duobus collatis locis, apparet, & saltem probabiliter colligi potest, Galenū Andromachi Iunioris descriptioni, putasse, quoties in medicamentorum præscribenda quantitate discedit à Seniori & à Patre, (quod aliquando facit) non ita tuto credendum esse. Quapropter inferius etiam, videlicet capite decimoquarto compositiones utrasque in

numero quidem simplicium ingredientium esse conformes, in pondere tamen quarundam medicinarum esse diuerfas affirmat; ait enim. *Et medicamentum præterquam in pondere quarundam medicinarum, omnino concordi sententia tum Senior, tum Iunior etiam descripsit Andromachus.* Quòd si quis ideo, quoniam Galenus nullius inter Patrem, & Filium in melle præscribendo differentia meminerit, arbitretur se posse colligere centum, & quinquaginta drachmas illas non habuisse Galenum; longe lateque decipitur, quoniam, neque noningentis acceptis, & sexaginta, differentia, quæ inter patrem, & filium intercederet adhuc, mentionem aliquam effecisse videretur. Quare credendū est potius, numerum, seu characterem, & notam, qua Iunior Andromachus in mellis quantitate præscribenda fuit vsus, veluti corruptam, non solum Galeno fuisse suspectam, sed etiam penitus ab ipso despectā; ac proinde veluti indiffinitam, & indeterminatam fore mellis quantitatem illam ab eodem acceptam. Ex quibus omnibus satis clare (ni fallor) apparet duplici ratione fieri, vt propositum Argumentum, in quo tota spes, & omnis eorum gloria posita videbatur, nullius momenti censendum sit; vt quod, scilicet, vna pariter, atque altera, responsione tollatur.

Octaua ab Aduersarijs adducta ratio soluitur. Vbi quomodo Pondus Mensuræ respondeat, in melle potissimum, declaratur. Cap. XIII.



Quoniam verò postrema Aduersariorū ratio, qua, supposito nostro (nimirum decem libras illas à Galeno determinatas, mensurales esse) concesso, colligebant adhuc, & argumentabantur non tantam sumi posse pro confectione Theriaces copiam mellis, quantam Aromatarij nostri sumere solent, tum ab auctoritate, tum etiam ab experimēto desumebatur; oportet, vt, cum ad calcem disputationis huius iam deuenimus, responsionis fundamentum & nos (quò, scilicet, vltima primis ex omni parte respondeant) tum ab auctoritate, tum etiam ab experimento petamus. Profert igitur primo Iuuenis eruditissimus auctoritatem, ac testimonium scriptoris cuiusdam libelli de ponderibus, & mensuris, quem asserit affirmasse decem mensuræ libras continere mellis libras duodecim cum dimidia redactas ad pondus, ad lancemque dimetitas. Deinde subaddit se lōgè minus eas etiam pendere certo quodam experimento didicisse, neque pluris, quàm vndecim

decem libras, & vncias octo ponderis, & grauitatis mel ipsum habere, continereque dignouisse. His duobus fundamentis innititur ea ratio tota. Pro cuius solutione, quanquam satis esset nobis ab experimento solo, & à sensu veritatem ipsam haurire, cum, scilicet, Vbi sensus, & experimentum, quod satis est fidei præstare possunt, neque ratio quærenda, nec aliorum testimonium sit expetendum: Ne tamen nostra hæc opinio autoritatibus destituta videatur, & vt clauum (quemadmodum dici solet) clauo tollamus: placuit nobis initium destructionis rationis huius ex multorum Scriptorum autoritatibus, & testimonijs asumere. Quòd tanto quoque libentius efficimus, quanto scimus eorum plurimos, qui sua nobis autoritate fauebunt, sine experimento non fuisse loquutos. Sed vt à tribus Græcis ignotis, qui de ponderib. & mensuris nonnulla docuere, sumamus exordium, liberè dicimus, & vera dicimus, nos in eorum nullo vidisse mensuram aliquam decem librarum, aut decem libras ipsas mensurales, tã paucae capacitatis, vt solas duodecim libras, cum dimidia reddant ad pondus, si plenæ melle capiantur. Siquidẽ autor illius libelli, qui cum Galeno solet imprimi, immò verò ab aliquib. etiam (quanquam vanè prorsus) eidem adscribi, ab alijs autem veluti Pauli Æginetæ, (sed falsò quoque) citari, cum primò dixerit (pondus mensurarum humidorum explicare volens) Mel vino grauius esse quarta, atque amplius etiam decima parte, quod in vniuersum est proximũ tertix; Oleo verò Mel idem dimidia parte ponderosius agnosci; postremoque vinum oleum excedere nona parte: in tabula deinde mensurarum, & ponderum, dum olei, vini, Mellisque grauitatem, & grauitatis differentiam cuique mensuræ subiecit, de Congio, quem mensuram esse librarum decem Romanarum iam demonstrauius, Sermonem habens, affirmat ipsum Olei continere ponderis libras nouem, vini decem, & mellis tresdecim, & semissem. Vt proinde, non possit hic Autor ille fore, quem ipse citat; cum decem Hic mensurales libras, quæ congiũ efficiunt, non asserat duodecim cum dimidia pondere mellis, sed tresdecim atq; semissem. Alter quinetiã Ignotus autor, qui cū superiori Galeno coniunctus, & simul reperitur impressus, ac de ponderibus, mensurisq; Veterinariorũ nonnulla pertractat, affirmat Cõgiũ mellis pendere libras tresdecim, & semissem. Cui tandem, & tertius ignotus Græcus, sub nomine Dioscoridis vna cum prædictis impressus, assentit: Nam mellis, inquit, Congius habet libras tresdecim, & semissem: sicuti Semicongius libras sex, & vncias nouem: quanquam in margine pro Cõgio quoque notentur libræ quindecim; pro Semicongio verò libræ septem, & semis: & in illius libelli emendatione, Neander parimodo scriptum

reliquerit. Vt proinde qui sit Autor huius libri de ponderibus, & mensuris ab ipso vocatus, qui decem mensuræ libras, pendere mellis duodecim cum dimidia testetur, sit adhuc nobis ignotum: & ob id hucusque primum fundamentum rationis illius ab autoritate desumptum, ruinosum appareat immo verò iam sponte corruat, & delabatur. Pro cuius omnimoda euerfione præstat ignotis Græcis Autoribus illis, notiores, immo verò notissimos alios addere. Inter quos omnibus præferendus est diligentissimus Georgius Agricola, qui, se cuncta experimento subiecisse testatus, affirmat Congium mellis quid amplius quàm libras tresdecim, & semissem pendere, videlicet libras tresdecim, vncias decem, drachmas quinque, & scriptulum vnum. Accedit huic Doctissimus Syluius qui libro tertio iam allegato, cum prius dixisset Quæ pondera, quibus mensuris quorumcunque liquorum rectè respondeant, Paulum in operis sui fine docuisse: Iam Atticas ipse cum liquidorum ponderibus in vino melle, & oleo recensens, de Congio scribit eum capere mellis libras duodecim cum dimidia. Quod etiam Dessenius in Atticis mensuris explicandis asseruit. A quibus tamen nunquam existimarem Viduam nostrum eruditissimum desumpsisse decem mellis mensuræ libras redactas ad pondus, fieri duodecim, & Semissem. Cum certo suam ipsum haud ignorare Congium Atticum nouem tantummodo libras mensuræ capere, non autem decem; vti Congium Romanum accipere, continereque demonstratum ab alijs, & à nobis in superioribus quoque declaratum est. Consimilia, vel parum ab ijs differētia scripsit Michael ille Neander, de quo superius: hic enim quadam tabella siue Kanonio, quodam (sic enim vocat) Galeni testimonijs, & experientia non fallaci constructo, distribuens vnicuique mensuræ pondus in dictorum vnoquoque liquore, confirmat Congium mellis pendere libras tresdecim vncias decem, drachmas quinque, & scriptulum vnum. Affirmauit id ipsum Bergomensium Medicorum Collegium: & omnibus ijs pari modo subscripsit Præceptor Mercurialis eo loci quo supra, constituens Congium mellis continere libras grauitatis, & ponderis tresdecim, vncias decem, Drachmas quinque, & scriptulum vnum. Quod, vt summam dicam, ab omnibus ferè, qui differētijs has grauitatis in oleo, vino, melleque considerarunt, receptum, & eò saltem confirmatum est, quòd decem mensuræ libras vnanimis asserunt redactas ad pondus, tresdecim illas excedere, quanquam aliqui sex, alij verò decem, & amplius vncijs, illas easdem superare statuerint: cum non defuerint vltius etiam qui decem mensuræ, quindecim, in melle grauitatis reddere libras existimauerint. Quanquam ij parumper in olei pondere ab alijs euariēt, vt pau-

to post declarabimus. Ceterum inter ignotos Græcos, & inter alios post
eos recensitos à nobis Autores, non modica in ijs liquoribus metiendis,
& ponderandis differentia noscitur. Quanquam enim omnes in mel-
lis pondere præsignando modice differant (cuius modicæ differentia
rationem etiam paulo posterius inuestigabimus) in proportionem tamē
illius ad reliqua duo corpora liquida, vinum nimirum, & oleum, facien-
da, dissentiunt. Cum enim omnium ferè, qui de eiusmodi re scripse-
re, sententia sit ita Vinum, Oleum pondere superare, vt nonam
amplius partem grauitatis illius contineat, & complectatur; Mel
verò grauius esse vino tertia parte; non videtur eiusmodi tertia pars
apud omnes vno prorsus, & eodem modo cōsiderari: Nonnulli siquidē
(sicuti tres ignoti Græci, & aliquando Dessenius) eā in leuiori corpore
liquoreve sumptitandam esse cēsuere. Qua ratione fortasse potius, quā
eorum autoritate motus, eruditissimus Iuuenis, cum probe nouerit ex
Galeno constare, libram eam mensuralem infectam lineis in cornibus
apud Romanos, olei continere ponderales vncias decem, ac proinde cō-
gium oleo repletum pendere centum vncias, quæ libras octo conficiunt,
& vncias quatuor; pari que modo dignouerit vinum, cum nona parte sit
oleo grauius, eiusdem mensuræ, redactum ad lancem pendere libras no-
uem vncias tres, & drachmam vnā, seu parum minus, veluti facta cō-
putatione patet: Postmodum sumens & ipse tertiam in vino partem;
collegit duodecim circiter libras & vncias octo, decem mellis illas men-
suræ libras Autori de ponderibus, & mensuris pendere debuisse. Cum
tamen ipse nonnihil in olei pondere à Galeno recedens, affirmet con-
gium mellis (vt dicebamus) libras tresdecim, & semissem ponderis, aut
grauitatis habere. Alij autem è contra tertiam eiusmodi partem in gra-
uiori corpore, non in leuiori considerarunt. Quam proportionem om-
nes ferè ceteri, qui de mensuris, & ponderibus diserte tractarunt, respe-
xisse visi sunt. Quod primum licet in supracitatis à nobis Autoribus in-
telligere, qui cum vel tresdecim libras, & semis, vel tresdecim, & vncias
decem, mellis congiū pendere statuerint, Ac vinum nouem ponderis
habuisse libras, tres vncias, scrupulos duos, quatuor siliquas, & duo gra-
na dignouerint; utique videntur omnes tertiam eiusmodi partem in ip-
so melle velut in corpore grauiori, non autem in vino leuiori. s. conside-
rasse: Quandoquidem si talis proportio spectetur in vino, dimidiæ non
tertiæ partis rationem potius habere, & præferre videtur: etenim li-
bræ quatuor & semis, quæ in melle crescunt, si conferantur ad nouē non
tertia pars, sed dimidiū esse dicuntur. Id ipsum licet à Phannio quoq; co-
gnosceret; Is enim, quanquam aliud, olei mensuræ, pondus efficiat, statuit
enim

cum Congium olei pendere libras nouem, vini decem, & mellis quindecim: tertiam tamen eiusmodi partem in melle, non in vino considerauit, cuius quinque libræ, quæ in melle crescunt, dimidium potius, quam tertia pars nuncupari debent: Hanc autem Phannij fuisse sententiã clare deducitur, & ex ijs, quæ ab ipso de Sextarij mensura, capacitãque in tribus corporibus illis prodita sunt, manifeste colligitur. Scribit enim olei Sextarium vncias pendere decem, & octo, vini viginti, mellis verò triginta. Hæc eius carmina sunt.

Illud præterea tecum cohibere memento

Finitum pondus variare sæpe liquores.

Non libra, vt memorant, beßem Sextarius ad dec

Seu puros pendas latices, seu dona Lyai.

Addunt semissem libra liuentis Oliui

Selibramq, ferunt Mellis superesse bilibri.

Eamdem hanc proportionem vt rectè nouit, ita quoque secutus est elegantissimus, & doctissimus Ioannes Fernelius libro 4. suæ Therapeutices cap. 6. scribit enim, *at quoniam Oleum leuius est vino parte nona, Mel verò grauius vino parte dimidia, quacunque mensura capiet mellis vncias quindecim, capiet vini vncias decem, & Olei nouem.* In ijs enim Fernelius oculatissimus rectè partem eandem, quæ in Grauiori corpore tertia conuenientissimè nuncupatur, in leuiori dimidiam appellat. Facilius enim eiusmodi tertiæ partis exuberantia, proportioque dignoscetur; quoties à ponderosiori desumemus exemplum; nam si dixerimus vinum tertia parte melle leuius esse, seu graue minus; statim agnosceamus, & intelligemus, si sit aliqua mensura, quæ mellis capiat duodecim vncias, eandem vini capturam octo tantummodo; aut, sicuti rectè Fernelius ad id respiciens aiebat, si quæ mellis accipit vncias quindecim, eam vini solum capere decem. Quam eandem proportionem Desseñius etiam in Atticis explicandis mensuris (secus ac fecerat in Romanis) sectatus est. Namq; de Metrete Attica loquens (quæ mensura duodecim est Congoirum, librarumque mäsuralium centum, & octo) dum singulorum liquorum eorum pondera illius comparatione perpendit, inquit eam olei bene defecati pendere libras nonaginta, vini cētum mellis centū & quinquaginta. Eamdem explicauit in Congio, ait enim congium Atticum capere libras mensurales nouem; Olei verò pendere septem cum dimidia; vini autem octo & vncias quatuor; ac tandē mellis duodecim cum dimidia. Quod idem asserit in Sextario, cotyle, & reliquis mēsuris alijs: dimidiam semper leuioris partem accipiens, quæ in grauiori considerata, tertia redditur. Quæ si vera sunt iam ex ijs, quæ
de

de Sextario supra diligentius sunt a nobis ratione constituta; facta conuenienti multiplicatione per sex (tot enim congiū sextarij perficiunt) colligere nos quoque possumus Romanum congiū, seu libras mensuræ decem, pendere vini libras nouem, uncias tres, scriptulos duos, siliquas quatuor, & grana duo; sumptaque in eo sensu tertia parte, mellis habere libras tresdecim uncias decem, drachmas quinque & scriptulū vnum. Aut parum minus, si desit aliquid à tertia parte (quemadmodum Græcus ignotus intelligebat) Qui forte, si tertiam, aut proximam tertiæ partem in grauiori sumpsisset, proximius admodū ad veritatem, & experimentum accessisset. Et hæc illa sunt, quæ pro tollendo eo primo aduersariorum fundamento ab autoritate desumpto, tot alijs adductis autoritatibus, dixisse volumus. Pro quorum omnium intelligentia, & adductorum Scriptorum cōcilio, qui (sicuti dicebamus) in modicis quibusdam euariant, & inuicem differunt; animaduertendum fore censemus, non aliam huiusce modicæ differentię causam assignari posse, nisi quā Phannius tetigisse quandoque videtur; nimirum, quoniam liquida corpora, eiusdem etiam speciei, dispar, & varium pondus consequuta videntur, quanquam eiusmodi varietas modica sit; vnde & oleum oleo, & vino vinum, & melle mel ponderosius parumper inuenitur, & grauius. Sic enim Phannius illud in Aqua explicauit, & Vino.

Hæc tamen assensu facili sunt credita nobis;

Namq; nec errantes undis labentibus Amnes,

Nec mersi puteis latices, aut fonte perenni

Manantes, par pondus habent, non deniq; vina,


Quæ campi, aut Colles nuperve, aut ante tulere.

Hinc rectè, ni fallor, ab aliquibus notatum est in ponderibus olei, vini, & mellis inueniendis, & conferendis, sumendum oleum esse ab amurca, videlicet, ab aquatili humore, & ab omni recremento bene defecatum; aliter enim grauius apparet; vinum pari modo flauum, aut quale falernum erat; etenim ponderosius est nigrum; ac tandem mel depuratum à fordibus, quod è fauis destillauerit: & si (quod attinet ad rem nostram) vera penitus proportio seruari & agnosci debet, despumatū, aut sicuti ad Pisonem Galenus inquit) decoctum mediocriter; vt quidquid in eo cereū est, flatulentumque, in coctione separetur, quemadmodum etiam primo de Antidotis confirmauit: Addimus nos, etiam refrigeratum; siquidem, dum à calore tractatur, in fastum attollitur, & intumescit, proinde que tunc, nondum prorsus (nisi fuerit admodum coctum) à spuma liberum, turgēt, & summam vasculi capacitatem aeri permixtum, nō purum, & ab omni flatulenta portione separatum, attingit, & metientes fa-

cilè decipit. Neque enim mihi videntur illi bene sentire, qui, quoniam decem libras eius despumati, decocti q; mediocriter, sumendas esse Galenus quandoque præceperit, ex illius mente deducunt, si mēsurandum mel quoque sit, calidum esse mēsurandum; cum non repugnet esse discoctum, & frigidum; & nullibi apud Galenum legatur decem libras illius calidi fore sumptitandas. Nam quid ineptius, aut quæ ridicula magis comparatio foret, dum pondus cuique mēsuræ respondens in tribus liquoribus illis oleo. s. vino, melleque indagantes, & inquirentes duo reliqua, puta vinum, & oleum frigida, mel autem ipsum calidum sumeremus? Quanquam, etiam vbi quidquid est in eo spumosi deponeretur, & tepidum id sumeretur, modica in pondere differentia inter hoc tepidum, scilicet, & illud, nempe refrigeratum, agnosci posset.

Ita nos, vt ad alteram ab experimento desumptam respōsionem deueniamus, sensu duce, sæpiusque repetita experientia, fatemur, olei mēsuram pondere decem vnciarum (talis enim est mēsuralis libra Galeni) animaduertisse pēdere mellis despumati discocti q; mediocriter, librā vnam, & vncias quatuor ac ēt parum amplius ita, vt libræ decem mēsurales ascendant ad tresdecim saltem, & vncias quinque vel circiter; Quod sane pondus quanquam ab illo, quod ex citatis Autoribus præfiniebamus parumper fore diuersum, at modice variare videatur, forte tamen ea causa fuit, quoniam non vndique à sordibus oleum defecatū, & expurgatum à nobis assumptum, & ad faciundum experimentū vsurpatum est. Quod sanè pondus, tot Autorum testimonio, & experientia confirmatum, aridis assumptis à Galeno corporibus eadem ferè proportionē respondet, atque respondent tres puluerum vnciæ singulis libris mellis iniectæ: cum, scilicet, Crocum, Napi semina, Gummi que, ac ipsam Lemniam Galenus inter liquabilia reponens, ab aridis, & siccis corporibus omnino subtraxerit. Quod si tam essent aduersarij nostri superstitiosi, vel ita scrupulosi, vt omnino vellēt nihil amplius à tresdecim libris illis, & vncijs quinque vel circiter (ab oleo minus defecato proportionē desumpta) in talis Antidoti compositione fore sumptitandū, immo si forte leuius aliquod ipsi mel ad experimentū hoc assumentes, aliquid etiam à constituto pondere detrahendum esse contenderent: Nos quidem illud illis quoque permetteremus, dummodo tantam vini copiam assumerent, & vsurparent, quantam assumere, & vsurpare consueuisse Galenum, tum ex eius ad Pamphilianum constitutis apparet; tum ex modo compositionis ab ipso supra allegato loco descriptæ: dum sic ex Andernachi versione scribit. *Tum cinnamomum, crocum, cassiam spicam, thlassi, malabathrū, sigillum Lemniū, Chalutim, & eam quidem vñam*

*vstam (nam vsta artificiose hac colorat Antidotum) amomum, bitumen, castorium incisum, & cribratum tunde in mortario, & contere, sicut collyria solent cum vino. Postea illa superiora commisce cum ijs omnia, & cū vino reliqua alia exita, quæ in mortario sunt, in pilam transfunde, commiscendo omnia diligenter, atque vinum infundendo tempera &c. Illud vnum satis mirari non possumus, quomodo præter omnium sententiã, præter sensum, & experimentum Eruditissimus Iuuenis noster affirmet se diligenti animaduersione nouisse decem illas mensuræ libras pendere mellis libras vndecim & vncias octo. Neque enim satis nos intelligimus, cuius fecerit experimentum; siquidem quamuis inter mella quoque sint alijs alia grauiora, leuioraque; non tamen credimus, quemadmodum neque etiam nouimus, inter ea tantæ leuitatis aliquod reperi, vt in constituta mensura librarum decem, sic à diuersis ponderatis à nobis, & ab ijs etiã, quæ scriptores omnes superius adducti tantæ grauitatis, quantæ dicebamus, esse nouere, differat; quodque ita varium, ita diuersum ad lancem dimetitum appareat, vt à consueto ferè cæterorum pondere per duas circiter libras euariet, ac amplius etiam fortasse recedat: intersunt enim inter assumptū ab eruditissimo Iuene, & à præcitis Autoribus ponderatum, vnciæ viginti sex, quæ binas libras efficiunt, & binas vncias. Quod in puro melle contingere incredibile prorsus vnicuique, vel modicè in talibus exercitato, videtur: cum (sicuti nos experientia didicimus) ipsum oximel, & satis etiam liquidum, in eadem mensura, capacitateque sumptum, tantum ponderis in se contineat. Oportet igitur, vt vel in hoc omnes errauerint, & nos vnà secum decepti simus: vel vt ipse solus (quod credibilius est) valde fuerit hallucinatus. Nec mirum cum (sicuti octauo de compositione secundum locos Galenus inquit) *falsæ opiniones animas hominum præoccupantes, non solum surdos, verum etiam cæcos homines reddant, ita vt videre nequeant, quæ aliis conspicua sunt.* Cæterum quoniam tota responsio pendet ex sensu, & ab experimento fidem assumit, non erimus in hoc longiores, vnicuique facultatem hæc experiundi relinquentes: Illud solum addentes Atticum mel (quod de Thymoso in vniuersum Ruellius protulit) non coire, tactuque fila prætenuia mittere. Quod primum (vt inquit ille) grauitatis est Argumentum.*



*Colligitur ex dictis, & ex eo, quod legis vicem habet,
ostenditur consuetudinem hanc immutandam haud
quaquam esse.* Cap. XIII.



Am omnibus aduersariorum confractis telis, cunctisq; nobis ab ipsis illatis vulnusculis, ex toto sanatis, reliquum est, vt quambreuissime colligamus, nullis eorum rationibus, nullis adductis ab ipsis auctoritatibus concludentibus, aut aliquam nobis vim inferentibus; cum scilicet demonstratum hucusque sit, tum rationes illas inualidas, tum numero plures, & existimatione maiores, scriptores esse, qui nobis, quam qui illorū opinionioni subscripserint. Remanet, inquam, vt colligamus non posse nos consuetudinis huiusce bonis, in quorum tot ab hinc annis possessione perstitimus, vllō iure priuari; proindeque (vt tandem ad vos iterum conuertamur Præclarissimi Patres) nisi vrgentioribus alijs, immo verò demonstratiuis, rationibus Aduersarij nostri prædictam eorum sententiā adstruant, & ex toto confirmant, (quod tamen sicuti nunquam ipsos esse præstaturos haud ignoramus, ita semper defensuros esse pollicemur) non posse vos iustius, aut sanctius proferre iudicium, quam vel nihil (vt fecere maiores nostri) in eiusmodi re decernentes, tacitè pristinam consuetudinem hanc approbare; vel, si lubet aliquid determinate statuere (quò, scilicet, alijs post multos iterum annos, vt ante factum quoq; fuisse monstrauius, non amplius sacro huic ordini, & nostris successoribus easdem promouere difficultates confidentius audeant,) aperte nostros aduersarios, cum proposita ab ipsis (nulla tamen ratione, nullo ve vrgente) innouatione dimittere nobis autem votis omnibus suffragari. Quod tanto magis à vobis præstandum est, quanto constat, hac vna data prima mutatione contingere, vt deinde (quemadmodum in spontanis illis motibus euenit, vbi vno aliquo ab initio moto, multa simul commoueri necessum est) alia plura quoque mutanda sint. Quæ fanè priusquam ex toto corrigi, mutarique possint, graue secum, immo grauissimum periculum afferunt, ne humani generis Indiuiduis aliquibus insigniter obsint, & aliquod etiam, non sine vitæ discrimine, nocumētum eiusdem generis singularibus alijs inducant. Nā quæso; si quæ sint probatorum Scriptorum quorundam magistrales (vt vocant) medicamentorum descriptiones, in quibus, facta cunctorum ingredientium propor-
tione

tione, symmetriaque, certam Theriaces Venetæ dosim injiciendam esse præcipiant; in qua Theriaces dosi præfinita quoque singulorum simplicium, & terminata pastillorum quantitas reperitur: Non ne, si tamen minori mellis quantitate Theriaca parata sumatur, cum in eadem præscripta dosi necessario maior specierum quantitas reperiatur, tota illius medicamenti proportio, symmetriaque mutabitur? non ne præter Auctoris mentem medicamentum id alterabitur? non ne maximo cum vite discrimine ab aliquo, cui dosis ea non conueniat, suspecta que sit, assumetur, & usurpabitur? utique. Iam verò constat plurimos apud Scriptores, huiusmodi medicamentorum descriptiones adinueniri: sic enim legimus apud Vvecherum Antidotarij sui specialis libro secundo, quo loci de compositis alterantibus Aquis Sermonem habet, in quadam aqua contra pestem; & alibi. Sic apud Quercetanum inspicimus in Pharmacopœa dogmatica restituta; dum Aquæ Antepilepticæ maioris descriptioni, quædam adiungit. Sic, apud alios. Quapropter, & has oportebit, & alias emendare, corrigereque. Quod quam difficile sit, non in toto mundo ferè (quemadmodum opus fortassis esset) sed in Vnica sola præstare Prouincia, nullus ignorat. Sed non ne Germani, qui sine alicuius Medici (vt audio) consilio, sed sponte (sic assueti) certam huius Antidoti quantitatem assumere solent, diminuto melle, maximo propriæ salutis incommodo, ac vitæ discrimine quantitatem eandem assument? Quibus etiam (vt dicebamus) in cōtemptum medicamētum abibit, & quidquid tot annorū spacio fidei, sibi talis antidotus apud eos comparauit, totum breuissime concidet, paruoque momento temporis, leuissima causa, prorsus ad nihilum redigetur, & euanescet. Vt quid igitur solo quodam animi motu, ex arbitrio, nullis vrgentibus, proba, & inueterata consuetudo mutabitur? Quam neque leges cor rumpendam esse permetterent: immo quam leges habendā esse pro lege constituunt? Ita siquidem Leg. Leges. Cod. Quæ sit longa consuetudo, notatū, & scriptum habetur. *Leges quoque ipsas antiquius probata, & seruata tenaciter consuetudo imitatur, & retinet. & quod Officijs, Curijs, Cinitatibus, Principibus, vel Collegiis præstitum fuisse cognoscitur, perpetuæ Legis vicem obtinere statuimus.* Cuius rei ratio redditur Leg. de quibus, paragra. Inueterata. Digest. de Legibus, & Senatus consultis. dum ita scribitur. *Inueterata siquidem consuetudo pro Lege non immerito censetur: & hoc est Ius, quod dicitur moribus constitutum. Nam cum ipsæ Leges nulla ex alia causa nos teneant, quam quod Iudicio populi receptæ sunt; merito & ea, quæ sine ullo scripto probantur, tenebunt omnes: nam quid interest suffragio populus*

fuetudo, vel hæc Theriacen componendi ratio, Collegio nostro non ignorante, immo tacitū præbente cōsensum, præstita sit, nō est, vt (quid- quid aduersarius noster affirmet) in dubium amplius ab aliquibus re- uocetur; Cum ex actibus, Collegijque nostri monumentis idipsum iam apparuerit. In quibus, præter cætera, quæ superius à nobis allata sunt; ea specierum ad Mel symmetria, proportiove, quam adhuc nostri my- ropolæ seruant, in actibus D. Thomæ Philologi Rauēnas ijs etiam ver- bis explicata, cognoscitur. *Fuere species confusa, quæ anno 1565. pro con- ficienda Theriaca paratae sunt ab Aromatario ad Insignia Medici, pon- dere libræ decem, & septem Gummi verò libræ duæ. Mel autem de spuma tum, pondere librarum octo supra sexaginta.* Patet autem inibi Mel quadruplum ad species esse; decem etenim & septem, quater accepta, constituunt octo supra sexaginta. Sed in his amplius immorari super- fluum. Illud potius addendum, & animaduertendum a nobis est, ne quis hanc quanquam centum amplius annorum consuetudo sit, consue- tudinem adhuc appellari non posse defectu temporis, quoniam forte nondum mille sint anni transacti, contendat; Quod allegato loco su- perius notatum est. Vbi quàm leges consuetudinem vocent, Glossa de- monstrat, dum ita loquitur. *Appellatur consuetudo, quæ decem aut vi- ginti annorum spatio seruata fuit.*

Atque tot ea sunt, quæ in hac laboriosa potius, quam subtili dispu- tatione, dixisse voluimus. In qua si probabilia diximus, fatis est, sin mi- nus, alij demonstrent, si longiores fuimus, excusandi sumus. Nos enim qui certas Scriptorū, & fidas opiniones afferre curauimus, proque mul- tis laborare soli maluimus, triginta quatuor Autorum sententias vnico verbo referre nequiuimus. Ita tamen (quod sit propter impatientes aliquos aut gustus delicatioris, adnotatum, quibus lectio triginta plus linearum continuata; nauseam mouet) scriptum à nobis est, vt multa possint præteritis multis, intelligi; & omnia tandem, inspectis inscriptio- nibus, capitumque rubricis, inueniri facillime. Valete.

F I N I S.

Errata potiora ita Corrigit.

- Pag. 23 Lin. 24 Quos scilicet. Lege quò scilicet.
Pag. ead. Lin. 27 dicturi simus. lege dicturi sumus.
Pag. 29 In inscriptione capitis. Lin. 4. opinione nostræ. lege opinionis nostræ.
Pag. 40 Lin. 18 drachmas noningentæ. lege drachmæ noningentæ.
Pag. 47 Lin. 9 est egressurus. lege est aggressurus.
Pag. 48 Lin. 35 drachmas centū & sexaginta. lege centū & sexaginta nouē.
Pag. 72 ab initio capitis. vt infixas. lege vt inflictas.
Pag. 88 Lin. prima, Antidoti. lege Antidoto.
Pag. 93 Lin. 6 Num itaq; lege non itaque.
Pag. ead. Lin. 9 nomine solum. Lege nomina solum.
Pag. ead. Lin. 34 pondere. lege pendere.
Pag. 102 Lin. 20 abellæ. lege tabellæ.
Pag. 110 Lin. 14 etiam earum ratione. lege & sic earum ratione.
Pag. 124 Lin. 19 certo suam. lege certo sciam.

GLI Eccel. Signori Capi dell'Eccelfo Conf di Dieci Infraſcritti, hauuta fede dalli Signori Reformatori del Studio di Padoa per relatione à loro fatta dalli due à queſto deputati, cioè dal Rcu. Padre Inquiſitore, & dal Circ. Sec. del Senato Gio. Francesco Marchefini con giuramento, che nel libro intitolato Trattato del Signor Fabio Olmo de Mellis opportuna decentive quantitate pro Theriaca Mithridatoq; componendis, nō vi è coſa contra le leggi, & è degno di Stampa, concedono licentia, che poſſi eſſer Stampato in queſta Città.

Dat. die 9. Aprilis 1614.

D. Franc. Moreſini.

D. Marco Loredan.

D. Bernardo Thiepolo.

} Capi dell'Eccel. Conf. di X.

Eccelfi Conſilij Decem Sec.

Ioan. Baptiſta Padauinus.

1614. adi 11. April.

Regiſtrato in libro à charte 170.

Ioan. Bapt. Breat. Officij
Cont. Blasphe.

6
AUGUSTINI

DONII CONSENTINI

Medici & philosophi,

DE NATURA HOMINIS

LIBRI DVO:

*In quibus, discussa tùm medicorum, tùm philosophorum
anteà probatissimorum caligine, tandem quid
sit homo, naturali ratione ostenditur.*

AD

STEPHANVM SERENISS.

REGEM POLONIAE.



BASILEAE

APVD FROBENIVM.

M. D. LXXXI.

INITIALS V D V A

UNITED STATES OF AMERICA

DEPARTMENT OF THE INTERIOR

BUREAU OF LAND MANAGEMENT

WASHINGTON, D.C.

OFFICE OF THE ASSISTANT ATTORNEY GENERAL

LAND OFFICE

NO.

SECTION 1, TOWNSHIP 12 N., RANGE 10 E.,

SECTION 36, TOWNSHIP 12 N., RANGE 10 E.,

BRITISH MUSEUM
SALE DUPLICATE
I 787

1878

1878

1878

1878

1878

1878

LIBER PRIMVS.

PRAEFATIO.



NULLA est regio in Europa, *REX* Serenissime, in quam clara uoce iam pridem non peruenierit fama uirtutis tuæ: neque ego sum dubius, quin æquè celebris uolitet etiã Africã atque Asiã: non enim fieri potest, ut tãti principis tam magna laus Europę tantũ finibus contineatur. Quod cũ ita sit, admirabilis, & propè diuina uirtus tua sit oportet: parua enim stella non emisit à se magnum lumen, sed Sol omnia collustrat. Speciosa uerò undecumq; fama, & digna, quæ in dies magis magisq; uigeat. Fertur enim, te non modò instructum esse bellicis artibus, optimeq; tenere scientiam administrandi regni, sed etiam excultum habere animum ijs studijs, quæ præcipuè decet uirum principem, quippè studijs literarum: & eorum amore undiq; accersere uiros doctos, honorificè excipere: instaurare gymnasium magnificum Cracouiæ. Rarum, atque adcò singulare exemplum regis hoc tempore, quo, aduerso fato, principes ferè animum alienarunt à literis, nec quidquam minùs curant, quàm earum uel studium, uel patrocinium. Qui igitur ne mirentur, si res tuæ uel in dies ruunt in peius, uel non melioribus fultæ artibus semper sunt in discrimine, dum tuæ crescunt in dies, & sunt tam securæ, tam undique communitæ, ut beata hoc tempore habeatur Polonia, quòd te sortita sit regem. Cũ enim sine longo usu rerum comparari non possit insignis prudētia, qua ad remp. benè gerendam opus est: necessariò ad eam rem literarum monumenta requiruntur. Tàm brevis enim est hæc nostra uita, ut uel cui longissima contingit, uix ad pauca satis experienda sufficiat: & à consilijs sæpè accidit adesse principi eos, quibus ipsis maximè esset opus consiliario. Literis autem breuib; spatijs consignata habētur facta uirorum clarissimorum totius memoriæ: artes consilia, euentus: regnorum & re-

DE NATURA HOMINIS

rum publicarum exortus, incrementa, status, inclinationes, occasus, fortuna uaria: unde iam aliorum periculo habita experientia rerum, sumi possunt usque apta exempla, ad quæ actiones in rerum administratione dirigantur. Nonnumquam etiam adiuant ij ipsi, qui scribunt, sapientes uiri, qui de ijs, quæ scribunt, interponunt prudens suum iudicium. Sed ratio ipsa rerum, quæ à felicibus ingenijs studiosè obseruata, literis tradita est, etiam plurimum potest uel ad inuentionem, uel ad directionem consiliorum iuuare. Aliud quoque, nec paruum, bonum solet prouenire ex literis: nam peculiari ferè quadam efficientia inducunt ad humanitatem, qua maximè homines capiuntur. Tu itaq; unus omnium optimè intelligis, & sapis: imitarisq; ea re, ut cæteris, ueteres illos maximos, quorum nomen omni ueræ laudis genere ornatum, perpetuò scriptorum beneficio manebit. Et ex tam prudenti, prorsusque egregia imitatione duplicem capies fructum: alterum, quòd magna cum uoluptate remp. tibi demandatam uidebis floridam, ac beatam: alterum, quòd & uiuens eris in honore apud omnes gentes; & moriens nomen immortalitati honorificis monumentis mandandum relinques. Iam uerò tam clara uirtutis, studijque fama cepisti animos omnes omnium; ut nemo iam sit, qui te non amet & ueneretur, quiq; non precetur tibi ætatem longissimam. Literatorum autem animos incredibiliter erexisti: qui alioqui deiecti de spe honorum, pro suo tantum solatio, molestiarumq; uitæ lenimine, lentam nauabant operam: nunc uerò sumptis animis alacriter, strenueq; agunt: iamq; multi, uti uideo, quisque eo genere, quo laborat, pro ingenij facultate, te absentes alloquuntur, certatim conantes dare specimē industriæ suæ. Inter eos autem, quos ad cultum nominis tui excitasti, cum primis ipse sum, obscurus adhuc homo, notusque paucis, sed forsan non minimi laboris in bonis studijs: qui cū multis iam annos, sic meo ferente genio, tenear studio cognoscendæ naturæ rerum, iamque summa cura, magno labore uidear noua, & (nisi fallor) cognitu digna animaduertisse; decreui donum aliquod diligenter pro uirili elaboratum offerre tibi: speroque elegisse materiam non indignam principe. Proposui enim tractare apud te de natura

hominis.

hominis, quem quidem plerique ueteres amatores sapientiæ rerum naturalium omnium nobilissimum duxerunt, adeoq; perfectum existimarunt, ut parui mundi instar haberent: naturam uerò eius excellentissimi quiq; indefessè quæsiuerunt: atq. adeo pythius dæmon, ipse homo maximè cognoscat, monuit. Ac si omni hominì cognoscenda est, principi maximè cognoscenda est, quem in primis decet rerum magnarum, uulgo non cognitarum, cognitio: ut quemadmodum dignitate & opibus, sic etiam tali scientia præclarè, insigniterq; antecellat. Non una autem cùm sit ratio tractandì de homine, in præsentia ego eam tenebo, quam etiam suscepti operis monet inscriptio: scilicet, quam indicant res hæ obnoxia motui; hoc est, naturalem: diuina uiris altiori ingenio, qui in ijs studium, operamque locant, concessero. Monet enim commune præceptum, neminem polliceri, aut conari debere, quæ præstare & absoluere non possit. Hac autem duce tantum spero præstitero, præstare certè conabor, quantum cultor naturalis studij, mediocriter exercitatus, præstare ualeat. Verumtamen antè quàm quæ habeo de hominis natura, dicere aggrediar, cogor detinere regias tuas aures diutiùs, quàm uel occupationes tuæ ferrent, uel requireret assumpta materia. Quia enim ea, quæ ab antiquioribus, qui ferè hodie sunt in pretio, sunt tradita in tali causa, ea fide sunt accepta, ut qui ea teneat, is tandem uerum tenere existimetur: oportet, si uelim nouis aliquid esse loci, reddam causas, quare ea, quæ didici à ueteribus, non placuerint. Quod dum ago, graue certamen suscipiam oportet: neque cum humilibus, aut gregarijs, sed summis, atque principibus; Hippocrate, Platone, Aristotele, Galeno; à quibus sanè meliores longè, quàm ab alijs, traduntur rationes, quibusq; ego ipse præclara refero accepta. Quamquàm ego non descendo in arenam, ut uelut ingratus, coner quoquo modo eos uincere & profligare, quibus numquàm satis dignas grates agere possumus: quorum quidem operâ multa præclara sunt in physica manifestata, & quibus uel rationes ostendentibus, uel certè ostendere conantibus, & quasi notas quasdam tradentibus, deinceps ulterius procedimus: sed ut, eorum ipsorum exemplo, liberè ostendam, quæ ab ipsis dicta non pla-

ceant, causas reddens ab ipsorum etiam ferè desumptas libris, ac demùm meā feram sententiam, examinandā etiam illā uiris eruditis, paratus recantare, quotiescunq; ratione cōuincar. Illud enim semper statui esse boni ciuis in literaria rep.: maiorib. qui quē potuerunt animi, industriæ, diligentiae monumēta nobis reliquerunt, gratias quidem agentem, & honores decernentē, nō sic tamen temerē approbare omnia, sed considerare etiā atque etiā: & si uera uideantur, nēpē cum ipsis rebus consentire; laudare: sin minùs; quid peccent æquissimo indicare animo. De se moderatē, atque adeò demissē sentire: si qua ædat noua, subijcere iudicio prudentiorum. Quod autem ego nunc facturus sum, nō dubito, quin faciam bona gratia manium eorum, quos mihi egregios aduersarios constituo: qui dum uiuerent, ueritatem solam querentes, eam solā coli debere decreuerunt, & nihil sibi tribui, nisi ueri essent, uoluerunt: aliqui etiam erāt ita modesti, ut, ubi rerū magnitudine se deficere cognoscerēt, ingenuē faterentur, & rogarent per deos, si quis fortē boni aliquid inueniret, amicē impartiretur. Aristoteles autem, uir alioqui spiritus ingentis, scribit, ueritatem pro dignitate assequi posse meminem: imò uerò, ut noctuarum oculi ad diurnum lumen affecti sunt, sic animi nostri mentem ad ea esse, quæ naturā clarissima sunt omnium. Ut etiam fatentibus ijs, qui principes habentur philosophiæ, semper possint superesse noua, acutis uestigāda ingenijs, quæ demùm prolata libenter cognosci debeāt. Tu uerò, qui ea animi fortitudine diū iam assueuisti in ueris bellis, spero non ingratum habebis spectare umbratilem pugnam hominū otiosorū, quæ in re diuersa, similitudine quadam iuuare animum possit. Nam si in agendo fuero paullo prolixior, (fuero autem perinuitus) uel in summam breuē redigi argumenta iube, uel, certamine præterito, ea tantum lege, quæ à me tradita ex propria sententia cognosces.

Breuiore Me-
aph. cap. v.

Quid intelligatur per naturam.

CAPVT I.



PRIMUM autem dicam, quid intelligam per naturam, ne de re agere uidear, quæ mihi nondum sit definita. Per naturam intelligo, tum essentiam corpoream, qua constat homo: tum naturam incorpoream, quæ præstat, ut corpus nostrum sit tale, ut quidem sit omnibus alijs corporibus, quibusque à sua: namque omnia corpora naturalia constant ex materia, & incorporea quadam ui, quæ facultatem habet agendi, atque efficiendi: existuntque talia, uel talia, ubi ea uis materiam quasi induerit, sibi que subiecerit. In primis autem intelligo substantiam illam, quæ, ut effingit corpus hoc in organa, sic causa est efficiens operationum, quæ in animali uiuo fieri uidentur, omnium. Ac tot modis à uiris magnis, qui de eadem re sunt loquuti, intellectū est.

Veterum probatissimorum opiniones de natura hominis. CAP. II.



*H*ippocrates, medicus Cous, scripsit de natura hominis commentarium, qui adhuc exstat: quo ille sibi persuasit, non minùs ueris, quàm necessarijs rationibus probasse, hominem esse sanguinem, pituitam, bilem flauam, & atram: compositum nimirum quid ex ijs quatuor, quos uocauit humores. Quia enim uidere sibi uidebatur, quatuor esse prima corpora, quæ postea sunt dicta elementa: existimauitque, omnia, quæ non essent prima, constare ex omnibus ijs, sed mutua alteratione mutatis: quin ne generari quidem posse ullum, nisi illa inter se miscerentur: in homine, ut in cæteris, ea omnia posuit. Nam si illa contrarijs inter se essent uiribus, quasi conuenire in unum putauit per misionem & temperamentum: quod quidem rectè processerit, ubi illa maximè fuerint mista, hoc est conserta inter se, compositaque: moderateque & æqualiter se inter se habuerint tum facultate, tum copia, ut ne alterum multò præstet, sitque potentius, quàm alterum.

alterum. Natura autem incorporea, corporis propria, Hippocrati (quantum ex eius dictis colligere licet) qualitas est, ex contrarijs, sed inuicem temperatis, conflata qualitatibus. Substantia autem animæ existimatur illi esse calidum innatum, quod aliquando spiritum uocauit insitum: res uidelicet composita etiam ipsa ex ijs quatuor generibus, sed in qua maximè aereū, aqueumque elementum superent, magisque aereum, Galeno interprete: quæ quidem substantia una ab initio animal afformet, ac deinde adaugeat, & ad mortem usque nutriat: sitque auctor operum naturalium omnium. Vnde autem sensum nanciscatur animal, si substantia est conflata tantum ex elementaribus: utrum à primis usque ducat elementis, quæ uel omnia, uel aliqua sentiendi habeant facultatem: an aliqua alia ratione fortiatur: nullus usquam explicatè dixit Hippocrates. Galenus uerò explicans eius sententiam, ut profitetur, ambigit ea de re: aitque, accidere posse, ut prima elementa sentiant, si non omnia, at tamen aliqua: nec minùs, ut nullum quidem sentiat eorum, sed per mutuam alterationem, transmutationemque, tum commistionem & temperationem, tandem in unum aliquod agantur, quod sentire possit: magisque inclinatur in hoc posterius. Tantum Hippocrates de natura hominis: nam libri qui sub eius nomine circumferuntur, unde aliqua alia ratio colligi possit, omninò non sunt legitimi. Hippocraticam mistionem, temperationemque deinde aliquatenus receperunt Plato & Aristoteles: aliquatenus, inquam, quia prior non omnia elementa mutari ait: terram enim non in aliam speciem transire unquam: posterior quia putabat, longè aliud esse mistionem à compositione: & forsan aduertebat, contraria, agendi facultate prædita, si re ipsa mancant, nullo modo posse cessare à pugna: non actu manere in misto ait, quæ miscerentur, sed potestate: mistum enim actu aliud esse iam ab ijs, quæ uenire in mistionem: esseque similarium partium, ut quemadmodum aquæ pars aqua, ita & temperati: partem nimirum eius, quàm uis minimam, eandem habere cum toto rationem. Incorporea natura, corporis propria, atque immediata, Platoni forsan fuerint qualitates quatuor primæ, sed unà temperatæ: Aristoteli forma ipsa corporis, hoc est anima. Animæ autem

1. de Elem.
secundum
Hipp. cap. 3.

In Timæo.

1. de Gen. &
corrupt. tex-
tu 86.

Textu 84.

86.

In Timæo.

tem

tem substantia Platoni non simplex quid est, sed compositum, ut Hippocrati: compositum inquam ex ijs quatuor principijs, terra nimirum, aqua, aere, & igne, ex quibus uniuersa narrat composuisse Deum. Duas autem eius species facit, coniungitq; unà diuersissimas: alteram diuinam, immortalem, quam rationalem uocat: alteram mortalem, cuius uult esse affectus graues & necessarios. Priorem à Deo creatam dicit, posteriorem à filijs Dei. Rursus autem posteriorem secatur in duas adhuc diuersas: alteramque facit principium irarum, alteram appetitionum. Priorem illam diuinam in capite locat: secundæ alteram speciẽ in pectore, alterã subter præcordia. Omnibus, ait, corpus circumdatũ à filijs Dei: esse igitur in usum instrumenti, essentia separata ab anima. Quo autem modo corpori colligarentur, & fortè inter se, excogitauit uincula deligata in medulla ossum omnium. Communicare uerò inter se illas, inquit, suprema obijciente appetitiuæ in iecore spectra: itidem, reor, irascibili in corde. appetitiuam intentare illi minas utendo amaritudine: exhibere dolorem & anxietatem constringendo iecur. Irascibilem, ut satellitem, adstare principi rationali, eaque iubente obsequi, moliri que unà ultionem tùm appetitiuæ, tùm externi cuiuspiam, quod fortè sit iniurium. Fingit enim inter illas seditiones & rixas, rursusque pacem, ut in populo factioso.

Aristoteles non tradit animæ substantiam, sed definit ijs rationibus, quibus uideri possit, tantum docere, illam, uiuo animali, esse in eius corpore, qualiscunque sit tandem. Ait enim aliàs: esse actum primum corporis naturalis, organici: aliàs, principium uitæ: uel, principium & causam uiuentis corporis: causamque tùm substantialem, tùm finalem in generatione, tùm nunc efficientem motuum omnium, qui uidentur in animali. Omnino uult esse speciem quandam incorporeã essentia, ut ipsi sunt formæ omnes, sedentem in hoc corpore, ut in subiecta materia, utentem calore & spiritu, ut instrumentis, ut sæpè tradit: spiritum enim instrumentum esse naturæ in uarios usus. Est autem, cum incertum ait esse adhuc, anima ita sit actus corporis, ut nauta nauigij: hoc est, an penitus separabilis à corpore, separata essentia, an uerò forma materialis, quæ extra materiam nulla sit. Quod aliqui suorum de mente dubita-

2. de Anima. te

xtu 6. 7.

textu 18. 36. 37

2. de Gen. &

corr. text. 54. 55

& de Gen. & i

mal. cap. ult.

2. de Anima,

textu 11,

tum existimant: sed, ut uidetur, dubitatum est de tota anima. Vult autem animam effici, produciq̃ue in materia (quam sanguinem menstruum esse dicit) à genitore, cuius natura semine utatur, ut instrumento: cui quidem genitorem modò ait dare motum, modò principium uitale, modò originem & principium animæ: quare animatum dicit esse semen maris. Tria autem animæ genera cùm uiderentur, quæ singula seorsum diuersa genera animantium constituerent, uegetabile, sensitiuū, rationale: animam hominis, specie unam eandemq̃ue, ea omnia habere ait, ea tamen ratione, ut inferiores, uegetabilis, & sensitiua, potestate tantum essent, ut in quadrato triangulus: aut (ut ego clariùs, & magis naturaliter exponam) iam facultates tantum rationalis. Sed ipse, qui ità docet: animam produci in materia, quæ potentiâ sit corpus tale, esse corporis formam, proindeq̃ue corpori obnoxiam, ab eo inseparabilem: diuidit rursus illam in duas partes longè diuersæ conditionis: quarum alteram (quam uocat mentem, intellectum, contemplatiuam potentiam) accedere ait foris, solamq̃ue esse diuinam, incorruptibilem, æternā, cum actione cuius nihil communicet actio corporalis. Quod factum ingentium reliquit suis causam controuersiarum, dum alij de mente diuina tunc loquutum magistrū uolunt, quæ nobis intelligere & contemplari conantibus ut lumen affulgeat: alij, propriè de parte humanæ animæ: quod probatur pluribus. Tametsi ipsemet Aristoteles iisdem commentarijs, aliàs refellit eam sententiam, aliàs fatetur, nondum quidquam manifestum esse de ea re: non quia nondum demonstrârat, ut aiunt aliqui suorum, sed quia nesciebat certū. De spiritu autem illo, quem modò Aristotelē naturæ instrumentum facere dicebamus, audire etiam adhuc, fuerit operæpretiū.

cap. 4. Sic enim ipse met, libro de Mundo: *Spiritus item natura animata & fœcunda nominatur, quæ in animalibus & stirpibus per omnia meat.* Et de calore & spiritu, alibi: *Sedenim omnis anima siue uirtus, siue potentia, corpus aliud participare uidetur, idq̃ magis diuinum, quàm ea, quæ elementa appellantur. Inest enim in semine omnium, quod facit, ut fœcunda sint semina, uidelicet, quod calor uocatur: idq̃ nō ignis, nō talis facultas aliqua est, sed spiritus, qui in semine, spumosoq̃ corpore continetur, & natura, quæ in eo spiri-*

2. de Gen. ani-
mal. cap. 1.
Cap. 1. & 3.

de Anima.

textu 30. 31.

de Anim. textu
9. 20. & 2. de
Gen. animal.
ap. 3.

de Anim. tex-
tu 90. & seq.
de Anim. tex-
tu 21.

de Gen. ani-
mal. cap. 3.

eo spiritus est, proportionem respondens elemento stellarum: quam ob rem ignis nullum animal generat: at uero Solis calor, & animalium, non modo qui semine continetur, uerum etiam si quid excrementi sit, quamquam diuersum à natura, tamen id quoque principium habet uitale. Tum alio loco adhuc magis explicatè: Generantur ^{3. de Gen. ani-} in terra, humoresque animalia, quoniam humor in terra, spiritus in ^{mal. cap. 6.} humore, calor animalis in uniuerso est, ita ut quodam modo omnia anima plena sint: quam ob rem consistunt celeriter, cum calor ille comprehensus, siue exceptus est. comprehenditur autem, & humoribus incalescentibus efficitur ueluti bulla spumosa. Etiam alio: Putrefactis, inquit, facillimè ingenerantur animalia, quod excreta caliditas constituit, & componit corpora. Galenus in animali ^{In primis} duo calida ponit, efficientia seorsum utraque, ut uidetur: quorum alterum uocat natium, alterum aduentitium. Prioris substantia superius descripta est: posterioris siccam ait esse & igneam. Vocat autem aduentitium, non quia uel in primis ortus primordiis non fuerit, sed quia ipsa die prodere se, inualescereque uideatur. Aitque, natium superare in pueris, aduentitium in uiris: illud hyeme copiosum esse, hoc æstate: & quemadmodum ab illo omnia naturalia opera rectè peraguntur, sic hoc esse in causa omnium ferè morborum calidorum, atque siccorum. De ui naturæ propria & immediata, haud ferè aliud habet, ac natium caliditatem, temperamentum quatuor qualitatum. De animæ substantia incertus est, ferturque modo huc, modo illuc. Sæpe suspicatur eam esse temperamentum: aliquando spiritum animale uocatum, cerebri cellas inhabitantem: aliquando insitum cerebro; aliquando toti corpori: est, cum natium caliditatem cerebri, aut totam speciem constitutionis eius. Ferè autem fatetur ingenuè, nescire se: quemadmodum causam animalia formantem: quam quidem modo ait esse semen, uim seminalem: modo mentem quandam à corporibus superioribus extensam per aëra, qui uim assumat à Sole, dum lucis eius sit particeps. Usque tamen dubitanter: sicut dubius est semper, anima, & uis formatrix, unum idemque sint, necne. Neque inuitus fateretur, ipsam animam efformasse corpus, nisi quia in anima, uegetali ab Aristotele appellata, à Stoicis natura, non agnoscit rationem & sapientiam: & nisi uideret (ut inquit) quod motus ædimus, instru-

^{In primis}
Aph. 14.

Lib. Quod ani-
mi mores: & a-
libi sæpe.

7. de Placitis,
c. 3. de Utilitate
resp. c. 5.

de Tremore,
& c. cap. 6.

De Format. fœ-
tuum, cap. ult.

Ibidem.

17. de Usu part.
cap. 1.

De Format. fœ-
tuum, cap. ult.

Ibidem.

Ibidem. mentis mouentibus ignoratis. quare neq; post partum animal dispensari suspicatur ab anima rationali. Simplex autem
Ibidē. & frag. in Timaeum. ne sit anima, an non, in dubio itidē est. Aliquando enim facile concederet rationibus eorum, qui totam simplicem illā posuerunt: aliquando non; sed duplicem saltem mauult: neque id alia de causa, nisi quia mens & ratio naturales rationes, operationesque minimē nosse uideatur. Quocunque autem modo
De Form. foetū. cap. ult. se res habeant, illud sine ulla dubitatione pronunciat: nempe, post quā formatum fuerit corpus uniuersum, in toto uitae curriculo gubernari tribus motuum principiis: ex cerebro per neruos. & musculos, ex corde per arterias, è iecore per uēas: quae principia passim uocat facultates: quae autem sincilla, hoc est, qua essentiā, non audet manifestē constituere, ueritus ubiq; de finire animae substantiam. Quāquā autem diuersa omnino, uideantur principia, tamē consentire & conspirare ait: modum uerō interea nullum demonstrat. Tum quodam loco delegat
2. Methodi. ap. 5. iis principiis tres spiritus, suum unicuique, quos uocat nominibus, quibus solet facultates; animalem, uitalem, naturalem: & animalis quasi fontem facit cerebrum, uitalis cor, naturalis iecur: qui quidem inde procedentes, primus per neruos, secundus per arterias, tertius per uenas, in omnem partem, sint uel instrumenta, uel uehicula facultatum. Quanquam uitalis ait non esse euidentem demonstrationem, & de naturali magis adhuc dubiē pronunciat. Sed neque semel certa & firma est uiro illi sententia de processu eiusmodi omnium spirituum: est enim
Ibidem. ubi, sed uacillando, per alios neruos, quā uisorios, non spiritum, sed facultatem tantū transmitti statuit: idq; ob tenuitatem fibrarum. nam, *Si per uia eae essent, tūm facillimē discerperentur*, inquit; *tūm meatus in singulis penē momentis obturarentur*: et, *Facultatibus celeritas mouendi conuenit, corporibus eadem aduersatur*. Hec ferē ij uiri de natura hominis: quae singula ordine reuocanda in examen, excutiendaque sunt.

Quatuor humores non respondere ijs elementis, quibus sunt relati: neque esse absolute tales, quales sunt positi: humoris etiam nomine simpliciter non recte uocatos. CAP. III.



Vatuor ne sint prima corpora, uocata elemēta, & talia, qualia sunt posita: nec nō an ex ijs omnibus simul cōmistis sit necesse constare alia omnia, quæ generātur: non patitur res proposita ut exquiramus. Age-

mus autem de quatuor uocatis humoribus: quaremusq; num singuli respondeāt ijs elemētis, quib. sunt relati: num sint tales, quales sunt traditi: demū etiā, num recte humoris nomine simpliciter sint affecti. si enim ostendā, id nō esse: erit satis ad disturbance, euerfionemq; eorum principiorum. Ego enim id ut asseram, faciunt eadem argumēta, quibus utuntur ipsi auctores eius sententiæ: uidelicet ducta à colore, consistentia, & ijs, quæ patiēdo singulis eueniunt. Hippocrates .n. , cū substantias diiudicat, inspicit colores, tractatq; consistentiam: Galenus ait, *1. de Vsa part. cap. 9. In Phadro.* colorem, duritiem, molitiem, necessariò consequi tēperamentum, quod quidem ipsi partium substantia est. Plato iudicans naturam quamq; attendit facultatem, quam ea habeat uel ad agendum, uel ad patiendum: itidemq; Cous. Iam uerò sanguis ruber est, & tenuis, & aëreo refertur elemēto: pituita albet, estq; crassior, & subditur aquæ: bilis flaua est, & elementari ratione tenuior sanguine esse deberet, quando attribuitur igni: melancholia ipso nomine refert nigredinem, estque crassa, & à terra agnoscitur esse. Auctor autem libri de Coloribus, qui uulgò Aristoteli attribuitur, scribit, rubrum colorē exoriri, ubi copiosum lumen primo nigro tēperatur, hoc est, cum re magnopere nigra confunditur. Id quidem non est necesse, ut, cui lumen misceri debet, uehementer sit nigrum: nam etiam sub nubes tenues, tenuesq; exhalationes radij Solares contrahūt ruborē: satis est, esse crassiusculum, & opacum, quod à se non luceat. Cetera recte dicuntur: idemq; docet Plato, idem sensus. Cur igitur sanguis non attribuitur igni, qui solus uidetur lucere inter

2. de Gen. ani-
mal. cap. 2.

elementa? aër. n. dum aër est, quàm uis densatus, nullum fortassè reddat lumen: nostris certè auctoribus nullum. Galenus uerò ipse ueretur aliquando, sanguinē ex colore aëri assimilare. Tum qui sunt prudentes rerum, norunt, colorem flauum esse infra rubrum, hoc est, nigro uiciniorē. quod si ita est, ut est: cur bilis non alij tribuitur elemento? aut, si id non potest fieri, cur non ignis dicitur esse magis passi, & affecti, quàm in sanguine? Pituita iuxta Aristotelis & aliorum sententiam, falsam illam quidē, sed sensu imperito probabilem, albior est aqua, unde esse fertur: unde nam ea coloris accretio? Ex spiritu admisto, dixerit Galenus cum Platone, & aliquo alio. Sed mitto, quòd non nigrescit sub acre, ut spuma, & semen dissolutum, ut deberet, iuxta ipsorum rationem: si multus spiritus in pituita continetur, cur nō iam est multò leuior aqua? Si uerò ostendant rationem, qua aliquid tam tenue, quàm aqua est, compositum multò adhuc tenuiori, euadat crassius; uendant tota cum gēte Donium. Ergò ex admista terra accesserit albor pituitæ? Id quidem rectè processerit auctori libri de Coloribus, qui terram quoq; ponit albā: at unde nigredo melancholiæ, si id fuerit? Ex adustione diceret ille idem. Sed hīc ne quidem ipsi reor recipi ea causā possit. Quia enim melancholia etiam ad ipsa primordia generationis cōferri existimatur: si uestigio perpetuò causā sit eius nigroris, planè oporteat, statim in ipsis primordijs calorem animale, qui quidem, fatentibus cunctis, per ea maximè pollet, & agit, esse urentem: qui tamen numquàm urens posse esse existimatus est. Nolo dicere, impossibile prorsus esse, ignem quidquam, quod album, & totum tale sit, posse reddere ullo modo nigrū: quī enim nigra ille faciat alba corpora, qui candidus est ipse? Sed terra ipsa nigerrima est, & nigrorum primum; ut alibi est demonstratum: quare recta & uera ratione à terra esse dicetur substantia, quæ nigra uideatur. sed ea nullus umquàm fuerit humor, ut iam manifestabitur. Verū enim uerò, substantia, cuius secretò est rubor, tenuior est ea, cuius secretò est flauities: est enim illa naturæ gradu maioris, & in materia omninò sedēris tenuiori. Nosse id possunt rectè ij, qui hoc tempore stillanti uaporario segregant dissimilitudinē compositorum, si ut rectè operentur, sic rectè ratiocinentur; tūc etiam quicumque uelit, in his,

in his, quæ omnibus sunt in manibus : pomorum enim & florum, si igni admoucantur, apertè citiùs euanuerit rubor, quàm flauities. Quo igitur ture substantia tenuior crassiori elemēto attribuitur, crassior tenuissimo omnium? Atqui, inquit, sensus iudicio, bilis maiorem præbet calorem. Istud quoque, inquam ego, imperitorum iudicij est. Primum .n. sæpè minores naturæ uehementiùs nos mouere & alterare possunt, quàm maiores, si materiam copiosiore subiectam habeant, proinde quæ copiosiores sint ipsæ, & pluribus agant copijs : nam ipsæ flammæ non passæ aliud, ac in amplius diffusæ, non urunt amplius : & calcis urens spiritus aliquando non sentitur, nisi affundatur aqua. Tum fieri potest, ut substantijs corpulentis per accidēs insit uis caloris, ut ignito lapidi : deinde etiam, ijs coërceatur subtilis halitus, cuius uerè sit acrimonia : quibus tamen nominibus eæ minimè propria natura calidæ existimari debēt. Quid aut est, quod ijs humorib. (ut ego sic semel uocē) dum à calore assantur, accidit? Sanguis tostus agitur in bilem. esto hoc, si dijs placet : nam aër humiditate spoliatus in ignem uerti dicitur. At quid est, quòd bilis flaua magis tosta in atram agitur? ut substantia igni propinqua, de igneo elemēto constituta, calore agente, uertatur in rem specie & consistentia terrestrem? Nullam substantiam, quantum in se est, reddiderit nigrā candidus ignis, nedum eam, quæ ad suam uniuersitatem pertineat. Idem potest obijci de pituita, quæ etiam atq; etiā usta, bilis atræ speciē induit, negent id licet multi : nam si tu ipse igni torreas, uideas eam nigrū fumere colorem. Vnum responsum dari potest, nec præterea ullū. nempe, quòd ei, quod bilis dicitur, & ei, quod pituita, multū adhuc rei terrestris admistum sit. Verum sanè, sed quod duæ accusationes consequantur. Vna, quòd nullo modo sunt tribuenda huic elemento ea, quæ sunt alterius, quia istis, quæ huius sunt, composita sint illa alterius : altera, quòd uon simpliciter dicendum est, bilem, aut pituitam à calore agi in rē terrestrem : fit enim uerè sic : Tenuiores partes, uel aqueæ, uel æreæ, uel quæ ijs sunt proximæ, educuntur à calore : terrestres fiunt reliquæ. itaq; nulla uersio fit tenuiorum in crassiora, sed segregatio ab illis. Nolim autem quemquam nunc dicere, non à consistentia, aut colore, aut ijs, quæ fortè accidant, iudicandū de ijs

de ijs substantijs, sed à facultatibus, quas gerere uidentur. Primum enim id est contra maiorum sententiam, atque factum: deinde alienum à natura. Vt enim uires, facultatesque substantiarum sunt, & usque certæ certarum: sic illud est in natura certissimum: nempè, ut pro uiribus substantiæ cuiusq;, quæ quidem semper fuerint pro gradu & copîa naturæ, quæ illam constituit, sint etiam cæteræ omnes eius conditiones: consistentia, species, (hoc est color) operatio. quæ igitur ijs differunt, his etiam different. In primis apertum id est: ergò in secundis, & deinceps alijs, uerum ubique erit; composita sint licet cum dissimilibus: corporum enim usque eædem sunt pro genere conditiones, quamuis imminutæ, atque mutatæ. Neque hercules aliter processerit natura: quid enim esset, hoc habere suas uires, speciem alterius? Sed non possum ferre, ut eæ substantiæ absolute humores uocentur: non enim terra, quia aquæ commista est, aqua uocanda est: & humor uerè, & propriè id est, quod iam liquidum, uereq; cedens est, quodque à calore nullo umquam quoquo modo agi in rem crassiorē & nigram, queat: quod quidem in natura à uiro prudēti tantum id, quod aqueâ, aut uapidâ consistentiâ est, esse agnoscitur. Confusæ tractationes, & parum consideratæ nominum impositiones, obscuritatis, dubitationis, errorum, fallaciarum sunt causa: quæ uiro amico ueri, quique signatè, atque apertè res tractare cupit, studiosè cauenda, & pro uiribus tollenda sunt.

*Missionem, & temperamentum, qualia posita sunt,
esse nulla: idq; ipsorum etiam ueterum mul-
tis enunciantibus, & demonstran-
tibus. CAP. IIII.*



Emissione autem, temperamentoque, longior fuerit altercatio, ut in quibus multa, & difficilia, consideranda ueniunt. Sed uereor, ne illa tanto labore, tantaque contentione elaborata, non modò in hominis corpore, sed in uniuersa natura, nulla sint prorsus: nulla, inquam, qualia sunt constituta: quippè, ut per ea, plura diuersa inter se, contrariaque, conspirent in unum, unumq; agant, unaque

unaque operentur; aut uerò simul unam aliam speciem, formamque naturæ sumant. Natura enim, dum est, nullo pacto mutare sese, aut obliuisci sui, aut ponere proprium studium potest: itaq; quæ sunt natura contraria, nullo umquam modo contraria esse desinere posse uidentur: & si pugnacia sint, nulla conditione, ratione nulla posse non pugnare, si committantur. si. n. id fiat, cōtraria esse desināt: at hoc fieri nō potest; ergo neq; illud fiet umquā. Duo modi sunt excogitati à nostris principibus cōtraria cōciliandi: unus ab Hippocrate, ab Aristotele alter. Ab Hippocrate quidē, manentib. corporū miscibiliū formis, ea penitus cōferi, atq; cōponi: quod deinde, per qualitates eorūdē, ex æquo omnia alterantes, temperatio, & quædam in unum deductio cōsequatur: ab Aristotele, super hoc, uel occultari, uel obscurari (uix enim inuenio idoneam explicationem) illorum formas: quæ omnes, quasi ab officio paullū decedentes, dent nobiliori aduenienti locum, mox tamē, ea abeunte, uel de eius oppressione elabentes, proditurae se. Quorum quidem prior nullus est, ut quo nihil agatur: posterior falsus, impossibilis, ne auctori quidem probabilis, neque probatus. Nam si maneant substantiæ singulae proprijs formis, planē nulla adhuc sit coitio in unum: quī. n. potest unū aliquid eodem tempore esse hoc & illud? nullum temperamentum: quī enim potest aliquod concepisse, & iam quasi ex dimidio proprias fecisse qualitates alienas, contrarias suis, propria adhuc retenta forma? Qualitates enim primæ si non ipsæ sunt formæ (sunt autem Hippocrati, quando ipsi illę unā cum materia totam constituere uidentur substantiam) certē itā se habent ad formam, ut prout ipsæ propriē sint, talis corporis sit forma. Alienæ, si quæ modō inuaserunt, atque insunt, per accidens insunt: & pugnant illæ quidē, sed nō dum uerē aliam rem fecerunt, nec fecisse debent uideri. Ea uerò seorsum mansio dissimilium, licet maximē compositorum, cognita etiam Hippocrati, clarissimō argumento est, pugnare etiam ibi dissimilia. Propterea. n. est, quia nihil habere uolunt naturæ commune cū dissimilibus, proindeq; usq; se seorsum tuentur, alienasque arcent. Contraria mutua actione agi in unum medium, in quo deinde cōueniat illis, dicere, uerba sunt: at ostendatur ratio, qua id fieri queat. Num ea effracta,

C atque

atque alterata mutuò, ponunt tandem odia ultrò, coeuntque in unum? At sunt contraria natura, & naturæ eorum, hoc est qualitates, effrænes. An uerò id fit ui, alterius uiribus alterum retinentibus, cohibentibusq; in medio uel repugnans? Id uerò pugnare est. Nec oportet dicere; non dolet homo, ergò rectè procedit mistio: inscientis enim est tale dictum. Propterea id fit, quia ea natura, substantiaque, quæ uincit & dominatur sub hoc corpore, una ipsa & simplex, benè rem gerit, dissimilesque contrariasque frangit, premit, agitque ad interitum, ut earum nihil quidquam contra ualeat, ut probabo postea: non beneficio misionis, quæ nulla est. Aristoteles autem ipse fatetur, nō aboleri miscibiliū formas, alioqui generatio esset alterius.

2. de Gen. & Si non abolentur, ergò manent. *Non manent*, inquit: *nam uel*
 corr. textu 8. *si secundum parua ea seruentur, compositio sit.* Si non seruantur, ergò percunt. An uerò est ullum medium? Esse, uidetur dicere

Textu 84. ipse: *Neg. manent enim, neque corrumpuntur*, inquit: *seruatur enim utriusque potentia.* Quid per Deum est ista potentia, quæ ipsi tot in physica expedit difficultates? Hic quidem necessariò haud aliud, acabilitas ad formam: tamen non accipiendam, non habitam prius, ut in generatione; sed aut recuperandam, modò non amissam, aut iterum proferendā ueluti occultatam. At id omninò oportet fiat aliqua actione: eccuius erit actio? Separati alicuius efficientis non potest esse: non enim uidetur adesse ullum, quod statim ea reddat talia: ergo eorum ipsorum, quæ sunt potentiâ. Erunt igitur talia, quæ agere possint, antè quàm sint actu talia, hoc est, antè quàm resumant actum. At maneant oportet formæ elementariæ in mistis, alioqui ne elementa quidem sint: & manent etiam ipsi Aristoteli: negat enim elementa esse materiam mistorum. aliqui suorum, *Elementum*, inquit, *natum est manere, in quantum elementum.* Cur id? scilicet, quia totâ substantiâ ea mancant in misione. Sed quid plura? ipsemet quantum potenciali illi rationi fideret, ostendit, cum rem incertissimam, obscurissimamque relinquens, *Hec omittantur*, ait: cedens manifestè difficultati. Id animaduertentes ingeniosi aliqui suorum, concentum qualitatum dixerunt esse temperamentum: alij misionis rationem. Nugæ, & gerræ: illi non proficiunt hilum, hi certè non uident ipsi

2. de Gen. &
 corr. textu 48.

2. de Gen. &
 corr. textu 84.

ipsi quid dicāt. Concērus non est omninò unū, sed multa unā. Rationis autem uerbo si adstruant formam quampiam, quam mistio tandem sit mistio; sicque existiment confectam rem, quando forma omnis existimatur per se simplex & indiuidua, petant principium: negatur enim in præsenti causā posse esse tale quidquam. Cū autem ratio uerè non sit aliud, ac circumstantia quædam rei, ut postea ostendetur: erit egregijs uiris id, quo res est, quod est, uerè circumstantia eius. Verumtamen si per misionem, temperamentumque uel in unum medium aguntur contraria, uel unā agunt, unaque operantur; cur mista omnia in dies per se mutantur, & nobiliora in horas, in momenta, internā actione consumuntur? potest ne ulla esse pax, aut quies, qualis deberet esse in temperamento, ubi plurima continenter, celeriterque mutantur, atque intereunt? Nam non sanguis, aut caro, aut cætera corporis nostri, ut sunt, hoc est, sanguinea, carneaque consistentiâ, effluunt, sed mutata in aliud: ergo tota massa sanguinea, & carnea, & aliæ, uim patiuntur, & superantur, & rapidè consumuntur. At fit tamen, dicent, aliqua temperatio: nisi enim fieret, nihil morarentur mista: atque in nullo eorum sentiuntur qualitates summæ. Quid est, inquā ego, quia quæ uincuntur, non se deserunt, sed repugnant quod possunt, itaque uictorem morantur, dicere eum temperare? lignū moratur ignem edentem, ergo ignem temperat. Si nullæ uires mistorum sentiuntur summæ, propterea est, quia uerè nulla substantia, quæ in ijs est, summâ naturâ est: & si qua summis finitima est, nimium exilis est. Negent licet illi, qui clamitant, formas non intendi & remitti, substantias non recipere magis & minus: qui (ignoscant uera dicenti) nesciunt de quibus loquantur, hoc est, formarum essentiam, substantiarumque conditionem. Temperationem tamen (instent etiam fortasse) fieri per misionem, indicat res ipsa: nam non modò quæ natura miscuit, sed etiam quæ nos, si segregentur, reddant uires maiores: & rursus si misceantur, retundantur exsuperantiæ, & uim ferè emittant unam mediam, moderatam, si ad simplices priores comparetur. Ad quæ ego non respondebo aliter, ac reddens rationem eorum, quæ eueniunt: ea enim ignorata, erroris est causa. Qualitates actiue ea conditione sunt, ut in substantia, qua sunt, semper sint tantæ, quanta natura eius substantiæ iam

est, si aliud natura à qualitate est: si uerò per multiplicationem inde foras protendantur, ut de igne calor, aut de niue frigus; quò quidem in longius, ampliusque diffunduntur, eò magis languent: sed si fortè per spatia misceri contingat dissimili, contrariæque uì; dictum mirum: quia non habent ubi quasi sistant gradum, cuique innitantur, statim, temporis momento, afficiuntur, atque mutantur: tam facile, eas uinci extra corpus, cuius sunt, est. Atque sic diuersæ, contrariæque commistorum uires de ijs manantes, simulque uenientes per eadem spatia (non enim præcludunt alijs incorporea locum) minuuntur omnes mutua actione: non tamen propterea aut ipsæ, aut ea, quorum sunt, fiunt unum: diuersa, contrariaque sunt, & talia esse uolunt, atque pugnant. Vna tamē aliquando sentiri uidentur illæ, tum quia quod sentit, unum numero est, eodemque tempore, iisdemque partibus sentit: tum quia uel eæ nō mouēt admodum impariter: uel (quod est ferè) quia una aliqua earū est tam præpotēs, quæ cæteras quasi obscurare ualeat. nam sicubi fortè magnopere dispares sint, nec una uehemēter reliquas retūdat, palam secretò sentiantur. Cæterum si sumā ego unū aliquod istorum, quæ mista dicunt, segregemque, ostendam centum ordines, gradusque, ut mediæ substantiæ, sic mediarum qualitatum: qui si singuli sunt tales propter mitionem, quis erit mitionum, & temperationum in uno singulari finis? in corpore nostro mille erunt mitiones, mille temperationes: quod nescio quàm explicabile sit negocium. Galenus passim asserit, mista ad sensum uideri unum, naturæ nihil minùs esse: & Hippocrati ea in re subscribit: atque insuper multis locis id egregiè, bellissimeque demonstrat: ostendit enim, in multis uocatis simplicibus substantias esse ualdè aduersarū, contrariarumque qualitatum, quæ palam seorsum agunt, seorsumque percipiuntur: & uel in quibus non percipiuntur, itidem esse, atque actu, dicit. Rectè sanè: quæ enim ex iisdem eadem ratione constituuntur, ab omnibus nominibus eandem habent rationem. Vbi nunc sunt illi, qui contendunt, uniuscuiusque misti prorsus unicam esse formam? Qui possunt una eademque forma naturæ, quæ sit quasi in termino (sic enim ipsi uolunt) contineri ea, quæ sunt contraria actu, quæque iam manifestè seorsum agunt? Sed occasus

de Simpl. me.

fac. cap. 14. 15.

4. & lib. 4.

cap. 3. & ult.

casus etiam qualitatū primarum, quæ (ut dictum est) si non naturæ ipsæ corporum sunt, certè maximè naturales sunt, manifestè demonstrat, nullam fieri posse temperationem, qualis præscripta est. Planè enim cæ occidunt, non quia abeant in contrarias, quæ i. n. id fiat? sed quia dentur neci, sicque esse desinant. Si autem sic desinunt; ergò cum minuuntur, non propterea minuuntur, quia participet contrariam aliquo modo, sed quia ui frangantur, & pessum dentur. Elementa autem non mutari diuturna actione qualitatū alienarum, nullus umquàm dixit Aristoteles, neque ullus opinor Hippocrates, cum manifestè repugnet ueritati: nihil enim cerneretur mediū, nisi prima descēdissent totā substantiā: (nam si est dictū, moriente homine unum quodque eorum, quæ sunt collata ad generationem, redire ad suam ipsius naturam, & ad id, unde est; Hippocrati, puto ad suam sinceritatē, intellectum, abeundo de medio dissimilium & contrariorum: Aristoteli autem non statim, reor, in ignem, aërem, aquam, & terram, sed aliquo tēpore post, nimirum ubi per motum, multasque adhuc mutationes, redire ad naturam eorum principiorum potuerint:) sed qui uolunt non mutari in media corpora prima, illi planè in mediorum constitutione negāt sensum & rationē: unde enim fiāt media, primis semper incolumibus? Sic apparet, inquiūt, præsentia alienæ qualitatis. Sed uolo sciant, in substantia summx naturæ nullo modo posse durare qualitates alienas. nunquàm uideas flammam frigore mistam, neque niuem calore igneo oppletam, etiam si nix non sit primum frigidorum. Mutētur oportet prima, & descendant naturæ eorum, si media fieri debent. Istorum uerò opinione, mista fuerint falsa quædam spectra, ostendentia quod uerè minimè est. Nos agnoscimus, prima corpora mutari, & transire in omnia media, ui & actione contrariorum: simplicia autem illa nata sunt, contrarijs naturis, contrarijsque prædita uiribus: & dum naturas habebunt contrarias, hoc est, dum erunt, semper secum uolent esse, nihil habere commune cum contrarijs: non possunt enim contraria esse simul: pugnabuntque pro uiribus, ut ne alterum contactum alterius, uiresque patiatur: citiusque pereat natura, quàm fiat aliter. Comprobatur id omnibus argumentis, sicut uisum est. Quam ob rem tandem sine dubi-

tatione statuatur, nullā mīstionē esse, nullū tēperamentū, quale traditū est. Quod etiam ipsi, quibuscū disputamus, cognoscere poterāt uel ex eo, quod ferē omnes sunt testati: scilicet, quōd in mīsto superet unū aliquod, & motus omnes fiāt iuxta naturā superantis. Quod quidem postea usque adeo uerum est uisum, ut sectatores aliqui pronunciare sint ausi, impossibile esse, ut ex æquo quæpiam misceantur. Si per mīstionem compositio intelligatur; rectē est, & nos, & natura accipiet: nec uideo, cur nō sic decernamus, atq; loquamur. Si per temperamētum, fractio atque imminutio actiuae qualitatis, uel nudæ, uel cum substantia, cuius est, cōtrariæ actione & ui deductæ in gradus minores, in quibus sit erga nos lenior: & uerē, & secundum naturam pronuncietur: aliter nulla esse ueritas potest. Sublata mīstione, quæ tamdiū miscuit philosophiam, nihil erit, quod nos uel incorporeæ naturæ, uel animæ causā remoretur, si eē ex mīstione, temperamentoque dicantur exsistere.

*Si omnia elementa insensilia sint, nullo modo mutua
tantum alteratione & mutatione, nihil ac-
cipiendo foris, posse assumere sen-
sum. CAP. V.*



SI quis fuit, qui existimaret, ex elementis, omnibus insensilibus, tantum se inter se mutuò alterando atque mutando, nihil extrinsecus accipiendo, posse sentiens exoriri; is uerò nouo atque acerbo dignus est accusationis genere. Quē enim fieri potest, quātauis actione passioneque contrariorum, quidquam constituatur extra genus? nec modò extra genus, sed quod tantò genere cōprehensa excellat, quantò sensile insensili nobilius est, atque præstantius?

De Elem. ca. 3. Potest, inquit Galenus, per multas medias transmutatiōes, quod interim est nigrum, mox album euadere, & quod interim est albū, mox fieri nigrum: & quod interim est sensus expers, mox sensum accipere. Quod nam simile est hoc, uir eximie? Cōtēdere aliquis posset, non similem esse rationem accidentis & formæ substantialis, quæ quidē principium est uel sensus, uel insensibilitatis. At esto hoc, quando uerò numquā nouus exorietur color, nisi

tota

tota mutetur substantia, cuius uerè est color, te prædicante, qui statuis, colorem necessariò consequi temperamentum, quod tibi constituit & complet substantiam: Sed si corpus mutatum cum alia forma alium sumit colorem, id sumit, sine quo esse nullum corpus potest: nullum enim corpus sine colore: at de sensu tibi non item: uidetur enim in alijs, in alijs non. Quæ igitur eo carètia, sumere eum debent transcendant tibi suam sortem oportet, transeantq; ad ea, quæ sensu prædita sunt: à se enim quæ mutant genus? Quàm uis simul inter se misceantur, & ut uis se inter se afficiant & alterent, quæ acquirant id, quo ipsa omnia careant? Dei certè alicuius ope ad eam rem fuerit opus. Sed neque si similia quadrent, eadem adhuc sit ratio. Agitur enim nigrum in album, & hoc in illud, pereunte albedinis, nigredinisue forma: at insensibilia sensum assumunt tibi non occasu suo, sed mutua compositione & cōmitione, alterationē modò subeundo. nullus .n. adhuc humor seorsum sentit: sed omnes sic simul commisti in corpore humano, tibi sentiunt. Galenum miror, uirum talem, qui ipse ostenderat, nihil diuersi generis posse ijs, quæ componuntur, aduenire, cuique non tam facile sic temerè allata recipiebantur, potuisse inclinare in eam opinionem.

Platonem, quæ de anima origine, & hominis formatione loquutus est, ut theologum loquatum esse. Tres uerò species animæ diuersæ essentia imprudenter contulisse in unum: non habere quem ostendat modum probabilem earū communicationis: seditiones & rixas inter eas turpiter excitasse.

CAP. VI.



Lato autem quæ de origine animæ, de creatoribus specierum eius, de formatoribus hominis est profatus, ut theologus est profatus. Itaque missum faciemus eum, quando in tota hac tractatione diuina nō attingere proposuimus. Nam si quis tantum naturaliter agi expetēs quæreret ex Platone probationem eorum, quæ sunt pronuntiata, nā illè haud iure ageret: proindeque nō deberet mi-

rari,

rari, si fortè frustrà se quæsiuisse cognosceret. Trium uerò specierum animæ in unum adportatio & cōsociatio, certè imprudentis, inscientisquæ est: neque enim alius faciat id facinus, nisi qui non assequatur rationes, quibus operationes, motusquæ omnes, qui in animali æduntur, ab unica, tota consimili sibi, sint, ædanturquæ anima. Factum autem indignum est etiam mediocri philosopho, uel naturali, uel diuino: quis enim, uel sine probatione ulla, secum ipse non deprehendat, eam substantiam, quæ percipit rationes rerum, deque ijs iudicat, eandem ciere in causam iniuriosam motum, ubi indignè ab ea secum agi decreuit? quæ aliter persuadeant, nulla sunt. Appetentiam autem omnem sentientis esse animæ, non indiget demonstratione: at sentientem eandem esse, ac quæ ratiocinatur, ostendam etiam posterius. Modus autem, qui communicationis earum est allatus, meras habet fabulas. Neque enim iecur tale est, in quo imagines affingi, proferriue queant, ut neque cor: neque ciendo bilis amaritiem, & iecur, portæ sue constringendo, excitari, intentariquæ possunt omnes, quos ipse appetitiuæ tribuere posset, motus. Tùm in iecore paruus est sensus: ut non propter eius constrictionem fieri tantus strepitus, tantæ uociferationes queant, quantas fingit Plato. Sed intentare, percipere, obsequi dicere, & alia talia, uerba tantùm proloqui est: at modi, & ij quàm fieri posset euidentēs, probabilēsue, erant ostendendi. Seditiones autem & rixæ specierum animæ, quàm turpiter sunt excitatæ? tùm frænationes, domationes, cōcordia, obsequia, & cætera eiusmodi, quàm inaniter & falsò commenta? Sic enim uerò fit: Sæpè electuræ animæ uel plura obijciuntur imparia, diuersæue, quorum neque eadem conditio sit, neque idem futurus finis: uel unum aliquid, à quo non idem perpetuò fructus speretur, sed primò bonus, deinde malus, uel cōtrà. Tunc anima, una, & simplicissima, ambigit secum ipsa, hocne, an illud malit: accipiatne hoc prius, an uerò non: ubi constituerit, nulla apud ipsam fuerit dubitatio amplius, quam pugnam existimat Plato. Est uerò, cùm sibi ipsa uim facit, pugnatque quodam modo: nimirum quando iam blandè, dulciterquæ ab aliquo mouetur erga id, atque alioqui non ingratis seque retur: sed habens conceptum aliud, uel quod sequuturum esset,

set, uel iam sit amittendum, non uult, seque ipsa retrahit, cohibetque: aut quando furiosè cietur, seque ipsa conatur coërcere. Est, cum sibi quoque ipsa irascitur, tamquam malo iudici, qui in deliberando decreuerit nocenter, aut indignè. Quæ quidem omnia si unius, eiusdemque, & simplicis animæ ponantur, ut sunt; tum rectè fiat, & congruenter ad ueritatem, tum longè facilius, longèque apertius reddantur rationes, exponanturque omnia; ut par quidem est ab eo, qui profiteatur alios docere causas rerum. Nam quòd causa Deus esse dicatur, qui sic fecerit, uel sic uoluerit, non propterea semper absoluetur Plato: quin sæpè magis adhuc, optimoque iure, damnabitur. si quod enim est agens & operans, quod longè optima, & in omnibus convenientissima ratione agat & operetur, quodque eo etiam superet alia omnia, id certè Deus esse existimandum est.

Aristotelem, qui non proferat substantiam animæ, non posse uerè, aut rectè de eius actionibus, passionibus, operationibus edisserere: non posse ostendere, quo modo utatur spiritu & actiuis qualitatibus, ut instrumentis: frustra conatum docere, à quo ea producat, modumque ostendisse ineptum: malè eam scasse in duas partes penitus diuersas & separabiles. CAP. VII.



Um Aristotele seorsum diutiùs agam, qui uir est acer, & fortis, disputator subtilis, meque unus miserius torfit, quam multi alij. Primùm exigo, proferat animæ substantiam: suis enim finitionibus planè non profert, sed circumscribit: affertque uel quod sit obscurius eo, quod quæritur uel nihil magis secretum, quam possit uidere qui uis de uulgo. Cum *ὁτιλέχεια* dicit, planè dicit quid, quo perficitur aliquod, aut perfectum est: propter quod fiebat, aut factus est motus. Sed rogo te, quid illud est? latet enim adhuc: & si non ostendatur, multò melius fuerat, non facere me ijs modis anxium. Quis autem uel ex discessu animæ non nouit, eam esse talis uitæ principium, atque causam? causamque motuum, qui in animali uidentur omnium? At quid sit id, & quale, id uerò ostendere conandum est; dum id lateat, num-

quàm ueri quidquam sperabo de anima audire : qui enim reddi rationes uel actionum, uel passionum, uel operationum possint, substantia adhuc ignota ? In *ἀπορίαις* uerò erit Aristoteles, etiam dum educet animam de potētia materiæ, faciens formam materiale, ut loquuntur aliqui suorum : eum autem mentem attulerit foris, asserens eam separabilem à corpore, in multò maiori adhuc fuerit : multò enim magis illa lateat necesse est : sed neq; propriè, & rectè forma corporis dici poterit. Quæcumque autem sit anima, ostendatur modus, quo actiuis qualitatibus & spiritu utatur, ut instrumentis : qualitates enim illæ effrænes sunt Aristoteli : nihil audiunt : pergūt usque, quò fert uis. Et uerò ea, quæ in dies eueniunt, indicare possunt, eas minimè obsequi ullo modo animæ : cur enim sæpè, nulla causâ ueniēte foris, etate florente, internarum qualitatū uitio corpus corrūpitur ? Ignaua, & iners fuerit forma, quæ sedēs in materia, & uigens, non è re sua regat qualitates : simul hæ indomitæ, quæ, quasi equus sternax, sessorem frustra hærere conantem possint excutere. Ostendatur mihi aptitudo mouentis ad organa, & horum ad illud : quam eò auidius quæro in naturalib. q̃ in artificialib. uocatis, quò causâ est interna, secreta à sensib.

De motu anim.
cap. 5. & 6. Docet ipse, animā mouere spiritū alterationib. appetitu ciente illas. Iam obscurissimū est, quo modo ea appetēs moueat,augeatq; qualitates : sed si id queat, motu omninò queat, aut cessatione à motu : motus. n. calorem, quies frigus p̃cedere uidetur. At cuius rei præcedat motus ? spiritus ? ille igitur mouebitur

Cap. 6. ante alterationē. Quid autem est, quod subdit, in locali motu spiritum auctum impellere ? quid opus est, ea de causâ augeri spiritum ? Motus omnes uoluntarij uocati in animali, contractione fiunt musculorū : itaq; usq; cōtrahi solūm oporteret spiritū. Sed si, quātū intelligo, Aristotelē uelle, spiritus pulsus augeatur calefactiōe, cōtracturus minuitur frigefactione : quī fieri potest ea alternatio qualitatū in cito motu ? & ubi iam feruēt omnia ob multā uehementemq; motionē, quod frigus subinde, ac statim, potest excitari ? Sed definiatur per Deū semel, an ita sit actus corporis anima, ut nauta nauigij, an sedeat in eo, ut forma in subiecta materia : neq; enim id parū est, aut leue : in eo sunt omnia, quæ possunt ducere ad substantiæ quæsitæ inuentionē.

dum

dum id definiat, ne me detineat: nulla est spes cognoscendi, de quo quæro. Cum primis autem declaretur modus, quo producat^r anima in materia à genitore per semen, ut instrumentū: obscurior enim est tenebris Cimmerijs. *Continet, inquit, semen* 2. de Gen. anim. *motum, quo illud (scilicet primum agens) mouebat: ut in spon-* cap. 1. *tinis illis, quorum partes moueri pergunt, licet nihil nunc tangat, qui antè tetigit.* Sed, uir docte, quàm dispar est similitudo? Primum, mouens efficiensque naturale internum est, sub id, quod mouet: impulsor machinarum istarum externus. Tum machinarum deinde est motus per locum, partibus alijs alias impellentibus, ac rapientib. cōtinuè: at seminis est generationis, quæ præparantis, disponentisque materiam, & demùm formā producentis est: quarum motionum quæ machinæ esse possunt in semine, quæ eas non modò gerere, sed tamdiū continuare queant? Motus enim omnis tale est accidens, quod dum fit, perit, & desinat, nisi ui noua reparetur. Vsq; dum autem producat^r anima uegetabilis, satis longum tibi tempus est: & quis intereā moderetur, & regat motum tanta arte? Profectò necessariò opus habes motore & moderatore in semine, qui usq; moueat ut oportet, modereturque motum. Quæ autem ostenditur ratio mouendi? talis scilicet: *Semen (inquit) cum excrementum sit,* 2. de Gen. anim. *eodémque moueatur motu, quo augetur corpus, digestionem ultimi* cap. 3. *alimenti, ubi uterum subijt, constituit, & mouet excrementum* *feminae eodem motu, quo ipsum mouetur: nam illud quoque excrementum est, habetque omnes partes potentia, actu nullam.* Cap. 1. *Motu peracto, pars existit quæque, eadémque est animata: non est enim facies, nisi animam habeat, neque caro.* Nisi fallor, asseuerat, augmenti ratione mouere semen, non generationis: quod si est, quid disceptamus? Profectò uidetur rationi cōsonum, ut quod fertur in partē aliquā corporis, eam nutriturum, uel casurum, si superfluxerit, gerat tantum augmenti motum: aut, si etiam generandi, simile tantum constituendi. augmenti uerò motū partis eius solius, minimè omnium: quī enim totius corporis motus in unam partem conferatur? Nec oportet dicere, aliter tamen uideri euenire ut in animalibus, sic etiā plantis, quarum uel gemma una germinare, & arborem ferre posse uidetur: quærenda enim ratio eius, quod fit: nam longè alia est, ac quia gem

de Gen. anim.
cap. 8.

ma, aut semen habet motum, quo augetur planta. Sed si instrumenti uicem gerit semen, defertque tantum motum, quid oportet dicere, semē esse animatum, habere principium uitale, originem & principium animæ? An motus, & anima sunt idē? an uerò parum interest, & utrumque pro eodem accipi licet? Aristoteli certē non uidetur opus esse, animatum esse semen, si per illud efficienda tantum, producendaque est anima in materia, quæ materia est sanguis mēstruus: ipsi enim anima uegetabilis & sentiens sine dubio forma est materialis, inseparabilis à materia hac, in qua producitur. An uerò non potest naturā ab instrumento inanimato produci animatum.? Duæ igitur interuenerint in generatione animæ: altera, quam habuerit semen, altera, quæ producitur in materia. Verum ubi semen mouerit excrementū fæminæ, perierit anima, que erat in eo instrumēto: disperditur enim sub illa Aristoteli semen. Quamquā non actu in eo esse dicit, sed potentia: perierit igitur anima potētia: & cur natura frustra fecerit eam potētiā? At nunquā dederit id Aristoteles: sed uel animam, uel potentiam animæ, quam semen continuerit, eam ipsam numero (si licet sic dicere) dari sanguini menstruo: proindeque uetat quærere, an semē genituræ iam pars sit formæ constitutæ: ut coagulum, à quo lac cogitur, pars sit lactis iam coacti, nec ne. Quasi diceret: satis esse, scire, materiam hanc accepisse ab illo uirtutem, atque formam: de materia, in qua prius erat uirtus, & qua deferebatur, non esse quærendum amplius. Sed hoc modo aut motum quid erit anima, quæ possit de materia in materiā migrare: aut si id minùs; perijt omninò ea, quæ in semine erat, quādo (ut diximus) post motum sanguinem mēstruum, dissipatur genituræ corpus Aristoteli. Sed si potētiā est in semine anima, & iuxta ipsius dogmata neque quidquam se ipsum producere potest, neq; quod non sit actu, quidquam efficere: quā possit ea potētia animæ uel à se prodire in actum, uel aliam materiam in actum agere? Motu, dicit, quem defert à genitore: at ego mox ostendam, nullum iam motum, nullam mouendi uim habere semen, quæ iam genitori tribui mereatur. Verumtamen ubi cor constitutum est, & anima uegetalis data materiæ, consentaneum est, ut iam qui à parente ueniebat, cessarit motus. *Cum quod gignitur* (inquit)

de Gen. anim.
cap. 4.

(inquit) *de ambobus abiunctum iam est, seipsum gerere, gubernare, & dispensare debet, perinde quasi filius à patre emancipatus, seorsumq; collocatus.* Si sic est; quî potest deinde actione animæ uegetabilis produci sentiens, & mox intelligens? Doceat nos eam rationem, qua quid supra proprium gradum agere, operarique possit, quæ uidetur transgredi omnem naturæ legem.

Libenter autem cognoscerem modum, quo tres species animæ, quæ singulæ separatim singula diuersa genera constitutere possunt animantum, in homine fiant una. Quadratus enim (quando ea utitur ipse similitudine) si non diuisibilis quæ quadratus; constat tamen ijs, quæ partibilia, & inuicem separabilia sunt: possunt secari lineæ fortè in infinitum: potest una tolli, & iunctis cæteris esse triangulus: at nō possunt talia cadere in animas, quæ Aristoteli ipsi sunt quasi in terminis, nec corpori quæ tanto, sed quæ tali, hærent. Quod quidem dicitur de facultatibus; animam rationalem & sentire & uegetabilis quoque obire munia; rectè dicitur: sed animæ substantiæ sunt, & singula animarum genera seorsum substantiæ: quî igitur fieri potest, ut quæ substantiæ sunt, hîc fiant facultates? Cur quemadmodum sensitiua anima uegetandi quoque uim habere dicitur, sic rursus uegetabilis sentiendi uim, sed minorem, non dicitur habere? nam multi maiorum id dixerunt, nec difficilis fuerit demonstratio: nec de ratiocinatione forsan difficilis erit. Sed si illa difficilis; satius fateri nescire ea, de quibus nō liquet, quàm incondita & incerta, (ne dicam falsa) ponere. Illud uerò, quòd una eademque hominis anima in duas partes tantopere diuersas secta est, indignum est Aristotele, uel ipsomet iudice, qui paullò antè idem facinus in Platone reprehenderat, nec leuibus argumentis sustulerat eiusmodi opinionem. Si dubium habebat, melius longè erat, fateri id quod erat, ut fassus etiam fuerat, nec addere aliud: eius enim rei ratio nequit expediri philosopho naturali. Quantùm autem animaduerto, duæ fuere causæ, quibus induci potuit ad tale facinus. Vna, quòd pars intelligens uidebatur sine corporeo instrumento suam obire functionem: nam neque actiuarum qualitatuum uir esse obnoxia: altera, quod appareret ipsi abstrahere formas de materia, & tantùm uniuersalia comprehendere. Quid ais, magne Aristoteles?

2. de Anima, te.
xlv 21.

Rogo te, dic, cur in multis uel naturâ, uel morbo, dum imaginatio & memoria, & reliquæ corporeæ facultates, planè rectè habent, intellectio, ratiocinatioque aut habent uitium, aut impediuntur? Si corporeum instrumentum aut iam malè affectum, aut antea malè præparatum, est in caussa, cur non uititatae sunt eæ facultates, quæ sunt corporeæ? Potestne fieri, ut corporis uitio uitietur facultas, quæ nō perinde, aut nō immediatè corpori sit obnoxia, & nō illæ, quæ maximè, immediateq; sunt obnoxie, quibusq; medijs operatur illa sublimior? Verumtamē siue mediata, siue immediatè patiatur substantia intelligēs à corpore, si patitur, ea & corpus hoc omninò in genere cōmunicabūt, & in genere patibilium: quæ enim inuicē patiuntur, naturali quidē ratione, sic in genere communicent necesse est: & si id est, substantia intelligens aut corporea erit, materia constans, aut obnoxia materiæ, indeque etiam obnoxia actiuis qualitatibus: nam si alterum inuicem communicantium patitur, patitur & alterum. Abtractio autem ista formarum, quam iactas, planè ficta est: non enim te intelligere conante, ipsæ ueræ rerum formæ de sua materia abstrahuntur. Itaque tu tua abstractione atq; conceptu non habes aliud, nec uerò potes habere, quàm similitudinem uerarum formarum. Quidquid enim comprehenditur, aut ipsum comprehenditur, aut similitudo eius: aliud nō superest. Quemadmodum autem imaginatione refertur imago ueræ rei, sic ex imagine colligitur similitudo formæ, quæ est ueræ rei. Miror autem, quod ais posse te: penitus abstrahere formas à materia, quod naturâ prorsus fieri non potest: indulgesq; ipse tibi priuilegium, forsan quia uidere formam huius assequi seorsum ab ipso. Sed ego intelligo, aliud esse huius sensibilis sensibilem formam, aliud huius materiam: quæ quidē materia sua ratione non minùs eadē est omnium congenerium, quàm forma. Cur igitur non facimus paria de materia, & eam abstrahere dicamus à formis? nam planè optimè procedat res, & secundum ueritatē. Sed, me iudice, frustrà conamur etiam intelligentiâ facere uim naturæ, hoc est à materia auellere penitus formas: dum enim nos materiam quasi excludere & abigere conamur, illa contrà quasi alligat formas materiæ, nec seorsum esse sinit, quando nec esse seorsum queunt: loquor de naturalibus.

bus. itaque usque refert totum formatum. Neque tu abhorres: hominem enim intelligens, non formam hominis tantum intelligis, substantiam illam adhuc incompertam secundum tuas traditiones, sed totum, tum quæ materiæ, tum quæ formæ, quæcumque erit. At intuo teorsum, inquires, formam. Seorsum attendere uideris, sed non seiunctam à materia, uerum in ea, & cum ea. Inseparabiles enim cum sint à materia ueræ rerum formæ, te quoque magistro, & extra materiam sint nullæ: qui etiam similitudinariè eas legēs penitus à materia abstrahere conetur, in nihilum eo modo redigere conetur, & sic uerè nihil percipiat. Quod tibi in primis ponendum, cui formæ sunt quasi in terminis, aut uerius (ut ego interpretor) quasi termini: qui enim etiam intellectu penitus remoueatur terminus ab eo, cuius est terminus? aut id à suo termino? Verum termini (nisi fallor) priuatione præcipuè intelligi uidentur: quippè quia linea (exempli causa) non procedat ulterius: forsan sic etiam istas tuas formas comprehendimus, scilicet absentiâ alterius; interea tamen ipsarum nihil comprehendimus. Substantiales certè, consensu omnium tuorum, ferè omnes adhuc latent: tu igitur abstrahis, quod non nosti, & intelligentia comprehendis, quod quid sit & quale, omnino nescias. Sed ipse etiam sensus, teste te, percipit formas sensibilibus sine materia: neque prodest dicere, ut sentiamus, oportere obiectum habeamus hoc materiatum, unde ueniat sensibile: nam etiam ut intelligamus, oportet habeamus obiectam hanc imaginem, referentem materiatum. Causa porro uniuersalium facillima sublata est, te etiam, & tuis omnibus opitulantibus: non sunt enim talia uobis in ueris rebus, sed in abstracto, nescio ubi. Verum si in ueris rebus non sunt talia, neque alibi usquam erunt: omnis enim similitudo consentire debet cum eo, cuius est similitudo: non enim licet aliter fingere de rebus, quam uerè eæ actu sint in natura: cum igitur uerè nusquam sit, quod actu contineat omnia consimilia, neque animo concipi potest. Id de omnibus rerum formis est uerum, sed multò de substantialibus uerius, quæ ut ipse uulgo modo plures agantur in unam, dum sunt plures, prorsus est impossibile. Sed erroris, atque adeo fallaciæ, causa uidetur fuisse ignorata ratio formarum, incertitudoque, quid intelligeretur per formam: indeque effectum, ut incertè, & in-

& inconstanter, atque etiam fallaciter pronunciaretur de ea. Nam ferè ubi per formam altera rerum substantia accipienda erat, non substantia est posita, sed essentia, nempe (ut nunc interpretandum est) ratio essendi, qua sunt res: quæ quidem est in eo, quòd sint, & modo, quo sunt, tùm in alijs, tùm in primis in termino, quo, & forma motus, qua constitit natura. Minimè uerò substantia umquàm est, sed semper accidens, & circumstantia quædam: & talis circumstantia, quæ quia est etiam accidentium quorumcunque, posteriorque omnibus, digna est, distinctionis causa, ut rei nomine non afficiatur. Sed quidquid ea quoque est, & in quocumque consistat, non erat, cur propter illam fingerentur uniuersalia: ea enim etiam est non una omnium consimilium, sed eadem, hoc est consimilis. Quemadmodum enim res congeneres non sunt una omnes, sed consimiles: sic quidquid habent, quidquid eis accidit, non potest esse unum omnium, sed consimile: accidentia. n. & posteriora, semper sequuntur conditionem substantiarum, & priorum. Cumque omnia accidentia sequantur, multò magis sequitur hoc, quod est accidens etiam cuiusuis accidentis, & cuiusque rei quasi terminus, non in quo, tamquam separabili, desuerit, sed quo, ut inseparabiliter hærenti, & semper sequenti: qui tantum in rebus rerum beneficio sit, alibi per se ullo modo nusquam. Quod inde patere potest, quòd in omni genere, omnium congenerium est eadem, sed non ita, ut ipsius scetæ in partes singula eorum habeant partem, aut uerò singula quidem totam, sed aliud post aliud, ut ijs, quæ communia dicuntur & uerè sunt, uidetur fieri: sed eodem tempore tota integra est omnium. Duobus autem temporibus uideri potest ratio una omnium, quæ tamen in unum recidunt: uel cum uolumus conferre rationem huius generis cum ea, quæ est alterius, uel cum simul semelque de omnibus congeneribus statuimus: Homo, non bestia: homo est risibile. Sed uide quanta sit uis ueritatis: quia in natura non sunt alia, quàm singularia, parte materiæ, parteque formantis naturæ contenta singula: & quæcumque eis possunt accidere, sequuntur conditionem eorum: tunc etiam, cum ea agimus, uerè non habemus animo aliud, ac singularem aliquam singularis alicuius similitudinem, qua quasi specimine utamur pro cæteris

cæteris consimilibus, uel quæ sit in specimen, exemplumque consimilium. Nam, quia ubi cōsimilia intuemur, neque facie, neque alia aliqua ratione trahi subinde uidemur in diuersum, sed quasi eodem termino, eodemque modo detineri: propterea ad consimilium omnium cōprehensionem satis esse putamus unum eorum, uniusue similitudinem. Singulare autem esse illud, quidquid est, sit indicio, quòd intelligentes semper habere uidemur animo imaginem alicuius singularis noti nobis: cuius comprehensa ratione, utimur deinde pro exemplo. Itaque si exemplum continet ea, quorum est exemplum: id, quod intelligentes habemus in animo, uniuersale erit. Verba non attendo, res ipsas quæro: sed tamen neque loquendo aliter res procedit. Cùm enim dicimus, Omnis homo est risibile, non magis, omnes in unum acti, dicimus, quàm, quisque per se: nec magis coactus in unum ea est nota, quàm distributionis. Verumtamen cùm quasi terminus rerum sit ratio, uti diximus, iniquum est, ad eam referre ipsas res, constituereque eam uniuersale quid, continens illas: ipsa enim potius referri debet ad res, quæ illas sequitur, quæque habetur ab illis, non habet. Nec uerò rationem continere rationem facile dicere potest Aristoteles: id enim si sit, forsan diuisibiles sint termini. Sed ea exempla, quæ modò ad consimilium cognitionem facere dicebam, sensus quoque habere posse uidetur: planè enim semel deprehenso aliquo tali, eiusque qualitate memoriæ mandata, omnia deinceps, quæ deprehenderit talia, contulerit ad rationem prioris: simileque sentiens, simile statuerit. Dubitare adhuc fortassè contigerit, quia intelligentia uidemur assequi ea, ad quæ nullus existimatur posse penetrare sensus: & quia etiam ipsas sensibiles formas intelligendo penitiùs assequi, interiusque habere, & longiorem rationum seriem conferre, atque concludere posse uidemur. Sed minimè errandum est ijs de causis. Quæ enim intelligentia assequi uidemur, sensu non, aut non assequimur aliter, ac uidendo esse quid, quod uidere ullo modo nequeamus, fuerimusque fortè de eo suspicati per effectum aliquem sensibus demonstratum: aut assequimur ficta similitudine eorum, quæ sensu percepta sunt. quòd etiam ipse Aristoteles agnouisse uidetur, ubi inquit, nihil esse in intellectu, quod

prius non fuerit in sensu. Formas autem sensibiles minimè omnium penitiùs assequimur intelligentia, quàm sensu: quí enim meliùs assequamur similitudinem, quàm ipsam rem? umbram uero? Habemus quidem interiùs, quia tunc nō trahimur foras uersus, sed intra habemus, quidquid contuemur: & ab imaginibus animo conceptis tangimur, non à ueris rebus. Quæ imagines quia leuiùs mouent, debiliusque conuertunt ad se, propterea expeditior est ad motum, attentionēque spiritus, pluraque per eas breui tempore lustrare, concludereque ualet. Sic non satis ualidæ fuere causæ, quibus in duas partes, tantopere diuersas, secta est anima. Sed iam ad caloris causam separato capite, si libet, transeamus.

Calorem animale, & spiritum, si habeat potentiam, uirtutemque anima, esse ipsam animam, itaque non semel Aristoteli uisum. Eum calorem Aristoteli non posse alium esse, quàm elementarem, & esse omninò elementarem. Calorem Solis & ignis animalia similiter gignere, & necare.

CAP. VII.



Calorem animale, ac spiritum pro eodem accipit Aristoteles. esto, liceat substantiam à natura constitutam appellare nomine naturæ, & hanc illius. Ait autem, omnem animæ siue uirtutem, siue potentiam, participare illum. Omnis uirtus, omnisque potentia naturalis substantiæ est, & à substantia: & ubi substantia non adest, esse, aut consistere non potest: At anima non est actu in semine Aristoteli: ergò nulla uirtus, potentiaque animæ. At adest (inquit) anima actu, quippè eius, qui emisit semen, unde illud habet uirtutem. Sed omnem uirtutem, quam accipit semen à genitore, aut habet accidentariè, ita ut amittere possit sine ullo sui detrimento, aut habet propriè: si habet accidentariè, separatum citissimè amiserit: si propriè, iam ipsius ea haberi debet, eiusque ratio haberi, ut existentis in substantia, & à substantia seminis. Rursus igitur si in semine est uirtus animalis, eiusque propria est: anima in eo est, neque ullus motuum ei, unde profectum est semen, referendus est ampliùs. Sed non negauit, in semine esse

esse animam, Aristoteles: ait autem, potentia esse, non actu. At quid prodest? ea, quæ actu nō sunt, nullo modo possunt quidquam agere, efficereque, quod sit substantiarum actu: & quid magis sit substantiæ actu, quàm constituere & componere corpus uiuens, quæ eum calorem præstare ait? Ex uerbis autem Aristotelis colligi potest, non modò potentiam animæ uoluisse esse in eo spiritu, sed eum spiritum esse ipsam animæ substantiā. Quid est enim, uirtutem animæ participare illud corpus? nempe, habere illud, & esse in illo. Sed omnis uirtus à substantia est, uti diximus: neque alia ostendi in semine potest, cuius ea uirtus sit, præter spiritum: ergò spiritus ille est animæ substantia. Quod etiam ampliùs confirmatur ijs uerbis, quibus ait, omnia animæ plena esse quodam modo, quia humor in terra, spiritus in humore, calor animalis in uniuerso sit: & animalia consistere celeriter, cū calor ille comprehensus, siue exceptus est. anima nimirum, ijs in uolucris, unde iam ire nequeat. Tū ijs, quibus assēuerat, caliditatem illam constituere & componere corpora: quæ ipsius animæ sunt munera. Ex Peripateticis autē *Philoponus.* sunt, quibus calor ille & spiritus ipsa anima potentiā uideatur: si potentiā, ergò mox actu. Quòd si instrumentum animæ esse eum spiritum dicat adhuc, & quæ de eo dixit, ut de instrumento dixisse omnia: rogo, ut accipi dignus est, ubi inquit, omnia animæ plena esse, si uult instrumenti animæ? Sed si ita res habet naturā, ut ubi instrumentum est, mouens quoque statim adsit: aio: cū nullum, spiritum mouens, appareat; cur philosophus naturalis non statuatur, eum ipsum esse animam, eius naturæ, qua à se possit mouere? Nam quod dicitur, animam non posse esse sine corpore; inscientium est, ut demonstrabitur altero libro: & iam spiritus corpus est. Sed si perpetuò instrumentum est spiritus; quæro: in generatione eorum, quæ fiunt ex putri, ubi nōdum eorum quidquam formatum est, à quonam spiritus ille habet mouendi uim, & animæ uirtutem, atque potentiam? Cætera superiùs sunt obiecta. Non est autem in uno semine is calor, sed in totis corporibus animalium: non enim exoriuntur tantum eo, sed uiuunt etiam: nec uerò secus semen haberet illum; unde enim accepisset? Itaque calor seminalis ubi cor foetus constituit, generat etiam in eo calo-

2. de Cælo, te-
xtu 4.24.

rem animale. Quod quidem fieri à seminali calore dicere Aristoteles posset, qualitate nimirum, non à substantia seminis: quia calor promanat deinde de substantijs calidis quibusvis: & quæcunque attingit, agere, & efficere conari uidetur in illis: ea autem citius actionem, effectumque recipiunt, quæ iam magis parata sunt. Sed eum calorem, spiritumque ait esse magis diuinum, quam quæ elementa appellantur, & proportionem respondere stellarum elemento: quare quærendum etiam, ex elementisne, an de cælo, aut unde tandem ea res esse Aristoteli possit. Cælum ipsi quidem nullius qualitatis tangibilis, alterantisque, est particeps: at hic calor alterat uel usque ad molestem: de cælo igitur non est. Multo minus substantia de cælo uenire potest: quæ enim id fiat? aut unde reparentur ablata cæli partes? Hoc aio, quia Aristoteli calor animalis & spiritus pro eodem accipi solent. Luminis causa, qua calor à cælo fieret, à iunioribus Peripateticis allata est: Aristoteles tantum abfuit, ut cælum lumine diceret calefacere, ut lumen etiam à stellis aëre illarum latione contrito, fieri prædicaret. Restat igitur solus motus, quo calor hic à cælo excitari ipsi possit, quod quidem fieri persuadere conatus est: quippe cælo, & in primis stellis, unà secum supposita elementa commouentibus, etiamque conterentibus. Sed mitto, quod quæ conterere debent corpora, dura, & non cedentia debent esse, quale certe minimè est cælum, neque stellæ: quæ undique æquabiliter circulo mouentur, nec in supposita ullo modo adiguntur, numquam ea de statu, habituque turbarint, alienaque ulla qualitate affecterint per motum: & illa minus, quæ eodem motu consequuntur, ut etiam aër consequitur cælum, qui est supra montium uertices; quem quidem uirapi dicere, ut Peripatetici dicunt, natura non finit. Videtur autem superuacaneum, atque adeo intempestiuum, obijcere talia: Sol enim, & cæteræ stellæ, à quibus maximè excitatur calor, longissimè absunt à sublunariis: quæ igitur impossibile est moueant, nisi descendant prius, usque dum attingant. At esto, fac cælum eo modo excitare calorem: quando ea qualitas elementi calidi contritione, inter elementa excitatur, & alterat, ut elementaris, elementaris ponenda est: quemadmodum calor, quem nos ipsi aërem sed du-

ritur

riter conterendo excitamus. Nec uerò omne, quod ab efficiente fit, denominari ab eo debet denominatione, quæ quid de eius substantia, aut substantiæ inhærens, referat, quando ob rem impediri postea rerum imperiti possint: nam nec rectè dicas humanum calorem eum, quem nos quoque excitamus conterentes aërem; sed elementarem: quemadmodum eum, qui cœlo conterente fit Aristoteli. quem quidem etiam elementarem esse, uel eo argumento conuinci potest, quod non modò alterat res, ut elementaris, sed sæpè flammæ inde existunt, ut nobis etiam aërem duriter conterentibus. Quod si ipsæ flammæ cœli contritione excitantur; sequitur, ut lenis calor, qui uidetur ab eodem fieri, differat à flammeo tantum ratione magis & minùs, prout calori intensio, remissioque accidunt. De nostro quoque igne procul calorẽ excipimus lenem, & per intermedia multò leniorem. Eiusdẽ autẽ rationis cum elemẽtari existimare se illum, Aristoteles declarauit, cum inter modos, quibus cœlum hîc calorẽ excitare ipsi uideretur, recensuit detrusionem (ut sic loquar) partium ignei elementi: nec propterea monuit, diuersum esse eum, qui aëris cõtritione fieret à cœlo: facturus, si ita existimasset. Animalem autem calorem Aristoteles, opinor, numquàm habuit alijs rationis ab elementari: sed ait, esse illum magis diuinum, quàm quæ appellantur elementa, scilicet quia mistum, temperatumque quid iam esset: nobilius igitur elementis, atque adeò diuinius, nam longè nobiliora simplicibus sunt mista secundum ipsius opinionem, & simplicia gratia mistorum. Non autem esse ignẽ, neque originem ducere ab igne; nempè simplici: aut uerò non ignem præualere in ea substantia, sed aërem. Proportionem respondere stellarum elemento, quia sicut calor, qui à cœlo fit, animalia generare uideatur. Quod si nullo modo elementarẽ esse animalium Calorem uelit aristoteles: quintam qualitatem, atque adeò quintam substantiam elementi afferat oportet in constitutione corporum uiuentium; quod nusquàm ab ipso traditum est, nec uerò fieri iuxta ipsius placita potuit. Elementarẽ autem esse calorem animalium, extra alterationẽ, doceat eius consumptio: uorat enim, ut elementaris, licet lentè: & ut à frigore necatur, sic à calore elemẽtari moderatè excepto fouetur,

1. Meteor. ca. 4.
Summa prima.

& uiuificatur: fierique haud potest, ut quidquā propriè ab alio foueatur, ac ab amico atque cognato. Quod autem Aristoteles pronunciauit, calorem Solis & animalium generare animalia, ignis non; palàm, uel ipsius etiam testimonio, falsum est. Nam in Cyprijs fornacibus, ignibus medijs, enasci bestiolas quasdam ipse met tulit: & muscæ in aqua enectæ iam, si calido cinere (cuius calor ab igne inditus igneus censerì debet) super-tegantur, reuiuiscant. Oua quoque quotidie ad ignis calorem excluduntur, qui quidem calor omninò ibi præstat eam uicem, quam solaris in generatione animalium quorumcumque. Rursus calor solaris, si nimius sit, tenella animalia, tenerasque plantas necet, nisi caueant, & defendantur. Nec uerò, quia uel igneus spiritus uiuere non possit: sed quia de corporibus teneris, & nimium adhuc adaper-tis, ille ui extrahit spiritum, humoremque, reliquiasque torret. Vt statui possit, calorem lenem omnem, undecumque sit, constituere uiuentia: iniustum contrà, undecumque ueniat, eadem dare neci, si spiritus uel amem tenerum, & molle habeant: atque in hac etiam ratione, ipsa experientia, ipsaque rerum ueritate attestante, Aristoteles conuincatur.

Galenum imprudenter posuisse in corpore animalis duo calida diuersa, utraque agentia & efficiencia: peruersè & inconstanter de ijs loquutum. Animam non posse esse temperamentum, neque quidquam bruti & inertis corporis. In causa calidi natiui, seu spiritus, habere Galenum difficultates inexplicabiles. Definiri autè debere, qui spiritus sit anima. Et si spiritus non sit ea ipsa, non esse ostensum modum, quo illa utatur eo & calore, ut organis. Non debuisse uideri causa formatrix esse alia ab anima: neque ipsam animam non efformasse sibi corpus. Non rectè constituisse Galenū tria principia separata in animali diuersarum facultatum: neque earum facultatum illa esse principia, neque esse omninò principia. Neque spiritum animale a cerebro gigni, aut affirmari, neque à corde uitalem, neque à iecore naturalem: non liquere, qui uergerant facultates. Spiritum uitalem naturalem uideri, & animale: naturalem uitalem: animale uitalem. Non rectè abieciisse Galenum opinionem transmissionis spiritus animalis per omnes nervos.

CAP. IX.



Vne adsit Galenus, uir ille egregius, cuius ingenio, studijs, probitati puto inuidisse fata, quæ cum de natura hominis ueritatem celauerint. Tu, princeps medicorum alter, & ueri anxius scrutator, geminas calidi substantias, easque diuersas ponis in corpore animalis: Si cum Hippocrate tuo, ut de quolibet elemento portio sit in misto; superuacue fortasse facis: quæ enim paucioribus satis bene facere potest natura, ad ea plura non adhibuerit: Itaque cum calido opus habeat ad constitutionem animalis, calidum unum desumet: quid enim una causa duo? Aëreum itaque sumet: nam siccitatis causa, qua igne diceres esse opus, utetur terra, siccitas cuius, ratione elementari tradita à uobis, eadem atq; ignis est. Hanc certe rationem respexisse uidetur auctor trium librorum de Diæta, quisquis is fuerit, qui duo tantum elementa attulit ad hominis constitutionem. Sed tu (uti uideo) duplicem in animali compositionem diuersam discordemque facis; itaque duplicem ponis ab igne substantiam. Tibi enim natium calidum compositum quid est ex omnibus quatuor substantijs elementaribus, inter quas ea sit oportet, quæ ab igne manauit: si igitur alia ignea substantia insit seorsum ab illo, duæ planè fuerint in hoc corpore compositiones, quod nullus umquam dixit Hippocrates: qui sine dubio per calidum natium intellexit simplex id, quod in mitione totius ab aëre esset; uel id, & simul quod ab aqua foret: unius enim una cōpositio, & uobis una mistio, sit necesse est. Tu uerò si id fateare, hoc est, unicam esse huius corporis substantiæ mitionem; uereor uehemēter, ne imprudens disturbes temperamentum, mitionemque tanto studio elaboratam. Si enim modò superet calidum aëreum, modò igneum; manifestum est, pugnare illa inter se, & alterum usque agere in alterum: itaque nullam esse eorum mutuam temperationem. Mirum prætereà, quod ais: natium calidum minui effluendo, atque inde sicari corpus; igneum remanere longiùs, atque inde inolescere ætate consistente. Vtra enim aptior ad elabendum de terrestribus inuolucris substantia, tenuiorne,

nuiórne, an crassior? non est opus responso: tenuior enim planè. At utra tenuior, subtiliorque, quæ ex igneo elemento est, an quæ ex aëreo, atque aqueo? prior sine dubio. Quî igitur fit, ut citiùs calidum natiuum, quàm igneum, elabatur, atq; effluat? An uerò igneum libens sese abdit in terream substātiā, cum ea esse uolens, non perhorrescens frigus, neque impedimentum ad motū? Sed quæ alternatio est, quæ postea fit per senectam? per illam enim planè est calidum natiuum agens & opera faciens: igneus uix sentitur ullus, aut ualeat quidquam: contra quàm tua ratione deberet fieri. si enim per tot annos minui natiuus calor, augeri igneus perseuerat, sic perpetuò res procedere deberet: nihil. n., si sit rectè, uidetur cōsequi, cur mutetur. Sed hæc impedita satis, neque tibi forsan ipsi probata: est enim, ubi statuis, uerè parem esse calorem, qui in puero sentitur, ei, qui in iuvene: nempè (ut interpretari licet) eundem: quæ enim pares tibi sunt eiusdem speciei qualitates, eadem omninò sunt. Quod attinet ad naturam, nihil moror ea, quæ facta sunt extemperacione. Essentiam autem animæ (est enim de ea tecum uidendum) uir eximie, quî suspicari potes esse temperamentum? Audiuiſti antè, quæ sunt de temperamento disputata: sed non te exterret partium corporis dissimilitudo, atque diuersitas? quî fieri potest, tot, tam disparia temperamenta sint unum, totum sibi ipsi simile, ac simplex, qualis oportet sit anima, ut motus omnes agendi, & patiendi, & operandi, non tam communes sint omnium eius partium, quàm unius omninò eiusdemque, nulla ratione à se ipso differentis? Disparia uerò & dissimilia, & contraria omninò inter se cū sint partium corporis temperamenta, & singulæ partes ex diuersis consentiant substantijs, diuersorum adhuc temperamentorum: anima tibi admirabiliter sibi ipsi dissimilis, & contraria, sit necesse est. Memini haud dubiè legisse apud te, oportere ab unica ui gubernari animal, quando constet ex tot tamque dissidentibus particulis. Digna uerò Galeno uox, & quæ maximè ingenium tuum possit commendare: quando uerè est impossibile, ut quæ dissimilia naturā sunt, consentiant, nisi ab uno alio omnia quasi concilientur, uel (si id fieri nequeat) cogantur. Per eam uim tu quidem intelligis naturam, quæ sit aliud à temperamento sub-

stantiaque animalis: sed aliudne esse possit natura ab anima in animali, posterius uidebimus. Nunc aio: si anima regit corpus, non posse eam secum consentire, si tēperamentum sit essentia eius, ob causam expositā. Sed tute ipse reprehendis, nec semel, de tali suspicione, cum ais, in animi motibus, qui affectus uocantur, animam ipsam per se ipsam moueri: si enim temperamentum sit illa, quā sese moueat, quin totum corpus moueatur? Cum autem tradis nobis temperamentum cerebri, uel totam speciem constitutionis eius, rationalis tantum animæ principium tradis, non alterius, cuius operum rationalis nullā tibi uidetur habere cognitionē. Sed ubi cerebrāle quid adfers de anima rationali; uel caliditatem eius, uel speciem, uel proprietatem, uel facultatē, uel quouis tandem nomine afficias, quæ cerebri quid sit; respicere debes, quā probabiliter rem tam gnauam, tam impigram, tam, ut licet intelligere, sublimē, tam celeriter, tamque diū, uel per se, uel per instrumenta, cientes, exercentemque motus, affigas substantiæ inertī, stupidæque. Imaginatio manifestē cum sensu fit: at cerebrum stupet: nam (ut multi graues uiri experientes sunt testati) tactum, nihil uidebatur sentire: ergo in cerebro nō fit imaginatio. Tuum dictum est: memoriæ, recordationis, imaginationis, radicē & fontem esse sensum: at cerebrum non sentit, uel certē admodum stupidē. per se quidem, hoc est propriā substantiā, nullius est sensus, qui sit noster, ut probabo postea. In calido natiuo, siue spiritu, mistiōis tibi importunitas obest, & etiam dissimilitudo eius, quando is quoque non usquequaque sibi ipsi similis uidetur tibi: nec prōptum habes, unde adsit sensus: neq; umquā reddideris rationes, quibus tot, tantasque operetur operationes: neque alias solueris difficultates, quæ eam positionem excipiunt. Videtur autem mihi non unus spiritus, sed minimum duo, uenire apud te in deliberationem causæ animæ: quippē, natiuus, & is, qui continetur cerebri uētriculis, qui licet natiuus quoque sit, tamen alterius à reliquo rationis uidetur haberi à te, quando eo longē nobiliores operationes, atque adeò nobilissimas, obire uidetur animal. Sed de spiritu animali suspicio est, an sit anima rationalis: de cætero igitur, an sit naturalis, uel uegetalis, ut uelis nominare. Verumtamen de animali statuis

12. Meth. cap.

et alibi.

1. de Element.

cap. 3.

5. de Simp. med.

fac. cap. 9.

apertè non esse eum animæ substantiam, sed eius primarium instrumentum in cerebri corpore habitantis: quia (inquis) si is esset substantia animæ, fieri nullo modo posset, quin simul atq. esset euacuatus, continuò quoque interiret animal. Sed quid si qs neget, statim aperto uentriculo uacuari eū spiritū, indicetq; causam tibi quoq; esse cognitā? quia ad contactū tūm uulnerā

causs. sympt. cap. 2. ris ferri, tūm frigidi aëris, sese ille abdat intrò? Quid si contēdat satis esse ad uitæ instauratiōem, te fatente, nouam eius spiritus collectionem, & expediat, quæ remanent dubia? De cætero spiritu, calidōue natiuo, relinquis dubium: sed (ut sæpè de animali) aut ipsam essentiam uirtutum, animæque ipsius, esse ais, aut primarium eius instrumentum. Sed si animæ instrumentum spiritum omnem ponis, ostendendum tibi, quo modo eoutatur: quo modo incitet ad mouendum, eōue moueat: quo modo per animalem sentiat: spiritu ne ei communicante aliquo pacto motus, an ea ipsa spiritui uel propriæ essentiæ, uel uel aliquā allabente: qualis sit communicatio inter eam & spiritum, ut eius motus sui sint motus. non enim satis, tantum pronunciaſſe rem tam magnam, & tam secretā. Neque tantum in sentiendo, & quoquo modo mouendo, id præstandum tibi est: sed etiam in exercendis principibus functionibus. Quamuis enim ais, animale principium (quod in cerebri substantia locas) per se, & secum addere illas: & alibi inquis, cerebrum propterea molle factum esse, ut scilicet facile recipiat motus per sensoria uenientes: eos uidelicet ipsos, qui memoria retinentur, qui imaginatione repetuntur, de quibus, aut uerò ijs, quæ per eos repræsentantur, est ratiocinatio per intellectionem: quare uideri posses uelle, animam ad eas obeundas non habere opus spiritu animali: tamen etiam iuxta tua placita, opus eam habere oportet fateare, quando spiritus ille instrumentum sensus tibi est, sine quo nō est imaginatio, atque adeò quo sublato omnes ex operationes perierint: instrumentum etiam motus, per quem etiam imaginatio fieri mihi uidetur, & sit fortassè memoria. Cæterum, si aliud sit anima, aliud uis formatrix, quæcumque ea sit, & undecumque uenerit in seminis substantiā: planè illud consequitur, uidelicet, ut ferè passuum quid tantum sit anima sub hoc corpore. Non enim deseruisse animal

uideri

videri potest ea uis, quæ à principio constituit, formauitque corp⁹: sed sub ipso adhuc est, agitaturq; & procurat, exsequiturq; omnia, quæ sunt opus ad animalis conseruationem. itaque ubi uitium factum est aliquod, illa ipsa emendat, supplétue, modo, quo potest. quin format denuò assidue corpus, quandoquidē, illud continenter absumitur, & si tale consistere debet, continenter, eadēque ratione, iisdemq; motibus oportet reparetur. Si itaq; illa ea facit omnia, & aliud est ab anima; hæc non modò ipsa etiā sit opus alterius, sed neq; iam sui iuris, mancipijq; , sed sub alio, pendens usque ab alio: tantum habeat sensum & cognitionem, quæ est alterantium, & de statu aliquo modo mouentium: insuperque laboriose moueat: laboriosus .n. omnis uoluntarius dictus motus. Iniqua uerò res, & quam ne tu quidē approbare possis: qui aliquando serio agens, de tali causa sic inquis: *Cum in limo, colluue, paludibus, plantis, fructibus putrentibus animalia gignantur, quæ uires illius, qui sese condidit, ostendunt mirificas.* Illius qui sese condidit, inquis: declarans aperte, nō aliud uideri ab anima causam, quæ totam animal constituit, atque formauit. Dubius es tamen aliàs, an anima efformarit corpus, quia uegetalis non uideatur sapere, & scire rationes: & rationalis nescire partes, quæ inserviant suis appetitionibus. Sed ubi nunc sunt encomia naturæ, quæ passim canis? ubi admiratio prouidentiae eius & sapientiae? ubi nomen, quo eam appellas, Dei? Ignoratio rationalis animæ certè magna est causa, & quæ te iure habeat suspensum. quare ego nihil te incuso: sed in altero libro pro uiribus rem conabor euoluere: ingentes enim tenebræ, quibus ueritas hac in parte, ut alijs multis, obtegatur, sunt in causa, ut erres, non quia sit, sicut suspicaris. Vbi autem eandem ob causam duplicem nostram animam facis, hoc est ex duabus speciebus, partibusue constituis tam diuersis, ut neutra alterius rationes teneat: præter quàm quòd obijci tibi ea possunt, quæ Platoni, atque adeò Aristoteli obijciuntur: & unum plura diuersa erit, aut plura diuersa unum: totam Hippocraticam disciplinam conturbas. Si enim seorsum ab anima rationali fiunt opera alterius, & huius seorsum ab illa: ergò non est in animali consensus, & conspiratio illa ab Hippocrate animaduersa, & deinde tanto consensu à plurimis approbata, &

17. de Vsupar
cap. 1.

quæ omninò sit necesse est. De tribus autem principiis agendum est diligenter. Ac primum statuamus, quod ratio undecumque dicat: nēpè, omne, quod alijs uel substantiæ, uel qualitatis, uel operationis principium est, magis etiam ea habere, & posse oportere: nam quī fieri aliter possit? Cerebrum autem dicitur principium facultatis animalis, quæ quidem in primis existimatur esse sensus, & sensus tactus; nam per eū sensum in primis esse animalia putantur: tūc facultas mouēdi. Dictū autē est, demonstrante experientia, cerebrum non sentire tactum: & si non sentit tactum, neque alia sensibilia senserit: omnis enim sensus fundamētum, principiumque est sensus tactus. Si igitur sensu tactus caret, numquā sentiendi facultatem ullā cæteris partibus impartiri poterit. Nec dicere oportet, me assumere ut falsā ea, quæ manifestè uidemus uera, quādo palām percipimus odores & sonos sub caput; & impedita cum cerebro cōmunicatione, nerui omnes obstupeſcunt, & sensu priuantur: reddam enim postea rationem ueritatis expeditissimam, eaq; cum hoc, quod nunc contendo, consentiet. Quā autem sit aptum cerebrum ad motum, qui uoluntarius uocatur, ædendum in sua substantia, indicet consistentia, & figura. Neque est tam breue, ut dici possit, non apparere eius motum, tamquā cētri, super
31. de Decretis;
cap. ult. quod moueatur circumferentia. Quamquā tu asseueras aliquando, ipsū cerebrum moueri eo motu: quotiescumque uult ad aliquod membrum spiritum animale transmittere. nimirū, putando absurdum, non moueri principium eo motu, cuius alijs sit principium. Probè, & secundum naturam, hoc est, secundum ueritatem: sed inutiliter cerebro, si ei facultas tribui debet mouendi sese uoluntario dicto motu. Mitto enim, quod uerè nihil graue potest moueri à se: nullum graue, atque infirmum potest; uidelicet, quod non habeat, quo nitatur: ac tale est cerebrū. At motus actio est: & esto, actionē quampiā nō posse ædi sine organo: sed sensus hic notus passionis est, & fit cum passione: & omnis substantia uiuēs semper secum, & tota eam facultatem habeat oportet, sine ullo instrumento: non enim instrumēta sunt uitę principium & caussa, sed natura: quæ si sentiendi facultate careat, nullā sit talis, substantiaq; cuius ea est, non uixerit talem uitam. Sensu igitur non debebat carere.

cerebrum, aut uerò nō cedere eo nervis, si principium sit eius. Siue enim spiritus est sensus primarium instrumentum, isque in nervos transmittitur, aut uerò qualitas per illum; siue non; sed ui facultatis, quæ continuatione in nervos transit, existat sensus: ea re cerebrū, quod spiritum animalē intra se continet, quodque eo perfunditur, te teste, atque adeò principij ratione, 7. de Decretis, longè oportebat exsuperare. Cor perhibetur principiū facultatis uitalis, quæ planè est uiuendi, & tenorē animæ seruandi. cap. ultimo. Sed si quæram ex te, quæ sit facultas, qua uiuunt, & æuum agitant substantiæ, haud scio, an explicare queas. Hic autem uel substantiam, quæ uiuat, intelligis pro facultate; uel uim, qualitatemque, qua cōseruatur uita: utrumque enim tibi procedit, & fortassè Hippocrati. Si enim natiuum calidum, hoc est spiritus, est substantia uiuens in animali, ut Hippocrates uoluit, & aliquando de illius sententia tu: illud in corde & arterijs nanciscitur originem: Si non illud, sed solida ipsa uiuunt, quorum uel temperamentum, uel alia uis sit anima: calore à corde affluente temperamentum, uisque eorum cōseruatur tibi. Vtrumuis autem sit: Si caloris natiui principium est cordis substantia (ea enim est planè cor) cur de arteria uix egressa recipit ramum ad sui cōseruationem caloris? Est ne illud principium, quod id, cuius dicitur principium, accipiat foris, per se eo egeat? Neque in cerebro id sit, neque in iecore, neque in principio ullo fieri debet. At cur motu assiduo agitur cor, si proprio eius temperamento caloris natiui continens instauratio, multiplicatioque debetur? Pulsus quidem tibi redditæ aliæ causse, alienæ à uero: sed tamē inter cæteras, caussa gignēdi spiritus. Si itaq; motu ad id est opus: saltem non omnino cordis naturæ id acceptum referendum est. Natura quidem in principio, quod sui est quasi uniuersitas, à se, sua ui sufficit ad agendū, opusque constituendum, sine ullo laborioso motu. laboriosum autē esse naturæ nostræ etiam pulsus motum, norunt ij, qui eam penitus introspexerūt: omnis enim grauis molis agitatio laboriosa est nostræ naturæ. At tamē (dices) elaboratur spiritus in sinu cordis. Quid? sunt cavitates pars, aut qualitas, aut facultas corporis? Est quidem cor quasi focus agentis operantisque naturæ, ad quod ea satis fota est: tum instrumentum, quo utitur

De Format.
fœtuum.

6. de Vsu part.
cap. 10. & de
Vsu puls.

mouens, ut faber suis organis: at calidum natiuum ab alio fit, ut dicā suo loco, ne cogar bis de eadē re agere. At qua, te rogo, ratione iecur est principium naturalis facultatis? Omnia corpora, quæ uiuunt, tūm tota, tūm singulis partibus, de tua sententia, à se, propria ui, trahunt, concoquunt, retinent, expellūt: itaque adaugent se, suumque statum tuentur. Si igitur uitam habeant aliæ partes à iecore, habeant ab eo naturalem facultatem: si non illud, ergò neq; hoc. At habent, inquires: ab eo enim habent, ut uiuere possint uita plantæ. Sed si tu ostendas, iecur ipsum, ne dum cæteras partes, uiuere ullam uitam sine spiritu ab arterijs delato; uolo uiceris non in hac modò caussa, sed in omnibus. Si autem nullam uitam uiuere possunt, neque aliæ partes, neque iecur, sine ui ab arterijs accepta; ne, rogo, ijs des aliam per se uitam. Nec dicas mihi, rationem dictare, iecur gigni ante cor, proindeq; licere statuere eo modo. Primum enim nō demonstras: deinde, fac sit: non ab iecore auspiciantur prima orsa fœtificationis, sed à duabus uenis, totidemque arterijs: quod est argumentum euidentissimum, nullam uitā usquam in animali posse esse, sine uitali (ut tu uocas) ui. Nec rursus dicas, uenas solas posse aliquandiu tueri uiam partium: nam (inquā ego) & spiritus & calor uenarum plurimum ab arterijs transmittitur, te auctore, te prædicante: ipsarum tepidus est, ut tu inquis, & inefficax. Verè sanè: nam eam hercule ob caussam uenis uix iecur egressis copulantur arteriæ. Iecoris quidē materia uenis, quæ illa foris obsipantur, atque opplentur, affusa est ad caloris multiplicationem, ut in alijs uisceribus sanguineis: quo alimentum ibi satis confici, & ad opera efficienda præparari possit; non ob aliud. quare minimè naturæ, facultatisque ullius principium debet uideri, præcipuè partibus dissimilibus: quæ certè à ui aliunde, quàm à iecore accepta, ut sunt constitutæ, sic nunc habent uitam, ut postea demonstrabitur. Verumtamen præter dicta, ut mihi ista principia integrè probes, docendus à te sum, singula ea constare per se, à se ipsis sufficere, non quidē quo ad materiam, quæ subiicienda tantum uenit; sed quo ad uim uiuendi, tuendi se, agendi & operandi, quæ agunt, operanturque omnia: ea enim uerè sint principia: si id non facias, cōtendam principia non esse, sed pendere ab eo, quidquid tandem sit,

fit, à quo principium uitæ, uitamque, quam uiuere uidentur, sumunt. Rationes motuum, atque operationum, quæ ab ipsis incipere, diuersæque, uidentur, me non impediunt: reddam eas, expediāmque; spero omnia, quæ te, uir magne, impediunt, & intricarunt. Naturalem facultatem habent omnia ista principia: ea uerò non modò cum uitali coniuncta sit oportet, sed ab ea pendeat, ab ea omninò proficiscatur: uiuant enim prius oportet, deinde agant, & opera faciant. cur igitur naturalis non subijcitur uitali, ei que attribuitur, ut uiuenti substantiæ operationes? De facultate animali maius uideri posset dubium: sed non est. Ea in primis est sentiendi & mouendi. at ea sentiunt, & à se mouent, quæ uiuunt. cur igitur non etiam animalis facultas datur auctori uitæ? At tibi plures fortassè sunt uitæ auctores: indignè sanè, si id sentis, in eodē animali. Sed cor & iecur num sentiunt? planè oportet, nisi ut plantæ debent uiuere: (quamquam ipsæ etiam plantæ aliquando uidentur tibi habere sensum tum propriorum, tum alienorum:) arteriæ & uenæ tibi sepe sentiunt, licet aliquando contrà contendas. At si non sentiunt arteriæ, neque uenæ, quæ quidem quidquid habēt facultatis, tibi à corde & iecore habent: cur iuxta animi motus pulsus mutantur, & animali principio partes illæ subito obsequuntur? cur animo perturbato, malè procedit naturalis operatio etiam in ossibus? cur per timorem subitum sanguis fugit intrò, in lætitia foras effunditur? cur neruis iam conuellēdis, arteriæ nobis antè præferunt conuulsionē? Motus uenarū tibi est dispensandi alimentī, mihi etiā pulsatorius, sic enim uidi hisce oculis aliquādo in accessione febris per longum spatium temporis: at siue uterque, siue alter; cur non harum & arteriarum motus ab eadem sit natura, substantiaque, ob cuius affectus tam citò mutatur, & cuius obsequi uidetur motui, quæ quoque forsan uitæ totius principium est, & actionum, operationumque omnium? Cum autem uenæ & arteriæ sentiant; nec ipsæ tantum sed earum etiam principia: & sic necesse sit, uel si non appareat, ut ostendam postea: & earum omnium motus tam promptè sequi animalis principij uideatur motum: quid est, cur non ab animali principio ipsæ quoque pendere agnoscantur? Prohibet, inquis, quòd earum motus non uidentur pendere à uoluntate nostra.

Sed

De Substantia
facult. natura-
lum.16. de Vsu part.
ca. 2. de Inaqua-
li intemp. cap. 3.
lib 2. de Comp.
med. s. l. cap. 1.
Contrà 16 de
Vsu part. cap. 12.

De Format. fo-
tuum, cap. ult.
de Motu musc.
lib. 2. cap. 4. 5.

Sed ne quidem muscoli omnes uoluntaria motione agitantur, teste te: & sæpiissimè uolūtarias uocatas motiones ciemus, quas ciere nos prorsus nesciamus. Sed hac de re, antcà sum pollicitus, in sequenti libro. Motuum quoque, operumque diuersitas quæ ab ijs principiis separatim auspicari, ac deinde procedere, uidetur, turbat te, qui uidere nequeas, quì ab una eademque, & tota sibi consimili natura, & unum habēte principium, ea oriri possit: sed ne turbere; inueniemus rationem. Tibi intercà consensus facultatum, & principiorum conciliat omnia: sed uidēdum est etiam atque etiam, quo modo fieri possit, ut diuersa principia, substantiæque, dissimilium, diuersarumque facultatum inter se, conspirent in unum, consentiantque: repugnat enim ratio naturæ. Hippocratis quidem habetur illud: *Confluxio una, conspiratio una, omnibus omnia consentiunt*: Sed uide quid sequatur: *Iuxta totius corporis naturam omnia*. quæ quidem una, communis omnium, ad quam spectent omnia, sit necesse est. Tuque addis: *Nam nisi hoc esset, duo animalia esset, nec unum, quisque nostrum*. Qualicumque autem ratione posueris iam eatria principia, equidem miror, cùm cordis facultatem accipiendo animalia plantæ sortem tibi uiderentur superare, cur non sis miratus, cor non esse sensus principium. Mirabor adhuc aliud: quippè, cùm non cor, sed cerebrum, sensus principium tibi est compertum, quod idem intelligentiæ & ratiocinationis principium erat tibi, cur non solum animæ nostræ, sed omni sentienti, non dederis etiam facultatem intelligendi & ratiocinandi, si non tantam, quātam nos habemus, at tamen aliquam. Nam quæ aliquando in substantia naturā ac propriè simul esse cognita sunt, uiro prudenti semper simul esse existimandum est, etiam si ipsorum aliquod fortè aliàs non ità manifestè pdatur. Iam uerò agamus causam trium spirituum, ne res non leuis momenti sic prætereatur. Ij uerò tibi non omnes sunt certò, quod mihi satis esset ad exigendum: sed ut sint: nullo modo constituuntur ab ijs principiis, à quibus prodire dicuntur, & à quibus, si facultatum eorum uel instrumenta, uel uehicula sint, constitui deberent. Tu enim ipse ais de spiritu animali, illum qualitatis proprietatem ex sui ipsius coctione adeptum. Rectè sanè: quì enim naturā

aliquid

9. de Vsu part.
cap. 4. Et 7. de
Decretis.

aliquid generari, uel afformari ullo modo possit ab eo, quod sit
dissimillimum, ut est cerebrū spiritui? Quamquā aliqua spi-
ritus animalis copia per ipsum cerebri corpus contineatur: ta-
men paucior ea est, quā quæ calore suo spiritum in uentri-
culis continendum possit absolvere: estque tam confusa dissi-
milibus, ut uix possit tueri scire, & aliud facere, quā spiritū in
uentriculis. A corde autem nō effici uitalem, extra substantiæ
dissimilitudinem, quæ una satis posset esse; sit indicio quod
antè dicebamus: nempe, quod spiritus foris subit cordis sub-
stantiam ad eam uiuificandam. Nec oportet dicere; sub ea ui-
scera continentur spiritus, sub ea elaborantur: quid enim ipse
respōdeas, si dixerō, uasa efficere ea, quæ intra ipsa efficiuntur,
aut continentur? Iecur autē ullum constituere spiritum, ine-
ptum est dicere, quando neq; in uenis sanguis ipse satis confi-
ceretur, nisi spiritus & calor ab arterijs succederet. Sed si spiri-
tus sub iecur constituitur ullus, is tam crassus est tibi, ut penè
uapor sit; humor potius habendus, quā spiritus: quod eius
etiam nō calor magis, quā tepor, tibi ipsi possit comprobare.
Tantum quidem cū laboret natura in spiritu absoluendo,
quantum ostendam postea; indignum est, eius ullius confectio
iecori, uisceri tantum ad mediam usque coctionem ciborum
adapto, attribuat. Sed sub arterijs, quantum uideo, tuorum
spirituum, propè duo absolui uidentur, iudicio quoque tuo: ui-
talis & animalis. Censes enim, in cōplicatione ea arteriarū, quæ
dicitur retiformis, sub cerebri basi, exiguum abesse, quin spiritus
sit planè perfectus animalis: sicut in conuolutione, quæ dicitur
uariciformis, exiguum abest, quin perfectum item sit semen.
Consuetum quidem est apud naturam, cū alieni casus non
interueniunt, ubi ipsa quid semel comprehensum, habitumq;
loco, mutare aggreditur, eodem loci dare ei mutationem, quā-
tam maximam efficaciter & per tempus dare ibi potest, nec an-
tè transferre aliò: contingit enim interrumpi intentionē actio-
nis mutatione loci. In conuolutione autem ea, in qua fit semē,
manifestè uidere est semē, perducta demum ad eam rei formā
materia, quantum refertur specie, hoc est colore, qui tibi non
aliud, quā quod res, rei que natura est, indicare solet. Si tan-
tundem fiat spiritui, quem tu habes adhuc uitale, in retiformi,

iam ille planè sit animalis. Exiguum certè illud, quod tu dicis deesse, quodque postea alio in loco accedit per coctionem, tantum erit, ut per id nequaquam alia facta res possit apparere: & tibi omnium minimè, cui temperamētum, qualitas uidelicet, est natura corporis, substantiarumque omnium, quæ sunt in corpore: quæ quidem qualitas eadem intendi, remitti que possit; & paullo magis intensa, non modò in spiritu humano, sed quouis genere rei, non aliud, nisi differentiam perfectionis, ferre noui uideatur. At quæ ratio tua illud ferat? Tu quidem tamen apertè id, strenueque negas, asserisque, præparari tantum spiritum sub id textum (ut sic apellem) quò deinde faciliè fiat animalis sub cerebrum: interea uerò, quàm uis fiat proximus substantiâ animali per coctionem, tamen esse adhuc uitalem. quemadmodum de semine, negas esse semen, usque dum deueniat in testes, ibi tandem euasurum semen: non adhibens fidem ipsi sensui, præter morem tuum. Sed libet querere: spiritus cum exit de arterijs in cerebrum, statim, in instanti, fit animalis, an uerò cum tempore? si dixeris statim; mirabor tam subitam μεταμόρφωσιν: si cum tempore; erit interea spiritus adhuc uitalis in loco animalis, agitabitque mistus cum animali. Rete illo, quo est uisus detineri spiritus, captus tu es, imprudēs ibi satis. Namque (ut nunc sis sciens) uolo cognoscas, nequaquam fieri in eo illud, quod tu dicis. Cur? inquires. scilicet, quia neque detineretur ibi ullus spiritus per spatiū ullum tēporis, simul atque factus est, nec detineri omninò potest: ut non dicam hīc, non oportere, alia de causa. Audi enim, si uis. Spiritus ea est substantia, quæ cum facta est, statim contendat exire de angustijs, suo impetu incita foras, sicut leuia & mobilia à se querunt liberum locū. Accedit autem sub arterias compulsio, quam contingit dari à materiæ mole, quæ assidue multa infertur, ac uehementer, celeriterque, ut dilatātur eæ, à corde in omnes, ut à corde in omnes fit dilatio: accedit etiam expressio, quæ necessariò fit rursus constrictis ijs uasis. nam ea quoque fiunt per motū arteriarū, non modò materia laboratur. Arteriæ uerò cōsimiliter paratæ, æquabiliterque contextæ per omnes tractus, ab omnibus partibus consimilem, hoc est æquè angustū, aut laxum, præbebunt ei exitum. Quare spiritus, ut æqualiter fieri ceptus, sic æqualiter factus

factus in omnibus partibus per arterias, dātibus ijs ubique exitum consimilem, pariter, eodem tempore exiuerit de omnibus : & planè per conuolutiones, & tortuosos ductus earum, nihilò fiet durius negocium exeundi, ut tu ipse potes aduertere : non enim prorsus, secundum ductum arteriarum, sed in latera, per medios earum uillos, quæritur exitus. Aliud oporteret esset, ut fieret illud : scilicet, ut tunicæ ibi essent usque crassiores & densiores, quàm fuerint in partibus præteritis : quod tamen esse numquàm demonstrāris. Nec dicas mihi, non uideri rationi cōgruum, spiritum adhuc crassum peruenire ad cerebrum : aut ; accidere tamen ut ille factus uitalis moretur etiam sub arterias, quæ ducunt sursum, quippè quia eā ferat iter eum tendentem sursum uersus, ut iam leuem substantiam. Primum enim ex nullis arterijs ita it crassus, ut tu putas : à nullis. n. datur exitus prius, quàm sit satis tenuatus, usque adeò, ut sit facilè penetrabilis. Deinde, per arterias semper celeriter, & cū impetu agitur materia, à corde ad usq; extremas : ut neq; liceat illi ascēdere lēto, & errabūdo, ut tu inquis. Præter alia aut absurda, & multa, quæ prætereo, nōne uidetur absurdissimū, spiritū, qui est exiturus in cerebrū, fieri prius inferius, & post factū ascendere superius ? Eēcur igitur infertur materia spiritus, hoc est sanguis, etiam extremis cerebri arterijs ? Si dixisses, ipsum sanguinem morari in transcundo complicationem retiformem, & inter eā ēre magis magisque laborari, atque tenuari, fortassè toleraremus. Nam texta arteriarum, conuolutionesque (ut nō taceam quid mihi uideatur de ijs) ubi ubi sunt, propterea paratæ sunt : scilicet, quò in breui spatio maior spiritus copia emitti possit ; quod non posset haberi arterijs rectà traductis : uel quia colligi ibi maiorem spiritus copiam oporteat ; uel ad potenter domādam & consumendam multam magnamque uim alienorum insolentiorum, quæ ibi fortè colligantur, ut tu aliàs nosti ; uel ad difficile omninò aliquod conficiendum. Quare, in basi cerebri est textum propter multitudinē frigidorum, quæ per illud aceruantur, ac talia, quæ citò intendere actionem queant, uel opprimere decidendo. Venis, sub quas sit semen, sunt conuolutæ arteriæ, quia per non longum omninò spatium efficiendum erat semen, quod non ita facile est factu : sicut quò cibi

difficiliores pareretur, copiosius igne opus est; Sed his missis (cupio. n. i. a. peruenire ad finem) esto, do, si cupis: fiat isti spiritus omnes ab ijs uisceribus, sicut tu uis, quod tamen nunquam erit uerum: ostendatur, quo modo sint instrumenta gerendarum facultatum. Si caloris essent facultates omnes, facile foret negocium: at non sunt eius nudi omnes in omnibus. Si igitur alius rei: uel quo modo dentur illae spiritibus, uel quo modo ij habeant, & gerant, numquam ostenderis. quamquam qui ostendas, qui essentiam facultatum te nescire fateare? Sed cerebro, de tua sententia, ne quidem sit opus spiritu ad facultatis transmissionem. si enim qualitas est id, quod transmittit per nervos: cui usui ad eam rem spiritus animalis? nam ea hercule multo aptius, multoque forsitan facilius a cerebro ipso per substantiae cum nervis continuationem & similitudinem transmittetur. Spiritus autem naturalis tibi uel auctor est naturalis facultatis, uel quasi uehiculum: utrumuis sit, praestat omnino, ut partes peragant omnia munia naturalia, quae plane sunt satis ad tuendam substantiam, atque uitam: cur ergo non uitalis quoque is sit spiritus? Sed si spiritu quoque uitali opus habent partes tum ad uitae, substantiaeque conseruationem, tuitionemque, tum ad munia peragenda; a se enim, uel influente spiritu naturali, deficerent breui: sic enim est plane: & tu ipse saepe ais, calorem natuum partium uitalis facultatis continenter influentis beneficio conseruari, & eas insuper perficere actiones suas: cur non semel, uitalem ipsum etiam naturalem esse, statuitur, ut a te etiam ipso aliquando statutum aperte est, si tuus liber est, & dictum saepe loquendo? Quidquid enim natura ab alio conseruatur, a simili, parique conseruatur: & quod a se deficit, nihilque potest, & perit, nisi ab alio non pabulum, sed uim uitalem, auctoremque uitae capiat; id ab eo principium uitae, & uim, qua uiuit, omnem, uitamque ipsam accipere, statuendum est. Id autem cum cerebrum quoque habeat a spiritu uitali, uereor, ne praeter tuam spem neque actiones, neque uita cerebri a suo ipsius principio sint, sed spiritus uitalis continenter subeuntis, & cum subierit, inexistens. Tum si spiritus uitalis uitae est auctor, qua quidem plane sentimus atque mouemur: cur non idem quoque sit animalis? Tu saepe inquis, arterias pulsare ad spiritus animalis

Introducet. seu
Medico.

generationem: cur tantum ad eius, qui cerebri cellis continetur, non etiam ad eius, qui in cæteris corporis partibus? Animal autem spiritu pereunte, perit sensus & motus, uita nimirum ipsa: cur igitur idem non sit uitalis? Non potuisti autem inducere in animum, neruos omnes deferre spiritum animale, quia in musculis, eorum fibræ nimium exiles uiderentur. Quid? nonne partibiles eæ sunt etiam per longitudinem? non concipiunt humorem? si humorem, quanto magis spiritum, rem ætheream? An non in angustius multo cogi possunt nerui, & fibræ eorum singulæ? planè possunt, ut uidere est, cum exsiccantur: ergo habent cavitates. Neque negare id nos debemus, quia oculis non uidemus meatus: iniurium id est in naturam: quasi uerò non possit ea talem efficere substantiã, quæ ut ipsa fugiat uisum, sic etiam locus, quæ meat. Hebetes sunt sensus hi, & tantum grandes differentias possunt dignoscere. Sed si non à cerebro mittuntur spiritus in alias partes corporis, ergo neque ab alijs principijs: principiorum enim, quæ aliorum sunt principia, similis ratio est, si simili ratione principia ponuntur, uti hæc. Non animaduertis autem, quæ difficultates excipiunt causam qualitatis. Primum (quia uteris similitudine Solis, lumen per aëra mittentis) aio, imparem esse similitudinem: Solis enim lumen admittit aër purus, pellucidus: nerui uerò tam crassi, tamque opaci sunt: & crassities, opacitasque uehementer obstant qualitatum transmissioni: & quidquid sit illa transitura, oportet neruis tam promptè recipiatur, ut quo tempore uoluntas uelit, eodem moueatur extremus pedis digitus. Tum qualitatum, quæ agere & facere opus posse uidentur, unus tantum uidetur modus mouendi loco aliena, quæ correpta habent, unusque mos: rapere ad principium, unde ipsæ manant: at qualitas delata per neruos non cerebrum uersus tantum mouet: sed est, ubi planè in aliud centrum, ut in uillis circularibus intestinorum, aut (si eos neges ab illa moueri) sphyncterum. Deinde semper illæ mouent, aut conantur mouere, nec cessant omnino umquam: ista uerò tua sub neruos & musculos sæpè, & multum otiosi apparet. Quamuis tibi non aliàs est sub illos, nisi cum est uoluntas: quæso te, quid impedit, ne semper mittatur? Sol semper mittit suum lumen: & per Iouem,

per se quidem, nullo tempore temperare posse videntur substantiæ ab emissionem qualitatum suarum, earum, quæ extramittuntur. Non oportet obijcere iterum, absurdum esse, non abundare cerebrum ea qualitate, quam impartiat alijs; sed deprehendi brutum, nedum immotum. Verumtamen proferatur, quæ nam ea sit qualitas: dum enim lateat, nulla eius haberi ratio possit. Sed tu certè uir bonus, atque adeò optimus, qui scèpe ea, quæ nesciebas, ingenuè te nescire fatebare: quare
 sim inhumanus ac ferus, si in tantam probitatem
 sim iniustior: nec uerò meus in te amor,
 studiumque patiatur.

PRIMI LIBRI FINIS.

LIBER SECVNDVS.

P R A E F A T I O.



IRARI satis non possum, *REX* magnanime, multos, qui opinionis errore hoc tempore accusant philosophiam, quòd detinens hominem causis naturalibus, auocet à cultu *DEI*. Qui quidem si quid dicant respicerent, & rem recta ratione cognoscerent, profectò iustiores essent erga philosophos, & magis etiam pie in *DEVM* loquerentur. Nunc enim dum pijsissimi, & religiosissimi uideri uolunt, iniurijs sunt erga immerentes, & contumelijs ipsum etiam afficiunt *DEVM*. *DEVS* enim ipse à principio hunc mūdum, naturamque creauit, & scimus quam ob causam: scilicet ut se ipse manifestaret: cumque propterea creauit, tum ea forma, dispositioneque posuit, quam mirari satis non possumus: tum facta deinde non cessare, & nihil agentia, facientiaque uoluit esse
 sed

sed usq; ea fieri ab ijs, & in ijs iussit, quæ qui cognosceret, causâs
 que, rationesque perspiceret, nō posset non colere, & omnibus
 afficere laudibus auctore principem. Tunc enim substantiæ, mē-
 tisque præstantia elucet, cum eius uirtutes elucent: uirtutes au-
 tem operando, inque operibus ostenduntur. Quare qui negli-
 git naturam, planè negligit ea, quæ *DEVS* fecit ad sui patefa-
 ctionem: & qui improbat, improbat *DEI* consilium, atque fa-
 ctum: qui uerò se ab ea auertit, eamque detestatur, à *DEO* ipso
 cognoscendo auertit se, *DEVM* que detestatur. Quid enim
 non sit ita, si à *DEO* creata est illa, & ob causam, quæ prædicta
 est? Atque his criminibus satis imprudenter, inscienterque al-
 ligant ipsi se isti, qui studiosos naturæ, naturaliumque indaga-
 tores rationum calumniantur. Non sic patres illi ecclesiæ uete-
 ris, ut pij, sic docti: amabant enim philosophiam, colebantque,
 & probabant philosophos, qui uidebantur optimi, sequeban-
 turque etiam opiniones eorum in causis grauissimis: ut Basi-
 lius Magnus, Athanasius, Methodius, & quotquot secunda sy-
 nodo Nicæna conuenere patres, Platonem de substantia ani-
 mæ sequuti sunt, recipiētes, esse eā corporeā, sicut philosophus
 ille statuerat; & esse igneam, aut aëream. naturam autem habe-
 bant *DEI* uel filiam, uel famulam: aliqui etiam manum ipsius
DEI. existimabantque, naturalia hæc esse ueluti scalas perueni-
 endi ad *DEVM* cognoscendum: aliqui etiam, & ij optimi, sta-
 tuebant hunc mundum esse quasi speculum quoddam, quod
 referret imaginem *DEI*. Verè, & rectè, & sapienter. Quia enim
 natura in omnibus *DEO* obsequitur, & usq; quæ *DEVS* uult,
 rationeque, quam ille instituit, & uult, facit: iure optimo uel fi-
 lia, uel famula, uel manus etiam *DEI* uideri debet. Cumque
 hic mundus forma, mensura, ordine, arte, prouidentia sit factus
 undecumque admirabili, atque stupenda: meritò censeretur de-
 bet opus, quod facie sua referat informabilem & incomprehen-
 sibilem opificem: aut uerò ueluti scalæ, quæ ducant ad *DEI*,
 qualiscumque tandem haberi hîc potest, cognitionem. Exclu-
 sus enim animus noster cœlo per aliquod tempus, obuolutus-
 que corpore hoc graui, bruto, atq; inertî, tollere sese in altum,
 aciemque suam sine obstaculo intendere non potest: itaque si
 hac conditione rerum suarum aueat tamen cognoscere aliquo
 modo

Actione 5.

modo rerum opificem ac dominum, non possit aliud, ac con-
 tueri & contemplari hæc, quæ ostenduntur, & ab eo facta sunt,
 quæque in dies, ut ille idem instituit, iubetque, fiunt: ut ex ope-
 rum excellentia, conijciat auctoris, opificisque excellentiam &
 diuinitatem. Simili quidem modo, quo ipsum animum, quem
 nec cernere oculis licet, nec tãgere manu, describimus ferè no-
 bis ex operibus, quæ facit hoc corpore, uel per huius corporis
 motus eum sub hoc facere deprehendimus. At *CHRISTVS*
 est quærendus, inquit, à quo si digrediare, nusquam sis inuen-
 turus salutē. Quis est tam amēs, uel tam impius, qui hoc audeat
 negare? Sed quid si quis *CHRISTVM* quærēs, interea etiam
 contempletur pulcherrima hæc opera *DEI*, ex quibus cogno-
 scat *DEI* potentiam, bonitatem, beneficētiã, aliasq; uirtutes, &
 monstrās etiã ea, quæ in his sint in usum hominū, cōmunemq;
 utilitatem, benè mcreatur de rep., accusandus is? dānandus? O
 iniustitiam non ferendā: neq; in nos solū, sed in se ipsos. q etia
 quidquid de *DEO* norūt hīc in terris, norunt ope horum, quæ
 creata sunt, quæq; ostenduntur sensibus. eorū enim, in quibus
 hæc deficiunt, ita ut ne similitudine quidem iuuare ualeant,
 non possunt ipsi habere aliud ac priuationem cognitionis: esse
 uidelicet talia, quæ hoc statu, hacque conditione rerum, nullo
 modo assequi detur. Illud enim uerum est: non potest natura
 assequi per se ea, que *DEVS* ipse reuelauit, præcepitque homi-
 nibus: ut, mundi principium & finem, mortuorum excitatio-
 nem, animorum æternitatem, & cætera, quæ fide christiana cō-
 prehendūtur: sed cū ea non assequitur, non negat, neq; pro-
 pterea se alienat à *DEO*: quī enim neget manus ea, quæ homo,
 cuius est, facit? aut quī aliena sit filia à patre, quæ ab eo digredi
 nec uult, nec potest? sed ostendit suam humilitatem & stupidi-
 tatem, propter quas ad tam sublimia, tamque secreta per se per-
 uenire non possit. Non est autem neque eam ob causam accu-
 sanda, atque damnanda: sed auditis suis rationibus, conandum
 attollere altiūs, quàm ipsa per se possit: si id fieri nequeat, com-
 monefacienda conditionis suæ, & relinquenda loco, quo est:
 intereaque alio modo ad sublimia contendendum, & diuina
 tenere conandum, quantū in hac uita, & hoc loco datur. Sed
 accusatores nostri ferè in omnibus causis ferunt æquo animo
 natu-

naturam uti suis rationibus, præter quàm in causâ animæ: non possunt pati, philosophum dicere, naturali ratione non posse probari animæ immortalitatem. Sed ò impietatem, pietatis prætextu uelatam. Si naturali ratione probari ea potest, cur fide iubemur sic tenere? cur est in symbolo Apostolorum, *CREDO VITAM AETERNAM*? Tollatur de symbolo ea pars: quid enim facit, si quod dicitur, patet naturali ratione? Matthia Apostole, tu stultus es, uel falsus, horum iudicio, qui humana pro diuinis præcipias nobis: stulti quoque, aut falsi ceteri, consortes tui, nunc cælestes diui ut tu, qui idem senserunt. Ad tales salebras, *REX* optime, taliaque absurda adigit homines ignorantia coniuncta cum arrogantia. Non sic uir solidè pius, atque cordatus: sed omnia circumspiciens, & recta ratione cognoscens, animo æquo & alto sic statuet: Christiano homini minime esse dubitandum de immortalitate, sed firmissimè eam tenendam: quæ quidem si non esset, ne uiuendum quidem homini esset: quo autem modo, & qua facultate eam nacturi simus, permittendum *DEO* immortalis humanis enim rationibus assequi nemo potest. Quod enim dici solet, etiã nonnullos philosophorum posuisse animæ immortalitatem, id nullum est: nullis enim rationibus probare illi attentarunt, quæ non refutentur nullo negocio: & id quidem asserentes non egerunt philosophum naturalem: nec uerò ipsi per se, duce hac sensibili ratione, primò animaduertunt: sed sine dubio primùm à theologis Hebræis ad philosophos cuiusuis gentis, qui id enunciaſſe ferantur, profecta ea uox est. Necesse autem est statuere, uti dixi: & in naturalibus agendum naturaliter: & in causâ æternitatis animæ, ut in cæteris, quæ sunt fidei, conseruanda fidei prærogatiua, quod uel in primis faciendum est christiano. Atque hoc potius facere debebant etiam isti accusatores philosophiæ, quàm pietatis prætextu tam iniuriosè tamque impiè agere. Sed de accusatione naturæ, studiū eius, satis sunt à *DEO* ipso refutati, & castigati, qui ipse illā creauit, & de inde in symbolum sui erga naturam amoris, & coniunctionis, uoluit filium suum naturam nostram assumere, adiungereque sibi. Nos autem, *REX* humanissime, istorum reprehensiones nihil curâtes, gaudebimus in sinu, æquo animo, contenti rectè

factorum, rectorumque sensuum conscientia ipsorum uoculis ab instituto non auocabimur. Quare philosophemur, & prosequamur tum aliàs alias præclara, tum nunc susceptum opus, subdamusque, quæ polliciti sumus. Superiore enim libro excussæ & confutatæ sunt sententiæ probatorum ueterum de natura hominis: reliquum est nunc, ego quid sentiam de ea re, dicam. Sed id dum paro, exteret me (ingenuè fateor) exemplum multorum, qui hac ætate dissidium fecerunt à ueteribus: qui quidem dum eos impugnarent, eorumque rationes refellerēt, uisi sunt nō admodum turpiter dare se, sed afferre rationes ferè recipiendas: ubi autem ipsi præcipere, & sua tradere inceperunt, *DEVM* immortalē: quàm impares, quàm inferiores se ostenderunt: ne quidem discipulis eorum, quos confutarāt, fuerunt conferendi. Sed non propterea ego cessabo, nec dene-gabo amicis, uiris magni, candidique iudicii, qui sæpè me ad eam prouinciam sunt adhortati. Eoque aggrediar alacrius, quòd (deos, hominesque cōtestor) nulla cupidine nouæ gloriæ noua molior, sed ut simpliciter proferā, tradamque, quæ magno labore inuenisse uideor. Quamquàm ne noua quidem prorsus ea sunt: nam uerò pauca comperientur meorum dictorum, quæ ueterum aliquis quoquo modo non uiderit, atq. retulerit: licet uel dubitanter diceret, uel rursus aliquando peruerteret, uel etiam deinde ea subderet, quæ non aptè quadrarent positis: quod erat signum, non explorata satis ratione protulisse ea, quæ protulerat. mihi autem id erit multum ad fugiendā nouitatis inuidiam. Fretus autem simplicitate animi mei, spero, tibi & alijs, uel quibus librum hunc communicare tibi uidebitur, uel qui eum, tamquàm tabulam ad templa decorum appensam, dicatamque spectarint, atque legerint, si me non laudatum, saltem meum simplicem conatum aliqua ex parte commendatum iri. Vnum quidem esset, quod posset mihi impedire tractationem: quippè, quia præmisisse oporteret aliqua principia, unde tota ea duceretur, quæ promere non licet hoc argumento: sed dabo operam, rem instituem, tractemque ijs rationibus, itaque compositis, quæ uel nulla probatione egeant, ut quæ pateant sensibus; uel tali, quam gnauum ingenium per se nullo negotio assequi ualeat. Iamque ipsam rem aggredi tempus est.

*Corpus humanum constare ex pluribus substantijs
inter se dissimilibus. CAP. I.*



Vi naturam corporum rectè, & sine errore cognoscere student, ij adhibere, & seruare solent talem regulam: nempe, ut simplicia considerent simpliciter, composita autem disgregent, cernantque seorsum simplicia: putant enim non rectè esse, iudicare de composito, sicut de simplici: & animaduenterunt, compositionē uehementer posse fallere nostros sensus. Eos nos, ut ueros, rectosque, sectabimur: & cognituri corpus humanum, rem mirum in modum compositam ex dissimilibus inter se, conabimur prius disgregare eius dissimilitudinem, ac deinde sic discretam intueri. Non est enim disgregatio corruptio unius cuius, ut existimarūt quidā etiā hac ætate: sed planè secretio eorum, quæ, cum singula apud se simplici, inter se uerò omnia dissimili natura essent, confusa tamen simul, consertaque erant, ita ut nobis unum quiddam aliud simul referre, simplexque possent. Non deficit hoc tempore aliquatenus idoneus modus segregandi, cum uolumus sumere laborem: at si ille non omnino sufficiet, usui fuerint rationes, quas ego quoque notauī alio quodam libro, nec nunc hīc adscribere oportet. Res enim breuiter sic habet: Sūt in hoc corpore partes magnopere crassæ, adhuc terrestres, quæ obsistant, si tangas: sunt non ita crassæ, sed humidæ, & liquidæ, quæ grauitèr inuadenti facilè cedant. sunt aliæ uapidæ, tenuiores liquidis, quæ etiam facilius cedere possint. deprehenduntur etiam adhuc uapidis tenuiores, quas dicemus habitus. (sic distinguere, & appellare commodum fuerit species substantiæ se à crassitie ad magnam tenuitatem consequentes.) Species autem hæc, sic comprehensim notatæ, non sunt singulæ in uno quasi gradu, ita ut omnes partes crassæ sint æquè coactæ, & solidæ; & sic liquidæ, & cæteræ: sed singulæ species multorum sunt ordinum, multorumque graduum: (ob exactiorem distinctionem faciemus ordines quosdam specierum, ac deinde etiā ordinem diuidemus in gradus:)& crassarū sunt magis & minus crassæ, usque dum sint, quæ liquori uide-

antur finitimæ: & liquidarum deinde minùs ac magis tenues, usque ad consistentiam uapidam: & sic deinde uapidæ & halituosæ, minoris, ac maioris tenuitatis ratione differentes. Fuerit quoque in corpore humano (dicendum est enim etiam nunc) spiritus, substantia nobis supra omnem halitum ponenda subtilis, atque leuis: ut par est esse sub compositionem crassiorum & tenuiorum, in qua diutiùs ualentior calor laboret, actionis cuius finis ultimus semper uidetur esse res magno opere tenuis, hoc est ipse spiritus. Sic consistentia, & nomine etiam iam, differentes res palàm in compositione corporis nostri deprehenduntur. Vnde autem sit tanta dissimilitudo, quærere nunc, uidebitur extra argumentum: sed si quæratur tamen, dicam breuiter. Est, quia suprema terræ, unde animantium materia desumitur, multò adhuc maiore constant dissimilitudine. nec quia quatuor prima elementa, ut putarunt multi, misceantur: sed quia hîc in medijs spatijs pugnant naturæ agêtes, uario Marte, uarioque successu: dumque illas uariè, ac diuersè affici, mutarique contingit, fit, ut materia quoque, quam illæ occupant, uarios, diuersosque contrahat habitus: ut aliàs, loco commodiore, exponetur.

Cuius naturæ sint substantiæ, ex quibus constat corpus hominis. CAP. II.



Ingulæ autem substantiæ species, singuliq; ordines, atq; gradus, ut consistentia differentes sunt, sic etiam alijs qualitatibus differentes erunt: fert enim discretæ & syncera ratio rerum, ut quæ uno differunt, alijs etiam differant, uidelicet, quæ propriè inhæreant, non quæ (ut sæpè accidit fieri in his medijs) ut externa adsint, aut adesse uideantur. Atqui si accidentibus differunt, uideantur etiam naturæ differant necesse est: id enim est perpetuum in rebus: nempè, ut iuxta rei naturam, sint cætera omnia, quæ sunt in re: itaque si alia illa erunt, rectè arguere licebit, aliam esse rei naturam. Cuius uerò naturæ sint substantiæ, quæ componunt corpus nostrum, hoc est, à qua incorporea ui sint tales, nullo negotio nos inueniemus. Non enim dubitamus, neque est omninò dubitandū, media

media omnia referenda esse ad prima, & ei primo subijcienda singula, cuius adhuc, utcumque mutatas, uidetur retinere conditiones: & ad eius naturam referendam esse singulorum naturam, qualiscumque iam sit tandem. Nunc igitur, cum est animaduersum, duo tantum esse prima corpora, alterum terram, alterum hoc tenue, quod per sublimem fertur locum, siue ætheris, siue aliis rei nomine uelimus appellare: quæ uidebuntur accedere ad terram, eius naturam retinere statuendum: quæ ad ætherem, ætheris naturam. Terra igitur est iners, crassa, opaca, & frigida: quæ igitur grauiora sunt, & crassa, lumen neque reddentia, neque transmittentia, frigida quoque natura erunt: & quæ magis grauiora, crassa, opaca, ea magis frigida. Aether mobilis, tenuis, quæ lucidus, quæ pellucidus, & natura calidus: quæ igitur mobilia, tenuia, pellucida, aut luminis aliquid participantia, calida quoque natura erunt: & quæ magis mobilia, tenuia, pellucida, participantia uel luminis, ea magis calida. Ut quid consistat ita in medio, ut ne ad alterutrum referri possit, est impossibile: tamen si quod nobis dubitationem afferet, inspicienda perspicuitas, aut (quod puto certius) experienda leuitas, aut utraque: eæ enim poterunt nos ducere ad naturæ rei inuentionem. Sapor super omnia potest prodere naturam rei, si liceat experiri; & gustatus syncerus haberi queat, & sinus boni cognoscendi ex sapore iudices. Fit enim in natura hoc modo: Prima corpora, dum alterum ab alterius uel mutatur, & in oppositum agitur, retinet tamen longum suam naturam utcumque mutatam, & à se ipsa aliam factam, usque ad extinctionem eius; & simul omnes suas conditiones: inde alienæ qualitates incipiunt apparere in materia, sed infimæ primò: tum per medias species accrescere uidentur, usque dum ex opposito rursus ad summum euaserint. itaque quod ad alterum iam accedere, idque quoquo modo attingere uidetur, ei, ad quod accedit, sine dubitatione attribuendum. Nec dubitare oportet, quia aliquando contra appareat, & crassa quædam sentiantur calida, & tenuia frigida: nam (ut dicebamus superiore libro) uel composita erunt dissimilia, uel modò ingressa incorporea uis aliena aderit: uerè autem res habuerit, uti exposui, & ita comperietur, si aliena secesserint. Antiquiorum multi media hæc mutatione quidem primorum, sed

magis mistione & præsentia contrariorum, decreuerunt exsistere: nos autem, quibus eo modo mistio nulla est, dicimus, media esse, quia prima, usque simpliciter secum habentia, descenderunt à summo ui deiecta contrarij, & minora, & alia omninò à se ipsis reddita. Ex talibus, & eius naturæ substantijs, compositum, constitumque est nostrum corpus. Qua quidem ratione statuenti tibi non erit uerendum, ne uel Empedoclis cōcors conuentus elementorum, alioqui immutabilium, sed in minutissima redactorum, ut refert Aristoteles, uel Epicuri atomorū concursus, aut Anaxagoræ homœomeria, aliaue eiusmodi ineptiæ obijciātur: ratione enim rectè, & discretè quæ sita arguente, approbanteq; sensu, palàm sic esse demonstratur.

Quia substantia natura inter se dissimiles semper inter se pugnarint, seq; inuicem turbarint, oportere, in corpore humano una aliqua superet, quæ pre-
mat, & corrigat alias.

CAP. III.



Porrò ulterius sic procedemus: Quæ inter se dissimili natura sunt, naturaliter quidem, contraria inter se sunt, uiribusque prædita, quibus se inter se infringere, & perdere omninò ualeant: & si committantur, dum sint, ferant uires contrà, oppugnentque se inter se, ut dixi etiam altero libro. Cum igitur compositio corporis nostri sit ex tot, & tam dissimilibus inter se: certè, quantum in ijs est, semper pugnabitur, & semper erit labor. Non enim tantum materia ea sunt, sed singula substantiæ compositæ, constantes natura, quæ agere possit. Tum impossibile est, ut quæ dissimili, impariue etiam inter se natura sint, similiter, paritérue operentur: (intellico nunc operari, mouere se, aliaue simul, loco, aut manere) nam eius rei quoque studium, & facultas est à natura, secundum eius speciem, atque gradum: estque immota lex, singula pro genere, proque gradu operentur, nec aliter, magisue, aut minus, nisi impediuntur. Quando igitur usque adeò dissimilia, impariæque sunt in hoc corpore, dissimilium, impariumque studiorum: quantum quidem sit in ijs, numquam fiat unum aliquid rectum,

rectum, uel certum: immota enim detinere conabuntur mobilia, & hæc illa agere, rapere: impariter mobilia se inter se conturbant, dum aliud alio agmine, & alia forsan uia conabitur mouere. Quis erit modus comprimendæ pugnae, & corrigendarum turbarum? Quoquò me uertam, is uidetur esse, nec prætereà alius: uidelicet, ut una aliqua substantia longè superet alias, & uiribus suis illas frangat, & quamuis reluctantes, trahat secum tamen, si mobilis sit ipsa. Nulla enim ratio fert aliter, nec ipsa natura aliter ferre potest. Ac una inquam superet, non duæ, uel tres: nihil enim minùs pugna & turbæ inter duas dissimiles fuerint, quàm inter plures, si utraque in alteram uires potenter, efficaciterque miserit. Ad eam igitur, quæ superat, inueniendam accingamur.

Qualis sit substantia, quæ superat & dominatur in corpore nostro. CAP. IIII.



Ed in tanta dissimilium compositorum turba uix puto eam secretò deprehendere liccre: & forsan ipsa per se fuerit talis, quæ facilè aciem oculorum, tactumque manuum, ut est cum compositis, ualeat effugere. Quare artificiosa uia insistendum, si ad eam cupimus peruenire. Breuis quidem, & expedita uia esset, indice eius incorporea ui, hoc est calore: eius enim esse calorem hunc nostrum, quem (rectè quidem) uocant animale, non est dubitandum, quando ea abeunte, perit omnis hic calor. Cumque sit compertum, calorem maiorem, uerè non cōsistere propriè, nisi in subiecto maiorem in modum renui: iure statuere uideremur, quæsitam substantiam esse calidam, tenuem, mobilem: leue enim etiam mobile. Placet autem magis, insistere alia uia forsan magis idonea, quæ talis est: Vbi in composito superat unum aliquid, consequens est, ut operatio, quæ fit in composito, uel omnis, uel certè ferè omnis, fiat iuxta ingenium superantis: sic quidem res fert, & ueteres etiam ipsi monuerunt. Nunc igitur motus, qui multis partibus corporis uidetur esse perpetuus, & comportatio materiæ huc & illuc per corpus omne, etiam perpetua, & is etiam motus, qui dicitur uoluntarius, cuius

ius exercendi uiuo homine perpetuò facultas est, oportet sint substantiæ superantis: si enim ea perpetuò superat, perpetuò etiam ex eius ingenio erit operatio. Grauiam uerò hæc, quæ sunt in corpore nostro, palàm immobilia sunt per se: mouentur enim subinde manifestè facta ui, nec semper: quod est indicium, ab alio, & cum labore moueri: & sub mortem remanent penitus inertia. Natura uerò sic habet: quippè, ut substantia nunquam facultate ex ingenio operandi deficiatur, dum sit ultimum, nec etiam unquam cesset ab operando, prout opus suæ conseruationis requirat. Substantia igitur superans erit auctor motus. Atqui si id est, ut est; iam tenemus eam: nihil enim æquè indicat, & manifestat latentes substantias, quàm operatio. Scio autem, motum contrarium esse immobilitati: dictatque ratio, quemadmodum motus est immobilitati contrarius, sic mobilem substantiam ab omnibus nominibus contrariam esse ei, quæ immota est. Agemus igitur hoc modo: considerantes conditiones huius crassi, quod est immotum, subinde transientes per collationem ad contraria, ex aduerso ponemus substantiæ propè perspectæ conditiones. Hoc graue est, ergò illa leuis erit: hoc non æquè quidem, sed crassum omninò omne: igitur illa tenuis. hoc opacum, lumen neque reddens, neque transmittens: illa igitur lucida, uel omninò pellucida. hoc immobile, loco per se immotum, semper sic mansurum, dum erit tale: illa igitur mobilis, per se semper mota, sicut natura per se à sua propria operatione cessare nequeunt substantiæ. hoc natura frigidum per se, ut apparet saltem sub mortem: illa igitur per se natura calida. Mobilem etiam eam à se esse, quando hoc est immotum, prædictum est: & iam motum eius sequimur, tamquam ducem ad eam. Sic breuiter erit substantia, quæ superat in compositione corporis humani. Si quæris simile, contemplare hoc purum, leue, & tenue, quod occupat sublimem locum, quod à ueteribus siue ab ardendo, ob calidam sui naturam, siue à perpetuo cursu, est æther uocatum: huic enim non modò assimilasse, sed tamquam suæ uniuersitati retulisse iure uidebere iam comprehensam substantiam: sicut contrariarum conditionum corpus terræ, uel terræ finitimum. Spiritum non incommodè uocaris, usitato iam nomine. Nam spiritus mihi,

& corporea omninò substantia, ea, quã querebamus, uisa est, & incorporea esse non posse, quia horum crassamentorum natura omninò non est ea, quæ est effectrix motus: itaque si illa in his sit, ut aliena omninò sit, & per accidens, ut loquuntur: sic enim sunt naturæ, ubi sunt ea cōditione. sed quæ ut alienæ sunt naturæ in corporibus, (quantum ostendūt eæ, quæ se mihi referunt cognoscendas,) durare in ijs non possunt, nisi alia consimilis foris usq; submittatur. Tum naturæ incorporeæ materiam alienam, cum possunt tollere, unico modo uidentur mouere, nec alio: scilicet, rapere ad principium, unde ipsæ promanant: sicq; calor cœlestis sursum euehit, fornacis rapit ad fornacem intereà, dum sursum properat ad calidorū primū, quare ea uia etiam attollit. catulus saltitans aliquando in os tormenti bellici feruentis ui caloris absorptus est. At in corpore nostro & in alias partes mouetur, comportaturque materia: & sanè spectabile est, qua moderatione, qua arte, tam multis, uarijsq; modis ea ducitur, fingiturque. Id cum non sit moris naturæ incorporeæ, corporeæ erit. Si fortè nunc quæras, unde sit talis substantia in hoc corpore, aut unde aduenerit; dicam. Est, quia sub hoc ipso corpore producta est, & ab hoc ipso conclusa atq; coercita ita, ut ne elabi possit. Quod si adhuc iubeas exponi modum, quo illud fuerit factum, dicam etiam breuiter, aliquid tamen paullo altiùs repetendo.

Quo modo fuerit factum, ut spiritus esset in hoc corpore. CAP. V.



rtus nostri primordia ex semine sunt. Semen autem non est unum simplex, sed compositum etiam ipsum ex omnibus generibus substantiarum, excepto spiritu. Sunt autem copiosiores in eo duæ species substantiæ: una ea, quam dixi halitum, res, quæ quidē non est spiritus, sed propinqua spiritui: altera crassitudines. Quæ quidem crassitudines tūm multæ sunt, tūm ferè ita cōminutæ & leuigatæ, ut facilè sequi composita queant, si illa cōfertim conentur ire. prætereà multis partibus amplexatæ inter se & coagmentatæ, ut semper consimilia amplectuntur se inter se. Ea autem tali

massa comprehensa loco, ubi procreamur, consequitur in tem-
 pore non ualdè longo, ut de substantia, quæ in ea massa proxi-
 ma spiritui est, spiritus planè enascatur, similis (ut dicam breui-
 ter) spiritui parentum. Factus autem spiritus profectò statim
 elaberetur; nam nullum naturà est libens cum dissimilibus,
 quæ eadem cuncta sunt contraria: sed non unum obijcitur ob-
 staculum. Per id enim tēporis locus, in quo fit generatio, quasi
 studente natura parentis, atque conante retinere fugitiuum,
 ità clausus undique, & ità constrictus est, ut meritò res mira ui-
 deri soleat. Crassitudines autem ipsæ, inter quas spiritus exor-
 tus est, coagmentatæ multis paribus, uti dixi, nolūt omninò dis-
 iji atque disrumpi: itaque quantum etiam in ipsis est, non
 facilè per medium sui exitum dare paratæ sunt. Non enim in
 superficie earum producitur spiritus, sed penitùs sub illas, sicut
 sub illas quoque per omnia habebatur halitus. Sed ipse etiam
 spiritus, ut factus est, ipse quoque sibi exitum usque arctiorem,
 difficilioremque reddit. Nam (quæ est cupido, & studium inex-
 plebile omnium naturarum) dum sese multiplicat, & sui copiã
 adauget, agens etiam uehementiore ui, quàm per ipsius exor-
 tum in semine agebatur; consumitque in eam rem non hali-
 tus modò consequentes, sed uapores, atque liquida: crassitu-
 dines priuatæ liquentibus, quorum interuentu magis laxæ, ma-
 gisque apertæ tenebantur, cogunt, constringuntque sese: sicut
 uidemus fieri in aperto, ubi liquida de medio crassiorum, qui-
 bus composita erant, exhauriuntur. inde uerò postea difficilius
 adhuc spiritui fit exeundi negocium. Et quia ille numquàm
 cessat, sed usque etiam etiamque idem agit: eo modo usq; magis
 magisque angustum exitum sibi fecerit. Verùm enim uerò eo
 quidem loci numquàm penitùs deficere humores poterunt: &
 præterea habitus ipse crassitudinum non est talis, qui facilè obri-
 gescere possit: quam ob rem licet eæ usque magis magisque
 coarctentur, tamē longum ductiles, atque sequaces erunt. Eam
 autem ob causam fiet, ut si quæ tamen conclusus spiritus impe-
 tum facere uelit, atque illæ sequantur, nec dimittant. Primò
 quidem ille fit paucus: & deinde augetur quidem, usque, sed
 paullatim: ut de materia per gradus, perq; ordines consequente.
 Coërcentia uerò crassamenta præter quàm quòd quanta sunt,

cum

cum etiam aliquatenus auctum facile sequi possunt: ipsæ quoque auctu crescunt: namque ibi non spiritus tantum, sed omnia, quæ ad constitutionem talis animalis pertinent, adaugentur. Erit igitur usque crassamentorum tantum, quod spiritum capere commodè possit. Numquam autem ille subito adaugeatur ea copia, qua dispellere obstantia ualeat: sicut cum nimium turgentibus contentis disrumpuntur continentia. Iis uerò modis undique ui facta, & undique prohibita uia, esse cogitur sub hoc graue & crassum spiritus, substantia tenuis & leuis, digna alio consortio. Eaque causa deinde est, ut fiat à spiritu hæc talis corporis conformatio, quam ego quoque aliàs pro uirili persequar, tunc, cum, *DEO* dante & adiuuante, animantium conformationem scribere aggrediar: & fortè in consequentibus, si res ita ferat, quasi præteriens ostendam aliqua rudimenta.

Vnum primò oriri, & postea non posse fieri plures, qui omnes agant & moueant. CAP. VI.



Nus autem fit primò spiritus, partotus, sui similis ab omnibus partibus: & deinde non potest fieri, ut efficiantur plures dissimiles, qui ipsi quoque agant & operentur. Vna enim natura, omninò uniformis, initio capit, pertenditque motum: ac necessariò una, si generatio consequi debet. causa superius est reddita. Et, si uniformis natura mouet; certè unam, simplicè propriè substantiã effecerit: simplici enim naturæ in mouendo unus ultimus propositus finis. Deinde uerò, ut spiritus exortus est, eius quoque unius præualebit & superabit tota cōpositione actio & operatio. Quis igitur ille possit propriè facere alios sibi dissimiles? Naturâ simile prorsus simile facit: dissimile numquam propriè. Quòd si ab aliquo fortè dicatur, fieri id tamen per accidēs: nam calor spiritalis dum omnia agere in spiritum conatur, & agit omninò, talem, qualis is, unde est ipse, per media agat oportet; & si per media, ergò per spiritus, qui sunt inferiores humano: ego quidem non negabo id; ualet enim ratio: sed dicam: etiam si fiant inferiorum ordinum in corpore nostro spiritus, quicumque sint, & quocumque fiant modo: tamen (dum benè res cedat) neque

licentiæ quidquā habere eos in hac compositione: nihil agere,
 nihil mouere, nihil posse, sortemque eorum esse, ut omnes ex-
 cipiant actionem aliis superantis, & ab eo patiantur, inelucta-
 biliter nutentur, & confirmantur. Vnus enim (ut toties iam
 dico) oportet agat & operetur spiritus, unaqueque natura, uniformis,
 eadem per omnia. Si alius spiritus dissimilis, aliaqueque natura agat,
 laboret illa, quæ nunc agit, & pereat, & subinde uideantur fieri
 longè alij motus, quàm nunc uidentur. Itaque quæcumque aliæ
 spirituales substantiæ fuerint in cōpositione hac, iam ferè materia
 tantum erunt spiritus omnia sibi subiicientis. Quam ob rem,
 etiam si aliqua tamen actio, aut operatio animalis, in ijs appa-
 reat, non erit uerè ipsarum, sed ipsius superantis; qui calorem
 suum mittens in omnia, eo complebit etiam illas, eò facilius,
 quò alioqui per se calidiores fuerint; & eo deinde non in ijs
 modò, sed de ijs egerit: quique omnia secum agens & mouens,
 egerit quoque illas, eoque facilius, quò leuiiores fuerint: & ijs
 etiam motis, si fuerit usus, è re sua utetur. Ea cum ita habeant,
 qui nunc de natura hominis tractauerit, non modò commodè
 ad tractionem, sed opinor iure etiam aliquo fecerit, si extra spi-
 ritum, qui potitur rerum, & qui princeps, & propriè unica na-
 tura hominis est, cæteras substantias spirituales, quæ fortè hîc cō-
 positæ sint, cōiecerit in ordines halituum, neque ullam earum,
 ut spirituum, habebit rationem, quando à se nihil quidquam
 spiritale faciunt. Hominis enim spiritum unum agnouerit, &
 unum ponet, nulla in parte sui dissimilem. Nobis, qui rem tene-
 mus, & iam rectam rationē agnoscimus, dubium esse ampliùs
 illud non potest: sed propter multos, qui hoc tempore non mi-
 nùs, quàm olim alij, irrequietè ambigunt ea de re, & numquàm
 finem faciunt sermocinandi; placeat rogo parumper attendere
 demonstrationem, quæ id, quod affirmo, cuicumque, quàm uis
 peruiacaci, persuadere possit. Non enim à falsis imaginibus, ina-
 niter, monstrosèue confictis, petita est; sed ab ipsa re, ipsaque
 ueritate, quam certissima ratio declaret.

Demon

*Demonstratio, qua ostenditur, spiritum esse unum, sibi
totum consimilem. CAP. VII.*



Eceptum est, (namque ità apertè habet ueritas) ut quod naturà nutritur, hoc est reparatur, & quasi supplementum accipit, re prorsus simili facta reparatur, si quidem rectè nutriri debeat. Quam ob rem, si nunc nos ostendemus, id, quo in corpore proximè suppleatur copix spiritales omnes, nimirum spiritum, esse ab cunctis partibus sibi similem, iure, quod intendimus, confecisse uideri debemus. Arteriæ igitur quæ dicuntur in corpore nostro, uasa sunt sic parata, ut ex duabus constent tunicis, quarum una est quintupla tunica uenarum: & sic sunt textæ, uillis ità densatis, ut nihil densius uideatur texi posse: & (quantum est animaduertere) non inæqualiter densè sunt textæ, sed æquè omnes. Ea que argumenta planè indicant, ex illis non dari exitum alij substantiæ, præter quàm admodum tenui: & ex omnibus æquè tenui. Laboratur autem sub ijs materia propè tota leuis & tenuis; flos sanguinis tenuissimus: quæ (ut ratione duce assequimur) in breui tota in rem spiritalem agi queat. Calor uerò, qui sub eas coquit, æquè magnus gradu esse per omnes facillè cognoscitur: copia quidem, pro copia materiæ, quæ subest. Mouentur autem illæ omnes ferè uno eodemque tempore, à corde ad extremas usque: pari certè tempore omnes. tum eadem celeritate, eodem agmine, numero motus. Quis iam etiam à se non colligat, unam, totam sui similem, ijs fieri & deinde emitti substantiam? Quæ enim non fiat, ubi conueniant omnia? materia, agens, instrumentum, motus, tempus, & (si is quoque aliquid ad rei constitutionem facit) locus? Ea uerò, quæ fit, substantia, uel omnibus consentiētibus, spiritus est. quo iam si suppleatur toto corpore uniuersus spiritus, nihil ea de re ambigendum sit ampliùs. Attende autem, rogo te, ut suppleatur. Rami aliquot arteriarum deueniunt sub cerebrum, in cellas quasdam satis amplas, in quibus caput est spiritus: ij igitur continenter reparant caput spiritus: qui inde postea quasi extendendo artus, procedens per nerueos quosdam ductus, complet partes

omnes, in quibus manifestus deprehendatur sensus. Paruos autem & graciles uidebis eos ramos, nec mirabere: nam cellæ illæ, & ductus neruei de materia benè crassa, ac benè coacta, compactaque sunt: ut non ità in breui inde ire contentus spiritus queat. Reliqui rami & trunci, plurimi, & longè maximi, extenduntur in omnem corporis molem, per omnes partes. Multitudine igitur spiritus, qui ijs redditur, complentur cætera corporis omnia, quæ tanta sunt; & massa ipsa sanguinis, (ut accipiunt & dicunt comprehensim) ex qua, ut materia, corporis omnia ponuntur. Ex successione autem perpetua huius spiritus in omnes partes, duci argumentum potest, alium nullum esse in ullis spiritum, ob causam, quæ à me suprà ea contentione allata est. Quam ob rem nihil dubitandum, totum sui similem esse, qui nunc cōtinuè fit, spiritum, & quo continuè uniuersus toto corpore suppletur. Si spiritus nunc spiritu ab omnibus partibus eodem, omninò reparatur, ergò ab omnibus partibus sibi consimilis est: & si nunc ab omnibus partibus sibi consimilis est, ergò à primo totus sibi similis productus est. Quid hoc argumento cogitari possit apertius? Quod enim aiunt aliqui, per conuolutiones quasdam, quæ aliquibus locis uidentur, arteriarum, longiùs morari in transeundo spiritum: quare si non fiat ibi alius, tamē ità eum parari, ut postea egressus fieri possit alius, inscientium est dictum, & à nobis priore libro exagitatam. Tantum enim abest, ut eæ complicationes spiritum longiùs retardent, ut ne quidem materiam eius diutiùs possint retinere, quàm facerent, si in rectum productæ essent. Nam præter quàm quòd spiritus materia est flos sanguinis, halitus & uapor: mistus etiam est aër, (ut etiam postea dicam) qui est tam citus: cuius quidem aëris commistione ea uel momento à corde ad extrema usque uasa per anfractus quosque ualeat peruenire. Accedit insuper dilatatio arteriarum, quæ cum primis instituta materiæ attrahendæ caussa est: quam oportet sequatur materia: & illa tam celeris est à corde ad extrema usque. Quod etiam dici solet, spiritus egressi de arterijs partem fieri alium, multò magis inscientium dictum est. A se enim nulla pars assumere aliquid poterit, quod etiam non possint aliæ: ab ijs autem, inter quæ uersatur spiritus, si qua parte uinceretur, ea quidem muta-

ri, & fieri alius omninò posset: at ipse uincit omnibus.

*Spiritus solius esse hanc uitam: & eius solius operationes
omnes, quæ sunt in uita. CAP. VIII.*



I autem spiritus superat unus, ut dicimus, & probamus, & alia composita omnia premit & sibi subiicit, &, quæcumque sint, sibi obsequi cogit: ille unus uiuere in hoc corpore putandus est, & eius esse hæc uita animalis. Est enim uiuere, agitare secundum naturam suam: nulli autem alij substantiæ in compositione huius corporis licet agitare secundum suam naturam: aliæ enim omnes mutantur à sua natura, & franguntur, & pessum dantur. Tum, si eius unius est uita, eius quoque unius erunt operationes omnes uitales; hoc est, quæ rectè fieri uidentur in homine, aut ab homine, suppetente uita. Quod enim uincit inter dissimilia & contraria, indeque agitatur unum ex ingenio; id quoque unum mouere & operari, ut fert natura, & ut est impetus, consentaneum est. Operationum autem, quas ædit spiritus, primæ offerunt se motus, & sensus: quas quidem facultates unde ille habeat, exponendum nobis sine cunctatione, si ea, quæ diximus, probari uelimus.

Vnde spiritus habeat motum. CAP. IX.



Motus quidem spiritus non est unius generis: sed est per locum, & est alius, quem uocant alterationis: qui quidem affectionis est, & semper aliqua affectio; sed ex quadam actione fit à spiritu in se, ut declarabitur inferius. Eum ædit, cum qualitates rerum uidemur percipere. Facultatem autem mouendi per locum habet, quia naturam habet, quæ una propriè motus localis est auctor, & statum in loco pati nullo modo potest: nempe calorem. Calor est ea natura, quæ gaudet agitatione per locum: proptereaque semper materiam coactam & crassam expandere & tenuare conatur: uidelicet, ut eam subiectam habeat leuem, facilemque ad gerendum secum per locum. Aedendi autem affectionis motum
facul-

facultatem habet, quia sentit: & quæ sentiunt, ubi sentiunt, ita se ciant necesse est, ut demonstrabitur in consequentibus. Quod si uelis ponere inter motus spiritus actionem, qua eius natura mutat dissimilia: id quidem potest, quia calore præditus est: quem extendens in alia, quoque superans, flammæ more, frangere ea, mutareque potest.

Vnde habet sensum. CAP. X.



Vnde autem sensum habeat spiritus, qua de re tam anxie ueterum multi laborarunt, nos ne minimum quidem in quærendo laborabimus: causam enim habemus non modò promptam facilemque, sed necessariam: Quippè, quia omne, quod natura constat, uim sentiendi habet, & sine ea esse non potest. Mirabere, optime *REX*, nouitatem pronunciati: sed attende, rogo, quàm euidenter id ostendatur. Omne simile petit simile, & fugit dissimilia: neque id causa loci facit, ut uisum est Aristoteli: nam non substantia est propter locum, sed locus propter substantiam: neque à loco, sed in loco quæritur bonum. Tum, omne simile amplectitur simile, & cū eo amicè est: in dissimile agit & pugnat, & ad illud inualefcens colligit sese, & unit suas uires. Cur id? scilicet, quia omne naturam habens sensum habet eorum, quæ tangunt: & quæ bonū dare uidentur, & fouere, & robur suo robori addere, amica statuit, & uult ea, & sequitur & cum ijs esse uult, sic sperans uitam perenniore, uel dulciorem: cōtrà, quæ malum dare, & alterare, & frangere; inimica statuit, noxiaque, proptereaque facit omnia, ut ne eorum sentiat contactum. Non est enim sensus tantum dignotio alterationis, ut quidam docuerunt, qui quidem unam modò speciem finiuerunt sensus: sed etiam eius affectus (non inuenio aliud uerbum, quo exprimam rem) qui à similibus & cognatis attingentibus datur: qui quidem non est alterationis, & motus de statu, sed dulcissimi, & (ut sic dicam) uitalis motus ad uim amicam blandissimè quasi afflantem & uegetantem. Vt sic forsan commodè definiatur: Sensus est dignotio sui ipsius affectus: cōprehendēdo uoce affectus id, quod dixi modò. Nefas sit enim similium sensum negare naturæ: quo e-

nim modo ea scētetur, nisi sentiat? aut uerò quī conseruetur? Semper enim uel cum similibus, uel cum dissimilibus uersari oportet: ab his cauendum, cum ijs manendum: quī id faciat, nisi noscat non modò ubi sint, sed quæ sint? Id certè per solam tactus qualitatem haberi potest: sed quid profit tangere, nisi dignoscat qualitatem tactus? Dignoscit igitur, ac necessariò, & hæc & illa, & utraque positionis ratione: si enim altera generis opposita sentit, altera etiam sentit; semper enim erit sentiens: atque inde altera refugit, altera sequitur: quo studio maximè conseruatur mundus. Omnia igitur, quæ constant natura, uim sentiendi habēt: spiritus est substātia naturalis, natura cōstans: ergò uim sentiendi habeat necesse est. Quòd si in primis uera, atque adeò necessaria ratione non satisfacio, quando plurima uideantur esse, quæ dissecta, ad necem acta, extrema patientia nullum dent indicium sui sensus: & multa consimilia disiuncta & dispersa manere, & quasi negligere se inter se: cogor pluribus uerbis reddere causas eorum factorum, & postea euidentioribus argumentis ueritatem illustrare. Ac principio aio, sensum non esse materiæ, sed naturæ incorporæ, quæ est in materia: materia penitus bruta est. Impossibile autem est, offerri nobis sensum naturarum, nisi earum ad nos perueniat motus, & sic affectus earū aliquo modo participes fiamus: motus enim est nobis alieni sensus index; & ferè cum sensu cōiunctus est. Natura autem sine dubio ad omnia tangētia commouetur, quamuis alio atque alio modo. Dupliciter autem eam agitare accidit: nempe, uel nudam, per accidens adhuc extensam per aliena corpora; uel cum materia iam supposita sibi, & eam quasi indutā. (per te hæc melius intelliges: ego enim ut declarata & supposita iam, assumere opus habeo.) Nudè motus erit secretior; quipè quia facilè latent sensus nostros motus incorporeorum: indutæ in multis est manifestus, & cum sensu habitus: in multis manifestus, & quidem cum sensu, sed non habetur; in multis autem est tam exiguus, ut nobis non referatur, proindeq; cum eo etiam lateat sensus. Nos enim ferè nihil sentire putamus, nisi clamet ad tactum, nisi membra quatiat. Iniusti, qui præ nobis uelimus de omni statuere natura, & in omni exposcamus similes nostris motus, si eas facultates, quas ipsi habemus, illi ueli-

mus attribuere, etiam si non habeat instrumenta, quæ nos, aliæ
 ne animantia. Quo errore ducti, neque eas substantias, quas ali-
 quando sentire uidimus, nunc sentire existimamus, quia sensu-
 um suorum nihil significant nobis. Sic neque animalium, quæ
 bruta dixere, spiritus è corpore egressos sentire posse putamus
 amplius: neque si aliquo modo ostendant etiam suum sen-
 sum, id putamus esse sentientium, nisi sit uox, qualem exaudire
 solebam⁹. Nā aër, qui propè similis est substantia spiritib. animalium,
 de eodem certè genere substantiæ est; compressus uehemèter,
 collisusque, gemit, fugiens compressionem, & iam de ea con-
 querens: quæ quidem querela est sonus: tamen uulgò mini-
 mè omnium sic rem esse existimatur. Non sic uir prudens rerū:
 sed etiā motū corporū, quē uel pulsa, uel tracta exsequi uidet,
 natura eorū agēte, exsequi nouit: quippè uel pressionē, uel diui-
 sionē sui cū materia, nō ferente: nisi. n. id esset, ea ubi pelluntur,
 coacta in sese admitterent quod inuadit, mollia præsertim, neq.
 latū unguē mouerentur amplius: & ubi trahuntur, quantū eo-
 rum apprensū est, tantum auferretur, reliquum remaneret
 disiunctum: quid enim esset causæ, cur fieret aliter? Enimuerò
 non æquè omnia, hoc est pariter promptè, pariterque exquisitè
 sentiunt: nā neque omnia candem, parisque uigoris naturam
 habent. Quæ naturam habent calidissimam, ut celerrimi sunt
 motus, sic etiam exquisitissimi sensus: quæ minùs calidam, tar-
 dioris motus, & hebetioris sensus: sicque per gradus descendi-
 tur usque ad ea, quæ minimum habent gradu calorem, & tardis-
 simè mouentur, stupidissimeque sentiunt, ità ut nobis prorsus
 immota, insensiliaque uideantur. Ac talium natura petita à con-
 traria, licet miserè conficiatur, tamen lentissimè ad cladem suā
 mouetur, stupidissimeque sentit: & quamquàm fugere quàm
 procul conetur, tamen sic lentè id agit, sicque breuiter, ut etiam
 à se ipsa relictà perire uideatur. Et nō ne etiam sunt animalia,
 quæ ob sui caloris ignauia stupidè sentiunt? Atque hac ratione
 infimorum graduum naturæ iure aliquo nobis expertes sensus
 uideri possunt, dum uerè non sunt: & etiam id probè scienti-
 bus, per collationem ad exquisitè, promptèque sentientes, pos-
 sunt insensiles statui. Quæ à contraria natura tenentur substan-
 tia, à frigore nimirum, quod alioqui immobilitatem amat, à
 calore

calore correptæ, faciunt quod non faciebant, mouenturq; sed quò fugiant motum, raptumque caloris: ac cogunt sese intrò ad centrum uel terræ, uel etiam suum; qui modus unus est ipsarum uel petendi similia, uel fugiendi contraria: sed motus ferè non uidetur, quippè quia tam compactæ eæ solent esse, ut uix sit spatium, quò se conferant, & per quod suum ostendant motum. deprehenditur tamen in aliquibus motus, & inde sensus uiris prudentibus, ex induratione earum ad calorem: quæ quidem fit, ijs undique intrò cogentibus sese, atque fugientibus, dum suam efficaciter pertendere possunt fugam. Similia autem quædam à similibus consuetandis abstinēt hisce de causis: Substantiæ, quæ incommodum, quod nullo modo sustinere possunt, fugere, uel maximum bonum assequi iam prope-rant, si expeditæ iam eunt, profectò similem aliquam parua, quam fortè sentiant esse in uicino, dimiserint: nam parum ab ea assequi poterunt, & si ire uelint, itinere abducente à proposito fine, uel certè remorante, oportet eant. Quam ob rem neq; flammæ eunt ad flammæ: quamuis si fiant contiguæ, libentissimè uniantur. Si autem ea conditione sint substantiæ, ut cogatur esse sub dissimilibus, ac similis fortè etiā impedita adsit: sensu eius habito, iuerint ad eā, si sint mobiles, nec prohibeantur, uel cū impedimētis: cōiunctionēq; appetiuerint, si ea leta specie, & blādo ad se affectu inuitet: nam si sit tristis, obruta & cōtristata à dissimilibus. auertāt ab ea se. hocq; ferè fit in animalium amoribus. Deinde est hīc in medijs spatijs, ut quod iturum esset, constet ex substantijs magnopere dissimilibus inter se, diuersarum, impariarumue naturarum, studiorum, facultatum. Eo fiet, ut quamquam una, uel duæ insint, quæ iam irent, detineantur ab alijs, & impediantur, quæ fortè uelint lentiùs, si ituræ sint, hoc est si sit eundem, ubi sint etiam ipsarum similes: nam si non sint, numquam accedant libenter. Tū quia sēper dissimilia in dissimilia agunt, afficiuntque illa; facile in cōpositis fuerit, ut quæ & ire, & rapere etiā impediētes possent substantiæ, ui dissimilium afflictæ sint, & impetū iā facere nequeant. Sed ferè est hīc ad terrā, ut in cōpositis plurimum sit eorum, quæ sunt naturæ grauis, & penitus alienæ à motu: quæ igitur suum morem sequentes, ui retinere possint quamuis leuem cōpositam. Graui enim num

quàm motum capiant, nisi (ut dixi) ut fugiant motum. proptereaque in sublimi posita, per se tendunt deorsum: quippè quia manere in sublimi, naturarum est à se mobilia, seque sustinētium per spatia: qualis cū non sit ipsorum natura, impotentia eius operationis, atque adeò exhorrentia eam, ut alienam, fugiunt deorsum ad grauium cœtum quorumcumq; ubi suo modo sint, & conquiescant. Tendunt autem ad centrum, primò suum, deinde uniuerſi. eaque cauſſa est, ut semel ſeparata à ſimilibus, deinde, uel contiguīs ijs factis, non amplexentur illa ampliùs: ſcilicet, quia explicare ſeſe, quod amplexando faciant oportet, ire eſt uerſus circumferentiam, quæ res aliena eſt, & iſſis inuiſa. Videntur autem quædam ex grauib; quæ dum dura, inertiaque penitùs ſunt, faciunt quod dixi: ſi autem à calore explicentur, & colliquantur, quibus id accidere poteſt, libenter amplexentur ſimilia, ſi contigua ſiant, & continuentur ijs, ſi ea ex altera amplexentur, liquataque ſint: poterunt enim iam talia facta: nam omnia liquida iam aliquatenùs mobilia ſunt. Non uidentur autem liquida à ſe, ne erga ſimillima quidem, capere motum, niſi contigua, uel fortàs ſe proxima: nimirum propter grauitatem naturæ: grauiſcula enim adhuc eſt natura duntaxat liquidorum, atque tardior. Horum autem, quibus nō modò à uulgo, ſed à philoſophis multis ſenſus denegatur, quot ſunt, quæ ſenſus euidentiffima dant ſigna? quæ quidē certè tametſi multis grauib; cōſtant ſubſtantijs, tamē unā habent ſuperantem, tūm à ſe mobilem, tūm quæ impetū uehementiùs capiens grauiā ſecum rapere ualeat. Plantarum ſemina ſi non cōtecta terra enaſcantur ſupina, conuertunt ſe in pronum, quò radicem deſigant terræ. Crescentes plantæ, ſi quid eſt, quod ſurgētib; ſuſumque tendētib; poſſit præcludere iter, antè quàm perueniant ad illud, ſeſtunt iter, tenduntque ad liberum aëra. Nimis lentæ cauſes, qui ualdē in longum porriguntur, quò ſuſum ſcandant, capere uidentur iter ad ſtatumen uicinum longè multis pedibus. Palmæ feruntur nutare plures circa unum marem, pronas comis blandiorib;: qui ſi excidatur, illæ ſterileſcant. Sunt plantæ, quæ nolint agere ſimul: & ſi cogantur, malint occidere. Quàm multæ, & quàm multi flores comitantur aſpectu & gyro Solem? Eſt flos, qui Sole occidente immergit ſe aquis,

aquis, quibus innascitur, non patiens sine Sole intueri cœlum: mane unâ cum illo emergit. Est quoque aliud heliotropon, quod die uel nubilo comitatus Solem, noctu uelut desiderio contrahit florem cœuleû. Contrâ est flos, qui horreat Solem: quare die se inuoluit, noctu pandit. Cucumis pendulus, si subeat spirit⁹ olei fortè suppositi, auertat se, & apertè effugiat. Quid uerò quòd etiam à saxis, & à metallis manifesta sensus argumēta habentur? Lapis asterites capit fergam de succo limonis, deq; aceto ualido, cui immergatur. Magnes quarit arcticum polû, & aliam partem cœli non libenter aspicit. Ferrum it ad magnetem, palea ad succinum, quod in utroque amoris est indicium. Aio autem ferrum ire ad magnetem, non trahi ab illo, ut plerique alij: nam si traheretur, quocumque situ esset ad magnetem, usque eo ipso traheretur: sed non sic fit. nam squamæ ferri interposito scaphio mira celeritate uidentur sequi magnetem, sed usque se conuertendo in caput: ut styli ferrei se ad eum conuertunt, eumq; sequuntur. Vidi quoque stylum ferreum, qui alteram magnetis partem, quam ille semper ad polum uertit, tetigerat, ubi altera conuerteretur, tam celeriter auertere se, ut præueniret conuersionem. An uerò illud magnetis est, cuius spiritus subierit ferrum? quippè qui tantopere amet arcticum polum, ut sui ipsius faciem, quæ ab eo auersa nata sit, oderit? erit igitur magnetis iam sui ipsius sensus. Cæterùm aiunt, moschum in cloaca (sit habitus honos auribus tuis) nihil mittere halitus odorati, ut neque cinnamomum: quare postea educta tantanum mittere odoris, ut compleant omnia. Quod si fit, propterea fieri existimandum, quòd eorum odoramentorum naturæ aduersæ naturæ importunitatē sentientes, nec propellere queunt, continent sese cum tenuitate, quam usque faciunt, nec eunt: quare fit, ut sub ea composita magna uis odorati halitus colligatur. Sed quid tot uerbis opus est? Cùm in similia primorum uniuersitatibus, eorum studium sit maximû se mutuò confectandi, simulq; coniungendi, & dissimilia fugiendi, quod à sensu ueniat oportet: in specialium mediorum ordinibus idem studium, idemq; sensus sit necesse est: quæ enim generum comprehendunt sunt, comprehensorum etiam sunt, licet imparia, & minora. Sic neque rationes nos, ne-

que argumēta deserunt, quin omnibus corporibus tribuamus sensum. Quin neque nudas naturas sentire nobis est penitus ignotum: nam quia tangibiles sunt, (eæ inquam, quarum philosophi naturalis consideratio debere esse uidetur) tactu nobis aliquando manifestant suum motum, & sensum. Nō ne ad caloris ualidi aduentum frigus refugit, sese colligens, atque uniens? nō ne item calor ad aduentū frigoris? Haberem aliud lōgè maius, longēque euidentius argumentum, nisi res pronuncianda esset prorsus noua, & mira, quæ prius separatim suam requireret probationem: quam ob rem abstinco. Me autem hīc finem de causā sensus facere uolētem detinebis fortassē, quia iam in mea disputatione discrepantia uideatur. Dixeram enim, studiū rerum alteras sequendi à naturæ similitudine esse: nunc autem meo ipsius testimonio, multa sunt, quæ petant etiam ea, quibus cum nullam habeant similitudinem: quæ enim similitudo statuminis ad caulem? quæ plantæ ad alimentum, quod naturā adhuc palam est aliud? quæ lapidis magnetis ad polum arcticum? plantæ ad Solem? & si similitudinis causā ualeat, certè ferrum citiùs ferrum, quàm magnetem petat: & palea citiùs paleam, quàm succinum: quod tamen non uidetur. Verè sanè: itaque digna oppositio, quæ respiciatur, & cui satisfiat. Istorum uerò exemplorum consideratione faciliùs induceris, ut recipias quod ego assero, & quod res est, attribuasq; unā mecum cuius substantiæ sensum. Si enim similibus studium est, certè est propter bonum, quod capitur ab illis. At si id propter bonum est, non dubium est, quin ubi maius bonū proponatur, illud potiùs sit capiendum. Porro maius & minus bonum mediæ tantum naturæ proponi possunt, primum enim medio maius: summæ non, sed tantum minus: istæ autem, quæ iam dubitationē dant nobis, cunctæ mediæ naturæ sunt. Mirare uerò ista etiam, quæ penitus insensilia uulgus putat, posse etiam dignoscere maius & minus bonum, & maius sumere sibi, neglecto minore. Non eā enim ambigū, maius esse bonum, quod à statumine capit infirmus caulis, quàm quod à simili pariter infirmo caperet, cum quo simul miseriter ad terram uolutarentur. meritò igitur statumen petit, misso simili caule. Maius item bonum, quod capit semen enatum à terra, quàm quod ab altero

altero simili enato grano, apud quod alimento destitutum pereat. Con similemque crediderim esse causam, qua magnes se ad polum, plantæ se ad Solem uertant: quaque ferrum ad magnetem, palea ad succinum eat, & si qua alia sunt, quæ dissimilia uideantur appetere. Hæ enim inferiores naturæ amant quidem similes, ut ament necesse est: sed interea usque appetunt gradum nobiliorem, quod est desiderium omnium, quæ sunt in inferioribus, ad summum tandem perueniendi. Quod autem iam iam rapiat ad summum, oderunt ferè: perdidit enim nequeunt ire tam raptim: at quod non corrumpendo, sed seruando potius adiuuet ad superiora, illud uerò uolunt, & appetunt, & ut tanto bono fruantur, conantur quod non solent, neque etiam similium causa facerent. Quam ob rem crediderim, magnetem propterea usque se conuertere ad arcticum polum, quia inde sentiat uenire qualitatem quandam, quæ supra omnia similia fouere, & non modò conseruare, sed etiam adiuuare ad gradum nobiliorem possit: itidemque flores, plantasque ad Solem. Quamquam enim natura magnetis, & natura florum, ne conferendæ quidem uideantur naturæ cœli, quod est ad arcticum polum, & naturæ Solis: tamen qualitas, quæ ab ea parte cœli ueniens tangit magnetem, & ea, quæ à Sole tangit flores, qualis tangit, non immodicū quid naturam substantiæ, quæ est in magnete, cumque mouet, & naturam substantiæ, quæ est in flore, cumque mouet, superare existimandæ sunt. Eademque sine dubio fuerit causa motus ferri ad magnetem, & paleæ ad succinum, neglectis similibus, à quibus non tantum fructum captura sint. Putarim quoque, magnetem, & succinum, ut Solem, posse trahere ad se ea, quæ sibi sunt facilia, si ui sua attingant, sicut plantæ trahunt ad se alimentum: quod si fiet, duæ simul causæ accesserint. Hic autem finem de causa sensus agendi facio: iniuriam enim quodam modo uideor facere naturæ, qui in re non modò uera, sed necessaria sibi, probanda tantum sumam laboris: atque ad alia, quæ fert rei ordo, me confero.

Variè & diuersè operari spiritum: & plura, & quædam nobiliora, uideri esse genera operationum eius. CAP. XI.



Substantia enim hæc nostra superans & uiuens, mouensque & sentiens, quam unam, simplicemque esse huc usque undecumque ratio dictauit, nunc, dum eius motus, eiusque facta spectamus, & speciatim, & singula per partes consideramus, in uaria nos, & diuersa ducit. Nullum enim est genus operationum, in quo omnino unum (ut simplicem substantiam deceret) facere appareat. Nam dissimilibus mutandis, ex materia, quam tractat suo modo, constituere comperitur plurima, & uaria, ac diuersa, perinde quasi non eadem natura operaretur: & alia etiam alijs partibus reddere effecta. Mouendo uero non uno tantum modo, unaque forma mouet, sed uariè etiam, atque diuersè; quasi ipsa uaria & diuersa esset; tum uidetur alios motus alijs capere partibus, perinde ac plura haberet capita: demum (quod est adhuc maius) eosdem motus modo celerius, modo tardius, modo uehementius, modo remissius ædit; quod per legem nulli substantiæ, quæ una, simplexque sit, uidetur debere licere. Præterea non tantum mouet & sentit, sed uidetur alia quoque posse, quæ appareant longè diuersorum generum, quàm sint motus & sensus; quæ quidem tanti fuerunt apud plerumque maiorum, ut substantia, cuius eorum aliqua propriè essent, longè alia statueretur, atque quæ moueat & sentiat; uidelicet, imaginatur, recordatur, intelligit, ratiocinatur, memoria tenet. Postremo (quod sit ferè prodigium) eorum, quæ facit, quedam uidetur nosse & uelle facere; quædam nec nosse, nec uelle; quod quidem nescio quò ducere scientiæ amatorem possit. Quas quidem ob res ingentia nunc nobis proponit dubia: quæ, si quod positum est, manere debet, necessariò omnia tollenda sint. Neque enim benè perspecta uideri potest substantia, cuius non pateant undique operandi rationes: neque positum, statutumque id, in quo adhuc dubia remaneant. Id igitur nunc, nulla facta pausa, agemus; conabimurque, quantum suffecerint uires: nihil enim in scientijs humanis magis arduum, magisque

magisque difficile puto cogitari posse. Simulque inspiciemus rationes, quibus facit spiritus, quęcumq. uideatur facere: simul dubia soluemus: nisi si qua cōmoditate tractationis differenda ad calcem iudicabimus. Vt autem aptè agamus, & quā fieri possit, signatè, & undique definitè tradamus omnia, oportet faciamus id, quod alioqui non faceremus: effectoremque operum spiritum partiamur quasi in binas copias. Nam quamuis ille nullo modo est multiplex, neque à se diuisus: tamen illud uerum est, quidquid tandem sit causę: quędam operatiōes uel solū, uel magis in certa eius parte, quędam alię in certa alia elucent: ut ipse quidem licet continuus, tamen partibilis est. Habebimus igitur eum partitum in binas copias: quarū alterę erunt eę, quas antè dixi ire in cerebri cellas, & inde extendi per ductus nerueos: alterę eę, quę prodeunt in reliqua corporis. In illis enim conspicuus est magis motus, qui fit citatior, uehementiorque per locum; & qui est affectionis; nec non sensus: definitè autem in ea earum parte, quę est sub cellas, apparet imaginatio, recordatio, intellectio, ratiocinatio, memoria. In his, mutatio dissimilium, constitutioque uariarum & diuersarum substantiarum: addam; & materię extra uasa, quę sunt ex nerueis tunicis, comportatio atque positio. Distinctę autem notationis causa, priores uocabimus inclusas, posteriores uagas: nam alioqui neque illę solę inclusę sunt, neque hę temerè uagantur. Libet autem prius contemplari uagas.

*Cur spiritus faciat uaria & diuersa in corpore nostro:
& quo modo comportet materiam, quò com-
portat. CAP. XII.*



Umquā quidem spiritus, quantum in se est, fecerit aliud, quā spiritum: nullum enim naturā propriē fecerit quidquam, nisi simile: dico in generatione substantię: ut autem alia tamen faciat, sunt in causa illa, quę ab eo patiuntur, atque mutantur: quę cū remota sint à substantia, naturaque spiritali, dum ad eam aguntur, per media transeant necesse est: omnis enim transitio de termino in terminum per media: sicque à spiritu spiritum faciente, media

interea fiūt, & alia atq. alia. Fit autē tali modo: Spiritus ut exit de arterijs, peruenit in habitudinem corporis, in ſpatia, quæ undique tenentur à diſſimilibus : & præ nimia quidem eorum turba, ubique confercta & coarctata, non licet facilè euadere : ſed neque ipſe uult, niſi ſi uniuerſus, quantus inuolucro hoc concludus eſt, ſimul eat. Vt enim uenit ille recens ab arterijs, iūgitur & continuatur uniuerſitati (ut ſic appellem) ſpiritus, quæ eſt ſub corpore, iamque degit per omnia, ut ſimilis, & cognata ſubſtantia; & ſit pars eius, ſicut membrum corporis. & eo modo ſit, ut poſtea ire aliquam partē ſine toto, ſicut iā eſt, ſtatim diſiunctam ab eo, ſit idem, ac membrum auelli à corpore. Dum autem ibi eſt inter diſſimilia, oportet ſic agat cum ijs, ut omne diſſimile naturā agit cum diſſimili : mittat uidelicet uim ſuam in illa, & quantum poſſit, infringat, atque perdat. Ipſe quidem exſilis eſt ſubſtantia, hoc eſt prætenuis : quam ob rem non multam conferctā ſimul uim proferre poteſt; ſicut exſilis flāma nō multum calefacit, ut (exempli cauſſa) quæ eſt de latice Scythico ardente: ſed alius tamen atque alius continenter ſubit ſpiritus; & præexiſtētis calor uſq; multiplicatur & augetur copiā, ut per ſe multiplicari, & auctu accreſcere calor poteſt. itaque in breui ſit tantus calor ſpiritalis, qui uincere ualeat. Frangit igitur potenter, agitq. ad necem naturas diſſimilium omnium, & de omnis caloris more materiam omnium expandere conatur. Illa uerò (ut dicebā ſuprà) nō ſunt tantum materia, ſed ſubſtantiæ cōſtantes natura formante, atque agere potente: quæ igitur, ut omnes, quæcumque ſint, uiuere & eſſe uelit. Quare non ſe neglexerint illa, & perierint ultrò, ſed ſi non poterunt repellere uim præpotentē & ruinoſè inuadentem; tuebuntur ſe tamen & tenebunt, ut poterunt, & quamdiū poterunt. Ea uerò ſe longiùs, pertinaciusque tuebuntur, atque tenebunt, quæ fuerint magis aliena, & uiriū plus collectum, cōferctumque habuerint: ea tempore breuiore, & minore pertinacia, quæ minùs aliena, & ut minora gradu, ſi uiribus fuerint exſilibus, & ſic quaſi eneruatis. Omnia tamen ſuccumbent, & uincuntur à natura animali, & accipient ab ea mutationem. Inter mutandum autem, quia (uti dixi) oportet agantur per media: propterea eadem quoque numero ſubinde alias atq. alias aſſumunt formas : & ea plures, quibus per plures ordines,

ordines, pluresque gradus sit transeundum. Tum, quia ut correpta sunt, utque sunt sub calore animali, dissimilia inter se, impariaque sunt : propterea, licet eodem tempore simul omnia ab eodem calore patiantur, tamē non possunt simul omnia similē, parēque accipere mutationem : sed ea, quæ alio ordine uel gradu fuerint, aliam; & quæ alio aliam : remotiora adhuc alieniorem, minùs remota iam minùs alienam. indeque est, ut plures simul etiam in eadem massa, diuersæque uideantur prodire facies rerum. Porro, quia materia (sic nunc appello ea, quæ mutantur) non ducitur passim & temerè, sed certo ordine & per certas usque uias, certo ductu, certoque tempore : itaque disposita est actio, & res cedit, ut certis locis ea usque accipiat certas mutationes : propterea certis partibus, certa fieri animaduertimus, & semper. Verumtamen non solum mutationem naturæ & consistentiæ accipere simul æquè non possunt ea, quæ conficiuntur à calore spiritus : sed neque loco pariter sequi eius motum. Ut enim alia crassa sunt & graua, alia tenuia & leuia; & sunt alia gratiora, & alia leuiora : sic semper euntibus facile leuibus, graua usque sequentur grauitè & tardè, & grauiora tardiùs, restitantiæ & moram trahentiæ : quare dum ea sic subsequuntur, alia interea in alium rapiuntur locum. Inde uerò distractis ijs, quæ quasi uno glomo ibāt glomerata, conspicua fiūt dissimilia, quæ facta sunt. quamquam ipsam naturam intentam esse segregationi ob usum, credendum est. Inexistens autem spiritus materiæ (ut illud quoque non obliuiscar) & illam quasi indutus, facto agmine gerit quò tendit, adiutus usque & quasi sustentatus à continua copia subsequente eodem studio comportandæ materiæ. Ipse quoque calor, quamuis sit factus iam extra spiritum, adiuuat comportationem : qui quidem materiam correptam tollens (ut rapere uidemus calorem materiam) & cū rapto cōmeans, semper est ad latera spiritus, uel pergit omninò, quò est iter eius, quasi stipans principem cum impedimentis, ut animaduertitur, studio prorsus admirabili. Sed harum copiarum calor, qui quidem uolitat per omnia, & quo complentur omnia, est propugnator, & tutela maxima & prima totius uitæ. is enim est ea uis, quæ ut retundit & reprimat turbam dissimiliū ferè omnem, sic maximè fouet, roborat, & tuetur substantiam

spiritalent uniuersam, & in primis illam partē eius inclusam artius, cerebri cauis & ductibus nerueorum agitantem: quæ undique à tanta multitudine contrariorum, eorumque ualidorū, ueluti obseſſa, à se quidem sola uix momēto tueri se, & repellere præsentem cladem ualeret. Atque hæc satis possent uideri circa operationes, quæ magis conspicuæ sunt in spiritu uago: sunt enim redditæ rationes earum, nondum quidem satis difficiles, & dubitationes simul, quæ esse poterant, ferè sublatae. Sed quia multum refert tum ad totum hominem cognoscendum, tum deinde ad notitiam multorum, quæ in dies fiunt in nobis, nosse exactè hoc negocium nutritionis, ut apellatur: hoc est, ut celebretur & procedat coctio per corpus, & quo modo, quæ constitui uidentur, constituentur: placeat, obsecro te, per ocium, si quando erit, morari hinc adhuc mecum paullum, & contueri diligentius, & quoad liceat singillatim, quo modo fiant, quæ fiunt, omnia. spero non erit sine fructu. Et quia omnis dissimilitudo est ex eo, quod sumimus in nutrimentum: è re sit, si communis alimenti materiam, perfunctorie, quantum ad tractionem nostram expediat, spectando repetamus.

Rursus diligentius, & quoad fieri possit particulatim, quo modo per totum corpus mutantur dissimilia, & quæ constitui uidentur, constituentur.

CAP. XIII.



I corpus nostrum est tam multiplex, hoc est, si substantiæ, ex quibus iam tale constat, sunt tam multiplices: multo etiam magis multiplex sit oportet materia alimenti, ut ad corpus uel primo ponendum, uel postea instaurandum uenit. Eius autem in præsentia non exhibebo aliam notationem ab ea, quam exhibueram notanda dissimilitudine corporis: tantum dico, multiplicandas species & ordines crassamentorum, quæ quidem plura & maiora fuerint in materia alimenti, quam postea in corpore: ordines & gradus aliorum omnium, extra aliquem halitum, faciendos inferiores: postea enim sub corpus omnia magis expanduntur, leuioraque fiunt à calore animali, ipsi etiam maiores halitus. Signabimus autem

autē in ea materia inter cæteras tres species rei: quarū una erit halit⁹, sed ex gradibus superiorib⁹, benè calidus iā, nec ad motū segnis: quod quidem est id, cuius uim percipimus sapidè gustātes, & cum sensu odorantes: ab ea enim natura sola est ea uis, non ab alia. altera est amarum quoddam & mordax: quod quidem halitus quoque est, sed inferiorum graduum: inexistitq; ferè omnibus, quibus uescimur, factum iam à calore accrescēte sub ea tūm per omnes ferè medios gradus, tūm per hos, in quibus sit amarus & iam aliquatenus mordax: soletque esse itā insertum & immistum crassis, ut ne facilè queat extricari. tertia, ea, quæ magnopere sunt crassa. Ad ea enim tria genera rei conficienda atque coquenda liquore leni, hoc est aqueo, opus habet spiritus: is enim liquor etiā sui insinuatione aperit, laxatque crassa, sed uī naturæ etiam id facit: alia tūm sui quoque immistione diffundit adhuc in amplius, & sic reddit languida; tūm lenitudine naturæ lenit, atque mitigat. Alioqui certè difficilia ea, & aliqua fortè inexpugnabilia essent spiritui, naturæ quidē magnæ gradu, sed copiā exilis: Magnopere enim crassa cū ualdè alienæ naturæ sunt, tūm consistentiæ stabilis: substantiæ uerò amaræ, & benè calidæ, & citæ, si, ut integræ sunt, magis exalfiant, nec ineluctabiliter necentur, irritatæ potius, & incitatæ, furenter in proxima quæque ferantur: quare petant, feriāntq; etiam ipsum uerueo genere inclusum spiritum: quod quidem cū fit, tūm alij casus oxoriri solent, tūm excitatur sitis: sicut fames, ubi à crassamentorum compositorum natura, hoc est frigore, incipit tangi spiritus: tunc enim ille materiam exposcit uapidam, & halituosam, in qua rursus calorem suum multiplicet, & ex qua adhuc sui copiā adaugeat, quæ auuiditas fames est. Materia autem eiusmodi, qualem descripsimus, cibo nimirum, ut appellatur, in uentriculo congesta, liquore leni affuso, uel in ipsis cibis sumpto, coctio incipit calore multo quidem, sed ualdè leni, ut est op⁹ per omnia ferè in corpore nostro, sed maxime per principia. Nam (quæ res est dignissima notatu) naturæ omnes, quò facilius mutantur, aut obsequantur, requirunt, tractentur leniter, ac placidè; & quæ sunt alieniores, eæ etiam magis: alioquin uel efferabuntur, uel exose insolentiam cogent sese cū materia subiecta, & durius deinceps exhibebant negociū. Cū

autem id semper requirunt, tùm magis per principia: namque ubi iam multùm edomitæ, effractæque fuerint, securè maiorem licebit inferre uim. Eamque ob causam, admirabili consilio est prouisum in nobis, præcipuè per principia coctionis lenis calor adhiberetur: & calor iccoris (is enim est maximè, qui etiam in uentriculo conficit cibum) transiret per geminam tunicam uentriculi, quò ad cibum concoquendum perueniret minor & lenior. quamquàm ipsum iecur quasi focus quidam tùm ad principia, tùm ad media coctionis paratum, ità paratum est, ut non ualdè uorax in eo calor fieret: quod præter cætera indicet paucitas & exiguitas arteriarum ei uisceri datarum. A calore autem illo multo facto, adiuncto intereà eo, qui undique de partibus contiguïs, & deinde appositis uenit, massa lentè, sed efficaciter, frangitur, subigitur, mutatur: itaque in tempore non ualdè longo, omnibus maceratis, & crassis ex liquidis subactis atque coctis, fit quiddā molle, album, quod chilum uocāt Græci. Demittitur postea id inferiùs in locum, unde ferè quidquid est nutriendo, trahitur sub hepar per uenas quasdam, quas dicunt mæseraicas. Ibi uerò agitur ualentius, intensiusque: franguntur uehementius naturæ alienorum, materiaque tota explicatur, expanditurque magis ac magis. Atque in breui calor in massa sic inualefcit, ut rubore ea uestiatur: qui quidem rubor minimè in tota ea propriè erit, sed tantùm in halitu, & tenuiore omninò substantia: quod uel idè patere potest, quòd si rubētes carnes aqua macerâris, aut benè coxeris, exalbescunt: tenuitate nimirum, cuius erat rubor, uel ab aqua excepta atq; abducta, uel in rē inuisibilē acta, atq; dispersa. Is autē halit², admisto uapore aliquo prætenui, sic rubēs, est, quod propriè sanguinem uocarūt ueteres, & aëri retulerunt. Dum autē omnia sub iecore expanduntur, atque explicantur, segregantur multa, quæ priùs composita erant, ut calore uehementiore coquente dissimilia necesse est, quando (ut diximus antea) non omnia æquè consequi possunt illius motum. Inter cætera autem prodit id amarum & acre, paullò antè descriptum, obuolutum tamen adhuc aliquibus crassis, ut penitiùs ijs confertum solet esse. Prodit autem multis & robustis uiribus: nam crassamentis coërcitum & quasi uallatum expandi satis nequiuit: & amarum quidem, & acre priùs per se e-

rat, sed nūc amarius etiam & acrius est redditum ad calorem spiritalem. quare sese offert superatu difficillimum. Sentiens autem natura morsum, separat illud, sicut est, extractumque uesiculâ quadam præcipitat in aluum. At tamen non ita exactè abstrahere potest, quin relinquatur aliquid, saltem eius, quod sub coquente calore paullo calidius factum, transeat in rem eiusmodi: & id est, quod uocatur bilis, quodque deinde etiam in massa sanguinolenta, & alijs per corpus discernitur. Subsidunt quoque quædam crassamina, atra, & acuti frigoris, quæ natura expurgâs, conuehit in adaptum locum, sub splenem, conficienda ibi multa spiritus ui: uix enim credas, ut arterijs intextus est totus splen, & jis non paruis. Ea autem atritas est, quæ nominatur melancholia. cuius etiam species aliqua deinde conspicitur in sanguine, & magis atque magis processu ætatis: tum quia relinquitur omninò aliquid eius, tum quia calor quò est uehementior, eò magis torret correptam materiam, uorans uapores atque liquores, & crassa & atra reliqua faciens: planè ut ignis calor carnes, quæ torrentur. Aqueorum autem multum sub icore in massa est: nam & multum poposcit natura admisceretur massæ ciborum, & multum quoque cibus quibusque inest: sed postea etiam caloris actione omnia soluentis, & per media non rapidissimè ducentis, liquantur multa crassiorum, uicina gradibus liquentium, & persistunt etiam aliquandiù liquida. At quia calor agit omninò uehementior, qualis non exactè segreget liquida à crassis, sed rapiat etiam simul multa crassa: propterea etiâ nunc fiet, ut unâ cum liquidis crassa quædam, sed leuiora, moueantur. Ea autem à calore expansa magis atque magis, itaque ad morum acta, ab omnibus partibus amplexabuntur sese quoad poterunt, & coagmentabuntur. Ex crassis autem eiusmodi sic amplexatis, & cōposito humore, existunt postea quædam lenta & glischra, quæ simul comprehensa pituitam appellarunt maiores. Halituum & uaporum plurimum & per principia, & per media coctionis sit necesse est: nam cum primùm multū erat in cibus, tum postea plus attollitur de liquoribus: itaque per ea tempora uaporibus & halitibus complentur corporis omnia, ijsque crassioribus: agitati enim, atque dilati, sed nondum admodum tenuati sunt. Confectum uehementer, &

fatis.

fatis benè præparatū alimentum sub iecore, differtur inde per uenas. Hîc autem attendenda res notatu dignissima: uix enim egressis iecur uenis arteriæ sociantur, cæque maximæ. quod quidem propterea fit, quia calor animalis, qui adhuc est inditus sanguini, quamuis sit multus, non esset tamen satis coquendo usque ad extremum, alienisque naturis interimendis: quin citò reunderetur, & extingueretur: est enim ibi adhuc ut alienus, nōdum sibi materia supposita: & facillimè necantur naturæ in materia aliena. itaque noua uis succedat oportet & plurima, & gradu magna. In toto enim alimento probè conficiendo sunt totius nutritionis omnia: posthac autem, deficientibus uaporibus & halitibus, qui facile calorem animale recipiebant, in quibus igitur ille magnopere multiplicabatur, (consumuntur enim ij continenter & citò) crassa, quæ longiùs actionem moratur, facta reliqua, fuerint liberiora: itaque quamuis fracta, tamen etiam nunc intendere contrà potuerint actionem suam, nisi magna uis coërceantur. Spiritus itaque succedit subitò, qui subiens massam, deinde usque conficiat illam, usque ad consumptionem. Ac, quia laboriosum, & perdifficile est interimere naturas sedentes in materia; non dissociantur arteriæ à uenis, sed illarum maximas maximæ comitantur usque ad extremos artus; multos etiam ramos rami: certè nusquam dimittunt, nisi tantū spiritus sit inditum, quantus calore suo, adiuuante cognato, qui ex omni parte uenit, ad extremum usque materiam conficere ualeat. Dum autem coquitur sub uenas maiore etiam adhuc uis, alimentalis massæ semper constantis ex dissimilibus inter se, necessariò fiunt aliæ etiam segregationes: atque ea opportunitate spiritus sagacissimè, prudentissimeque utitur. Licet enim certè ea in re admirari illius sagacitatem, atque consilium. Nam per principia uenarum, aut sub illa breuì, ex materia semicruda, multo uapore adhuc recente refercta, multoque halitu, sed crassiore, constituit uiscera rubentia: scilicet tùm ad caloris copiam sub ea multiplicandam, propter coctionem, quæ sub unoquoque facienda est; tùm etiam ad sui ipsius caloris uim (quod uix possis credere) in ijs leniendam, quò tùm meliùs ducatur coctio, tùm diutiùs illa durent. Paullò magis coctam, sed rubentem adhuc, comportat in medium fibrarum neruearum, quæ

quæ diducuntur in instrumenta, quæ dicunt musculos: conficitq; inde spiritui ibi laboriosos exercenti motus, & inexistenti fibris tenuissimis, longeque productis, itaque alioqui fotu & fulcris destituto, toros quosdã satis molles, tepentesque, quos carnem propriè uocant uulgò. Reliquum quod fit, difficilius est, proindeque diutiùs coctioni relinquitur subuenis. Satis eo quoque confecto, ex leuiore eius specie cerebrum instauratur: ex grauiore & tenaciore nerui, tunicæ, membranæ: ex crassiore adhuc, chartilagines, ligamenta: ex crassissima, ossa. Quæ quidem omnia album iam induisse uidentur colorem: quod non alia de causa est factum, nisi quia inter coquendum halitus ille, cuius uerè erat rubor, quoque erant contacta omnia, nimium tenuatus, diffususque in amplius, in rem inuisilem est actus: prodijt igitur facies crassiorum, & frigidorum. Quæ etiam deinceps, quamquam calor numquam sit cessaturus, tamen numquam amplius ruborẽ resumere uidentur: scilicet, quia numquam amplius sub ea fiet simul tanta copia halitus, eaque consistentiâ, quæ iterum obruere crassitudines possit. eæ enim cum consistentia difficiliore, tum natura alieniores, calorem uel integrũ accedentẽ diù repellere, & aliquatenus etiã refringere & lenire poterũt, ut semper quoad possunt repugnant naturæ: sed præ difficultate ueluti ab imo ille capiat, & lætiùs moueat necesse erit. Talis aut redditus, & sic acceptus calor, sensim ducit opus: & de albore transpauitatem liquidã facit: tum de ea inuisilem: & quemadmodum sensim ducitur opus, sic natura in materia sensim accrescit. itaque ubi ea fuerit, quæ iam splendere posset, tantopere expansam habuerit materiam, ut quæ sit, specie ostendere nequeat. nam ut conspicuæ sint species naturarum in materiâ, requiritur supposita illa densior, & copiosior: in nimium exili illæ non apparuerint. Videntur autem durescere assiduè ossa, & cætera modò dicta, tum quia composito liquore, uaporeque spoliantur: tum quia ipsa præ grauitate nequeuntia caloris animalis sequi motum, uim effugientia, cogunt se in sese. At ea etiã pernacia tam cõmoda, tamq; opportuna est, quam uidemus. Semẽ in magna uenarũ, arteriarumq; simul cõplicatione, ac deinde in testiũ anfractib. per longã morã uidetur elaborari. Quia enim materia, quæ in eam rem desumitur, est paullò cor-

pulentior, paulloque difficilior: propterea ut conficiatur, cum multa & magna adhibeatur vis caloris, tum actio quoque protrahatur necesse est. Difficilior autem ea sit oportet, quia in semine quoque difficultas & tenacitas habenda est, quò postea enatus sub eam spiritus retineatur. Nam nunc eo consilio sub eam penitus efficitur halitus: qui quoque certè de re non ita facili fit, si ipse quoque tam longa actione fit: sed de ea fiat oportet, quæ quàm propinqua haberi penitus sub ipsa crassa possit. Albet autem semen, quamvis re iam benè calida oppletum, eausa, quæ modò de crassioribus albicantibus est reddita. Sub crassamentis autem omnibus pergit opus facere natura, cessare non potens, usque dum planè effecerit spiritum, si queat, de quibuscunque: facit autè omninò lentius, & tardius, ob causas, quas modò dixi. Explicans autem eorum dissimilitudinem, idque sensim atque ductim, quod facilius subinde est, æquabili actione facit transpicuum: pertendensque opus, mox agit in halitum: ac quia satis densa ea sunt, unde haud facilè quævis tenuitas, elabatur: demùm sub ea ipsa facit halitus copiam tam tenuis qui propè finitimus sit spiritui. Interea actione eadem, lenta, sed pertinaci, non ea modò, quæ nò longo intervallo sunt post halitum, sed ipsa quoque crassa, quantum potest, usque magis magisque explicat. Crassorum autem ipsorum id, quod fuerit leuius atque facilius, longa actione demùm reddiderit ita læuigatum, itaque tenuatum, ut propè lique scat, & à se mobile incipiat esse: sed uisciditatis adhuc referet aliquid, quam quidem asumpserit, dum calore expandente, agenteque ad motum, partes eius per intermedia quævis se inter se aptius coniunxerunt. Cum eiusmodi autem læuigata crassitie, tum, ut iam tenuiori, leuata paullum ab alia, componi acciderit halitum illum tam tenuem, cum alijs etià consequentibus, nec non aliqua liquoris copia, ut conferta, complicataque sunt simul omnia. Et quia halitus est inuisibilis, & composita illa tenacitas, à qua quidem tum halitus, tum cætera composita coerceruntur, ut crassiuscula adhuc, sic etiam frigidiuscula naturâ est, qualia quæ sunt, alborem habent: compositæ simul omnes illæ substantiæ nobis albo representantur colore: est, ubi transpicuo aliquo modo, crassiusculis adhuc paullò magis explicatis. Atque id est, quod

uocant

uocant adipem, pinguedinēque. Quod quidem æquabiliter caloris animalis more confectum, plenum re spiritui proxima, ei deinde est familiarissimum alimentum, quasi pœnus optimus, unde ille se facillimè instaurat: fomentum maximè idoneum, in quod interea suus calor facillimè effunditur, & auctu crescit, unde ipse uniuersus, uniuersaque natura roboratur. Talis res demùm ubi abundat, exsudare solet de laxioribus crassamentis, ac postea densioribus, quæ offendit, impingere, atque con-
 crescere, exhalante tenuissimo halitu, aut diminuta à frigidis bona ex parte ui caloris, à quo tota magis expāsa teneri poterat. Est enim ubi ab halitu tenuissimo inexsistente, calori animali propè elabente, euehitur: est ubi adhuc à spiritu & calore animali. Licet uerò admirari etiam in positione huius prouidentiam naturæ: ferè enim eò comportatur, aut adigitur, ubi uim animale, spiritumque maximè fouere, tutari à compositorū frigida ui, & roborare maximè debebat. Eoque hercule consilio est prospectū, ut omentum, res maiori ex parte confecta ex pinguedine, uentriculo & intestinis superstaret, partibus ex plurima, & benè magna, frigidaque crassitie contextis, &, præter uentriculum, destitutis alioqui fomento apposito. Spiritus non ubique in corpore animalis fit, quāquam ubique eius demùm causa efficiendi laboretur, nisi quid fiat ab incluso, proximum halitum ad se trahente, atque consumente: sicut naturæ omnes trahere uidentur usq; proximā materiā, deque ea augere substantiam, cuius sunt ipsæ. Cætera. n. corporis spatia ferè magis omnino perspirabilia sunt, quàm in quibus detineri possit materia, dum planè transcat in spiritum: uel non eo apparatu, eaq; uehementia, & celeritate laboratur per ea, qua materia antè, quā exhalet, in spiritū agatur. Sub unas autē arterias absoluitur spiritus. Sed uide quot artes, & quanta industria adhibeatur ad illum absolueudū. Confertur enim in arterias flos sanguinis: pars leuior atque tenerior, quæ maturè agi in spiritum potest, sicut maturè efficiendus ille est. inditusque est iam calor animalis, qui conficiat illum. Sublimamentum autem illud (ut sic appellem) sanguinis, sicut est tenuissimum totius massæ sanguinolentæ, sic etiam est calidissimum, & sua natura multis partibus iam promptum ad motum. Propterea uerò cum multa ui, tum magna &

acri, celeriterque confici oportet: nam (ut dicebam antea) quæ benè calida sunt, si magis excalfiant, nec citò perdantur, malè irritentur. Id autem præstare unus non potest calor animalis: agit enim ille quidem uehementer, sed lentius omninò, quàm oporteret nunc eò loci cum eiusmodi re. Et per accidens adhuc est ipse tota ea materia: & spiritus subuenit nullus: fit enim in arterijs spiritus, non retinetur, neque reuertitur emissus. Quare sanguis ille certè intereà miserit suam uim, & malum dederit naturæ. Ob eam autem rem additus est motus arteriarum, qui inter alios usus promouet factum spiritus. Insuperq; accersitur aër, qui uel sui immissione magno agere in amplum sanguinem potest: sed calore suo cum adiuuabit animalem in agendo, tum eum augebit & roborabit. Quàm enim calidus sit sua natura aër, indicet dura eius collisio: est autem tenuior quidam nostro spiritu, & perfectior æther, sed non tantò superior, ut ne sit substantia amica atque cognata. Tàm operosa res erat matura talis spiritus effectio. Frigidus autem oportet sit aër, qui inspiratur, (ut id ostendam quasi ex itinere,) quia sub pulmones, & sub cor, arteriasque furit tamen aliquo modo uis sanguinis modò memorati. Vt enim adhibeantur tot artes, & tot subsidia ad eum conficiendum: tamẽ eiusmodi natura omninò sic subitò interimi non potest, ut ne mittat tamen intereà aliquid suarum uirium, uel dum perit: sicut (exempli gratia) fecerit pi per, aut aliud sic calidum intrò sumptum. Ad eam igitur uim, quæ tamen aliqua furit, usque extinguendam, subuenit frigus delatum cum aëre. animalem enim calorem præualentem omninò multò, & tantum non uincens sine aliena ope, non re- tuderit, (modò ne sit nimium,) ità ut ne etiam agere, & opus suum facere possit. Quamuis enim non acri qualitate petat uis illa sanguinea: tamen copia & multitudine sui tantum posset, quòd (sicut cohibita respiratione sentimus) citò suffocaret naturam, spiritumque uniuersum, ni reprimeretur. Nec id dubitare oportet; scilicet alienam esse eam uim, propter quam requiritur frigus aëris: si enim non esset, non suffocaret: nullum enim patitur à sua ipsius natura. Factus autem spiritus, & per omne corpus effusus, dum ualens est, uti narraui, frangit, uincit, cohibet omnia dissimilia, ne in se possint quidquam grauius: po- titur

titur rerum, suo modo mouet, peragitque omnia. Sin debilitetur, amittatque uim; aut alia occasione dissimilia inualecant, atque superent; aut uerò foris aliena uis ueniens perfidat in cōpositis, uel etiam ipso, uimque, actionemque statuatur, efficaciusque intendat: tum uerò labor & morbi, qui pro naturarum rebellium, inimicarumque ui, pro substantiæ etiam importunæ consistentia & mole, tam uarij accidunt, tamque multiplices.

Cur, & quo modo calor animalis in dies fiat qualitate maior: & quo modo ille idem consumat animal. CAP. XVIII.



Alor autem animalis in dies uidetur accrescere, & qualitate fieri maior, nisi fortè per senectam, per quam aut non usquequaque sic fieri, aut decrescere omninò, & rursus minor fieri cognoscitur. Neque tatus modò id indicat, qui fortè aliquo modo decipi posset; uerum ipsa, quæ fiunt, opera. Namque usque ad ætatem affectam in dies exacuitur & efferatur uis eius rei, quæ dicitur bilis, & maior eius copia aggeritur, quod fieri non posset, nisi à calore uehementiore; eamque acrimoniam exacerbante. Tum usque nigrior redditur sanguis, quod quidem ob populationem liquidorum & tenuiorum euenit, quæ fit à calore uoraci. Eius autem effectus causam nosse, non uoluptuosum minùs, quàm utile fuerit. Sed ut cognoscatur, accipienda priùs duo, quæ unicè ad rem declarandam faciunt. Vnum est: calorem spiritalem multò maiorem esse, quàm qui propriè faciat humorem: quam ob rem uel si fortè sit factus humor, per se quidem non sinet esse, sed quam primùm poterit, uorabit, atque consumpserit. Alterum est, quod à me ut primùm etiam recta (nisi fallor) ratione est animaduersum, sic multis locis ambitiosius decantatum: nempe, calorem medium omnem per se in dies accrescere gradu, & fieri maiorem, causa, quæ etiam in superioribus est significata. His cognitis, cognitum iam est, quod quærimus. Calor enim animalis uorabit semper uapores, humoresque compositos, ut substantiam dissimilem, inferiorisque naturæ. At crassa, quæ difficiliùs mutantur, resistuntque longiùs, facta reliqua, co-

gent sese simul, sicut habent de more crassa omnia, humidis, quæ commista erant, abeuntibus; constringentque: unde siccitas, & densitas eorum. Iis uerò constrictis, & densatis magis, necesse est, spiritus cum suo calore diutiùs sub illa morentur: difficilior enim fit exitus. Diutiùs moras calor, magis qualitate augetur ibidē: nō enim uel statim, uel umquā summus gradu est noster calor. magis auctus, uoracior est: dum magis uorat, maior fit siccitas, constrictioque crassorum, quare deinde diutiùs adhuc ille coërcebitur, unde fiet etiā sub coërcentia maior. Re autem sic procedente, fiet, ut demum peracris efficiatur spiritus, qui sub iecore, quod (ut diximus) est quasi focus coctionis usque ad media; iam præcipere, & torrere sanguinem ualeat, ut ex nigrore cognoscere erit. Eoque tempore acciderit id, quod aliquādo in iudicio de hominis natura potuit imponere ueteribus: scilicet, acrem bilem quodam modo adaugere caloris animalis edacitatem. Ea enim iam defectu humidorum non satis lenietur; & ad uehementioris caloris uim magis exacuetur: acutior autem facta, calore animali tangente atque mouente, proferet ipsa aliquid, miscebitque, uis suæ: quæ quidem uel dum extinguetur, uim acerbare animale poterit: poterit & ipsa quoque interea quid afficere alia composita, si plus nimio ualuerit. At sanguine præcepto, ac tosto, necessariò deinde malè sequitur opus coctionis & tenuationis: eaq; malè procedente, spiritus etiam confectio malè procedat oportet, fiatque ut impurior, fuligines simul iam ui caloris efferente, sic paucior. Ob materiam autem non ritè tenuatam, caloremque uorantem, deficient etiam halitus & uapores, quæ est materia, per quam facile multiplicatur calor: itaque ijs deficientibus, deficit etiam copia caloris animalis. Qui igitur cum copia iam sit paucus, sed ui igneus, siccat tantum superficiē alimenti, atque torret: intrò non subit. Crassitudines aut non euictæ & cohibitæ, mox omninò proferunt suam uim frigidam: unde frigida materia uagantur per corpus, & morbi exoriuntur frigidi: à quo frigore etiam spiritus, licet ex eo, quod euincitur, fieri possit acerrimus, afficitur, atque torpescit: unde uis quoque caloris deinde erit languidior. Materia autē, ut dico, non euicta atque tenuata, reque sic in dies magis magisque procedente, demum cōdeducitur

eitur res, ut admodum exiguus fiat spiritus, & ad extremum nullus: sicque deficit animal senio. Quam uis enim arde contineatur spiritus ab his inuolucris, tamen tandem, in tempore non ualde longo, sua ipsius ui fit tam tenuis, ut per constrictissima quæque ualeat foras euadere, uel suo impetu, uel etiam (si libet addere eam causam) compulso copiae usque consequentis. Et ut nunc sensim fit continenter, sic postea sensim it continenter. Ut uerissime, & sapientissime olim fuerit ab Hippocrate dictum: *Anima hominis generatur usque ad mortem: & Extinguit nos calor ille, qui corpora produxit.* Quamuis interpretes Galenus uel non assequens, uel fortè non assequi se simulans ea, quæ inclutus ille senex felicissime pronuntiârat, uel ut non dicta ab Hippocrate conatus est uocare in dubium, uel alienis interpretatus est modis. Verè enim anima, nimirum spiritus, generatur usque ad mortem hominis: & eius caloris causâ, à quo constituimur, exposito modo deficimus. Certè quidem si is non sic ageret, multò citius deficeremus, uictò contrà illo, atque extincto: tum uerè ei propriè alius est, ppositus finis, quam nunc sequitur: tamè propter ei⁹ ipsius actionem is sequitur, & eius omninò culpa nunc etiâ deficimus. Eat nunc antiquitas, prædicetque, calorem animalè proprium esse totius corporis humani, qui non modò assidue consumit corpus, sed ipsemet est in causâ, ut tandem sub eo penitus deficiat uita. Neque inconueniens uidebitur nobis, ab uno eodemque calore his qualitatibus corpus constitui, atque consumi, sicut Galeno uisum fuerat: nam (ut iam non semel dico) hoc non propriè ille constituit, uidelicet tale corpus: propriè spiritum unum studet. Sicut ipse spiritus quidquid mouet, quidquid format in hoc corpore, & de hoc ipso, nunc quidem necessariò, sed primò per accidens mouet & format: scilicet, quia eo includi, & sub eo esse aliquandiù accidit, & interea ne momentum quidem potest uiuere sine motu. Temporarium enim quid est animal, tamdiù durans, quamdiù substantiam alterius iam ciuitatis, sub hoc corpus esse, & agere contingit inuitam, hoc est præter primarium, & in primis proprium naturæ suæ impetum. Ne uerò erres cum inscijs, *REX* optime, quia igneum dixi spiritum, credens talem non posse uiuere: uita enim cum nihil sit aliud (ut prius dicebam) nisi

nisi agitatio secundum suam naturam; erit omnium substantiarum, quæ sint usquàm, quæcūq; & qualescumq;, nedū spiritus. Non propterea spiritus pyraustarum non uiuebat, quia planè igneus esset; sed uiuebat, ac dum inter ignes esset. Sed cū sic fiat, nempè ut causa eiusdē caloris, à quo constituimur, deficiamus: consultò fecerint ij, qui ubi non obstiterit morbi aliqua importunitas, per annos feruentiores, assiduè, adhibito modo, refrigerare & rigare humore corporis habitū studuerint, & per senium tepidè humectare. Haftenus de operationibus, quæ clariùs apparent in spiritu uago; quibus addidimus ut corollarium causam, propter quam accrescat calor: deinceps de ijs, quæ in incluso magis conspicuæ sunt.

Quo modo spiritus moueat loco: & quī unus, ab omnibus partibus idem, possit eodem tempore pluribus uarijs & diuersis mouere motibus: & multis etiam partibus incipere alios atq; alios: tum eosdem modò citatiùs edere, modò remissiùs & tardiùs. CAP. XV.



Motum per locum planè ædit spiritus, ciendo sese, interna sua ui, in quam partem uult. Ciere autem solet duobus modis: quippè uel solū se, secretò à cōpositis inuolucris, (nam quamquàm coërcetur ab ijs ne eat, non propterea tamen quasi alligatur, configiturue ad illa, ne quos sub eorum caua liceat, secum exercere possit motus) uel cum compositis. Composita autem simul secum mouet utens neruis, & fibris, quibus inexistit, quibusque ea sunt colligata, tamquàm habenis: neruos autem & fibras, sese illis applicando & ueluti affigendo, ac tum sese ciens, cogensque, quorsum cogere intendit. Vt autem declarem, quī ille uarijs, & diuersis mouere possit modis; atque insuper (ut uidetur) motuum alios alijs incipere partibus; proferenda mihi quædam axiomata, quæ in causa unicè possint adiuuare, sed ea docere de motu, quæ prorsus ignota fuere antiquioribus. Aio autem, nequaquam motum contrarium esse motui, ut dicunt aliqui; uidelicet quo ad uias, quibus tenduntur motus: neque rectum circulari, neque

que qui sursum, ei, qui deorsum, neque qui ad dextram, ei, qui ad sinistram: sed immobilitatem motui contrariam esse. Eæ enim operationes uerè contrariæ sunt, per quas occidunt naturæ, & corrumpuntur corpora in alia: substantiæ autem à se mobiles, quacumque uia moueantur, motu æquè conseruari & uetari uidentur: ut spiritus animalium: ut ignis, qui circulari, & recta, & obliqua latione accenditur. qui quidem si motu penitus priuetur, intereat breuè: ut substantia immobilis, si uelocissimo motu rapiatur, nō diū sustineat eam operationem. quippè quia res habet, ut dico: & motus unica est operatio, conueniens substantiæ à se mobili; nec fit contraria, quia alia uia pertendatur: & sola immobilitas contraria est motui. Vna alia ratione motus contrarius esse motui potest, uel circularis circulari, & rectus recto: nimirum sui qualitate, hoc est, celeritate agminis. Nā quæ circulari motu (exempli causa) agitant corpora, sed lento & pigro, sic eorum ferente natura; si ualdè concitentur, & diū rapidè agantur, mutantur omninò, corrumpanturque, eamque assument naturam, quam decet tam rapidus motus. Quod quidem immobilitatis ratione procedit: quò enim tardior substantia est, eò magis ad contrariam mobilissimæ accedit naturā: & per legem nulli, ut extra sortem, sic neque supra gradum operari licet: neque si sit immobilis, agitare motu per locum, ut neque contrā: neque si sit tarda, à se ire celeriter, ut neque contrā. Mouere uerò in hanc, aut illam partem, hoc, illo ductu uia, æquè licet cuicumque substantiæ à se mobili: & quocumque moueat, sibi conuenienter, & salutariter moueat, si usus, necessitasue exigat. Iam uero substantia mobilis à se, quæ ut simplex est, sic etiam sit procul à contrarijs, conuenienti loco cognatis sociata; ea quidem non alium, ac undecumque simplicem & uniformem exercebit motum, tum qualitate agminis, tum itinere uia: certè enim simplici substantiæ undecumque simplex conuenit operatio. Sed si qua est, cui inter contraria esse, & cum ijs agere contingat, nec possit euadere; ei certè non licebit tantundem: sed, quia à contrarijs non poterit accidere aliud, nisi mala, præsentibus malis, quibuscumque & quocumque modis possit, prouideat, occurratque necesse est. Quare nunc spiritus, cum hac sit alienorum importunitate obuolu-

tus, & sub ea sit oporteat, quamuis sit simplex, multis, & uarijs, & diuersis eodem tempore mouet motuum formis, quia tot, & tam uarijs, tamque diuersis necessitati occurrat necesse est. Potest autem unus eodem tempore eos ædere & exercere omnes, alijs tamen atque alijs sui partibus, nam quamuis una numero, tota continua substantia est, tamen partibilis est: atq; omnibus sui partibus est mobilis, habetq; principium motus, naturā nimirū efficientē motus: itaq; quacumq; parte sic mouere oportet, sic potest, & mouet, ubique sentiens, & ubique promptus mouere, quacumque uia incommoda cuitanda, aut minuenda sint. neque enim rigor ullus obstiterit; qui tam tener est, & sui sequax. Quin eadem sui parte subinde potest mutare figuram motus, & mutet, si res exigat, & liceat per composita: nullum enim recusat modum occurrendi malis: & (uti diximus) per figuram uiae non ædiderit contrariam operationem. Quāquā certē in motibus uoluntarijs uocatis, & ijs, quæ fiunt tunicis uasorum, est prouisum, ut quā simplicissimē moueatur: duabus enim formis mouetur, nec ampliū: quippē, contendendo uel in rectum, uel in gyrum, ut uidere est in structura instrumentorum. in cæteris ualet exposita ratio. Sed si qualibet sui parte habet principium motus, & quauis potest quemuis capere motū: planē poterit etiā pluribus partibus alios atque alios auspicari motus. Neque propterea plura esse spiritus capita debet existimari: nā plures spiritus, & plura animalia sint oportet, ut plura sint capita: unius animalis unus spiritus, & unius spiritus unū caput est. Capitis enim illud est munus: nempe, ut ab eo omnis incipiat, & ad id omnis referatur motus; sitq; quasi cardo, aut uerius moderamen motuum omnium, qui fiunt tota uersitate, cuius id est caput. Et cū ita sit, iam si plura essent capita, plures essens cardines, & plura moderamina motuum substantiæ unius numero: & accideret etiam, ut alterum caput, ratione qua est caput, fieret moderamen motuum alterius, quando ad ipsum quoque oporteret peruenire alterius motus. quod ut esset rationi congruum? Vnum autem omnino cū sit spiritus totius caput, & illud, quod dixi sit capitis munus: hīc ego, quantum in me est, censeo statuendum: toto corpore, à nulla partē spiritus fieri motum aliquem, qui à capite non intendatur,

tur, & quod inde omninò per intentionem non capiatur: sicut inde ad omnes partes est conspiratio & continuatio, & intentio omninò in omnes. Ratio quidem sic dictat: & palàm est id fieri in motibus, qui dicuntur uoluntarij, cùm plures simul corporis partes palàm uolentes agitamus: fiet igitur in ijs, qui fiunt in-
scientibus (ut apparet) nobis. Cerebrum quidem certè perpetuò uidetur moueri ad motum arteriarum: neque attolli sic potest ab arterijs intercurrentibus: mouebitur igitur, principio capiente motum, qui in cor, arteriasque per neruulos est continuandus: fortè etiam in omnes alias partes, licet non eadem uehementia, ad spiritum in omnibus à premente grauitate relaxandum, tùm excitandum, uegetandumque. ad caput quidem motum totum, alia omnia, & eodem modo, sicut fieri potest, moueri par est. Agnoscere id quoque licet ex affectibus capitis spiritus. Est autem caput definitè ea copia, quæ est sub caua cerebri, sicut memini antea à me esse dictum. Neque obsit, quia multorum animalium cor abscissum uidetur adhuc posse persequi per se motum: omnes enim spiritus partes (uti dixi) principium habent motus: & satis est intendi illis semel motum, deinde per se etiam parumper persequi possunt, dum uirium tenorem habent aliquem. Sed cor abscissum inconditè tamen, turbateque mouet, & usque languidiùs, ut uim amittit in momenta, & commoritur. Certè si ea causa ualeat, in cauda etiam serpentum caput spiritus poni possit, quia detruncata satis diù adhuc moueatur. De commutatione uehementiæ & celeritatis eiusdem motus, quam uidetur posse facere spiritus, adhuc dubium restat, quam toties diximus per legē non debere licere. Sed sciendum, spiritum natura esse multò citatoris motus, quàm ædat cum hoc corpore; quem quidem motum exerceret solutus impedimentis: nunc enim, quia mouet hoc graue, & cum labore mouet, laborem temperat tarditate & remissione. Quare si uehementiùs, celeriusque conetur, possit planè per suam naturam, gradumque eius; sed cum labore maiore, quando magis tollenda grauis moles. Sic dubitationes omnes, quæ essent in hac causa, tolluntur.

Quo modo adat motum alterationis.

CAP. XVI.



Admirabilis prorsus est is, quem dico affectionis, motus. Cui enim nō sit admirationi, substantiā non modo excipere, ut patientem, & ut materiā, motus, qui dantur ab externis, sed etiā posse rursus, ac simul eodem à se ædere, & ciere in se ipsa, etiam alienos, hoc est eos, quibus de statu moueatur? Fit enim ad hunc modum: Quæ tangunt spiritum, (nam nihil quidquam percipi potest rei, quæ nō tangat) mouent eum omnia, planè ut sunt naturā, & iuxta intensiōem qualitatis, quam gerunt, & prout magis, minū sue adiguntur. Ille uerò dum uim patitur, nec resistere omninò ualens mouetur, planè facere non potest, quin obsequatur, hoc est eum, qui datur, sequatur motum: sed ut substantia est sibi usq; intentissima, & status sui studiosissima, ut tãgitur, nō sic finit, & nihil agit: uerū more sentiētīū omniū, cōuertit se ad id, quod tangit; amoliturus, si sit alienum, amplexaturus, si amicum: tam citò ipse, tamq; prōptè, quā nignauus & impiger est. Adhibetq; attentionem suam primò quidē in sese, quippè qui ipse recipit; deinde, sed propè eodem tempore, erga id, à quo est motus, uti ad principium motus, quod iam ipse petat. Dum autem attendit, (attendero go, quid nunc dicatur) ratione attentionis fit, ut à se iam, hoc est motu factò à se, sequatur datum motum, prorsus, prout moueatur, hoc est, ea ipsa qualitate motus, qua ab externo mouetur. Non est enim aliud attendere, quā aliquatenus cum studio sequi id, quod mouet, sed ità, ut ipsum moueat: eundem ciendo motum ad id, quo ipsum cieat animum, & eundo, sicut id ducat: aberretur enim, neque attendatur, nisi sic fiat. Conferens se igitur spiritus ad attentionem, confert sequens datum motum, & ciens se ipse rursus eo motu, quo ciatur: & rursus, simulque, cum capit, atque ædit: sicut nos toti, cū loco ui rapimur, atque etiam simul imus à nobis. Et is est modus, quo externis tangētibus, æditur ab illo motus affectionis: non quidem usque ut eam qualitatem faciat propriam suam: corrumpatur enim ipse oportet, ut id fiat, cū illa sit aliena: sed.

na: sed quando in ipsum ea accidit, & per eam iam afficitur, utendo ut aliena, tantisper, dum noscat. Atque hoc, quod ego nunc dico, est, quod Aristoteles monitus ab ipsa re olim uolebat exprimere, cum diceret: sensibile, & id, quod sentit, similia esse *αἰσθητά*, cum tamen nesciret facti rationem. Res uerò difficilis intellectu: quare declarationis causa conabor, ut potero, referre rationem in aliquibus affectionibus. Durum motum sequitur, æditiq̃ue cogendo sese, & fortiter obnitendo. Calorem igneum rapido quodam motu, & uis suæ concitatione. Frigus quodam modo tarditatem & torporem sibi inducendo, & quasi contrahendo se. Colorem cogendo quidem se, sed in primis uigorem & lætitiā naturæ suæ, quasi facem, uel extollendo, uel quasi occultando: quod inde cognosci potest, quòd postea clarè quò magis atras species uult secum repræsentare, eò magis laborat. extolli autem cōtingit uigorem eius, lætitiāq̃ue a lacri quadam citatione in maius: sed magis quadam auctifica sui condensatione: occultari uerò, quadam tristi naturæ ueluti demersione, & diminvente statum sui conspissatione. Nec dubitare oportet, an fiat, quod dico, & ut ego dico: planè enim oportet concipiantur affectus aliqua actione: & modus agendi & capiendi alius nullus potest esse. Sed quid dubitetur? iam a motis ijs, quæ uerè tangebant, possumus ea meminisse: & impossibile est id fieri aliter, quàm repetendo eos, qui ijs tangentibus rursus à spiritu æditi sunt, motus: si nunc repetit, ergò etiā antea fecit. Sequens autem spiritus eum, qui datur, motum, affectionemq̃ue, prorsus prout mouetur, atque afficitur ab attingente; par est, non modò eodem motus genere, sed eadem intentione, eodem numero, eodem tempore sequatur: tum præcipuè ijs ipsis partibus, quibus attingitur: indeq̃ue tanta amplitudine sui, figura eadem. Quidquid autem ceperit umquam eo modo, citaueritq̃ue in se, non erit aliud, ac qualitas, & incorporeum omninò aliquid: quoniam enim citet, & faciat in se corpora? quare etiam dum corpora attigerint, non aliud ceperit in sese eorum, nisi qualitatem. Cum hoc motu sine dubio semper erit coniunctus localis quispiam motus spiritus; sicut rursus per motum localem sæpè manifestè contrahitur hic motus affectionis: sed hic certè alius est.

Quomodo sentiat. CAP. XVII.

Ensus hic, qui iam est notus nobis, tantum est alterationum, & motuum omnino de statu: sed est tamen sensus affectuum, qui dantur à similibus, qui nulla fuerint alterationes; sed longè alterius generis. Ut autem fiat, ita uiuam, uix uideor exponere posse, tam penita ratio, & interna naturæ est. Dico autem sic: Primum spiritus est substantia, quæ uiuit: & cum uiuat; sicut naturæ omnes, quæ uiuunt, est usque intentus sibi, & tenet, & secum nouit statum suum. non quidem, sicut nos fortè nunc nosse uidemur, neque omnino ut sentiuntur externa ulla; sed ut secum agendo, & sibi intendendo, intentione quadam tenere & nosse uidetur oportere suum statum naturas. Quam quidem sui ipsius, statusque sui abditam in se intellectionem, esse quoque sensum, atque adeò primum sensum, iure opinor aliquis dicere posset; & ex intentione in sese fieri, atque constare: sed quia statuimus iam, sensum esse tantum ad tactum externorum, propterea, nitentes tamen omnino ei, quod nunc relinquimus, sic statuimus: Ut tangitur ab aliquo spiritus, quod quidem, quodcumque sit, semper adfert aliquid, quod non erat; ille qui alioqui semper intentus sibi est, excitatur quasi ad res nouas: & quemadmodum noui aliquid accipit, sic nouo modo, hoc est sollicitius, intendit in sese. Ibi uerò idem, qui semper tenet & noscit suum statum, teneat, noscatque oportet etiam nouari ceptum; siue augeri & roborari dulciter & uitaliter, quod fiet ab amicis, siue horridè agi in alium, quod fiet ab alienis. Sollicita illa excitatione ad intendendum in sese, aio exoriri sensum: tenere illud sollicitum, & nosse statum suum eo modo, iam noui aliquid casu habentem, aio esse ipsum sensum. itaque ubi prius dicebam, sensum esse digressionem affectus, nunc, re melius cognita, dico, esse status affecti. Tantum possum dicere de sensu: si non satisfacio, ignoscas rogo imbecillitati ingenij. Secundum qualitatem autem, quæ se moueri, afficique tenuerit, noueritque spiritus, nouerit etiam de ijs, à quibus est motus: & qualis erit qualitas, quam ab ijs ceperit, talem quoque ijs attribuerit; & quot acceperit,

perit, tot attribuerit: & sic formatas, ut formatas acceperit: taliaque nouerit illa, quales ab ijs acceperit qualitates. Vt enim quæ tangunt, non possunt attendi, nisi secundum eum, quem ipsa dant motum: sic nō possunt nosci, nisi qualia peruenerint, seque noscenda præbuerint. Sensus quidem & motus affectionis semper sunt simul: sensus enim est dato, captoque affectu: tamen aliud est capere affectum, aliud nosse & tenere, se sic iam habere, & sic esse affectum. quare meritò etiā ab antiquis sensus & motus duo diuersa posita sunt.

Quo modo spiritus imaginetur, & quo modo recordetur.

CAP. XVIII.



Qum imaginatur spiritus, recolit omninō secum formas motuum, quos antea in se effecerit, dum ad sensibilia mouentia moueret se, sicut exposuimus, uel omninō illis assimiles. Nihil enim possumus imaginari, quod uerē aliquando nō perceperimus sensibus, aut quod ijs, quæ percepimus sensibus, non fingamus esse simile. Inde enim ea, quæ sensu percipere non est, ferē imaginamur forma eorum, quæ sensibus percepta sunt: ut *DEVM* & Angelos pictores pingunt humana facie: ineptē quidem, & indignē, sed tamen tolerabiliter iudicio uulgi, quando sic quoquo modo captui ipsius consulūt. Sicut autem spiritus erga sensibilia tangencia, dum se ad illa uerteret, à se rursus eodem modo, eademque forma motus est, qua ab illis tangebatur, efficiens quandam *ἁντιμόρφωσιν*, ut sic loquar: sic cū secum recolit images, eodē, sic factos, recolit motus, easdem sibi ipse secum figurans, & repræsentans formas: totque generum recolit, quot sensibilibus generibus obiectis reddere coactus est. tam egregius ille est (ut sic dicam) *μορφοποιός*. In ea operatione illud mihi magnopere uidetur mirum: nempe, quod images, quamuis sint in ipso spiritu, eius ipsius parumper alteratis qualitatibus: tamen apparent non modō alienæ, sed etiam separatæ, & tam longē positæ, quàm uerē cōspectæ res sunt, aut etiam conspici fingere possumus. Alienæ enim uidentur, planē quia alienæ sunt, hoc est factæ motibus & dispositionibus alienis: sed de longinquitate,

tate, qua referuntur, non possum in præsentia aliud, quàm ostendere simile. Vides quæ à speculo redduntur imagines, & quæ à conspicio adeunt oculos nostros cernentium? sunt enim à conspicio species, quas nos excipimus, non quæ ab ipsis rebus attingunt conspiciendum. Tàm longinquæ adhuc forsan apparent, quàm sunt res, à quibus primò manant species. Nec propterea appropinques tibi conspectum specierum, quia speculū, uel conspiciendum tibi appropinques; ne quidem si tangas eorum superficiem superficie oculorum: sed semper tantundem remotæ uideantur. Sic poterit fieri, & fit omnino in ipso spiritu: nempe, ut in eius ipsius superficie eidem offerantur species tàm remotæ, quàm uerè antea sint uisæ, aut ipse secum ponere possit. Rationis redditio non est huius loci, atque temporis. Ex apparitione autem imaginum, quæ spiritui fit sub ipso, nihil luminis subeunte foris, colligi potest, luminis participem esse illum, & redditurum lumen, si densetur magis. si enim non esset, non fieret illa: nihil enim omnino à cernente ullo, secundum naturam, cerni potest sub tenebras. ille uerò cum imaginatur, cogitur in sese. aliàs nimium exilis, hoc est nimis diffusa tenuitate est. Est uerò cum euidenti sensu imaginatio; quippe quia spiritus iam capit & tenet alienos motus, alienosque affectus; per quos quidem ille alienis modis redditur attentus.

Recordari, primò est recolere eiusmodi formas: actus recolendi eas: tum per eas iterum capere sensum eorum, quorum sunt imagines.

Quomodo intelligat, & quo modo ratiocinetur.

CAP. XIX.



Intelligere, quasi intus legere, est, spiritum uel secum quasi in suo recessu, uel quasi ad interna rerum penetrando, assequi, & deprehendere quid, quod sit: primū quidem esse id, tum ut sit, & qua ratione. Tantum enim esse deprehendere, est quasi coniectare speciem aliquam rei, quæ tamen quid, aut qualis sit, non dum appareat. Ratio, qua res habet, est id, non quod illam, sed quo illa se, tamquam aliquā notā, manifestet: ut ipse per te potes aduertere. Quid-
quid

quid autem est intelligendum, planè oportet obijciatur substantiæ intelligenti, eamque sui aliquo modo moneat. Placuit autem nostris maioribus, ut intellecturi auocaremur ab obiectu rerum uerarum, quales offeruntur sensibus, & speculareretur phantasmata: quasi interiùs, aut perfectiùs liceat comprehendere res per imaginis, quàm per ueræ rei obiectum; aut quasi imagines non essent cum sensu. Obiectas autem imagines, atque adeò conceptas habens spiritus, quia ab ijs repræsentantur illa, quæ uerè antea sunt præsentata, uel omninò illis assimilia; rursus uidere uidetur eadem, aut assimilia illis: contuensque & noscens, uidetur planè deprehendere tùm esse ea, tùm tali ratione. Nam si res ipsa imagine repræsentatur, ratio quoque rei repræsentatur, quæ nusquam est ullo modo extra rem, & sine qua nulla res est. Actus autem intelligendi existit hoc modo: Intendens usque sibi spiritus, attendit nunc in se, contueturque & dignoscit alterationes & affectus, qui imaginatione citati in se sunt. Dignoscens autem eos, oportet ea quoque forma dignoscat, qua sunt effecti. quia uerò illa iam simulachrum est ueræ rei, sicut exposuimus, aut omninò assimile: fit ut spiritus nunc hanc formam contuens, rursus rem ipsam præsentem habere sibi uideatur, rursusque deuenire in eius notionem. Quia enim naturà (uti dixi) impetu attentionis fertur ille ad capita motuum, quæ sunt ipsæ substantiæ, ut ad ultima, solida, & per se consistentia, ubi tandè sistere aliquo modo motum & quiescere possit: motus enim semper alterius est, & ab altero, & quātum in se est, semper eum habebit in motu: propterea uel quando uerè tangitur ab externis, uel etiam cùm postea secum repetit motus, fertur ad ipsas res, & ipsas captat substantias. Noscens autem rem, planè & esse illam, & sic esse noscit. Atque sic etiam amoto uero obiectu rerum, per suos ipsius affectus, eorumque formas, deuenit spiritus ad notiones rerum, & assequitur, comprehenditque tùm esse eas, tùm esse hac, uel illa ratione, quod est intelligere. Atqui hic idē uidebatur modus noscendi res etiam cùm uera obiecta excipiebamus: non enim uidetur alia differētia, nisi quòd ibi ad res uerè præsentis mouebamur, hîc ueluti ad præsentis: num igitur idem & hîc & ibi modus erit? Dicam liberè quod sentio: nisi uir quispiam maior aliam

O mihi

mihi ostēdat rationē; uel hāc ipsam uulgatā intelligendi, quam ego forsan nō satis assequor, melius declaret; quantū in me est, statuā indubitanter, esse prorsus eundē, consimilemq; modū. Vtrobique enim forma alterationis concepta est mediū, & quasi dux, ad rei comprehensionem, ibi uerē præsēntis, hīc uerē præsēntis uisæ. Quin, si iam uerum discerno, uideo & hīc & ibi, spiritum primò in se alienorum noscere imaginem: formam nimirum illam à se in se datam, & sic conceptam, secundū eam, quæ externū mouens tangit: primò enim ea, quæ in se sunt, tenet & noscit: cætera, & res ipsas, per eam. & forma, hoc est imago, est semper eadem, ut prius facta ad rem tangentem, sic nunc reperta. Imago uerò est tantum simulachrum ueræ rei: itaque tantum ab ea referri potest, quātum à uera re offerebatur: tantum igitur assequemur ab ea, aut certè assimile: si quid ampliùs putemus, certè fallamur. Abstractiones formarum à ueteribus fictæ, falsæ sunt: & quo modo esse possē uideātur, æquē fiunt in rebus etiam præsēntibus, atque in solis imaginibus. Vniuersalia quoque illa sunt superiore libro exagitata: quid igitur restat aliud? Quòd si res uerē præsēntes, carumq; rationem iam uerē oblatam assequi, sentire eas est, per imagines autem intelligere: tantò nobilior, præsantiorque erit sensus intelligentia, quantò solida umbris, aut uera fictis. Sunt, qui obijcere soleant, intelligendo facilius posse errare nos, quàm sentiendo. Sed id magis confirmat, quod ego dico: ostendit enim, quantū sensus intelligentia sit uerior, & dignior. Error autem contingit, quia sæpè uolumus iudicare de ijs, quæ sese nobis referunt, non percepta omni eorum conditione: iudicantesque ex una nota, aut duabus, quæ ostendantur, quæ fortè etiam in alijs possint uideri, tamquàm omnibus undecumque cognitis, possumus falli. Sæpè arrogantiores ad ea penetrare uideri uolumus, quæ nullo modo ostendūtur, aut penitus sub alia facie rerum; & falsas nobis confingimus imagines, & rationes. Sicque temeritas, & priuatio comprehendendi res, omnē uic earum conditionem, ducit nos in errorem. Obijci etiam solet, intelligentiam non uideri corrumpi ab excellenti intelligibili, ut ab immoderato sensibili corrumpitur sensus. Sed id fit, quia cū intelligimus, sicut uoluerē maiores, nullum uerum externum agens contorquet

quet suā uim in spiritū, sed leuiore motu ab eo ipso ex se efficta imagine refertur, quod refertur: Sed alia etiam accedit causā: scilicet, quia pro sensibili, usque res quæpiam, quæ uim alterandi habeat, accepta est: pro intelligibili autem non unquam, ut uidetur, sed semper accidens quoddam, quod quemadmodum ne exsistere quidem posset uerè ullo modo usquā, nisi beneficio alterius, & in altero, sic neque referri animo ualeat, nisi beneficio alterius, & in altero, nempe imagine. Sed afficere omninò intelligibilia uocata, quamuis leuius, uel propter affectus, qui imaginibus reddendis contrahuntur, uel propter attentionem, indicet labor ea meditandi, & attendendi, & subinde satietas & fastidium: quod sit signum, corrupturā spiritū tandē eius operationis, eorumque obiectorum meditationem, nisi dimittatur. Ea quidem ratione uidebitur differre sensus ab intelligentia, si sensus pro perceptione & dignotione sui ipsius motus, affectionisque accipiatur: intelligentia autem pro notione eorum, quæ per motum, sensumque noscuntur. Quod si dicatur, liceat etiam per me, modò ea, quæ iam medio sensu nos assequi dicimus, intelligere etiam dicamus. Verum tu hinc memor dictorum forsan obijcias, mihi etiam saxa intellectum ire, quando superioribus disputationibus asseuerabam, omnem substantiam naturalem sensu præditam esse. Sed ego non propterea turbabor: dicam enim, quod dicebā, cū agebam de sensu naturarum: uidelicet, ut sunt genera, species, ordines, gradus earum, sic alias promptius, alias tardius, alias exquisitiùs, alias stupidiùs assequi & noscere ea, à quibus moueantur: alias forsan plura, alias pauciora: tum alias non nisi dum iam attinguntur ab externis, alias etiam per se postea recolendo secum motuum & affectum formas: naturam tamen nullam penitus facultate intelligendi, hoc est deprehendendi atque noscendi ea, quæ tangant, sui que moneant, priuari debere. Tam ratiocinari, fuerit, considerando (quod est quasi defigi in actu noscendi) uersari circa res, legereque earum rationes, uel pergere per eas, comprehensas, ut quidem res referre uidentur; coniungendo, disiungendo, & faciendo cætera, quæ cū ratiocinamur, facere solemus.

*Quo modo fiat memoria, & quo modo tamdiu
duret. CAP. XX.*



Eminisse autem, est retinere formas, rationesq; perceptas. Sed quo modo eas retineat spiritus, secreta ratio est: puto autem eam esse: Memoria manifestè est eorum, quæ insigniter mouerint, siue nouitate, siue ui, siue frequentia motionum id sit factum. Id omninò cum sit; putandū est, quòd spiritus, qui admirabiliter, & tantā pròptitudine se conuertere ad alterationes solet, licet præterierint ueri motus, tamen postea etiam secum ueluti quærit ea subinde, à quibus insigniter sit motus, uel expectans ea, uel timens. Eius rei dum sollicitus est, semper secum habet aliquod initium capiendi ad eorum attentionem motum, repetendique mouendo formas: quod dum habet, & facit, rationes motuum, atque formas secum ipse cōseruat. Mihi eius facti indicium est, quòd sæpè dormientibus nobis, uel nihil de quibusdam cogitare uolentibus, subit memoria eorum, eorumque magis, ob quæ recens moti sumus. Nec uerò dubitetur, quia tam breuī copia est spiritus, ut possit uideri, non posse eodem tempore initio motionis, motu omninò, tot rationes, formasque motuum conseruare; & eo minùs, quòd non potest una eademque particula plures eodem tempore exercere motus. Nam neque tam breuis est eius copia sub cellas cerebri, ubi illud facit, quin eodem etiam tempore plures capere possit motus: namque etiam minora specula uno positu ferè innumeras simul capere uidemus imagines: neque tam segnis est ille, ut dum unum ædit, alios penitus mittat motus: sed attentus omnibus, à quibus insigniter sit passus, iam ad hunc, iam ad illum celeriter conuertitur motum; ut cum externorum captamus modò illud, modò hoc: leuiter ferè, ita ut non usquequaque fiat hic manifestus sensus, sed tamen tantum, quātum sit satis ad motuum, formarumque conseruationem. Quamquàm, quia non potest omninò unus attendere plurima, plurimosque recolere motus, perit in dies multorum memoria. Ob eamque rem, scilicet, quia laboriosum est ei eodem tempore, uel subinde breuī, plures distinctè

finctè exercere motus; ferè exposcimus capita, summasque rerum: pauciores enim, & breuibus spatijs comprehensas, commodius tenere, & minore recolere labore spiritus potest. Solent iuuare consequutiones rerum, rationumque: namque uno motu repetito, spiritus postea quasi uiam legens, addit suo impetu alios, quos alias ædidi consequenter. Solent & similia, & contraria: namq; illa consequutionem, hæc oppositionem statim offerunt consequentem. Vt autem tamdiu durare possit memoria, longè secretius forsan est longeque ignotius. Spiritus enim quamuis crassis, & densis integumentis continetur, tamen it omninò continenter, uti diximus, & nouus est ferè in dies singulos: & quamquam similis usque est, tamen non usque idem numero est: ut, si diu manere debet memoria, modus sit aliquis oporteat, quo usque præexistens subeunti suos communicet motus. Sed dubium non est, quin sic fiat: fieri enim aliter non potest. Modus autem communicandi unus fuerit: quippè unio. quia nimirum subiens cum præexistente unus fit, sic, ut ille cum eo, qui iuit, unus erat: non quidē numero, ut pars elapsa sit hæc ipsa morata; sed apta substantiæ continuatione; uis, affectuum, operationum omnimoda communicatione. Quæ enim benè mobiles sunt substantiæ, & nō nimis ampla mole continuatæ, & undecumque aptæ sibi sunt, admirabiliter secum conspirant: ab omnibusque partibus affectæ ad omnes, omnes omnium omnibus communicant motus: ita ut non magis plures earum partes, quam unum iam sint omnes. neque solū ea copia, quæ iam collecta est, sic secum est: sed si quid similis, cognatæque subeat, ueniat pariter in omnium communionem. Sed tamen, nisi subinde recolantur motus, pereant breuī formæ: laboriosa enim est ea talis, nec spiritus naturæ conueniens operatio; atque affligatur ille mouendo: quare breuī remittit: tum per communicationem, traditionemq; nouo subinde spiritui, languescunt motus, & in breui obscurantur, & confunduntur, & sic demum finiunt. Vnde etiam potest duci argumentum, conseruari memoriam, spiritu ueluti præ solitudine semper retinente initia motuum, semperque mouente. Ille quidē inquires est: coërcitusque & grauatus hoc corpore, prohibetur ex ingenio exercere motum: itaque impatiens non

solùm immobilitatis, sed etiam motus non sufficientis ad facilem agitationem, præcipuè cùm retrahit se ab externorum attentionibus, recolit hos.

Operationes omnes spiritus esse motum & sensum.

CAP. XXI.



Edditæ sunt rationes operationum omnium: ijsque reddendis, sublata etiam iam dubitationes ferè omnes, quæ in ijs, aut de ijs poterant esse: in primis de imaginatione, recordatione, & cæteris, quæ post illas sunt enarrata. Agnouisse enim potes, ut eæ nō sint aliud, quàm ipse motus, ipseque sensus; uel simul uterque, uel solus alter: ita ut minimè propter illas alia sit nobis querenda in homine substantia ab ea, quam nouimus, & cuius omninò sunt motus & sensus. Et uerò ego uehemèter miror ea in re antiquiores, qui à circumstantia, aut accidente omninò aliquo decepti, fecerunt eas operationes alias à motu & sensu, & aliquas etiam dederunt alijs substantiæ, quàm quæ quoque per se primò moueat & sentiat. Planè enim ipsemet motus, & ipsemet sensus, sumpta tantùm circumstantia, aut accidente omninò, quod possit in ipsos cadere, referunt eam speciem, qua ueluti personati fefellerunt uiros tantos. Adhibe enim attentionem, si placet adhuc audire summam sermonis, qui de illis est factus, ut magis etià signatè, magisque certò uideas quod dico, & quod res est: nempè eas, quot numerantur, non esse aliud, quàm motū & sensum. Imago fit, recepto motu tali figurâ, hoc est sic actò: erit itaque imago motus. Recordatio est imaginis repetitio, & reditus ad sensum eorū, quæ referuntur imagine: erit igitur simul motus & sensus. Intelligentia omninò est sensus eorum, quæ offeruntur, quæque monent sui. Ratiocinari est sentiendo omninò ea, prout sunt & habent, cum attētionē quasi uolitare circa ea, aut, cùm erūt plura seiuncta, discurrere per ea: iungitur igitur etiam ibi motus cum sensu. Memoria uerò est conseruatio imaginū, hoc est talium motuum, & simul sensus, qui ob imagines obiectorum est. Quam ob rem, nunc re patefacta, si mutationem quoque alienorum uelis referre in motum, poteris enunciare

duobus

duobus uerbis: operationes spiritus omnes, quot quot sunt, non esse plures, quàm duas: motum uidelicet et sensum.

*Cur quædam operationes in altera spiritus parte,
alia in altera solum, magisue appareant.*

CAP. XXII.



Idetur aut non cõmittendum, ut tacita relinquatur causa, qua fiat, ut aliæ tamẽ operationes in altera spiritus parte, aliæ in altera, solum, magisue appareant: ne ppter eã res dubia aliquo modo relinquatur. Euenit enim illud nõ propter aliud, quàm propter cõditionẽ, qua po-

ni, & agere in corpore spiritũ partibus suis contingit: quæ talis est: Ea pars, quæ est sub cellas cerebri, est caput totius spiritus, ut dixi non semel. processus postea, (ut sic apellem) eius, qui ab eo extenduntur per ductus nerueos, (intelligo ea uoce omnia, quæ sunt ex albis, fibris, aut uillis, in quibus, ut index præcipuus, est mihi sensus manifestus) sunt quasi artus spiritus, aut rami, sicut arboris. copię deindæ, quæ eunt sub cætera corporis, sunt extrema eius, sicut arboris extremi ramuli & surculi. Caput autem ita se habet: nempè ut sit collectũ benè ampla copia, nullis interuenientibus alienis. processus quoque, quos dixi, procedunt ipsi etiam nullo alieno intercedente inter ipsos & caput, & quasi intersecante. ducũtur quidem subtiles propter angustias ductuum, in quos solertissimo artificio sunt ductæ fibræ & uilli neruei. extrema uerò spiritus, quæ ramulis & surculis assimilauimus, quæ sunt plurima, ex plurima spiritus copia, procedunt ipsa quoq; à ramis & ipso etiã capite, sed nullam in partẽ expeditè & liberè. tantã enim offendunt passim multitudinẽ alienorũ arctè conferctam, cui immisceri oporteat, ut penè opprimãtur. Inde uerò fit, ut caput in primis, deinde artus sint planè expediti per caua, in quibus agunt, & multã simul aptè iunctam habeant uim. extremis autem illis non licebit tantundem: nam penè obruta turba dissimilium, quæ sunt tam graua, ac difficilia, & interrupta passim, ubique impediuntur, atque grauantur, & uires collectas ita aptè iungere & conferre nõ possunt. Atqui capiti, quæ est caput, illud debetur: nempè, ut in eo fiat iudicium

ultimum

ultimum & consummatum motuum, affectuumque omnium, qui fiant ullo modo toto spiritu. Cùm enim id sit positum ut principium, & ut finis, à quo omnis incipiat, & ad quod omnis referatur, & ultimum statuatur motus: nec modò qui primò cietur & fit ab ipso spiritu, sed etiam qui detur ab externis: & cum motu semper sit attentio spiritus, cognitioq; ; fiet, ut uel in intendendo motu in partes, decreta attentione cum motu, uel in recipiendo eo à partibus, quasi statuta attentione simul cum motu; fiat ibi statutum & decretum motuum omnium. Sic autem quasi iudex erit caput totius spiritus uniuersitatis: & in eo etiã consummabitur & absoluetur, finis ultimi ratione, sensus & notio etiam aliarum partium: breuiterque erit caput quædam summa totius spiritus: ita ut si fortè partis alicuius motus non perueniat ad illud, aut ita languidè perueniat, ut non excitet ad attentionem: talis motus nullus uideatur esse sensus animali: cuius quidem iudicium, & sensus absolutus in capite fit. Ac rem sic esse, & sic cedere, unusquisque in se potest cognoscere. Res cùm ita habeant, rectè sequetur nunc, & secundum rationem latam à conditione rerum, ut caput & artus possint ædere maiores & citatiores motus, & aliæ partes non tales, sed admodum lentos, & non nisi multò post tempore conspicuos. Rectè quoque, ut tacto, affectoque capite & artibus, statim exquisitus excitetur sensus: tactis autem extremis illis, non. Si enim caput est etiam perfectior sensus aliarum partium in animali: multò magis, multoque exquisitiùs sentiet sibi ipsi primò datos affectus. ab artibus autem ad illud, ut nusquam interrupta continuatio est, sic etiã celerrimè transmittentur motus. taceo quòd caput usque attentum in omnes partes, attentionem quoque suam semper habet præstò in ijs, cum quibus expedita est communicatio. A partibus autem illis alijs ad caput & ad artus tam difficilis est & impeditus processus: quare difficilè quoque perueniet motus atque affectio: alienis occurrentibus, & excipientibus, impredientibusq; agmen motus: & ubi motus iam peruenierit, tam languidus peruenerit, ut non excitet principium ad attentionem. quemadmodum certè motus quoque, qui à capite ijs intenditur, aut communicationis ratione transmittitur, cùm deuenit ad impedimenta, tardè per ea procedit & lentè.

quam-

quamquam non oportebat citius peruenire ad eas motus intentos à capite, quando comportatio materiæ atque positio cum mora quoque facienda est. Sed ea caussa erit, ut partes, quæ neruo genere destituuntur, non uideantur sentire, uel si frangantur, uel si urantur: licet pars spiritus, qui sub eas est, & patitur, æquè possit sentire, & sentiat æquè apud se, atque ipsum caput. Porro uoluntas uix est operatio, sed decretum operandi: id autem (ut dixi suprà) in tota uniuersitate spiritus fit primò à capite quare iure eius solius est decernere atque intendere etiā eum, qui à uoluntate esse dicitur, motū: aliæ enim partes in ijs quoq. qui alterius uidētur cōditionis, pendent ab eius nutu, & sequuntur decretum eius. Ampli uerò motus, hoc est ampla forma acti, planè multæ simul collectæ copię sint oportet, quæ quidem eos capiat; nec non expeditæ: sed spiritus nusquam sic est, præterquam in capite: meritò igitur tantum in capite fit imaginatio. Deprehenditur tamen, admirabili modo motus efformatos, figuratosque, hoc est ipsas imagines factas à capite, mitti in cæteras partes per angustias & obstantia quæuis: nam sæpè palàm semini etiam datus uidetur à parente motus imaginationis. Intelligere & ratiocinari, si exsistere dicantur tantum ex imaginibus, palàm est iam caussa, quare cæterarum partium, extra caput, non possint esse: sed si recipiatur, exsistere etiam rebus ipsis tangentibus, erunt quoque cæterarum: & iam nihil est, cur non recipiatur, quādo intelligere ipsum sentire est, quod est partium omniū; & sensus nullius rei esse potest, quin noscatur unà ut ea habeat, & ut se se offerat. Erunt tamen, duntaxat dum illæ tangentur: non enim licet ijs postea repetere imaginibus. Memoria non potest esse, nisi semper expeditæ partis, cui nimirum uacet usque recolere motus: sed tantum capitis ipsius propter imagines. Mutatio autem dissimilium, & comportatio, & effictio, extra uasa, magis apparent in extremis illis copijs spiritus, quas superius dixeramus uagas: cæ enim ipsæ totæ cōmixtæ & cōfusæ sunt cū dissimilibus: quare eas ipsas iacere in illa uim, tum eadem impetu suo (cuius tamē intentio semper erit data à capite) secum conuehere, quò statutum est, contingit. Sed copia inclusa per se neutro eo opere faciendo præteritur: nā ipsa quoque agit usque in dissimilia, quæcumque sint contigua: & ipsa

tum nerueum genus sic produxit, tum sub cerebro cellas fecit. Sed unus est (ut undique ferè iam probatum est) spiritus, una natura : qui spiritus ut unus est, sic omnibus partibus sui secum continuatus est, toto corpore, per media quæuis. nihil enim corporis est tam densum, neq. tam solidum, quod æthereæ eius rei, quæ est sub omnia, quæque confluit per omnia, prohibeat penitus continuationem : licet faciat, ut ne tam aptè cōtinuetur. Ab omnibus ille conspirat in omnes, sicut etiam norunt optimi veterum : & à capite præcipuè est attentus alijs omnibus, sed rursus ab alijs omnibus ad caput. Capitis motus, affectusque sunt communes cum alijs omnibus, & rursus aliarum omnium cum capite, qui quidem sint alicuius momenti : uel negante noto hoc sensu. Neque tam partes eius hoc aut illud facere dicendum, quàm cum totum omnia, hac quidem parte sui præcipuè intendentem in hoc, illa in illud. Cumque unus est spiritus, totus idem, sibi consimilis : cunctus omnibus sui partibus æquè easdem habebit facultates, & cunctus eadem operabitur : hoc est mouebit & sentiet.

Cur spiritus uidetur quædam sentire, & cognoscere, & uelle facere, quæ facit; quædam non. Additurq., cur placeat cognitio, & scientia rerum: cur sint grata hæc sensibilia. CAP. XXIII.



Elíquum est, reddam eam causam, quæ ignorata, una maximè fecit, ut uiri magni errarēt in natura hominis, & ex duabus diuersis speciebus componerent animam nostram: nempe, cur spiritus, qui (ut iam est demonstratum) effector est omnium operum uitalium, quiq. hoc corpore inclusus nos sumus, eorum, quæ facit, quædam uidetur sentire & cognoscere facere se, quædā non uidetur: quædam uelle facere, quædā nō uelle, & tamē facere, & uel si contrā conari appareat, nō posse non facere. Causa est secretissima, de intimis naturæ eruenda latebris. Omnia ille sentit facere se, omnia uult, quæ facit: quī enim substantia usque sibi attentissima, sui que studiosissima, quæ tanta arte, prouidentia, diligentia, studio, ponit & tuetur statum suum in hoc corpore, sub quo

agit >

agit & mouet, potest iam suos viros non nosse motus? aut qui potest non decreuisse conferre vim ad faciendum, si iam facit? id enim est uelle. Sed illud est, quod mihi ut demonstretur, altius paullo incipiendum est. Non modò spiritus, sed substantiæ cuiusvis, quæ uiuat, duo possunt esse tempora agitandi, & duæ conditiones: per quas quidem accidunt ijs tam diuersa, ut quando fortè alterâ tantùm fuerint, nihil prorsus habeant eorum, quæ haberet alterâ: & ipsæ sibi iam aliquo modo videantur aliæ. Aut enim inter similes agunt substantiæ, aut inter dissimiles. Inter similes sequitur illud: ut tanguntur ab ijs, dari sentiunt vim amicissimâ, quæ inuet, quæ roboret, quæ auctet vitâ: itaq; sentientes tam carû affectû, uolunt eas, & appetunt, & amplexantur, si queant: possunt autē, ac statim, à se mobiles omnes: iunguntq; se illis quàm aptissimè: vimq; ab ijs capiētes & uicissim dantes, fouētes omninò se, conseruantesq; mutuò, unâ agitant: & quādo summum bonum, quod iam possit accidere (si tamen uniuersæ, quæ sunt eiusdem generis, coniunctæ fuerint, nā si non uniuersæ, minus erit bonum) sunt assequutæ, & secum habent, nihil quærunt extrâ amplius, nihilque attendunt: sed fruētes eo, unâ omnes, quin una iām factæ omnes, unam eandēq;, quam propriè, & in primis ferat natura sua, operationē ad perpetuitatē persequuntur. (in summis generibus hoc demùm fit absolutè: in medijs adhuc restat appetitus ad superiora.) Quid autem inter dissimiles? ab ijs verò ut tanguntur, sentiunt vim alienam, noxiam, agentem omninò ad interitum. itaque nolunt eas, & effugiunt, si licet, etiam insolito motu, uel etiam inuisa operatione: malunt id enim, quàm perdi, aut malè omninò haberi. Sin exdem obstant, aut alia de causâ effugere nō liceat; conuertunt se grauiter ad vim alienam, & subeunt illam, & inferunt quoque ipsæ contrâ suam, atque incunt pugnam. Interea autem, etiam si eueniat ut vincant, inuitissimæ erunt sub dissimilibus: neq; illud leue, aut paruum malū: sic enim multò minus erunt ex ingenio, sed duriorē conditione seruitutis. itaque ei quoque rei prouidere cogentur: adhibentesque vim, pepulerint, & egerint obstantem molem, quò incommodum etiam illud, quo premuntur, faciant minus, & tolerabilius, pro præsentī conditione rerū, quibuscūq; possint modis, sed la-

boriosis omnibus, & alienis, hoc est non propriè secundum naturam, sed sicut aliena quodā modo præscribunt, factis. Quam putas esse differentiam sensus, quem capiunt ab his, ab eo, quem capiunt ab illis? quantam studiij ad mouendum inter utraque? quantam denique motuum, atque operationum? Sane, quantum differunt contraria à contrarijs. Prior sensus est cōseruationis, posterior corruptionis. prior uoluntas, decreuisse iam semel, suo modo, proprio agentium liberè secundum ingenium, pertendere uim ad id faciendum, quo in fructu summi boni perpetuent: posterior, iam suis ingratijs constituisse, insolito, aut alieno, laboriosoque modo id conari, quo præsentī importunitati occurratur: & pluribus modis, si plurib. oporteat: & subinde mutando, si mutare oporteat: qui conatus si longiore tempore uehementior duret, eo ipso corrumpantur. priores operationes conseruatrices, uitales: posteriores corruptrices, perniciosæ. quemadmodū. n. propria operatione conseruantur naturæ, sic corrūpūtur tandē alienā. Et ex his patet, quæ cōditio sit, apud utrūq; genus substantiarū: & quæ apud utrūq; causæ operādi. cum priore enim mouēt, ut uitā cōseruēt eo statu, quo est: cum posteriore, ut ne necētur. Quī igitur substātia in altero genere occupata, quidquam teneat alterius? Nunc igitur spiritus obuolutus corpore hoc penitus secretò a suis, semper cum alienis inter aliena agere coactus, nihil tenet eorum, quæ teneret inter sua. Nouit tantūm aliena, alienosque motus, quia ferè ab ijs tantūm tāgitur: aliena tantūm attendit, quia semper ab ijs afficitur, & tam grauitè, ut ferè omnē cōuertant ad se ipsius attentionē: tātūm alienis modis conatur, atq; operatur, nam alienis usque obsequi, & ut ea quasi præcipiunt, necesse est. Suorū nihil sentit: quī enim sentiat, nisi tangatur? iam autem ne tangi quidem potest, nisi medio hoc corpore, quæ aliena res est, prohibetque purum, & aptum contactum. Sed ne cognosceret quidem sua & quæ sunt suorum, hoc nunc tantūm sibi noto modo cognoscendi: nihil enim tale daretur à similibus, propter quod ad ea grauitè oporteret conuerteretur, sicut nunc semper ad aliena. Numquam decernit, eo modo adhibere uim ad mouendū, quo cum similium uniuersitate adhiberet: est enim iam seorsum, in consortio alienorum. Numquam eam,

quam

quam illa in primis, & propriè maximè, operatur operationem: què enim possit, nisi eat ad illa, soluens se ab alienis? Ne scit quidem eorum quidquam: scientia enim nunc, est possessio imaginũ, formarumq; motuũ, redditorum, dum aliena graues infligerent motus: qui motus omnes ut laboriosè recipiuntur, sic laboriosè, infelicitèq; retinentur. i nunc, & iacta scientiam. Cùm autem sociatus suis, expeditus hinc, agitabit cum illis, si procul erit ab his, quæ mutant, certè nihil senserit umquàm tale: neque enim sentiat, quod non tangat: nihil simile uoluerit, quia non erit necesse consulere malis: nihil tale operabitur, quia nullum erit alienum, quod ui cõuertat ad se eius motum. Ne attendere quidem poterit à se hæc: nam intereà à suo impetu auerti oporteret, quod numquàm faceret à se. nec tenebit quidem modum conuertendi se ad hæc: sociatus enim suis, iam unicæ tantum cum ijs uacans operationi, cæteros omnes miserit, obliuioniq; dederit motus. Tum ne cogitare quidem: si enim cogitaret, cogeret sese, affligeretq; quod ab alienatio esset à suis, atque adeò à se, quando intereà mitteret modum agitandi secundum naturam suam. Quin dico: si sensus sit tantum ad tactum externorum, hoc est, quæ iam sint extrà, nec iuncta & unum facta: perierit ibi omnis sensus. iam enim non amplius tangetur à similibus spiritus, ut ab externis, sed unum cum ijs factus erit, non aliter, quàm nunc secum ab omnibus sui partibus unus est. Remanebit tamen sensus ille internus, secretus, quem superiùs nos significauimus. Sed ratio exposita, & dissimilitudo conditionum, atque caussarum, tantum ualet, ut etiam quæ media inter extremas, quas diximus, conditione degunt substantiæ, ubi ad alteram paullò magis accedant, (sed sèper oportet accedāt, quādo, uti dixi per principia huius secundi sermonis, uerè nullum potest esse tam exquisitè medium, quin uergat ad alterum extremorum, sitq; omninò de genere alterius) alterius nihil tenere sibi uideantur. Proptereaq; hercule spiritus, quāquàm quidquid mutat in hoc corpore, quidquid ducit, quidquid conformat, alienum est, facitq; aliter, quàm ferret primariò ingenium inter sua: tamen ipsemet nihil sentire, nihil per se nosse uidetur multorum suorum gestorum: ut de negotio, rationeq; coctionis, de of-

ficio comportationis; de magisterio conformationis. Scilicet, quia quamquam ea talia agens & faciens, cum alienis habet rē, aliena comportat, aliena tractat: tamen in agendo superat omninò potenter, nec quidquam patitur contrā grauius: tum materiā eam si nō suo in primis proprio, hoc est liberi, modo, tamē suo inclusi modo cōportat & format, nec cū nimio adhuc labore: nunc uerò querit sentire & nosse ea modo hoc, qui solus uidetur notus, qui quidem nō modò alterantium, sed nimiū id facientium, & horrificè ad se conuertentium est. Alius est is modus, quo ea sua facta nouit spiritus, alterius generis. Hoc quidem nouit teneri se inter aliena, & grauari tamen hoc pondere, & contristari tenebris: quippè quia ea statim nimia sunt. Spectabilis verò res: eodem tēpore substantiam aliquo modo posse uideri sibi, esse se, & aliā. Sed ne quidē earum operationū, quarum uidetur esse sensus manifestus, rationes in se ipso nouit spiritus, hoc est, quo modo mouens se ipse eas ædat. Cur obsecro? scilicet, quia ut existat cognitio vel hæc, vel etiam alia quæuis, quæ sit aliorū, oportet, ea, quæ sunt cognoscenda, sint etiā disiuncta ab eo, quod cogniturum est: nullum enim potest conuerti ad se se, & intueri tāquām aliud: duo enim esset oportere, non unum. Nunc igitur, quamquam alienos motus cicat spiritus, alienisque modis: tamen ipse est, qui mouetur, qui que sese mouet. Itaque nouit fieri à se motus, quippè quia alieni sunt: nouit quodam modo rationes eorum, quatenus uidelicet ijs uel aliena mouentur, uel alienæ repetuntur formæ: tamen ut ipse se adhibeat ad eos ædendos, & quomodo ædat, in se ipso nosse nō potest. Rursus res pulchra cognitu: quid aliquā operari operationem, quā sciat aliquo modo ex dimidio: hoc est, quantum per eam alienum aliquid efficiat, alienisque modis: cetera, quæ in se sunt, nesciat. Sic nouit spiritus imaginari se, memorari mouere corpus: modum autem, quo ea faciat, in se non nouit. Ne quidem quī cognoscat nunc uidetur scire, quando interna sua, & in ipso ea est ratio. Volens autē fortè nosse alterum generū modo, quo nouit alterū, quod quidē sit dū nos studemus nosse ea, quæ se non offerunt his sensibus; nisi fingat ad similitudinem rerum notarum, sicque transferat ad gen⁹ cognitum, non assequatur aliud, ac priuationem cognitionis. tam alia co-

gnitio

gnitio rerum alterius generis est. Atque hæc est causâ, qua alias operationum suarum sentire & cognoscere, alias non uidetur spiritus: quam qui nesciat, & aliâ quærat, toto erret cælo. *DEVS* meliora, inquires: si enim uera essent, quæ disputas, non essent tam grata sensibilia, ut sine captatione eorum uiuere nolimus; neque tantopere recrearent, quantum manifestè recreant: tum cognitio & scientia (ne de ijs sic mittatur) si non essent bonæ, & corrumperebunt potius, uti ais, non tantopere placeremus nobis in illis. Cui ego quid respondeam, nisi exponam causas eorum, quæ quæris, quando sicut exposui, se habet ueritas? Atque ut incipiam à posteriori: propterea cognitio, scientiaque rerum multarum, uidentur placere, quia noster spiritus seorsum iam est à similibus, cognatorumque uniuersitate, priuatusque est potestate unâ cum ea exercendi eam operationem, quæ perfectissima est omnium, quippe quæ motus comprehendit omnes. Dû igitur multos, & uarios, & exquisitos exercet motus, accedit quodam modo ad perpetuam illam, omnes complectentem, motus continuationem: nauiterque & aptè mouens, utcumque moueat, uidetur sibi dignus cælo, ut est: superansque alios consortes, dignus nobiliore adhuc, quam illi, consortio. tenens uerò quam plurimas imagines rerum, sic saltè imaginario cōplexu, quo licet, refert uniuersitatis suæ cōplexum. Sed labor cōparandæ, colendæque cognitionis & scientiæ exquisitarum rerum, quātus sit, sit indicio, quod pauci sunt, qui eum suscipere & ferre uelint; & nisi subinde cessetur, ferre nemo queat homo. In causâ autē delectationis istorum sensibiliū, afferā id respōsum, quod mihi adhuc ostendere nostrā hanc conditionem possit. Propterea enim ea placent, non quia uerè, & naturā spiritui sint bona: si enim aliterant, atque mutant, quā possunt esse amica? sed quia ueniunt ad leuamen malorum malorum. Ab hoc enim, quo ille coercetur, & obuioluitur, graui, stupido, obscuro, non modò prohibetur à motu suo naturali & libero, sed etiam premitur omnino, & sensim hebetatur, & stupefit, & contristatur tenebris. Quare ad leuamen malorum suorum, ut se leuet, uegetet, & exhilaret, uel cum labore ciet, captatque, quoscūque potest, motus, modò re iniuste afficiunt; & captat species rerum. Sic agit subinde artus, & ciet sonos, captatque, & à mitibus qualitatibus ciborum tagi amat. Lux certè aurea res ei est,

& quæ

& qua etiam cùm hinc emigrârit, naturaliter quidem, nihil ipsi accidere possit præstantius: sed nunc eius quoque rei respectus miseriozem ostendere hanc suam inclusi conditionem potest: cùm quidem eam serenam, quæ sit tam amica, tamq; adamata, non modò foc datam ferè excipit alienis speciebus, sed etiam extrinsecùs ad se quasi in obscuram cauernam uenire conspiciere solet: & quia alioqui ea priuatur, cum molesta attentione, & ferè cum laborioso sensu, ea fruatur necesse est. Cum molestia enim coniunctum esse eum fructum, sit argumento, quòd etiam à lucis aspectu subinde retrahamus nos oportet. Solares autem radios statim rectà ferientes non possumus ferre oculis, quia nò dum tantus gradu est spiritus, qui perfectione nobilissimas naturas adæquet. Vbi uerò magis adhuc perfectus de hoc corpore euolârit, seque etiam nobilioribus cognatis sociârit, si eo loci erit, quo contraria sint procul; ibi uerò immutatus, incorruptus, suoque statu fruens, usque à similibus fatus & uegetatus, & lumine æternùm exhilaratus; integer, æquus, clarus, hilaris, conuenientissimam, iucundissimamq; exercens operationem, summis omnibus fruens bonis, nihil extrà quærens ampliùs, nunc incomprehensibili uoluptate, perpetuùm agitabit.

P E R O R A T I O.



HÆc habui, *R EX* Serenissime, quæ naturali philosophia magistra scriberem tibi de natura hominis, deque humano spiritu. Qui quidem spiritus si est ea ipsa anima, cui à *DEO* (modò custodiat eius legem) fruitio cœlestium bonorum promissa est: & pro cuius salute *CHRISTVS IESVS DEVS, REX ET DOMINVS NOSTER*, mortuus est: statuendum nobis christianis, eum, *DEO* sic prouidente, potentia naturam superante, sub hoc corpore ab omni ui impetentium seruari omninò incorruptum: & post discessum à corpore habiturum eam sortem, quam ipse dederit

dederit *DEVS*. Sin ea non est, sed alia illa est, quæ spiritui præsit, atque imperet, quibuscumque tandem id fiat modis : fatendum, illam alteram incognitam esse naturæ, neque ullis naturalibus rationibus posse haberi, uel qualis sit eius substantia, uel quo modo utatur hoc spiritu. At tamen nos in hoc spiritu, ut fortè substantia ei subdita, & ut famulo optimè obsecundante, (instrumentū. n. hunc tantum esse eius, ut plerique dicunt, recipi nullo modo debet) illius incognitæ functionum, quas imperando, & præsidendo obeat in hoc corpore, rationes cognouimus: ut spes sit, nulla in parte ab re sumptū, aut ullo modo inanē meum laborē uisum iri. Quidquid autē præstiterim, si te, *REX* regum optime, & humanissime, non illibenter legisse cognouero, fuerit dignissima causā, qua alacriter pergā ad cætera, quibus rem physicā & medicā, plerisque in locis adhuc tectas obscura caligine, pro uiribus illustrare paro: etiamque incitamentum, (id, quod maximè cupio) properem uenire Cracouiam, ut quæ de te feruntur egregia, quæque nunc uideo animo, præsens uideam: & si tibi accipere libeat, tradam me in regiam istam manu uirtute & fide præstantem. Interea absens precor tibi eam fortunam, quam uirtus meretur tua: ut quemadmodum præclare cœpisti, & usque ad hoc tempus processisti, sic in posterum semper felicissimè persequare: & (quæ iam spes est in te uno) nostram rempublicam à ferarum gentium immanitate reddas tutam, ac securam.

Aue, & uale,
& rem benè
gcre.

FINIS.

Errata quadam.

pag. 7. uersu 11. quibusque. lege, quibusque.

pag. 8. loca citata linea altius, quam par erat, ascenderunt.

pag. 12. uersu 31. Hec. Hæc.

pag. 13. uersu 21. molitiem. mollitiem.

pag. 15. uersu 31. uon. non.

pag. 16. uersu 18. qnoquo. quoquo.

pag. 23. uersu 3. à se enim qui mutant genus? restituo: sed à se
qui illud faciant?

pag. quæ habet numerum (est enim erratum ab operis etiam in apponendis
numeris) 46. uersu 31. At motus actio est. restituo: At
motus actio tantum tibi est.

pag. 69. (sed per errorem est, 96.) uersu 1. ipsæ. ipsa.

eadem pag. uersu 37. neque licentiæ. lege; neque iuris, neque licentiæ.

pag. 118. uersu. 24. Nouit tantum. lege: Nouit ferè.

¶ uersu 29. nihil sentit. lege: nihil umquam sentit.

¶ adde: uidelicet, quod purè & syncerè sit eorum.

pag. 119. uersu 27. ut etiam quæ media. lege: ut etiam ubi media.

¶ uersu sequenti: ubi ad alteram. lege: atque ad alteram.

pag. 120. uersu 36. rerum notarum. lege: rerum eo altero modo
notarum. deinde: sicque transferat ad genus cognitum. lege:
sicque transferat ad genus illud.

Cetera leniora erunt.

7

AD CRITICAM
DISSERTATIONEM

DE ABUSU
CHINÆ CHINÆ

Mutinenſibus Medicis perperam objecto

A CLARISSIMO QUONDAM VIRO

BERNARDINO RAMAZZINO

In Patavinâ Universitate Practicæ Medicinæ
Professore Primario

RESPONSIONES
IATRO-APOLOGETICÆ
FRANCISCI TORTI

Medici Mutinenſis.

N. ~~774~~. 1748.



MUTINÆ MDCCXV.

Typis Bartholomæi Soliani Impressoris Ducalis.
Superiorum Permissu.

MVSEVM
BRITAN
NICVM

BRITISH MUSEUM
SALE DUPLICATE
I 7 8 7

ALMO, INCLYTOQUE
CLARISSIMORUM, ET DOCTISSIMORUM
MUTINENSIIUM
MEDICORUM
COLLEGIO

FRANCISCUS TORTUS
S. P.



Uas. ad Criticam Viri Clarissimi Ramazzini quondam nostri Dissertationem, De Abusu Chinæ Chinæ, intuemini Responsiones meas, COLLEGÆ DOCTISSIMI, hæsi aliquandiu anceps an scriberem: hæsi diutiùs, postquam conscripseram, magis anceps an promulgarem. Re tandem apud memetipsum seriò perpensa, ad tria potissimè illas me adornasse novi; ad tutelam nempe meam, ad decus Vestrum, ad bonum Reipublicæ. Ex his quod meum est, Viri defuncti Manibus litandum facile credidi: non ita facile, quod Vestrum, quod Publicum. Equidem quic-
quid

quid in *Scriptis* legitur extincti *Professoris*, quod *Dignitati Vestrae* minus conveniat, communive officiat *utilitati*; id omne ex infelici quodam mei calamitatis *Fato*, velut ex malo fonte, tum *Vobis*, tum quibuscunque illud detrimento fuerit, dimanasse, persuasum est mihi: mea etenim si quondam de hac materia siluisset *Minerva* rudis, & citra venustatem veridica; nullus dubito, quin & *Clarissimi Opponentis* siluisset affabrè compta, & *Censoria* simul *Majestatem* gravis: nec alio fortasse nomine *Vos*, imò *Nos* conjunctim omnes, immeritò quidem, criminatus est, nisi ut me unum, quasi ceteros seducentem, perstringeret, qui me unum seorsum perstringere quodammodo veritus est, *Criticus Auctor*. Idem propterea, qui, prima spectata mali scaturigine, *Vobis* aequè, ac *publicae Rei* quadantenus obfuit, dum prodesse credidit, calamus meus; damna præter intentionem illata æquum est ut rependat: siquidem *judicio Vestro* acri, & limato id congruum censeatur. His de causis *Scripta hæc mea*, qualiacunque ea sint, in manibus tandem *Vestris* posita volui, *Vestro* subjecta examini, *Vestroque* planè arbitrio relicta; ut sortem quamcunque illis destinarint *Fata*, nanciscantur a *Vobis*; lucem quoque *publicam Vestris* primum ex placitis receptura, si *Literatorum*, *Ingenuorumque* conspectu haud prorsus indigna reputaveritis; sin minus, nativis in tenebris latere contenta, nec vitam habitura, nec nomen. Quòd si ea, faustis fortè sideribus obstetricantibus orta, *Vestro* humaniter probentur cal-

culo; nil posthac illis metuendum credam ab Aristarchis, aut Momis, postquam inter res Vestras Profanis intemerandas fuerint cooptata, nec ad me amplius, sed ad Vos tantum, qui auctoritate non minus præpolletis, quam robore, ipsorum defensio pertineat. Si verò ex adverso tennes hi conatus mei, sive ut oneri suscepto impares, sive ut Opusculum levidense nimis, sint Vobis despectui; accepta saltem sit, precor, hæc ipsa mea grati animi erga Vos, erga Patriam studiosa propensio. Valete ad annos Nestoreos, VIRI DOCTISSIMI, per quos jugiter bene valet Civitas nostra.

Dabam ex Museolo meo Idibus Octobris
MDCCXV.

APPROBATIO

ALMI COLLEGII D.D. MEDICORUM

CIVITATIS MUTINÆ.

R Esponſiones Jatro-apologeticas a Viro Clariffimo D. Francisco de Tortis, SERENISSIMI DUCIS Medico, & Almi Collegii D.D. Medicorum Mutinæ Priore, cūm ad Patriæ decus, tum ad publicam utilitatem conſcriptas, atque ob id etiam univerſo eorundem D.D. Medicorum Collegio, cui eas humaniter obtulit, quàm maximè acceptas, luce ſtatim publicâ (cæteris, ad quos id pertinet, annuentibus) ipſius Collegii expenſis eſſe donandas, omnes ejusdem Almi Collegii Doctores unanimiter decreverunt

Hac die 18. Octobris 1715.

Joannes Maninus Inclyti Collegii D.D. Medicorum Mutinæ Cancellarius de Mandato.

CUm Librum, cui Titulus -- *Ad Criticam Dissertationem De Abusu Chinæ Chinæ*, Mutinensibus Medicis perperam objecto a Clarissimo quondam Viro Bernardino Ramazzino, in Patavinâ Universitate Praticæ Medicinæ Professore Primario, Responsiones Jatro-apologeticæ Francisci Torti Medici Mutinensis, -- ex Mandato Reverendissimi Patris Inquisitoris Generalis Mutinæ attentè legerim; cumque omnia consona Catholicæ Fidei, bonisque moribus in eo, multâ doctrinâ, modestiâ, veritate, ac eruditione referto, observaverim; idcirco posse ad publicam utilitatem imprimi, si iis, ad quos spectat, videbitur, censeo.

Datum in Monasterio S. Petri Mutinæ

die 27. Octobris 1715.

D. Maurus Alexander Lazarelli Monacus Casinensis Sanctiss. Inquisitionis Consultor.

Imprimatur.

Ego Fr. Joannes Philippus Monti Sacr. Theolog. Magister,
& Inquisitor Generalis Mutinæ.

Vidit

Carolus Barberius.

IN hujus Divini Remedii laudes non effundar, cum se ipsum satis commendet.

Ramazzin. de Chinâ Chinâ verba faciens

Orat. 3. Patr. argum. pag. 103.

Edit. Patav. 1708.

Idem hæc non acrius accusavit in Senectute, quam antea defensitaverat. Quamvis igitur fuerit acutus, ut fuit: tamen inconstantia levatur auctoritas.

*Cicero de Antiocho Philosopho sermonem habens
in Lib. Acad. Quæst., qui in-
scribitur, Lucullus.*

I

PROLUSIO

AD DISCEPTATIONEM

UNIVERSAM,

E T

Scribendi Occasio.



Vix sub extremos Octobris dies anni proximè elapsi 1714. ad captanda bidui spatium, ne completi quidem, ruris otia secefferam, cum mihi fortè ab Amico favente communicatæ, in manus incidere Constitutiones Epidemicæ Mutinenses Clarissimi quondam Viri D. Bernardini Ramazzini, mense Julio ipsiusmet anni Patavii recusæ, additâ ad calcem novâ Dissertatione Epistolari ejusdem Auctoris *De Abusu Chinæ Chinæ Ad D. Bartholomæum Ramazzini Nepotem suum Mutinæ Medicinam facientem*. Constitutiones ipsas sicco, ut fatear, pede prætergressus, ut qui primam earum editionem aliàs lustraveram, in Dissertationem tantùm adjectam curiosos oculos statim conjeci eâ spe, ut argumentum nec parvi ponderis, nec modicæ utilitatis, quod pridem & ipse in Therapeutice meâ Speciali enucleandum assumpseram, rursus a Viro Cl. majori saltem venustate, majoriq; eruditione absolutum intuerer. Sed meam profectò non parum fefellit expectationem eventus; non enim Chinæ Chinæ abusum tantummodo jure, ac meritò reprehensibilem, in eâ Lucubratione damnatum legi (cujusmodi vitium, nedum obiter pluribus in locis Operis mei, sed ex professo per integra Libri Capita, indicatis singillatim cunctis erroribus & ipse perstrinxi) verùm etiam inviso abusus nomine usum ipsum rationalem, atque methodicum, non sinè plurimâ quidem admiratione, haud rarò notatum vidi, vanisque potiùs, si fas est dicere, terriculamentis, quàm rationibus, sincerisve experimentis, a Viro cæteroqui doctissimo tentatum ubique, acriterque persæpe etiam rejectum.

Præconceptam adhuc admirationem id magis adauxit, quòd Vir Clarissimus istiusmodi abusus crimen, de quo potiori forsitan jure plurimas alias Regiones culpæ poterat, Mutinensi duntaxat Urbi, quam diu coluit loco Patriæ, fidenter objecerit; & quidem fide nixus unius tantùm præoccupati Relatoris, huic Remedio tunc temporis plus quàm par fuisset infensi, dolens usque adeò scandalum hoc, atque perinde ingemiscens, ac si de immani Civium omnium ageretur excidio. Hac

A

idcirco,

idcirco, utinam non affectatâ, sollicitudine percitus, totum ferè Mutinensium Medicorum cœtum vehementer impetens, ac de enormi Chinæ Chinæ abusu usque ad quotidianam Ægrorum internecionem Parapho 48. suæ Dissertationis insimulans, spretâ quasi ut pusillâ, vel ut imbelli hac multitudine, minimè veritus est *in cavernam*, ut ajunt, *formicarum inspuere*: cum alioqui multos caveat sit necesse, qui singulos non metuit. Nihil tamen ex his, fateor, tanti penès me valuit, ut proinde præcipitem illico manum calamo admoverem: neque enim mea tunc interesse credidi, Medicos omnes conterraneos ab opposito crimine vindicare, multòque minùs refellere quemlibet de Peruviano Febrifugo malè sentientem, quantumvis immeritò. Præterquam enim quòd nimis operosum hoc foret, tanta insuper mei ipsius me non tenet fiducia, ut alios, qui sui planè sunt juris, placitis meis acquiescentes audacter velim, aut a propriis dimovere arroganter contendam.

Id unum præ cæteris nequivi aut satis mirari, aut tacitus præterire, Cl. nempe Virum, quem paulò ante in Therapeutice meâ non ampliùs, ut olim in Constitutionibus suis Epidemicis, Chinæ Chinæ parum propitium, sed mutatâ sententiâ maximum hujusce Remedii Patronum, imò & argumenti mei Fautorem asserui pag. 637. ad pag. usque 641, ab hoc ipso asserto, palàm, & publicè a me ibidem promulgato, adeò discrepasse in hac nuperâ Dissertatione, ut non modò quicquid Peruviano Cortici adversum in iisdem Constitutionibus protulit, in hac Dissertatione confirmarit, verùm etiam hanc, illis recens recusis velut quid planè cohærens annexam, ulteriori contra hoc Remedium, meamque Praxim sinistrè detortam asperferit acrimoniâ. Quæ sanè omnia apud Lectores Operis mei, quibus fortè minimè visæ sint Viri Cl. Lucubrationes, liberalem Chinæ Chinæ usum adusque sidera efferentes, me jam vel inconsultæ levitatis incusant, si mentem illius haud satis attigisse dicar, vel aperti mendacii, si de industriâ credar contemerasse.

Turpes hæc notas haud leviter perhorrescenti cum se mihi obtulisset illud Boetii *De Consol. Phil.*, eos nempe, *qui crimen aliquod affixum ferunt, videri meruisse, quæ perferunt*, ne silentio meo propriæ simul existimationi viderer deesse, & publicæ, quæ magis cordi esse debet, utilitati, rem totam in propatulo ponere evestigio decreveram, quippe de Cl. Viri scriptis æquè ac de meis, nec non de quocumque controversæ praxeos usu intimè conscius, ut versatilem, sed malè tornatam illius, *modò Palliati, modò Togati* opinionem, incudi quoquè meæ paulisper redderem. Qui itaque gregarium quemlibet, Sciolumque contra scribentem, vel sibimet adversantem nequaquam fuisset moratus, nec unquam morabor, a censurâ nihilominus Famigerati Scriptoris, sua simul & mea in detrimentum Reipublicæ infirmare molientis, haud modicè, ut par erat, timendum duxi; ne scilicet ii saltem terrentur, quibus Causæ integræ momenta minimè perspecta essent, neve beneficium, quod Praxi Medicæ deferre fueram conatus, in suspicionem intentati maleficii veniret. In id autem tria potissimum assumpseram demonstranda: *Primò* nempe, Virum Clarissimum, sicuti

sicuti in enunciatis Constitutionibus suis parum amicè sensit de Cortice Peruviano, ut videre est in Constitutione anni 1690. num. 15. & num. 47., & in Constitutione unicâ trium annorum 1692. 93. 94. num. 32., & num. 56. (siquidem in Constitutione anni 1691. illum commendaverat num. 34. & num. 37.) ita postmodum constanter per annos tredecim subsequentes, nempe ab anno 1700. usque ad 1712. inclusivè, quo tempore meum Tractatum edidi, mirificè non solùm, sed & magnificè sensisse de eodem Febrifugo, solemniterque pluries, ac pluries scripsisse oppositum, ac scripserit tam in illis Constitutionibus, quàm in nuperâ Dissertatione; ipsum videlicet Corticem, ejus usum, & repetitum, & liberalem, ejusque vim super omnia, quæ hæctenus innouerint, Febrifuga eximiam, miris laudibus absque ullâ limitatione deprædicando, & connumerando inter potiora, humanoque generi magis proficua divinæ munificentiae dona: *Secundò*, Virum eundem in hac suâ Dissertatione, ubi iterum labitur in priorem, imò & pejorem sententiam, in hoc probabiliter aberrare, quòd nonnullis in rebus verè rationabilibus, & bonæ praxi consonis, in quibus non finè lepore quodam affectat ostentare semetipsum a me non modicè discrepantem, tantum abest ut verè discrepet, quin potius illa eadem volens nolens repetat, confusè licèt, quæ ipse ordinatim, ac per extensum in Opere meo priùs exaraveram: quod sanè a me non parvi faciendum, ob spectabilem cæteroqui Viri Famigeratissimi auctoritatem, ubi ea mecum vel invita coincidat: *Tertiò* tandem, eundem Scriptorem, ubi revera dissentit a me, non modò hallucinari perplurimum, & a meliore praxi deflectere, sed & æquè dissentire a se ipso, suisque publicis assertionibus, imò (tribuat id quivis ætati, impeditæque valetudini, libenter annuam) ab ipsâ sæpius Facti veritate. Id elucescit quàm maximè, ubi adductis in medium peculiaribus casibus Denarorum, qui Viro Cl. mihi socio, quandiu ægrotaverant, curæ meæ fuere commissi, Chinam Chinam, quam ne per somnium quidem iisdem præscripsi, si non apertè obitus illorum Ream, enervem saltem, atque frustraneam conatur ostendere ad sanandas Perniciosas eorum Febres, quas olim pro præcipuo meæ Therapeutices argumento selegi, & pro objecto activitatis Chinæ Chinæ, adversus eas in summis etiam angustis, lethalibusque circumstantiis eximiae.

Jamque manum Operi cœperam admoveere, crebrisque memoratæ Lucubrationis marginem universum consperferam notis, ut iisdem postmodum ordinatè digestis uterer ad concinnandam longiusculam Dissertationem: cum ecce nil tale expectanti delatum est mihi nuncium infastum de Obitu Viri Cl., repentino (quod verè dolendum) fato sublato Nonis Novembris ejusdem anni 1714., dum octogesimum primum ageret, felici etiamnum pollens mentis acumine, ætatis annum. Casus profectò iste planè inopinatus ab incepto opere calamum statim retraxit, ne scilicet Viri Celebris, mihique aliàs amicissimi Manibus, cineribusve adhuc tepentibus insensus viderer, quasi cum Protogene mortuo bella gerere satagerem, aut Leoni exanimi barbam vellere: cum ea præsertim in hujusmodi contentionibus, ubi nonnihil asperè

laceffitus quis fuerit , difficillima sit temperantia , quæ omnem excludat acerbiteriam ; *quid enim est* , ajebat Tullius , *quod contra vim , sine vi fieri possit ?* Seposito itaque consilio Dissertationem animo jam conceptam condendi , & cuncta , quæ sparsim annotaveram , ita contexendi , ut Auctorem salibus , dictariisque ditissimum , ubicunque me confriasset , vicissim refricando , servatâ semper utriusque dignitate , pro ingenii viribus retaliarem (si namque illi Machæra aderat , nec mihi deerat Veruina domi) decentius , ac laudabilius duxi , ipsas tantummodo Animadversiones , seu Responsiones meas , non quidem nudas , quales a primordio mihi excidère , sed eousque tantum adauctas , quoad fert mera , & inculpabilis defensio mea , insimul confarcinare , eodem planè retento contrariæ Dissertationis ordine , quæ me certè præ aliis Urbis hujus Medicis , etiam (si fas est dicere) nonnihil intemperanter , vellicat .

Hanc quoque nihilominus operam , extincto Antagonistâ , multo magis ac antea facile dimissem , si de unâ meâ ipsius tutelâ actum fuisset , præsertim ne viderer partæ in re medicâ , & in cultiori Philologiâ Viri Cl. gloriæ invidere . At (quæ & ab initio potissimè ad scribendum me impulit causa) cum de totius agatur negotio Reipublicæ , cujus vitæ , aut incolumitati necesse est modò , ut alterutrius nostrum noceat sententia , hanc idcirco Provinciam minimè deferendam censui ; imò potius eidem aperiendum esse Reipublicæ , quam ex parte lateat error , & quam veritas : id quod , omni semoto vilis ultionis , aut turpis cujuslibet æmulationis affectu , mihi planè licere crediderim . Et sanè quidni liceat , cum idipsum religiosissimi doceant morum Censores ? quos tamen hic immiscere minùs opportunum putassem , nisi prius Cl. Auctori longè leviori de causâ (ut scilicet vanum quemdam Seculi morem piè fugillaret) placuisset uti auctoritate Sanctorum Patrum §. 49. suæ Dissertationis . Unam igitur inter tot , quæ prostant , huc libet transferre D. Basilii sententiam , nedum permittentis , sed & expressè monentis , ad criminationes hujusmodi (sunt hæc illius verba) *tacendum non esse , non ut contradicendo nos ulciscamur , sed ne mendacio inoffensum progressum permittamus* : quod quidem hic maximè videtur cavendum , ubi fallacia dogmatis , auctoritates vel nullius ponderis , vel mutilæ , minùsve sinceræ , & apocryphæ tandem narrationes (omnia namque singillatim ostenduntur talia) damnosam facile praxim valerent in Artem inducere . Quæ cum ita se habeant , ut in progressu poterit sensim dignoscere quilibet etiam in re medicâ nequaquam versatus , ipsius potius indigentiam rei , quam vota mea me expleturum dicam , si positis in mutuum conspectum rationibus a nostrum quolibet hinc indè deductis , Opus tandem meum defendere mihi haud difficulter obtingat , nebulasque omnes perfectè discutere , quas eidem Operi , sive directè , sive indirectè , offundere visus est Cl. Auctor . Vindicato autem a velitationibus , imò & cavillationibus Viri Celebris Tractatu meo , minutiori postmodum obstrepentium , aut objurgantium plebeculæ , de quâ sanè minùs laboro , quam de Ranis palustribus , videbor mihi quodammodo fauces præclusisse .

Sic & publicam utilitatem , & rem meam , & Collegarum tandem meorum , imò Patriæ totius dignitatem unà tuebor . Nec proinde mihi tam justâ causâ compulso , neque lædere quemquam , sed respondere meditati , severior quispiam Judex audeat obtrudere ,

Nullum cum victis certamen , & æthere cassis

unquam probari . Occurram namque verbis Erasmi , & potiori quidem jure , ac pro suâ Causâ occurrerit olim , aut decertarit Erasmus ipse Apologiâ ad Libros prædefuncti Alberti Pii quondam Carpensium Principis , quæ sic habent , *Vehementer invidiosum habetur scribere in mortuos , & ut ajunt , cum Larvis luctari . Sed quid facias , si in te scribant mortui , & impingant apud totius Orbis Tribunal , ad quæ conivere non decet ? Valeat proverbium , Non esse luctandum cum Larvis , nisi contra proverbium mordent mortui . Fugit Apis ; sed in vulnere reliquit aculeum . Non est , quem referiam ; sed est , cui medear .* Est , cui medear , inquam : patriæ quippe Academiæ dignitas læsa (ut singula recolligam) vulnerata commentitiis saltem in historiis veritas , & periclitans ob panicum terrorem incussum tot Ægrotantium salus , medelam profectò nullis dissimulandam officiis expostulant .

Priusquam tamen pensum hocce peragere aggrediar , Febrifugique infontis æquè ac benefici partes suscipiam , a proposito minimè alienum putarim , generalem quandam æquivocationem , in scriptis Viri Cl. passim obviam , de medio tollere ; quâ nimirum detentus ille , conatus suos vel minimè ad rem , vel prorsus inaniter exerit , Securim , ut est in adagiis , adhibens ad referandas fores , & Clavem ad findenda ligna . Ejusmodi autem fallacia nullo statim negotio submovebitur , ubi quis animadvertat , Remedia medica duplici respectu posse pro noxiis , aut saltem pro suspectis haberi , nempe , vel ratione sui , vel ratione inopportunæ administrationis , sive deinde hæc referatur ad morbum , sive ad tempus , quorum alterutri remedium non congruat , sive ad utrumque . Priori modo suspectus , aut noxius esse poterit usus exempli gratiâ Medicamentorum Purgantium , præsertim validiorum , ob solam videlicet acriorem , & irritantem eorum substantiam ex se nocendi capacem . Altero autem modo , scilicet ratione intempestivæ administrationis , non solum Purgantia , Narcotica , aliæque plura , quæ utramque certè exceptionem patiuntur , sed præterea quotquot sunt in Medicinâ remedia , quotque in Mundo alimenta , possunt obesse . Atque hoc nomine minimè negaverim , ut pluries fassus sum in Opere meo , suspectum nonnunquam dici posse usum Peruviani Corticis , quantumvis ille cæteroqui sit revera Remedium supra omnia Pharmaca , tum mitissimum , & suapte naturâ prorsus innoxium (quippe quod sinè humorum perturbatione , spirituumve irritamento , aut dissipatione , suum munus absolvit) tum etiam efficacissimum in eo præstando effectû , cui illud præordinavit , cum condidit , Divina Bonitas , scilicet in sistendis , atque delendis Febribus illis , ad quas extenditur ejus activitas . Adeoque si vis huic Febrifugo ingenita , efficax , & ex se nunquam inanis , transferatur ob nimiam Medici confidentiam , aut imperitiam , ad alios usus extra illius ditionem sitos , vel

etiam ad ordinarios quidem, sed quorum non sit rationabilis opportunitas, eo certè casu, vel inutile illud evadet, vel fortè noxium; non quidem ratione sui, sed ratione administrationis minùs castigatæ: si videlicet, vel in Febre, quæ suapte naturâ ipsius Corticis medelam respuat, usurpetur, vel in eâ, quam fortè suppressere sit nefas, utpote *depuratricem* Fluidorum, & *cujusdam quasi lixivii loco* (ut in eodem Opere meo locutus sum pag. 143., & alibi) *sordes sanguinis verè abluentem*, vel denique in eâ, quæ ex unâ parte nondum debitam maturitatem acquisivit, & ex aliâ nullum adhuc portendit periculum, vi cujus ad suppressionem, aut extinctionem illius statim, ac præmaturè sit deveniendum. Hæc profectò Medicis incautis nonnunquam haud satis perspecta, nonnunquam etiam ante præcipitem Corticis oblationem neglecta, vertuntur postmodum ab iis ipsis post oblationem, vel irritam, vel minùs felicem, in crimen, & contumeliam illius, quantumvis infontis, eosque serò *pœnitet hujusmodi remedio usos fuisse*, cum potius deberet pœnitere, se illo perperam fuisse usos.

Contra nonnullis, æquâ licet hallucinatione detentis, fors identidem favet opposita. Hi namque Febres, nedum Intermittentes, sed & Continuarum naturam non parum redolentes, imò & quadantenus verè præseferentes, quovis etiam earum tempore, fortuitâ Corticis oblatione nonnunquam feliciter curant (quod non rarò quidem, sed non perpetuò contingere debere sum conscius) absque ullo etiam subsequente Ægrotantium detrimento: quo fit persæpe, ut ab iis nimium gloriosa, adeoque vana Indo huic Antipyretico texantur elogia; illud videlicet indiscriminatim posse ad Febres omnes, tam Continuas, quàm Intermittentes, quocumque etiam earum tempore suppressendas, & cum eventus certitudine, & impunè penitus usurpari. Has ob causas Scriptores quamplurimi, haud satis, ut reor, remedium experti, in Classes abeunt oppositas, quarum una uni vitio adhæret, & altera alteri; pauci etenim verè sunt, qui medium teneant iter tutissimum, paucis videlicet prælucente, quod Regiam præmonstret viam, claro lumine veritatis, aut constantis experimenti. Nimirum & in hac Gymnade cæteroqui satis frequenti,

Plures Thyrsiferos, paucos est cernere Bacchos.

Cum verò in praxi frequentissima occurrat, vel saltem videatur occurrere, administrandi hujusce Febrifugi occasio, frequenter quoque contingat facillimum est, vel quòd usus in abusum transeat penès audaciores, vel quòd abusus metu, a recto etiam usu quis meticulosus abstineat, ut de Phlebotomiâ, aliisque præsidiiis in peculiaribus quotidie casibus videmus accidere.

Absit ideo, ut ausim quemquam refellere, qui huic farinæ suum inesse fursurem asseveret, ut in vastissimâ materiâ medicâ cuique farinæ suus inest, sive de Remediis Pharmaceuticis, sive de Chirurgicis sit sermo; quibus equidem omnibus usus rationalis pretium comparat, irrationalis adimit. Hac ego potissimum de causâ hanc eandem farinam, repetitis non semel laboribus pluries, ac pluries excussam, in Therapeutice meâ jamdudum trajeci. Secrevi quippe, qualis Pistorum

mos est

mos est (siquidem per similia hujuscemodi liceat prolixius rem declarare) pluribus veluti distinctis, sæpiusque pertentatis Incerniculis, tum crassiorem, tum tenuiorem furfurem, quoadusque purissimum, & planè impermixtum illum collegerim pollinem, unde non rubidus, aut secundarius panis,

Sed tener, & niveus, mollique filigine factus

in escam venire potis est quammaximè vitalem, quæ nempe vel prope morituris auxilio sit præsentaneo. Hæc quidem omnia membratim, ac per gradus me præstitisse reor, materiam universam partitis vicibus minutissimè perscrutatus, cùm primo statim loco Febres *Continentes* omnes, quotquot sunt, tam *Solitarias*, quàm *Comitatas*, tam *Essentiales*, quàm *Symptomaticas*, turmatim a ditione Corticis ablegavi, remanente, pro suscipiendâ illius actione, confertissimo agmine *Vulgarium omnium*, seu *Benigniorum Intermittentium*, quibus tamen nulla fomentum præbeat Viscerum, aut Solidi cujusquam labes. Id ipsum diligentius adhuc peragere mihi sum visus, cùm nonnullas iterum Febres, tum Periodicas, tum Periodicis similes, sed suapte naturâ verè *Continuas*, videlicet vel *simpliciter Remittentes*, vel etiam *Proportionatas*, sæpe a proficuâ hujusce remedii administratione sejunxi, retentis iis Periodicis simul, & Continuis Febribus, quæ contra suoapte genio verè *Intermittentes*, sed fortuitam quandam continuitatem nactæ, cujusmodi sunt *Subintrantes* omnes, usu pariter Peruviani Corticis prudenter adhibiti haud difficulter fugantur, non ampliùs redituræ. Ultimam denique manum materiæ incernendæ, Cribro quodam peculiari, & Medicis hætenus ferme omnibus intentato, me imposuisse persuasum habeo, cùm Febrium earundem *Intermittentium* quidem, saltem *ab ortu*, sed nihilominus quammaximè *Perniciosarum*, curationem indigitavi, eodem Febrifugo, certâ quadam, & speciali regulâ ministrato feliciter absolvendam, non modò tunc cùm Febres illæ, moris cæteroqui maximè subdoli, atque maligni, tempestivè possunt dignosci, verùm etiam non rarò postquam curantes Medicos decipere, Ægrumque ad id redehere, ut jam totus algens, pulsuque præditus ferme nullo, ac non ampliùs perceptibili, Nyctemerino tantùm spatio distet a morte, nempe a futuro Paroxyismo, citra dubitationis aleam lethali.

Hic sanè hujusce Farinæ purus putus Flos est. Portionibus cæteris, utut summè utilibus, nonnihil tamen tenuissimi saltem Furfuris inesse nequaquam negaverim, idest, ut apertè loquar, non negaverim, locum fortè quempiam Superstitiosis quibusdam etiamnum in illis relinqui ad scrupulositates, ineptias, atque sophismata pertinaciter obtrudenda, ut mercem hanc utilissimam reddant in dies abjectiorem. Atque his, palato meliora etiam nauseante instructis, liberum sit expuere quod non arridet, meque habebunt minimè repugnantem, qualem in Opere meo apertis notis memetipsum sponendi. Minimè verò me talem polliceor, ubi agitur de purissimo, mundissimoque hoc polline, quem postremâ diligentia excussum secrevi, & cui ædepol nihil est, quod vel a dicacioribus queat opponi. Cum itaque intentum unicum, vel saltem primarium hoc sit Tractatus mei, docere scilicet re-

cenſitarum Februm *Pernicioſarum* medelam, Peruviano Cortice peculiariter uſurato inſtituendam, cætera verò reliquas Febres reſpicientia, ſint mera additamenta, cujuſvis arbitrio vel ibidem relicta, idipſum eſt, quod oppoſitâ, ſed verâ, & ſolidâ adminiculante experienciâ, turpem falſitatis, aut vanitatis notam præſeferre deberet evinci. Quòd ſi quis in Opus meum animadvertens, hoc, quod potiffimum dixi, contendat evertere, evincat quoquè ſimul neceſſe eſt, crimen eſſe in Medicinâ, certò ſervare hominem cæteroqui certò pereuntem, ſi per Remedium id fiat quotidie obvium, de quo tamen quis ambigat, an Empyricum illud ſit, an Methodicum, & an perpetui, an temporanei tantùm quandoque levaminis.

Materiam hanc univerſam Farinæ nomine hætenus vocitatam, & reſenſitâ hucusque ſedulitate particulatim ſecretam. (patere Lector coactum aſſumptæ ſemel allegoriæ ſatis appoſitè rem explicantis progreſſum) totam denuo reſens incernere aggreſſus eſt Cl. Ramazzinus. Et quidem quicquid ipſe partitè, nec ſinè labore ſegregaveram, ille primò commiſcuit iterum, atque turbulenter confudit; dein uno tantùm exiliſſimo, ac penè imperfoſſo ad opus ſuſcepto pollinario Cribro, materiâque, quanta illa extitit, nonniſi leviter excuſſâ, vix tenuiſſimum collegit Pollinem; non illum tamen, qui meliore pollens ſubſtantiâ, in egregium panem ſolet evadere, ſed volatilem illum, qui parietibus, ubi pinſitur, adhærere conſuevit, ex quo nonniſi inſirmiſſimus panis cõfici poteſt. Præpoſteram hanc cribrandi, aut incernendi normam viſus eſt ille procul dubio tenuiſſe, cùm uſum omnem Peruviani Corticis *ad unam tantùm, vel alteram Drachmam* contraxit ſemel oblatam, & quidem in diuturnis duntaxat Intermittentibus, *ad impetrandas aliquot dierum inducias*. Reliquum Materiæ univerſæ utiliſſimâ adhuc abundè reſertum Farinâ, nomine Furfuris, & recrementi, nedum inutilis, ſed & noxii, planè rejecit, imò & projecit. Uno verbo (ut a Piſtoriâ tandem ad Medicam Artem rem contraham) in id potiffimè nervos intendit, ut quas deleveram difficultates, iterum ſuſcitaret, ne minimùm quidem eaſdem promovens, crambemque jam coctam recoctioni planè ſaſtidiendæ rurfus exponeret. Demum in eo totus fuit, ut peculiaris, diſtinctæque probationis defectum, quo perſæpe laborat, oſcitaturque jejuna illius Diſſertatio, Rhetoricâ identidem ſuppleret induſtriâ, clamans undequaue, declamansque, Americanum iſtud Febrifugum *non tam facilè, nec tantâ copiâ, ad uncias videlicet integras in Vino infuſum, pluries in die, largâque Doſi, ut Mutinæ fieri ſolet, indiscriminatim eſſe exhibendum, ſed modo adhibito: quandoquidem remedium iſtud empyricum prorsus, & amethodicum noxas plurimas ſolet progignere, & ob improprium illius uſum, & ob occultam ejusdem malitiam*. Quibus omnibus generaliter, & indefinitè hîc illic prolatis, quin plurima inſit veritatis ſpecies, forſan ambiget nemo; ſed factò, ut decet, ſcrutinio, pro quantum vacuitatis ſubeſt, deceptionis, & falſitatis! Si quiſpiam igitur rumoribus hiſce Viri Cl. fortasſe præventus, calculum præcocem opiniononi illius ſtatim apponendum cenſuerit (quod conſuevit facitare non-

nemo) suffragium tantisper suum æquum est ut suspendat : *Scelestum* siquidem , & *crudele iudicium est* , si quid statuatur antea quàm cum accusatione comparata sit defensio , clamat Lucianus *De non temerè credendo calumniæ* , subdens iniuper illud Phocylidis ,

Ne Judex fueris , partes ni audiveris ambas.

Ad hæc ego respiciens , e re fore censui , priusquam ad criticam Cl. Auctoris *Dissertationem* meas *Responsiones* apponam , Propositum Lucubrationis illius , æquè ac Therapeutices meæ , summatim præmittere , ut ex juxta posito utriusque nostrum germano sensu , clariùs indè elucescat consensus , ac dissensus noster : mox erutis ab eâdem *Dissertatione* potioribus textibus Peruvianò Cortici infensis ; aliis verò e directo confitis eidem Cortici apprimè faventibus , quos ex variis Cl. Auctoris Operibus , ante meæ Therapeutices evulgationem editis , placuit excerpere , atque transcribere ad literam , quid ab utrisque simul collatis resultet , haud frustraneum credidi nudis terminis , & citra fucum exponere ; ultimoque tandem loco ipsam Viri Clarissimi *Dissertationem* in Paragraphos concisam (quam percurrenti si fortè alicubi hæreat aqua , sciat is , primi Exemplaris , non secundi , prout jacet illud hîc adamussim recusum , id esse vitium) cum Notis meis membratim respondentibus , pro pleniori , nedum Professorum Artis , sed & aliorum quoquè Eruditorum notitiâ subnectere . An verò per hæc omnia neverim quod Colo aptavi , scilicet an satis ostenderim , cæsim licèt , ac interruptè , Virum Cl. *malo suo* (quod agebat Seneca *De Vita beatâ*) *vim suam exercuisse* , ipsumve clarè demonstrarim vel præter intentionem nonnunquam consentientem mihi ; cæterum præter rationem prorsus , & a me , & a se , & ab ipsâ re dissentientem , *Judicet* , ut verbis illius utar , *Judicet* , inquam , *cui cor sapit* .

DISCREPANTIA

INTER

Clarissimum Ramazzinum, & Me,

SIVE

SUMMARIUM

*Propositi Cl. Ramazzini,
ex illius Dissertatione
fideliter ex-
cerptum.*

*Propositi mei saltem præcipui,
ex Therapeutice meæ
Speciali fideliter
excerptum.*

O Pinatur ille in hac Dissertatione (quidquid aliàs senserit) Chinam Chinam posse obesse Febricitantibus, tum ratione intempestivæ suppressionis Februm, tum etiam ratione *malitiæ* cujusdam *occultæ* illi insitæ, quam pluribus in locis innuit, sed nusquam probat. Ex eo pariter quòd *occulta* sit *virtus febrifuga* illius, arcanusque modus, quo ipsa operatur in nobis, cum nullam sensibilem pariat evacuationem; imò ex eo quòd in Europâ quicquam ei analogum non reperiatur in Vegetabilium familiâ, concludit ille, rationalem esse non posse

O Pinor ego in Opere meo, Chinam Chinam nonnunquam obesse posse, ut possunt omnia Remedia selectiora, omnesque etiam cibi, quantumvis optimi, si *intempestivè* illa usurpetur, hoc est si per eam aliquando sistantur Febres, quas expediat omnino sinere progredi, vel si sistantur præmaturæ, quæ seriùs tantùm essent supprimendæ. Posse verò ipsam obesse ob *malitiam occultam*, quam habeat, vel ex eo quòd *arcana* sit illius *virtus febrifuga*, nedum non consentio, sed oppositum rationibus, auctoritatibus, & experimentis satis abundè conor ibidem ostendere.

Illam in Intermittentibus omnibus admittò quidem, cùm adest indicans; sed ut ab aliis vel invitè admittatur insudare detrecto: neque enim hic est Therapeutices meæ scopus præcipuus. Hanc unam tamen limitationem adjunctam volo, ut scilicet Febres hujusmodi tunc solùm curentur Peruvia-

ruvia-

posse hujusce Corticis usum, sed merè *empyricum*, & *amethodicum*. Experimenta enim, ad explorandam ejus virtutem antifebrilem hactenus instituta, etsi planè non improbet; plurimis tamen hallucinationibus putat obnoxia, ut indè nil utilitatis quis valeat eruere.

Illam æquo animo nusquam admittit, nisi in *diuturnis* tandem *Intermittentibus*, salvis etiam limitationibus infra recensendis: & quidem semel tantùm exhibitam *ad Drachmam unam, vel duas*, ad impetrandas aliquot dierum inducias, ut nonnihil reparentur vires, quemadmodum fieri solet oblatione Opii ad sedandos dolores. Cæterum usum repetitum, aut diuturnum improbat, ne illo scilicet impediatur recursus Februm, quas iterum expectandas, exoptandas, imò & excitandas dicit remedii loco; nisi enim redeant, malè consultum putat rebus Ægrotantium: ignem nanque febrilem penès prudentes Medicos suum usum habere, novum

ruviano Cortice, quando naturam *Corruptivam* habeant, vel sensim adipiscantur; secùs si *Depurativæ* sint, vel tales probabiliter sint evasuræ: tunc enim Febres sui ipsius, suæque causæ Remedium esse sum falsus. Adeoque ferme ridicula Quæstio est penès me disputare, an Febris aliqua curanda sit ope Chinæ Chinæ, an *alterius* cujusvis *Specifici Febrifugi*; si etenim ea verè sistenda sit, nec meliùs, nec certiùs id assequi licet, quàm usu Peruviani Corticis. Sed prudentis Medici est potiùs quærere, ac seriò perpendere, num verè eam Febrem sistere expediat, & an eo tempore, an alio; quod ex dignotione *Depurativi*, aut *Corruptivi* Februm generis planè dependet. Quomodo autem dignoscantur ab invicem hujusmodi *Depuratoria*, aut *Corruptiva* Intermittentes, ibi per extensum docentur Tyrones.

Et quia ego relapsum Sanatorum in pristinas Febres, quas Corruptrices censui, cùm Chinam Chinam præscripsi, prohibere conor pro viribus; idcirco Remedium semel oblatum, pluries cum moderate ramine repeto. Dosis tamen mea minimè transcendit in hujusmodi Febribus dosim *vulgarem*, imò plurimis etiam vulgaribus *parcior* est. Primus siquidem haustus non excedit unquam *Drachmas duas*, quod summum est. Alias *sex Drachmas* ad summum pariter impendo *trium hebdomadarum spatium* ad præcautionem. Atque ita quantitas universa *uncie unius* pondere continetur. Nonnunquam etiam, ubi lentiores curationem citiori præferendam putem (ut si prætolâ Februm diuturnitate Chinam Chinam

novum non esse commemorat.

Liberaliorem illius usum in quibusvis casibus apertè damnat. Et licèt de hoc generaliter tantùm, & non nihil etiam hyperbolicè loqui videatur, quasi pro certo habeat, exuberantem admodum Chinæ Chinæ profusionem fieri *Mutinæ* (Urbem quippe hanc inter tot reprehendendam seligit) quia tamen nulla alia uspiam reperitur taxatio licitæ dosis, quàm supra recensita unius, vel duarum ad summum Drachmarum, quamlibet idcirco dosim, quæ hanc excedat, ab eodem damnari censendum est.

Quamvis autem, ut dictum superiùs, in Febris Intermittentibus, tunc solum cùm illæ nimis protractæ Ægros fatigant, Drachmam unam, vel duas Peruviani Corticis admittat, præscribatque juxta Methodum sanioris, ut ait, ætatis suæ; nihilominus eundem Corticem locum opportunum minimè habere autumat in Regionibus, Anni temporibus, Aeris.

nam præscribam) per *semidrachmas* tantùm, ad *quindecim* circiter dies exhibitas, negotium absolvo.

Ingenuè tamen ibidem fateor, me *raro* in *vulgaribus* Intermittentibus Corticem præscribere consuevisse, quippe quas sæpissime, ac quibusdam potissimùm tempestatibus, pro *Depurativis* habeo, melioremque eo casu, cæteris paribus, reputo curationem sponte Naturæ absolutam, ubi liceat eam sperare, quàm Specificorum, sive *Chinæ Chinæ* adjumento quæsitam. Imò si quando ob suppressam, vel *ad preces* Ægrotantium *importunas*, vel ob *metum* fortè *præco-*
cem, qui me corripuerit, Febrim, aliqua mihi suspicio incidat de Febrifugo nonnihil præmaturè administrato; Febris autem ipsa non multò post redeat: diuturniorem eo casu illi cursum denuò permitto, priusquam remedium repetam: illudque etiam sæpe non repeto, quoties Febre rationabiliter quoque depulsâ, sed nihilominus redeunte, *levior* est, & ad spontaneam solutionem facilè vergens illius recursus.

De sexuum, ætatum, temperamentorum, institutorum vitæ, & similium diversitate *accidentali*, & quò ad Chinam Chinam exhibendam, vel non exhibendam planè *superstitiosâ*, non minùs quàm ad tot alia, quæ sinè hisce cautionibus quotidie offeruntur Remedia, sum parum sollicitus; atque ad ea omnia tantùm respicio quò ad dosim plus minùs *liberalem* usurpandam, ut in aliis quoque Pharmacis præscribendis mos est, & quò ad vehiculum illius plus minùs activum, aut energeticum seligendum. Cæterum indicationem offer-

ren-

Aerisve Constitutionibus humidis; in siccis verò feliciùs, sive, ut castigatiùs loquatur, minori damno inquit exhiberi. In temperamentis pariter Pituitosis Febrifugum hoc suspectum putat: adeòque Corpulentos, & præpingues homines in Cachexiam sensim delabi, ac tandem longum post tempus obire, se observasse refert. In temperamentis verò Melancholicis graviores adhuc noxas Chinam Chinam parere, nervosè asserit, de humoris atrabilaris ferociâ ibidem nonnulla commentus.

Sed & insuper sexus, ætas, & vitæ conditio parum proficuum reddere solet, ipso Judice, Peruviani Corticis usum. Talem reputat, ut summatim dicam, in Pueris, Adolescentibus, & Mulieribus, exceptis gravidis, & operosis, cujusmodi sunt Textrices, Lotrices, & fervilibus operibus addictæ. Item ablegat a Monialibus, ab ædibus Nobilium, & Potentium virorum, & tandem (quod fortassis erat illi intentum primarium) a

Prin-

rendi, vel non offerendi, fumo a natura, & causâ Febris, nec non etiam ab accidentibus ejusdem, si graviora sint præter ordinem. In hunc finem ipsam Febrium omnium Periodicarum naturam diligenti indagine pluribus in locis Operis mei ex instituto persequor, & Causas illarum productrices inquirò, placita Scholarum, tam Veterum, quàm Recentiorum perpendens: atq; inde ad quævis medendi Systemata, & ad quasvis Scriptorum Hypotheses accommodatum esse Peruviani Corticis usum, pro curandis in quovis Subjecto iisdem Periodicis Febribus, luce meridianâ clariùs ostendo.

Vim nullam fluida nostra fragentem Chinæ Chinæ inesse, & rationibus, & practicis experimentis perspicuè demonstro, admittoque solum in eâ Fermenti febrilis absorptionem, meliori quo possim mechanemate explicatam. In quo sensu si quis contendat, a Peruviano Cortice figi nudum ipsum febrile Fermentum, dum ab illo absorbetur, me nequaquam dissentientem habet; dummodo hoc idem dicat de cæteris absorbentibus, citra diffidium apud omnes innocuis habitis, si ritè usurpentur. Neq; enim absorptio materiæ adeò exiguæ, cujusmodi est Fermentum febrile, ullam subinde necessariò exigit sensibilem evacuationem: quod pariter quarumlibet Scholarum Thesibus cohærere, factò prolixiori celebriorum examine, indigito. Et quotiescunque etiam sensibilis evacuatio quærat, illam satis superque patefacit, quæ Chinæ Chinæ actionem perpetuò subsequitur, urinæ copia; etiam si sub solis naturalibus excretionibus minimè ad-

auctis

Principibus ; tutioremque usum habere antifebrile istud in Populari gente , quæ ex manuariis operibus victitat , quàm in cæteris quibuscumque , tandem concludit.

Neque verò illud prætereundum , quòd quamvis hujusmodi remedium admittat semel tantum in diuturnis Febribus , ad impetrandas aliquot dierum inducias ; nihilominus neque id planè tutum censet , omnibus licèt expletis conditionibus supra recensitis , ob suspicionem , ne Febris , quæ ad tempus sisti creditur , Medicum eludat , & sistatur omnino , quod pessimum reputat : quam ob causam non semel illum poenituit , eo Febrifugo se usum fuisse.

Remedio huic inesse facultatem *figentem fluida* quæque humani corporis , ut *Sanguinem* , *Spiritus* &c. pro re certâ supponit , ne lites agat ; atque ob id fortasse Nepotem suum seriò admonet , ut diligenter animadvertat , Febres Intermittentes post epotam Chinam Chinam *nunquam* ad veram , & per-

auctis facilè tota possit delitescere Fermenti febrilis absorpti materia , & hac demum viâ integrè excerni.

In Febribus porrò *Intermittentibus Malignis* , non solum admitto Peruvianum Corticem , sed ita admitto , ut nullo pacto patiar omissionem illius ; unicum enim hoc est , verum , germanumq; Propositum Therapeutices meæ . Harum Febrium multiplex *differentia* , imò & tempestiva *diagnosis* hactenus parum nota , dilucidata est ex professo pro viribus a me , exemplo etiam Mercati , & Mortoni . In his casibus , ubi dignotio sit *tempestiva* , non plus , aut paulò plus Chinæ Chinæ præscribendum dico , ac in *vulgaribus* Intermittentibus : & hac proportionem , imò etiam parcius procedendum assero , si *maligna* Intermittens sit de earum specie , quæ nil aliud perniciosi præferunt , quàm dispositionem quandam proximam ad acquirendam continuitatem , quam *Febrim* idcirco *Subcontinuum* appellavi .

Quòd si vel ob Medici incuriam , vel ob Ægri calamitatem , *seriùs* dignoscatur *Perniciosæ* Intermittentis *malignitas* , sitque *repentè* constitutus homo in angustiam ferè *extremam* , dummodo victurus sit per horas 24. , quatenus per totidem distet a futuro lethali accessu , etsi *frigidus* , & *arteriæ micatione destitutus* ; in eo statu constanter statuo , inculco , & doceo , saltem Tyrones (neque hoc unum , quod mordicè sustineo in Therapeutice meâ , ab ullo Viro culto in circumstantiis hujuscemodi refutari posse censuerim) assero , inquam , maximâ , ne dicam certâ spe felicitis exitus , offerendum esse

Peru-

& perfectam apyrexiam per-tingere; non enim, inquit ille, Febres verè fugantur, sed potiùs concentrantur: ideoque non recurrunt quidem Paroxyſmi; veruntamen Febris ipsa, quæ creditur recessisse, tacitè cubat, ut ignis sub cinere do-loſo, & tacitè Corpus depa-ſcitur: adeòque optandum est, ut in apertam flam-mam erumpat, sitque redi-tus illius remedii loco.

Utiliorem *forſan* dice-ret Corticem Peruvianum in Febribus Intermittenti-bus *malignis* a Mercato de-scriptis, si tales ab initio di-gnoſcerentur; sed illas quo-què a Medicis Mutinensi-bus, tumultuariè, ut inquit, ad ſacram Anchoram Chi-næ Chinæ, ad uncias in Vi-no infusæ, incaſum confu-gientibus, minimè curatas vidit; perpaucoſ enim ab hujusmodi Febribus corre-ptos evaſiſſe, ſibi observa-tum teſtatur. Et si exem-plum aliquod oppoſitum af-feratur, hujusmodi porten-ta, inquit ille, viſebantur quoquè antequam Chinæ Chi-

Peruvianum Corticem, ſed auctâ doſi: itaut primus hauſtus, de quo mihi ſumma anxietas (ſecùs even-tu fruſtrarer) conſtet Drachmis, modò *tribus*, modò *quatuor*, mo-dò *quinque*, modò etiam *ſex*, ſi opus ſit, pro diverſâ caſus plùs, vel minùs *præcipitis* exigentia; dummodo tamen in progreſſu, tran-ſactâque unius, aut alterius diei procellâ, admodum *temperanter* a-gatur in oblatione Remedii, ſuapte licèt naturâ proriùs innoxii.

Uno verbo eâ regulâ, men-surâque procedendum volo in his caſibus, ut non plus quàm *uncie duæ* Chinæ Chinæ, pro *curatione* ſimul, & *præſervatione* impendan-tur; *una* ſcilicet, vel etiam quid minùs pro *ſubitâ* extinc-tione Fe-bris, & ſpatio *trium hebdomada-rum* ad præcautionem *altera*. Et hanc Methodum, quam *meam*, ac *peculiarem* voco, poſſumque *no-vam* jure vocare, ſaltem in regio-ne meâ, imò & alibi, non abnuo, quin pro libito quiſque appellet, vel *ſuam*, vel *alienam*, dummodo in commune beneficium eâdem u-tatur.

Pro aſſertorum quorumcunque meorum veritate confirmandâ, non modò *auctoritates* aſſero Scripto-rum *expertorum* (inexpertos enim, vel ſinè methodo expertos fidenter appello quot quot oppoſitum ſen-tiant, quamvis expertos ſe jacti-tent) verùm etiam *hiflorias* quam-plurimas *inſignes* æquè ac *fideles*, de quarum certitudine ipſe Cl. Ra-mazzinus expreſſè, uti ſocius in curatione, ita & teſtis a me non ſemel adducitur; neque tamen ea-rum ullam pro eâ, quâ pollebat honeſtate, in Diſſertatione ſuâ vel minimùm inſiciari aggreſſus eſt.

Uti-

Chinæ nomen innotesceret.

In hujus, aliorumque etiam assertorum suorum confirmationem auctoritates nonnullas, quodque magis refert, casus etiam nonnullos adducit; quibus tamen omnibus quænam vis insit, & quænam facti veritas, nonnisi invitè quidem, suo loco patefiet.

Denique in Febribus nullis, quibus obtigerit *continuitas*, qualiscunque ea sit, ne in iis quidem, quæ de Intermittentium naturâ quodammodo participare creduntur, aut sunt de earum *prosapia*, quamvis etiam *quid malignum portendant*, Peruvianum Corticem (quem adversus eas nimis liberaliter, ut dictum supra, *Mutinæ* usurpari putat) exhibendum censet; plurimas enim deceptiones hac in re ait contingere, cum Febres ipsæ Continentes, & ab essentiâ Continuae, quæ Cortici certè non auscultant, quosdam præseferant nonnunquam parvos motus, quales sunt ii, qui Febribus Intermittentibus competunt: quâ
demum

Utinam verò liceret mihi quas ipse adducit ex adverso, me fontem, seque testem criminis faciens, meo licèt suppresso nemine, pari silentio dissimulare; sed justâ dignitatis meæ tutela, & multò magis communis causa, quæ defendi debet, inofficiosam hujusmodi moderationem non patitur.

Ad *Continuas* denique *Continentes* omnes, sive *minimè* Remittentes Febres Chinam Chinam & ipse inutilem censeo, ut & ad plures alias diversorum generum nullâ intermissione notabiles. Ad *Continuas Proportionales* sic dictas in Scholis, sive *Periodicas*, minimè proficuum pariter dico, si illæ ex radice *Continuarum ab essentiâ* prodeant; secùs si sint de Stirpe *Intermittentium ab ortu*, vel *Subintrantium*, dummodo nondum *continuitatem essentialem* sint affectæ: quousque enim illuc non pervenere, eas etiamnum dico curabiles Cortice modicè exhibito.

Ne tamen ulla hinc oriatur in praxi confusio, Febris *simpliciter Remittentis*, a me sic appellatæ, naturam, & signa diagnostica minutè sum prosecutus, eamque, licèt obscurè, confusè, aut inordinatè periodica videatur, Cortice inexpugnabilem profero; non sic merè *Subintrantem*, quam quoque describo, suisque signis a *simpliciter Remittente* distinguo. Atque hac positâ duplicis generis Febre, *Continuæ* quoque *Proportionalis*, ex hisce duabus quodammodo mistis, seu potius ex diversi Febris utriusque Fermenti commistione conflatæ, naturam ancipitem, Chinâ Chinâ quandoque curabilem, & quandoque nequaquam curabilem, sub utrâque hac conditione considero,
pro-

demum vanâ spe seducti Mutinenses Medici, Chinam Chinam ad uncias integras in Vino infusam pluries in die propinant; sed perperam, etsi illis curationes nonnullæ Ægrorum pro conclamatis habitorum *fortuito* feliciter cesserint.

Interim hanc Methodum, neque *novam* esse contendit, neque inclytæ *Scholæ Bononiensis* usui consonam: miraturque ideo, Peruvianam hanc Plantam altas adeò radices egisse *inter Scultennam, & Gabellum*; non ita verò in Solo Bononiensi finitimo, cum cæteroqui apud Medicos temporibus Viri Cl. *Mutinæ* florentes, valde rarò, & valde cautè præscribi consuevisset Peruvianus Cortex, utpote *infidus*, atque *suspectus*. Hæc Ille. Dispiciendum posthac particulatim, quo singula consistant robore.

propriisque clarè, quantum fieri potest, signis indigito.

Ac tandem ne quis error possit obrepere, distinctas omnium planè Februm species, juxta seriem practicæ earundem Geneseos (quarum plurimæ Peruviani Corticis conatus eludunt, aliæ plurimæ eidem cedunt, aliæ denique modò cedunt, & modò non, pro variâ ipsarum naturâ, ortu, & successivâ nonnunquam Metamorphosi) in Icone peculiari ob oculos legentium, præsertim Juniorum, pono: ut ideo laborem frustraneum assumpsisse videatur Cl. Ramazzinus, Opus meum eatenus tantum convellens, ut perspicuè visitur, quatenus quæ ipse clarè disposui, & secrevi ab invicem, ille denuo simul confundit, mox fusque deque declamatorie perturbat.

An verò singula, quæ huc transtuli, in ipsâ Therapeutice meæ satis digesserim, ac ad umbilicum perduxerim, perduxerimve ratione duce, & comite experimento, qui distinctè cupit dignoscere; prolixam autem nimium, quippe in gratiam Tyronum conscriptam, eandem Therapeuticen detrectat percurrere, adeat solummodo Cap. 1. 3. 7. & 8. Libri primi, Cap. 3. & 4. Libri tertii, Cap. 5. Libri quarti, & Cap. 2. & 3. Libri quinti, cunctaque ibidem comminuta, forsan & supra modum, reperiet.

DISCREPANTIA

Clarissimi Ramazzini a semetipso,

S I V E

COLLATIO

*Potiorum Textuum summatim
huc translatorum, quos in
novissimâ Dissertatione suâ
De Abusu Chinæ Chinæ,
Anno 1714. evulgatâ, edi-
dit Clarissimus Ramazzinus
in contumeliam Chinæ Chi-
næ, præsertim ne posthac
Juvenes relinquantur du-
bii (ut eos antea relique-
rant Auctores ab invicem
discrepantes) in quam par-
tem se dedere debeant,
quemadmodum infra dedu-
citur ex eâdem Dissertatio-
ne, Paragrapho septimo.*

*Plurium Textuum hîc ad lite-
ram transcriptorum, quos in
diversis Operibus suis, non
juvenili, aut consistente æ-
tate, sed in medio, ac ul-
timo Senio; ab Anno scilicet
67. ad 79. ætatis suæ, sive
a 1700. ad 1712. Æræ
Christianæ, idem Cl. Ramaz-
zinus edidit in laudem Chi-
næ Chinæ, non Oratorem a-
gens, sed Documenta Theo-
rica, & Practica studio-
sæ suggerens Juventuti,
ut in Orat. Patr. argum. ipse
ad Lectorem præfatur.*

A

Non est tam insons, ut
vulgo creditur, Ame-
ricanum istud Febrifugum.
*Ramaz. Dissertat. de Abusu
Chinæ Chinæ Epist. nuncupat.
lit. c.*

Reme-

A

Peruvianum Febrifu-
gum, non arte qui-
dem, aut industriâ reper-
tum est; sed nobis divinitus
concessum. *Ramaz. Orat.
Patrici Arg. pag. 104. Orat. 3.
Edition. Patav. 1708.*

Peru-

B

Remedium istud natura suâ *dolosum* est. *Dissertat. eâd. §. 50. circa finem.*

B

Peruvianus Cortex Antipyreticorum omnium, quotquot excogitavit Antiquitas, & Chymicorum solertia conflavit, est facile Princeps. *Idem ibidem pag. 101.*

C

Noxa hujus Febrifugi tantò *perniciosior* est, quantò occultior. *Dissert. eâd. §. 15. lit. b.*

C

Utinam favore Numinum, & commiseratione, quâ solent in res humanas, aliud Febrifugum reperire daretur, quod *eâdem securitate*, quâ Peruvianus Cortex Periodicas sanat, reliquas Febres, quas Synochas, & Continentes vocant, sanandi facultate polleret. *Ibidem pag. 103. & 104.*

D

Hoc Febrifugi genus apud me tanti non est pro Febribus Intermittentibus curandis, ut Medicina æquè benè hoc præsidii genere carere non posset, & Veterum Febrifugis, quæ si non tam citò, tutiùs tamen operantur, non posset esse contenta. *Ibid. §. 18. lit. b.*

D

Quot seculis defudarunt Artis Primores, ut Febrifugum aliquod reperirent, aut arte conflarent? Modò e Peruvianâ Regione Cortex ad nos defertur, *divinum planè* remedium ad malè natam Febrium sobolem *exterminandam*. *Ibid. pag. 34. Orat. Secular.*

E

Certè constat, longè tutiora fuisse Veterum Febrifuga, quæ olim usui erant, quam Indum istud. *Epist. nuncupat. ejusd. Dissert. lit. e.*

F

In quacunque Febre Intermittente, in qualibet Regione, quocunque anni tempore, ætate, sexu, temperamento &c. Chinam Chinam indiscriminatim exhibere velle, magnum abusum esse judico. *Dissertat. ead. §. 8. lit. c.*

G

Chinæ Chinæ Fautores in eâ laudandâ modum nesciunt, sed summis laudibus ad Astra efferunt, *Arborem Vitæ* illam appellantes. *Ibid. §. 7. lit. a. b.*

E. F. G.

Quàm diu a peritioribus Artis Magistris insudatum est ad Febrifugum aliquod conflandum, ex triplici Regno materiâ petitâ? At omnes hætenus illorum labores frustrante diligentia in irritum cessere; & si aliquod Antipyreticum in illorum monumentis extat, nonnisi sub Grypho descriptum legitur, ut Delio Natatore opus sit, si mens Auctoris sincera habenda sit. *Solus Peruvianus Cortex*, nobis a Divinâ beneficentiâ munus concessum, sinè alterius rei mixturâ, in qualibet regione, quocunque anni tempore, ætate, sexu, temperamento, Febres saltem recurrentes, atque intervalatas fugat, & *exterminat*; quamquam non defuerint qui *bieron* hoc *picron* ex *Arbore Vitæ* decerptum temerare pertentarint Opio, aliisque rebus adjectis, ut solitis mangoniis vulgo imponerent. *Ibid. pag. 212., & 213. Orat. sept.*

H

In Febribus Tertianis Intermittentibus Malignis Medici Mutinenses ad sacram Anchoram Chinæ Chinæ incassum confugiebant; perpaucos enim ab hujusmodi Febribus correptos, evasisse vidi. *Ibid. §. 30. & 32. lit. a.*

H

Equidem hoc præsidii genus in Febribus Periodicis miranda præstat, & præsertim in Tertianis Intermittentibus Malignis, quæ in ipso impetu accessionis Ægros interdum necant &c. hoc enim Febrifugum fermentum illud malignum si ve penitus restinguit, si ve ita enervat, ut periculum illud tollatur, ne Æger in ipso Febris accessu intereat. *Idem Dissert. De Contagiosa Epidemia, quæ in Boves irrepfit pag. 37. Edit. Patav. 1712.*

I

Cum post tot conatus Magnorum Virorum, & facta tentamina, adhuc ignotus sit operandi modus hujus celeberrimi Antipyretici, asserere necesse est, *rationalem non esse illius usum, sed merè empiricum, & amethodicum. Ibid. §. 6.*

I

Licet autem in Peruviano Febrifugo &c nondum teneamus quid verè sit Febris, nec satis constet quid in nostris corporibus præstet hoc remedium &c; magnum tamen mortalitati nostræ solamen foret, si consimile præsidium haberemus, quo contra Febres verè continuas, quæ nobis exitium interminantur, *cæco licet modo, & Andabatarum more* pugnaremus, quando idem penè

de omnibus Remediis, quotquot habet Ars medica, proferre liceat, posse nos quidem pro lubitu fingere quid agant, quove modo operentur, ubi nostri corporis penetralia subierint; *modum* autem, & *ingenium*, quo morbum, & causas morbificas oppugnent, verè, ac scienter nequaquam posse pertingere. *Idem Orat. Patr. argum. pag. 104. & 105. Orat. 3.*

K

In Periodicis Febris *continuatus* hujus Febrifugi usus Obstructiones, & Cachexias invehit, Hydropem, & mortem. *Ibid. §. 21.*

L

Sicuti Opium, pro sedandis doloribus semel oblatum, rursus ad prophylaxim repetendum non est: ita *nec repetendus* ad prophylaxim Peruvianus Cortex, pro sedandâ febre semel præscriptus. *Ibid. §. 48. lit. a.*

M

Ab hoc remedio Febres Intermittentes fugari videntur; sed

K. L. M.

Profectò postquam hujus remedii usus innotuit, & præmissis justis purgationibus, *non semel tantum*, ut olim, *sed plures ad dies* exhiberi cœptus (*ita habet Auctoris Codex*) donec febrile Miasma fuerit *penitus exantlatum*, talem circa Februm doctrinam, ac illam curandi methodum factam fuisse fateri oportet (*hic quoque ita habet Auctoris exemplar*) qualem in re militari post inventum pulverem pyrium omnes norunt. Quemadmodum autem abjectis Catapultis, & Arietibus, solo tormentario pulvere terræ cuniculis incluso

tur ; sed Medicis nimis credulis imponunt : non enim verè fugantur , sed potiùs *concentrantur, tacitè cubantes*, ut ignis sub cinere doloso, & corpus tacitè depascentes . *Ibid. §. 24. lit. b. §. 25. lit. a. & §. 27. lit. b.*

cluso , & accenso alta propugnacula temporis momento solo æquantur, & Arces obsessæ ad deditionem coguntur; sic valere jussis tot pharmaceuticis præsiidiis, modico Quinquinæ pulvere exhibito *contumaciores* Febres *vinctas* dant manus . *Ibid. pag. 102. & 103.*

N

Aliquando Medico, qui Americanum istud Febrifugum exhibuit, in votis est Febrem repetere, sed fortiorum, ut tollantur ea mala, quæ China China ob Febris extinctionem invexit. *Epist. nuncupat. lit. c. & d.*

O

Optandum esset, ut in apertam flammam erumperet Febris, postquam Æger ad aliquot dies, eâ silente, roboris aliquantum reportasset ; nam reditus Febris remedii loco esset . *Dissertat. ead. §. 25. lit. b.*

N. O. P.

Cum in universâ morborum classe nullus extet nobis hostis infensior, & cui minùs fidere oporteat, veluti Febris; attamen eò audaciæ ventum est, ut inter Quæstiones Medicas sit, num ad alios morbos curandos Febrem excitare liceat, eò quòd interdum in quibusdam affectibus, veluti convulsione, & hypochondriorum dolore, superveniens Febris remedii loco fuerit, quasi in nostrâ potestate sit ignem febrilem accendere, ac pro lubitu ipsum restinguere . Quàm libenter scirem, quodnam corpus, sive de genere simplicium, sive

P

Ægri Febris obstinationem fastidientes, inscio nunquam Medico Quinquanam capiunt; sed magno sui damno pœnas luunt, Hypochondriacis postmodum affectibus, Cachexiis, ac lentis Febris correpti; ut postea cogantur Medicos accersere, qui multis remediis Febres *excitando* morbum vincant, & remedia quærant ad sepultum ignem suscitandum: in quem finem Spiritus Salis Armoniaci commendatur, & *Ficus Pharaonis*, qui Tertianas Febres *excitare* creduntur. Novum enim non est, ignem Febrilem penès prudentes Medicos suum usum habere. Sic Celsus scripsit, *licere Febres parvas augere; fortasse enim curationi opportuniore fient. Ibid. §. 38. lit. a. b. c. d.*

compositorum proſtet, quo quis Tertianam Febrem, Quartanam, Synocham, vel quamcunque aliam *excitare* possit. Pro fabulâ enim accipitur, quod quidam de *Pharaonis Ficu* referunt, quam ajunt, Tertianam Febrem *excitandi* vim habere. Non absimilis priori est alia Quæstio, non adeò tamen audax, quam habet Celsus, num *Febrem lentam augere liceat, ut curationi opportunior fiat*: verùm quàm suspecta, & quàm infausti ominis sint beneficia, & dona, quæ ab hoste proveniunt, satis compertum est, ut vetus proverbium admonet, *Hostium munera non munera*. O quàm egregiè in hanc rem Seneca. *Gravissima infamia est Medici opus quærere; multi quos auxerant morbos, & incitaverant, ut majori gloriâ sanarent, non potuerunt discutere, aut cum magnâ miserorum vexatione vicerunt. Ibid. pag. 94. 95., & 96.*

ANTITHESES RAMAZZINIANÆ

Ex unius nempe Viri Cl. Textibus hucusque
citatis, atque regeſtis excerptæ,

S E U

VERSICOLOR PAVONIS CAUDA.

*Caudaque Pavonis largâ cum luce repleta eſt,
Conſimili mutat ratione obverſa colores. Lucr. lib. I.*

* *
*

China China eſt Remedium

I.

Non tam inſons, ut vulgo
creditur, ſed naturâ
ſuâ doſum, noxium, & per-
nicioſum.

2.

*Arboris vitæ nomine per-
peram appellatum.*

3.

*Veterum Febrifugis eo lon-
gè tutioribus poſthabendum.*

4.

*Quo nempe pro Febris
Intermittentibus curandis æquè
benè carere poſſet Medicina, &
iis*

I.

Planè divinum, a benefi-
centiâ divinâ nobis con-
ceſſum, & Antipyreticorum om-
nium facile Princeps.

2.

*Hieron picron ex Arbore
vitæ decerptum.*

3.

*Veterum Febrifugis eo lon-
gè infirmioribus anteponendum.*

4.

*Quo nempe contra Fe-
bres Intermittentes reperto,
magnum mortalitati noſtræ ſo-
lumen*

iis tantummodo, quæ antea habuit, esse contenta.

lumen foret, si Medicina consimile aliud haberet contra Continuas.

5.

In quacunque Febre Intermitte, quacunque Regione, anni tempore, ætate, sexu, temperamento indiscriminatim non usurpandum.

6.

Semel oblatum, non amplius ad Prophylaxim repetendum.

7.

Non continuandum, ne Obstructiones invehat, Cachexias, & Hydropem.

8.

In Tertianis Intermitte, e quibus perpaucos evasisse observatum est, incassum adhibendum.

9.

Quippe Febres Intermitte, verè non fugans, sed potius concentrans.

5.

In quacunque Febre saltem Intermitte, quacunque Regione, anni tempore, ætate, sexu, temperamento indiscriminatim usurpandum.

6.

Non semel tantum, ut olim, sed ad plures dies exhibendum.

7.

Continuandum, donec penitus exantlatum sit febrile miasma.

8.

In Tertianis Intermitte, præsertim Malignis, miranda præstans; adeoque ne Æger in accessu intereat fidenter adhibendum.

9.

Quippe Febres Intermitte, omnes fugans, & exterminans.

IO.

Ejus enim operandi modus ignotus cum sit, usum quoque ejusdem irrationalem esse, empiricum, & amethodicum asserere necesse est.

II.

Ad tollenda ergo mala, quæ ob Febris extinctionem illud invexit, excitare Febrem debent Medici, & ad sepultum ignem suscitandum, remedia, quæ huic usui prostant, exhibere.

I2.

In hunc finem commendantur Spiritus Salis Armoniæ, & Ficus Pharaonis, qui Tertianas Febres excitare creduntur.

I3.

Neque enim novum est in Arte nostrâ, ignem febrilem penès prudentes Medicos suum usum habere. Sic nos docuit Celsus, cum scripsit, licere Febres parvas augere; fortasse

IO.

Ejus enim operandi modus ignotus sit licet, nil officit, quando idem penè de omnibus Medicinæ remediis asserere necesse est.

II.

Et tamen eò audaciæ ventum est, ut ad alios morbos curandos contendantur, num liceat Febrem, quâ nil nobis infensus, excitare, quasi in potestate nostrâ sit ignem febrilem accendere, ac pro lubitu ipsum restringere.

I2.

Nullum tamen, aut simplex, aut compositum corpus prostat, Tertianam, aut Quartanam excitare potis: pro Fabula enim accipitur, quod Ficus Pharaonis Tertianam Febrem excitandi vim habeant.

I3.

Cum ergo inter morbos nullus extet nobis hostis infensor, & cui minùs fidere oporteat, quàm Febris, suspectum est, & infausti omnis, quod habet Celsus; licere nempe Fe-

taffe enim curationi opportu-
niores fient.

Febrem lentam augere, ut
curationi opportunior fiat.

Præter hætenus recensitas, aliæ superessent pugnantes invicem Propositiones, ex unâ tantum Viri Cl. novissimâ Dissertatione facile depromendæ; quas tamen hîc juxta ponere supersedeo, quoniam mutua illarum repugnantia in Responsionum mearum decursu satis patefiet. Interim superiùs exaratas, neque ab hac unâ Cl. Auctoris Lucubratione, sed & ab eâ, & ab aliis simul ejusdem Operibus excerptas, placuit uno intuitu ob oculos ponere, ut me illico quisque cernat eâ ineluctabili necessitate compulsus, ut quicquid scribam in hac gravi, atque inter nos controversâ materiâ, velim, nolim, cogar dissentire a Viro Cl., vel septuagenario, vel octogenario; ita tamen, ut quacunque ex parte illi adverfer, ex aliâ semper adhæream: quapropter, si ex iis partibus meliorem fortè selegerim, eidem Auctori æquiùs adhærere dicar, quàm adversari; idque eò magis, si ab illo quoque ipsa dignoscendæ melioris, aut deterioris partis documenta depromam. Cum itaque ille §. 7. suæ nuperæ Dissertationis Nepotem doceat, fidem potius adhibendam esse iis Scriptoribus, *qui de Chinâ Chinâ judicium suum tulerunt datâ tantum occasione tractandi de Febris, utpote qui de hoc Febrifugo sanâ mente, ac ingenuè disquisiverunt, quàm iis, qui ex professo de eâdem Chinâ Chinâ scripsere, ac edidere Tractatus*: ipse autem Scriptorum utriusque Classis personam diverso tempore indutus, steterit pro Cortice Peruviano per annos 13., tunc scilicet cùm de Febris tractavit, earumque remediis, ut in Orat. 3. Patavinâ, & in Dissertatione De Contagiosâ Boum Epidemiâ; & quidem non juvenili, aut virili, sed provectiori, atque, ut ipse alibi vocat, *saniori ætate* (quam unam inter varias, quas percurrit, attendendam esse præcipit. §. 3. & 8. ejusdem Dissertationis) steterit verò adversus Peruvianum Corticem vix ante paucos menses, sive ultimâ provectissimæ ætatis periodo, cùm videlicet *de ipso Cortice ex professo acriter scripsit, ac Tractatum edidit*: idcirco meliorem partem me selecturum, nec illi verè me adversaturum putarim, si eum potius sequar pro Chinâ Chinâ, quàm adversus Chinam Chinam scribentem. His præmissis, evestigio rem ipsam aggredior.

ANIMADVERSIONES

IN TITULUM

A Cl. Ramazzino Constitutionibus suis Epidemicis,
annexæque Dissertationi De Abusu Chinæ
Chinæ conjunctim præpositum,
qui sic habet.

(a) *Constitutionum Epidemicarum Mutinen-
sium Annorum quinque Editio secunda* BERNARDINI RA-
MAZZINI in Patavino Gymnasio Practicæ Medicinæ
Professoris Primarii.

(b) *Accedit Dissertatio Epistolaris De Abusu
Chinæ Chinæ Ad D. Bartolomæum Ramazzini Mu-
tinae Medicinam facientem. Patavii 1714.*

(a) (*Constitutionum &c.*) **P**Rior hæc Tituli portio nihil ad me;
quemadmodum nihil ad me Consti-
tutiones ipsæ, quas non alio certè consilio recudere studuit artificiosus
Auctor, nisi ut ab his colorem mutuatus, annexæ Dissertationi viam
sterneret; quandoquidem in illis quoque parum amicè identidem sense-
rat de Peruviano Cortice. Scripsit ille quidem (atque hoc referre non
erit inutile) hujusmodi Constitutiones ab anno ætatis suæ 56. usque
ad 61.: & cùm *Juvenili ætate, ac in virili etiam statu Chinam Chi-
nam in magno pretio habuisset; procedente tamen ætate* (cùm vide-
licet easdem Constitutiones conscripsit) *a priori sententiâ recessit non
parum*, ut de his omnibus in subsequenti Dissertatione §. 3. nos monet.
Adeoque in Constitutione primâ, scilicet anni 1690., usum Chinæ
Chinæ *improsperè cessisse* sibi observatum refert; in secundâ verò anni
1691., ejusdem Febrifugi administrationem *saluberrimam fuisse* testatur
pag. 126. nuperæ Patavinæ Editionis, confirmatque pag. 131.: subdens
insuper pag. 132. ex vi oppositarum invicem observationum, in oppo-
sitis hisce Constitutionibus a se habitarum, *securiorem probabiliter esse
Chinæ Chinæ usum, quando humores fræno potius egent, quàm sti-
mulo*; quod in Constitutionibus calidis, & siccis evenit; secus in fri-
gidis, & humidis. Atque idipsum tandem *ulteriori*, ut ait, *factâ ob-
servatione* incunctanter statuit sub finem ultimæ Constitutionis trium
subse-

subsequentium annorum 1692. 93. & 94., ubi Chinæ Chinæ usum pro curandâ lentâ Febre, Peticulari malè judicatæ identidem tunc succedente, *parum salutarem* fuisse adnotat. Omnibus porro hisce observationibus haud semper uniformibus inter se collatis, pro coronide demum concludit pag. 192. earundem Constitutionum - *In frigidis, & humidis Constitutionibus, quæ corpora nostra crassis humoribus infarciunt, parum salutarem esse Corticis Peruviani usum; in calidis verò, & siccis Constitutionibus, in quibus humores aliquo egent sufflamine, Remedium istud egregiam operam præstitisse.* Hæc ille tunc. Ejus verò sententia, qualiacunque ea fuerint, huc compendiosè retulisse sufficiat, omisâ earundem Constitutionum recusatione, quippe frustraneâ, ut earum connexionem cum subsequenti Dissertatione minimè videar de industriâ dissimulasse. Quid verò, & quantâ quidem diversitate, post annum 61. ætatis suæ, nempe post annum 1694., senserit de eodem Cortice, postquam scilicet memetipsum vidit, sociumque non semel habuit, eo Febrifugo felicissimè semper utentem, in arduis præsertim circumstantiis, tam Intermittentium, quàm Subcontinuarum Febrium lethaliter malignantium, quidve in illius commendationem palàm scripserit ab anno 67. usque ad 79. ejusdem ætatis suæ, scilicet ab anno Christi 1700. usque ad annum 1712., satis constat ex ipsius Auctoris Textibus superiùs transcriptis; ut ideo tam insignis mutatio sententiæ, relapsusve in priorem, cæteroqui ab eodem repudiatam, contigerit ultimo biennio vitæ illius: quo tempore, & Exedræ addictus, & Ægros invisendi vix capax, quantum potuerit in praxi proficere, ut experientiâ ulteriore edoctum se nobis ostendet, nemo non novit.

(b) (*Accedit &c.*) Altera hæc Tituli pars magis ad me. Hic autem nonnisi de *Abusu Chinæ Chinæ* constituit agere Cl. Auctor; egi ego in Opere meo de *Uso, & Abusu*. Ille universim, ac indefinitè; ego definite, ac particulatim. Vide ergo Titulum meæ Therapeutices, Præfationem ad Lectorem pag. 19., & 22., totumque fermè, si lubet, Librum quintum; nec non Cap. 8. Libri primi, Cap. 5. Libri quarti &c.; & me æquè inimicum abusui, ac recto usui amicum ubique deprehendes. In eandem ergo metam tendimus: disquirendum superest, an eodem itinere; dum quinam sit rectus usus, & quinam abusus intimiùs examinabitur. Vereor tamen, ne hujusmodi examine minùs castigatè instituto, sibi que propterea nimium fidens, & nimium placens, *Ollam auxerit ante Lentem* Cl. Auctor.

ANIMADVERSIONES

I N

EPISTOLAM NUNCUPATORIAM,

Quæ sic inscribitur.

Illustrissimis , atque Excellentissimis D. D. Equitibus, D. Marci Procuratoribus, & Patavini Gymnasii Moderatoribus, D. CAROLO RUZINO, D. FRANCISCO LAUREDANO, D. ALOYSIO PISANO, Bernardinus Ramazzini Felicitatem.

(a) **C**onstitutiones meas Epidemicas, quas olim circa finem prægressi Seculi evulgavi, & Mutinenses dixi, quia modo Agros, modo Civitatem afflixaerint, denuo in publicum prodire volui, sed nonnisi sub Nominum Vestrorum auspiciis, Patavini Lycei **MODERATORES AMPLISSIMI**, neque ab hoc proposito quidquam me dimovit, quòd novum aliquod Opus non sint, scio enim Autoritatem Vestram eam esse, ut Antiquis gratiam, Obscuris lucem conciliare valeat.

Hisce tamen novum aliquid accedit, *Dissertatio nempe de Chinæ Chinæ abusu*, quem (b) ubique tam grandem, ac familiarem factum video, ut castigatione aliqua, & animadversione indigeat. (c) Non est enim tam insons, ut vulgò creditur, *Americanum istud Febrifugum*, ut aliquando Medico, qui illud exhibuerit,

bibuerit, in votis non sit febrem repetere, sed fortior-
rem, ut tollantur ea mala, (d) quæ China China
ob febris extinctionem invexerit. (e) Certè constat
longe tutiora fuisse Veterum febrifuga, quæ olim usui
erant ad febris causam sensim eliminandam, quàm
Indum istud, cujus operandi modum in nostris Corpo-
ribus, admirari potiùs licet, quàm intelligere. (f)
Vos autem CLARISSIMI VIRI, quorum
Incolumitas ad publicum bonum tanti interest, ita va-
lere volo, ut Medicorum nullus Peruvianum Corti-
cem, aut quidquam aliud pharmaceuticum Vobis un-
quam præscribat.

DABAM PATAVII

Die 20. Julii 1714.

(a) (*Constitutiones &c.*) Q Uemadmodum prima pars Tituli ni-
hil rei habuit cum Animadversioni-
bus meis, ita nec quicquam habet prima pars Epistolæ Nuncupatoriæ,
quippe quæ Constitutiones a me sepositas æquè connotat. Sat igitur
sit & hanc ordinis gratiâ integram recusasse, ne mutila in publicum
conspectum veniret. Cæterum cum alterâ tantùm illius parte nonnulla
mihi res est.

(b) (*Ubique &c.*) Animadvertant Geographi, hoc *Ubique* sumi a
Cl. Auctore per strictam quamdam Synecdochen pro eo tantùm terrar-
um spatio, quod *inter Scultennam, & Gabellum* intercipitur. Quòd
si illud idem *Ubique* semel saltem in totâ Dissertatione occurreret, ne-
que is, qui satis immeritò infonti Mutinæ affigitur, illi uni imputa-
retur Chinæ Chinæ abusus, ferenda utique, dum amplior, etsi adhuc
animosa plurimùm, Censoria hujusmodi castigatio.

(c) (*Non est enim tam insons &c.*) Non esse insons istud Febrifu-
gum, facile est asserere; difficillimum nervosè probare. Naturam illius
innoxiam ex opposito satis, superque me ostendisse puto Cap. 1. & 2.
Libri 1. meæ Therapeutices Specialis, & signatè a pag. 7. usque ad 30.
inclusivè. Id nihilominus ex abundanti ultro confirmabitur in pro-
gressu ex ipsis Responsionibus meis ad peculiare Paragraphos Ramazzi-
nianæ Dissertationis, & præsertim ad §. 47., ubi fusiùs de indubita-
bili, & patente hujusce remedii innocentia. Et sanè quidni sit insons
Febri-

Febrifugum, quod Cl. Ramazzinus in *saniori ætate* appellavit (ut vidimus in *Collatione* Textuum illius) *Remedium planè divinum, ex Arbore vitæ decerptum, Antipyreticorum omnium facile Princeps &c.*?

(d) (*Quæ China China &c.*) Satiùs fuisset dicere, *quæ Medicus*, non *quæ China China*, ob Febris extinctionem intempestivam *invenit*. Si enim præcisè ob Febris extinctionem quidquam mali contigit, idem, ut patet, contigisset effectus, si per aliud quodvis Febrifugum specificum, puta Gentianam, Centaurium &c. *eo tempore* Febris extincta fuisset. Medicus ergo rationem reddat præscripti *eo tempore* Febrifugi Corticis, non ipse tunc forsitan malè præscriptus Febrifugus Cortex. Num fortè culpabitur ut pravus cibus optimus, quem malè tulit Æger, quia illum Medicus sumendum præscripsit invadente accessione, cum debuisset ingerendum præscribere eadem solutâ? Ad evitandos hujusmodi scopulos in Chinæ Chinæ oblatione, circumstantias omnes examinaui, in quibus liceat, vel non liceat Febres suppressere. Hoc est, quod methodicum reddit illius usum, quodque talem reddit usum cujuscumque remedii, nempe ut illud *tempestivè* administretur: posito enim quòd suppressendæ verè sint Febres, & cognito opportuno tempore suppressionis earum, quod ex Medici peritiâ dependet, non aliud quærendum Febrifugum, quàm China China, quâ certius, aut tutius nullum. Vide propterea totum nuper citatum Caput octavum, ni te pigeat, Libri primi Therapeutices meæ, ut & decimum, si exempla tempestivæ, & intempestivæ oblationis nosse velis in Intermittentibus benignis; si verò in Subcontinuis malignantibus, ac præsertim in earum principio, ne graveris inspicere a fronte ad calcem citatum pariter Caput quintum Libri quarti; & si exempla desideres, etiam Caput sextum ejusdem Libri, ubi in historiâ primâ occurret tibi curatio Ægrotantis a Cl. Ramazzino pro conclamato habiti, subinde tamen Peruviani Corticis administratione restituti. Sanè eo casu perspecto, miraberis cur idem Auctor, nullâ etiam ratione habitâ aliorum plurium, arctis adeò limitibus rectum Chinæ Chinæ usum restrinxerit.

(e) (*Certè constat &c.*) Veterum Febrifugis quales olim laudes, sive, ut apertè loquar, quas criminationes in concursu Peruviani Corticis attexuerit Cl. Ramazzinus in suis Orationibus Patavinis, vidimus supra in *Collatione* Textuum illius lit. E. F. G., ubi *frustrantem Priscorum Medicinæ Patrum diligentiam, laboremque in iis, tam reperendis, quàm arte conflandis planè irritum*, parum abest quin ore pleno derideat: ut proinde & hîc subeat mirari, quo pacto iisdem Amplissimis Patavini Lycæi Moderatoribus hæc tam facilè obtrudat in Veterum Febrifugorum commendationem, coram quibus ante paucos annos tam effusè effatus erat oppositum. Sed nec id inglorium prorsus dixerim Viro Cl., Carneadem in hoc imitato, qui coram Catone prisco, Galbâ, aliisque principibus Viris elegantem, & acutam habuit Orationem *pro Injustitiâ*, cum oppositam haud minùs elegantem *pro Justitiâ* pridie habuisset *eisdem audientibus*. Quid de Veterum Febrifugis, partim noxiis, partim inertibus sentiam ipse, legi potest in meâ Therapeutice a pag. 20. finem versùs, usque ad totam pag. 23.

(f) (*Vos autem &c.*) Non erat, ut in Epistolæ fine officioso incolumitatis omine averti ab Amplissimis, prosperâque longævitate dignissimis Viris Peruvianum Corticem deprecaretur, qui severo Interdicto Medicis omnibus observando, *ab Aedibus Nobilium, & Potentium Virorum*, ut infra §. 10., vulgare istud Antipyreticum *proscripsit*, Exedræ Practicæ Patavinæ Professor Primarius. Quemadmodum tamen ille Nobilium, & Potentium Virorum genus egregium jam bene valens, finè Peruviano Cortice jugiter *valere voluit*: ita ego, ut revalescat non rarò malè valens ex Periodicis Febris quodcunque genus hominum, universam Viri Cl. Dissertationem, ut in sequentibus, valere jugiter volo.

RESPONSIONES JATRO-APOLOGETICÆ

AD IPSAM

DISSERTATIONEM

In Paragraphos divisam, cujus tota series hæc est.

DE ABUSU CHINÆ CHINÆ

Dissertatio Epistolaris.

§. I.



Uæsisſti à me per literas, nec ſemel (a) *Nepos* cariffime, quidnam ego ſentiam de celebri Febrifugo Peruviano, cujus uſum (b) *iſtic* tam frequentem, tam magnum ſenſim factum ais, ut qui ſine hoc præſidii genere ad febrem oppugnandam velit accedere, tanquam inermis accedat, ac ſi forte æger intereat (c) *pro magno piaculo* habeatur remedium iſtud non fuiſſe pertentatum. Quosdam tamen adhuc eſſe, ut ſcribis, ingenuos Medicos, qui ſui juris ſint, & huiusce remedii uſum quidem non abhorreant, ſed (d) *modum adhibendum* velint, ut nec tam facile, nec in tanta copia ſit exhibendum, ſed potius hac in re rationem, & experientiam conſulendam, longe tamen vincere illorum numerum, qui ſibi plaudunt ex hoc ſolo remedio curatas febres, quas Natura ſi non tam cito, tutius tamen curafſet non ita facile redituras.

(a) (*Quæfisti &c.*)

Piscis primum a Capite fœtere incipit. Nepoti pluries sciscitanti, usumque Chinæ Chinæ verè immodicum describenti (siquidem tam latè, ut in hoc Paragrapho asseritur, ille scripserit) æquum erat certè, ut hujuscemodi excessum minimè probans rescriberet Patruus: neque enim is sinè stomacho aliquo audire poterat, Mutinensibus Medicis fere omnibus pravum hunc esse morem (quod tamen longè abest) ut Febrim quamlibet armatâ semper Peruviano Cortice manu indiscriminatim aggrediantur, imò apud eos hodie piaculum reputari, hoc intentato præsidii genere Febricitantem quempiam interire. At minimè æquum, ut a se ipso paucos ante annos scribente, novis nullis emergentibus causis, dissentiret, ac in percunctantis opinionem planè oppositam, inexploratâ rerum narratarum veritate, mediis typis publicis, præceps descenderet. Sanè si minùs frigide Urbis hujus Medicos, magis verò sobriè Nepotem suum dilexisset Cl. Auctor, æquius, ut opinor, hac de re judicium tulisset: *Oportet* siquidem solùm *diligere cum judicaveris, non cum dilexeris judicare*, inquit Cic. de Amicitia. Cæterum Relatori ad præscribendam Chinam Chinam tunc temporis parum propenso, mirum non est, si fortè usus laudabilis, a scrupulosiore tamen ipsius methodo nonnihil recedens, imposuerit nomine abusus; multòque minùs mirum, quòd accedentibus partium studiis, isthæc tandem Nepotem non modò, sed & Patrum ipsum transversum egerint. Quòd inter nimis austeros in oblatione Corticis collocandus tum fuerit Nepos Cl. Auctoris, satis superque nunc potest eruere quilibet pluribus ex locis Therapeutices meæ, ut pag. 444. historiâ 9. pag. 368. hist. 2. pag. 416. hist. 11., nec non etiam pag. 476. hist. 2. Idem namque ille est, cujus nomen locis citatis semper officiosè subticui; modò verò scriptæ Dissertationis occasione cum indicetur a Patruo, totius quoque Causæ cognitioni admodum conducit haud ampliùs oculere; quemadmodum nec grave est mihi, eum in hac materiâ opinabili, & liberâ palàm ferre discrepantem a me, qui discrepat, aut discrepabat saltem, ut legitur in contextu, *a longè majore Medicorum Mutinæ degentium numero*. Occasione scribendi, quam captare sibi complacuit Cl. Ramazzinus, quantum sufficit explicatâ, minùs forsan posthac habebit unde obstupescat quisquam, Cl. Auctorem ab iis, quæ pro Cortice nuper scripserat adeò insigniter descivisse in hac Dissertatione, ubi Causam instantis Nepotis jam facit suam. Etsi enim profiteatur §. 49. *ad publicum beneficium isthæc se conscripsisse*, nihilominus & in Rempublicam (ut puto) inofficiosus, & sibimet ipsi, quæ antea docuerat refellens, quodammodo injurius, solis Nepotis sibi carissimi votis, Censuram in longè majorem Mutinensium Medicorum numerum præstolantis, obsecundavit. Sed satius forsan fuisset respondere sciscitanti: *Ipse Testudines comede, qui cepisti*.

(b) (*Istic &c.*)

Vastissimum illud **UBIQUE** Epistolæ Nuncupatoriæ statim ad breve **ISTIC** Mutinensis Pomerii contrahit Cl. Auctor. Liceat ergo & mihi hoc idem **ISTIC**, quatenus solas connotat Mutinensium Medicorum domos, restringere sensim in pulcherrimum, & æquali extensione præditum **NUSQUAM**.

(c) (*Pro*

(c) (*Pro Magno piaculo &c.*) Piaculum certè foret finire, ut hoc remedio minimè pertentato *Æger* occumberet, si ex *Febre Intermittente Perniciosâ* interiret, aut aliâ simili, ejusdem *tantummodo*, non alterius cujusvis remedii viribus cessurâ, unigue *Naturæ* palàm succumbenti linqueretur jam desperanda curatio, ne fortè aliquando rediret febris per *Chinam Chinam* fugata. Si verò obiret ex Febre, remedium hocce respuere, aut eludere solitâ, cujusmodi sunt omnes *Synochi*, aliæque ab essentiâ continuæ, tunc potius illiud pertentasse, ridiculum. Neque verò, ut quis *ingenuus* dicatur, & *sui juris Medicus*, necesse est illi, usum proficuum hujusce Febrifugi ab aliis præmonstratum, sibi que cognitum ut talem, reicere, alienamve Methodum, ne servus videatur, etsi res exigat, minimè amplecti.

(d) (*Modum adhibendum &c.*) Modum adhibendum esse, ne nimis facile, aut nimîâ copiâ exhibeatur Remedium istud, *rationemque*, & *experientiam hac in re consulendam*, ipse quoque in Opere meo pluries inculcavi (quis enim tam ferreus, ut aliter sentiat?) quodque magis refert, perpetuò etiam utramque consului. Quamobrem si fortè me collocet Cl. Auctor in Classe illâ numerosiore *Mutinensium Medicorum*, qui, ut inquit, in hujusce Febrifugi usu modum non servant, sciat se hallucinari quamplurimùm, cum debeat me potius reponere in eorum Classe, qui modum adhibent. Et primò quò ad nimiam in *Peruviani Corticis* administratione facilitatem, an ego vacem hujusmodi culpâ, manifestè visitur ubicunque de abusu illius, vel de tot cautionibus, pro casuum varietate hîc, & nunc in eo præscribendo adhibendis, locutus sum. Atque ut rem minuius persequar, si sermo sit de hac facilitate in *Febribus Intermittentibus vulgaribus*, seu non malignis, videndum Caput octavum Libri primi, præcipuè a pag. 146. usque ad finem Capitis, & duæ priores paginæ Libri secundi, videlicet pag. 189. & 190., quibus in locis me nedum cautum, sed & scrupulosum prodidi. Si verò sit sermo de *Subcontinuis malignantibus* (in *Intermittentibus enim malignis*, ac præsertim in præcipiti earum periculo me facilem non solum fateor, sed & profiteor) videndum Caput quintum Libri quarti; imò, & Caput sextum ejusdem Libri a pag. 573. usque ad finem ipsiusmet Capitis. Si denique sermo sit de *Continuis* absolutè cujuscunque speciei, legendum Caput secundum, tertium, & quartum, præcipuè verò tertium Libri quinti, tandemque lustranda *Icon Febrium Chinâ Chinâ curandarum*, vel non curandarum, quæ prostat Cap. quinto ejusdem Libri. Ex quibus omnibus clarè elucescet, me hujusce Febrifugi usum a quamplurimarum Febrium curatione planè proscribere, ad alias planè admittere, ad alias verò; imò etiam ad eandem in diversis illius stadiis modò admittere, modò rejicere, summâ in hoc adhibitâ circumspectione, tantâque interdum, ut remedium istud, quantumvis naturâ suâ prorsus innoxium, alias tamen ob causas sæpius contra Gravissimorum Scriptorum placita minimè verear excludere, vel alicubi nonnisi cunctanter admittere, aut potius permittere, ut latius de his omnibus in Responsionum processu.

Quò verò ad exuberantem illius profusionem, si quis me ab hoc

quoque crimine immunem velit dignoscere, legere ne gravetur Caput septimum Libri primi, quod est ad quantitatem in *diuturnioribus Inter-mittentibus* præscribendam, ubi me non transcendere intra hebdomadas tres, pro earum curatione simul, & præcautione, pondus unciae unius Chinæ Chinæ clarè deprehendet. Quòd si loquamur de *Inter-mittentibus malignis*, aut etiam de *Subcontinuis*, ut vocitavi, pariter *malignantibus*, & in *acutas* sensim migrantibus, dispiciendum est Cap. 3. Lib. 3. præsertim a pag. 323. usque ad finem, & Cap. 4. ejusdem Libri a pag. 352. usque ad 354. inclusivè. Atque ibi me pro harum validissimâ curatione in occasione præcipiti non plus Corticis impendere, trium pariter hebdomadarum spatium, quàm sesquiunciam, aut ad summum uncias duas, peculiariter tantùm distributas, cuique obvium est cernere. Ast hæc quantitas, imò & longè minor, quæ in *Benignis* impenditur, quo jure poterit improbari a Cl. Auctore, qui, ut vidimus in *Collatione* Textuum illius Cortici favorabilium, Textu literis K. L. M. signato, admittit usum Corticis hodiernum *ad plures dies, donec scilicet febrile miasma sit penitus exantlatum?* Ad quod equidem opus absolvendum, eam requiri ad minimum, quam taxavimus quantitatem, nemo non videt; quotidiana siquidem idipsum experientia confirmat. Denique si de omnibus antedictis variâ identidem, attentâque determinatione a me statutis, præter scrutinium rationis, quis etiam *experientiam* desideret, quam quoque *consulendam* esse monet egregiè Cl. Auctor, præter historias omnes tribus primis Capitibus Libri 4. comprehensas, quæ Mtehodum meam, & proficuum, & rationalem ostendunt, præter illas inquam, ut meam insuper cautionem quoque; imò, & nonnunquam hæsitantiam in præscribendo Cortice, in experimentis ipsis, & observationibus plurium, ac plurium annorum fundatam queat dispicere, adeat Cap. 10. Libri primi, Cap. 6. Libri quarti, & Cap. 4. Libri quinti, ni velit insuper expiscari casus alios innumeros per totum Tractatum meum dispersos. Quæ omnia in ipso Dissertationis limine per extensum indigitasse sufficiat, in reliquo clariùs adhuc exponenda ejusdem Dissertationis, ac Responsionum mearum progressu. An verò his omnibus satis patefiat, non solum *modum* ubique *adhibitum* fuisse a me in Chinâ Chinâ præscribendâ; verùm etiam fuisse definitè indicatum, quinam esse debeat, & quâ religione servandus sit hujusmodi modus, a Cl. Auctore generaliter tantùm de-prædicatus: item an ipse *nimis facilè*, aut *nimiâ copiâ* in Therapeutice meâ illam præscribam, aut præscribendam doceam, ut fortasse visum est Nepoti, & Patruo, penès Practicos judicium sit. Quòd si fortè quispiam ex Nostratibus Medicus, me inficio, revera sit, vel videatur nimius in usu Chinæ Chinæ, illum, illosve, quòtcunque sint, sicuti si regulis, & cautionibus a me positis eâdem utantur, rectè utentes dicam; ita si secùs, forsitan abutentes. Sitne verò Mutinæ major Medicorum sibi ex hoc plaudentium, vel non plaudentium numerus, ego sanè, qui gressus alienos non dinumero, calculum hunc nequaquam subduxi.

§. 2.

QUæris ulterius an salutare consilium esset usum Chinæ Chinæ pertentare ad solam prophylaxim, num scilicet antequam ingruat solita febrium periodicarum tempestas per æstatem, sive autumnum, bonum esset Chinam Chinam adhibere ad præcautionem, ne generetur fermentum illud, quod hujusmodi febres excitare solet.

(Quæris ulterius &c.) **F**Ucatum hoc Quæsitum abnuo scalpere, ne color Dissertationi obductus repente concidat. Cum verò jam præ crassitie suâ incipiat ille concidere, quamvis non scalptus, *alium* idcirco

————— Dic Quintiliane colorem.

§. 3.

UT honestis petitionibus tuis satisfaciam, ad primum Quæsitum respondeo, juxta varias ætates, quas Divina Beneficentia percurrere mihi indulsit, (a) *varie ac diversimode* de Peruviano Cortice me sensisse; juvenili ætate, ac in virili etiam statu, fateor mihi in magno pretio habitam Chinam Chinam, & illa familiariter usum, non ita tamen ab illius vesano effectû me fuisse infatuatum, ut illam tanquam Panaceam omnibus remediis præferrem, procedente vero ætate, (b) *experientia edoctum* à priori sententia recessisse me non parum, & non nisi cum summa cautione remedium hujusmodi præscripsisse. Sic frequenter evenit non solum in re Medica, sed in aliis quoque facultatibus, quod ajebat Demea ille Terentianus.

*Nunquam ita quisquam benè subducta ratione ad vitam fuit,
Quin res, ætas, usus semper aliquid adportet novi,
Aliquid moneat, ut illa quæ te scire credas, nescias,
Et quæ tibi putaris prima, in experiundo repudies.*

(a) (*Variè, ac diversimodè &c.*)

Variè, ac diversimodè sensisse, aut saltem scripsisse Cl. Auctorem de Peruviano Cortice diversis temporibus, verum est nimis. *Juvenili ætate, ac in virili etiam statu eam magno in pretio illi habitam quidem fuisse; sed procedente ætate a priori sententiâ ipsum recessisse non parum*, bonâ ejus veniâ, distinctione indiget; enormis enim hic latet æquivocatio. Ante annum ætatis suæ 57., ac ideo tum in juvenili, tum in virili etiam statu fuisse Cl. Virum usui Corticis satis addictum eâ vulgari, quæ tunc vigeat methodo, minimè inficias iverim; id enim & me non prorsus latet. Ab anno 57. usque ad annum 61. ejusdem ætatis suæ, nempe ab anno 1690. usque ad annum 1694. (quo tempore Constitutiones Epidemicas Mutinenses conscripsit) recessisse ipsum non-nihil a priore sententiâ, itaut nonnisi cunctanter, & cum recensitis paulò ante limitationibus, quas modò ferme ad proscriptionem usque remedii coarctat, illius usum admiserit, ultro patet ex iisdem Constitutionibus. Ast progrediente adhuc ætate, & praxi, æquè patet, illum incomparabili huic Febrifugo strictiore longè fœdere, quàm in ipsâ juvenili ætate se devinxisse. Id statim patefecit, ac Patavinam Exedram cœpit conscendere, fretus, ut reor, ulteriore experienciâ ab anno 1694. ad annum 1700. acquisitâ: quo anno primam habuit in eodem Patavino Athenæo Orationem, quam *Secularem* dixit; in cujus decursu non vulgaribus Peruvianum Corticem laudibus extulit. Multò magis extulit in *Tertiâ* anno 1702. ibidem habitâ, ut & in *Septimâ* habitâ anno 1706. Tandemque anno 1712. in *Dissertatione De Contagiosâ Epidemiâ, quæ in Boves irrepfit*, eousque devênit, ut sphæram activitatis hujusce remedii propagare conatus fuerit, quousque illam tunc me propagaturum sponderam in Synopsi Tractatus mei antea editâ. Quamobrem quasi iis, quæ ipse promulgaturus eram, prævium calculum vellet apponere, ad *Tertianas Perniciosas* curandas mirabile remedium esse Chinam Chinam pronunciavit. Quorum omnium veritas, absque eo quòd hanc crambem ad nauseam usque recoquam, satis liquet ex *Collatione Textuum* illius supra prolatorum, ad quos Lectorem iterum remitto. Constat itaque evidenter, illum in provectiori, gravique ætate nempe ab anno 67. circiter ejusdem ætatis usque ad 79. eam mutasse strictiorem sententiam, quam ab anno tantum 57. ad 61. professus erat, ut in meâ Therapeutice asserui pag. 640. Adeoque toto vitæ suæ cursu quater saltem diversimodè, sententiis videlicet alternatim oppositis, opinatus est de Peruviano Cortice Cl. Auctor. Juvenili siquidem ætate, ac in virili statu illam in magno pretio habuit, ut hic fatetur. In primâ senectâ habuit in minori, ut patet ex Constitutionibus Epidemicis. In secundâ senectâ usque ad decrepitam ætatem (siquidem menti tam vegetæ ulla unquam obtigit ætas decrepita) habuit in maximo, ut Opera illius palàm commonstrant. Ultimâ tandem Vitæ periodo, ab anno scilicet 79. usque ad 81., quo satis cessit, habuit in minimo, ut nupera hæc Dissertatio rursus testatur.

(b) (*Experienciâ edoctum &c.*) Hanc ergo, quâ edoctum se profitetur Cl. Auctor ulteriorem experientiam, ab editione tantummodo

Tracta-

Tractatus mei, Fungorum more, citra cultum repente prognatam, sterile biennium octogenariæ ætatis produxit. Ast reclamat ille §. 18. hujusce Dissertationis. *Observationes istæ, scilicet usui Corticis infensæ, multorum annorum sunt fructus* (rectius dixisset *duorum*, quos retuli) & *longævitatæ a divinâ beneficentiâ mihi concessæ*. Quid ergo? Insequarne amplius Virum, qui vel in dolo aliquo deprehensus, *unum pro re natâ pedem habet in calceo, & unum in pelvi?*

§. 4.

Absit tamen, ut febrifugi hujus vim arcanam contemptui habeam, etenim ingenue fateor Peruvianum Corticem unum esse ex iis quæ facilius admirari possumus, quàm intelligere. Sicuti enim divinum illud Hippocratis aliquando in morbis reperitur, idest quiddam abditum, quod humanum captum excedat, ita etiam in aliquibus remediis observatur non raro, το θεϊον & potissimum in Peruviano Cortice. Admirandum est profecto quomodo ad exiguum pulvisculum quomodo-cunque exhibitum febris periodicæ furor conquiescat, interdum etiam extinguatur, quod de quocunque alio remedio pharmaceutico non tam facile observatur, quod sciam. Opium equidem, ex quo Nobile illud Nepenthes dolorum sedativum, paucarum horarum spatio dynamini suam ostendit, spiritus animales consopiendo, sed hujusmodi virtus ephemera est, nam altera die dolor redit, ast Chinæ Chinæ beneficium non tam paucis diebus clauditur.

(Absit tamen &c.) **M**alo nodo malus Cuneus, dici solet: ast hîc duro nodo mollis, & iners Cuneus a Cl. Auctore adhibetur: artificiosa quippe isthæc laudum pondere carentium congeries encomiasticis Textibus, aliàs a Cl. Ramazzino editis, nequit supplere Commentarii vicem, ut ille fortassis autumat; nisi Commentarii nomine veniat hîc explicatio germano textui planè contraria. Aliud namque est asserere, ut hîc asseritur, inesse Chinæ Chinæ nescio quid arcani, quid abditi, quid tandem divini, uti quid divinum, aut potius quid divinandum latet in morbis, & asserere in eum præcisè finem, ut in progressu postmodum ostendatur, illud idem *Arcanum*, *illudque mirabile*, quod *humanum captum excedit*, & Chinæ Chinæ inest, illud inquam

quam, ob hoc ipsum quòd *arcanum* est, esse in praxi *amethodicum*, *irrationale*, *merè empiricum*, *naturâ suâ dolosum*, ac *noxium*, *malitiamque habens occultam*, & *noxam inferens tantò perniciosorem*, *quantò occultiozem*, ut infra §. 6. 8. 15. 47 50. &c. : aliud est scripsisse, & sine ullâ limitatione pluries promulgasse, eam esse *Remedium*, non habens tantummodo quid divini (id nempe divini, quod etiam in morbis malignis, & in venenis exitiis delitescit) sed *divinum planè*, *tanquam munus a divinâ beneficentiâ nobis concessum*, ad malè natam *Februm sobolem*, non consopendam tantum, ac interdum etiam extinguendam, sed absolutè *exterminandam*, & ad *exantlandum penitus febrile miasma*, dummodo ad plures dies exhibeatur: cui remedio simile aliud optandum est favore *Numinum*, & *commiseratione*, quâ solent in res humanas, ad *Febres verè Continuas*, & *Continentes* pari securitate sanandas, ac sanantur ab eo *Periodicæ &c.*, quemadmodum latius legitur in *Collatione* pluries indicatâ. Certè *Glossa* recens minimè cohæret veteri *Codici*, digna tantum quæ apud *Mulieres*, & *imperitam plebeculam* (si *Cl. Auctoris* verbis uti licet) *locum habeat*, non apud eos, qui sapiunt.

§. 5.

(a) **C**Ætera remedia, uti omnia emetica, catartica, hydrotica in morbis quibusdam promptam opem quam spondent, re ipsa præstant, sed cum ratione, dum è corpore peccantes humores eductos adspicimus, ast exhibito *Cortice*, sive in mediocri, sive in larga dosi, saltem ut plurimum nihil sensibile propelli videmus, fortuitum enim est si aliquid per vomitum rejiciatur, sive propinata *China China* contingat alui dejectio, (b) *virtute ergo secreta*, & adhuc incomperta *Febrifugum* istud agit id, quod agit.

(a) (*Cætera Remedia &c.*) **Q**Uod perfunctoriè, ut sic dicam, habet hîc *Cl. Auctor* de carentiâ, saltem ut plurimum, sensibilis evacuationis ab epotâ *Chinâ Chinâ*, non videtur prolatum per modum objectionis; sed etsi eo etiam nomine intelligatur, vulgarem hujusmodi oppositionem ad ultimas usque ineptias solutam vide *Cap. 3. 4. 5., & 6. Libri primi Therapeutices* mæ. Quòd si te pigeat hujusce generis *Pandectas* evolvere, & nihilominus *Cathartorum*, *Emeticorum*, aliorumque similium remediorum inutilitatem, ac noxam, in concursu *Febrifugi Corticis* nil sensibile propellentis, paucis expressam nosse desideres; adi tantummodo *Cl. Auctorem Orat. 3. Jatrici Argum. pag. 101.*, ubi hæc reperies. *E singulari hujus*

hujus remedii præstantiâ (loquitur de Peruviano Cortice) quòd in Periodicas Febres vim suam potissimum exerat , id beneficii fuimus assecuti , ut verum discrimen inter Febres Intermittentes , ac eas , quæ verè sunt Continuæ , nec non inter illarum fœcum teneamus ; neque amplius unicâ methodo Febres omnes curentur , tam Gastricæ , quam Venosæ , continuato scilicet refrigerantium , & humectantium usu , tot repetitis venæ sectionibus , tot iteratis purgationibus , quæ humani corporis machinam potius infirment , quam confirment (en ergo quid præstent in curandis hujusmodi febribus remedia , quæ humores e corpore educunt , quæque in hoc Paragrapho tam fidenter dicuntur re ipsâ præstare promptam opem , quam spondent) sed illæ tantum Febres , quæ de Intermittentium familiâ sunt , pulveris exigui haustu in vino soluti , aut compressæ quiescant , aut etiam penitus aboleantur . Aboleri possunt igitur secundum ipsum Cl. Auctorem Febres , quæ de Intermittentium familiâ sunt , haustu pulveris exigui nihil sensibile propellentis . Quomodo autem tutò , & rationabiliter id fiat , videre est per extensum locis nuper citatis Therapeutices meæ .

(b) (*Virtute ergo secretâ &c.*) Hocce effatum per modum Consequentia hîc loci prolatum , sinè ullo etiam antecedente , nemo , quòd sciam , unquam negavit . Ratio tamen potissima (si velimus ingenuè fateri) cur tam *secreta* sit virtus hujusce Febrifugi , est quia *secreta* est *Causa* Febrem Intermittentem gignens ; hac enim cognitâ , facile forsân esset dignoscere quidquid habet in se *China China* , quod hujusmodi *Causæ* opponatur . Ita quoquè si *Chinæ Chinæ* in febres agentis ratio intima innotesceret , ad incompertam febrium ipsarum notitiam via facilis sterneretur . Ob hanc rationem Villis , Borellus , & alii ominati sunt , fore , ut ex hujusce Corticis virtute , quamvis adhuc occultâ , lumen sufficiens aliquando trahatur ad detegendam occultam pariter Febrium Intermittentium naturam . Sed hi fortasse Viri , inquiet Cl. Auctor , ut in §. septimo , haud satis sanâ mente disquisiverunt de hoc *Peruviano Febrifugo* . Audiamus potius illum nullâ præoccupatione detentum , neque (quod maximè cavendum præcipit eodem § septimo) de *Chinâ Chinâ Tractatus* edentem , sed ingenuè datâ occasione tractandi de Febribus suum judicium ferentem . Hariolari licet , inquit ille Orat. 3. Jatr. argum. pag. 103. *hariolari licet , ex admirandâ hujus Corticis virtute Febris naturam medullitus aliquando erutam iri ; passim enim hujus celeberrimi Febrifugi Chymica Analysis instituitur &c.* Consequentia igitur , quæ ex hisce omnibus debet inferri de virtute abditâ *Chinæ Chinæ* , respectu habito ad virtutem patentem aliorum remediorum , mediis evacuationibus sensibilibus morbos nonnullos curantium , ea non est , quam illaturus est Paragrapho sequenti Vir Cl. , quòd nempe *amethodicus* idcirco sit illius usus ; sed est ea , quam infert , ab ipso Cl. Auctore sæpissimè laudatus Sydenham , in Præfat. ad Lectorem lib. de *Observationibus Acutorum* ; videlicet *Peruvianum Corticem* hac unâ de causâ , quòd *virtute ignotâ sinè evacuatione sensibili* determinatam morbi speciem delet , ac destruit , jure merito *Remedium Specificum* appellari ; imò *unicum* esse in Medicinâ , cui verè competat *Speci-*

Specifici denominatio : remedia verò , quæ mediantibus evacuationibus ad varios morbos curandos adhibentur , æquè improprie appellari *Specificæ* , ac quis *Scalpellum Phlebotomum Remedium Pleuritidis Specificum* vocitaret.

§. 6.

D *In equidem* , sed frustrante diligentia à sagacioribus Medicis allaboratum est circa hunc Corticem , ut aliquid proferrent quod animum veritatis avidum expleret , *sed vincit adhuc natura latendi* , ut olim de Nili origine cecinit Lucanus. Cum ergo post tot conatus magnorum Virorum , & facta tentamina per varia experimenta , num saltem pro solamine laborum in Vegetabilium familia in Europa aliquid analogum Peruviano Febrifugo reperiri posset , adhuc ignotus sit operandi modus hujus celebris Antipyretici , asserere necesse est rationalem non esse illius usum , sed mere empiricum , & amethodicum.

(*Diu equidem &c.*) **E** X eo quòd Febrifugum istud agat virtute *adhuc incomptâ* , ut supra adnotavit Cl. Auctor , *sitque adhuc ignotus* , ut modò repetit , *illius operandi modus* , haud satis percipio , cur *necesse sit asserere* , ut asserit , *rationalem non esse illius usum* , sed *merè empiricum* , & *amethodicum*. Hoc jacto fundamento , nunquam Chinâ Chinâ licebit uti ; semper enim obstabit , qui semper *occultus* , & *ignotus* est , illius operandi modus : cum tamen aliquando utendum esse , & quomodo utendum sit , per varia ratiocinia , variasque regulas , quæcunque illæ sint , doceat idem Cl. Auctor in processu Dissertationis , & signatè §. 48. , remediumque istud , quod modò *amethodicum* dicit , tandem *methodicum* , & *rationale* affectet reddere , etsi modo illi etiamnum incomptò vim suam exerat antipyreticam. Sic egomet illud idem , in primâ licet inventione suâ , ut alia remedia ferè omnia , prorsus empiricum , ad rationales demum , & insolitos usus extendere pro viribus conatus sum , præeuntibus mihi aliis non paucis , egregii hujusce Febrifugi fortuitò quondam detecti utilitatem eximiam legibus Artis promovere , & ampliare studentibus. Scilicet non pudet Medicos culti hujusce Seculi (inquit doctissimi ne suo more Eruditissimus D. Antonius Franciscus Bertini in præclarissimo Opere suo , cui Titulus -- *La Medicina difesa* pag. 171.) non pudet , inquam , Medicos hujusce Seculi ; imò referunt ii in decus suum , Chinam Chinam , quâ primò a Barbaris uti didicere ad Quartanas tantum expugnandas , ad meliores usus quotidie transferre , nedum ratione , & observationibus culti ;

fultí ; verùm & auctoritate ipsius Hippocratis, sic, illo notante, docentis. *Neque verò pigeat ex plebejis sciscitari, si quid ad curandi opportunitatem conferre videatur.* En igitur quo pacto ex mente Divini Senis remedia empyrica parum nota, & a plebejis ipsis petita, accedente demum Medicorum observatione, studio, & industriâ, ad rationales Canones redigi possint. Verùm quid multis? Nonne ignota nobis est virtus cujuscumque Specifici, quorum tam creber est usus, & copia tam ferax in Medicinâ, ut series eorum, si cuncta vellem persequi, facilè volumen impleret? Nemo certè virtutem novit, seu modum actionis, quâ Lapis Aetites abortum dicitur præcavere, Judaicus mederi Nephritidi, Hæmatites Hæmophthysi, tot Amuleta Quartanæ, aut Tertianæ Febri, tot alia Ictero, Epilepsiæ, Hystericæ affectioni &c. An igitur horum virtus, & actio, quantumvis *occulta, methodica* vocabitur, & *rationalis*, quia ut plurimum futilis, aut nulla est? Si hac ratione methodicus est rerum hujusmodi occultè agere creditarum usus inanis, verè ex Contrariorum regulâ erit amethodicus, nedum usus Peruviani Corticis apud Medicos, sed & apud Nautas usus Acus nauticæ, quia *ignota*, & adhuc incomperta est virtus utique certa, quâ verè Magnes constanter respicit Polum. Extraordinarium magis est id, quod additur a Viro Cl., nempe amethodicum esse Chinæ Chinæ usum, eò quia *in Vegetabilium Familiâ nihil illi analogum adhuc reperiri potuerit in Europâ.* Anne quidquid ab Indis ad nos defertur, cui simile non sit in Europâ, vocabitur amethodicum in Medicinâ? Exulent igitur a Pharmacopoliis quævis Aromata. Si verò Cortex Peruviano Cortici analogus in Europâ reperiretur, numquid propterea methodicus unâ evaderet Americanus, & Europæus Cortex? Sed hæc frustra obtruduntur a me Cl. Auctori, qui decreto irrevocabili jam sancivit, ex eo quòd *ignotus sit adhuc operandi modus hujus celeberrimi Antipyretici, necesse esse asserere, rationalem non esse illius usum, sed merè empyricum, & amethodicum.* Appello itaque a D. Ramazzino Cortici irato ad D. Ramazzinum Cortici benigniorem, & ante paucos annos ingenuè fassum, æquè *ignotum* esse operandi modum omnium fermè, quot quot habet Ars Medica, *remediorum*: ideoque optandum esse simile aliud Febrifugum pari *securitate* Febres verè Continuas sanans, ac istud sanat Periodicas; neque referre quicquam, etiamsi *ignoto* illius operandi modo, *cæco nos modo Andabatarum more* contra easdem Febres pugnaremus. Vide propterea, tum Textum notatum lit. C.; tum maximè alium notatum lit. I. in *Textibus Ramazzinianis* Cortici favorabilibus, &, ni obstupeas, obstupecam.

§. 7.

Suppono Te clariores Scriptores legisse, non eos solum qui ex professo de China China scripsere, qua de re tot in dies prodeunt novitates, ut de hoc remedio jam habea-

habeamus Pandectas, sed etiam eos, qui data occasione tractandi de febribus, ac illorum remediis, de hoc Peruviano Febrifugo (a) *sana mente*, ac ingenue disquisiverunt, facile enim Tibi fuisse existimo observare quàm parum convenient qui ex professo de China China tractatus edidere, & illi qui data occasione de hoc remedio judicium suum tulere, priores enim (qualis mos est eorum, qui de aliquo novo medicamento tractatus integros edunt, in eo quod laudandum assumpsere modum nesciunt, ac ut ait Juvenalis *de magnis majora loquuntur*) summis laudibus remedium istud ad Astra efferunt, (b) *Arborem Vitæ* illud appellantes, alii vero suspensò pede de China China procedunt, (c) *bona & mala* quæ non raro inferat ingenue exponentes, sic (d) *laudatur ab his* culpatur ab illis, ut legentes, ac præsertim Juvenes dubios relinquant in quam partem se dedere debeant.

(a) (*Sanâ mente &c.*) **Q**Uasi sanâ mente non disquisierint, qui ex professo de Chinâ Chinâ scripsere, ac edidere *Tractatus*. Sed hoc in obsequium defuncti missum faciamus. Sanâ certè mente de hoc Febrifugo disquisivit Cl. Auctor in suis Orationibus Jatrici Argumenti. ubi tot, quas partim recensuimus, partim etiam non recensuimus laudes effudit; & quidem majores, ac unquam effuderint ii, qui, ut inquit ille, *in eâ laudandâ modum nesciunt, ac de magnis majora loquuntur*. Sanâ inquam mente tunc disquisivit de Chinâ Chinâ Cl. Auctor; tum quia non aliter potis erat quicquam scribere; tum quia, non ad augendas de hoc Remedio *Pandectas* ullo scripsit percussus affectu, sed datâ tantùm occasione tractandi de Febribus, & signatè in tertiâ ex iisdem Orationibus (quæ circa Febres versatur tota) ut fusè jam vidimus. Quâ postmodum, & quàm sanâ Minervâ scripserit ille in hac Dissertatione, ubi ex professo de Chinâ Chinâ agens, sentit oppositum, decernere meum non est.

(b) (*Arborem vitæ &c.*) Ego certè, qui de hoc Remedio *Tractatum integrum* edidi, *Arborem Vitæ* illud me appellasse non memini. Memini tantùm, pag. 7. ejusdem *Tractatus* dixisse hæc obiter; cùm videlicet facilem relapsum in Febres, assumptâ semel, ac unicâ tantùm dosi Chinâ Chinâ, citra contentionem concessi -- *Nisi hoc unum obstaret, Arborem Vitæ in Chinâ Chinâ superstitem divinâ clementiâ crediderim* -- Sed hic Vir Cl. incidit solus in foveam, quam fecit. Mihi enim obstitit aliquid, ne Chinam Chinam appellarim *Arborem vitæ*. At illi, nullum de eâdem *Tractatum* edenti, nil obstitit, quò minùs asse-

ruerit, ut in præmissâ Collatione Textuum, *Hieron hoc Picron ex Arbore Vitæ fuisse decerptum*. Sic dum Vineta mea cædere fatagit Cl. Auctor, cædit sua.

(c) (*Bona, & mala &c.*) Satis memetipsum citavi, ut ostenderem, quàm *suspensio pede processerim* in Opere meo, usum Chinæ Chinæ methodicum omni adhibitâ cautelâ ibidem indigitans. *Malos* verò æquè ac *bonos* eventus an ingenuè *exposuerim*; quos ab illius administratione, vel præposterâ, vel præproperâ, vel minùs castigatâ, vel minùs circumspectâ procedere observavi, facile est cernere a pag. 557., usque ad 559., & a pag. 627., usque ad 635., ut & pag. 659. & 663. ejusdem Operis. Imò si quis ultroneam quoquè ingenuitatem meam velit adhuc clariùs dignoscere, lustret historias defunctorum, quibus, vel planè desperatis, vel constitutis in aliis quibusdam difficillimis circumstantiis inutiliter solùm (neque enim noxiè) propinatus est Cortex: eas verò reperiet a pag. 375. usque ad 381. Tractatus ejusdem. Ut proinde, si fortè modò me petat, me certè nequaquam attingat Cl. Auctoris Censura.

(d) (*Laudatur ab his &c.*) Laudari ab uno, & culpari ab alio, est Fatum pluribus aliis Remediis commune; at laudari ab uno, & ab eodem culpari, unius est Chinæ Chinæ in Scriptis Cl. Ramazzini. Inde puto & ego, fore posthac, ut non ampliùs ambigant Juvenes, *in quam partem se dedere debeant*. Viro enim Cl. in Collatione superiùs allatâ viam utramque præmonstrante, tam *dextrorsum* vergere impunè poterunt, quàm *sinistrorsum*. Nisi forsan illis in eo bivio, cui simile rarò visitur, constitutis contingat, quod sibimetipsi, Veterum, & Recentiorum volumina, ut naturam Febrium exploraret, evolventi, contigisse refert idem Cl. Auctor pag. 89. Orat. Jatrici Argumenti, recolens illud Terentiani Senis -- *Incertior multò sum, quàm dudum*.

§. 8.

(a) **I**N provectiori ergo ætate experientia edoctus, & observatis noxis ab illa prognatis, cautius in illius usu processu, & mediocri solum dosi præscripsi (b) *ad dracmam unam* vel duas in febribus intermittentibus, quando nimis protractæ ægros fatigarent; in hunc præcipuum finem, ut aliquot dierum induciis impetratis æger recrearetur, & vires resumeret, (c) *non sine spe*, imo cum certitudine febrem redituram, quæ una cum natura roborata, morbi causam expelleret, seu mutata aeris temperies, quæ in morbis diuturnis magnam vim habet, febris historiam absolveret; hæc mea est methodus, qua in ætate

tate saniori sum usus. (d) *Cæterum* in quacumque febre intermittente, quacumque ætate, sexu, regione, tempore, temperamento, corporis habitu, constitutione, Chinam Chinam indiscriminatim exhibere velle, magnum abusum esse judico.

(a) (*In provectiori &c.*) **P**Ræter id, quod diximus §. 3., & dicturi sumus §. 18. de *experientiâ* per Cl. Auctorem acquisitâ in *provectiori*, ut inquit, ætate pravorum effectuum Peruviani Corticis, hîc quoquæ loci animadvertat Lector, Virum Cl. ab anno 67. ad 79. ætatis suæ (quæ quidem ætas videtur nonnihil provecta) tot, tantaque scripsisse, ut vidimus, & posthac videbimus, in commendationem Chinæ Chinæ, ut minimè verisimile sit, noxas ullas ab eâ prognatas illi tunc observatas fuisse. Universam ergo experientiam noxarum hujusmodi eo ipso anno ætatis 80., quo Dissertationem hanc conscribebat, praxique Medicæ exercendæ vitio corporis impar evaserat, ipsum acquisivisse necesse est, & tunc tantùm Chinam Chinam cautiùs præscribere didicisse. Hæccine ergo longa illa multorum annorum experientia tam inconcussa, quam jactitat?

(b) (*Ad Drachmam unam &c.*) Præscribere tamen ad Drachmam unam, & semel tantùm, idem est ferè ac non præscribere. Ad Drachmas autem duas in istiusmodi diuturnis, benignisque Intermittentibus Febribus, verè sat est, ad impetrandas aliquot dierum inducias; quandoque etiam ad extinguendam Febrim: neque ego hisce casibus hanc dosim vulgarem transcendendo, ut aliàs sum effatus; nec rarò quoquæ unam tantùm Drachmam primâ vice præscribo. Sed sive unam præscribam, sive duas, sequentibus semper diebus nonnullas iterum Drachmas, vel saltem semidrachmas sumendas præcipio, ne, si fieri possit, Febris, ut verè nocens depulsa, iterum redeat. Idipsum commendavit aliàs Cl. Ramazzinus, tum in Dissertatione De Contagiosa Boum Epidemiâ, fassus ibi pag. 38., tacitèque approbans, ut ex contextu, quòd nostris temporibus *hujus remedii dosis largior esse cæpit, quàm olim*, tum in Orationibus Jatrici Argumenti pag. 102. his verbis. *Postquam hujus Remedii usus innotuit, & non semel tantùm, ut olim, sed plures ad dies exhiberi cæptus, donec Febrile miasma fuerit penitus exantlatum, talem Febres curandi Methodum factam fuisse fateri oportet, qualem in re Militari post inventum pulverem pyrium omnes norunt &c.*, ut fusiùs in Collatione Textuum illius lit. K. L. M. Immeritò ergo nunc ad unam, vel alteram Drachmam restringit rectum usum Corticis idem Cl. Auctor. Alia profectò mensura, & quidem pro Febrium varietate varia, statuenda est. Verùm de congruente singulis Febrium generibus Chinæ Chinæ dosi, plenior in sequentibus suo loco sermonem habebimus.

(c) (*Non sinè spe &c.*) Plura hoc loco sunt perpendenda. Inquit

quit Cl. Auctor, se Chinam Chinam præscripsisse *non sinè spe*, imò cum certitudine *Febrem reddituram*. Quoàd *spem reddituræ* Febris, alicui forsan lusui locus esset, si viveret Vir Cl., cui placuit olim in suis Constitut. Epidem. pag. 125. annotare, quinam fuerit Medicis *annus quæfluosior*: modò cum cineribus joculari non decet; atque ob id etiam, quòd Viro, non quæstus, sed famæ cupido, minimè congruunt hujusmodi ludicra. Relinquamus ergo hanc *spem* cuipiam Agyrtæ, aut Circulatori, corium humanum, cùm se præbet occasio, lubenter negotianti. Quò ad *certitudinem* verò reditus Febris, quam habuit idem Vir. Cl., cùm Chinam Chinam præscripsit *ad impetrandas tantum aliquot dierum inducias*, quispiam me doceret velim, quomodo conciliandus sit Textus iste cum alio Textu Paragraphi 27., qui sic habet. *Hic nimirum Medicorum est error, ut si Chinam Chinam in hunc solum finem præscribant, ut paucos a paroxysmis dies liberos obtineant, interdum eludantur, Febre amplius non redeunte, sed tacitè corpus depascente*. Anne igitur unus ille potuit cum Febre pacisci, ut ea rediret? atque ita quidem ex privilegio speciali, ut quod ei licuit, cæteris Medicis nequaquam liceat? Ad hæc si satis cautè se Chinâ Chinâ usum putat *in ætate saniori*, quia usus est *in hunc præcipuum finem*, ut aliquot dierum induciis impetratis *Æger recrearetur, & vires resumeret, quando Febres nimis protractæ Ægros fatigarent*; cur æquè cautè se, vel alios non putaret uti, si Febribus modicè tantum protractis, eâ uterentur ad tollenda *gravia Symptomata* quandoque supervenientia, quæ vires etiam constantes non rarò opprimunt, Ægrumque tandem in vitæ discrimen adducunt? Hunc sanè titulum pro præscribendâ rationabiliter Chinâ Chinâ; Viro Cl. cæteroqui suspectâ, potiorē crediderim, quàm ut Æger a *diuturnitate morbi* recreetur, & vires resumat.

(d) (Cæterum &c.) Huic Textui ante annos octo hunc alium Textum præmisit, & post biennium sponte recusit Cl. Ramazzinus: feratque Lector coactam hanc repetitionem *provocante materiâ*. *Solus Peruvianus Cortex, nobis a Divinâ beneficentiâ munus concessum, sinè alterius rei mixturâ* (sunt illius præcisa verba, quæ in septimâ Oratione Patavinâ leguntur pag. 212. secundæ Edit., & pag. 19. primæ Edit.) *in qualibet Regione, quocunque anni tempore, ætate, sexu, temperamento, Febres saltem recurrentes, atque intervallatas fugat, & exterminat*. Si adversari sibimetipsi in eâdem provectioni ætate non est hoc; quodnam erit? Certè quisquis non ultra conscius hæc legeret, facile Cl. Ramazzinum diceret anno 73. ætatis suæ, quo hæc primò conscripsit, & 75., quo ea recusit, *infatuatum eo vesano affectu* erga Corticem Peruvianum, quo nec fuisse inquit *juvenili ætate, cùm Chinam Chinam habuit in magno pretio*. Sed tantam rerum discrepantiam in tantâ verborum similitudine miretur nemo: sic namque *iisdem literis Comædia, & Tragædia componitur*.

Si qua tamen limitatio extra tot frustraneas a Viro Cl. recensitas constituenda videatur, ea una potiùs est, quam ego indicavi pluries in Opere meo, locis antea citatis, & alibi; scilicet, ne quocunque morbi

morbi tempore (non quocunque tempore anni) imò nec in quacunque Febre Intermittente, nisi videlicet ea *Corruptiva* sit, Cortex adhibeatur ; ne vel præmaturè sistatur Febris, quæ seriùs sisti debuisset, vel ea sistatur, quæ absolutè non erat sistenda. Quamobrem si arrideret Scholarum distinctio, dicendum esset, Chinam Chinam convenire in quacunque Febre Intermittente *specificè*, puta, tam in Quartanis, quàm in Tertianis &c., non in quacunque *individualiter*; sed in unâ convenire, non in aliâ: imò ubi etiam individualiter convenit, modò uno tempore illius convenire, modò alio. In hoc consistit, magnâ saltem ex parte, usus methodicus. Cætera ab eo recensita non prohibent Chinam Chinam usurpari; sed ad summum eorum nonnulla dici possunt quoquo modo prohibere quò ad quantum, ut, si Puero ea sit præscribenda, minori dosi præscribatur, ac præscribatur Adulto. Sed hæc quibusvis remediis communia cum sint, & vel Tyronibus nota, non est cur illis Practicos velit morari Gl. Auctor.

S. 9.

CErte in (*a*) *Pueris, & Adolescentibus*, ubi per æstatem febribus intermittantibus, quæ ut plurimum sunt tertianæ spuria, raro autem simplices, & exquisitæ, parum proficuum observavi Chinæ Chinæ usum, licet enim videantur aliquantum mitescere, hoc febrifugo exhibito, sæpissime redeunt, & ad multos menses (*b*) *contumaciores perstant*, nec nisi ad oppositas anni tropas receptui canunt. (*c*) *Vidi* anno elapso Patavii in familia quadam, quæ multas puellas habebat, eodem tempore febribus istiusmodi laborantes, cum ferina tussi in principio accessionis, quibus cum varia remedia fuissent administrata, sed incassum, & Mater instaret, ut illis præscriberetur China China, nec Medici qui curationi aderant annuere velent, Mater libere dixit se tale remedium, cujus vim fuerat experta esse exhibituram, quod cum fecisset febres semper contumaciores sunt factæ, ac per totum autumnum, ac hyemem, usque ad veris principium perdurarunt; ætas enim hujusmodi ob errata in victu, & minorem per ambitum corporis humorum distensionem, ab hoc remedio, quod nihil è corpore educit,

(*d*) *sed*

(d) *sed potius concentrat*, nil opis obtinet, fortior autem ætas, qualis est Juvenum & virorum facilius sustinet incommoda, quæ posset China China inferre.

(a) (*Pueris, & Adolescentibus &c.*) **N**E tempus inutiliter teram, ostendendo proficuum Pueris, & Adolescentibus Peruvianum Corticem, (quod nonnisi experimentis potest nervosè probari) neve casus propemodum innumeros in medium adducam, qui in dies hoc idem evincunt; sat erit eos tantum rursus indicare, quos in Therapeutice meâ protuli, ubi tam diuturniorum *Intermittentium*, quàm *Subcontinuarum*, atque etiam *Lentarum*, non contemnendæ curationes visuntur. Adeat ergo Lector Tractatum meum pag. 167. historiâ 4. pag. 183. hist. 15. & pag. 187. a principio ad finem. Item pag. 433. historiâ 3. pag. 473. hist. 1. & pag. 495. hist. 9. Item pag. 648. historiâ 1. pag. 650. hist. 2. pag. 651. hist. 3. pag. 655. hist. 4. & pag. 660. hist. 6. Non ergo *parum proficius Pueris, & Adolescentibus est Chinæ Chinæ usus*, si ea solùm cum decet, atque ut decet administretur. Potiùs non adeò frequens in illis est utendi occasio; quippe quibus faciliùs est, & febres sortiri *depurativas*, & eas sinè gravi incomodo diutiùs perferre.

(b) (*Contumaciores perstant &c.*) Si perstant Pueris ad multos menses contumaciores Febres, cum redeunt ab epotâ Chinâ Chinâ, quomodo *illarum reditus* denuo post Chinam Chinam exoptatur a Cl. Auctore §. 25. *loco remedii*? Vel si *remedii loco* stat *reditus febris*, cur modò ab eo damnatur hoc idem remedium, cujus actio si diutiùs perstet, diutiùs juvabit? Hac datâ occasione, quærerem insuper, si liceret, cum Peruvianus Cortex commendetur sæpius a Viro Cl. in Constitutionibus suis Epidemicis ad Vermes Puerorum necandos, ut pag. 14. & pag. 61. ipsarum Constitutionum: & cum in præsentî Dissertatione dicatur habere *malitiam occultam*, quâ noxas plurimas ratione sui possit progignere, quî fiet, ut solam *virtutem*, quâ Vermes necat, non *malitiam*, quâ homini nocet, exerat in Pueris industrius Cortex?

(c) (*Vidi &c.*) Quidquid Patavii contigerit in Puellis unius Familiæ, quibus forsan *semel tantum* (scitque Deus quâ dosi, quâ lege, quâ methodo, & quo morbi tempore) invitis Medicis Chinam Chinam exhibuit impatiens Mater, certum est, Mutinæ mihi longè aliter sæpius contigisse, ut retuli; nec ab uno tantum eventu malè parto assurgit Regula, sed a multiplici. Interim eo quoquè casu nil magis profecerant *alia Remedia incassum*, ut legitur, *antea administrata*. Neque proinde adhuc mente assequor, unde habuerit Vir Cl. durationem ulteriorem earum Febrium ascribendam potiùs fuisse Chinæ Chinæ, quàm aliis remediis æquè incassum administratis. Quoniam ergo, ut subdit, *Contumaciores Febres per totum Autumnum, & Hyemem* his Puellis *factæ fuerunt*, cur illas Veterum Febrifugis, ipso iudice, longè *præstantioribus*, licèt e corpore nihil *sensibile* pariter *propellentibus*, quibusque solis, ut inquit §. 18., *Medicina posset esse contenta*, non

fugavit Cl. Auctor, unde erubescerent, & Chinæ Chinæ Fautores, & audacula Genitrix?

(d) (*Sed potius concentrat &c.*) Si quis Tractatum meum legere non renuat, inveniet passim in historiis, ut in 19. & 20. Cap. 2. Libri 4., nempe a pag. 468. ad 471., ab epotâ Chinâ Chinâ urinam copiosiore redditam; atque hoc quidem perpetuum est. Inveniet insuper, idem Febrifugum propinatum erumpentibus Criticis Sudoribus, fluentibus Menstruis, Puerperiis, Alvo &c. nunquam hasce evacuationes interturbasse; sed eas solum sistere consuevisse, quæ Symptomaticæ sunt; inquantum scilicet tollendo Febrem, indè quoque producta tollit Symptomata; non autem quia vi peculiari polleat easdem evacuationes sistente. Cur itaque tam fidenter, & gratis asserat Cl. Auctor, *hoc Remedium nihil e corpore educere, sed potius concentrare*, non video. At de his fusiùs alibi, præsertim §. 41.

§. 10.

(a) **A** St hoc de muliebri sexu dici nequaquam potest, sexus enim muliebris ex sua natura minus aptus est ad beneficia reportanda ex usu Chinæ Chinæ, minus enim operosus est hujusmodi sexus, & larium domesticorum magis amans; (b) *Monialibus præsertim* intra sua Claustra conclusis, parum salubrem esse Chinæ Chinæ usum, satis compertum habeo; perraro etenim induci potui, ut illis Chinam Chinam exhiberem, nec nisi cum protestatione (c) *febrem redituram*, & pertinacius duraturam, Medici enim non solum ab ægris, sed etiam ab aliis Monialibus interdum compelluntur præscribere ea, quæ nollent remedia, quod observavi pariter in puellis, quæ apud ipsas educantur. A' Monialibus itaque antifebrile istud exoticum longe ablegare bonum judico, ab experientia sic edoctus, febres enim Sacrarum Virginum, ut ut parvæ, habent nescio quid abditum, cui malo abigendo potius alchalia volatilia, quàm fixa conveniunt. (d) *Ab Aedibus quoque Nobilium*, aliorumque potentium Virorum, in ocio urbano, seu rurestri cum victus lautitia degentium, Chinam Chinam proscribi utile judico, licet enim ubi interdum ex aliqua febre intermittente decum-

decumbant, quamvis cassiæ modico purgentur, aut vena secetur, non tam facile disponi possunt, ut satis tuto iis præscribi possit febrifugum, ut ab aliis malis postea non plectantur.

(a) (*Ast hoc de muliebri &c.*)

DE hoc Ligno vitæ potest fructum carpere etiam post lapsum scemineus æquè, ac virilis sexus, ut diutiùs vivat. Si exempla cupiat Lector, adeat (seclusis hinc Mulieribus *Gravidis*, & *operosis*, quæ plures forent) adeat inquam *Therapeuticen meam* pag. 159. historiâ 4. pag. 165. hist. 2. pag. 166. hist. 3. pag. 177. hist. 12. pag. 414. hist. 9. pag. 416. hist. 10. & 11. pag. 419. hist. 12. pag. 453. hist. 10. pag. 457. histor. 12. pag. 458. hist. 13. pag. 480. histor. 4. pag. 657. hist. 5., pag. 508. hist. 1., pag. 510. hist. 2., tandemque pag. 521. a fronte ad calcem, ubi prostant insignes Mulierum Chinâ Chinâ sanatarum historiæ. Sed forsan id contigit, quia hisce temporibus sequior sexus *Larium domesticorum* est minùs amans, ac olim.

(b) (*Monialibus præsertim &c.*)

Quod est ad Moniales, adeat idem Lector pag. 156. historiâ 2. pag. 171. hist. 7. pag. 172. hist. 8. pag. 463. hist. 16. pag. 490. hist. 6. &c. Id unum sciscitarer a Cl. Auctore, si adhuc esset in vivis, num scilicet ad Vestales quoquè illas quas Tertiarias vocant, quæque Moniales cum sint, extra Claustra tamen vagantur, extendatur illius Interdictum. Nec festivè tantùm sciscitarer, sed ad rem quoquè: nuper enim dum hæc scriptitarem, vênit domum meam Tertiaria quædam ex ordine S. Francisci, cui nomen *Soror Maria Francisca Rigbi*, ut me de invaletudine suâ consuleret. Narravit illa mihi (narro ego, quæ ipsa retulit) se *Quartanam* Febrem diutiùs gestasse; pro cuius curatione cum Chinam Chinam jugiter respuisset, tandem assumptis, nunc Medicorum, nunc Mulierum suasu, pluribus Veterum Febrifugis, id opis reportavit, ut *Febrium causâ extenuatâ*, & *sensim exantlatâ* (quemadmodum loqui consuevit Cl. Auctor) elapso integro *decennio* convaluerit: post vacationem autem duorum mensium a Febre, sibi ex improvise succrevisse in infimo ventre Tumorem quemdam dolorificum, ferme ac si Corticem Peruvianum, *obstructiones*, *cachexias*, & his similia, ex eodem Cl. Auctore, mala progignentem, potasset. His ita se habentibus, quærerem, an Peruviano Febrifugo post sex V. G. priores menses assumpto, citiùs illa, tutiùs, atque jucundiùs convaluisset necne. Jam verò rursus ad nos. Siquid cavendum est in Monialibus Chinâ Chinâ curandis, illud est, ut diligenter dispiciamus, num Febres earum verè pendeant a Fermento ordinario Febrium Intermittentium, an potiùs, ut persæpe accidit, a nervoso, vel lymphatico genere universo, atque occasione potissimùm vitæ cœlibis: quo casu longè minùs efficax est actio Corticis. Has verò diversi ordinis Febres, per sua signa ab invicem dignosci aptas, nonnisi peritis datum est internoscere, iisque tan-

tum, qui callent ex praxi, quantum ab æqualibus absint similia, &
 ————— *quid distent æra lupinis.*

(c) (*Febrem Redituram &c.*) Ne me quidem latet, Febrim ferè semper *redituram*, si *semel tantum ad Drachmam unam, vel duas* exhibeatur Peruvianus Cortex, ut Auctor consuevit: non ita, vel non tam faciliè, si *repetatur*. Si verò Febres post assumptam Chinam Chinam redeunt, redeunt contumaciores, & *pertinacius duraturæ*, cur (quod pluries cogor regerere) cur inquam ex eodem Auctore §. 25. *optandum, ut redeant remedii loco, ad absolvendam Febris historiam?* Aut cur Chinam Chinam præscribit & ipse *ad impetrandas inducias*, si has inducias excepturus est longior cruciatus?

(d) (*Ab Ædibus quoquè Nobilium &c.*) Quò ad Viros Nobiles in otio urbano, vel rurestri degentes Chinâ Chinâ curatos, neque tamen *ab aliis malis*, quæ asserente Cl. Auctore, Chinæ Chinæ potus portendit, *subinde vexatos*, videnda pag. 421. historiâ 14. pag. 432. hist. 2. pag. 444. hist. 9. pag. 499. hist. 13. &c. Forfan si Cl. Auctoris Edictum aliquantò citius emanasset, non ausus essem præscribere plebejum istud Febrifugum Nobilissimis quibusdam Viris, ut puta Neapolitano Principi Limatulæ Duci, Tertianâ duplici Subcontinuâ, & ad Acutam properante detento; felicissimè tamen illius ope sanato: sicut neque Nobili Hispano Viro, & (quod secundum Cl. Auctorem auget difficultatem felicitis curationis) præpingui, Domno Josepho Marchioni de Borda, & Aragon, modò pro Sacrà Cæs. Catt. Majestate in Regno Neapolis totius Hispanæ pedestris Militiæ Generali Castrorum Præfecto, qui cum Tertianâ pariter duplici, nedum Subcontinuâ, sed & Malignante, ac fermè Lethargicâ Mutinæ laboraret, ignobilis hujusce Febrifugi auxilio convaluit: neque tandem Parmam accitus ad invisendum Marchionem Joannem Franciscum Gonzagam, unum ex Generalibus Tribunis Militum Regis Christianissimi, Tertianâ simplici Intermittente, sed in Cardiacam Pernicioiam conversâ malè vexatum, calculum meum apposuissem tam faciliè, ut illi methodo validâ, quemadmodum in hisce repentinis Februm mutationibus mihi mos est, exhiberetur exoticum istud, *dolosum*, & vile Antipyreticum; quantumvis hoc idem a Doctissimis Viris Parmensibus curationi præsentibus (instante præsertim D. Clerico) etiam ut mihi, qui nondum illuc perveneram, pro eorum humanitate morem gererent, & præcipiti exitio occurrerent, in usum jam revocaretur, favente statim communibus nostrum omnium votis eventu, Doctissimisque pariter plaudentibus fortunato operi Mantuanis Professoribus, subinde cum Fratre decumbentis Equitis illuc pariter accedentibus. Has, inquam, Curationes recentes Nobilium Virorum tam feliciter absolutas fortasse non ausus essem hoc remedio pertentare, aut eo ab aliis jam pertentato, meis quoquè suffragiis additis tam faciliè persequi, si mihi Animadversio hæc severa Viri Cl., dictatorio planè supercilio prolata, & experimentis imaginariis feriantis biennii extremæ illius senectæ firmata, paulò prius innotuisset. Sed quoniam post res jam feliciter gestas tempestivè illa non exiit, fatius est, eam reperito pluries successu inanem deprehensam negligi, quàm Praxim hanc auspicatissimam.

(a) Sed

§. II.

(a) **S**ed quid Medico Aulico agendum, inquires, ubi aut Conjugem, aut Filium Principis, sive ipsum Regnantem Principem, febre aliqua intermittente inter æstivos ardores decumbere contingat? (b) Num suo Principi, apud quem multoties gloriosas curationes, in hoc atque illo à se factas solo Peruviano Cortice, celebrarit, tam fidenter, tam animose (c) potionem hujusmodi porriget, ut illi (d) præcordia non sudent ob metum de aliquo improspere eventu? Hac in re si Galenum consulere velimus, optimum habebimus documentum, ille etenim, ut refert in Libro de *Præ. Ad Post.*, ab Imperatore, passione quadam stomachi ab assumpto cibo laborante, per noctem accersitus, & ab ipso interrogatus quo remedii genere hujusmodi passioni mederetur, cui Romani Medici nil opis afferre potuissent, prompte respondit se cæteris hominibus sic affectis (e) vinum pipere inspersum exhibere solitum, Regibus autem, non nisi tutissima remedia à Medico debere præscribi; (f) num autem Peruvianus Cortex inter tutissima remedia recenserì debeat, judicet cui Cor sapit.

(a) (*Sed quid Medico Aulico &c.*) **H**ic piis Auctoris Manibus pio silentio litanda, quæ cæteroqui congrueret acrior responsio. Nec enim illi fuerat satis, generalia sibi creasse ab exordio, quæ pro arbitrio resolveret Quæsitæ, nisi peculiare hoc quoque de rebus, ut juvat sperare, ne futuris quidem, esset denuo commentus, ut joculari visus cum Nepote, *æs alienum* interim luderet vel nondum cusum. Emphaticus tamen, quo usus est citra opportunitatem loquendi modus, etsi indefinitus, casusque respiciens tantum possibiles (nullus enim hujusmodi hætenus Deo dante, saltem hîc loci, contigit) videtur fidenter admodum, atque animosè ab Auctore vivente usurpatus; sed liceat modò defuncto, quod forsitan minùs licuisset viventi. Liceat, inquam, illi hæc impunè proferre, atque ab Aulis Principum pro libito suo Chinam Chinam proscribere. Monendus tantum Typographus, qui omnia simul Viri Cl. Opera quamprimum recusurus dicitur, ut Tractatui illius, *De Princi-*

pum Valetudine tuendâ, Præceptum hoc tanti ponderis, ab Auctore ipso tunc omissum, peculiariter adjiciendum curet.

(b) (*Num suo Principi &c.*) Nisi duos de eâdem Fideiâ velit Cl. Auctor denigrare, non dealbare parietes, sed unum tantum; adeoque si Medicus ille Aulicus forem ego (ut in me unum conversa facile hariolatur Urbs tota) quem pictorio veluti calamo studet ille circumscribere, coloribus a Nuncupatoriâ Epistolâ meâ forsan petitis, sed alteratis, & ad omnimodam usque mutationem confusis, sinè ullâ prorsus hæsitantiâ hæc responderem. An apud meum Principem *gloriosas curationes jactarim*, an laudibus minimè promeritis, prout modestum hominem decet, potius obstitierim, tribuerimque divino tantum favori, quos ad Principem fama detulerat faustos eventus: item an ea, quæ modò minùs humaniter in me vibrantur spicula a longè præviderim,

—————*ipsos divinarimque lacertos,*

Queis jaculanda forent;

tandemque an his de causis Therapeuticen meam, nedum suadente, sed & ferè dixerim imperante eodem Principe invitus ediderim, ipse scit, qui mihi & Dominus clemens est, & æquus Judex. Id insuper addam (quæ mihi est gloria non levis) eundem Serenissimum Dominum meum, post editam, sibi que jam notam Dissertationem Cl. Auctoris, cum fortè haud leviter ægrotaret Vir quidam Principis existimatione dignus, de cujus idcirco salute sollicitus erat ipsemet Princeps, mihi animum, & stimulos addidisse, ut Ægro inspecto, repertoque in talibus circumstantiis, ut ei China China judicio meo posset opitulari, posthabitis, si quæ obstitissent, adversis cavillationibus, id remedium promptè, statimque præscriberem. Cui cum facilè id me præstiturum respondissem, quoties ea se mihi præbuisset opportunitas ex parte morbi, quæ se præbebat ex parte Subjecti, videlicet privatæ personæ, non æquè facilè idem acturus, si fuisset in discrimine salus cujuspiam Principis, quibus Chinam Chinam minimè offerendam docet Cl. Ramazzinus, reposuit ille subridens, *cavendum esse pro viribus ab occasione hujusmodi: cæterum necesse esse, ut Principes, qui commune cum reliquis hominibus habent morborum fatum, communia quoque cum illis habeant remedia.* Ægrum itaque invisi (ne desit complementum historiæ) Tertianâ duplici Subintrante nonnihil violentâ detentum; quam tamen, cum ad depurationem ea vergere videretur, nondum Peruviano Cortice attingendam censui: quamobrem methodo tantum vulgari adhibitâ, ad vigesimam primam usque diem protracta est illius judicatio, quamvis negotia Principis Ægrotanti commissa, citiorem exigerent curationem. Cum verò post dies nonnullos incidisset suspicio non levis de Febre eâdem recidivâ, Corticem ipsum ad præcautionem præscripti, facilè annuente curante Medico, in hocce remedium suoapte genio pro re natâ propenso. Paucis horis elapsis ab assumpto Febrifugo, quæ jam prope imminebat, successit Febris; eo tamen repetito, hæc statim penitus suppressa est sinè reditu, simulque expleta sunt Principis æquè, ac Ægrotantis vota.

(c) (*Potionem hujusmodi &c.*) Si ex Croco Metallorum, ex pul-
vere

vere Alcorethi, ex Elaterio, Esulâ, aut Gummi gutta conflata esset *hujusmodi Potio*, possetne acerbius illa, ne ullo quidem colore quæsitò, proscribi a Cl. Auctore, apertam hoc loco *temeritatis* notam Aulico Medico apud Principem præter rationem prorsus inurente? Nolo hîc historiolum recensere accusationis, ab Antiphilo Pictore ad Ptolemæum Regem delatæ adversus Apellem, Luciano referente: quæ insimulatio, probabilitatis limites non parum excedens, evanuit statim ac Rex animadvertit, *Antiphilum Apelleæ artis æmulum esse*; nolo inquam recensere historiam hujusmodi; neque enim Apelles sum ego in Arte medicâ, aut Viri defuncti æmulatione dignus; neque fuit ille capax unquam livoris Antiphili. Sed ad quid quælo pavorem, quem verè nullum habebat Vir Cl., imò quem in reliquâ Dissertatione, *dummodo adhibeatur modus*, se non habere profitetur, tam strenuè simulavit? Certè neque timuit ille, neque sensit quæ protulit. *Nolim quis inferat, velle me ex Albo medicaminum Chinam Chinam expungere* (inquit ille §. 48.) *absit hoc; habeat suos usus remedium istud: beneficium, quod asferre potest, ab illo excipiamus &c.* Si ergo suos unus habere debet remedium istud, si beneficium aliquod potest asferre, quo jure postea potio illius ex arte parata, sudores e præscribentis Medici præcordiis, ob metum sinistri eventus debebit ciere?

(d) (*Præcordia non sudent &c.*) Sudent inexpertis præcordia; non millies, & innoxie semper expertis. Mihi fortassis ea sudarent, si quando in Febre aliquâ, non tantum Intermittente benignâ, de quâ sum parum sollicitus, quippe sæpius depurativâ; sed nonnihil graviore, præsertim in circumstantiis, in quibus Peruvianum Corticem, vel opportunum, vel absolute necessarium censeo (quas omnes tamen avertat Deus, ut hucusque semper avertere dignatus est) præsentaneum hoc auxilium vano quopiam timore perculsus, vel obstrepentibus hujusmodi terriculamentis inaniter divexatus, me omisisse dignoscerem, a munere meo, officioque Principibus meis debito turpiter declinans. Piget me sanè Cl. Auctorem tam emphaticè hîc locutum, redarguere statim inconstantia, ac erroris; sed materiæ pondus vulneratæ veritatis dissimulationem non patitur. In toto Dissertationis decursu, & signatè paulò supra §. 8., ubi revelat ille Methodum sanioris, ut inquit, ætatis suæ, universaliter loquendo, Peruviani Corticis usum admittit, & approbat *in hunc præcipuum finem, ut aliquot dierum induciis impetratis Æger recreetur, & vires resumat*, additque insuper infra §. 48. *ad eundem finem obtinendum, scilicet ad obtinendum aliquod intervallum pro virium reparatione, admittendum, & laudandum esse Chinæ Chinæ usum in Febribus præsertim intervallatis*; quin imò §. 22. Ægris ipsis quandoque citra rationem poscentibus, *in mediocri dosi, ut lædere non posset* (potest ergo ita exhiberi, ut lædere non possit) *eam exhibuit cum eventu*, ut fatetur, *satis felici*: id, quod verè cohæret præceptis illius, ut scilicet usus Chinæ Chinæ in Febribus *sit qualis est Opii ad sedandos dolores*; utriusque enim remedii, ipso docente eodem §. 48., eadem esse debet, & regula oblationis, & cautio. At hoc solamen saltem, quod fatigatis Ægris cujuscumque conditionis, imò & fœminis ipsis

utero

utero gerentibus (quibus §. 13. non solum tutò, sed & cum beneficio afferit Chinam Chinam exhiberi) concedit, & donat Cl. Auctor, quomodo *tam fidenter, tam animosè* Magnatibus denegat, quibus tamen dolore aliquo afflictis Opium præscriberet, quamvis, nisi cautè exhibeatur, haud neget eodem §. 48. periculum fortè subesse, *ne ex somno excitare possimus, quem obdormire volumus?* Si verò in Principibus quoquè Chinam Chinam admittat, eo saltem nomine, ut tantummodo reparentur vires; cur in eundem finem, *sinè præcordiorum sudore, ac aestu, potio hujusmodi in dosi mediocri, quæ, ut ait ille, nequit lædere*, a Medico Aulico porrigi datà occasione non poterit, imò & in dosi nonnunquam liberaliore, ut reparentur simul vires, & periclitans salus?

(e) (*Vinum Piperis inspersum &c.*) Sano consilio abstinuit eo casu Galenus a pipere, ut qui forsan prævidit, fore tandem longo seculorum tractu, ut exotica *Vegetabilia, quibus aliud analogum non sit in Europâ*, cujusmodi est Piper, *irrationabilia* a Cl. Ramazzino declarantur, & *amethodica*, ut nuper vidimus §. 6. Documentum autem, quod indè trahere debet Posteritas, illud est, ut Viris Principibus ea ipsa præscribantur remedia, quæ sæpius per experientiam profuere plebejis. Imperator enim ille, Commodus nempe, intellecto Galeni effato, statim *Vinum Sabinum pipere inspersum, in vulgari gente remedium expertum, sibi laboranti adhiberi jussit; & sanitati feliciter fuit restitutus*, ipso nedum fatente, sed & iisdem verbis modò relatis apertè docente Cl. Ramazzino, Orat. Jatr. argum. pag. 46.

Non omnia quidem remedia (ut nugas etiam has persequar) præsertim sumptuosiora, quæ sibi potest comparare dives, æquè potest pauper, ut facilè quæcunque potest pauper, potest & dives; quæ tamen uni verè conveniunt, quæcunque ea sint, conveniunt & alteri. Profectò non hominum, sed morborum varia conditio varietatem remedium expostulat. Menti nunc subit, Virum Cl. mecum olim risum effusum risisse, cum fortè utrique nostrum nuntiatum fuisset, Medicum quemdam afflictæ Mulieri, filii sui unigeniti acerbum funus lamentanti, illudque ipsi Medico, qui morbo adstiterat, acriter exprobranti, hæc fidenter reposuisse -- *Unicum tibi hunc esse filium quare incauta non monuisti? fortassis enim aliter, aliisve remediis curationem illius peregissem* -- Sed quid, si Viri hujusmodi testimonio uteretur alicubi in suâ Dissertatione Cl. Auctor, cum cæteroqui ex veteri Patremiâ, *Nunquam Paterfamilias qui semel Scurra*.

(f) (*Num autem &c.*) Num inter tutissima recenseri debeat Remedium planè divinum; Antipyreticorum omnium, quot quot excogitavit Antiquitas, aut Chymicorum solertia conflavit, facilè Princeps; *Febri-fugum non arte repertum, sed a divinâ beneficentiâ concessum, ad malè natam Februm sobolem exterminandam; Sacrum Amarum ex Arbore vitæ decerptum, cui simile aliud optandum a commiseratione Numinum in res humanas, quod eadem securitate Febres verè Continuas sanare sit potis, ac istud sanat Periodicas*; num, inquam, Medicamentum hujusmodi inter tutissima remedia recenseri debeat, *Judicet, cui cor*

cui cor sapit. Nisi fortasse tutissimorum nomine audiant hîc ea solum Remedia inertia, & varia, quæ nihil agunt, quæque tantum ostentant magnificentiam, & pretium. Scilicet apud Magnates vel in ipsis remediis latet adulatio. Perniciosa profectò hujusmodi dogmata (ut universim loquar) affectatæ circumspeditionis, & vigilantiae plena, quibus ad captandam Principum benevolentiam, usi sunt omni tempore Aulici præsertim Medici, non sinè aliquo ipsorum quoque Principum detrimento, replevere jam superstitionibus Aulas quamplurimas: non hanc quidem, ubi decora tantum Majestatis custodia; sed excessus nullus. Nimirum communiter malè audit, quòd Medicus Aulicus accedat ad morbos immediato, diuturno, intimoque contactu vix communicabiles, ut ad Febrem mali moris, Scabiem, Variolas, Morbillos, & hujusmodi; ne scilicet illæsus ipse, morbi tamen effluvia; quasi semina in vestimentis suscepta, in Aulam deportet, perinde ac si in Xenodochiis verà peste Infectorum noctu æquè, ac interdiu assiduè ministraret, conviveret, ac obdormiret; cum tamen omni securitate domi suæ, & familiares, & Liberos illotis perlæpe manibus contrectet, osculetur, & amplexetur innoxie: a quibus procul dubio caveret amplexibus, nisi vacuitatem aërearum hujusmodi circumspeditionum didicisset expertus. Cautela, quæ ad summum devenit subtilitatis, plerumque noxia. Hinc fit, ut in Constitutionibus Epidemicis nonnunquam grassantibus Medicus Aulicus, ut ut doctus, sed tantum ex Libris, si præscrupulositatibus hîsce a morbis communibus invisendis abstineat, cum neque signa diagnostica, neque prognostica, neque remedia ipsa callere queat illius Constitutionis peculiaris, ad curandos eisdem morbos, si fortè in Aulam irreperint, planè ineptus evadat, in incertum denuo Tyronem conversus. Populares morbi Magnum fecere Hippocratem, quæsitum Regibus, & Posteris admirabilem. Sed caveam, ne longè nimis ab instituto excurrat calamus.

Ut ergo ad *Remedia tutissima* redeam, si ab illorum censu excludat Peruvianum Corticem Cl. Auctor, necesse erit remediis tantum usualibus, & quotidie obviis, iis præsertim, quæ in Veterum monumentis extant, quippe tutissimis (etenim *qui veteri utuntur Vino Sapientes putat* ex Plauto) periodicas aggredi Magnatum Febres. Statim itaque in usum vocanda erunt celeberrima duo (neque enim alia peculiariter usurpari legimus a Viro Cl. in suis Operibus) & usitatissima Artis præsidia; Venæ sectio videlicet, ac Purgatio, vel horum saltem alterutrum; ut his præmissis, Specificorum dein Febrifugorum usus ab Antiquis celebratorum, quorum plurima, si arte facta sint, ex Mercurio, aut Antimonio erunt parata, minimè verò Peruviani Corticis, quippe parum tuti, sensim succedat. At bone Deus. *Tutissima erunt Remedia* in Febribus, præsertim intervallatis, Venæ sectio, & Purgatio, quæ & vires dejiciunt, & spiritus dissipant, & humores perturbant, & Venas exhauriunt, nisi summâ cautione usurpentur, ut cæteroqui a prudentibus Medicis solent usurpari; & tutus non erit debitâ circumspeditione adhibitus, qui vires non dejicit, qui spiritus non fatigat, qui humores non perturbat, qui Venas non exhaurit, sed ex

Cl. quoquè Auctore Ægrum recreat , & instaurat Peruvianus Cortex ?
Id sanè non aliud est , nisi nobismetipsis effingere Spectra , & pueriles
metus incutere ,

Nam veluti pueri trepidant , atque omnia cæcis

In tenebris metuunt : sic nos in luce timemus

Interdum , nihilo quæ sunt metuenda magis , quàm

Quæ pueri in tenebris pavitant , fugiuntque futura .

Hæc tamen Lucretii neutiquam congruunt Viro Cl. , qui aliàs minimè trepidanter Purgationi , & Venæ sectioni , utpotè remediis minùs tutis , tutissimum Peruviani Corticis anteposuit præsidium . Hic ergo ipse sibi responsionem adornet , ne præfervidè forsitan quis me locutum arbitretur . Adeamus itaque rursus pag. 101. Orat. Jatrici Argumenti , & videamus , an tutius putet ille , ad Febres , quæ de Intermittentium familiâ sunt , curandas , uti Methodo antehac receptâ , an potiùs Peruviano Cortice . Inquit igitur de Chinâ Chinâ verba faciens ; & inquit tam appositè , ut minimè tædio futurum sit , alibi transcriptum huc denuo summatim transferre : tanti enim Viri effata etiam repetita placebunt . *E singulari hujus remedii præstantiâ id beneficii fuimus assecuti , ut non ampliùs unicâ methodo Febres omnes curentur , continuato scilicet refrigerantium , & humectantium usu , tot repetitis Venæ sectionibus , tot iteratis Purgationibus , quæ humani corporis machinam potiùs infirment , quàm confirment ; sed illæ tantùm Febres , quæ de Intermittentium familiâ sunt , Pulveris exigui haustu in vino soluti , aut compressæ quiescant , aut etiam penitùs aboleantur .* Num ergo inter tutissima Remedia Principibus exhibenda , in concursu cæterorum , ac præsertim Venæ Sectionis , & Purgationis , recenseri debeat , ex ipsius Cl. Auctoris decreto , *Peruvianus Cortex* , iterum Judicet , cui cor sapit .

S. 12.

EX nuperis Ephemeridibus hebdomadariis , pro curiosorum pabulo ad nos deferri solitis , accepimus in Regia Persona pertentatum fuisse Corticis Peruviani usum , sed non multa Medicorum laude & fortuna , in casu intermittentis febris , ut reor , cum illius non expressa fuerit mentio , fugata enim , seu sopita febris prohiberi non potuit , quin rediret , continuato licet ad prophylaxim Febrifugi usu , at id forsan pro Regiæ Majestatis beneficio accipiendum , ut febris historiam suam perfectè absol-
veret .

(Ex nuperis Ephemeridibus &c.)

Ephemerides hebdomadarias non vacat legere : propterea quò tendant hæc spicula , obscurum mihi . Qui præscripsit Corticem , repellat ictum , si operæ pretium putet ; si secùs , negligat . Rumores istiusmodi , re benè perspectâ plerumque vacui , Invidiosissimum certè Galliarum Regem LUDOVICUM XIV. nuperrimè extinctum , & Chinâ Chinâ , ut fertur , valde familiariter utentem dum viveret , neutiquam terruere .

S. 13.

Tutiores ergo usum habet hoc antifebrile in populari gente , (a) quæ ex manuariis operibus vivit , quales sunt Artifices continuis laboribus exerciti , quibus cum non vacet diu in lectulis ægrotare , suam si velint alere familiam , propinare licet potionem hanc febrifugam , (b) etiam ab initio , paucis præmissis , ad consuetos enim labores redeundo , congestos humores , & si quid noxæ Febrifugum affixerit , sudore discutunt . Hoc itidem dicendum de Mulieribus operosis , quales sunt , quæ servili opere sunt addictæ , uti lotrices , textrices , & aliæ hujuscemodi . (c) Gravidis quoque mulieribus , sicubi à febre tertiana , seu quartana corripiantur , facta aliqua levi purgatione , scilicet etiam V. S. lubenter remedium hoc præscribi poterit , & cum beneficio , præsertim in postremis graviditatis Mensibus , prævalet enim metus , ne concussio illa , quæ in febribus periodicis , & præsertim quartanis contingit , fœtum cum Matris periculo possit excutere , quod si ex China China præjudicium aliquod subsequi posset , remedio futuram uterinam proluviem , quæ partum consequitur .

(a) (Quæ ex manuariis operibus &c.)

Postquam per varios Virorum , & Mulierum ordines vagatus est Cl. Auctor , nondum quemquam Cortici Peruviano impunè potando aptum dignoscens , reperit tandem ex infimâ Plebe nonnullos , in quibus ille tutiorem usum possit habere , in iis nempe , qui ex manuariis operibus victitant . Mirum profectò , quòd Viri Cl. animadversiones subterfugerit passim obvia Gens Recutita ; cum nescio quid

quid peculiare insit huic populo, five victum consideremus, five genus ipsum Vitæ, in his activæ, in illis sedentariæ, & plerumque citra manuarii operis exercitium. Id si fortè addidisset, ut facile poterat, non aliud defuisset in posterum ad complendos Annales, nisi tandem investigare, quid præster hoc Antifebrile in Ægyptiis apud nos identidem irrequieto pede circumvagantibus.

(b) (*Etiam ab initio &c.*) Scrupulosissimus alibi Cl. Auctor, hoc tamen loco Peruviano Cortici præter institutum favens, Quæstionem non parvi ponderis duobus tantum verbis liberaliter absolvit: quam quæstionem, agens ego de vulgaribus Intermittentibus, toto fermè Capite 8. Libri primi; agens verò de Subcontinuis in celerem malignitatem pronis, toto pariter Capite 5. Libri quarti nonnisi hæsitanter sum ausus resolvere; nempe, *An in hujusmodi Februm principio Chinam Chinam liceat exhibere*. Certè hic videtur oblitus noster Auctor eorum, quæ paulò ante sancivit § 8. ad leges *sanioris* Methodi suæ: cumque illi antea Culices hæssissent in Cribro, modò Camelum illinc *transmitti* facile patitur. Cum enim ibidem docuerit, præscribendam esse Chinam Chinam *ad drachmam unam, vel duas* in Febris, tunc solum *quando nimis protractæ Ægros fatigant, ut aliquot dierum induciis impetratis, Æger recreetur, non sinè spe, imò cum certitudine Febrem redituram*: modò recedens a lege, quam posuit, vult, Plebem, *quæ ex manuariis operibus vivit, cujusmodi sunt Artifices, quibus non vacat diu in lectulis ægrotare, curari posse propinatâ porione febrifugâ Peruviani Corticis, etiam ab initio morbi, suam ut possint alere familiam*. Sed nisi statim post Febrem unâ, vel alterâ Corticis drachmâ suppressam, incerto pede, nutante gressu, e lectulis ipsis ad Officinas migrent (quod difficile, ac periculotum simul) post aliquot autem dies pro voto Viri Cl. revertatur Febris ad consuetos profectò labores non admodum festinanter redibunt. Si verò tempestivè redeant, totque, & tanta, quæ ex hujusce Febrifugi usu secundum Virum Cl. imminent pericula, ut *Cachexiæ, Obstructiones, & Hydropes*, avertuntur tam facile mediantibus laboribus, & exercitiis, ad quæ ipsi met denuo redeunt Artifices; cur non poterit idem effectus obtineri, si post propinatum idem Febrifugum, & Febrem depulsam, Civibus quoquè, Nobilibus, & Principibus, lusum Pilæ, Choreas, Equitationem, Venationem &c. auctoritate Artis imperemus? Hos puto labores, tanto etiam pensatos sænore, multò libentiùs subibunt Potentes, quàm diros, & diuturnos labores Februm. Nec cæteroqui putarim expedire absolutè, quod avidis forsan, si qui sint, expediret Pharmacopolis, Febres nempe Divitum diutiùs durare, quàm Pauperum, ut illis scilicet *annus fiat quæstuosior*.

(c) (*Gravidis &c.*) Facilem quoquè se præbet Cl. Auctor in exhibendo Gravidis Mulieribus Peruviano Corrice; & quidem rectè: atque adhuc rectiùs, si absque præviâ saltem *Purgatione* exhiberet. Sed hic insurgit difficultas non contemnenda (fatum nempe quoddam illius est, ut in contradictionem aliquam vel dicti, vel facti adeò frequenter impingat) si enim ex unâ parte China China *postremis præ-*

sertim

fertim, ut ait, gestationis mensibus offeratur; habeat autem ex aliâ parte eadem *Quinquina* facultatem figentem, ut ille §. 41. pro re certâ supponit, motumque sanguinis compescat, fluida quæque in nostris corporibus cogat, omnesque evacuationes per se, & non per accidens supprimat; quâ ratione præjudicio, quod ex *China* *China* subsequi posset, futura erit remedio, ut hîc asseritur, uterina proluvies, quæ partum amplius (hoc Febrifugo humores quosque figente, & qualvis evacuationes supprimente) non poterit consequi? Heu quot in Scopulos agimur, cum a cognitâ nobis veritate sponte deflectimus!

§. 14.

CUm autem varia, ac diversa sint hominum temperamenta, & corporis habitus, varios, ac diversos effectus operatur *China* *China*. (a) In temperamentis melancholicis graviores noxas parere observavi, humor enim atrabilaris ferox est, nec tam facile auscultat remedio febrifugo, licet ab initio primarius usus *Chinæ* *Chinæ* in febribus quartanis sibi famam, & nomen compararit, aut si paululum febrem infringat, non multo post ferocior caput exerat. (b) In temperamento quoque pituitoso suspectus est *Chinæ* *Chinæ* usus, & quamvis paroxysmi febriles in febribus spuris post longum usum *Chinæ* *Chinæ* conquiescant, prolixior est restitutio ad priorem sanitatis statum, crassi enim & pituitosi humores post hujusce remedii usum fixiores fiunt, & minus difflabiles; homines corpulentos, & præpingues sensim cachecticos factos ex usu hujus febrigugi, ac tandem (c) longum post tempus obîsse observavi, (d) licet aliæ culparentur causæ.

(a) (In Temperamentis Melancholicis &c.) **Q**uod de Temperamentorum diversi-

tate, de humoris Atrabilaris ferociâ &c. profert hîc, & in subsequentibus prolaturus est Cl. Auctor, eâ præsertim, quâ uctur malè sonante Recentiorum auribus se explicandi formâ, ejus dignitatis ratione habitâ dictum nollem: sic enim loqui Medici eo vix tempore consueverunt, quo illis barba femoralibus erat prolixior,

Atque supercilio brevior coma ———

Jamque mihi videor quempiam audire a Viro Cl., vel a superstite saltem illius *Minervâ* sciscitantem, cujusnam speciei, aut differentiæ sit
ferox

ferox iste humor atrabilaris ; an scilicet ex Melancholiâ naturali putrefactâ , & exustâ , an ex flavâ bile torrefactâ , & in cinerem redactâ progenitus , postquam ei placuit per obsoleta hæc nomina , quasi per imaginaria quædam Veterum formidamina terrere ignarum vulgus . Ego verò , qui hujusmodi nomenclaturam retinui in Febribus , Arrabilaribus a me vocitatis , significatione licet longè diversâ , ut scilicet solis Antiquiorum terminis me accommodarem , non rei , quemadmodum & terminis , & ipsi rei fictitiæ hic se accommodat Cl. Auctor ; ego inquam , datis illi omnibus hisce commentis , sciscitarer potius quid intelligat , aut ab aliis velit intelligi per hæc , quæ in præsentî Paragrapho , & alibi scripsit idem Vir Cl. ; fateor enim , me ab hoc Labyrintho nescire tam faciliè memet ipsum extricare . Nimirum inquit ille , In Temperamento Melancholico Chinam Chinam graviores , ac alibi noxas parere , quia humor atrabilaris (qui pro causâ Quartanæ Febris manifestè hic astruitur) ferox est , nec tam faciliè auscultat remedio Febrifugo , licet ab initio primarius usus illius in Febribus Quartanis sibi famam , & nomen compararit : aut si paululum Febrem infringat , illa tamen non multò post ferocior caput exerit .

Tot contradictiones propemodum quot syllabas continet hæc Viri Cl. brevis assertio . Primò namque per hanc apertè supponit ille cum Antiquis , ut annotavimus , fictitium humorem illum atrabilem , in corpore universo prædominantem , esse Causam Quartanæ Febris . At §. 46. statuit omnino , secundum Ettmullerum , aliosque Recentiores , *Febres Intermittentes pendere a salso-acido Fermento existente intra ventriculum* . An fortè intelligendus etiamnum per hoc Fermentum humor atrabilaris , aut melancholicus per vas breve a Liene ad Stomachum inverso motu transmissus ? Nugæ , Somnia . Secundò clarè asserit , Chinam Chinam noxas parere in casibus supra recensitis , eò quòd *idem humor atrabilaris non faciliè auscultat remedio Febrifugo* , quasi Quartanæ Febres consuecant eludere actionem Peruviani Corticis ; cum tamen sit vel ipsis Mulierculis notum , eas de more hujusmodi remedio perpetuò vinci , ac edomari . Septem ego Ægrotos (nec enim invisi plures) Quartanâ laborantes prægressâ Hyeme felicissimè curavi solius Corticis ope , quorum duos tantùm Febris rursus corripuit , priusquam planè dimitteret , reliquis statim perfectè convalescentibus , robustis , ac pinguioribus redditis : quos inter peculiari mentione dignus est Co: Johannes Andreas Valentinus , e citrino , ferè dixerim , Sceleton in carnosum paulo post , & benè coloratum Athletam conversus . Sed demus , humorem atrabilem , qui pro causâ Quartanæ hic habetur a Viro Cl. , verè *non auscultare remedio Febrifugo* . An proinde dicetur ab eo noxam parere ipsum Febrifugum ? Nonne §. 40. , & 41. illi tribuit Auctor Cl. *facultatem figentem* , quâ tot noxas ibidem inferre dicitur ? Quam ergo noxam inferet , ubi humor , qui figi deberet , *eidem non auscultat* ? Insuper si hoc ipsum *non auscultare Febrifugo* in bonis habetur §. 16. , ubi tutior asseritur illius usus in Temperamentis , & Febribus biliosis , præcisè per hoc , quòd *biliosus humor non se patiat adstringi vinculis ejusdem Febrifugi* , cur in malis habebitur ,

bebitur, quòd iisdem vinculis non se patiat adstringi humor atrabilaris in Febribus atrabilaribus? Tertiò tandem concludit Vir Cl., noxam graviolem inferri a Peruviano Cortice, quia *etiamsi paululum Febrem infringat, ea nihilominus non multò post ferocior caput exerat*. At si de *simplici* Febris reditu sit sermo, nonne ex §. 25. *Optandum esset, ut Febris in apertam flammam erumperet, postquam Ager ad aliquot dies silente Febre roboris aliquantum reportasset, nam reditus Febris remediì loco esset?* Et ex §. 27. nonne *Medici a Chinâ Chinâ eluduntur interdum, Febre amplius non redeunte?* Si verò sit sermo de reditu ipsius Febris, sed *fortiore*, velut de graviore noxâ, nonne ex ipsâ nuncupatoriâ Epistolâ lit. d. *Sæpe Medico in votis est Febrem repetere, sed fortiolem, ut tollantur noxæ, quas China China ob Febris extinctionem invexit?* Et §. 27. nuper citato, nonne *Rem felicius cessisse annotavit, quibus Febris denuo caput erexit etiam ferocior, quàm quibus Febris visa est prorsus extincta, & oblitterata, seu parva subsecuta?* Infelix China China, quid tibi agendum, *sananti, & non sananti æquè rejectæ, redeuntibus, & non redeuntibus Febribus, iisque vel levibus, vel ferocibus æquè proscrip-tæ?*

(b) (*In Temperamento quoquè pituitoso &c.*) Hic quoquè loquendo de Temperamento pituitoso, Febres statim spurias in medium adducit Cl. Auctor, quasi ab humore *pituitoso, & crasso* pendentes, non verò a *Salso-acido Fermento Ventriculi*, ut ex professo autumat §. 46. Confundit pariter & hic, unumque, & eundem efficit humorem in Temperamento prædominantem, & humorem Febres Intermittentes producentem; cuilibet nimirum Temperamento suam Febrim correspondentem assignans, & cuilibet Febri, Antiquorum more, suum humorem: quæ omnia jam sunt e Scholis exhibita, & explosa. Hisce tenebris involutus, mirum profectò, quàm clarè introspiciat Causas physicas effectuum, quos nondum in rerum naturâ observavit quisquam, dum rationes omnium malorum assignat, quorum nulla in pituitosis Temperamentis, aut Febribus comperiunt alii a Chinâ Chinâ illatorum. Sed audiamus, quæ probationis loco in sequentibus est allaturus.

(c) (*Longum post tempus &c.*) Longum post tempus obeunt & Pingues, & Macilenti, obeuntque Chinâ Chinâ curati, & non curati, Medicis utentes, & non utentes. Fieri verò *Cachecticos ex usu huiusce Febrifugi* eosdem *Præpingues, & Corpulentos homines*; mihi certè non observatum; potiùs enim oppositum compertum habui. Et ne videar gratis refellere quòd planè gratis asseritur, verè præpingues, ac corpulentos homines, tam Mares, quàm Fœminas, plurimis retro annis Chinâ Chinâ curatos, curatasve, *cum facili restitutione ad priorem sanitatis statum*, & in hanc usque diem inculpatâ valetudine utentes, vide Lector in Therapeutice meâ pag. 166. historiâ 3. pag. 171. hist. 7. pag. 421. hist. 14. pag. 433. hist. 3. pag. 437. hist. 5. pag. 442. hist. 7. pag. 444. hist. 9. pag. 473. hist. 1. &c. Adde recens curatos ope Corticis, & quidem de Vitâ quàm maximè periclitantes (numerum enim pinguium Hominum ex vulgaribus Intermittentibus felicissimè sanatorum quis meminit?) corpulentos, ac ætate profectos, D. D. Johannem Bapti-

flam de Carandinis, Paulum Æmilium de Bignardis, & Antonium de Zanellis, Viros huic Urbi plurimis nominibus notos: quos omnes, ut & alios supra recensitos, ferme quotidie sanos, ac robustos intueor; potestque intueri, & audire quilibet alius, cui grave non sit solutionem oppositionis Viri Cl. ex vivâ illorum voce repetere. Quod si eos, qui maturo jam Fato decesserunt e vivis, memorare liceret, pinguiſſimus certè omnium hujus Urbis erat Æger pag. 184. historiâ 16. descriptus, annoque 1678. (curante illum Præceptore meo colendæ memoriæ) per accidens Chinâ Chinâ oblatâ servatus: pinguisque pariter, ac corpulenta erat Ægra octogenaria pag. 480. historiâ 4. relatâ. Sed hos, aliosque omnes, etsi vel longævum simpliciter, vel diutinum ab epotâ Chinâ Chinâ vitæ stadium emensos, *tandem longum post tempus obituros*, jam divinavit Cl. Auctor.

(d) (*Licet aliæ &c.*) Quicunque dicantur esse *præpingues* isti homines innominati (quorum nempe saltem nomen a Viro Cl. indicatum optassem, quemadmodum nomina simul & historias Sanatorum ipse indicavi, tum in Therapeut., tum in hisce Responsionibus meis) quicunque inquam esse dicantur imaginarii isti Ægrotantes, indefinitâ tantum, & cuique arbitrariâ hic enuntiatione prolati, qui *ex usu hujus febrifugi sensim cachectici facti, longum post tempus objerint*, posito quod illius infortunii *aliæ, ut inquit, culpantur Causæ*, unde habet Cl. Auctor, certè culpandam fuisse *longum* illud *post tempus* Chinam Chinam, minimè verò causas easdem forsitan evidentes? Si ab ingurgitatione fructuum horariorum succedat Diarrhæa, num culpandum potius, quàm fructus recens comesti, epotum ter, aut quater ante biennium, vel triennium Cocolate? Ita & qui moritur *longo* post Chinam Chinam assumptam *tempore*, aliis licet existentibus proximis interitus causis, anne ob eam olim cum juvamine assumptam mortuus dicendus erit, quasi hoc Pharmacum sit Pomum Adami, quo cæteroqui non deglutito homines sint æviterni?

S. 15.

(a) **N**on paucos hic memorare possem Mutinæ mihi observatos, in quibus hanc principalem causam credidi extinctam fuisse intempestive febrem; (b) *verum noxa* hujus Febrifugi tanto perniciosior est, quanto occultior, cum enim ægri ab illius usu, non autem Naturæ beneficio evaluerint, si postea post aliquod tempus in morbos recidant, creditur à Medicis ab aliis causis prognatum morbum.

(a) (*Non paucos &c.*) **N**on paucos Mutinæ sibi observatos, quos memorare posset, non memorat Vir Cl., & quidem consultè; nam quos alicubi memorat, non rarò illum juvisset subticuisse, ut in decursu videbimus. Quòd si nomina supprimat, eò quòd fuerint ab ipso *potionati*, tunc forsan cùm *Chinam Chinam habuit in magno pretio*, ut supra §. 3., *affectuque suo in eam nimis effusè ferebatur*, ut infra §. 18, sintque idcirco de eorum numero, pro quorum curatione *illum pœnituerit, hoc remedio se usum fuisse*, ut §. 27., sciat, Chinam Chinam fuisse infontem, & suo munere bene functam, dum Febrem sustulit; ipsum autem errasse in præscriptione, si malorum *hanc principalem causam credidit, extinctam fuisse intempestivè Febrem*; quod idem est ac dicere, oblatam fuisse *intempestivè Chinam Chinam*. Sed hoc perperam patratum quis negat? His non obstantibus, ego Febrifugum hoc a Barbitonforibus, Pharmacopolis, imò & Medicis haud multùm circumspectis, non semel minùs opportunè (ut mihi tunc visum) sine ullâ, neque tum, neque mox subortâ noxâ, oblatum novi; cùm videlicet Fermentum Febrile, utut præmaturè forsitan, & ut ita dicam in statu suæ cruditatis a Febrifugo absorptum, subinde tamen potuit expelli, aut discuti, priusquam rursus exaltaretur: quemadmodum probabiliter, & quidem faciliùs, vel expellitur, vel discutitur, vel perfectè subigitur, cùm tempestivè offertur idem Remedium. Nihilominus illud ego semper inopportunè saltem usurpatum suspicor, idque ipsum in Opere meo profero ubique; quotiescunque vel vitæ imminens, certumque periculum non adsit, ut in Febribus *Intermittentibus Perniciosis*, vel probabilissimum, ut in *Subcontinuis Malignantibus*, vel denique nisi corruptivæ naturæ indicia certa sint in *Vulgaribus Intermittentibus*; quas utplurimum, nisi valdè diuturnæ fuerint, pro *Dépurativis* habeo, vel tales nonnunquam evasuras spero. Quò ad hanc ergo intempestivam Febris extinctionem, ne actum agam, me refero ad ea, quæ supra dixi in Animadversionibus ad Epistolam Nuncupatoriam, lit. d., & in Responsionibus ad §. 1. pariter lit. d., & alibi.

(b) (*Verùm noxa &c.*) Noxa hujus Febrifugi, iterum repeto, nulla est; ex se enim Febrem submovet, quod ex se pariter bonum. Si malum aliquod nonnunquam sit subsecutum (quod non repugnat) ob tempus inopportunum, quo Febris *præmaturè* suppressa fuerit, expectanda erat opportunitas oblationis, nullaque fuisset *noxa* Febrifugi, quamvis eadem fuisset illius actio in corpus Ægrotantis. Sed jam æquivocatio isthæc pluries sublata, eò turpior est, quò patentior, & crebrior. Cum verò ex istiusmodi æquivocationis repetito abusu gratis omnino affigatur Chinæ Chinæ beneficæ qualitas quædam *perniciosa*, ratione cujus in contextu imputatur illi quilibet *novus morbus ab aliis causis, longè postquam ejus beneficio Ægri evaluerint, prognatus*: adeoque cum a Cl. Auctore sustineatur mordicùs, cavendum esse ab eâdem Chinâ Chinâ, statim licet juvante, quippe tractu temporis nociturâ; æquè gratis quis posset asserere, tum quòd Sarsæ parillæ V. G. insit *occulta noxa*, quâ homini in Febrem, aliumve morbum delapso, de-

trimentum attulerit , postquam hic *ab illius usu , non autem Naturæ beneficio evaluerit* a Lue Celticâ ; tum quòd veneno cuiusvis vis insit balsamica , postquam eo per sua Antidota tempestivè debellato , prosperam nonnemo valetudinem fuerit subinde sortitus . Ut ergo ad Chinam Chinam redeam : *Proba est* , dicam , *materia* , si probus illam adhibeat Artifex .

§. 16.

(a) **I**N temperamento bilioso securior forsan Peruviani Febrifugi usus , bilis enim humor subtilis , & facilis motus , non tam arctis vinculis adstringi se patitur , ut propriis viribus se non expediat . (b) Tempus quoque , regiones , & annorum constitutiones observandæ ; æstivo tempore felicius , seu minori damno exhibetur hoc remedium , & sub finem Autumni , hyemali parum fausto successu , per totam enim hyemem fatigantur ægri , nec nisi ad primum veris accessum liberantur . Hoc idem evenit in regionibus humidis , ubi aer crassus , & humidus , magis , quàm in siccis quæ puriori aere gaudent , quales sunt Civitates Montibus proximæ , sive Montanæ .

(a) (In Temperamento bilioso &c.) **R** Editum facimus ad consuetas contradictiones , seu potius ab iisdem nunquam recedimus . In temperamento bilioso securior reputatur a Cl. Auctore Peruviani Febrifugi usus , quia bilis ab eo non tam arctis vinculis adstringi se patitur , ut propriis viribus se non expediat . Hic ergo bilis supponitur Causa Febris alicujus Intermittentis , puta Tertianæ , cum tamen §. 46. hujusmodi opinio ab eo rejiciatur his verbis -- *Neque novum Intermittentes Febres Æstate pervagantes pendere a Salso-acido Fermento , licet ut plurimum opinio sit , a luxuriante bile progigni .* Sed pergamus : Cur quæso modò tutum est , quòd humor biliosus non sinat se adstringi vinculis Chinæ Chinæ , si noxium nuper erat §. 14. , quòd iisdem vinculis se adstringi non fineret , seu quòd hujusmodi Febrifugo non auscultaret humor Atrabilaris ? Forasan quia bonum est , flavam bilem non figi , Febrimque ab eâ pendentem minimè infringi ? At malum erat , interque noxas Corticis graviores numerabatur , non figi bilem atram , nec infringi Febrim ab eâ pendentem . An denique tutius est modò , ut propriis viribus se expediat febrilis humor , quia ex §. 25. & 27. optandus est remedii loco reductus Febris a Chinâ Chinâ fugatæ ; imò reductus Febris fortioris , ac ferocioris , ut ex eodem §. 27. , & ex ipsâ nuncupatoriâ Epistolâ ?

Epistolâ ? At nulla major noxa recensetur §. 14. a Peruviano Cortice illata , quàm quòd Febris paululum enervata , aut ad aliquod tempus depulsa , *denuò ferocior exerat caput*. Quidnam igitur inter hæc omnia bonum est , quidnam malum ? Certè tota hæc Dissertatio nonnisi acervus contradictionum videtur.

(b) (*Tempus quoquè &c.*) Expectabam hoc insuper , ut scilicet dilucidaretur a Viro Cl. , an tutius sit exhibere Peruvianum Corticem crescente , an decrescente Lunâ , die Martis , an die Veneris &c. Sed non vacat amplius minutiora hæc , futilia , & vana singillatim persequi . Et quoniam adversùs auctoritatem illius haud satis videntur posse experimenta mea , meæque ratiunculæ , illam demum pro me refellat , deleatque æqualis auctoritas . Ex ipso itaque tandem Bove lora sumamus . Idem nempe Vir. Cl. unâ Periodo suâ sibi responsum faciat : pensetque prolixiores , quæ occurrerent animadversiones , repetita quidem , sed pressior illius confessio , tum paulò supra , tum in notæ jam *Collationis* textibus etiam allata literis E. F. G. , videlicet . *Peruvianus Cortex nobis a divinâ beneficentiâ munus concessum , in qualibet Regione , quocunque anni tempore , ætate , sexu , temperamento , Febres saltem recurrentes , atque intervallatas fugat , & exterminat . Ita ante sexennium Cl. Ramazzinus*

Ipse sibi Judex , & Reus ipse sibi .

§. 17.

CUriosum porro est quod in Constitutionibus meis Mutinensibus annotavi , nam cum anno 1690. in austrina , & pluviosa tempestate à veris principio per totam æstatem campestris regio infra Mutinam Padum versus aquis exundaret , quam ob causam pessum ivere fruges cujuscumque generis , Rustici fere omnes eodem tempore ex tertianis febribus intermittentibus decumbebant , observatum est in illis , quibus fuit administrata China China , infeliciter cessisse illius usum , tardius enim convalescere , quàm ii qui soli Naturæ negotio commisso multo citius ad Agrorum culturam rediere ; sequenti vero anno vagante urbana Epidemia tertianarum febrium in constitutione valde sicca , & æstate præfervida , Cortex Peruvianus in usum adhibitus , honorem , & famam , quam priori anno amiserat , visus est recuperasse .

(Curiosum porro &c.)

HUic Paragrapho, partim pro usu Chinæ, partim pro illius omissione militanti, non aliud reponam, nisi quod Autumnali tempestate anni 1714. nuper elapsi, inter omnes, quas meminerim, summè pluviosâ, vixque integram ob id seminum, segetumve sationem permittente, æquè felicem, & æquè certum illius usum comperi (eam siquidem ad multiplicis generis Febres sæpius præscripsi) ac quavis siccâ, & sudâ tempestate. Quod si in *Rusticis* anno 1690. observavit oppositum Cl. Auctor; me vel tunc hujusmodi diversitatem, saltem in *Civibus*, non observasse sum conscius: quemadmodum plura alia, quæ de Constitutionibus eorum temporum ipse conscripsit, haud semper cohæsisse memini observationibus meis, etsi præ multitudine Ægrotantium, quos invisebam quotidie (*Urbi nota loquor*) longè major mihi, quàm illi obtigerit opportunitas dispiciendi, quæ generaliter, quæ peculiariter in iis morbis acciderent. Profectò hujusce Febrifugi actionem semper ego uniformem deprehendi; efficacem scilicet semper in iis omnibus febribus, in quibus revera convenit; in iis, in quibus non convenit, semper inefficacem. Qui propterea nullos unquam Medicos audire consuevi dicentes -- *Hoc anno longè melius, ac prægressis purgat Senna, aperit Chalybs, Alchermes roborat, attenuat Salsa*, rideo quoties eorum nonnullos audio identidem exclamantes -- *Verè hoc anno mirabilis est Peruvianus Cortex, proficiusque longè magis, ac annis elapsis*; hujusmodi enim assertio, ex observatâ forsitan illis eventus diversitate procedens, infirmam, & cæspitantem eorum praxim accusat; quippe quæ ex eo solum oritur, quod cum satis non distinguant ab invicem febres Cortice curabiles ab aliis Cortice non curabilibus, aliquam tamen vicissim similitudinem allucinationum Matrem habentibus; quotiescunque regnant universaliter febres Cortici suapte naturâ obsequentes, aliis verò generis fermè nullæ, in earum medelam uno Cortice indiscriminatim adhibito fortuitò impingunt, & remedium eo anno *Mirabile* prædicant; quoties verò diversæ intrinsecus inter se se febres vagantur, aliquam licèt symboleitatem primo aspectu præ se ferentes, easque omnes sinè delectu curare satagunt eodem Febrifugo, res male cadit, & Chinam Chinam eo anno ut *Maleficam*, vel saltem sæpius *Inutilem*, summâ quidem injuriâ, criminantur: haud secus ac olim Vetula cæcutiens fortuitò casum passa, suæ domus, non sui visus obscuritatem excrebatur.

S. 18.

Observationes istæ quas memoravi, (*a*) multorum annorum sunt fructus, & longævitatæ à Divina Beneficentia mihi concessæ; hæc affectum, quo à principio in Peruvianum Corticem nimis effuse ferebar, paulatim attemperarunt, & varium, ac suspensum in hujus reme-
dii ad-

dii administratione reddidere ; summam igitur hoc Febrifugi genus apud me tanti non est pro febribus intermittentibus curandis , (b) ut Medicina æque bene hoc præsidii genere carere non posset , (c) & Veterum Febrifugis , quæ si non tam cito , tutius tamen operantur , febrium causam extenuando , (d) & sensim exanthlando , non posset esse contenta , (e) qui veteri utuntur vino sapientes puto , agebat Plautus in Cassina .

(a) (Multorum annorum &c.) **Q**Uot annorum sint fructus singulatim quatuor opiniones alternè oppositæ , quæ Cl. Auctorem *varium* , ac inconstantem reddidere in administratione *Peruviani Corticis* , ostendit supputatio a me facta §. 3. ; ex quâ infertur aperte , confusam hanc , & indigestam observationum Chinæ Chinæ infensarum reminiscentiam (nullas enim , aut ferè nullas recentes tam brevi , sibi que tam inopportuno tempore potuit ille instituire) initium sumpsisse ab editione Tractatus mei , paucorumque proinde mensium sobolem planè abortivam fuisse . Etenim si anno 1712. de Contagiosâ agens ille Boum Epidemiâ argumentum ipsum meum , ex præmissâ ejusdem Tractatus Synopsi meâ elucescens , sibi ferme adoptavit , ut patet ex Textu in *Collatione* transcripto lit. H. ; edito autem immediate post a me anno eodem 1712. ipso Tractatu , tam repente sententiam mutavit , ut subsequente statim anno 1713. Dissertationem hanc Criticam e diametro oppositam scripserit (quod deducitur ex Paragrapho 47. , obitum Comitis Torricini , qui eo ipso tempore contigit , connotante , quamvis in annum 1714. protracta fuerit ejusdem Dissertationis editio) satis constat , fallacium hujusmodi observationum reminiscentiam paucorum tantummodo mensium , non *multorum annorum fructum* extitisse , obliterated illico penitus , vel saltem neglectâ favorabilium omnium , quæ antea scripserat , memoriâ . Nisi hanc Camarinam movisset Vir Cl. , neque ego in damna illius movissem fortassis . *Suo igitur ipsius indicio periit Sorex .*

(b) (Ut Medicina &c.) Medicina olim carens hoc præsidii genere , Tertianas Perniciosas , atque lethales a Mercato descriptas non sanabat , quamvis innumera tentaret remedia : hodie felicissimè sanat , etiam rebus in præceps ruentibus ; sitque testis Urbs Mutinensis tota . Æquè bene ergo hoc præsidii genere Medicina carere non posset . Sed asserta mea Cl. Auctori nequaquam probantur : etenim inquit ille infra §. 33. *Antequam Chinæ Chinæ nomen innotesceret , hujusmodi portenta viscebantur , ut in incerto esset , num Medicamentorum , an Fortunæ beneficio Ægri convaluissent .* Probata igitur erunt mihi asserta illius , eaque præsertim , quæ in Tertiâ Oratione Jatrici Argumenti prostant a pag. 101. usque ad 105. ; quorum plurima transcripta cum sint in *Collatione* Textuum illius Chinæ Chinæ favorabilium , præser-

tim literâ C., literâ I., & literis K. L. M.; idcirco ad evitandam prolixitatem, ea hîc omittere satius duxi, atque illuc Lectorem relegare.

Hunc tamen insuper rogatum velim, ut Textum appositum novissimè, tum §. 5., tum in fine §. 11., rursus adire non renuat, ubi ait Vir Cl. -- *E singulari hujus remedii præstantiâ, id beneficii fuimus assecuti &c.* Ex his enim omnibus conjiciet, illum nova, quæ hodie cernimus Medicinæ incrementa, novosque progressus in explorandis Febrium, præsertim Intermittentium Causis, & instituendâ meliori earum curatione, uni inventioni auspiciatissimæ Peruviani Corticis adscripsisse: & quasi eo reperto multa quidem, sed non adhuc omnia expleta sint Medicinæ vota, simile aliud insuper remedium ad Febres Continuas, pro ejusdem Medicinæ complemento, a Numinibus implorantem videbit. Quibus equidem tam manifestè, ac per extensum ab eodem prolatis, decernet facilè quilibet cohærenter, *Hoc Febrifugi generis apud ipsum potius tanti fuisse pro Febribus Intermittentibus curandis, ut Medicina æquè bene hoc præsidii genere carere non posset.* At reponet ille fortassis, tunc istud Febrifugum, anno videlicet 1708. apud ipsum tanti fuisse; modò *tanti non esse.* Videamus ergo quanti saltem apud eum etiamnum sit. Afferit ille §. 48. hujusce nuperæ Dissertationis, *Admittendum, & laudandum esse Chinæ Chinæ usum, ad obtinendum aliquod intervallum pro virium reparatione:* afferit §. 22., *Corticem Peruvianum in Febribus Intermittentibus revera aliquid posse, quia paroxysmos sistit per aliquot dies, atque interdum etiam omninò, ut amplius non redeant:* asseruitque supra §. 4, *Admirandum esse, quomodo ad exiguum pulvisculum Peruviani Corticis, quomodocunque exhibitum, Febris Periodicæ furor conquiescat, interdum etiam extinguatur; quod de quocunque alio remedio pharmaceutico non tam facile observatur, quod sciat.* Hæc sunt effata Cl. Auctoris anni 1714., quæ in hac ipsâ Criticâ illius Dissertatione leguntur. Quomodo ergo Medicina, quæ, ipso fatente, tot habet ab hoc uno Febrifugo, & quæ nullum aliud habet remedium pharmaceuticum, de quo quid simile observetur, quod sciat, æquè bene hoc præsidii genere carere posset?

(c) (Et Veterum Febrifugis &c.) De Peruviano Cortice, quem modò Veterum Febrifugis postponit immeritò, sic olim exclamavit Cl. Ramazzinus, ut in Collatione Textuum lit. D. *Quot seculis desudarunt Artis Primores, ut Febrifugum aliquod reperirent, aut arte conflarent? Modo è Peruvianâ Regione Cortex ad nos defertur, divinum planè remedium ad malè natam Febrium sobolem exterminandam.* Eundem Corticem aliàs appellavit ille, ut in citatâ Collatione lit. B., *Antipyreticorum omnium, quotquot excogitavit Antiquitas, & Chymicorum solertia conflavit, facilè Principem.* Tandemque de eodem cum Veterum Febrifugis comparato hæc protulit, ut in eâdem Collatione lit. E. F. G. *Quàm diu a peritioribus Artis Magistris insudatum est ad Febrifugum aliquod conflandum, ex triplici Regno materiâ petitâ? At omnes hæctenus illorum labores frustrante diligentia in irritum cessere; & si aliquod Antipyreticum in illorum monumentis extat, nonnisi sub Grypho descriptum legitur, ut Delio Natatore opus sit, si Mens Auctoris sincera habent-*

habenda sit. Solus Peruvianus Cortex &c. Hujuscemodi ergo Febrifugis diu, sed frustra quæsitis a Peritiorum, Antiquiorumque Magistrorum Artis industriâ, sinè Peruviano Cortice, qui *Solus*, ipso docente, Febres fugare, & exterminare perhibetur, *Medicina posset esse contenta?* Illis, illis ergo in Chinæ Chinæ dedecus oportebat curare Puellas Patavinas §. 9. ab Auctore vilas, nec tamen sanatas, Nobilemque Virginein ab eodem pariter §. 26. infra descriptam, solique tempori, & domui paternæ medicatrici commissam.

(d) (*Et sensim exantlando &c.*) Profectò *sensim*: & adeò sensim, ut ad biennium sæpius protrahatur in Quartanis iita Causæ febrilis extenuatio, Veterum Febrifugis, quæcunque in usum revocata fuerint, faciliè adscripta a Cl. Auctore, tantâ quidem fiducia, ac si *recens ab Academiâ venerit*, praximque medicam nunquam exercuerit. Contra, non rarò *valere jussis* illiusmodi Febrifugis, ubi simul quis renuat uti Peruviano Cortice, intra quatuor, plus minùs, menses solet contingere plurium Quartanarum spontanea solutio. Saltem *unum* ex tot Veterum Antipyreticis, cui magis fidat, indicasset Cl. Auctor, ut facto experimento, & asserti tam utilis veritate detectâ, *tutius* istiusmodi Remedium, Chinâ Chinâ sepositâ, totis ulnis possemus amplecti. *Sed isthæc* (ut infra ipsemet inquit) *apud mulieres, & imperitam plebeculam locum habent, non apud eos, qui sapiunt.*

(e) (*Qui veteri &c.*) Sapienter admodum in commendationem Febrifugorum a Veteribus usurpatorum, subdit Cl. Auctor effatum Plauti -- *Qui veteri utuntur Vino, sapientes puto* -- Desideratur tantummodo commentarium, quod in Orat. Jatr. Argum. pag. 183. huic ipsi Textui addendum censuit idem Cl. Ramazzinus, quod sic habet -- *Qui veteri vino utuntur Sapientes puto, agebat Comicus; rectè quidem, nisi tamen Vinum in vappam, seu acorem transferit. Non minus tamen sapientes judicandi, qui recenti utuntur Vino, si defæcatum fuerit; hoc enim Vini genus plus nutrit, multòque plus spiritus ab eo elicitur.* Ita ille. In hisce terminis tam bene quadrat casui nostro, collatione factâ vappescentium, ac mucidorum Febrifugorum Antiquitatis cum recenti, & vivifico Peruviano Febrifugo, expositio Cl. Auctoris, ut volupe mihi sit, absque ullâ hæsitantiâ eidem subscribere.

§. 19.

E *Quidem si damni dati, & collati beneficii à Chinæ* usu ineatur ratio, non tam facile crediderim, ut ab æquis iudicibus illa possit absolvi à crimine objecto, magis damnosam illam esse, quàm utilem, seu num liceat de Peruviano Cortice proferre, quod de Ortone scripsit Tacitus, *tantundem apud posteros meruit bonæ famæ, quantum malæ.*

(Equi-

(*Equidem si damni dati &c.*) **O**Mne damnum, quod China China possit inferre (si quod potest inferre) eo solum nomine inferre valet, quod est verè Febrifuga. Nisi ea talis esset, neque esset in potestate imperiti Medici Febrem sistere, *ubi, vel quando* non convenit. Hoc est damnum unicum, quod ab usu illius, intempestivo tamen, queat fortasse procedere. Contra, ab usu recto quot beneficia prodeant, satis patet vel ex uno Tractatu meo, & ex adductis ibidem historiis. Si ergo *damni dati, & collati beneficii* ineatur justa ratio, *ab æquis Judicibus* facile crediderim posse discerni, *minimè damnosam illam esse, sed utilem*. Quod si ratio ineatur laudum, & probrorum, quæ a Viro Cl. ea retulit, tunc verè crediderim, licere de ipsâ proferre, quod ex uno tantum defuncti Auctoris versatili calamo (quandoquidem velit ei Posteritas fidere) *tantundem bonæ famæ apud Posteror ea meruit, quantum malæ*. Ita nimirum nobismetipsis haud satis caventes

Cædimus, inque vicem præbemus crura Sagittis. Pers. Sat. 4.

S. 20.

POssem funestos casus referre non paucos, quos observavi toto eo tempore, quo Mutinæ Medicinam feci, sed prolixior essem, & Epistolæ leges transgrederer, unicum tantum in Viro insigni satis noto referam, dum casus, qui in gente vulgari contingunt sine rumore terra obtegit. Comes Joannes Carolus Morandi placentinus, olim Serenissimo Principi Cæsari Estensi Eques percarus, media æstate simplici quartana correptus est, cui Medicus magnus Peruviani Corticis Fautor, facta ut puto lævi aliqua purgatione, seu etiam V. S. Chinam Chinam ad plures dies pro more suo præscripsit, ast Eques ille contumaciori febre facta in pejus ruere semper cœpit, donec appetente hyeme hydrops ascites factus Placentiam asportari voluit, ut in Majorum sepulchro tumularetur.

(*Possem funestos Casus &c.*) **M**agnam potius esse dixerim Cl. Auctori penuriam funestorum casuum, quos possit obstrudere, si quem primo loco producit, a septem retro lustris cogitur emendicare. Verum nec rem planè tangit acu, neque me imparatum invadit; sed strenuè jam præmunitum. Atque hinc dignoscat quilibet, me *ingenuè bona, & mala exposuisse* in Tractatu meo, non encomia tantum, laudesque Chinæ Chinæ profusas, *qualis mos est*

mos est eorum, qui de aliquo novo medicamento *Tractatus integros edunt*, ut acutè notavit §. 7. Cl. Auctor. Hunc igitur eundem Galum vide Lector in *Therapeutice meâ*, pro animi mei candore primò tantùm obiter indigitatum in quadam parenthesi pag. 5. , dein expositum quidem breviter, sed ad trutinam longiusculè expensum a pag. 178. ad totam pag. 181., suppresso licèt *Ægrotantis* nomine; atque ob id solùm suppresso, ne viderer in infauti eventus discrimen velle me trahere, præter *Experientissimum Frassonum* Præceptorem meum, qui primò solus curæ adfuit, & ab *Obtrectatoribus* suis ob id malè audiit, ipsum quoquè superaccitum eidem curationi Cl. Ramazzinum, cujus propterea mentionem facere opus erat. Neque enim satis memineram, quemadmodum neque modò satis sum memor, an Vir iste Cl., qui tunc *Chinam Chinam* habebat in magno pretio, & affectu suo nimis effusè in illam ferebatur, ante oblationem *Peruviani Corticis*, an solummodo post oblationem curationi a Præceptore meo susceptæ supervenerit; atque ideo an calculum suum pro administratione *Febri-fugi* hujus addiderit necne. Discrepat tamen in nonnullis a meâ, in aliis manca est historia a Cl. Auctore laconicè nimis expressa; quam ideo nonnihil fusiozem, ulque tamen sinceram, apud me videre est loco citato his verbis. *Meus itaque colendæ semper memoriæ Præceptor Frassonus Nobili cuidam Viro* (fuit is idem *Gomes Jo: Carolus Morandus*, de quo hîc Cl. Auctor, etsi nomen illius tunc reticuerim) *Quartanâ Febre per mensem circiter detento, & supra modum vexato cum notabili anhelitus difficultate, atque œdematoso pedum tumore ante Febrem exortis, & cum eâ in dies crescentibus, Chinam Chinam exhibuit, & Febrem sustulit. Post aliquot alios successivè dies tumor œdematosus, suapte naturâ in incrementum pronus, major est factus, ad tibias, & crura sensim procedens, ventre non immuni. Atque ita, increbrescente anhelitus difficultate, intra paucos tandem menses, a serosâ colluvie universaliter obrutus Æger, fato cessit, Hydropicus Abdominis simul, & Pectoris.*

Hæc cum ita verè se habuerint, minimè consonat veritati, quòd *Febris* ab epotâ *Chinâ Chinâ facta fuerit contumacior*, ut asserit Vir Cl.; sicut nec eidem veritati pariter consonat, quòd *Frassonus ad plures dies ipsam Chinam Chinam præscripserit*. Præscripsit ille quidem pro more suo; sed mos illius, omniumque tunc Medicorum erat præscribere ad *Drachmas duas*, & semel tantùm juxta *Methodum* etiam *sanioris ætatis* Cl. Ramazzini. Quòd si *Febris*, ut subdit ille, *facta fuit indè contumacior*, cum Medici tunc solùm eludantur, quando ea non redit, sed tacitè corpus depascitur, ut §. 27.; imò cum res feliciùs cedat §. eodem, quando illa caput erigit etiam ferocior, quomodo hinc modò colligit Vir Cl., *Chinam Chinam* obfuisse, & *Hydropem* alcivisse, si *Febris* ex ejus effato nequaquam abiit, sed *contumacior evasit*? Prodeat tamen iterum e latebris in apertum Veritas. *China China semel* tantùm ad *Drachmas duas* propinata fuit, & *Febris* recessit; sed *Hydrops* antea genitus incrementum, quod eo etiam *Febrifugo* minimè epoto suscepisset, æquè suscepit. Rediit quidem pro
more

more post nonnullas hebdomadas paroxysmis levioribus , uno tantum Corticis haustu depulsa Febris ; sed nulla ferè amplius habita est illius ratio : quandoquidem conatus omnes ad se trahebat Hydrops usque succrescens , dum tractu temporis in lentiores symptomatice Febri- culam sensim conversa , paulatim obliterabatur Quartana.

Hæc est germana facti series : & præterquamquod vivit adhuc in luctu Comitissa defuncti Viri tunc Conjux , omnium facile memor , ipse nequeo non meminisse , qui eidem Comiti Johanni Carolo Placentiam proficiscenti , ut in *Majorum Sepulcro* , cum obiret , *tumularetur* , de mandato ipsius Præceptoris adstiti , Medicinæ sacris vix initiatus , circa annum videlicet 1678. Causæ morbi procatartice , quas brevitatis gratiâ ibidem subticui , modò verò cogor innuere , fuerunt labores infueti , & incommoda lata præsertim Liburni ; ut Principi , cui famulabatur , morem gereret , non semel sub dio pernoctans in ipso Portu nebulis confertissimis obsitus ; interdiu verò ferme assidue , ac violenter equitans ad plures dies per juga , & montes , tam in profectioe , quàm in reditu . Quæ quidem omnia omnino præter consuetudinem perpeffus , cœpit paulò post lumbis dolere , imminuto sensim lotio , domi hærere , pallere , sibi gravis fieri , subtumidusque , & anhelosus nonnihil ad quemcunque motum evadere , ac mox Febre Quartana corripì , succedentibus postmodum iis omnibus , quæ supra retuli , transcripsique ex Therapeutice meâ ; ut indè cuique pateat , Casum hunc unicum minùs favorabilem , lapsu annorum vel tunc plusquam triginta mihi observatum , ac quodammodo pro suspecto habitum , fideliter manifestasse . Et quamvis pro Frassono curante tot , tantique ponderis militarent rationes (quas fusiùs ibidem sum persecutus) ut ob illas Practici eximii Placentini , *Eques Moraggius* , & *Stanislaus Homatus* , quibus Ægrum tradidi gravissimè habentem , ipsum Præceptorem meum omni culpâ vacare pro suâ ingenuitate asseruerint ; eum nihilominus ego severior , ac forsan minùs æquus Judex , in ipso Tractatu meo ab omni suspicione parum cautæ oblationis remedii , solam Febrim , non Hydropem præortum multare valentis , nequaquam absolvi .

Interim tamen Lectorem enixè rogatum volo , ut dempto sibi , mihique repetitionis tædio , examen integrum hujusce casus videat in fonte , paginis supra citatis Therapeutices meæ : ubi quando Hydrops Chinâ Chinâ curari possit , si nempe a Febribus pendeat , & quando non possit , si nempe Febres ipsas præcedat ; crebris tum experimentis , tum Scriptorum expertorum auctoritatibus , statutum reperiet , planèque discussas intuebitur nebulas omnes , quæ hinc Peruviani Corticis usui cavillosus quispiam vel tunc studuisset offundere : tandemque noscet , me , his non obstantibus , de Febrifugi administratione haud satis fortasse cautâ , ipsum quadantenus Præceptorem meum (æquè audacter quidem , ac sincerè) notasse . Sed hoc idem si detur etiam Cl. Auctori ; quid contra Remedium , cum tempestivè , atque ubi prodesse debet , non ubi nequit , offertur ? Verùm rancescunt hæc a Viro Cl. nunc allata ; imò dixerim , putent , quippe extincti jamdudum Frassoni Manibus , prout ab Opponente appinguntur , heu nimis infensa .

Hujus-

§. 21.

HUJUSMODI exemplum in quartana intermittente, multaque alia postmodum mihi observata in febribus periodicis, in quibus continuatus Febrifugi usus obstructions & cachexias invexit, ut ægri cum sanitate in gratiam nunquam redierint, ac tandem hydropici obierint, ut postremo contigit Domino Comiti Marsiano, alia inquam exempla cautiorem me fecere in præscribendo hoc Febrifugo, licet febres essent de genere intermittentium.

(Hujusmodi exemplum &c.) **C**L. Auctor suadere contendens, continuatum Febrifugi usum obstructions, & Cachexias invadere, ac tandem Hydropem, & mortem, exemplum insigne inter multa, ut inquit, alia selectum (quæ tamen minimè indigitat) in medium proferre satagit, quasi per transennam memoriâ recolens obitum Generosi Viri D. Comitis Ludovici de Marsciano, anno 1703. Bononiæ vitâ functi, post septennium tamen (quod ille subticet) integræ valetudinis ab epotâ Chinâ Chinâ, quam D. Davinius anno 1696. curationi adstans, ad vota solliciti Ægrotantis proposuit pro curatione Quartanæ Febris, quâ tunc tenebatur Nob. ille Patiens, D. tandem Ramazzino, meque ipso, cunctanter quidem ante, facilius verò post rem discussam, eo casu remedium admittentibus. Hanc quoque historiam nominatim expressam, atque descriptam videsis Lector in Therapeutice meâ pag. 175. historiâ 11.; sciasque illam non ibi relatam, ut simplicis Quartanæ curationem Chinâ Chinâ absolutam, velut quid Cedro dignum, promulgarem; puduisset enim trivialia hæc pro magnificis venditare: sed ut Lienis intumescientiam (quæ nobis curantibus negotium faceffebat non leve) a Quartanâ prognatam, ope verò Corticis unâ cum Quartanâ ipsâ deletam, malè credulorum oculis subjicerem, fassus hac in re nonnullam quoque hæsitantiam meam; quamvis in Sententiam Cl. curantis Viri, D. scilicet Davinii, qui votis Ægri enixè instantis annuerat omnium facillimè, revera descenderim. Ad calcem historiæ, quasi futuræ cavillationis extitissimè præfagus, hæc quoque reperies, quæ placuit tunc subdere, feriores ejusdem Ægrotantis obitum connotantia, si quando & hunc in crimen Corticis quisquam vertere non erubuisset. Sunt hec præcisa verba pag. 176. meæ Therapeutices exarata -- Nisi fortè morosus quispiam recidivam morbi illius (videlicet Quartanæ Chinâ Chinâ curatæ) appellare velit lethalem ejusdem ægritudinem, post septennium a causâ evidenti productam, Febrim videlicet acutam, ex suppressâ cutaneâ quadam habituali affectione oriundam, & intra

14. dies per abscessum ad anum imperfectè judicatam : quo demum abscessu priùs in Gangrænâ converso, mox difficulter curato, translatoque interim Ægro in aerem palustrem, Febris erratica subsecuta est, quæ tractu temporis Lienis tumorem ascivit, dein Icterus, mox Hydro-
pem, & mortem. His adde modò, radicem omnium malorum verè fuisse suppressionem, nedum cutaneæ cujusdam affectionis habitualis, ut supra, sed & antiquæ simul *Fistulæ* ad anum (quod tunc subticui, quippe quod paucis notum) unde profundioris postea, altiorisve abscessus origo cum Febre acutâ, indè Gangræna, & partium imi ventris intimiorum, ac connexarum labes, Hydrops denique, & mors. Ita sensit distinctè inter cæteros Vir Cl. D. Paulus Piela in Consultatione postremâ, quam cum plurimis aliis celeberrimi Bononiensis Archilycæi Viris illustribus, de mandato Serenissimi Ducis ibidem habuimus D. Davinius, & ego. Atque hinc fanè petenda Causa obitus Viri Generosi, non ex Peruviano Cortice ante tot annos epoto. Certè tot Medici insignes ex inclyto illo Athenæo, qui ad longum tempus curæ illius Equitis adstiterè, quibusque universa prægressorum morborum series apprimè innotuerat, quicquam mali a Chinâ Chinâ progenitum, ne per somnium unquam sunt suspicati. Vivit unus ex iis Cl. Simonius, quæ circa hoc sentiat valens testari, & parum candidam hanc oppositionem, futileve potius has nugas potens diluere, si sit opus.

S. 22.

I Ndulgentior tamen fui in hujus remedii administratione, quando observabam ægrum ipsum instanter appetere tam decantatum præsidii genus, & quodammodo conqueri de mea procrastinatione, novi enim quanti momenti sit ægri confidentia in hisce remediis assumendis, quæ sibi profutura animo conceperint. Ne igitur tam magnam confidentiam frustrarer, Chinam Chinam (a) in mediocri dosi, ut lædere non posset, & cum satis felici eventu exhibui, hac in re Celeberrimum Sanctorium nostrum imitatus, qui, ut in *Methodo Vitandorum errorum* Libro 13. Cap. 4. suadet Lapidem Bezoar, licet fictitium aliquando exhibendum, propter nimiam ægrorum confidentiam, & ut vitentur calumniæ propter confirmatam opinionem, (b) quod malignæ qualitati obstat: Hæc nimirum opinio de Lapide Bezoar, à veneranda

randā Antiquitate in tanta existimatione habito, fuit penes hunc nostrum Professore, ut illum præscriberet in fide Parentum, à qua opinione non multum abludunt nostrorum temporum Medici peritiores modicæ fidei circa omnia bezoartica, & alexipharmaca, de quibus virgilianum illud dicere liceat, *possunt quia posse videntur*, quod dictum tamen Peruviano Cortici non videtur congruere, nam revera in febribus intermittentibus aliquid potest quia paroxysmos sistit per aliquot dies, atque interdum etiam omnino, ut amplius non redeant.

(a) (In Mediocri Dosi &c.)

M Ediocrem dosim Chinæ Chinæ a Cl. Auctore constitui in unâ tantum Drachmâ, maximam verò in *duabus*, vidimus jam ipso fatente §. 8. Quantitas autem Drachmæ unius, vel paulò major, præsertim *semel* tantum oblata, nedum *lædere non poterat*; verum nec ferè prodesse, nisi de Febre Intermittente planè facili sermo sit, & sponte ad solutionem vergente. Profectò si fortè hujusmodi, aut simili Methodo religiosè semper hæsit in Praxi Cl. Auctor, ægrè admodum de activitate remedii ferre poterat Judicium undequaque absolutum, ut illud damnaret. Neque jure crediderim potuisse ab illo decerni, an sinistri successus, quos identidem memoravit, aut perhibuit se posse memorare, unique Cortici fidenter attribuit (nisi ab inopportunâ forsā oblatione processerint) a Cortice verè processerint, an a dosi illius enervi, ac invalidâ, remque propterea infectam relincente. Sed urget ille, asserens, eo pacto se *Chinam Chinam exhibuisse cum satis felici eventu*. Hic, fateor, curiosus quærerem, si liceret; cum verò non liceat, mente saltem meâ scrutabor, quinam fuerit eventus ille, qui dicitur felix. Vel enim (repetitæ occasione donari velim repetitunculas quoquè nonnunquam meas) Vel enim *post aliquot dies Febris denuo caput erexit etiam ferocior*: sic enim rem *feliciùs cessisse* Ægrotantibus annotat §. 27., annotavitque in Epistolâ Nuncupatoriâ, *Febrem, sed fortio rem redeuntem*, pensare damna Chinæ Chinæ, ob ejusdem Febris extinctionem Ægris illata: & hunc eventum, quidquid dicat Auctor, procul dubio parum felicem dixerit Æger ipse. Vel Febris non ampliùs rediit: & hic eventus secundum eundem Cl. Auctorem omnium pessimus est; ex §. enim 25. *Optandum esset, ut Febris, quæ diebus a paroxysmo vacuis tacitè cubat, ut ignis sub cinere dolo- so, in apertam flammam erumperet, nam reditus illius remedii loco esset*. Sive ergo reciderit Æger a Cl. Viro Chinâ Chinâ curatus, sive non reciderit, difficile est eruere ex Theorematis hujusce Dissertationis, quinam fuerit eventus felix, & quinam sinister. Ad lubricas istiusmodi angustias perlæpe redactus, quocunque tandem se vertat Cl. Auctor, semper illi *A fronte Præcipitium est, a tergo Lupus*.

(b) Quod

(b) (*Quod malignæ qualitati &c.*) Gratias tandem habeo quamplurimas cineribus Viri Cl., quod in re obviâ quidem, sed in casu nostro plurimi æstimandâ, quippe quæ prima forsan, ut mox declarabitur, Controversiæ nostræ jecit semina, partes meas tam liberaliter, tamque ingenuè susceperit. Decernit ille cum celeberrimo Sanctorio, *confirmatam*, apud Medicorum vulgus *Opinionem*, quod *Lapis Bezoar malignæ*, ut ajunt, *qualitati obsistat*, vanam esse, *Medicosque peritiores nostrorum temporum esse modicæ fidei circa omnia Bezoartica, & Alexipharmaca*, de quibus Virgilianum illud dicere licet,

——— *Possunt, quia posse videntur;*

atque ideo, subdam ego, diligenter reponenda erunt inter *tutissima* illa *Remedia*, de quibus §. II. Regibus præscribenda. His præjudiciis explosis, comparat in contextu eundem Lapidem Bezoarticum Peruviano Cortici, fateturque, cuncta hæc, *quæ de Bezoarticorum, & Alexipharmacorum invaliditate ab eo dicta sunt*, nequaquam congruere huic *Febrifugo*; nam *revera* (inquit ille) *in Febris Intermittentibus aliquid potest, quia paroxysmos sistit per aliquot dies, atque interdum etiam omnino, ut amplius non redeant*. Lectorem hic, quæso, ne pigeat adire Therapeuticen meam pag. 444. historiâ 9., vel saltem pag. 448. Ibi videat, totam discrepantiam, quæ anno 1709. inter me, & Cl. Auctoris Nepotem Relatorem abusus Chinæ Chinæ in Urbe nostrâ, insurrexit, quæque forsan Scriptis hisce Cl. Viri ansam præbuit non minimam, in hoc uno constitutam fuisse, quod ille *Febris Tertianæ duplicis*, ab ortu suo *Intermittentis*, aut *Subintrantis*, mox recens *Continuæ*, ipsoque Judice, *malignæ jam factæ*, cum totali asphyxiâ, frigidisque circa Pectus, Caput, & Collum sudoribus curationem (quam ego Chinæ Chinæ ope certam pollicebar, ut contigit, inhibito per eam superventuro novo paroxysmo, cæteroqui planè lethali) ille inquam Lapide potius Bezoartico, quàm Chinâ Chinâ absolvendam contenderet, eo præcisè titulo, ut *malignæ obsisteret qualitati*. Quid ergo mihi, tam secunda ne cogitanti quidem, propitium magis poterat obvenire? Profectò

——— *Insperata accidant magis sæpe, quàm quæ speres*, inquit Plautus in Mostell. Etenim nonne ultronea ferme hæc est Cl. Patruî ingenuitas, quæ Corticem Peruvianum, *Paroxysmos Febrium revera sistentem*, Lapidi Bezoartico anteponit, *peritioresque nostrorum temporum Medicos* eos vocat, qui virtutem alexipharmacam illius celeberrimi Lapidis parvi faciunt, opinionemque ipsam, *confirmatam* licet, quod *malignæ*, ut vulgus Medicorum loquitur, *obsistat qualitati*? Sed nonne simul rationalis erat in casu tam præcipiti sollicitudo mea, ut rationalis, felixque fuit ipsa Febrifugi oblatio? Nimirum ope illius Perniciosa Febris recessit sinè reditu a Subjecto *Præpingui, Pituitoso, Adolescenti, Nobili, & lautitiâ victus utenti*; quæ conditiones, nedum conjunctim omnes, sed & seorsim singulæ, Peruviani Corticis usum prohibent ex Cl. Auctore, ut supra vidimus: jamque septennium interim inculpata valetudinis labitur a Chinâ Chinâ assumptâ. Hujusmodi noxam ex vi *occultæ malitiæ* suæ intulit illa, intrâ mensem ad uncias duas

duas epota. Nec majorem forsan, magisve noxium abusum mox vidit, aut ante viderat Mutinæ studiosus Relator.

§. 23.

ATque id est, quod valde admiror, & in variis meis Operibus (*a*) *virtutem hanc arcanam* commendavi, & nunquam satis admirari cessabo, (*b*) *sed optandum* esset, ut in periti, & prudentis Medici manibus esset hoc remedium, eò enim ventum est, ut vulgaris quisque Medicus, & juvenis, qui recens ab Academia venerit, non vereatur periodica febre laboranti ægro Febrifugum istud ad multos dies, & in liberali dosi præscribere ea securitate, qua Magistros suos operari vidit.

(*a*) *Virtutem hanc arcanam &c.*) **N**on solum *virtutem arcanam* Chinæ Chinæ (cujus usum ex hoc ipso quòd *arcana* est illius *virtus*, §. 6. hujusce Dissertationis vocat *amethodicum*) sed *usum ipsum liberalem*, & *amplum* ejusdem virtutis, illamque possidentis Peruviani Corticis, cum exclusione ferè omnimodâ cæterorum præsidiorum Artis, in variis Operibus suis commendavit Cl. Auctor, ubique asseverans, ut vidimus, -- *Antipyreticum istud esse Remedium cum securitate Febres Periodicas sanans: in Tertianis malignis, Fermentum illarum, sive penitus restinguendo, sive quamplurimum enervando miranda præstans, Ægrumque ob id vindicans ab interitu: in qualibet Febre recurrente, quocunque anni tempore, Regione, Ætate, Sexu, Temperamento exhibendum; non tamen semel tantum, ut olim, sed ad plures dies, donec febrile miasma sit penitus exantlatum; valere jussis tot pharmaceuticis præsidiis, tot repetitis venæ sectionibus, tot iteratis purgationibus, quæ humani corporis machinam potius infirmant, quam confirmant &c.* Vulneribus hisce consolidandis, quæ sibi metipsum gladio veritatis inflixit Cl. Auctor, Emplastrum tergiversationis hujusce Paragraphi profectò est impar. Interim tamen nequit saltem non commendari sagax solertia, quâ semetipsum expressæ contradictioni subtrahere studuit. Sed jam jacta erat alea, nec ullus supererat amplius (manu licet magistrâ calamum contrectaret) industriosæ defensionis locus. Quòd si quis verè fuisset, Viri certè sollertissimi dexteritatem nequaquam subterfugisset, ut de illo meritò dici possit,

——— *Si Pergama dextrâ*

Defendi possent, certè hac defensa fuissent.

(*b*) (*Sed optandum &c.*) *Optandum omnino, ut in periti, & prudentis Medici manibus sit hoc Remedium; & magis adhuc optandum,*

ut in periti, & prudentis Medici manibus sint *alia Remedia*, non ob præposteram aliquando administrationem tantum, sed *suapte naturâ* infimul periculosa, cujusmodi sunt Cathartica, & Emetica, Opiata omnia, Diaphoretica, ea præsertim, quæ vocant Spirituosiora, Venæ sectio, & alia hujusmodi generosiora præsidia. Ex horum quippe usu minùs castigato longè majora impendent damna, quàm ex usu promiscuo Peruviani Corticis; licèt finè rigidiusculâ, ut hîc, Cl. Auctoris animadversione, *vulgaris quisque Medicus, & Juvenis qui recens ab Academiâ venerit, non vereatur illa quotidie præscribere, eâ securitate, quâ Magistros suos operari vidit*. Non est tamen ideo, quòd approbem nimiam, si sit nonnunquam, Juvenum facilitatem, quam verè corripendam & ipse judico: dico tantummodo, errorem ipsius præcociis Februm extinctionis sæpe leviozem reperiri a posteriori (ut cum Scholis loquar) ac a priori apparuerit: errorem verò Febrifugi oblatis in Febre, cui nullatenus illud convenit, ut in Synocho, aut aliâ quavis Febre per essentiam Continuâ, ad solam ferme palati frustraneam multam forsan restringi; damnum enim, saltem sensibile, nullum exinde visitur. Propterea, quam jure exquirimus Cl. Auctor, & ego, peritiam, prudentiamque in Medico Chinam Chinam præscribente, eam non solùm, sed & majorem exopto ego in Medicis, *alia Remedia*, si malè administrentur verè periculosa; quotidie tamen, ac si bellaria forent, facillimè præscribentibus.

S. 24.

SEd hoc etiam esset tolerandum, nisi quoque (a) *Chirurgi, & Pharmacopolæ*, incio Medico hanc arrogarent auctoritatem, sibi plaudentes quod pauca impensa ægrum è lecto cui diuturnæ febres affixissent citissime exemerint non sine prævia purgatione, & venæ sectione, quæ duo magna remedia præmittenda censent, ut methodice videantur operari, quod si febris omnes illorum conatus eludat redeundo, in promptu habent ægrotantium errata in victu, & rebus non naturalibus, seu non exhibitam ad plures dies debitam Chinæ Chinæ quantitatem, sed isthæc apud mulieres, & imperitam plebeculam locum habent, non apud eos qui sapiunt, febres enim intermittentes ab hoc remedio fugari videntur, ac Medicis nimis credulis facile imponunt, (b) *non enim vere fugantur*, sed potius concentrantur, & quia paroxysmi non repetunt, putant nonnulli febrem abjisse.

(a) (Chirurgi, & Pharmacopolæ &c.) S Candalum hoc an ipse præviderim, ab excellentiâ, & præstantiâ ipsâ remedii facile oriundum; imò prognatum olim apud extraneos quosdam Chirurgos, nec planè innoxie tunc Mutinæ propagatum, an observarim, enunciarim, & malè tulerim, videre est in Therapeutice meâ; primum quidem pag. 383., secundum verò a pag. 557. usque ad finem Capitis. Id bonæ frugis, quod ex malo semine, & tunc, & postea collegi; nempe ex profusâ, & amethodicâ Corticis oblatione, ignaris hisce gentibus identidem usitatâ, fuit, ab hac ipsâ cæteroqui reprehensibili, ac temerariâ praxi, non malos eos semper, quos suspicatus essem; sed non rarò potiùs bonos, & felices, quos non ita facile expectassem, eventus successisse. Quamobrem etsi administrationi præposteræ illius malè aptetur excusatio de erratis Ægrotantium, vel de non satis continuato usu remedii, si Febris redeat: nihilominus hæc eadem excusatio planè contemnenda non est, ut illam videtur planè contemnere Cl. Auctor, si verax aliqui ea sit, & candida. Cum ergo sæpe, ut dictum supra, res bene ceciderit, quamvis remedium minùs congruenter fuerit administratum, colligo ego, nullam verè ab hoc Febrifugo *ratione substantiæ suæ* noxam hominibus inveni; sed eam solummodo nonnunquam (nec enim semper) quam mera *intempestiva Depurativæ Febris extinctio* potest inferre. Bonæ scilicet *leges ex malis* quandoque moribus etiam in Re medicâ procreantur.

(b) (Non enim verè fugantur &c.) Sciebam equidem, objici a Medicis Cortici Peruviano infensis, illum, qui solam Causæ febrilis quasi sopitæ actionem ab eisdem creditur impedire, solas per consequens Febres fugare consuevisse, minimè verò Februm Causam, pro illis iterum suscitandis intus latentem; sed Febres ipsas verè non fugari, imò eas concentrari potiùs (apertis adeò saltem notis) nondum audiui. Me itaque sponte recipio inter Medicos illos nimis credulos, quibus facile imponunt abditæ hujusmodi Febres, quæ faciunt Ægrum facile cibum appetere, benè ferre, meliùs nutriri, optimè quiescere, vires resumere, equitare, iter facere, ludere &c. sinè lassitudine, sinè molestiâ, sinè siti; uno verbo, sinè ullo Febris indicio. Certè Maligna valde sit oportet concentrata sic hujusmodi Febris. Modò infortunium nosco a Cl. Auctore toties deprædicatum, si nempe non recidat Æger: necesse quippe est illi, latentem huiusmodi Febrem toto vitæ suæ tempore circumferre. Quis tamen ideo vel somniasset unquam, Cl. Auctorem, de suis Ægris cæteroqui sollicitum, in hunc errorem scienter incidisse, ut illis non semel imponeret, præscriberetque in ætate saniori, jam experienciâ edoctus, & noxis Peruviani Corticis observatis, illud idem Febrifugum (quemadmodum se præscripsisse fassus est §. 8., & alibi) sub vano prætextu, quòd recrearentur ipsimet Ægri, & vires resumerent; cum tamen sciret, ab hoc Remedio non fugari Febres, sed concentrari, tacitèque ab illis, ut infra §. 27., corpus humanum depasci potiùs, quàm recreari?

S. 25.

(a) **A** *Dverte quæso* mi Nepos , ac diligenter observa, febres intermittentes post epotam Chinam Chinam nunquam ad veram , & perfectam apyrexiam pertingere , qualis contingit quando natura sponte per sudorem , aut alias vias accessionem discutit , nam in tertianis exquisitis in die intermissionis vera & absoluta ex pulsu observatur infebricitatio , non sic vero ubi assumpta fuerit China China , nam pulsus percipitur parvus , & cum aliqua frequentia , quod etiam (b) à *Doctissimo Etmullero* fuit annotatum , sic facile decipiuntur Medici qui putant febrem recessisse , quæ tacite cubat , ut ignis sub cinere doloso , sed optandum esset ut in apertam flammam erumperet , postquam æger ad aliquot dies silente febre roboris aliquantum reportasset , nam reditus febris (c) *remedii loco* esset.

(a) (*Adverte quæso &c.*) **M** Uliercularum more a crassioribus tantum indiciis carentiam Febris eram nuper metitus ; sed Medico *Vena tangenda est* , ajebat Seneca. Venam itaque , seu potius pulsantem Arteriam attentè scrutatus Cl. Auctor , Nepotem monet , *ut diligenter advertat , Febres Intermittentes post epotam Chinam Chinam nunquam* (ne toto quidem Vitæ cursu ?) *ad veram , & perfectam apyrexiam pertingere* . Hæc observatio respicit Rem , non Ratiocinia : quamobrem videtur turpe , contractato pulsu , Medicos non convenire circa existentiam , aut carentiam Febris . Vadem tamen me pretio quolibet dare volo , nullum inter Obtractatores Peruviani Corticis reperiri Medicum tam exquisito præditum tactu , ut ex pulsu (etsi frequens ille dicatur , ac parvus) valeat dignoscere Hominem hoc Febrifugo potius ; quàm sponte , aut aliâ quavis viâ ex Febre Intermittente sanatum , si aliunde nesciat . *Ist hæc verè apud Mulieres , & imperitam plebeculam locum habere possunt , non apud eos , qui saltem digitis sapiunt* . Haud tamen inficior , quòd si cuipiam Febricitanti diuturnis simul obstructionibus , aliisve similibus affectionibus detento , & diebus etiam a paroxysmo vacuis aliquam pulsus frequentiam de more habenti , offeratur Cortex , eadem ad aliquot dies perstare non possit pulsuum frequentia , quæ priùs aderat , ut illi perstaret , vel sponte , vel aliâ quavis arte sanato ; verùm illam eandem frequentiam citiùs evanescere continuato usu Febrifugi ,
quàm

quàm si aliter fuerit curatus Æger, non semel quoque compertum habui. Cæterum si Febris ante assumptum Corticem perfectè intermittebat diebus a paroxysmo vacuis, quomodo sublato per Corticem paroxysmo, cæterisque in suo statu relictis, poterit ipsam occupare intermissionis diem Febris depulsa? Aliud sanè docet nos Praxis, aliudque docuit ipsum Cl. Auctorem. Si enim Febres ab assumptâ Chinâ Chinâ non recessisse, nec verè fugatas esse observasset ille in Ægris suis, neque ad veram, & perfectam apyrexiam pertigisse, sed concentratas cubasse, & corpus tacitè depavisse, ut in hoc Paragrapho videtur monere Nepotem, & in §. 27. alios Medicos; dubio procul non dixisset in Orat. Jatrici Argumenti, *Febres, quæ de Intermittentium familiâ sunt, exigui hujusce pulveris haustu etiam penitus aboleri*: item eundem Peruvianum pulverem *Febres, saltem recurrentes, & intervallatas fugare, & exterminare*, ut qui verè datus est nobis *ad malè natam Febrium sobolem exterminandam &c.* quemadmodum in Collatione textuum lit. D., & E. F. G. potest facilè quilibet intueri.

(b) (*A Doctissimo Ettmullero &c.*) Ettmullerum, cujus auctoritate hîc liberaliter nimis abutitur Vir Cl., videbimus in responsione ad §. 35. dicentem, *Chinam Chinam esse Remedium egregium, feliciter* (nota illud *feliciter*) *curans tam Quartanas, quàm Tertianas Febres etiam duplicatas, seque verissimum arbitrari, hunc Corticem fugare* (nota quoque istud *fugare*) *suo usu quasvis Intermittentes; nec has solum &c.* An hæc cohærere possint aliis, prout jacent in hoc Paragrapho, per Virum Cl. adductis, judicet interim Lector, usquequo germana omnia Ettmulleri sensa, in citato §. 35. a nobis aperienda, & ad trutinam expendenda, clariùs intueatur.

(c) (*Remedii loco &c.*) Febrim aliquando remedii vicem supplere posse, in Morbis præsertim Herculeis, cujusmodi sunt Epilepsia, Apoplexia, & alii, nos docet Hippocrates, & experientia confirmat. Atque hisce casibus sicuti Febrium suppressio debet esse suspecta, ita potest esse optabilis illarum inopportunè depulsarum reditus, ut ipse in Tractatu meo pag. 161. historiâ I. observavi: idque semper asseram, quotiescunque Febris habeat characterem *Depurativæ*. Dicam scilicet, illam per nullum Specificum Antifebrile, quod eandem valeat ejicere (quodque præter Chinam Chinam nullum est adhuc) posse fugari sinè metu aliquo erroris. Dixi *sinè metu*, aut *suspensione* erroris, aut damni, non *sinè certitudine*: plerumque enim, ut paulò superiùs annotavi, Febres quasdam Intermittentes mihi contigit observare, ab ignaris Empyricis hoc remedio absque ullâ indè ortâ noxâ fugatas, quas ipse in quibusdam saltem circumstantiis, præsertim temporis, eo tunc remedio non attigissem. Quamvis enim aliquid audaciæ subsit in hisce casibus; si tamen vivida sit Fluidorum crasis, motus eorum liber, moxque cribrationes, ac secretiones adamussim peragantur, sæpissime probè subigitur, aut expellitur Fermentum illud, quod minùs castigatè fuit in statu cruditatis absorptum. Etsi verò in hujusmodi tantùm suppressione audaculâ, & amethodicâ optandum fortasse nonnunquam sit, ut revertatur Febris; quando tamen methodicè illa depellitur, non est

cur eandem votis adeò ardentibus revocemus. Neque idcirco vidimus adhuc votivas Tabulas pro Febris reditu in Templis nostris appensas.

S. 26.

(a) **N**ovi olim Nobilem Virginem in Monasterio S. Magdalenæ Mutinæ educatam, cui duplici tertiana spuria correptæ, & ad mensem integrum decumbenti, facta aliqua purgatione, aliisque solitis remediis, Peruvianum Febrifugum exhibere constitui, sed non sine alterius Medici consilio. Vocato itaque ad consultandum D. Antonio de Abbatibus, & exposita morbi historia, Chinam Chinam proposui, ut unicum remedium ad febris pertinaciam debellandam, seu aliquot dierum vacationem à tam diris paroxysmis obtinendam, at ille modeste tamen ac humaniter pro more suo professus est huic remedio se assentiri non posse, rationibus, & (b) *experimentis à se habitis*, ast ego tandem ab ipso obtinui, ut assensum præstaret, sed non ex animo, ut reor; propinata itaque Chinæ Chinæ potione ad aliquot dies, paroxysmi oblitterari visi sunt, sed Nobili ægrotante pejus se habente, in summum mœrorem, & anorexiam prolapsa, quare mihi in votis erat reditus febris ad priorem statum, sic ad menses integros decumbere in lecto coacta est, ut de illius salute non parum timeretur, è Monasterio tandem educta, & apud suos liberaliori vitæ comissa, longum post tempus convaluit.

(a) (*Novi olim &c.*) **H**istoria hæc a quinque retro lustris non-nisi ob inopiam petita, imò & repetita, est illa eadem, quam in Constitutionibus Epidemicis Mutinensibus habet Auctor Cl. pag. 42. Edition. Mut., pag. verò 57. nuperæ Patav. Edit., etsi aliqua in narratione novissimâ hujusce Dissertationis observetur a prioribus diversitas. In Constitutionibus siquidem tam primæ, quàm secundæ impressionis dicitur oblata China China *in formâ boli, cum in Vino infusam Ægra respueret*: neque ibi fit ulla mentio de repetitione remedii; & quidem appositè ad ejus ævi praxim; tunc enim apud nos nondum erat in usu, Febrifugum istud ad plures dies

dies exhibere. In hac verò Dissertatione aliter factum asseritur, *propinatatâ* videlicet *ad aliquot dies Chinæ Chinæ potione*. In aliis quoque variat narratio; imò & discrepat nonnihil, quæ in Mutinensi editione Constitutionum Epidemicarum reperitur, ab eâ, quæ modo legitur in Patavinâ Editione ipsarum Constitutionum: in hac enim Domino quondam Antonio de Abbatibus Dignitas Archiatri Serenissimi Ducis Mutinæ, quæ viventi a Cl. Auctore in illis officiosè tributa fuerat hujus historiæ occasione, adempta est, dum recuderentur, extincto. Sed hæc rem nostram non ita immutant, quin stet propositum Viri Cl., quòd nempe post Chinæ Chinæ usum Ægra illa pejùs habuerit, sive ad longum, ut in Dissertatione dicitur, sive ad modicum tempus, ut in Constitutionibus Epidemicis. Ast quomodocunque hæc fuerint, quomodocunque Febrifugum fuerit oblatum (certè tamen semel) qualiscunque fuerit jam Ægræ status, qualiscunque Febris illius, diuturnioris licèt, natura, & qualescunque Causæ peculiariter illam producentes, concomitantes, atque foyentes, mihi quæ Ægram licèt non invisenti, magis fortasse notæ, quàm Cl. Auctori, hac in re (si liceret cuncta persequi) non parum decepto: posito nihilominus, quòd omni cautelâ circa singula hæc adhibitâ, fuerit Cortex parum feliciter propinatus, subsequente videlicet laboriosâ, difficili, serâque, ac diutinâ, ut hîc asseritur, convalescentiâ, non tamen morte, quid indè propterea? Nunquid deterior multò fors Ægrotantis evasit? Nunquid alia Remedia *ad mensum integrum* priùs administrata, inter quæ dubio procul *Febrifuga Veterum*, *causam Febris*, ut asserit Vir Cl., *sensim exantlantia*, profecerant plurimum? Nunquid ergo sinè Cortice feliciùs convalescisset *atam diris*, ut Auctor inquit, *paroxysmis* eâ Constitutione, quâ (ut adnotat ille pag. 15. earundem Constitutionum Edit. Patav.) *nunquam visæ contumaciores Febres*, *ad recidivandum magis pronæ*, & *quæ magis Medicorum industriam eluderent*? *siquidem* (sequitur) *nec repetitæ phlebotomiæ, nec purgationes, nec mille Alexipharmaca* (en hîc involuta Febrifuga Veterum) *quæ pleno gutture tanquam manus Deorum, Receptariorum Chorus adeò celebrat, quicquam profuere*. Adeò igitur mirum non est, in tam pervicaci Constitutione morbosâ reperi tam esse Adolescentulam, cui fortè uni opem cæteroqui consuetam Cortex non tulerit, quando id nonnunquam, rarò licèt, accidere, atque ob idipsum quoque, rarò me in benignis Intermittentibus, persæpe *Depurativis*, Corticem eundem præscribere consuevisse, apertis literis prodidi, allatoque simul Exemplo confirmavi in Therapeutice meâ a pag. 147. usque ad 149. Verùm quid multis? Tutela Chinæ Chinæ semel a Viro Cl. improspere, forsan & improprie oblata, quid ad me?

(b.) *Experimentis a se habitis &c.*) Ornamentum postremæ huic narrationi superadditum esse crediderim, non quidem quòd Aulicus quondam Professor iste oblacioni Peruviani Corticis nonnihil obstiterit, ac *minimè ex animo assensum suum præstiterit*: etenim & ille, & reliqui ferè omnes Mutinenses Medici, præsertim Seniores eorum temporum, usui illius quammaximè reluctabantur, ut dixi jam in Thera-

peutice meâ pag. 4. ; sed Mantissa quædam colorata est, quòd obstitit non solum rationibus, verum & *experimentis a se habitis*: tantum enim abest, ut ulla, sive fausta, sive infausta de hoc Febrifugo ille habuerit experimenta, ut certò sciam, ipsum, qui sympatheticas potius curationes in deliciis habebat, aliquando nugatoriam Febrium transplantationem in perterebratos Arborum Cortices tentare maluisse, quàm implantationem (liceat nonnunquam vocabula condere) hujusce Corticis in Corpus humanum.

S. 27.

(a) **H**ic nimirum Medicorum est error, ut si Chinam Chinam in hunc solum finem præscribant, ut paucos à paroxysmis dies liberos obtineant, (b) *interdum eludantur*, febre amplius non redeunte, sed tacite corpus depascente; non absimiles casus alias mihi contingere, ut me pœnituerit hoc remedio usum fuisse. Rem felicius cessisse annotavi quibus post aliquot paroxysmos febris denuo caput erexit etiam ferocior, quàm quibus febris visa est prorsus extincta, & oblitterata, seu parva subsecuta.

(a) (*Hic nimirum &c.*) **Æ**Grè admodum cavere poterunt Medici dici ab errore, a quo nequivit ita cavere Vir Cl., quin illum ob id pœnituerit, hoc remedio se usum fuisse, ut subdit in contextu. Sed tunc fortè nondum advenerat tempestas, quâ maturescunt Ficus, ut *Ficu* febriferâ *Pharaonis* præscriptâ, de quâ §. 38., posset errorem corrigere, depulsamque Febrem iterum revocare. Cum itaque in Medici potestate non sit, præcipere Febri discessum eâ lege, ut postliminio brevè revertatur: neque *Ficubus Pharaonis* queat illam vel invitam cogere rursus ad reditum pro libito suo; non aliud agendum supererit, ne Febris ipsa *in apertam denuo flammam renuens erumpere*, corpus tacitè depascatur, nisi abstinere prorsus ab oblatione Febrifugi, etiam *ad impetrandas inducias, & ad virium reparationem*; quod cæteroqui faciendum docuit Cl. Auctor §. 8., & magis adhuc expressè docebit §. 48. absque ullâ formidine erroris. Atque ideo, vel præceptum Viri Cl. de Chinâ Chinâ exhibendâ *ad impetrandas aliquot dierum inducias, & ut recreetur æger, viresque resumat*, planè corruat necesse est, vel nullus sit error Medici id remedium in ejusmodi finem præscribentis, etiamsi febris vim sibi illatam in recessu indignata, votis eam reducem exoptantibus minimè auscultet.

(b) (*Interdum eludantur &c.*) Præscribant ergo Medici Chinam Chinam, repetantque opportunè in eum potius finem, ut, si fieri possit,

fit, Ægros, non *ad tempus tantum*, sed *jugiter* a paroxysmis liberos reddant: sic enim *non eludentur a Febre amplius non redeunte*. Sed præscribant *tempestivè*, regulisque ac cautionibus debitis; itaut non usurpent, nisi *Ubi, Quando, & Quomodo* decet, ut in Therapeu. meâ pag. 348., & alibi. Si ita se gerant, nunquam eos pœnitebit, se fuisse usos tam strenuo Febrifugo: pœnitebit potiùs post rem prosperè gestam tam serò uti didicisse. Tunc & Ægri sibi *rem feliciùs cessisse* dignoscant, nec *tacitè se depastos* a Febre suspicabuntur (quomodo enim se depastum suspicabitur a febre qui, ut nuper fatebatur §. 25. ipse Cl. Auctor, eâdem *Silente per Chinam Chinam febre reportat robur?*) non suspicabuntur, inquam, se depastos a febre, sed sibi rem longè feliciùs cessisse dicent, si ea vel *non revertatur amplius*, vel saltem nonnisi *mitior, ac parva*, quàm si *ferocior caput extulerit*. In primo etenim casu illam fuisse a Febrifugo opportunè mulctatam, sensu ipso experientur; in altero minùs opportunè; absque eo quòd alienum, & quidem satis paradoxum, de rebus suis iudicium exquirant. Neque enim homini Chinâ Chinâ sanato, qui jam, ipso notante ut supra, Cl. Auctore, *roboris aliquantum reportet in dies*, opus esse crediderim consulere Oracula, & trepidanter quærere, sit ne sibi melior continuata sanitatis possessio, an relapsus in Morbum.

§. 28.

(a) **D**ominus Augustus Quirinus Rivinus Scriptor recens, in suo Libro Elegantissimo Medicarum Dissertationum, Typis Lipsiensibus anno 1710. edito in Dissertatione de Febribus Intermittentibus, eos sugillat, qui postquam aliquo specifico febrem propulsatam videant, ut illam amplius non esse redituram prædicent, sibi plaudunt, & gaudent, ait enim *Medicos quosdam gratulari, quando ægrotantes è charibdi in Scillam deduxerunt, idest febrem feliciter profligarunt, ægro interim vel contabescente, vel intumescente ab humoribus pravis, atque hydrope, & paulo post mentione facta de Veterum Febrifugis, qualia sunt Centaurium minus, Absinthium, Carduus Benedictus, radix Gentianæ, & alia hujuscemodi quorum usum commendat, hæc subdit verba. (b) Idem hoc de Cortice Peruviano Gannaperide, vel ut alias vocatur China China, censeo, ut pote qui præ cæteris amaris, aut Febrifugis revera nihil peculiare, aut tanta laude dignum præstet. Certe sive*
genui-

genuinum , sive adulteratum sit , quod venditur , ab ejus usu interdum quidem febrem aliquando delituisse , seu plerumque subsecutam pejorem recidivam , in aliis & frustraneam , & nocivam extitisse .

N Il minùs me terret ratione satis , & experienciâ munitum , sed me simul nil magis angit , quàm Auctoritate impugnari . In id nanque discriminis non semel adducor , ut Scriptoribus omni honore , ac existimatione cæteroqui dignissimis , ullo pacto hac in re nequeam subscribere : imò cogar , impellente me notâ nimium veritate rei , non modò contrariis aliorum illustrium Virorum adductis testimoniis eos refellere , verùm & iis memetipsum fidenter opponere omnium infimum , sed fortasse præ multis expertum . Puderet me sanè cum quocumque tantâ decertare fiduciâ , si de subtili quapiam doctrinâ lis ageretur ; sed ubi disquiritur factum , quæ de illo sum millies expertus , ingenuè referre , & adversus Opponentem quemlibet constanter sustinere haud erubesco . Ob id penès me nulla auctoritas in hac materiâ experimentali magni penditur , nisi ab Auctore illa proficiscatur , qui per quatuor saltem , vel quinque lustra hoc remedio liberaliter sit usus . Atque ob id ipsum in Tractatu meo inter tot Auctores huic Febrifugo usque ad excessum addictos , paucos selegi pro Antesignanis ; eos nempe , qui longam , crebram , & rationalem de illo experientiam nacti fuerunt ; relictis tot aliis , qui , quamvis miranda prædicent , forsan toto Praxeos illorum decursu vigesies Antifebrile istud non præscribere . Quod de Auctoribus faventibus assero , multò magis assero de adversantibus ; quos inter impossibile ferè crediderim numerari quemquam , qui pluries , ac pluries , ut opus esset , Febrifugum istud administraverit . Atque id duplici quidem de causâ : primò nempe , quia possibile verè non est , hujusmodi Pharmaco crebrò uti , & crebrò falli , saltem ut de noxâ possit meritò quis suspicari , nisi præter rationem prorsus utatur : secundò , quia credibile non est , quòd Vir honestus , ac probus , qui semel , bis , aut ter eodem usus , quacunque demum de causâ , quantunvis irrationabili , sed sibi apparenter verâ , umbram non levem suspicionis admiserit , audeat remedium sibi suspectum deinceps præscribere , atque , ut cæteroqui expediret hoc casu , ulteriùs experiri , suâ jam satis suspicione occupatus . Atque hæc præmississe lubet , ne posthac Lector nimiam mihi facile imputet in rejiciendis oppositis auctoritatibus confidentiam ; licèt hanc quoquè omni , quoad ariet veritas , modestiâ me ubique temperaturum pollicear .

(*a.*) (*D. Augustus &c.*) Jam verò objicitur mihi statim auctoritas *D. Augusti Quirini Rivini* , *Scriptoris* , spectatâ saltem Libri impressione , *recentis* ; quæ quidem qualitas non parvi facienda in casu nostro . Etenim (ne vel hoc ipsum subdiceam) Auctores ferè omnes , quantunvis famigeratissimi , qui ante annos plus minùs viginti quid finistri , quidve suspecti de hoc Cortice sibi tunc haud satis noto scribere ; cùm scilicet nondum universalia , ut modò , peracta erant de illo

illo experimenta felicia ; mirum non est , si solo ducti conjecturarum suapte naturâ fallacium , & rariorum , incertorumve successuum lumine id egerint , suisque in Scriptis mistas identidem laudibus exceptiones , aut suspiciones quasdam protulerint , accuratiori Posterorum indagine discutiendas . Persæpe quoque absque ulteriori veritatis scrutinio *ad unius Cuculi cantum cecinere plures* : quo dein factum , ut etiam hodie remedium istud egregium damnent nonnulli tantummodo *in Fide Parentum* , aut ad modulum sui captus ; cum tamen , si eis invisendum detur , futurum sit fortasse , ut illud ægrè internoscant a Cassiâ , vel Cinnamomo . Ut igitur redeam ad recentem Scriptorem , cujus Librum , ob locorum distantiam , nondum est datum posse mihi tam facile comparare , omisso illius priore Textu generali , qui nec de *Chinâ Chinâ* , vel alio *Specifico* Febrifugo quicquam loquitur , neque me (quoscunque fugillet) ullo pacto afficit , cum de qualibet præposterâ Febres pellendi methodo possit intelligi , sive id fiat per insigniter evacuantium , refrigerantium , aut humectantium abusum , sive per exuberantem sanguinis effusionem , sive aliâ quavis viâ minùs laudabili , omisso inquam hujusmodi Textu , quippe Corticem Peruvianum usque adhuc minimè improbante , ad alterum me converto magis specialem , usuique hujusce Febrifugi minùs faventem : siquidem misellus hic Textus , qui per omnes errans Grammaticæ Regulas undique claudicat (luxationem , ut reor , passus , dum dimotus e sede suâ) graviore insuper vitio aliquo non laboret .

(b) (*Idem hoc &c.*) In hoc Textu cum statim ambigat Scriptor ipse , *an adulteratus sit , an genuinus* , qui *Lipsiæ venditur Peruvianus Cortex* , omnino dicendum erit , ut mos eidam geratur , Corticem illum adulterinum esse , non quidem ob facilem Febrium recursum , quæ post assumptum etiam quandoque germanum Corticem solent recurrere , nisi diutiùs ille usurperur , ac repetatur ; imò etiam nonnunquam , rariùs licèt , quamvis & continuetur , & repetatur usus illius , ut falsus sum in ipso Tractatu meo : sed adulteratum suspicabor ex hoc solùm , quòd ille *præ cæteris* , ut inquit , *amaris , aut Febrifugis , qualia sunt , Radix Gentianæ , Centaurium minus , Absynthium , Carduus Benedictus &c. revera nihil peculiare , aut tantâ laude dignum præstet* . Hic ergo cum non ausim , quasi Corchorus inter Olera , cum Professore Botanicæ , qualem agnosco D. Rivinum , de re Botanicâ disputare , quæram saltem , num tanti sit apud ipsum Rivinum Ramazzini auctoritas , quanti est apud Ramazzinum auctoritas Rivini . Si pari utrinque , ut reor , passu procedat res , dicam statim ex Cl. Ramazzini effato , ut in *Collatione* aliàs citatâ lit. B. , Chinam Chinam , nedum vulgarium antifebrilium , cujusmodi sunt Gentiana , Absynthium , Centaurium &c. , sed & *Alexipyretorum omnium , quotquot excogitavit Antiquitas , aut Chymicorum solertia conflavit , esse facile Principem* . Cum verò hoc ipsum Judicium suum in præsentî Dissertatione retractare , aut revocare studeat idem , qui protulit Cl. Ramazzinus , appellare demum liceat ad supremum Tribunal universæ Reipublicæ Medicæ , instando enixè , declarari communibus Medicorum Febri-

Febrifugum hoc expertorum suffragiis, an *sincerus*, & *genuinus* Peruvianus Cortex in sistendis, & statim, & semper, Febrium Intermittentium paroxysmis, præstet revera aliquid peculiare *præ cæteris amaris*, aut *Febrifugis* superiùs recensitis. Proh magna Europæorum Mercatorum cæcitas, qui ex Americâ Chinam Chinam ad nos asportant, cum satius foret, Absynthium, & Centaurium nostrum ad Americanos devehere! Quòd si ad Posteritatis Tribunal Causæ hujusmodi examen placeat prorogare, nullus dubito, quin decantatis Veterum Febrifugis cum Chinâ Chinâ collatis id sit eventurum, quod olim Cristis Gallinaceis in Pavonis Caudam velitantibus contigisse, falsè fabulatur Cælius Calcagninus in suis Apologis. Cum enim illæ in summo capitis fastigio prominentes, Pavonis Caudæ insultarent, quòd *postremissimo loco* nata esset, scopæque instar terram verreret; *Respondebo his*, inquit illa, *quum vos pallidulæ, ac ætate exesæ, e militari cono me hostibus minitatem suspicietis*. Sed ad nos iterum.

Evincit quoquè, Chinam Chinam, quæ Lipsiæ venalis prostat, *sinceram* non esse (quod suspicatur & Langius Professor Lipsiensis) evincit, inquam, idipsum assertio altera ejusdem D. Rivini, nempe, a Peruviani Corticis usu *interdum tantum*, & *aliquando Febrem delituisse*: in aliis illum, & *frustraneum*, & *nocuum extitisse*; bono enim, & germano assumpto Cortice, si depulsa Febris dicatur etiam solùm *delitescere*, id saltem non contingit *interdum*, sed *semper*; adeòque in hoc sensu nec evadit ille unquam *frustraneus*; dummodo Febris sit, vel Intermittens, vel de Intermittentium profapiâ, quod omnino requiritur. De *noxâ* verò, quæ nonnisi ab usu præpostero, ut diximus, potest procedere, loqui ampliùs planè detrecto. Revera ut hæc omnia, quæ obtruduntur, queant subsistere, non aliud conjectare licebit, nisi quòd hic Scriptor loquatur promiscuè de Febribus omnibus, tam continuis, quàm Intermittentibus: quo solo casu plura ex dictis poterunt haud difficulter admitti. Nec forsitan emendicatam quis dixerit istiusmodi conjecturam; quandoquidem §. 35. hujusce Dissertationis ex Cl. Ramazzino habemus, absque eo quòd aliunde quæramus, in Actis Lipsiensibus improbari usum Chinæ Chinæ, in Constitutione quadam Uratislaviensi anno 1699. universaliter adhibitæ (& quidem perperam) ad *Febres Continuas populariter grassantes*. Forsan & illuc respicit hujusce Lipsiensis pariter Scriptoris observatio.

Cæterum cum adducta illius auctoritas, prout jacet, non congruat experientiæ meæ; neque id ego præsumam, ut mihi potiùs, quàm illi acquiescat quivis hoc remedium nunquam expertus Lector (expertos enim jam inter meos connumero) fas sit, omissis tot aliis, qui simul congesti efficiunt, ut *de hoc Remedio jam habeamus Pandectas*, recentem aliquem Auctorem Lipsiensem pro Conciliatore nostro seligere, cujus Scripta approbet, ac magni faciat ipse D. Rivinus. Sit iste celebris Christianus Johannes Langius; cujus Opera Medica omnia, duobus amplis voluminibus comprehensa, edita sunt Typis pariter Lipsiensibus anno 1704: *curante*, ut legitur in fronte illorum, eodem D. Augusto Quirino Rivino Patholog., atque Botanices P. P.; ut nempe sui

conjun-

conjunctissimi Affinis (quemadmodum ipse ad Lectorem præfatur) labores, ac Scripta Cedro digna, & Orbi perutilia commendaret immortalitati. Cum ergo in his Langianis operibus reperiatur Part. 3. Volum. 2. pag. 361. *Disputatio* disertissima *De Chinæ Chinæ virtute febrifugâ*, in quâ quicquid ferme in eam usque diem a diversis Auctoribus tum in approbationem illius, tum etiam in contemptum prolatum fuerat, collectum, examinatum, & discussum visitur ad pag. usque 375.; idcirco ad id saltem me refero, quod in eâ Disputatione adversus Obtrectatores Corticis adstruit Vir ille Celeberrimus: etsi fatear, omnia, quæ in eâ Lucubratione ab eodem Langio traduntur, etiam de favorabilium numero, mihi non semper probari, ut qui suspicor, haud completam sufficienter fuisse defectu temporis Viro illi Clarissimo, anno ætatis suæ 46. vitâ functo, hujusce Febrifugi elegantiorum praxim. Interim saltem, quod nobis præcipuum est, reponere liceat, illa eadem quatuor Amara Febrifuga, a D. Rivino Chinæ Chinæ, non quidem prælata (ut illa huic præfert Cl. Ramazzinus) sed tantum æquiparata, & æquè commendata, nempe *Centaurium minus*, *Absynthium*, *Carduum Benedictum*, & *Gentianæ Radicem*, illa inquam eadem nominatim in citatâ Disputatione a Cl. Langio Chinæ Chinæ ita posthaberi, ut secundum ipsum pag. 372. *His, aliisque*, ut inquit, *hujus generis pluribus Medicamentis Antifebrilibus, quæ ordine recensere nimis esset prolixum, extra controversiam præripiat palmam China nostra Chinæ, dubio sinè ex suâ singularissimâ texturâ &c.*

Tandem quoniam hisce Langianis Disputationibus D. Rivino *Placuit* (ipse sic Lectorem admonet) *in margine breviter annotare, quæ prolixius in contextu pertractantur, ut hoc felicius contenta evolventi, & vel obiter insipienti appareant*, referam ipsius D. Rivini verba, pag. eadem 372. Paragrapho 50. in margine apposita, quæ sic habent. *China Chinæ reliquis Antifebrilibus antefertur*. Antefertur equidem, fateor, a Langio; sed a Langio Practico egregio, Scriptore recenti, D. Rivini Discipulo, illiusque conjunctissimo Affini; atque idipsum patitur, & sponte studet exscribere, ac annotare sinè ullâ limitatione Præceptor ipse D. Rivinus, forsan ut quadam veluti approbatione fortuito appositâ, propriis ipsius verbis lis hæc dirimatur. Quod si denique ipsi D. Rivino Scriptori recenti recentissimum aliquem quis opponendum velit, is legat D. Bernardinum Zendrinum, qui in suo *De Chinâ Chinâ Tractatu*, Typis Venetis hoc ipso anno 1715. edito, sensa ubique profert sensibus D. D. Rivini, & Ramazzini apertè contraria (reliqua ejusdem Tractatus non est quod persequar, aut perquiram curiosus) ne verbum quidem habens de hac Ramazzinianâ Dissertatione, paulò ante Patavii impressâ, & apud Venetos Bibliopolas publicè prostante: indicio manifesto, tam rationes Cl. Ramazzini, quàm auctoritates D. Rivini, & aliorum contra Chinam Chinam allatas, libero huic Scriptori nullum negotium faceßere valuisse; sed exolevisse neglectas.

S. 29.

(a) **U**tilior forsitan esset Corticis Peruviani usus in febribus intermittentibus malignis, si tales ab initio dignoscerentur, observantur enim aliquando tertianæ febres vere intermittentes, sed mali moris & perniciosæ, (b) de quibus *Mercatus* peculiare Caput habet, quales febres Hippocrati non prorsus fuerunt ignotæ, in septimo enim *Epidemiorum* hæc habet verba. (c) *Cholericæ affectiones magis in æstate fiunt, & febres intermittentes, & quibus horrores accedunt, hæc quandoque malignæ fiunt.* In hujuscemodi casu (d) si aliqua pravitatis signa se prodant, quæ ut plurimum obscura sunt, & Medicos fallunt, non alienum erit hujus Febrifugi usum pertentare, periclitari enim oportet, cum morbus periculosissimus est, ajebat Hippocrates.

HActenus conatus est Cl. Auctor ostendere, *amethodicum* esse, & *irrationalem* usum Chinæ Chinæ, *suapte naturâ*, ut inquit, *dolose*, ac suspectæ, tum universaliter loquendo, tum etiam peculiariter in Febribus Intermittentibus, nullam malignitatem præferentibus; in quibus, ut vidimus, non ad curationem omnimodam (quæ hoc remedio obtenta ipso Judice noxia foret) sed ad inducias solummodo aliquot dierum impetrandas, dummodo adsit certitudo de illarum reditu, nonnunquam permittit; dosi tamen satis exili, quippe non repetitâ, imò & in nonnullis tantum, non omnibus usurpandâ *Ægrotantium* generibus. Cuncta hæc ferè ex diametro opponuntur iis, quæ de innocuâ hujus Remedii substantiâ, usu illius, & dosi, ad Febres Intermittentes *non malignas* abigendas, toto primo Libro *Therapeutices* meæ præmissi; ut propterea idem primus Liber scopus unicus hucusque fuerit castigationis a Cl. Auctore in antea actis tentatæ. Huic tamen labori suo forsitan pepercisset, si primam, & alteram tantummodo paginam Libri secundi non renuisset evolvere; ubi apertissimis notis (quod a Lectore velim considerari) me nullatenus repugnantem polliceor cui-libet, qui in *benignis* Intermittentibus Peruviani Corticis operâ uti recuset: cum eo Febrifugo ipse quoquè in iisdem Intermittentibus non admodum frequenter utar, quippe pro *Depurativis*, seu *Perfectivis* sæpius a me habitis.

Enimvero etiam si contendere velit Cl. Auctor, vel alius quispian, solam effervescentiam febrilem etiam periodicam, esse instrumentum

mentum *unicum* depurationis Fluidorum; atque hanc depurationem esse jugiter a Naturâ, pauco adminiculante remediorum apparatu, nobis expectandam, usquequo saltem magnum non superveniat, impendatque periculum: adeoque *nullum* unquam esse locum, hac semotâ conditione, oblationi cujusvis *Specifici*, quod citò paroxysmos sistat absque crisi valde copiosâ, & palam sensibili (cujusmodi nullum adhuc præter Chinam Chinam repertum est) ego sanè ita sentientem nullo pacto refellere aggrediar, quantumvis forsan rigidè nimis sentientem. Neque me ab hoc proposito dimoveret quispiam alius, qui minimè innixus hujusmodi ratiocinio, haud planè forsitan contemnendo, sed quavis ineptâ, aut futili motus ratiunculâ, hoc ipsum tamen in re faciendum vellet. Etsi enim id rigorosè semper exigere in praxi, sæpe non cedat in proximi utilitatem; neque tamen cedit in evidens, & gravissimum damnum illius, ut contingit, quoties quis in periculo, & certo, & gravi, *certum* pariter hujusce Febrifugi a Deo dati spernit auxilium. Cuilibet propterea, qui duræ adeò cervicis non sit, ut in extremâ etiam angustîâ Remedium istud ablegandum judicet (iis videlicet in Febribus, iis in circumstantiis, eâque Methodo adhibitâ, de quibus abundè in Tractatu meo) cuilibet inquam hæc, quæ putarim negari non posse, facilè admittenti, etsi in reliquis dein omnibus adversanti, absit, ut unquam succenseam, ut qui nullam hinc assertis meis, saltem potioribus, injuriam, nullumque grave (quod majoris momenti est) Praxi Medicæ damnum fateor inferri.

Sola itaque oppugnatio *Methodi* meæ in *Perniciosis* a me descriptis evulgatæ, sola inquam hæc, si fortè a Viro quopiam existimatione digno (quod vix crediderim posse contingere) tentaretur, potis esset me commovere nonnihil; nullius tamen impugnatoris, utut Celebris, rationem haberem, nisi se profiteretur satis expertum: qui autem ritè expertum poterit se profiteri, rationem impugnatoris habere nequibit. Pro usu verò qualicunque alio Peruviani Corticis in *vulgaribus* Intermittentibus, pro quarum curatione nil ferè speciale prodidi, quod a pluribus ante me non fuerit annotatum; nec ea mihi propensio est, nec illud otium, ut velim decertare, & Causam, quam cum tot Viris pari voto mecum sentientibus habeo communem, mihi uni advocare. Atque ideo si intrâ hosce cancellos substitisset, ut hætenus substitit, Cl. Viri dissensus, omnes profectò illius, etsi alicubi valde peculiare, ac acerbiusculas animadversiones tulissim tacitus; verùm eas jam usquequaque ad nimietatem exuberasse, in bonæ simul praxeos, & veritatis detrimentum; atque ita quidem, ut tantum qui stertit non videat, paulò infra clariùs patebit. Quod autem palam cœpit

Omibus & Lippis notum, & Tonsoribus esse,

id certè a me citra quoddam dedecus ampliùs dissimulari non poterat. Et porrò dissimulare religioni mihi ducerem, cum publica potiùs res agatur, quàm mea; nec exinde minùs quàm existimatio mea, periclitetur Reipublicæ utilitas. Jam verò his interjectis pro Lectorum pleniorè notitiâ, Animadversionum Cl. Auctoris, simulque Responsionum mearum filum resumò.

(a) (*Utilior forsā &c.*) In hoc Paragrapho Vir Cl. tertii præcipuè Libri Therapeutices meæ, quippe potioris, asserta quadantenus infirmare aggressus (id enim ex asse conficere haud ita planum) progreditur ad expendendum, quem locum in Tertianis Intermittentibus *Perniciosiss* a Mercato descriptis, queat habere Peruvianus Cortex. Atque hic, priori depositâ severitate, duo admittit non exigui ponderis; unum quidem absolutè, alterum conditionaliter tantum. Quod absolutè concedit, est, Febres Tertianas *malignas*, & *Perniciosas* a Mercato descriptas esse *verè Intermittentes*, itaut (quemadmodum subdit §. sequenti) *ad perfectam apyrexiam deveniant*. Mirum autem visum est mihi, quod Cl. Auctor admittat, Febrem adeò ferocem, quæ heri hominem pessimè exercuit, & cras est nedum reversura, sed & eundem statim interemptura, hodie illum planè dimittat, *nec concentrata tacitè cubet*, *nec corpus illius tacitè depascatur*; cum omnia hæc mala contingant, neque *unquam amplius homo ad veram, & perfectam apyrexiam pertingat* ex Cl. Auctoris effato §. 25., & 27., quoties Tertianæ Febris *benigna* curatur Peruviano Cortice, post duas tantum hebdomadas forsitan reversura, & facilè iterum recessura. Alterum, quod conditione appositâ admittit pariter Vir Cl., est, Febrifugum istud *utilius forsā* (nec enim certò) esse posse *in Malignis Intermittentibus*, *si tales ab initio dignoscerentur*. Addo ego, & *etiamsi tales ab initio non dignoscerentur*, sed Medicum fallerent; dummodo in illâ ipsâ accessione, quâ tandem dignoscuntur, Æger non pereat, sed in alteram accessionem prorogetur illius vita, utut frigidus, & arteriarum pulsu fere omnimodè destitutus, expirare videatur: in his enim quoque circumstantiis ille, ferè dixerim certò, Chinâ Chinâ secundum Methodum meam oblatâ restituitur. Imò sæpe etiam, etsi non tam certò, restitui poterit solâ usurpatâ Mortoni Methodo, qui Febres hæc in extremum, quod modò diximus, discrimen hominem adducentes, graphicè describit, & Chinâ Chinâ non rarò feliciter curat, ut videre est, tum apud ipsum, tum Lib 2. Tractatus mei pag. 247., ubi Caput peculiare istius Auctoris recusum visitur, & Scholiis meis additis etiam ulteriùs dilucidatum. Quod ejus Methodo in usum ductâ potest *sæpe* contingere; meâ similiter adhibitâ solet contingere *semper*, aut ferè *semper*. Experiantur ter saltem, aut quater increduli, dummodo ingenui; meque tunc, si tanta illos teneat fiducia, mendacii redarguant. Quod si eas *ab initio* per sua signa, perque suos peculiare characteres *dignoscendas* velit Cl. Auctor, ut curationi suscipiendæ fiant opportuniore; id ex professio me per extensum scio tentasse haud oscitanter, forsā & integrè præstitisse, Cap. primo Libri 3., Mercato præsertim, & Mortono præeuntibus.

(b) (*De quibus Mercatus &c.*) Mercatus itaque non *unum peculiare Caput* habet de hujusmodi Febribus, sed *multiplex*; illiusque Tractatulus de hac materiâ verè aureus est, ac utilissimus, etsi non admodum comptus: adeoque plurimis philologico ornatu luxuriantibus longè antefendus. Primus ille fuit, qui ferocissimas hæc Febres observavit; exactissimè secundum varias illarum species descripserit, ac
pro more

pro more suorum temporum peculiariter curare docuerit . Et tamen incuriosa Posteritas nullum indè traxit emolumentum ; adeòut major Scriptoribus omnibus fuerit sollicitudo scribendi quodammodo ad pompam , ne dicam ad Lectoris stomachum , de *benignâ* Intermittente Tertianâ , quæ neminem , quousque talis manet , tollit de medio , quàm vestigiis Mercati inhærendo , quidquam scribendi de *Perniciosâ* , & ex se ferè semper lethali . Excipe Lector Mortonum , qui de Mercati Scriptis , ut licet conjicere , minimè conscius , propriâ nihilominus observatione easdem Febres (minùs dilucidè quidem) exposuit ; quodque laudandum magis , feliciter curare docuit Peruviano Còrtice , rebus etiam in præceps lapsis , liberaliter oblato . Utriusque Auctoris scripta circa hanc mäteriam habes recusa in Therapeutice meâ Speciali , Scholiisque meis haud planè forsan inutilibus adaucta : quæ simul omnia secundum Librum constituunt ejusdem Operis , ut nuper innui .

(c) (*Cholericæ affectiones &c.*) Textus hic Hippocratis a Cl. Ramazzino allatus quasi quid peregrinum ; ille idem est , quem primò observavit Mercatus , bisque de eodem meminit , Vallesii simul expositionem indigitans . Ego & Textum a Mercato citatum , a Cl. verò Ramazzino nunc recitatum , & ipsam Vallesii expositionem in Scholiis adduxi . Cuncta videsis apud me , primò pag. 196. , secundò pag. 213. , tertio pag. 218. & 219. Sed hæc forsan , utut repetita , debiliorem Viri Cl. obtutum subterfugere .

(d) (*Si aliqua &c.*) Tandem fatetur Cl. Auctor , in hisce Febribus , *si aliqua pravitatis signa se prodant , quæ ut plurimum obscura sunt , & Medicos fallunt , non alienum esse* (rectiùs dixisset , necessarium esse) *hujus Febrifugi usum pertentare* . Hæc una confessio mihi sufficeret , nisi ea statim infirmaretur ab exemplis per eum allatis ; quodque pejus est , commentitiis . Sed de his quàm mox . *Non alienum* itaque putat ille uti Chinâ Chinâ in Intermittentibus Perniciosis , *si aliqua pravitatis signa se prodant* : cum verò istiusmodi signa , ut inquit , *obscura sint , & Medicos fallant* , Thesis vix statuta statim vacillat . Saltem (fidenter subdam) obscura non erunt signa pravitatis , cùm Æger in angustiis supra recensitis constitutus , non finè maximâ difficultate febrilem paroxysmum incipit vix vivus transigere . In hujuscemodi casu , ni priùs dignota sit Perniciosa Intermittens , offeratur a curante Medico Peruvianus Cortex ; sed , bonâ veniâ Cl. Auctoris , non ad drachmam unam , vel duas (neque tamen ad uncias , & uncias) exhibeatur : eâ siquidem pusillâ dosi præscriptus , nec citò dein , ac pluries , saltem ad Mortoni , vel Sydenhamii mentem repetitus , id aget solummodo , ut Vir Cl. possit jure , ac verè testari , quod nonnisi declamando testatur Paragrapho sequenti ; *paucos nempe qui evaserint , sibi fuisse observatos* . Secùs verò fiet , si exhibeatur idem Cortex Methodo validiore , sed congruâ , & rationali , qualem in Therapeutice meâ docui Cap. 3. Lib. 3. , felicemque jugiter per plurimis Exemplis ostendi .

S. 30.

MEmini me vidisse Mutinæ variis temporibus Constitutiones quasdam tertianarum febrium intermittentium, sed malignarum, quæ tertia quaque die suas habebant accessiones cum rigore & horrore, & more solito per sudorem fiebat solutio, ut ad perfectam apyrexiam devenirent, sed quarta, aut quinta accessio tanto rigore invadebat, ut ægri non amplius incalescerent, concentrato pulsu, ac toto corpore perfrigerato, nec multo post interierint. In tam gravi, ac subita tempestate Medici tanquam è gravi somno exciti, cum antea super utramque aurem, ut dici solet, obdormirent nil tale expectantes in febribus, quæ cum frigore, & rigore accederent, absoluta infebricitatione postmodum subsequente, tumultuarie ad sacram anchoram Chinæ Chinæ ad uncias in vino infusæ confugiebant, sed incassum, paucos enim evasisse observavi.

(*Memini &c.*) **M**Emini & ego quod meminit Vir Cl., varias scilicet Mutinæ contigisse Constitutiones Perniciosarum Intermittentium, quæ non eâ solùm, quâ narrat viâ, sed valde multiplici, in Tractatu meo ordinatim expositâ, Ægrotantes non paucos *ante repertam Methodum meam* (id namque addere necesse est) *Peruviano Cortice penitus intentato*, trahebant repenti, ac inopinatò ad interitum. Sed simul memini, debuissetque & ille meminisse testis de visu, plurimos alios ejusdem generis Ægrotos, ne dicam omnes, eâdem Methodo curatos, ocysimè pariter, ac inopinatò *evasisse*. Saltem quot vidit ille Perniciosis hujusmodi Febribus laborantes, quibus ego meam Methodum adhibuerim, tot vidit repenti restitutos; pereuntem verò neminem. Et siquidem ullus sinceræ Inductioni locus concedatur, nonne vidit ille me duodeviginti abhinc annis, cum mihi graviter decumbenti tam humaniter adstitit (medicas enim manus nobis invicem pro re natâ præbebamus adjutrices) nonne inquam vidit, post latam a memetipso, atque ab eo citra dissimulationem admissam de imminente meâ morte sententiam, epoto, dosi quidem maximâ, unoque haustu, ad sex videlicet usque Drachmas Peruviano Cortice, omisâ postmodum consultò repetitione Remedii, ab Orci faucibus illicò ereptum, ut fusè in Therapeutice meâ pag. 424. atque ita quidem ereptum, ut ab eo tempore (superato videlicet novo Febris insultu

insultu, quem tunc præcavere non libuit) firmiorem ac antea in hanc usque diem traxerim valetudinem? Nonne pariter alios Ægrotos inspexit hujusce ordinis, quandoque etiam mihi socius in curatione, eodem remedio statim sanatos, nec ullo amplius morbo tentatos? Hujusmodi sortem faustissimam experti sunt, tum Æger ibidem a me descriptus pag. 181., anno videlicet 1695. usu Corticis Peruviani, Viro Cl. tunc facile consentiente, curatus; tum alter eodem remedio, me præscribente, ipso verò desperante, restitutus anno 1707., de quo pag. 562., & adhuc vegetus, etsi jam senex: ut plures omittam, de quorum Ægritudine, & curâ omnimodam pariter certitudinem habuit, quamvis ad eos invisendos verè non accesserit. Ast hæc narrantur, & narrata sunt a me; fortassè verò non admitterentur (inquiet aliquis) a Cl. Ramazzino, si respondere potis esset. Scripta sunt a me (subdam) & a Viro Cl. lecta, nec tamen negata; licèt omnem lapidem moverit ille, ut asserta sua exemplis quibuscunque, ac undecunque conquistis, imò etiam interdum minùs germanis, fulciret; mea verò enervaret. Usque tamen libet eundem audire, hæc ante biennium, anno scilicet 1712., de Chinâ Chinâ locutum in *Dissertatione De Contagiosa Epidemiâ, quæ in Boves irrepsit* pag. 37., ut retuli in *Collatione Textuum* illius lit. H. *Equidem hoc præsidii genus in Febris periodicis miranda præstat, ac præsertim in Tertianis Intermittentibus malignis, quæ in ipso impetu accessionis ægros interdum necant &c.: hoc enim Febrifugum fermentum illud malignum sive penitùs restinguit, sive ita enervat, ut periculum illud tollatur, ne Æger in ipso Febris accessu intereat.*

Hic ergo quæro: Si Cortex Peruvianus in *Malignis Intermittentibus*, ipso Judice, *miranda præstat; si Fermentum illud malignum, vel penitùs restinguit, vel plurimùm saltem enervat; tandemque si periculum illud tollit, ne Æger in ipso Febris accessu intereat*, cur tot additis limitationibus, cur tantâ incertitudine, ac nutatione, verboque forsân interjecto, protulit §. antecedenti, *Peruvianum Corticem in iisdem Malignis Intermittentibus esse posse forsân utilem, si tales ab initio dignoscerentur?* item, *non alienum esse, usum illius pertentare, si malignitatis signa se prodant, quæ tamen obscura sunt, & Medicos fallunt &c.*? Rursus si verè, ac absolutè ille utilis est in hujusmodi casibus, & incunctanter usurpandus, eo quòd in *Malignis Febris*, *præsertim Tertianis verè miranda præstet*, ut ante biennium asseruit; ubinam gentium quæso, ubinam terrarum miranda hæc observavit, aut commodiùs observare potuit ille, quàm Mutinæ; imò etiam, ausim dicere, quàm me præscribente? Si verò Mutinæ, ea miranda vidit, quæ prædicat, ubi verè vidisse certum est ex antedictis, quâ animi fiduciâ nunc jactat, Mutinenses Medicos pro curandis hujusmodi Febris tumultuariè ad *Sacram Anchoram Chinæ Chinæ incassum confugisse, ac perpaucos evasisse sibi observatum?* Habet profectò quid admirabile hæc inconstantia, eòque admirabilior ea est, quòd brevioribus distincta temporum intervallis. Etenim Textus nuper citatus, ingenuus planè, ac etiam ultroneus, vix quatuor mensibus præcessit ortu Therapeutice meam; eâ verò vix in lucem editâ, statim conceptum suum for-

tita est, ortaue nuper hæc Viri Cl. Dissertatio, Auctori æquæ suo infensa, ac Operi meo.

S. 31.

SUCCURIT nunc mihi funestus casus Domini Francisci Guidoni, qui ex hujusmodi febre misere opetiit; laborabat Vir iste Nobilis Media æstate tertiana febre, quæ exquisitæ speciem referebat, ut altera die prorsus apyretos esset, & è lecto si vellet posset exurgere, die quinta h. e. quinto circuitu accessit febris tanto rigore, & frigore una cum mentis stupore, pulsu exili ut vix perciperetur, unde Medicus ad visitationem pro more accedens, ad ægri adspectum attonitus institit me non procul abitantem subito pro Consultatione acciri, in qua Vir ille cæteroqui doctus ingenue confessus est se deceptum à febre, quæ tertianæ exquisitæ morem, & leges omnino servabat, nullo se prodente pravitatis signo. Proposuit ille Peruvianum Febrifugum more suo propinandum, annui ego memor dicti illius, quod habet Celsus, *in præcipiti periculo multa recte fieri alias omittenda*, sed altera die aphonus, & gelidus æger mortuus est.

HUc usque tribus, vel quatuor Casibus a tempore valde diutino emendicatis, inter tot, quos ipse referre se posse identidem obtrudebat, parum profecit, nihilque probavit Cl. Auctor. Et quotiescunque etiam ii pleno robore constitissent, nec potuissent rejici a me eâ facilitate, quâ sunt rejecti, ut exempla probationis invalidæ; quid quæso a Viro Cl. probatum foret, ubi agebatur de usu Peruviani Corticis in Intermittentibus tantum diuturnis, & cæteroqui *benignis*, cujusmodi curationum felicissimarum ipse plusquam quingenta, si omnium memor essem, tribus illis, aut quatuor ab eo recensitis opponere possem exempla? Forsitan modò, ubi agitur de re valde gravi, videlicet de oblatione ejusdem remedii in Febribus Intermittentibus quidem, sed *Perniciosis*, atque lethalibus, fortioribus exemplis utetur, nec ullam exceptionem admissuris; ut nempe Quartum Librum meæ Therapeutices impugnaturus, Historias in eo contentas, quippe felices, funestis ab ipso mox afferendis infirmet.

(*Succurrit &c.*) Jamque memetipsum armis meis confodere aggreditur, unius ex meis Ægris Perniciosâ Tertianâ confecti casum opponens,

nens, ipse paulò ante mortem ejusdem Ægrotantis in consilium accitus. Sed hæc quoque narratio variat in pluribus; & primò in circumstantiâ gravi, quæ vel ipsa dirimit Matrimonia: adest quippe *error personæ*. Non enim D. *Franciscus* Guidonius, qui multò ante objerat Apoplecticus, neque a me fuit unquam curatus; sed D. *Antonius* Francisci, & Opizonis frater fuit, quem Perniciosa illa Febris sustulit; ille verò Medicus ego fui (atque hinc dignoscat quilibet, an Censoria virgula Viri Cl. me peculiariter petat, & an ictum, auras licet, non me fugillantem, queam dissimulare) ille inquam ego fui, qui me deceptum falsus sum a tam celeri prolapsu in illud exitium, quod tardiusculè forsitan, & lentius eventurum a longè fueram suspicatus. Neque enim adeò deceptus fui, quin futurum mentis stuporem tempestivè prænosces, priusquam scilicet Æger in præceps rueret, curarim, ut ille rebus suis, animæque consuleret: cujus rei sollicitudo me impulit, ut D. Marco Antonio Origono Sacerdoti, Ægrotantis familiari, viventi adhuc, & memori, negotium anxie committerem (quod ille egregiè præstitit) quoniam Uxorem de imminente periculo haud rebar satis adhuc persuasam. Cæterum nec morbi series, qualis a Cl. Viro describitur, nec alia minutiora mihi uni nota, non illi, qui cuncta habuit ex relatu meo, & quorum facilè postmodum erit oblitus, cum re ipsâ concordant. Utcunque tamen hæc fuerint, certum est, Virum illum Nobilem ex Perniciosâ Febre, primò Intermittente, mox Subcontinuâ, & repente soporosâ (quo casu quis forsitan alius, subortam ex improvise Apoplexiam, vel vafre, vel stolidè pronunciaffet) præcipiti lapsu occubuisse. Me vesperi falsum esse Cl. Ramazzino, qui post administrata ob prævisum opportunè periculum Sacramenta Ecclesiæ fuit in consilium vocatus, deceptum memetipsum a motu morbi, supra suspicionem quoque meam matutinam citiore, verum est: ultròque fateor, me aliàs etiam magis deceptum, inscio licet Viro Cl.; ac si diutiùs vivam, magis adhuc forsitan decipiendum. In hoc tamen uno me tum deceptum sum falsus, quòd tempus adhuc mihi sufficiens pro Chinâ Chinâ venturis accessibus exhibendâ futurum esse antea conjectaram; cum tamen ob excidium immodicè præceps ampliùs ea nequiret administrari. Hoc ergo solùm nomine, quòd nullus ei locus esset, de Peruviano Cortice mentionem habui. Oblatum verò fuisse huic Ægrotanti, aut propositum a me Remedium hujusmodi, ut fidenter asserit, brevique verborum ambitu affabrè circumscribit Cl. Auctor, summâ dixerim illius etiam non viventis pace, ne per somnium quidem consonat veritati. De assertorum meorum honestate, nec ipsi, si quos novi, Obrectatores mei solent suspicari. Prostant nihilominus apud Pharmacopolam *Hortensium Candrinum*, Virum probum, honestumque Schedulæ meæ, Adversaria propria, & Codices fideles, ac integerrimi, lituram non admittentes, unde cuicunque lubeat, vel curæ sit, facilè datum est certiorari. Ibi cuncta cernuntur, quæ usui fuere, & inter cætera a Cl. Viro proposita, mihique statim probata, Ceratum Veficatorium, & Lapis Bezoarticus, quem forsitan Celeberrimum imitatus Sanctorium, in fide Parentum proposuit.

Hallucinationem tam masculam, quòd nempe obtrudat ille pro oblato minimè oblatum hoc casu, imò neque propositum Peruvianum Corticem, absit ut exprobrem Cl. Auctori, piè quippe quiescenti, deque his omnibus sibi nunc vanis forsan ridenti; in cuius obsequium lapsam fortè longà die memoriam tantùm culpabo. Id unum innuam Lectori; obstupuisse me non parum, cum primò hæc legissem, miratus nempe quomodo Vir circumspectus, ubi de Facto agitur, hujusmodi commentitia *tam fidenter, tam animosè* scripserit, *ut illi non sudarint præcordia* (quemadmodum loqui consuevit ille §. 11.) *ob metum de improspere eventu*: improspere namque illi eventus est, se fuisse isthæc narrando deceptum, vel eum videri, cui fuerit animus alios fortasse decipere. *Atque hæc Corinthiis audientibus, & satis scientibus recitat?* ajebat olim Lucianus de quodam Historico nugatore, apud Corinthios se vidisse jactante, quæ illum neutiquam vidisse ipsimet norant Corinthii.

Obiit itaque Vir ille Nobilis, Peruviano Cortice ne proposito quidem planè jejunos; quandoquidem præceps illius lapsus, in Subcontinuis cæteroqui Febribus, cujusmodi hæc evaserat, haud ita repente fieri solitus, contigit præter ordinem quoquè; inclinante videlicet die minoris afflictionis: erat enim ea Febris Tertiaria duplex, ab initio tamen penitus intermittens. Cum verò paucis horis distaret potior, & planè lethalis accessio; jamque patenter incœptum esset præcox præter morem exitium, lethalia prorsus de more paulò post incrementa suscepturum, ab exhibendo incassum, imò & proponendo Febrifugo abstinendum duxi, *ne quem servare illud non poterat, occidisse videretur*. Scilicet Virum jam conclamatum, & postridie, ut patefecit eventus, moriturum, postridie quoquè ab epoto minimè cruciante Peruviano Cortice (si fortè fuisset exhibitus) occubuisse, fuisset certè, ut infra §. 48., *amaris Chinæ Chinæ potionibus miserum Ægrum conficere*: interiisse verò deglutito Lapide Bezoartico, & Vessicantibus Emplastris inaniter divexatum, fuit, illum pro viribus Artis dubio procul reficere. Sicuti ergo perperam culpatur hoc casu non assumptus, neque præscriptus Cortex; ita perperam culparetur, si morituro fuisset incassum exhibitus. Revera nonne quotquot obeunt, obeant necesse est non multò post assumptum, vel cibum, vel potum, vel cardiacum medicamentum, vel quid aliud æquè innocuum, nisi ex inediâ deficient? Nonne pariter identidem postridie ab epoto solvente, aut leniente Medicamento pereunt Ægroti, quos tamen non Leniens illud pro innoxio habitum, sed Fatum eorum dicitur sustulisse? Exemplum sanè hujusmodi, inculpato nihilominus Remedio simul ac Medico, haud infrequenter occurrunt in praxi. Unum liceat hic referre, non quidem ut defunctum Antagonistam retaliem, ac quodammodo vicissim criminer, sed ut inopinata quandoque artis infortunia haud intempestivè commemorem; unum, inquam, liceat referre de Viro Nobili, *dum casus, qui in gente vulgari contingunt*, ut ajebat §. 20. Cl. Auctor, *sinè rumore terra obtegit*. Nimirum *ita res accendunt lumina rebus*: quemadmodum enim sub initia hujusce Paragraphi succurrebat in rem suam

suam eidem Cl. Auctori *funestus casus D. Antonii Guidonii*, Francisci nomine inconsultè appellati, ita in rem meam

Succurrit nunc mihi, & quidem succurrit certâ reminiscentiâ (multoque magis hujusce eventus deberet meminisse, si viveret, idem Cl. Auctor) funestus casus D. Honorii Baroccii, qui ex hujusmodi infortunio miserè oppetiit. Laboraverat Vir iste Nobilis levioribus quibusdam, sed diuturnis Febribus, a quibus jam ferme convaluerat, vel saltem adeò leviter affici videbatur, ut jam e lecto exurgeret, possetque, si vellet, etiam e cubiculo egredi. Usque tamen obstinatâ alvi stipticitate premebatur; pro quâ sollicitandâ Medicus illi præscripsit sex tantum drachmas Electuarii Lenitivi. Eo remedio assumpto, Æger superpurgationem passus, in deliquia subinde incidit, Febremque intensissimam unâ cum pulsu exili, ut vix perciperetur; unde Medicus ad visitationem pro more accedens, ad Ægri adspectum attonitus, institit, me non procul habitantem subito pro Consultatione acciri; in quâ Vir ille cæteroqui doctissimus ingenuè confessus est, se deceptum a Remedio tam blando, tamque parcâ dosi exhibito in morbo tam levi, ubi nulla unquam se prodidere infausti ominis signa; sed vix Febricula quædam mitior superstes remanserat, actiones tamen minimum lædens. Irrita fuere nihilominus quævis in eo præcipiti periculo licuit experiri Artis auxilia: Alterâ enim die aphonus, & gelidus Æger mortuus est. Loripedem rectus derideat, Æthiopem albus. Juven. Sat. 2.

§. 32.

(a) **E**odem fato obiit D. Comes Fortunatus Cortesius, D. Joannes Altimanus, & complures alii eodem pene tempore, perpauco enim ab hujusmodi febre correptos evasisse vidi. (b) Credo equidem, quod si attentius hæc febres, quæ æstate potissimum aliquando caput exerunt, observarent Medici, credo inquam quod signa quædam pravitatis deprehenderint; magnarum enim calamitatum parva solent esse ab initio signa, ut in morbis pestilentibus evenit. *Sæpe exiguus mus augurium tibi triste dabit*, ajebat Doctissimus Fracastorius de Contagione.

(a) (Eodem Fato &c.) **E**odem verè Fato obiit; Chinâ Chinâ videlicet nec assumptâ, nec ei præscriptâ, D. Joannes Altimanus, ut habetur ex Consanguineis, ex Pharmacopolâ, & ex ipso curante Medico ordinario, nempe D. Riccio: neque enim casus iste, ut nec subsequens quicquam ad me; quod quis crederet, oppositum indicante prævio contextu? Afferit is, qui verè adstitit, Febrem fuisse ab initio Intermittentem, mox in Mali-

gnam degenerasse; cui tamen curandæ, nec ipse, nec D. Ramazzinus superaccitus opportunum unquam putassent Peruvianum Corticem: tantum abest, ut vel propositus ille fuerit, vel in usum ductus. Ita ille: cujus effatum quod ad non oblatam Chinam Chinam nequit in dubium revocari, cæteris etiam adminiculantibus; quod verò ad carentiam opportunitatis illam exhibendi, standum erit amborum placitis, cum non aliter deceat.

D. autem *Marchio* (non *Comes*, ut habet Cl. Auctor) Fortunatus Cortesius in quadam Ægritudine verè fuit olim curatus (ne quicquam reticeam) & a Cl. Ramazzino Medico illius ordinario, & a me simul in consilium vocato. Evasisit tamen ille tunc a diuturnioribus Febribus; puto etiam ope Chinæ Chinæ; sed non satis memini, ut asseram. In ultimâ verò Ægritudine, cui compendiariò succubuit, solus illi adstitit Vir Cl.: proinde quibus pharmacis (dicam & ipse verbis illius ex §. 34. petitis) Æger iste fuerit *portionatus in postremâ Ægritudine, omnino mihi ignotum*. Hæredes Defuncti, consuetusque illius Pharmacopola Joseph Sallarolus censent, nullum, aut fere nullum (nullis videlicet hac de re extantibus monumentis) brevissimo illius morbi tempore præscriptum fuisse remedium: nullam propterea exegit idem Pharmacopola, nullam Hæredes solverunt expensam. Certè Corticem Peruvianum minimè usurpatum fuisse, asserit hoc quoque casu idem D. Riccius, qui & hunc Ægrum pessimè habentem invisit, cum fortè Mulierem quandam de Nobilis ejusdem Viri famulitio tunc Ægrotantem curans, ad eum quoque officii causâ non semel accessisset. Chirurgus pariter Andreas Tassonus, qui pro suo quoque munere eidem adstitit, de solis Vessicantibus paratis, sed ob præcocem illius obitum nequaquam appositis, memorem se perhibet, de Cortice nil conscius. Quod si nihilominus, omnibus insciis, Chinam Chinam se exhibuisse contendat Cl. Auctor; cum Methodus illius non transcendat drachmas duas; hæc autem in præcipiti periculo nequeant sufficere; habet hinc potius unde eum pœniteat suæ Methodi, pusillæque, ac invalidæ suæ dosis, quàm unde aliis exprobet abusus nomine usum liberalioris, virilemve adeò fidenter traducat Methodum, quâ nullatenus usus est; quâ verò uti necesse est hisce casibus, ut Cortex profit. Quamobrem quâ ratione inferret ille, noxium, vel frustraneum saltem fuisse funestis hujusmodi casibus ipsum Peruvianum Corticem, si verè fuisset oblatus; eâdem ratione saltem, forsan & potiore, mihi modò liceret inferre, funestos probabiliter illos extitisse, eò quia non fuit oblatus, vel non oblatus saltem Methodo meâ.

Expectasssem proinde potius, ut retulisset hoc loco, ubi proprios luctus alienis intermiscere non renuit, Casum antiquiorem, quem sibi olim contigisse, centies mihi narravit Cl. Auctor de quodam Laico Oblato ex Cœnobio Canonicorum Regularium Rhenanorum, quos vulgò S. Salvatoris; Mutinæ verò, ab Ecclesiâ desumpto nomine, S. Hieronymi appellant. Hic ergo cum Quartanâ Febre ab aliquot mensibus detineretur, adeoque jam valde debilis, ut & valde senex existeret, atque ex Cattarrho intrâ bronchia delitescente assiduè sub-

stertens;

stertens; Cl. autem Ramazzinus invadente accessione (cui a nonnullis jam diebus non ut antea præibat ampliùs omnimoda apyrexia) duas, pro more illius temporis, Corticis drachmas illi exhibuisset, *ad impetrandas*, ut puto, *aliquot dierum inducias*, eâ ipsâ accessione decessit e vivis: quo pacto recedente febre, verè *optandum esset, ut ea rediret*. Hunc inquam casum potiùs, quàm supra recensitos expectassem ut referret Cl. Auctor, ad innuendam, si non *malitiam occultam*, & prope veneficam, saltem invalidam, ac enervem in arduis hisce, ac *Perniciosis* Casibus Chinæ Chinæ virtutem. Sed forsan meminit, quòd sicuti se mihi quondam fassus erat ab eventu hoc inopinato adeò terrefactum, ut hac unâ de causâ in Constitutionibus suis Epidemicis nonnihil meticolosè scripserit de ulu hujusce Febrifugi (licèt causam hanc ipsam subticuerit, ne sibi magis noceret, quàm Cortici) ita postquam mecum rem eandem meliùs examinavit, viditque post editas Constitutiones suas tam crebrò quid possit, quidve præstet remedium istud ritè usurpatum, fassus erat pariter ingenuè mihi, se clarè jam dignovisse, protractam serò nimis eo casu fuisse Febrifugi oblationem, ac propterea perperam expositum infamiæ Remedium saluberrimum, cujus magis intempestiva esse potest serior, quàm præcox administratio; cum ob ejus innocentiam, atque salubritatem de ipso dici queat oppositum, ac de alio quovis remedio dici solet; videlicet, in eo usurpando *leviora esse perpetuò peccata commissionis, quàm omissionis*. Ita ille tunc.

Ut ergo rem contrahamus, ea tantummodo, quam supra vidimus, est vis, & veritas omnis trium Historiarum, a Cl. Viro allatarum, quibus probare satagit, se *Mutinæ perpauco vidisse Perniciosis Intermittentibus correptos, qui Chinâ Chinâ epotâ ab iis evaserint*; cum tamen contra viderit nonnullos, si eorum placuisset illi tantulùm meminisse, & noverit alios plurimos, in Historiis octoginta circiter, toto fermè Libro quarto, & alibi a me descriptos, iisdem quidem Febris confossos propemodum; sed ejusdem nihilominus Febrifugi ope pristinæ incolumitati, quâ etiamnum a tot annis integrè utuntur, felicissimè restitutos.

(b) (*Credo equidem &c.*) Credo & ipse, Medicos, si attentè advertant animum, posse tempestivè per sua signa, si non perpetuò clarè cognoscere, suspicari saltem rationabiliter morem pessimum harum *Februm Perniciosarum*. Nisi enim id credidissem, octo distinctas illarum species, ac differentias cum signis omnibus earum diagnosticis, prout mihi observare licuit, non essem exactissimè persecutus toto Capite primo, imò & secundo Libri tertii, quemadmodum pro viribus exequi conatus sum. Neque Tractatulum Mercati idipsum docentis, nec non etiam Mortoni descriptionem compendiarium præmisissem Libro secundo; ut ex illorum Auctorum, meisque observationibus simul collatis, facilius, & clarior evaderet obscura cæteroqui hujusmodi *Februm tempestiva Diagnosi*. Sed & insuper quando Medicum etiam oculatum decepit nonnunquam fraudulentus hic hostis, dummodo eo ipso accessu, quo se prodit, hominem non interficiat, sat habet idem Medicus ex observationibus, & Methodo meâ, unde hostem eundem,

ultimum licet excidium interminantem, confodiat. Ut propterea suis Historiis, tum paucis, tum veritati minus consentaneis, everfionem Tertii mei Libri, praxim hanc utilissimam, totque insignibus Historiis in Quarto expositis confirmatam, continentis, irritò planè conatu tentarit Cl. Auctor.

S. 33.

(a) **I**N *Febribus porro continuis*, dummodo de periodicarum profapia sint, si malignum quid portentant, jamdudum scio familiarem esse istic Chinæ Chinæ usum, & in larga dosi, sed multæ deceptiones hic etiam contingunt, nam febres continentes, essentielles ut vocant, interdum etiam inflammatoriæ, persæpe de natura intermittentium participare creduntur, cum enim in febribus vere continuis observentur (b) *aliquando parvi motus*, & horrores ex internis vellicationibus, quales febres intermittentium naturam sapere existimant, unde consuetum remedium præscribere non dubitant; habent enim id omnes fere morbi, ut vespertinis horis graviores sint, *Quale est ad vesperam exacerbari, ita & in omni morbo*, ajebat Hippocrates 4. Epidemiorum, omnibus pene ægrotantibus commune est, ut accedente Sole ad occasum magis molesti sint, atmosphœra etenim tunc gravior est, ac perspiratus debilior, quod in morbis melancholicis manifeste deprehenditur. Quartana febris, annotante Fernelio in Libro de Abditis morborum causis, nunquam, vel raro antemeridianis horis, sed pomeridianis suas habet accessiones. (c) *Quod si unum vel alterum exemplum* afferatur eorum, qui in aliqua febre continua pessimis accidentibus comitata, ut pro conclamatis haberentur, Chinæ Chinæ potione ad uncias integras in vino infusæ pluries in die exhibita, evaserint, ut hoc solo remedio ab Orci faucibus videantur erepti, talia exempla tanti non sunt, ut animum faciant ad Chinæ Chinæ usum indiscriminatim, ac tam liberaliter adhibendum. Antequam

quam Chinæ Chinæ nomen innotesceret, hujusmodi portentosa visebantur, ut in incerto esset num medicamentorum, an fortunæ beneficio ægri convaluissent; *quemadmodum enim*, uti aiebat Celsus, *moritur aliquis de quo Medicus securus fuit*, quod non raro evenit, *ita aliquando quidam deserti à Medicis convalescunt*.

(a) (In Febris porro Continuis &c.) **N**on recedendo penitus a tertio, & quarto, ad convellendum progreditur Librum quintum Therapeutices meæ Cl. Auctor. Ut ergo cunctis ab eo turmatim objectis singillatim a me satisfiat, pauca hæc pro responsione lubet innuere. In Febris *recenter tantum* Continuis factis (de Continuis enim ab ortu, seu *Continentibus originariis*, tam *Solitariis*, quàm *Comitatis*, tam *Essentialibus*, quàm *Symptomaticis* &c. hic sermo non est, utpote quibus, nec meo, prout latè in Therapeut., nec Viri Cl. judicio, China China quicquam prodest) in Febris, inquam, *recenter tantum* continuis factis, ac ideo Subcontinuis a me appellatis; dummodo de *Periodicarum*, hoc est de *Intermittentium*, aut *Subintrantium* *prosapiâ* sint, si malignum quid portendant, idque contingat in morbi *progressu*; familiarem mihi esse Chinæ Chinæ usum, non in tam largâ, sed in modicâ, & opportuna dosi, ex Libro tertio Tractatus mei Cap. pariter 3. potest certè Lector habere a pag. 333. usque ad 340. Si verò Continuitas illis accidat citius, ac in *ipso* fere morbi *principio*, plurimâ cautione, ac circumspectione agendum esse, & perpendendum, an ope Chinæ Chinæ, an *Methodo* potius *ordinariâ* tractandus sit morbus, expressè inculcavi; omnesque problematicas rationes hinc indè pugnantes fusè examinavi toto Cap. 5. Libri Quarti; imò & exempla insuper cohærentia retuli Cap. 6. ejusdem Libri. In Continuis autem de *Periodicarum* quidem, sed *Continuarum* *prosapiâ*, hoc est de *Proportionatarum*, sive *Proportionalium*, ut vocant, Stirpe, quæ modò ad *Subintrantium* tantum, modò ad *Continuarum originalium* genus reducuntur; nonnisi cum distinctione procedendum dixi in oblatione Peruviani Corticis, in uno casu proficuâ, in altero frustraneâ forsitan evasurâ: prout scilicet fermentum peccans, vel est præcipuè insitum sanguini, & febrem naturâ suâ Continuum gignit, vel præcipuè ab extrinseco accedit eidem sanguini, & febrem naturâ suâ producit Intermittentem. Ac tandem ipsam Theoreticam distinctionem ad praxim contraxi, docendo Signa ipsa diagnostica ejusdem Febris, modò ad unum genus, modò ad alterum pertinentis; adeoque modò Cortice curabilis, & modò non, Cap. tertio Libri Quinti, præcipuè a pag. 614. usque ad 622.: neque enim eundem calceum omni indiscriminatim pedi inducendum uspiam asserui.

Quibus omnibus a Lectore consideratis, facile erit illi discernere, an *multæ illæ deceptiones*, quas hic contingere autumat Cl. Auctor, sive de activis intelligat, sive de passivis, se teneant ex parte mei, cuncta

cuncta minutè explicantis , & dividētis (quod omnino requiritur , ut cum utilitate exhibeatur hisce Casibus China China ; secus saltem frustra exhibetur) an potius se teneant ex parte illius , cuncta , quæ ipse clarè distinxeram , turbulenter iterum confundentis ; quasi ut damnare queat sic commissum , quod damnare nequibat tam clarè secretum .

(b) (*Aliquando parvi motus &c.*) Quænam sint hæ Febres *Continuæ* , nonnunquam etiam *Inflammatoriæ* , quibus aliquando *parvi motus* , & *horrores ex internis vellicationibus* , aliisque causis obtingunt Intermittentium ad instar , quæque tamen Peruviano Cortice non sunt curabiles ; adeò perspicuè explicare , illasque ab aliis eodem Cortice verè sanabilibus per sua diagnostica signa distinguere , ac unam Speciem ab aliâ vicissim sejungere conatus sum in citato Libro Quinto Therapeutices meæ Cap. 3. , & signatè pag. 612. , ut omnino supervacaneum censeam aliud addere . Imò aliquando eousque perrexit cautela mea ; ut in Febre *Inflammatoriâ* nequaquam *Continuâ* , sed planè *Intermittente* (quam semel tantum licuit observare) a Corticis nihilominus oblatione abstinendum duxerim pag. 599. ejusdem Tractatus mei : ut proinde modò minimè repetendum sit mihi quod aliàs luculenter apervi . Dicam tantummodo in gratiam Tyronum ; distinctiones illas practicas unius *Continuæ* Febris ab aliâ , inter quas Febres nonnulla sit Symboleitas , & similitudo , quæ pluribus identidem erroribus ansam præbet , esse hujusmodi , ut si probè attendantur , Medicum in Chinæ Chinæ administratione apprimè versatum ostendant , efficiantque , ut ferè nunquam incassum illam exhibeat , cum non exhibeat nisi ubi eam propemodum certò profuturam prænoscat , atque etiam prænuntiet ; si verò minùs exactè observentur , aut intelligantur , detegant illum eo remedio cæspitanter tantum , aut fortuitò utentem , ac non rarò iis , qui bene uti norunt , etiam ridiculum . *Non omnes , qui habent Citharam , sunt Citharædi .*

(c) (*Quod si unum , vel alterum &c.*) Octoginta circiter exempla , non unum , vel alterum attuli in Therapeutice meâ Febrium lethalissimis persæpe accidentibus comitatarum , & Chinâ Chinâ , non ad uncias integras pluries in die exhibitâ , sed dosi decenter liberali , ut aliàs dictum est , & clariùs etiam dicetur §. 48. , felicissimè expugnataram . Istas omnes appellare *Continuas* non recuso , etiamsi ab ortu fuerint , vel *Subintrantes* tantum , vel prorsus etiam *Intermittentes* ; perniciæ siquidem in apertum prodeunte , statim in Continuarum castra se receperunt : adeoque & *Continuæ* tunc dici potuere ; eo tamen modo , quo in eâdem Therapeutice meâ locutus sum pag. 282. & 283. An verò talia exempla tanti sint , ut animum faciant ad Chinæ Chinæ usum liberaliter adhibendum , judicent Practici . Quòd si etiam (jure merito reponam ego) unum , vel alterum exemplum afferatur eorum , qui in aliquâ Febre *Continuâ* , pessimis accidentibus comitatâ , ut pro conclamatis haberentur , Chinæ Chinæ potione exhibitâ nequaquam evaserint ; talia exempla tanti non sunt , ut animum faciant ad illius usum , quasi noxius ille fuerit , tam liberaliter prohibendum : antequam enim Chinæ Chinæ nomen innotesceret , hujusmodi portenta crebrò visabantur .

At verò

At verò portenta, quæ visuntur postquam Chinæ Chinæ non nomen tantum, sed usus melior, me promulgante saltem, innotuit, sunt, ut Perniciosa Febris de Intermittentium, vel Subintractantium Stirpe, sed mox Continua recenter reddita, & gravissimis accidentibus comitata, quæ proinde in extremum vitæ periculum Ægrotantem redegerit, post biduum, vel triduum ab epoto hoc Febrifugo statim solvatur: idque non semel, aut bis; sed decies, vigesies, sexagies: neque etiam fortuito; sed ex præmissâ Prognosi expressâ, quòd ita sit eveniturum. Adeò celer, adeò constans, & adeò certa moraliter est vel in hisce angustis Peruviani Corticis actio. Quæ verò nonnunquam, sed perrarò, in hujusmodi casibus, sive Naturæ operâ, sive Fortunæ, aut Artis ordinariæ beneficio contingit restitutio Ægrotantium pro conclamatis habitorum, nonnisi lentè, ægrè, ac difficulter contra ipsam Medici expectationem, atque Prognosim succedit. Ad hunc Lydium Lapidem examinanda est acquisita salus: atque ita unde illa processerit vel ipsæ dignoscent mulierculæ; eâ quidem facilitate, quâ Cuminum dispiciunt a Pipere, & fissa a non fissis, cocta a non coctis fictilia Vasa: siquidem & hîc, si qua subest labes,

——— *Sonat vitium percussa, malignè*

Respondens viridi non cocta fidelia limo,

ut cecinit Persius. Sanitas per Corticem obtenta (dixi pluries in Opere meo, & signatè pag. 635., 636., 556., 557., & 593.) facile dignoscitur ex insolitâ, quâ acquiritur celeritate; id, quod fusiùs explicui in Schol. ad Mortonum, pag. 266. & 267. ejusdem Operis, istiusmodi cavillationem jam tum prævisam explodens. Sed pergamus.

Virtutem hanc certam sistendi paroxysmos, quam Chinæ Chinæ tribuit in diuturnis Intermittentibus Cl. Auctor, ut videre est in fine §. 22., eo quòd scilicet eas illicò post remedium illud assumptum cernit subsistere, quantumvis etiam non rarò, & sponte, & ex improvise subsistant; cur illi denegat in iisdem Febribus recentem Continuitatem adeptis, adeoque difficiliùs sponte suâ, tam citò saltem, solubilibus, adscribitque salutem Fortunæ potiùs, quàm Cortici; cum tamen eundem prorsus, æque certum, & æquè celerem in his, ac in illis intueatur effectum? Febres, quæ de Intermittentium familiâ sunt (ajebat ille in Orat. Jatrici Argumenti pag. 102.) pulveris exigui haustu in vino soluti, aut compressæ quiescunt, aut etiam penitus abolentur. At de Intermittentium adhuc familiâ sunt, si me Deus juvet, saltem quòd ad suscipiendam actionem Corticis, Intermittentes illæ, quæ ab eodem etiamnum Fermento Intermittentium majori ex parte pendentes, vix cœperunt se se reponere in Continuarum classem. Admirandum est profectò (ajebat nuper idem Vir Cl. §. 4. hujusce Dissertationis) quomodo ad exiguum pulvisculum quomodocunque exhibitum Febris Periodicæ furor conquiescat, interdum etiam extinguatur; quòd de quocunque alio remedio pharmaceutico non tam facilè observatur, quod sciam. At Febres istæ, de quibus portenta visuntur, Periodicæ sunt. Si ergo eas oblatâ Chinâ Chinâ statim sanatas videat, ut saltem octogies videre potest in historiis meis; cur earum extinctionem Naturæ potiùs, vel Casui

vel Casui velit adscribere, quàm *admirando Pulvisculo*, cui *nullum*, quod *sciat*, *equiparari potest remedium pharmaceuticum*? Quid verò, si ante pulvisculi exhibitionem Medicus fiat sponsor de subsequuturo ipsam felici eventu? Prognosim de certâ, & citâ morte, omisso Peruviano Cortice, & de certâ, ac citâ salute, eodem assumpto, a me in praxi præmissam ante oblationem illius, & quidem in circumstantiis gravissimis, vide in Tractatu meo pag. 444. Historiâ 9., ubi hanc, quam Cl. Auctor obtrudit cavillationem, penitus explosam comperies.

S. 34.

CUm decem ab hinc annis clauso jam Lyceo Mutinam venissem ad otia captanda, nec satis cavere possem, quin implicarer in curandis ægris, ac forte ex febre continua decumberet insignis Juris Consultus, vocatus ad consultandum cum Medico, qui curæ aderat, ac postmodum quoque accersito Domino Paulo Piela Clarissimo Medico Bononiensi, qui paucis ab hinc annis omnium dolore è vivis excessit, varia quidem administrata sunt remedia, sed ægro in pejus labente, unde alter Medicus, magnus Chinæ Chinæ virtutum assertor, declamare cœpit nullum aliud superesse remedium, quàm Peruvianum Corticem suo more exhibere; modeste responsum febrem eam non esse, cui conveniret tale remedium, sed illo instante, ac domesticis omnibus nos arguentibus, quod in re desperata unicum remedium arceremus, prædictus D. Piela, & ego assentiri necessarium esse credidimus, ne quidquam relinqueretur inausum. Per duos vel tres dies, si bene memini, quolibet mane, & forsitan etiam pluries in die propinata Chinæ Chinæ potio pro more, sed ægro in deterius ruente, & pulsu ita depresso, ut vix perciperetur, quo viso aperte protestati sumus, ab hoc Febrifugo desistendum, quo facto pulsus paulatim cœpit assurgere, ac sensibilibiter percipi, torpore quo prius æger tenebatur discusso, sic tandem post multos dies solo victu, remediis omnibus ablegatis, præter
spem

spem prioris Medici , qui inter mortuos illum referebat , perfecte convaluit Vir ille , dignus sane qui longum tempus viveret , sed paucos post annos communi fato cedere illi necesse fuit , num autem in postrema ægritudine solito Febrifugo potionatus fuerit , omnino mihi ignotum .

(*Cum decem ab hinc annis &c.*) **C**Asus hic , quem pro libito magnâ ex parte fabrefacit Cl. Auctor , est ille idem , quem obiter egomet innui in Tractatu meo pag. 367. historiâ primâ . Ibi namque ultimum , lethalemque describens morbum eximii hujus Jurisconsulti (cujus nomen modò supprimit Vir Cl. , ego verò candidè tunc patefeci) hanc aliam , quæ jamdudum præcesserat ægritudinem ; imò & tentatum in illâ Peruviani Corticis usum paucis hisce lineis adumbravi -- *In aliâ difficillimâ Ægritudine ejusdem Patientis non sinè fructu remedium illud (videlicet Peruvianum Corticem) vix vix indicatum , cum aliis tamen quamplurimis , longo temporis tractu (in hoc uno me fefellit memoria ; brevis enim , ut infra , fuit ille temporis tractus) præscriptissimus ; & ab eo morbo contra ipsam expectationem nostram evasit . An Cortex simul cum aliis remediis , an sola Naturæ actio opus illud absolverit , ignoro --* Ita ego tunc loco citato .

Si minùs ingenuè scripisssem , tribuisssemque absolutè curationem gravissimi illius morbi , qui ad extremum usque marasum Ægrotantem perduxerat , soli Peruviano Cortici , mihiq; uni arrogassem dignotionem opportunitatis illum utiliter exhibendi , *post alia remedia administrata ; sed Ægro , ut inquit Vir Cl. , in pejus labente ; imò , ut subdit , re jam desperatâ ,* dubio procul hoc adamussim quadraret narrationi illius , utut in plurimis plurimùm alteratæ . Etenim si *re desperatâ , & cum Æger in pejus labebatur , propinata fuit per duos , vel tres dies ,* ut inquit , *Chinæ Chinæ potio :* item si brevi illo oblationis tempore (scilicet verè per biduum tantummodo) quo nondum actio Corticis se se poterat exerere , Ægrotus ille in *deterius* quidem , ut cœperat , etiamnum ruere videbatur (siquidem poterat non moriens pejùs habere) sed tamen assumptâ jam intrâ illud biduum modicâ quantitate Febrifugi , duarum nempe drachmarum quadripartitarum , illiusque virtute in actum , ut mox assolet , paulatim deductâ , *pulsus ,* ut pariter inquit , *cœpit assurgere , torpore , quo priùs Æger tenebatur , discusso ;* itaut solo victu , remediis omnibus ablegatis , convaluerit ipsemet Æger ; profectò aliquid non alienum a probabilitate scripisssem , si adscripisssem Febrifugo curationis gloriam , mihiq; meritum oblationis , qui tantâ efficacîâ dicor illud proposuisse . Et tamen eo modamine , eoque neglectu hæc omnia transegi , ut mihi abundè suffecerit merè dixisse , *illud non sinè fructu fuisse præscriptum :* neque a me uno quidem , sed ab omnibus simul curantibus Medicis , ut verè fuit unanimiter , & electum , & exhibitum . Oblatio autem illius instituta fuit per modum levioris alterantis , videlicet ad simplicem semidrachmam ,

mam, manè, & serò; non tamen in formâ potus, ut ait Vir Cl., sed in formâ boli, per duos tantum dies, nempe die 25., & 26. Septembris anni 1704., ut habetur ex Schedis meis, & ex Adversariis, Codicibusque Pharmacopæi Hortensii Candrini simul collatis. Ex quibus constat, duas solummodo Peruviani Corticis drachmas intrâ biduum partitis, & exiguis dosibus, nonnisi lentè, ac imbecilliter agentibus, fuisse præscriptas. Propositum autem, usurpatumque fuit eo modo, eoque casu id Febrifugum in Febre Continuâ (quæ tamen ab exordio sui talis non fuerat) solum tentandi gratiâ, nullâque ferme spe, etiam ut Domesticis illud feliciter pluries expertis, morem gereremus; cum cæteroqui vix ulla tunc esset offerendi Corticem indicatio, ullave saltem solida ratio. Propterea subdidi, nos præscripsisse quidem *Remedium huiusmodi, sed vix vix indicatum*.

Quâ ergo sui ipsius securitate, postquam hæc scripserim, quæ a Viri defuncti Uxore, & Filio, bis propter Chinam Chinam vivente, semperque deinceps meliùs ac antea valente, possunt confirmari, illudit ille mihi, inquiens, *declamasse me* (neque enim cum D. Pielâ, & D. Ramazzino ullus erat, qui, ut ait, *declamare* posset, & festivè appellari, *Magnus Chinæ Chinæ virtutum assertor* præter me) ut Peruvianus Cortex exhiberetur, si remedium illud, non modò *vix vix indicatum* fuisse sum fassus; verum etiam post absolutam feliciter curationem in dubium revocavi, meque insuper *ignorare* sum protestatus, *num Cortici simul cum aliis remediis, num soli potius Naturæ* eadem fuerit adscribenda, quæ contra expectationem nostram successit sanatio? Neque enim unus ego, sed omnes, quotquot curæ aderamus, Medici, *Ægrum illum inter mortuos referebamus*. Atque hac unâ de causâ, si benè meminisset Cl. Auctor, *declamavi* (quoniam hoc verbo uti eidem placuit) cum D. Pielâ, Viro mihi amicissimo, & humanissimo, ut Bononiam reversurus ante morbi exitum, funestum illud præsagium, quod nobiscum privatim edebat, nullo pacto officii causâ ante discessum suum occuleret, sed apertè potius pro ingenuitate suâ revelaret Domesticis.

Hæc sunt, quæ mihi uni obtruduntur de oblato Cortice Peruviano, quando communibus offertur Mutinensium, & Bononiensium Medicorum suffragiis, & quando tandem Æger evadit a Morbo lethali. Quid si solus præscripsissem, & Æger occubuisset? Tunc certè non fuisset *ignotum* Cl. Auctori, *num solito Febrifugo fuerit potionatus*, ut modò inquit, *in postremâ Ægritudine*: sciret enim omnino, fuisse potionatum. Sed etsi distinctè narraverim in citatâ historiâ quo pacto res tota cesserit, ejusque veritatis, nedum Consanguinei, sed & Adstantes Cives, honestique Viri possint esse Testes, id omne nihilominus Viro Cl. *omnino ignotum*. Mirum solummodo, ei potius notum non fuisse omnino (quandoquidem Chinam Chinam ante septennium epotam minimè veretur ille criminari de morte Ægrotantium) insignem illum Jurisconsultum, qui *paucos post annos Fato cessit*, occubuisset propter illum eundem Corticem, quem in præcedente sumpserat Ægritudine, licèt tunc toxicum illud, quippe Cl. Auctoris suasu opportunè omis-

omissum, suis non valuerit *amaris potionibus*, ut eidem loqui libet §. 48., *miserum Ægrum conficere*.

§. 35.

(a) **C**asus hic, & plures alii, quos Mutinæ variis temporibus, & hic quoque Patavii, de infausto successu hujusce remedii observavi, mihi in mentem revocant quod in Actis publicis Lipsiensibus Anni 1701. memini me legisse de Constitutione quadam Uratislavien-si Anni 1699., in qua (b) *febribus continuis* populariter grassantibus, China universaliter exhibita causa potissima habita fuerit, quæ Annum illum nefastum plurimorum morte rediderit, qualis historia fusius legitur in Epheme-ridibus Curiosorum Naturæ Anni 1702., talia leguntur de Chinæ usu in continuis febribus. Nimius essem si referre vellem mala, quæ apud gravissimos Scriptores de China China leguntur. (c) *Videndus Etmullerus* de Usu, & Abusu præcipitantium, ubi ait persæpe concentrari aci-dum morbosum, quod compressum ad instar spiræ con-tortæ, ubi vim resumit, suos nifus impetuosiores redde-re, quod idem experimur in Automate ubi diu quieverit, motus enim suos ab initio velociores efficit. (d) *Legen-dus Thomas Sidenham* de febre intermittente, ubi de Quar-tana, agens de usu Pulveris Peruviani, quem magis lau-dat paulatim sumptum, & pluribus vicibus, quàm in ipsa accessione, ut fieri solet, sic enim ait sensim sangui-nem turgere, & officium suum absolvere, neque enim bonum putat febrilem motum illico compescere, & san-guinis despumationem cohibere. Legi quoque meretur Observatio D. Danielis Grugeri in Ephem. Ger. Decadis 3. Anno 3. (e) *ubi de intempestivo* Chinæ Chinæ usu varios casus refert, sed unum præcipue memoratu dignum de Pastore quodam, qui prius Epilepsia laborabat, singulis mensibus recurrente, sed Quartana correptus, quæ ipsi

remedio erat, & ut ex Hippocrate à magnis morbis liberat, præterlapso dimidio anno tædii ex longa febre per-tæsus Corticis Chinæ Chinæ drachmam unam ad aliquot dies assumpsit, febris quidem abiit, ast Epilepsia rediit.

(a) (*Casus hic, & plures alii &c.*) **P**rovido sanè consilio *plures alios casus infaustos, Mutinæ, & Patavii*, ut ait, *sibi observatos*, generalibus tantum, & gratuitis hisce terminis jactat, sed ne unum quidem describit, aut memorat Cl. Auctor: si enim omnes ejusdem sint ponderis, ac recensiti hucusque, nullo negotio evanescent in auras. Tres, aut quatuor protulit ille, accusavitque ut nefastos ob infortunatum, ut contendit, exitum Peruviani Corticis in *diuturnis Intermittentibus* administrati: eos tamen nec funestos omnes, nec a modico tempore, sed a septem lustris, & amplius in hanc usque diem petitos; omnes verò fallaces a me deprehensos, atque ut tales Orbi detectos. His nihilominus ab eo tempore usque ad hodiernum forsan quingentos opponam, si opus sit, in eadem lineâ planè propitios. Tres alios objecit sinistri eventus in *Intermittentibus Perniciosis*, eosque nedum fallaces, sed apertè falsos a me demonstratos. His quoque octoginta circiter felicissimos (minimè supputatis, quos communicarunt Amici) in Therapeutice meâ, tum sparsim, tum conjunctim facilè opponendos exposui, & plurimos adhuc in hisce responsionibus meis perquam recentes, compendiariò saltem, exponam. Unum denique expectationi haud satis respondentem in *Continuis* obtrusit; eumque partim commentitium, partim invalidum, nec bono tandem successu carentem, ipso fatente. Huic in solâ Therapeutice meâ insunt, qui possunt opponi, saltem viginti quinque planè inculpabiles, cùm ex *Subcontinuarum malignantium*, tum ex *Lentarum* genere; ex eo tamen, de quo clarè, quantum sufficit, ibidem locutus sum. Neque enim ullam Febrem *Continuam*, quæ talis *ab ortu* jam fuerit, Peruviano Cortice curandam volo; sed illam tantum, quæ per accidens *recenter* fit talis, quæque fuit ab ortu *Intermittens*, vel ad summum *Subintrans*, ut aliàs dixi.

Cæterum si Casus infelicem nonnunquam eventum sortitos; eos videlicet, ubi a me incassum oblatus est Cortex, aucupabatur Cl. Auctor (quandoquidem immortales nequit efficere homines pharmacum istud, sicuti neque iis ita unquam officere, ut sinè calumniâ dici queat occisus, qui servari non potuit) eos non aliunde emendicare habebat opus, quàm ex Tractatu meo Lib. 3. Cap. 5., & Lib. 5. Cap. 4.: ubi quotquot toto vitæ meæ cursu malè cecidisse observavi, aut saltem me observasse memini; eos omnes, nedum ingenuè descripsi, sed eâ simulatione indigitavi, ut indè regulam elicerem aliis communicandam, quâ mediante ab exhibitione frustraneâ Remedii, quod cùm non sanat, ab hominibus malè feriat necare dicitur, in similibus circumstantiis quisque caveret.

(b) (*Febribus Continuis &c.*) *Continuis Febribus ab essentiâ talibus,*

bus, quales rationabiliter fuisse puto, quæ in citatâ Constitutione Uratislaviensi populariter grassabantur, & cujusmodi sunt omnes, quæ nomine *Continuarum simpliciter* solent donari, Peruvianum Corticem, nisi noxiè, saltem inaniter adhiberi, non est quòd aliorum testimoniis conetur probare Cl. Auctor; cum delendo nimix hujusmodi fiducia, & Praxeos intemperantis abusui, ipse quoquè in Tractatu meo, tum rationibus, tum observationibus sedulò allaboraverim. Mihi propterea hæc, quæ ex Actis Lipsiensibus, ac ex Ephemeridibus Curiosorum Naturæ petita est Auctoritas, nullo pacto adversatur. Sed si qua alicubi unquam reperiretur, quæ Chinam Chinam excluderet, ubi eam incunctanter necessariam statui, scilicet in *Perniciosis Intermittentibus*, earumque præcipiti periculo jam detecto, Methodumque meam expressè damnaret, in funestis etiam circumstantiis illarum de more perutilem; hujusmodi, fateor, auctoritatem, aut auctoritates, quotquot fuerint, creberrimæ, semperque uniformi experientix meæ reluctantes, nihili facerem, etiamsi forent Responso Æsculapii, aut Oracula Apollinis. At nulla adversa, saltem quæ rem percutiat, uspiam profectò reperiri potest auctoritas. Si enim Methodum Auctoribus penè omnibus usque adhuc incompetam tradidi; quo pacto poterit ea ab iis, quibus cognita nunquam fuit, aut in usum deducta, expressè damnari? Liceat ergo mihi hac in re peculiarem tantùm observationem, & longam, rationalemque experientiam promulganti, Scriptorum quorumcunque conjecturas, si quæ sint, quæ genericè prolatae adversari videantur, ut falsas Magnorum Virorum haud satis expertorum suspiciones, aut hallucinationes potiùs corrigere, quàm ut Oracula venerari.

(c) (*Videndus Ettmullerus &c.*) Videndus utique Ettmullerus; sed secundùm id, quod §. 7. præcepit Cl. Auctor, videndus ubi de *Febribus* agit, ac *illarum Remediis*: ibi namque hæc saltem leguntur pag. mihi 198. *Vocatur etiam* (loquitur de Chinâ Chinâ) *Antiquarium Peruvianum*, ex eo quòd in *Quartanâ* sit *singulare*, utut etiam *Tertianas Chronicas*; item *Tertianas duplicatas etiam Nothas feliciter curet*. Et paulò inferiùs cum *Gentianæ pulverem loco pulveris Chinæ Chinæ* assumi quoquè posse priùs dixisset, subdit hæc verba -- *Utut certum sit, Chinam Chinæ esse egregium remedium, tam in Quartanis, quàm Tertianis diuturnis*. Neque ibi quicquam legitur, quod illius usum vel minimùm improbet: tantummodo hanc cautelam subjungit. *Sed observetur, quòd ritè præmissa debent esse universalia, & quòd post usum Chinæ Chinæ leniter expurgandum sit Corpus, aliàs certò recidivant Febres*. Hoc tamen monitum, non tam de præmittendis universalibus, quàm de purgatione quacunque post propinatam Chinam Chinam instituendâ, ut scilicet inhibeatur relapsus in Febres, mihi, ut verum fatear, ostendit apertè, hunc Auctorem cæteroqui præclarum, in usu tamen Peruviani Febrifugi fuisse parum versatum, ob rationes etiam infra recensendas: nullum enim meâ, & universali expertorum ferè omnium observatione, medium certius est ad revocandas Febres Chinâ Chinâ depulsas, quàm post Antipyretici illius oblationem quæ-

libet, utut levis, successive administrata purgatio. Sed hallucinatio hujusmodi, pluribus aliis Scriptoribus, hoc Febrifugum procul dubio rariùs expertis, fallacique tantum ratiocinio fidentibus, etiam communis, maximè condonanda est huic Auctori, qui brevè dies suos implevit, nec trigèsimum nonum ætatis annum transegit (obiit verò anno 1683.) scripsitque Posthuma hæc valde juvenis, eoque tempore, quo vix cœperat (nec forsan cœperat iis in regionibus, ad quas nonnisi ferius pervenit) experimentis increbrescere fama remedii, illi fortasse vix noti.

Hujus rei conjectura est valde firma, ne dicam probatio certa, quòd ille Remedium describens loco citato, primò illud sub *Radici*, mox sub *Corticis* nomine designet, tribuatque illi *saporem ferè instar Cinnamomi*; cum tamen quòd ad saporem minùs distent a Cydoniis malis Mespila, quàm China China a Cinnamomo. In Phytologiâ postmodum Schroderi dilucidati meliùs edoctus, verum Chinæ Chinæ saporem se paulò magis nosse indicavit: novis tamen interim & ibi allucinationibus eum detentum videas; non modò quia in Italiâ Medicinam facientem dicat Digbæum Anglum, & in Galliâ Redium Italum (hæc enim sunt de levioribus) sed maximè quia genuinam Chinam Chinam ex Româ afferri asserit, quasi in Romano Solo hæc Planta frondescat, aut in Peruano florescat Roma; tandemque quia contendit Gentianam nostratam (proh lapsus!) esse æquiparandam, forsan & præferendam, eidem Chinæ Chinæ:

Verum hæc tantum alias inter caput extulit herbas,

Quantum lenta solent inter Viburna Cupressi.

Fatetur nihilominus iterum hisce verbis, eam esse *Remedium expertum contra Febres Intermittentes quascunque, etiam Chronicas, in specie Quartanas*: item, *usum illius esse in debellandis Febribus Intermittentibus Francofurti quoque satis frequentem, nec carere optato successu &c.* Quæ omnia, & his similia leguntur Classe primâ Phytologiæ Schroderi dilucid. pag. mihi 43., & 44.

Si ergo Auctor iste alibi, nempe ubi *De Usu, & Abusu Præcipitantium*, suis innixus ratiociniis quicquam protulit, quod Peruviano Cortici minùs favere videatur; quanti ponderis in hoc censenda sit illius assertio, ex superiùs dictis, & infra dicendis eruat Lector. Addo nihilominus, Ettmullerum ibidem, in citatæ nempe Dissertationis *De Usu, & Abusu Præcipitantium* Capite tertio, §. 5., priusquam suas exceptiones adducat, hæc præmittere - *Superiùs dixi, Corticem Peruvianum fugare suo usu quasvis Intermittentes; id quod verissimum arbitror: nec has solùm, quin &c.* ubi verò easdem exceptiones protulit, expressè loqui de usu tantum, ut inquit, *illegitimo, cum videlicet (sequitur ille) paulò ante, non post paroxysmum assumitur Cortex, vel proprio ausu, vel Medici præcoci consilio, & nedum ad Intermittentes Febres, sed & ad Continuas quoque, tam benignas, quàm malignas, Symptomaticas, Lentas, & quæ ex decubitu materiæ peccantis in quandam partem oriuntur*: quibus in Febribus, vel perperam, vel saltem incassum usurpari eundem Peruvianum Corticem certum est, ut præter Ettmullerum ipse quoque Libro 5. Therapeutices meæ satis admonui.

Cæte-

Cæterum notatu dignum est quod nuper innui, nempe omnem suspicionem malorum, quæ ibidem recenset hic Auctor, quæque ait posse contingere *ex usu illegitimo* Peruviani Corticis, locum habere tantummodo, ipso quidem latè fatente, ubi Cortex *ingruente paroxysmo* exhibeatur; secùs si exhibeatur *post paroxysmum* solutum. *Obtinet hoc* (inquit ille eodem §. 5. capitis tertii) *Obtinet hoc de Cortice dicto, ante paroxysmum more hætenus recepto exhibito*: subdens postmodum ferme immediatè -- *Concinnior itaque, ac tutior ista videtur exhibendi methodus, quâ post paroxysmum, & intermissionis tempore, idque præsertim in infuso cum Vino, repetitis tamen crebriùs vicibus, exhibetur*: ut ideo hac viâ, *cita, tuta, & jucunda magis videatur cura*. Hæc ille; qui proinde *crebram, & repetitam*, ut patet, oblationem Remedii, nedum non improbat, ut eam improbat Cl. Ramazzinus; verùm potiùs, eâ sic institutâ, *citiolem, tutiolem, ac jucundiolem* indè curationem emerfuram sperat.

Quòd si nonnullas hìc illic intersevit Scriptor iste querimonias, facilem nonnunquam Februm recursum connotantes, etiamsi Cortex adhibeatur *ex arte*; id ego quoquè, rariùs licèt, contingere nequaquam diffiteor: sed cum sæpissimè, ac de more contingat oppositum, usui potiùs, quàm exclusioni Remedii favet hæc infrequens ejusdem Auctoris observatio. Alias, si quas obtrudit mucidiùsculas scrupulositates, partim desumpsit ille a Scriptoribus nonnullis priorum præsertim temporum (quorum alii adèò nervosè a Bado fuere impugnati, ut ne hiscere quidem ausi fuerint, alii experienciâ ulteriore adèò profecerunt, ut eo extincto palinodiam sponte cecinerint) partim deprompsit a semetipso; cui & propria brevis ætas, & recens adhuc Corticis in eas præsertim Oras adventus, locum nequaquam reliquere, quo meliùs præconceptam qualemcunque hæitationem diutiori, & crebriori usu emendare potuerit. Sed si vixisset, ut facilè poterat, in hanc usque diem, & triginta duorum annorum, qui ab ejus obitu usque adhuc præteriere, experienciâ fuisset nactus, aliarumque Nationum tot nova, & tam præclara legisset monumenta; nullus dubito, quin sinè ullâ trepidatione cum reliquis consensisset, hujus remedii usum, & innocentiam planè incunctanter admittentibus.

Ad rationem denique petitam *ab Acido morbofo Spiræ ad instar compresso*, quam adversùs, non Chinam Chinam, sed *Præcipitantes omnes generaliter*, & quidem, ut rursus ait, *sub illegitimo usu* adhibitos, adducit idem Ettmullerus, & *Automatis* exemplo illustrat, liceat respondere in casu nostro, Spiram Acidi morbofi haud difficulter forsan ita compressam iri, ut omni elasticitate deperditâ nequeat ampliùs resiliire, si sufficienti Absorbentis Corticis *quantitate*, congruo tempore, ac modo, prout a me indicatum est, propinatâ, prematur illa fortiùs, ut tandem penitùs infringatur.

(d) (Legendus Thomas Sydenham &c.) Legendus quoquè, perlegendus, nocturnâque manu, ac diurnâ versandus Celeberrimus Thomas Sydenham, quem pro Antesignano & ipse habui toto Therapeutices meæ decursu: proinde qui me renuit sequi, sequatur Sydenham, mecumque

vel invitus ferme coincidet. Revera hanc ipsam hujusce Scriptoris cautelam, a Cl. Ramazzino hîc loci recensitam, de oblatione Corticis Peruviani partitè potius, & extra accessionem, quàm acervatim, & in ipsâ accessione in Quartanis, aliisve diuturnis Intermittentibus, apposui & ego; imò & usu proprio confirmatam, exercitamque in illis iisdem circumstantiis expressè tradidi pag. 116., & 117. ejusdem Therapeutices meæ. Id nihilominus lubet addere, hanc ipsam videlicet cautelam, etsi rationalem in illiusmodi saltem casibus, appositam tamen fuisse in Libro suarum Observationum Medicarum ab Anglo illo Scriptore, cum nondum usus Remedii, a 25. circiter annis tantum tunc in Europam delati, erat universaliter satis perspectus: neque ipse perfectam illam adhuc erat nactus, quam deinceps acquisivit experientiam, fiduciamque, in reliquis postea ejusdem Operibus abundè patentem. Mirum verò, quòd auctoritatem hujusce Scriptoris ullo pacto attulerit Vir Cl., haud satis animadvertens, quòd dum inquit, a Sydenhamio *laudari pulverem Peruvianum pluribus vicibus sumptum*, sibi statim officit, qui eundem pulverem *minimè repetendum esse* inculcat ubique. Sic & loco ipso per Cl. Opponentem allegato, & innumeris aliis asserta mea ubique confirmat Doctissimus Sydenham; illius verò dogmata omnia funditùs evertit. Liceat ergo, ipso provocante, hîc immorari tantisper, variosque ejusdem Sydenhamii Textus, prout prostant in Tractatu meo, huc iterum transferre in conspectum Dissertationis Cl. Ramazzini, mala jugiter ad se se attrahentis, ut Cecias nubes.

In hac Dissertatione §. 21., & alibi inquit is, Chinam Chinam noxas plurimas, videlicet *Obstructiones, Cachexias, & Hydropem inveterare*, quemadmodum & vidimus, & posthac videbimus. Inquit verò Sydenham in Epistolâ Responsorîâ ad Bradyum pag. mihi 342. -- *Verè affirmare possum, non obstante tam vulgi, quàm perpaucorum e doctis præjudicio, me nihil mali Ægris accidisse ab ejus usu vidisse unquam, vel cum ratione suspicari potuisse: & paulò post -- Profectò si tam effectorum durationem, quàm Corticis hujus innocentiam exploratam haberem, principem illi locum inter omnia, quot quot sunt, remedia deferre nullus dubitarem &c. Tantum abest, ut de ejus insalubritate meritò quis conqueratur. Vide Therapeutice meam pag. 14., & 15., ibique plura etiam alia reperies ab hoc Auctore nonnihil acriter exarata. Scias enim, hæc de innocentia Peruviani Febrifugi scripta fuisse a Sydenhamio etiam ad dissipandas nebulas, quas illius usui, cum primum cœpit in Angliâ crebriùs adhiberi, offuderat casus aliquis, in quo illud, ut ait, *minùs opportunè fuerat Ægro ingestum*; cujus inopportunitatis conjecturam aliquam ulteriorem addidi & ipse in Tractatu meo pag. 362.*

Subdit Cl. Ramazzinus, dosim Chinæ Chinæ esse debere *ad Drachmam unam, vel duas tantum; nec eam esse repetendam ad prophylaxim*, pluribus quidem in locis, sed præcipuè §. 8., & §. 48. Afferit Sydenham, loco ipso per Cl. Virum nuperrimè citato, præscribendam esse *unciam unam Chinæ Chinæ*, pro curatione Quartanæ Febris cum

Conservâ Ros. commissam; eamque bis in die paulatim esse assumendam, donec tota Confectio sit absumpta, subditque hæc verba -- Repetatur porrò ad tres alias vices interjectis semper diebus quatuordecim. Uncias ergo quatuor, seu Drachmas 32. Chinæ Chinæ impendit Sydenham pro curatione, & prophylaxi Quartanæ Febris. Sed tunc nondum firmo talo incedebat ille in præscriptione Corticis. Efficacius adhuc agit in citatâ Epistolâ ad Bradyum pag. 346., & 347., ubi ulteriore experienciâ confirmatus, unciam unam Chinæ Chinæ intrâ biduum intermissionis ejusdem Quartanæ, duodecim scilicet partitis vicibus, singulo quadrihorio repetitis, integrè absumit; quaterque renovat, octo tantùm diebus interjectis, eandem oblationem unciaë unius, ut supra. Videtis Therapeuticen meam pag. 127.

Contendit Cl. Ramazzinus, In Malignis Intermittentibus incassum confugere Medicos ad Sacram Anchoram Chinæ Chinæ, cum Febres hujusmodi ab initio difficulter dignoscantur; de quo latè §. 29., & 30. Affirmat Sydenham in eâdem Epistolâ pag. 352., Febres Intermittentes Symptomate insigni Apoplexiam veram æmulante comitatas, quas inter magis Perniciosas collocat Mercatus, quasque ego Lethargicas appellavi, Omissis omnino evacuationibus quibuscunque, in primariâ Apoplexiâ fieri solitis, expectandum esse tantummodo, donec paroxysmus sponte evanuerit; quo tempore Cortex (modò citius idem ingeri non potuerit) quàm primùm est exhibendus, & in intervallis ab hujusmodi accessionibus liberis idem sedulò repetendus, usque dum perfectè convalesceret Ager. Ita ille. Vide Therapeuticen meam pag. 260., & 261.

Denique improbat Auctor Dissertationis usum Corticis Peruviani in Febris illis Continuis, quæ de Intermittentium prosapia sunt, & quid malignum portendunt, ut nuper §. 33. Contra in citatâ Epistolâ scribit incunctanter hæc Sydenham pag. 349. (vide Therapeuticen meam pag. 555., & pag. 620.) Cum Febres quædam apud nos grassentur, quæ etsi post secundum, tertiumve paroxysmum reponere se in classem Continuarum nitantur, tamen ad Intermittentes debeant referri, nulla mihi religio est, Corticem vel in maximè Continuis hujus speciei sumendum proponere, qui dicto more (videlicet ad scrupulos duos quartâ quaque horâ) iteratus, ad apyrexiam certò Aegrum perducet. Atque ita secundùm Sydenhamium singulis diebus naturalibus quatuor drachmæ Peruviani Corticis impendentur pro certâ curatione Februm maximè Continuarum, quæ sint de Intermittentium prosapia, pro quibus peculiariter curandis, subdit insuper ibidem. Hic autem observandum, quòd quò magis Febris ad Continuitatem accedit, eò major Corticis quantitas est exhibenda. Itane igitur istiusmodi Patronis suam causam fatagit sustinere, & meam prostrernere Cl. Auctor? Scilicet dum Chinam Chinam ab horto Medico evellere aggreditur, Anagyrim incautus movet.

Legendus itaque (repetam & ipse) Thomas Sydenham, nedum in Observationibus Acutorum, sed & in Epistolâ Responsoriâ ad Bradyum, & in Dissertatione Epistolari ad Cole. Imò si adeò placeant, quæ Sydenham scripsit, eâdem quoquè ratione legendi Viri alii Cele-

berrimi non alia sentientes, Sebastianus Badus in Anastasi Corticis Peruviae, Richardus Morton De Cortice Peruviano, & ejus virtute Febrifugâ, Christianus Joannes Langius De Febrifugâ pariter ejusdem Chinæ Chinæ virtute, Franciscus Maria Nigrifolus, simulque Nicolaus Blegnyus, Talbotius, Restaurandus, Monginotius, d'Acquin, & Sponius Lib., cui titulus *Febris Chinâ Chinæ expugnata* &c. Videndus etiam Guilielmus Cole, Hadrianus Helvetius, Teophilus Bonetus, Antonius Franciscus Bertinus, Joannes Jones, Joannes Jacobus Mangetus &c. *Legi quoque merentur* inter antiquiores Rolandus Sturmius, Gaudentius Brunaccius, Antymus Conygius, & inter Recentiores Anfanus Franciscus de Hyeronymis, Carolus Franciscus Cogrossius, Bernardinus Zendrinus, alique propemodum innumeri, quos modò recensere non vacat; in progressu tamen vacabit opportuniore loco.

(e) (*Ubi de intempestivo* &c.) *Observationes de intempestivo*, ut ait Cl. Auctor, *Chinæ Chinæ usu* adversus *tempestivum usum* nil probant, ut pluries dixi; quodnam enim tam levidensis texturæ cerebrum, ut remedii, quantumvis optimi, administrationem etiam intempestivam commendet? Quamobrem ad observationem D. Grugeri exclamabo tantum. Quodnam crimen Peruviani Corticis, si Pastor ille ignorabat Aphorismum Hippocratis 70. Sectionis quintæ - *A Quartanis capti non admodum a Convulsionibus capiuntur: si verò prius capiuntur, & Quartana supervenerit, liberantur?* Quænam Febris magis *depurativa*, quàm isthæc? Anne propterea ignari Pastoris loco damnabitur Remedium egregium, quod illam sustulit? atque ubi Coquus peccavit, vapulabit Tibicen? Suppressionem Februm Intermittentium, quæ aliorum nonnunquam morborum semina deleant, rejectam vide in Therapeutice meâ pag. 143. 144. 541., & alibi. Oportet ergo distinguere *Ubi*, *Quando*, & *Quomodo* sit exhibendus Peruvianus Cortex, ut exhibeatur utiliter, quemadmodum expressè monui pag. 348. ejusdem Tractatus. Nec aliter quidem nobis agendum in praxi; nec enim ipse aliter, ac in Scriptis tradiderim, in praxi exerceo.

Uno Augusti mense currentis anni decem saltem Ægrotos vidi Quartanâ intermittente recens correptos (hujusmodi enim februm feracissimus fuit hic mensis) quibus nil ferme aliud suasi, nisi temporaneam ipsius Quartanæ gestationem. Nemini eorum Chinam Chinam adhuc præscripsi; cunctis tamen præscripturus, si quando tempus, & opus id tulerit. Interim citra exigentiam Febris, vel deterioris, vel diuturnioris redditæ, eâ utar sobrietate, quam mihi familiarem jugiter prodidi pag. 149. & 190. præcitatæ Therapeut. meæ. Summa itaque negotii hæc est. Febris haud infrequenter homini potest prodesse, ac revera nonnunquam prodest; sæpius verò illi, aut vitam adimit, aut œconomiam vitalem plurimum labefactat. Atque ita sæpius utile, imò & necessarium est, Chinâ Chinâ febrem delere (quoniam inter Febrifuga non aliud æquè idoneum prostat) nonnunquam verò temerarium, aut noxium. Munus ergo boni Medici est hæc duo probè distinguere, ut a Barbitonforibus, & Pharmacopolis distinguatur & ipse. Atque hæc sunt, quæ non adeò facilem reddunt *rectam*, &

rationalem administrationem celeberrimi hujusce Febrifugî : quâ de re vide Therapeut. meam , tum Cap. 8. Lib. 1. , tum maximè Cap. 5. Lib. 4. Sic & in Febribus frequenter recidivis satius est pedetentim progredi , nec illarum recursum statim reprimere ; sed ita præbere se temperantem , ut partim ex se ipsâ , partim remedii vi Febris deficiat. Neque pudeat Medicum , Ægris Chinam Chinam pro Febrium quarundam suapte naturâ diuturniorum medelâ intempestivè poscentibus , respondere quandoque illud Ovidii

*Quod malè fers , assuesce ; feres bene ; multa vetustas
Lenit ———*

S. 36.

(a) **M**emoratu quoque dignum est , quod in paulo ante citata Uratislaviensi Constitutione legitur de duobus Clarissimis Medicis Riccardo Louver celeberrimo Anatomico , qui Elegantissimum Tractatum de Corde edidit , & Sohört , qui in febre continua ex temulentia orta Peruvianum Corticem sumpserunt , qui nono , vel undecimo die , aut circiter utrumque è medio sustulit. (b) Nefas porro ducere omittere id quod refert Doctissimus Joannes Willelmus Rhambergius in Ephem. Cur. Nat. Decad. 3. Anno IX. & X. , ubi narrat historiam cujusdam legionis pedestris , quæ prope Manhemium æstiva Castra posuerat , & paulo post 400. fere milites febre tertiana correpti fuere , quibus Chirurgus ad aliquot dies Chinam Chinam exhibuit , qui brevi omnes hydro-pici evasere cum omnimoda virium & appetitus prostratione.

(a) (Memoratu quoque &c.) **I**N Febre Epidemicâ per essentiam Continua citatæ nuper Constitutionis Uratislaviensis , quâ occubuerunt duo illi Cl. Medici , jam dictum est supra , Peruvianum Corticem perperam usurpatum fuisse ; de quo abusu satis clamat Tractatus meus , ubi semper , si non ut noxius , (quod profectò non auderem asserere) saltem ut frustraneus in illiusmodi circumstantiis a me rejicitur. Quod si contendatur , eam Febrem fuisse de genere Subcontinuarum a me descriptarum (quod tamen minimè admittam) certè , quocunque modo usurpatus fuerit a duobus illis Medicis Peruvianus Cortex , non fuit saltem usurpatus *Methodo mea* , iisdem ignotâ , quod mihi sat est. Neque enim Febres *Perniciosas* ,

jas, nedum *Continuas*, sed nec *Intermittentes*; Cortice *semper* curabiles dico, nisi ille *meâ Methodo*, quam idcirco *Specialem* appellavi; diligenter administretur; secus si Methodus quælibet apta *semper* esset ad opus, *peculiarem* meam promulgassem incassum. Ita nempe observavi Mutinæ; atque haud aliter putarim contingere potuisse & Uratislaviæ. Singulari nihilominus animadversione dignum est, quod mors illorum Virorum, quæ contigit exacto, ut mos est, Acutorum stadio, *tam fidenter*, *tamque animosè* a Cl. Auctore imputetur Peruviano Cortici, quamvis extra rem assumpto; *qui* scilicet, ut facile decernit ille, *utrumque e medio sustulit* (quasi de mortifero quodam pharmaco sermo esset) minimè verò tribuatur *Temulentiae*, aut *Continuæ Febris epidemicè grassanti*, ac *populariter*, ut supra, *funestæ*. Profectò ego nescio quid nominis pseudo-propheticæ huic divinationi conveniat.

Divinationem sanè, seu potius rationalem consequentiam valde dissimilem ex hoc alio Casu (quoniam de Medicis incidit sermo) eliciendam ego censuerim. Vidi nuper Medicum hujus Urbis laborantem Febre *Continuâ* ejus generis, cui verè proficius judicio quoque meo, minimè censendus erat Peruvianus Cortex: Febris namque vix de *Remittentium simpliciter*, non de *Subintrantium* stirpe videbatur. Comitabatur illam dejectio valde frequens, jactatio, & faucium ariditas. Post septimam circiter morbi diem (quo tempore amicitiae causâ ad illum invisendum accessi) Diarrhœæ cœpit adjungi sudor aliquis, inanis tamen, & nullius adhuc juvaminis. Nonnullos post dies, cum rursus ad eum accessissem, narravit ille mihi, se morbi vim, & vehementiam pertesum, eo ipso mane potasse pulveris Peruviani drachmas duas uno haustu; ægrè tamen, nec planè ex animo consentiente Docto Amico ipsum curante: subdidit nihilominus, totidem pariter ejusdem pulveris drachmas se potaturum postridie. Admonitus a me de probabili vacuitate hujusce tentaminis, non ideo tamen abstinuit; cum me satis novisset a remedii semel jam sumpti repetitione minùs alienum, ac a primâ illius sumptione, si fortè fuisset consultus. Animosior adhuc factus est ille, postquam ab ore meo excerpserat haud difficulter, omnem suspicionem tandem restringi ad irritum tantùm, minimè verò ad noxium usum Febrifugi quavis malitiâ carentis. Sumpsit itaque iterum Corticem, prout animo præconceperat; mox tamen cessavit, consilio etiâ meo, remedii modicâ jam dosi adhibiti effectum, quicumque indè emerisset, tantisper expectaturus. Accedente interim morbi statu, & Diarrhœâ nonnihil mitiore redditâ, largior non parum sudor cœpit erumpere; qui ad vigesimam primam usque diem protensus, visus est Febrim ferme penitus extinxisse. Non proinde tamen ea substitit; sed obscuris motibus quotidie exacerbata, ansam rursus paulò rationabiliorem dedit Ægroto (me quoque non dissentiente) ut Chinæ Chinæ parciore dosibus assumptæ vires iterum experiretur. Quod etsi ad plures dies tentasset, semidrachmâ nempe illius, primò bis, deinde semel in die epotâ; nihilominus ad trigesimam quintam circiter diem protracta est integra judicatio Febris, consueto temperationis Diarrhœæ cursu, & spontaneis de more sudoribus tandem soluta.

Post illius solutionem ingenuè fassus est ille mihi, se primis quoque morbi diebus morboſo pariter nescio quo percitum æstro (cum aliàs nunquam in suis Ægris curandis quicquam tale peregiſſet) nonnullas ejusdem Chinæ Chinæ drachmas clam quidem omnino, sed & incassum potasse. Non ego idcirco unquam crediderim, sanationem hujusmodi, quippe seriusculam, & difficilem, hoc casu adscribendam Cortici; sed Naturæ, opus, quod jamdudum molita erat, tandem perficienti. Id potiùs exinde concludendum putarim: primò nempe, Chinam Chinam, sicuti hunc Medicum sanitati restitutum, me quidem judice, nequaquam sanavit; ita duos illos Medicos a Cl. Auctore citatos, & vitâ functos nequaquam interemisse: secundò, eventum hunc, aliosque non absimiles mihi observatos, semper magis in dies suadere posse, usum verè proficuum, & rectum Peruviani Corticis, nec ampliores, nec strictiores pati cancellos iis, qui a me fuere in Tractatu meo constituti: tertio denique, Antifebrile istud verè Specificum, tam cum apertè convenit, quàm cum minùs videtur convenire, nullas evacuationes criticas, cujuscunque sint generis, a Naturâ institutas, aut præordinatas inturbare; ipsumque tantummodo forsan obesse posse nonnunquam, ubi præproperè Febrim seriùs curandam valeat sistere; non ubi vim suam Febrifugam nequit exèrere.

(b) (*Nefas porrò ducerem &c.*) Nefas ego duxissem potiùs recensere historiam hujusmodi. Toxicum certè aliquod paulò ante contudisset necesse est in eo Mortario incautus Pharmacopola, in quo Chinam Chinam postmodum quoque contudit; unde quadringentorum simul Abdominum inflatio subsecuta. Dixerit potiùs Relator historiæ, eâ de causâ, quâ tota ferme Legio illa decubuit, (fortè ob locum, victum, aquas, & aerem) plurimos ex iis militibus, ab imperito etiam Chirurgo Chinâ Chinâ sine methodo oblatâ curatos, subtumidos quoque, aut Lienosos factos fuisse; quemadmodum in Urbibus, aut Locis palustribus, Februm æstivarum feracibus, sive adhibito, sive non adhibito Peruviano Cortice, quotannis videmus accidere. Si enim verè *hydropici prope Manhemiùm 400. illi milites omnes evasissent ob Chinam Chinam*, ut asseritur, *ad aliquot dies assumptam*; cum tantus sit apud nos, exprobrante Cl. Auctore, ejusdem Febrifugi abusus, jam hydropicorum chiliades Mutinæ numerarentur. Sed hujus ingenii historias, bonâ cujuscvis veniâ, inter Fabulas liceat reponere. Scilicet ad has nugas, ad has vaniloquentias confugere opus est Cl. Auctori, ut suam, cui germanæ non suppetunt historiæ, Causam futilibus tueatur.

§. 37.

Febres hujus generis, quæ ubi eò pervenerint, ut amplius non recalescant corpora, audio istic algidas à Practicis appellari, (a) *sed scito illos decipi*, nam febres algidæ alio nomine castrenses dictæ, à sui initio usque ad finem

finem algorem habent comitem perpetuum, de quo vide Etmul. de Febr., Helmo. de Febr., Sylvium, & alios. (b) *Hinc magnum documentum* habere possunt castrenses Medici, quàm periculosum sit in febribus hujusce indolis hoc Febrifugo uti, nam in morbis hujusmodi generis (quod idem de Epidemicis dicendum) sanum consilium est pravos & malignos humores ad ambitum corporis per diaphoretica sensim promovere, potius quàm figere, & concentrare, uti fecit Chirurgus ille imperitus.

Post tentatas hætenus, & successivo particulatim ordine repetitas agressiones Tractatus mei, generale quaquaversum certamen tandem indicit, & hinc illinc classicum canit Cl. Auctor, modò hanc pro re natâ, modò illam partem invadens; omnimodam demum totius Operis everisionem molitus. Deinceps ergo quò me trahet identidem Cl. Viri vexatio inconstans; eò tendet laceffita, ut tempestivè occurrat, præsens ubique defensio mea. Pergendum igitur.

(a) (*Sed scito illos decipi &c.*) Hospes adeò non sum in Medicinâ, ut Februm nomenclaturas frequentiores ignorem, earumve differentias confundam, qui aliquando saltem novi distinguere, Ægrotante ne inspectâ quidem, Bubonocelen, sive Herniam intestinalem ab hysterico dolore, & solâ Subligaculi præscriptione (admotione verò Peritis commissâ) statim sanare inde ortam passionem Iliacam, cui antihysterica remedia, & incassum, & perperam quis adhibebat. Quòd si istiusmodi Intermittentes Febres, quas descripsi pag. 280. Therapeutices meæ, quæque Sextam apud me Perniciosarum differentiam constituunt, *Algidarum* nomine, quippe alio peculiari carentes, indigavi; minimè propterea me *deceptum* puto. Quâ enim ratione *Continuæ* Febres, quæ *a sui initio usque ad finem algorem habent comitem perpetuum*, *Algidae* appellantur, ut docet ex Tripode Cl. Auctor; eâdem quoque ratione *Algidae* nuncupantur a me *Intermittentes illæ*, quæ ab initio Accessionis usque ad finem illius, consueti caloris loco, eundem pariter algorem habent comitem perpetuum: hac unâ differentiâ adjectâ quòd illæ *Algidae Continuæ* vocantur; istæ *Algidae Intermittentes*.

Vix tamen hic risum continere queo, mente recolens, quòd de hujusce nomenclaturæ novitate me criminari contendat Vir Cl., auctoritate Helmontii, Ettmulleri, & Sylvii in medium adductâ, cum non aliis ferme, quàm hisce Patronis Causam ipse meam possim tueri. Si enim de Helmontio sit sermo, nemo unquam præ illo Scriptore, in morbis, aliisque rebus explicandis vocum novitate Medicinam ferè dixerim inquinavit; & tamen minùs ægrè tulerunt Scholæ *Blas*, *Gas*, *Archeum*, *Alkaest* &c. Helmontii, ac ferat modò nomen *Algidarum Intermittentium* Cl. Ramazzinus.

De Ettmullero , & Sylvio non aliud dicam , nisi me ab utroque Scriptore *Algidarum* , seu *Frigidarum Intermittentium* denominationem didicisse . Ettmullerus siquidem Cap. 17. De Febribus pag. mihi 187. *Febrium Frigidarum* exemplum aliquod allaturus , statim *Tertianam Intermittentem* describit his verbis huc summatim translatis--*Exempla Febrium frigidarum non tam a Sylvio fuerunt observata* (statim igitur auctoritate Sylvii semetipsum , & me tuetur Ettmullerus) *sed & mihi contigit observare &c. Erat hic Artifex , qui laborabat perfectâ Tertianâ , seu recurrebat febris tertio quoque die , anticipando semper duabus horis cum nullo subsequente calore &c. Paroxysmus ingruerat cum insigni rigore , & horrore gravissimo , qui ultra horam integram durabat ; postmodum cum deberet succedere calor , nullus apparebat omninò &c. Paroxysmi observabant ordinarium typum , anticipando per horas duas.* Hæc Ettmullerus . Ne verò ulla suspicio incidat , hujusmodi *Tertianam* minimè fuisse *Intermittentem* , etsi symptomatis prædictis stipatam , sed fortasse *Continuam* , observetur quid in illius curationis progressu manifestè subdat ipsemet Scriptor - *Præscribo* , inquit , *die intermissionis &c. & rursus , Die intermissionis denuò continuavit Misturam &c.* Iciens ergo ictus est eodem lapide , ut assolet , Opponens Cl.

Prodeat tandem in Scenam & Sylvius , qui Cap. 30. De Febribus Intermittentibus §. 7. , & 8. , pag. mihi 241. hæc habet -- *Ratione Symptomatum graviorum (quemadmodum de Synochis jam dictum) nomina diversa sortitæ sunt Febres Intermittentes . Nam primò Algidae observantur nonnunquam , non tantum frigore præsertim , sed frigore tantum molestæ ; adeout aliquando , & frequentius levis , aliquando & rariùs nullus sequatur Calor . Tales etiam semper Algidas in Nòsocomio Academico habuimus ita manifestas , ut non tantum incipiente , atque augescente , sed etiam vigente , ac declinante , imò cessante Paroxysmo , idest semper , tum suo , tum Adstantium , tum Medicorum sensu molestè ubique frigerent , nunquam teperent , minùs calerent ulli Ægri . Suntque hæc Algidae graviores semper forsan Quotidianæ.* Hæc pariter Sylvius . Et hæc pariter occasione Asciam cruribus suis illisit Cl. noster Auctor . Mirumque planè , quòd ob tam decentem , quam respuit immeritò , nomenclaturam , velit auctoritate præsertim Sylvii me redarguere Vir idem Cl. , cum potiùs habeat unde Sylvium ipsum corripiat , qui majore forsan pusillorum scandalo haud veritus fuit in Catalogum Febrium plures referre magis peregrinas , *Sputatorias* puta , *Ureticas* , imò & *Cacatorias* , Nasutulis fortè plurimis non benè olentes .

(b) (*Hinc magnum documentum &c.*) Maximum documentum , quod in *Algidis Intermittentibus* curandis possint habere tam Urbani , quàm Castrenses Medici , est , ut fidenter utantur Peruviano Cortice , qui teste experienciâ illas quotidie sanat ; nunquam verò easdem sanant , quæ incassum tunc adhibentur Medicamenta Diaphoretica . Hujusmodi enim Febrifugus Cortex Fermentum omnium Intermittentium Febrium , etiam Perniciosarum , cujuscunque demum naturæ illud fuerit in diversis earum Speciebus , *absorbet* , sive , ut explicat citatus a Viro Cl. Ettmul-

Ettmullerus De usu, & abusu Præcipitantium, *invertit, attemperat, saturat*, aut etiam si ita placeat, *figit*, atque *concentrat*: quod perinde est, tum apud eundem Auctorem, tum apud me; in eo videlicet sensu, in quo explicui in Therapeutice meâ a pag. 43. usque ad 47., & non aliter. Quid igitur mali putat innuere Vir Cl., dum ait, etsi gratis, Chinam Chinam morbosa semina *figere*, & *concentrare*, si D. Hippocrates Lib. de Vet. Med. docuit apertè, *Concentratione, & permixtione meliora, ac mitiora omnia fieri in homine?* Tantum ergo abest, ut ex hujusmodi *Concentratione*, aut *Fixatione* Fermenti febrilis mole *perexigui* (intellige idcirco *concentrationem* illius intrâ porosam Substantiam Corticis, non intrâ viscera humani corporis) sive in *Algidis*, sive in *Æstuosis* Febris quicquam sequatur incommodi; quin potius enervato æqualiter, & absorpto principio illo diversimodè hîc illic fermentante, omnes Intermittentium Perniciosarum Species etiam oppositæ, vel saltem, quæ tales nobis apparent, nempe tam de genere *Colliquativo*, quàm de *Coagulativo*, *victas dent manus*; quemadmodum annotavi, manuducente semper experientiâ, pag. 41., & 42. toties memorati Tractatus mei. De hoc itaque Febrifugo rursus affirmare liceat, quod generaliter olim de Remediis *Antifebrilibus* scripsit idem Hippocrates Lib. De Affectionibus, Illud nempe *Vim habere in Tertianis, & Quartanis Febris, ut potum corpus conservet in consuetâ caliditate, ac frigiditate, & neque præter naturam calefiat, neque frigeat*, ut cæteroqui in *Algidis* solet frigefieri, & in *Æstuosis* calefieri: eo enim ipso, quòd inhibet Paroxysmum febrilem, inhibet simul ejus comitem Algorem, ac Æstum, ut in historiis propemodum innumeris demonstravi toto ferme Libro Quarto ejusdem Therapeutices. Ut quid ergo inutiliter pugnatur ampliùs ratiociniis hinc inde fallacibus, ubi litem omnem dirimunt facta?

S. 38.

(a) **V** *Ide quæso mi Nepos* quomodo ex nimia facilitate præscribendi Peruvianum Febrifugum in febris, hoc remedii genus factum fuerit adeo commune Chirurgis, Pharmacopœis, Agyrtis, & ipsis quoque Fœminis, ut non ampliùs in Medicorum potestate sit illud rite administrare, & si Medicus rationibus velit obsistere, ægri ipsi febris obstinationem fastidientes, inscio illo Quinquinam capiant, quale vitium in hisce regionibus satis obvium & familiare est, sed magno ægrotantium damno, qui pœnas luunt, postmodum hypochondriacis affectibus, chachexiis, ac lentis febris correpti, ut postea

stea cogantur Medicos pro curatione accersere, qui multis remediis, (b) atque febres excitando morbum vincant, & remedia quærant ad sepultum ignem suscitandum, in quem finem laudatus Etmullerus spiritum salis armoniaci commendat, & (c) ficus Pharaonis, qui tertianas febres excitare creduntur. (d) Novum non est ignem febrilem penes prudentes Medicos suum usum habere. Sic Celsus scripsit *licere febres parvas augere, fortasse enim curationi opportuniores fient*. (e) Aureus extat locus apud Hippocratem de febre, quæ in Apoplexia interdum accenditur, qualem locum observat Ballonius Medicus experientissimus, nam si Apoplexia sit sine febre, venam secandam suadet, si vero cum febre præsertim acuta, à V. S. omnino cavendum, ipsi enim Naturæ arma præripimus, quibus hostem suum potuisset confodere. Alter locus Hippocratis extat in Libris Epidemiorum, *Puerperis convulsis ignem fac*, ajebat ille, hoc est febrem magnam excitato, febris enim continua græce pyr dicitur, parva autem pyretos. Idem præstat ignis febrilis corporibus male affectis, ac ignis agris humidioribus.

Sæpe etiam steriles incendere profuit agros,
ajebat Virgilius in Georgicis, varias quidem rationes inibi affert Poeta vere physicas, sed illa potior est, cum ait

————— *sive illis omne per ignem*

Excoquitur vitium, atque exsudat inutilis humor.

(a) (*Vide quæso mi Nepos &c.*) **I**psam Peruviani Febrifugi excellentiam sibi met aliquando obfutura; adeoque fore, tum ut faustorum eventuum frequentia illius *abulum* apud imperitos accersat, tum ut ex hujusmodi *abuso* aliquod quoque fundamentum acquirat Adversantium dicacitas, pro eo excludendo etiam tunc cum legitimè deberet admitti, jam pag. 383. Therapeutices meæ sum pridem vaticinatus. Neque tamen usum rectum apud gnaros supprimendum credam, ne apud ignaros invalescat abusus. Quod si *nimia in præscribendo Peruviano Febrifugo facilitati* imputet Cl. Auctor, quod remedium hocce, inter pretiosiora certè servandum, *factum sit commune Chirurgis, Pharmacopæis, Agyrtis, & ipsis Fæminis*, jure potiori imputabo ego *nimia facilitati* Obrectatorum illius

in eo proscribendo, quòd præstantissimum, & tutissimum hujusmodi Medicamentum hodie apud Uulgus audiat pro Pharmaco ancipiti, quod (ut olim de phlebotomiâ in Apoplecticis scripsit Celsus) *Ægrotantes vel liberet, vel occidat*: quo fit interdum, ut illud, magno cæteroqui in pretio, & honore habendum, vilescat; sitque non modò (æquè indecenter quidem) nunc usui, nunc ludibrio *Chirurgis, Pharmacopæis, Agyrtis, atque Mulierculis*; verùm etiam in Fabulis materiam dicteriorum suppeditet vel *Pueris ipsis*, & cuicunque insimul libet claudicare cum simulantibus Claudum, & pro re natâ cum Pueris pueralescere.

(b) (*Atquæ Febres excitando &c.*) Ad suscitandam iterum Febrem a Chinâ Chinâ depulsam Remedium certissimum est, nec ullum aptius prostat (quid enim aliunde emendicat Cl. Auctor?) quàm quælibet paulò post instituta purgatio, ut dictum est nuper, & latius adhuc olim pag. 125., 152., & 153., imò & exemplo confirmatum pag. 416. ipsius *Therapeutices meæ*: nisi fortè inter ipsam Chinam Chinam, & Purgans aliquod peculiare, V.G. de amaricantium Stirpe (quod quis observarit, quodque ego haud satis experiri studui) detur aliqua Symboleitas, quæ mutuum eorum nexum faciliè ferat, & sinè dissidio patiatur. Utcunque; generalis hæc Peruviani Corticis, nescio an dicenda mira proprietas, an potiùs infirmitas; quòd nempe ab assumpto quovis vel levissimo Leniente, hujusce Febrifugi virtus adeò infringatur, & langueat, ut redeat statim Febris antea fugata, hæc inquam proprietas, Medicis haud satis expertis (hujusmodi sunt omnes, qui hæc non callet) minùs perspecta, in causâ forsan aliquando fuit, estque etiamnum, ut Auctores nonnulli cæteroqui docti, ad educendam, ut putant, e corpore Causam febrilem, ipsi Chinæ Chinæ admisceant Purgantia Medicamenta, vel post biduum, aut triduum in eundem finem ea præscribant, vel, ad alvum, ut identidem affolet, stypticam leniendam, etiam post octiduum: quo fit persæpe, ut frustranea verè in primo casu evadat Febrifugi oblatio; in posterioribus verò casibus culpetur idem Febrifugum de inopinato Febris reditu, vel de pejore etiam noxâ, si Febris per Catharticum revocata redierit gravior: cum tamen culpa omnis verè sit adscribenda purgantibus, utut levissimis, perperam commistis, aut subinde superepotis, ut crebra diligentes Scriptores, Observatoresque docuit experientia. Sic omnino quidem injustè damnatâ ab uno, vel altero Auctore minùs attento Chinâ Chinâ insonte, plures postmodum in fide alienâ eidem condemnatoriæ jejuni prorsus, & inexperti subscripsere sententiæ.

Nec minùs hodie forsan hallucinantur nonnulli, Chinæ Chinæ virtuti eousque fidentes, ut illam æquè fartam tectam putent a Purgantium injuriâ, si eadem post epotum, ac si ante epotum hujusmodi Febrifugum assumantur; quod profectò experientiæ quotidianæ manifestè repugnat, prout pluries, ac pluries observavi. Solvens equidem Medicamentum ante Chinam Chinam præscriptum futuram Corticis in futurum præscribendi actionem non impedit; subsequens autem delet de more prægressam. Quòd si quis, dum Chinâ Chinâ utitur, intermisceat quoquè usum Purgantis cujuspian; sed pari simul passu, &

dosi

dosi æquè liberali in ejusdem Chinæ Chinæ oblatione etiamnum perseveret; is forsan damnum, quod Purgans intulit, neutiquam dignoscet, quia veneno nova successit antidotus; facilè tamen dignosceret, si purgante exhibito, a Corticis postmodum exhibitione feriretur paulisper; Febre scilicet ante novam Febrifugi oblationem iterum redeunte. Ad quid igitur Sisyphi saxum rotare inutiliter, vel texere vicissim, atque retexere telam Penelopsis? At de hoc jam satis. Redeamus ad Virum Cl., pro suscitandis Febribus intempestivè depulsis remedia quærentem.

(c) (*Ficus Pharaonis &c.*) De *Ficu febriferâ*, quam *Pharaonis* appellant, quamque in Sardiniâ in Ducatu Galuriæ abundè reperiri ferunt, fusè loquitur Badus (quem deinde secutus est Morton) de *Cortice Peruviæ* Lib. 1. a pag. 125. ad 129., adducitque auctoritatem Hieronymi Cardani, & testimonium de visu Petri Aponensis. Hæc tamen, nec forsan immeritò, inter fabulosas narrationes referunt plurimi. Sed quid, si *Ficum febriferam Pharaonis* inter *Fabulas* recenseret, simulque temerariam assereret, imò & a nostrâ potestate longè dissitam praxim ipsam excitandi Febres, pro aliorum morborum medelâ, eamque idcirco rejiceret, & derideret idem, qui modò laudat, Cl. Ramazzinus? Audiamus illum denuò in *Orat. tertiâ Jatrici Argumenti* pag. 94., & 95. ita loquentem, etsi aliàs quoquè in memorabili *Collatione* Textuum illius audiverimus lit. N. O. P. -- *Cum in universâ Morborum classe nullus extet nobis hostis infensor, & cui minùs fidere oporteat veluti Febris, attamen eò audaciæ ventum est, ut inter Quæstiones medicas sit, num ad alios morbos curandos Febrem excitare liceat* (quid ergo dicendum de affirmativâ sententiâ, si tam audax est sola Quæstio?) eò quòd interdum in quibusdam affectibus, veluti convulsione, & hypocondriorum dolore, superveniens Febris remedii loco fuerit, quasi in nostrâ potestate sit ignem febrilem accendere, ac pro lubitu ipsum restinguere. Quam libenter scirem, quodnam corpus, sive de genere simplicium, sive Compositorum proftet, quo quis Tertianam Febrem, Quartanam, Synocham, vel quamcunque aliam excitare possit. Pro *Fabulâ* enim accipitur, quod quidam de *Pharaonis Ficu* referunt, quam ajunt Tertianam Febrem excitandi vim habere. Sic suis ipsius penno capitur Cl. Auctor. Sed pergamus.

(d) (*Novum non est ignem febrilem &c.*) Ignem febrilem, quando debitam succorum ebullientium despumationem promovet, suum usum habere penès prudentes Medicos, latè dixi & ego in *Opere meo* Cap. 8. Lib. 1., præcipuè pag. 143, & Cap. 5. Lib. 4., præsertim pag. 536.; secùs verò, quando eorundem Fluidorum immanem effervescentiam, corruptelam, aut in visceribus stagnationem producit, sive illam consequitur. Num verò ad ancipitem hanc succorum defæcationem quærendam, liceat prudenti Medico sequi Consilium Celsi, parvas nempe Febres augere, ut curationi fortasse opportuniore fiant; ex ipso audiamus iterum Cl. Ramazzino, qui ex professo hanc quoquè Quæstionem eâdem pag. 95. *Orat. Jatrici Argumenti* resolvit his verbis. *Non absimilis priori* (videlicet nuper expositæ) *est alia Quæstio, non adeò tamen audax, quam habet Celsus, num Febrem lentam augere*

liceat, ut curationi opportunior fiat. Verùm quàm suspecta, & quàm infausti ominis sint beneficia, & dona, quæ ab hoste proveniunt, satis compertum est, ut vetus proverbium admonet, Hostium munera non munera. O quàm egregiè in hanc rem Seneca. Gravissima infamia est Medici, opus quærere: multi quos auxerant morbos, & incitaverant, ut majori gloriâ sanarent, non potuerunt discutere, aut cum magnâ miserorum vexatione vicerunt. Ita & hanc Quæstionem adversus semetipsum resolvit Vir Clarissimus, ex eodem ore calidum pariter, & frigidum efflans, ut eandem Pultem calefaciat, & frigefaciat pro libito.

(c) (*Aureus &c.*) *Aureus* potius uterque locus est Cl. nostri Auctoris nuperrimè recensitus, dignusque planè, quem observaret Ballonius, si modò viveret, ut cum Hippocratis, & Celsi Textibus conciliaret. Sed sive ex auro, sive ex aurichalco fuerint loca per Cl. Virum allata, locum certè ullum nequeunt habere, ubi Febris *Corruptiva* per Corticem tempestivè, methodi è, ac verè ex arte fuerit ante depulsa. An verò eâdem positâ, quæ solùm poni debet, *Corruptrice* Febre, locum opportunum habeant tot alia ex Græcis dictionibus satis notis, & ex Virgîlii Georgicis huc gregatim, confertimque translata, ne dicam intrusa, non quæram. Quispiam fortè animosior haud planè importunè huc traheret Jambos illos Nicostrati,

*Loqui si indefinenter, multaque & velociter
Prudentiam indicaret; utique hirundines
Fortasse quàm nos sapere dicantur magis.*

S. 39.

Non semper terreri Medicum decet, si videat in febribus calorem augeri, *p*us enim fit ajebat laudatus Ballonius, hoc est humorum maturatio, merito itaque reprehendit idem Scriptor eos Medicos, qui in febribus cum videant calorem augeri, mittunt sanguinem, quod procul dubio non facerent, si abscessum viderent in parte aliqua externa, nam potius maturantia, & calorem foventia, quàm V.S. & refrigerantia adhiberent, quæ enim *suppurantur non revertuntur*, ajebat Hippocrates, ipsa enim *maturatio judicatio simul & abscessus*. Haud aliter evenit in periodicis præsertim febribus, ex usu Quinquinæ intempestivo, impeditur illa humorum maturatio, quam Natura intendebat, hinc postea habitus cachectici fiunt, & dispositiones ad hydropem.

(Non semper &c.)

Calorem Febrium etiam intensiorem, ac sensibilibiter adauctum non semper debere Medico terrorem incutere; sed esse pluries verum opificem intestinæ secretionis heterogenearum particularum dissidentium ab invicem, turbasque effervescentis sanguinis excitantium, ac proinde esse quoque non raro instrumentum bonæ Judicationis morbi; tum locis nuper citatis in Paragrapho antecedenti lit. d., tum alibi in totâ Therapeutice meâ adeo inculcavi, ut fortè nimium. *Neque enim* (ajebat Galenus in Comment. Aphor. 12. primæ Sect. Hippocratis) *neque enim fieri potest, ut magna incrementa suscipientibus accessionibus, non proxima sit Morbi consistentia*, ac per consequens ipsa impuritatum ebullientium secretio. Atque hanc a Naturâ expectandam potius nobis esse, si probabiliter queat expectari, quàm intercipiendam, aut quodammodo impediendam Chinâ Chinâ, quâ solùm absorbetur Fermentum effervescentiam gignens, ac fovens; iisdem pariter locis, atque insuper pag. 356., & 357.; item pag. 544., ac 545. apertissimè prodidi: cum verè melior, ac perfectior censenda sit (ut ibi sum fassus, atque iterum repeto) judicatio Febris, quæ sponte fit ab ipsâ Naturâ, *perfectè, ac integrè* judicante, quàm quæ obtinetur a Cortice Peruviano, aut alio quovis Absorbente Specifico. Ac propterea verum nonnunquam erit, aut esse poterit (nec tamen perpetuò) quòd ubi adauctus Febrium æstus ad *depurationem* tendat, ex usu *Quinquinæ* tunc, ut ait Cl. Auctor, *revera intempestivo, impediatur illa humorum maturatio, quam Natura intendebat.*

Id autem certè non est de nihilo; etiamsi non adeò facilè indè fiant *habitus cachectici, aut dispositiones ad Hydropem*, ut sinè ullâ hæsitantiâ ipse decernit; quasi ex solâ Febrium, Cortice nullatenus curatarum *diuturnitate* Cachexiæ nunquam contingant, aut Hydro pes, de quo vide Therapeut. meam pag. 179.; & quasi eodem Cortice ritè administrato non curentur eadem Cachexiæ, aut dispositiones ad Hydropem ab ipsâ Febrium *diuturnitate* prodeuntes, ut experienciâ multiplici confirmarunt Raymundus Restaurandus, Cap. *De Hydropis succedentis Febris curatione ope Chinæ Chinæ*, ac alii quamplures; imò quasi suppressis etiam intempestivè Febris, quandoque Natura non queat Fermentum ipsum febrile, præmaturè licet absorptum, sponte subigere, aut ad illius perfectam expulsionem converti; & quasi denique, redeuntibus nonnunquam post Corticem, sive præmaturè forsan, sive etiam tempestivè administratum, Febris, aliquem rursus iisdem progressum permittendum esse ipsemet non suadeam, priusquam repetatur Febrifugum; vel ad omittendam planè illius repetitionem non horter Medicos pag. 31., 339., & 340. Therapeutices meæ, quoties levior, ut crebrò assolet, illarum recursus solutionem quoque spontaneam, ope ipsius febrilis æstus *depurativi* jam redditi sensim promovendam, haud longè distare prænunciet. Ad quid ergo futes istæ Viri Cl. Declamationes nonnisi aerem ferientes?

Quia verò idem sæpenumero Febrilis æstus (ut vela contraham) in *diuturniorum Intermittentium* progressu succos nutritios potius exhaurit,

haurit, cruoremque ipsum per repetitas deflagrationes spiritibus depauperat, graviaque sensim accersit etiam symptomata, ut *corruptionis* potior sit metus, quàm spes futuræ *depurationis*: item cum in iisdem Intermittentibus, mox Subintranantibus, ac dein *Subcontinuis* redditis, cum symptomatis pessimis in dies increbrescentibus, ille idem æstus acutiem certò, mox & necem probabiliter interminetur: denique cum in ipsis Intermittentibus quidem, sed *Perniciosus* (& hæc est rerum summa) laudatus nuper a Viro Cl. hujusmodi febrilis calor, nonnunquam & funestus alior, certam, ultimam, & inevitabilem, nedum portendat, sed & jam inferat cladem; propterea in hisce casibus, & circumstantiis, in quibus tantum Peruvianum Corticem absolute laudat Therapeutices mea, & quidem adhibitum Methodo pro casuum varietate pariter variâ, ipsum proscribi eo nomine, *ne videlicet impediatur illa humorum maturatio*, quam in Febris salutariis promovere nonnunquam solet calor adauctus, minimè admittam; etsi mille Hippocratis, & Ballonii Textus ad suam sententiam detorquere conetur idem Cl. Auctor.

S. 40.

Hæc olim non ignota erant Medicis Mutinensibus meorum temporum, uti D. Joanni Manzino Viro sane doctissimo, sed Chinæ Chinæ nimis infenso, D. Joanni Baptistæ de Grandis, D. Scajolæ Equiti, D. Antonio de Abbatibus, D. Antonio Ferrarino, Viro, si quis alius, omnigenæ eruditionis, Protomedico vere dignissimo, hætenus ultimo eorum, qui in Aula Estensi hujusmodi titulo fuerint insigniti, ast ii omnes jamdudum è vivis excessere; vivit tamen adhuc D. Franciscus Tona-nus felicissimus Practicus jam senex, Platonis ætatem prætergressus, qui eorum quæ diximus testis esse potest, scitque ipse quàm raro, quàm caute à laudatis Viris præscriberetur in quibuscumque febris Peruvianus Cortex, ut pote quem suspectum habebant, & infidum, cum nihil de causa morbifica viderent excerni, ac idem evenire, quod interdum in Corporibus à Chacodæmone obsessis evenit, quando ab Exorcista malignus spiritus solum in aliqua parte figitur, sed non expellitur.

(*Hæc olim &c.*) **M**edici Mutinenses *temporum Viri Cl.*, meorum quoque fuere temporum. Cum enim ille Mutinam primò domicilium transtulisset Vir jam maturus; tum verò Praxi medicæ primam ego navarem operam Adolefscens, Concives meos optimè noveram ante adventum illius, non in Exedris, ut longè feriùs, sed in Cuneis tunc sedentis. Eorum ferè omnium trepidationem, cunctationem, imò & averfationem, quò ad recipiendum Chinæ Chinæ ufum, vivente Frassono Præceptore meo (qui primus Mutinam advocavit hocce Febrifugum, statim ac illud in Europam cœpit deferri) fatis in propatulo posui pag. 4. Therapeutices meæ. Sed antiquiores illi priorum temporum Mutinenses Medici (rectiùs dicam omnes ferme illius ævi) quidquid novi Arti accessisset, quod non novisset Galenus, pro commentitio reputantes, nedum de Chinæ Chinæ usu tunc apud eos nascente; sed de ipsâ quoque Sanguinis Circulatione, de Chyliferis ductibus, aliisque ad oculum patentibus Inventis haud modicè dubitabant; veterem adhuc Hepatis hæmatosim, Facultates Viscerum attractrices, & mille alia figmenta contra mechanicum humani Corporis artificium, quod manibus contrectamus, acriter sustinentes. An propterea Medici hodierni deliramenta hæc nequaquam secuti, aliamque cohærenter ad detecta exercentes praxim, ut Nugatores, aut Novatores improbi erunt damnandi?

Addo tamen hîc, quod in eodem Opere meo pag. 5. innui, videlicet, post obitum egregii illius Viri, qui contigit anno 1680., plures eorum paulatim mutasse sententiam, & Peruviano Cortici humaniores evasisse. Hujusmodi fuit inter cæteros D. Antonius Ferrarinus Archiater certè dignus, qui sibi transmissam in Schedulis a Celeberrimo Malpighio Talbotii Methodum, mihi de mandato ipsius Malpighii libenter, & ex animo communicavit, laudavitque; cum cæteroqui antea fuisset ab hoc Remedio omnimodè averfus, ut constat pag. 184. Therapeutices meæ hist. 16. Ille namque fuit, quem ibidem descripsi Frassono repugnantem, quamvis nomen illius, quod tunc aperire haud opus erat, subticuerim; quemadmodum pag. 438. historiâ 6. & pag. 442. hist. 8. subticui quoque nomen D. Francisci Tonani, ante paucos menses, post editam nempe Cl. Auctoris Dissertationem vitâ functi; sed cujus testimonio nihilominus non indiget prævia confessio mea. Miror verò, quòd Catalogum Medicorum Mutinensium sui temporis contexens Vir Cl., Virum dignissimum D. Antonium Frassonum unicum Præceptorem meum prætermiserit, de se quoque bene meritum, & Chinæ Chinæ in hac Urbe primum, ac celeberrimum Fautorem, Medicumque experientissimum, qui unus tot saltem Ægrotos quotidie invifere consueverat, quot invifebant conjunctim omnes alii a Cl. Auctore hîc recensiti: simulque miror, quòd tot alios suppresserit, eodem Febrifugo, præsertim post Frassoni obitum, palàm utentes; quasi solummodo a Cl. Ramazzini discessu itrepserit in hanc Urbem merx vetita, & contagiosa Peruviani Corticis.

Parcant, quæso, Manes Viri Critici, Medicos Mutinenses hodiernos Antiquiorum severitate castigare molientis, parcant inquam, si

& hac in re, quæ opinabilis non est, sed historica, illum inconstantia redarguere cogor, & contradictionis planè inexcusabilis. Inquit ille hoc Paragrapho, *Medicos Mutinenses suorum temporum rarò admodum præscribere consuevisse in quibuscunque Febris Peruvianum Corticem, utpote quem suspectum habebant, & infidum &c.* Ante annos verò 24. (quod non breve est temporis spatium) anno scilicet 1690., dum priorem suam de Constitutionibus Epidemicis Mutinensibus Dissertationem conscriberet, uteretur autem satis liberaliter, forsan & præ aliis, Peruviano Cortice; nescio quo actus tunc spiritu, *Medicis Mutinensibus suorum temporum* hac eadem de Causâ, quòd nempe Chinâ Chinâ eâ Constitutione fuerint usi, Num. 15. ejusdem prioris Dissertationis pag. 17. Edit. Patav. ita succensuit -- *Major itaque pars Medentium apud Nostrates* (semper illi cum majore hujus Urbis Medicorum parte lis est) *ut vulgi calumniis, & assiduis Ægrorum querimoniis se subducerent, in hac Tempestate ad Peruviani Corticis sacram Anchoram confugere, at parum prosperè; nam in periculosiores scopulos Ægrotantes suos persæpe deduxere. Uju Febrifugi per aliquot dies equidem sub dolo cinere latebat ignis; verum postliminio violentior recandescebat. Qui tamen peritiores erant, ac rebus Ægrotantium magis quàm propriæ ambitioni consultum volebant, Nabant sine Cortice.* Major ergo Mutinensium Medicorum pars anno etiam 1690. Peruviano Cortice utebatur, imo & abutebatur, si Cl. Auctori habenda sit fides. Sed illum fortasse paulò post suasit religio quædam, ut ad leniendam hujusmodi sugillationem molliora hæc verba subdiderit in secundâ Constitutione, anni videlicet 1691. Num. 34. pag. 126. -- *Sicuti præcedenti anno Peruviani Corticis usus in Quartanis ac diuturnis Febris improsperè cessit, ita hoc Anno saluberrimus fuit; & ii qui passi sunt recidivas, Febres mitiores postmodum experti sunt, ac antequam Hyems accederet, perfectè convaluerunt: quod & propè finem rursus confirmavit* Num. 37. ejusdem secundæ Constitutionis pag. 131. sic inquit -- *Sicuti in superioris Anni Constitutione noxius fuit Chinæ Chinæ usus, ut adnotatum, ita in hac ab illâ toto Cælo diversâ valde salubris compertus est; multi quidem Quartanarii hoc Autumno per Urbem vagari visebantur, sed quot quot ad hoc remedium confugere, vel integrè sunt restituti* (possunt igitur, ipso fatente, non solum inducias obtinere; sed & finè Febris recursum, & finè noxâ integrè restitui Ægrotantes, absq; eo quòd eadem Febris tacitè cubet, & corpus eorum depascat) *vel si nonnulli recidivas passi sunt, paulo post convaluere.* Ex his omnibus, ut reor, satis patet, Medicos Mutinenses, non aliquot tantum, sed majorem, ut inquit, eorum partem, modò quidem feliciter, modò, ut asserit ille, *improsperè*, temporibus Cl. Auctoris Chinâ Chinâ uti consuevisse: atque ita quidem, ut ejus Censuram de intemperantiâ minimè declinare potuerit vetustior ille Virorum Cætus, qui modò ut maxime temperans in medium adducitur in reprehensionem hodierni.

Quòd si curiosus quispiam, qui Catalogum eorum legerit Medicorum, quos Vir Cl. quinario tantum, vel senario numero comprehensos voluit, alium pariter Catalogum, non totidem tantum, sed plures

Professores Cortici amicos continentem , præ oculis habere desideret ; occurrent primo statim loco recensendi , quippe temporibus Viri Cl. , & quidem valde remotis florentes , modò verò è vivis sublatis , laudatus nuper D. Antonius Frassonus Chinæ Chinæ celebris administrator , D. Annibal Cervius Cl. Auctoris antiquus olim Antagonista , adeòque eidem notissimus , nec non D. Marcus Antonius Montagutus Medicus quondam Aulicus eximius , quo vivente nedum ego , sed & ipse non multò post D. Ramazzinus (qui cæteroqui , ut doctrinâ , ac ætate me longè præibat , ita & ordine temporis , ac dignitatis merebatur præire , nisi aliter Domino placuisset) ad Serenissimi Francisci Secundi gloriosæ memoriæ Ducis extraordinarium Famulatum fuimus acciti ; ut proinde quinam in usurpandâ Chinâ Chinâ fuerit mos Aulici illius , & doctissimi Professoris , cùm viveret nobiscum agentis , ipsum Cl. Ramazzinum nequaquam latere potuerit ; occurretque demum inter recentius defunctos D. Joseph Candrinus , eidem Cl. Auctori Præceptori quondam suo sat notus. His accedent secundo loco , viventes adhuc , & bene valentes (memetipsum omitto , quem inter Juniores olim meritò collocandum diceret Vir Cl. , novus tamen & ille in hac Urbe , cùm ego novus in Praxi) occurrent , inquam , inter adhuc viventes D. Jo: Baptista Riccius Practicus pariter notissimus provectioris ætatis , D. Paulus Floranus ætate simul , & experienciâ spectabilis , qui tempore militaris incendii Genuensis Urbis , ubi domicilium contraxerat , in Patriam concessit iterum , Genuensis pariter Badi Chinæ Chinæ Propugnatoris celeberrimi sensibus imbutus , vivâque ipsius voce etiam instructus ; tandemque Aulicus ipse Collega meus , scientiâ , & eruditione Clarissimus , D. nempe Johannes Baptista Davinius : Viri sanè omnes , & Docti , & Peruviano Cortice usi temporibus Cl. Auctoris , eodemque etiamnum pro re natâ , nec rarò , nec trepidanter utentes , sed simul nec abutentes , ut ex quamplurimis visitur , quos recensere tædiosum foret , meæ Therapeutices locis . Sed quid si inter alios abundè Chinâ Chinâ utentes numerandus foret Auctor ipse , nec non etiam (ultimis quidem temporibus) illius Nepos , qui tamen dicitur Relator abusus , aut criminis , cujus est complex ? Absit tamen , ut id ulli eorum exprobre , de quo mitius judicium infra ferendum mihi §. 49. An verò quisquam ex iis Professoribus , quorum non meminit Vir Cl. , quia illum non meminisse juvabat , putarit , aut putet , *Malignum Cause morbigicæ Spiritum veluti exorcizatum figi a Chinâ Chinâ in aliquâ Ægrotantium parte* (ut quodammodo fieri videtur ab illis , qui eam semel oblatam non ampliùs offerunt , unde febrile fermentum per temporaneam absorptionem nonnihil figitur , sed non planè subigitur) an potiùs putet , *Spiritum* illum ab ægrotante corpore penitùs *expelli* ; meum non est investigare . Ad me quod attinet , si fortè uspiam , in Ventre porrò inflato (lubet seriis ludicra quandoque miscere) quadringentorum illorum Militum , de quibus §. 36. , verum Cacodæmonem a Maleficâ Chinâ Chinâ , vel a Chirurgo Incantatore illuc relegatum , delituisse crediderim .

S. 41.

Quinquam autem facultatem figentem habere (a) *pro re certa suppono*, cum motum sanguinis, & spirituum compescat, & alvum ipsum densiorem faciat, observatur enim, iis qui ad plures dies hoc remedio usi fuerint, ventrem adstringi, ut clysteribus indigeant: vim hanc hujus Febrifugi fluida quæque in nostris Corporibus cogendi, talem esse credidit (b) *Gedeon Harveus*, ut scripta hæc verba reliquerit, *omnes evacuationes supprimit China China per se, sed non per accidens.*

(a) (*Pro re certa suppono &c.*) **S**upponit pro re certâ Cl. Auctor, quod ab aliis Scriptoribus admodum controvertitur, & a quamplurimis mordicè negatur, *Quinquam scilicet facultatem figentem habere, & vim Fluida quæque in corporibus nostris cogendi.* Recens tamen acquisita hæc est eidem cognitio, cum §. 4., 5., & 6. *ignotam illius, abditam, secretam, & incomperitam adhuc virtutem, humanum captum excedere*, constanter asseruerit, pleno ibidem hæc decantans gutture. *Diu equidem, sed frustrante diligentia a sagacioribus Medicis allaboratum est circa hunc Corticem, ut aliquid proferrent, quod animum veritatis avidum expleret; sed vincit adhuc natura latendi &c.* Quòd si iis in locis se locutum dicat de solâ Virtute febrifugâ sibi verè occultâ; hîc verò de solâ figente sibi notâ, tamquam de duabus rebus toto Cælo diversis; itaut in vi figente, & notâ nullatenus consistat febrifuga occulta: ut quid, quæso, in totâ Dissertatione soli Virtuti occultæ, quæ febrim pellit, irascitur Auctor Cl., nec pugnat unicè contra Figentem damnosam; quam tamen corrigere posset (si adesset illa) per contraria sua satis obvia sinè detrimento Febrifugæ in abscondito degentis?

Verùm ut isthæc quoquæ fileat de Figente Peruviani Corticis Facultate fallax cantilena; aliud est, Chinam Chinam compescere turbas febriles effervescentis *præter naturam* sanguinis, absorbendo fermentum illud *acidum*, seu *salso-acidum*, quod §. 46., ut videbimus, adstruit pro Causâ Februm Intermittentium idem Cl. Auctor; aliud est, figere motum ipsum *naturalem* cruoris, atque spirituum, cæterorumque fluidorum, ut valde crassâ æquivocatione videtur ille confundere, Ocream fronti quasi applicans, & Galeam tibie. Quid quæso spirituum agitatorum, aut irritatorum turbas sedat, compescit, & consopit magis, quàm Opium, ut habet §. 5., & 48. Vir Cl.? Et tamen ex hoc ipso virtutem eidem Opio rarefacientem potius, quàm densantem fluida, tribuit, mechanicâ adductâ ratione, Pitcarnius adversus Ettmullerum

Dissert.

Differt. De Circul. Sang. in Anim. gen. , & non gen. Quodd si cum eodem Ettmullero , quem libentiùs sequitur Vir Cl. , *absorptionem* ipsam Fermenti febrilis , mole dubio procul perexigui , velimus donare nomine *fixationis* , *attemperationis* , vel *saturationis* illius , quæ omnia idem sonant apud eundem Auctorem ; facile in Cl. Opponentis castra descendam : dummodo liberio rem subinde fieri fluidorum motum , cum circularem , tum fermentativum concedat ; nec plus *figi a Chinâ Chinâ* sanguinem velit , quàm *figatur a Chalybe* , qui pariter dicitur Acidum obstruens *absorbere* , dum ad Chlorosim V. G. curandam , aliasve tollendas ipsius sanguinis stagnationes assumitur ; de quibus vide latè Therapeut. meam a pag. 43. usque ad 47. Verùm historias potiùs Febrium Syncopalium , Lethargicarum quoquè , si lubeat ; sed præ cæteris Algidarum , Peruviano Cortice sanatarum , ubi marmoreum frigus , & micatio pulsum jam ferme abolita , stagnationem , aut fixationem ferè omnimodam cruoris , atque spirituum apertè prodebat , lustrare sufficit , eamque signatè , quam proprio testimonio firmare potest , ni renuat , ipse Cl. Auctoris Nepos , pag. 444. recensitam . Ex subitâ namque eorundem pulsum elatione , ex calore quaquaversum ad exteriora diffuso &c. facile erit dignoscere , an China China illis casibus *Cruoris* , *Spirituum* , & *Fluidorum omnium fixationem* induxerit .

Per hoc verò , quodd Febrifugum istud de more *alvum densiorem faciat* (quodd isfacile admiserim , etsi non paucis quoquè identidem solvat , reddatque laxiorem) nolim deduci a Viro tam docto , eâdem ratione *figi Spiritus* , & *densari Sanguinem* , quâ densantur feces alvinæ . Pudet hæc ulterius persequi : proinde liceat tantum reponere , Vina generosa , & meraca , si austeriora sint , ut austeriusculus est Chinæ Chinæ sapor , alvum adstrictam facere : interim tamen sanguinem , aut spiritus non figere ; sed in ebrietatem magis quàm Vina tenuia , dulcia licèt , ac alvum laxantia , compellere .

(b) (*Gedeon Harveus &c.*) Gedeonis Harvei auctoritati fortasse subscriberem , nisi opposita , diuturna , & multiplex me retraheret experientia . Evacuationes Sudoris , Urinæ (cujus excretionem depulsis Febribus China China peculiariter promovet) Menstruorum pariter , ac Lochiorum , imò & ipsius Diarrhææ , dummodo *Criticas* , nunquam ab hoc Febrifugo suppressas vidi , ut in Therapeut. meâ pag. 42. innui ; pag. verò 469. , & 471. exemplis confirmavi ; utque magis adhuc posui ob oculos casu recenti , in responsione meâ nuperâ ad §. 36. hujusce Dissertationis allato lit. a. *Symptomaticas* equidem a Febre pendentes indirectè , sive *per accidens* supprimit , sistendo Febres , quæ immaturas hujusmodi excretiones produciunt ; non verò *per se* , sive per vim propriam , ipsique peculiariter insitam . Proinde nonnihil allucinatus est (si hoc vocabulo uti liceat sinè crimine) Vir quidam doctus , qui commendari a me in Therapeut. meâ Peruvianum Corticem pro curatione Dysentericæ suis in Scriptis promulgavit ; fortasse quia Febres quasdam Perniciosas , quas ratione adjuncti dysenterici cujuspian Symptomatis *Dysentericas* appellavi Lib. 3. cap. 1. , eo facile remedio sanari protulerim : quodd tamen de *Dysentericâ* verâ , & essentiali , quæ

Morbus est, non *Symptoma*, nequaquam intelligendum, ut expressè monui pag. 375. ejusdem Operis. Sed alterutro forsitan loco, haud satis clarè memetipsum explicui. Antifebrilis ergo solùm, non antidyfenterica est *China China*: neque idcirco prædictam, aut ullam aliam evacuationem, præsertim Criticam, seu quæ febrilis symptomatis rationem non habeat, figit, aut sistit per se, directè, ac ex naturâ suâ, ut falsò autumat Gedeon Harveus.

Ubi experientia loquitur, auctoritates silent: si tamen ulla arri-deat, ea nunc desumatur a Scriptore in usu Remedii plurimùm exercitato, qualis est Morton, cujus testimonium crebrâ, & longâ praxi credibilius redditum, poterit citra injuriam cuilibet alteri opponi; maximè cum a Mortono ratiocinium confirmetur eâ ipsâ experientiâ, quæ ab Harveo aliter se habere creditur ex vi ratiocinii. Inquit itaque *De Peruviani Corticis Virtute Febrifugâ* Exercit. 1. Cap. 7. laudatus Auctor, figentem hanc, atque obstruentem vim Cortici objectam explodens. Quo pacto *Pharmacum*, quod in *Puerperio* (nulla certè evacuatio magis sollicitè servanda, quàm isthæc) salubriter ministratur, inter obstruentia numerari potest? Ast suspectus semper habebitur Morton. Vertamus nos ad Ettmullerum, a Cl. Auctore in hac materiâ tanti habitum, & videamus, an Scriptor iste, ubi *Chinæ Chinæ* facultates ex professo recenset, figentem illi, & condensantem attribuat. Inquit ergo ille in *Phytologiâ Schroderi* dilucidati pag. mihi 43. edit. Lugdun. in Fol. -- *China China calida, & sicca est, vim habens aperiendi* (en primo statim loco vis aperiens, non figens) *discutiendi, attenuandi, resolvendi, putredinem arcendi, roborandi*. An hæc omnia cum suppositâ virtute figente, & Fluida quæque cogente convenient, vel rudes judicent Pharmacopæi. Quòd si de hac celebri figendi vi auctoritatem ratiocinantis quis optet, in promptu est Sententia Villisii, a Cl. Auctore pluries pro suâ Causâ citati, & de *Febris* cap. 6. scribentis. Annotetur, quòd hoc remedium, non quemadmodum vulgaria Febrifuga sanguinem figendo &c. accessiones febriles sistit &c. Suum ergo sequatur novum Scriptorem Vir Cl. Ego meos, utut veridicos, præcisè non sequor; sed ratione manucente experientiam.

S. 42.

Nunc autem quando usus, quem penes arbitrium jus est & norma medendi, ita *Mutinæ* obtinuit, ut tanto in honore Febrifugum istud sit, ut nullibi magis, expectandum num ad longum tempus duratura sit illius fortuna, habent enim sua fata medicamenta, sicuti cœtera omnia. Radix *Chinæ* ab Indiis Orientalibus in Europam devecta, olim inter Medicamenta ad morbos chronicos, & con-

& contumaces propulsandos, principatum obtinuit, ac tantam affinitatem cum natura humana habere credita, ut cum cibariis ipsis locum obtineret; modo pene obsolevit illius usus, ac in Officinis cariota reperitur. Qualis fors Quinquinam maneat, impofterum decernet tempus.

(Nunc autem &c.) **E** Tfi usus ita obtinuerit Mutinæ, ut hîc non minùs, quàm alibi in præscribendo Peruviano Cortice *Ars Medica*, non secus ac *militaris*, suos *Fabios habeat*, suos *Marcellos*; sortem nihilominus faustam, quàm intrâ universæ jam Europæ confinia China China sortitur, eousque duraturam crediderim, quousque illa germana, sincera, & minimè adulterata ad nos devehetur. *Radix Chinæ*, quæ a Viro Cl. confidenter hîc loci traducitur velut inutilis, plus forsan ac verè mereatur, ab eo contemnitur. Si tamen illa de more beneficia præstaret in morbis Chronicis, quæ *Chinæ Chinæ Cortex* perpetuò præstat in Febribus, non tam facile in Officinis cariem contraheret. Quemadmodum verò Peruvianum Febrifugum tandiù plurimi habitum est apud nos, quandiù in Scriptis Viri Cl. *habitum est in tanto honore*, & *pretio*, ut *nullibi magis*; ita fortassis posthac in minore habebitur, postquam scilicet adeò sinistrè de ipso *locutus est* varius pro re natâ, & versatilior ginglymo Cl. Auctor,

Quem penès arbitrium, jus est, & norma loquendi.

J. 43.

V Erum hic mirari subit quomodo (a) intra *Scultennam*, & *Gabellum* tam altas radices egerit Planta hæc Peruviana, non ita vero in solo Bononiensi finitimo. Certe (b) *apud Bononiensem Scholam*, quæ cæteris pro Regula Policleti esse potest, satis moderatus semper fuit, estque etiamnum, ut audio, hujus febrifugi usus. (c) *Quanta cautione* Peruvianum Corticem præscriberet Celeberrimus Malpighius, satis patet ex Centuria Consiliorum hujus Auctoris Patavii impressa Consilio 97., in quo Vir iste Sapientissimus in Febre lenta cum tensione abdominis post usum Aperientium, Diureticorum, Chinam Chinam proponit ad scrupulum unum singulo mane, sive alternis diebus per quindecim dies. Itidem in

Opere

Opere ejusdem posthumo, Londini impresso, hæc de China leguntur verba. (d) *Remedia, quæ vulgariter inventa creduntur à casu, & fortuito, & à sola Empirica, egent pariter, ut examinentur à ratiocinante, & reducantur ad tutam operandi naturam; Id experimur in usu Chinæ, quæ sine arte adhibita, non solum est causa recidivarum, sed etiam fixationum, & ut plurimum cachexiæ.* (e) *Hinc necesse fuit pro illius tuto usu ab eadem elicere tincturas in pauca dosi, & paulatim, & aliis cautionibus, à priori erutis, eam exhibere.* Omittam referre, quæ de hujus remedii (f) *malo usu Scripta extant* (g) *apud Georgium Baglivum in Libro de Fibra Motrice, (h) Nicolaum Lemerii in cursu Chimico, (i) Theophilum Bonetum in Medicina Septentrionali, Mercurio Compitalitio, & apud Polialthem.*

(a) (*Intra Scultennam, & Gabellum &c.*) **N**on intrà Scultennam tantum, & Gabellum altas radices egit Planta hæc Peruviana; verum eas quaquaversum diffudit, totque saltem in Regionibus jecit, quot sunt natales loci Scriptorum omnium, quos recensere cœpi §. 35. lit. d., & quorum seriem ulteriorem nunc persequi hæc ipsa me cogit uni *Scultennæ*, atque *Gabello* adscripta fertilitas: cum alioqui ab imo trunco ad elatiores usque ramos satis conspicua pateat hæc Planta ad Arnum, ad Padum, ad Sebetum, ad Tyberim. Tam latæ propagationis ampla hinc illinc specimina exhibent Viri Clarissimi, Hieronymus Bardi, Johannes Nardius, Vincentius Protospatarius, Hieronymus Sanctasofia, Franciscus Reditus, Antonius Vallisnerius, Lucas Tozzius, Joseph, & Thomas Donzellus, Joseph Lanzonus, Pompejus Sacchus &c. Sed has in Solo tantum Italico. Quas verò in Transalpinis Provinciis, Exterisque Nationibus non egit illa radices? Eam scilicet, præter allegatos citato Paragrapho Auctores Celeberrimos, excoluere insuper ad ripas Iberi, Tamesis, Sequanæ, Rhodani, & Rheni, Gaspar Kaldera, Joseph Villerobel, Thomas Villis, Robertus Bradyus, Dyonisius Jonquet, Digbæus, Hœferus, Rolfincius, Glantzus, Zuvelferus, Thomas, & Erasmus Bartholinus, Martinus Lister, Andreas Nicolus, Moyse Charas, Fridericus Illmer, Johannes Dolæus, aliique adhuc non pauci ad tædium evitandum reticendi.

Prope alia ergo Flumina, a Nostratibus etiam longè dissita, firmissimas radices egit, & ramos expandit Orbi toti spectabiles exotica hæc Planta; magis quidem, & minùs pro variâ Soli, & Cultorum ratione; sed centum in locis longè majores, atque altiores, quàm Mutinæ. Præter Cultores verò, seu Scriptores, quos retuli, suis Ope-

suis Operibus notos (quibus addere quis posset omnes a Viro Cl. pro suæ Causæ testibus adductos, & infra adducendos) quot Medici tacitè in Hortulo suo domestico, ad privatam scilicet praxim, hanc alunt, aut excolunt Plantam, etsi omnium oculis non exhibeant palàm? Horum numerum novit, qui stellas dinumerat solus, & arenas Maris. Primis certè temporibus, quibus usui cœpit esse Febrifugum istud, quinquaginta saltem Illustrium Medicorum testimonia de illius innocentia, & vi ad Febres quascunque Periodicas, nonnunquam etiam Continuas, Scriptis mandavit Sebastianus Badus nunquam satis laudatus. Modò quot millia possint haberi, conjiciat quisque: ut proinde prorsus immeritò mihi, cui forsitan nonnullam quis alius tribueret utilioris administrationis laudem, culpam liberalioris, imò & turpe abusus crimen fidenter, etsi dissimulanter, objiciat Auctor Clarissimus.

Nolim tamen hic me quispiam redarguat verbis illius §. 49., quòd *communium errorum reprehensionem in propriam calumniam referam*, cum de Cortice Peruviano *Mutinæ* non scripserim solus: extat siquidem in Diario, quod vocant Italicè *Galleria di Minerva* Venetiis edito, Tom. 6. pag. 119., Dissertatio quædam Anonymi *De Chinæ Chinæ in Febribus utilitate, & de vanâ quorundam methodo &c.*, sub dat. *Mutinæ* die 5. Novembris 1699.; in quâ Lucubratione non parum eruditâ, & eleganti, cum plurimus, & iatus admodum suadeatur Chinæ Chinæ usus, huic potiùs, quàm meæ Therapeuticæ in hoc castigatiori, videtur adaptari posse, atque congruere Cl. Auctoris Censura. Verùm patent nimium peculiare illius in Opus meum suggillationes: & dato etiam, quòd utrique nostrum plectendo idem intendatur Arcus, tutelam saltem meam in damnum bonæ praxeos renuo negligere, aut in detrimentum veritatis. Alienæ quidem Lucubrationis sensa, a sensibus præsertim meis non parum aliena, tueri meum non est; sed nec silentio prætereundum, quòd sicuti Dissertatio illa *Academica* inscribitur, non *Medica*; ita Auctor illius (quod certò scio) longè aliter ac ediderit in eo Scripto, Corticem Peruvianum præscribit in praxi.

(b) (*Apud Bononiensem Scholam &c.*) Scholæ Medicæ Mutinensi, cujus partem sat debilem ago ipse, *pro Regulâ Policleti esse posse Bononiensem*, Patavinam, Pisanam, Ticinensem, aliasque inclytas Universitates, tam meo, quàm meorum Collegarum, & Comprofessorum nomine minimè cunctabor fateri. Quænam sit illarum inter se se ipsas proportio, res esset audaciæ plena velle decernere. Utcunque de eâ re sit, certum est, illas omnes usum Peruviani Corticis admittere longè latiore, ac in suâ Dissertatione fanciverit Cl. Auctor. Et quò ad Bononiensem Scholam, ipse quoquè nedum audio, sed & scio, *moderatum*, ut decet, apud eam *semper fuisse, ac etiamnum esse hujus Febrifugi usum* (quis enim ullius immoderantiæ velit arguere prudens illud, ac celeberrimum Athenæum?) sed æquè scio, moderatum illum usum longè transcendere cancellos angustissimos, a Cl. Auctore constitutos; meamque praxim, quæ apud eum audit *abusus* nomine, haud ita audire in solo *Bononiensi finitimo*.

Hujusce rei fidem manifestam facit Dissertatio lucubratissima circa
hanc

hanc materiam anno 1711. a Clarissimo Viro, in praxi æquè, ac in Exedrâ exercitatissimo, D. Francisco Simonio conscripta, & a Clarissimo pariter, Scriptisque suis doctissimis Orbi jam noto, D. Jacobo Sandrio subscripta, & approbata. In eâ siquidem responsoriâ ad aliam Dissertationem e Pisauro missam ad duos hosce Viros Celebres Bononiensis Universitatis, de suo circa usum Quinquinæ judicio requisitos, occasione cujusdam Epidemicæ Constitutionis, in Urbe Pisaurenfi grassantis, responsa hæc sapientissima, & verè practica expressa leguntur. *Planè asserimus, Febrem quamcunque Peruviano Cortice curabilem, quantum quidem nobis observare licuit, de naturâ Intermittentium esse oportere, licèt sæpenumero continuè Ægros vexet. Præsupponendum enim hic est, quod optimè docet Sylvius de le Boe in Appendice Prax. Med. Tract. 9., aliud esse continuè febricitare, aliud Febre continuâ laborare: atque hæc duo non tam a plebejs, verùm Medicis quoquè haud rarò malè confundi (& hoc est, quod ego explicare, & distinguere totis viribus conatus sum in Therapeutice meâ a pag. 611. usque ad 621.) cum de factò possint Ægri continuè Febribus affligi, sed Intermittentibus, quæ idcirco neutiquam pro Continuis habendæ &c. Reliqua, quotquot sunt, quæ Febres istas comitantur Symptomata, sive benigna, sive maligna appellata, nihil ad præfatam Diagnosim spectant, nihilque de Speciali earum naturâ mox indicatâ detrahunt &c. Quare neque ab istorum præsentī malignitate, & perniciē Corticis Peruviani usum frustrari, tum ratione, tum experiētiâ didicimus. Tandem exclusis a ditione ejusdem Corticis Febribus ab essentiâ Continuis, Symptomaticis quoquè omnibus, Inflammatoriis &c. (quod & ipse in eodem Opere meo planè decerno) sic in eâ Dissertatione concluditur. Omnibus hisce conditionibus ex parte Febrium ritè perpensis, atque servatis, nos quoquè divinam planè, & admirabilem hujus Corticis utilitatem ultro asserimus, atque iis omnibus elogiis libenter subscribimus, quibus ejus famam condecorarunt Celeberrimi Scriptores plurimi. Quin imò facilè id etiam largimur, quod D. Franciscus Torti jampridem se ostensurum promisit in suo, quem propediem avidè expectamus, de re istâ Tractatu; Perniciosas scilicet, & Malignas Febres (modò indicatæ naturæ sint) ejus usu tutò curari posse &c.*

Hæc sunt lensa duorum inclytæ Scholæ Bononiensis luminum, quibus vel præibat, quoniam præibat ærate, vel saltem astipulabatur in praxi, cum viveret, Cl. Livizzanus, Famigeratissimi Malpighii amicissimus; astipulaturque hodie eidem veritati, sibi & usu, & dogmate planè compertæ, Cl. quoquè Albertinus ejusdem Celeberrimi Malpighii Propinquus, alique sat noti. Imò, si liceat addere, quæ ex ore ipso eorundem Professorum nuper accepi, dicam, Cl. Simonium perplures casus mihi narrasse Nobilium Virorum Perniciosis Intermittentibus laborantium, & Chinâ Chinâ liberaliter oblatâ ab eodem felicissimè sanatorum: Cl. verò Albertinum mihi pariter exposuisse, se non modò in vulgaribus Intermittentibus eo Febrifugo familiariter uti consuevisse; sed & illud celebri cuidam Pharmacopolæ, Perniciôsâ Tertianâ detento, præscripsisse ad drachmas sex, tempore inter tertiam, & quartam

tam accessionem medio, partitè oblatas; calculum suum libenter apponentibus Viris Eximiis, D. D. Livizzano, & Salano, in consilium vocatis. Quo præsidio adhibito, Æger cæteroqui moriturus facilè restitutus fuit, atque etiamnum vivit incolumis. Malè itaque praxi meæ objicit Vir Cl. praxim Bononiensis Scholæ, cujus usum saltem recentiorem, cùm suam Dissertationem conscripsit, haud satis callebat.

De aliarum Scholarum ritu non loquor, cum nec loquatur Autor Cl., & cum de illo satis superque loquantur nedum Scriptores, verùm & fama universalis. Jam notum quippe quinam generaliter Italiæ nostræ, quinam Galliæ, quinam Angliæ, quinam Hispaniæ mos sit. Accepi nuper a Sacerdote Aragonensi inclytæ Soc. Jesu, Viro fide dignissimo, Scholam Cæsaraugustanam in usu adeò frequenti Febrifugum hoc habere, ut nihil magis; neminemque, cui præstò sit illud, quod immediatè a P. P. ipsis beneficæ illius Societatis ab Indiis asportatur, Febres unquam recidivas pati. Sed nimium distant a Cælo nostro, ut Viri Cl. assensum mereantur, aut fidem, istiusmodi Scholæ. Cæterum si Patavinam suam Orbi tam celebrem, sibi (uni forsan, qui de Cortice tam malè sentiat) vel modicè faventem novisset ille, non reticuisset profectò.

Sed quoniam cuncta, quæ sibi quoquo modo favorabilia tantummodo imaginabatur, in medium tam facilè adduxit, cur non licebit & mihi Scriptorum qualiumcunque meorum sortem, modestè ut decuit hucusque suppressam, approbationemque omnimodam, quam a per multis insignibus nostri Seculi Professoribus (unâ quidem suadente materiâ) Scripta eadem sortita sunt, cavillationibus Viri Cl. saltem ad defensionem opponere? Cur inquam non liceat, cum idipsum non me tantum respiciat, sed & publicum Bonum, cui in primis servando mea hæc instituta est Apologia? Sanè apud Homines a partium studiis liberos magno momento erit, ut ab illis Methodus mea in beneficium usum adoptetur, si ea doctissimis ævi nostri Professoribus probata compareat. Inter tot tamen, tantosque Viros laboribus meis propitios unus sit instar omnium Celeberrimus *Lancisus*, *Vir, si quis alius, omnigenæ eruditionis, Archiaterque Pontificius verè dignissimus*, & effectuum Chinæ Chinæ utilissimorum Observator neutiquam recens, ut ex Therapeut. meâ pag 257. Illius ergo Epistolam perelegantem (innumeras aliunde acceptas supprimo, ne jactare videar, vel ostentare) exuberante licèt erga me humanitate refertam, cùm primò Opus meum recepit, excepitque, liceat proferre; eo saltem titulo, ut Romanæ Scholæ, quam non immeritò repræsentat unus, haud malè acceptum probem Tractatum meum: cujus omnia quotquot sunt, satis ab Opponentium sophismatis tuta, imò & facta tecta, in eâdem Epistolâ, ipso Judice, reputantur. Unum autem ex integrâ Romanâ Academiâ Lancisium seligo, quòd hic illius est Caput; non quòd aliis ea careat Viris Illustribus ob egregia scripta Orbi jam notis, & de Opere meo humaniter æquè sentientibus. Excipe tamen (quod auspiciatissimum mihi) Excellentissimum Barnabam Ciccolinum, Romæ scriptitantem, atque in Libello suo novissimo, cui Titulus -- *La Filosofia e Medicina de'Sa-*

vj -- acriter incandescentem adversus non me unum quidem, sed Neotericos omnes, vel minimè lectos, vel perperam intellectos, atque Atomistarum nomine illis affixo, confidenter traductos; eo tamen ingenii acumine, ac robore, ut verear, ne (quod agebat Cic. 1. de Orat.) *aliis miserandus, aliis irridendus esse videatur*. Et hoc illi responsum; nec unquam aliud.

Quia verò quadam veluti pietatis, ac religionis specie Vir iste bonus eâ ineptiit Magistrali securitate, ut ideo a probabilitate minimè alienum sit suspicari, quòd Religiosiores saltem Viri, sapientiâ quidem, zeloque pollentes, sed rei Medicæ haud satis gnari, nonnullam illi fortasse adhibitori sint fidem; quippe facilè metuentes, ne doctrina, quam tradidit Renâtus des-Cartes, etiam castigata, nimium nihilominus accedat adhuc ad errores Democriticos; quam verò tradidit Petrus Gassendus, ad Epicureos (quibus Sectis, Cartesianæ præsertim, necessario addictos Recentiores Medicos, quotquot sunt; satis absurde arbitratur, blateratque Excellentissimus Ciccolinus) idcirco, non ut illi quicquam reponam, sed ad tollenda, si qua fuerint, super hac re Pusillorum scandala, pauca hæc raptim liceat addere, tum Medicos omnes Neotericos universim, tum memetipsum peculiariter a futilibus hisce facillimè vindicantia.

Notum sit itaque, hodiernam solidiorem Medicinam, quâ Theoricam, quâ Practicam, pro suo stabili fundamento unicè agnoscere Structuram organicam humani Corporis, postremo tantum ævo nostro melius detectam, oculo iudice: adeoque in Viscerum, Glandularum, Ductuum &c. compage, texturâ, dispositione, ac usu; item in variâ Fluidorum naturâ, motu, commistione, fermentatione, secretionem &c. hic evidenter, illic probabiliter cognitis, omnes fundari Hypotheses, & omnia Systemata Recentiorum Theoretica; sive deinde cuncta hæc Scholasticè considerata, vel more Peripatetico, vel Cartesiano, vel quovis alio (quod perinde Medico est) explicentur, pro vario scilicet Philosophantium, & Scholarum totius Orbis arbitrio, aut ritu: eandem verò Medicinam Recentiore, quò ad exercendam Praxim, fisti, velut in basi sat firmâ, partim in Inventis iisdem Anatomicis, partim in observatione experimentalis; quâ identidem non modò remediorum ferè omnium, etsi ex arte administratorum, incertitudo perspicitur, quam præferunt tum ratione sui, tum ratione Subjecti suapte naturâ mutabilis; verum etiam certa quotidie visitur nonnullorum, a Veteribus in magno pretio habitorum, inefficacia; clarèque dignoscitur, Priscam, quæ ad noviter detectorum normam minimè correctâ sit, medendi Methodum, nec cohærere principiis constituentibus humanum Corpus, nec respondere expectationi Medentium in morbis curandis, peritiorum iudicio, & consensu unanimi. Utinam tam perspicuè didicissemus, quæ feligenda sint, ac utilia, quemadmodum didicimus, quæ vana, vel noxia sunt, atque vitanda. Hinc emerfit Galenicæ nonnunquam, vel Galeno saltem adscriptæ Methodi castigatio in nonnullis; in nonnullis aliis approbatio, prout detecta veritas identidem suadet, propriumque munus exigit, & quæsitâ præ cæteris Ægrotantium salus.

Cæterum nec Priscorum Medicina probos, pioſve facit Homines, niſi aliunde ſint tales, nec Recentiorum impios, aut improbos. Sic potiùs conſcientiæ ſuæ non deeſſent quandoque, qui nova medici ordinis minimè ponderata, aut examinata cæco quodam inſtinctu contemnunt. Hac de re vide Therapeut. meam pag. 60. 61. 62. Nihil ergo rei magis habet Neotericorum Medicina cum Philoſophiâ Carteſii, vel Gaſſendi, quàm cum Philoſophiâ Ariſtotelis: a quibus etiam omnibus Scholis, ſi libeat, poteſt illa præſcindere. Hanc idcirco praxim, non minùs quàm vetuſtiorẽ, potiſ eſt exercere citra religionis detrimentum Chriſtianus quilibet Medicus, ac ſummè pius, non ſecus ac illam exerceat Judæus, vel Scythæ. *Phyſicam Ariſtoteliſ, & Galeni Ignaram* longè ante hoc Sæculum promulgavit, ſuamque *Novam Medicinam*, novamque Sectam fundavit Jo: Baptiſta Van-Helmont; necdum tamen in Scholis ortum habuerat Carteſii, vel Gaſſendi Philoſophia.

Quod eſt ad me, nulli me Factioni profiteor ſerviliter deditum, ſive de rebus Medicis ſermo ſit, ſive de Philoſophicis: neque ideo Remedia, quæ, Hippocrate duce, incerta protuli, ſive *periculoſo* identidem *experimento* obnoxia (cujusmodi ſunt eorum non pauca) planè ob idipſum proſcribenda cenſeo; iis ſiquidem utor & ipſe defectu certiorum, ut patet undique ex Tractatu meo; eâ tamen utor fiduciâ, & cautelâ, quæ incertitudini nunc majori, nunc minori æquum eſt ut respondeat. Inertia ſolummodo, & inutilia, quæ nempe talia deprehenderim, quantumvis magnifica, conſtanter rejicio: contra verò, efficacia, quæ ſcilicet longo uſu expertus ſim talia (ſunt autem hæc numero non multa quidem; ſed nec tam pauca, quin ſatis) conſtanter quoquè adhibenda ſuſtineo; ut abundè jam in eâdem Therapeutice meâ. Hanc ſanè ſi luſtraſſet, ut cæteroqui par erat, Excellentiſſimus Ciccolinus ſolis paginis 25. 26. 27. & 28. ab eodem citatis, vel etiam pag. 244. & 253., magiſque attentè conſideraſſet quæ a me ſunt abſolutè, quæ tantùm comparativè, aut cum aliquâ limitatione prolata, quæque pariter in totâ hiftoriarum inibi narratarum praxi mihi uſui fuere remedia, vel denique ſi Lexicographos, ubi illi opus erat, conſulere non erubuiffet; proſectò nec tam facilè pro Bajulis a me fortuitò alicubi memoratis Apparitores, aut Liçtores intellexiſſet, nec tot abſona, falſa, & vana, quæ puderet hic recensere, æquè inaniter quidem ac illepidè obtruſiſſet.

Sed quoniam ex Opere meo latinè conſcripto laborare noluit, ut ſatis perciperet quid obiter ſaltem de Carteſii doctrinâ ſenſerim pag. 296.; commodiùs certè poterat, atque etiamnum poſſet idipſum ediſcere ex Diſſertatione quadam meâ Epistolari anno 1706. vernaculo ſermone exarata ad Doctiſſimum D. Marchionem Urſum, & ab eo editâ in Erudiſſimo Libro ſuo, cui titulus -- *Lettere di diverſi Autori in propoſito delle Conſiderazioni del Marchese Giovan Gioſeſſo Orſi &c.*: a pag. 287. uſque ad 320. ejuſdem Operis: ibi namque, ubi fuſè de Carteſio, nec non de Gaſſendo, & Ariſtotele ſermonem habui, me nullius in verba Magiſtri quò ad res Philoſophicas unquam juraſſe, apertè viſitur. Ea ſiquidem ſemper, quæ tam in Sententiâ ejuſdem Ariſtoteliſ, quàm Carteſii, Gaſſendi, aliorumve ſaniora, & meliora

credidi, nī mea me fefellit electio, conatus sum hinc indē excerpere, & pro ingenii viribus etiam connectere; quæ verò deteriora, planē rejicere: id perpetuò præ omnibus ratum habens; in hisce videlicet rebus, persæpe etiam vanis, veritatem in puteo latere, nulli hominum in hac vitā unquam se prodituram. Jam verò unde digressus sum denuo revertor. Epistola itaque Famigeratissimi Lancisii sic habet.

Viro

D. FRANCISCO TORTO.

Med. Doct., & Mutinensis Academiæ Professori longè

JO: MARIA LANCISIUS S. P. D.

Vix librum, Therapeutice specialis ad Febres quasdam perniciosas, quem avidissimè præstolabar, Clarissimus Pacchionus noster abs te mihi reddidit, cum statim aperire illum, atque evolvere occœpi, tametsi nondum compactum, & conglutinatum. Nec sanè Titulus ipse citra admirationem modestiæ tuæ occurrit: rem enim summis dignam ingeniis, & in arte medicâ exercitatissimis tractandam aggressus, Juniorum, & Candidatorum propositam tibi utilitatem profiteris. Tum utraque, ad Principem nempe, atque ad Lectorem epistola singularem animi tui moderationem, ac eruditionem nobis exhibuit. Subinde Librorum singula Capita percurrimus, ex hisque, perspicuâ methodo dispositis, specimen prodire conspeximus pulcherrimorum undique argumentorum, quæ varietate simul, & veritate, procul a fastidio, atque offensione, mirificè blandiuntur. Deinceps attentissimè legimus primum, & secundum Librum, in quibus, ut experimenta de Chinæ usu tanquam pretiosam Recentiorum mercem extollis, ita Priscorum, ac Mercati præsertim animadversiones circa perniciosarum Febrium discrimina aureum veluti pulverem agitare non prætermittis, æquissimus semper Judex, verique amantissimus. Ex reliquis autem tribus Libris tot, tantaque, omnia tamen tuo ab ingenio cum fructu jucunditatis, atque utilitatis, deprompsimus, ut, quemadmodum tu sine plenâ rerum Physico-Mechanico-Anatomicarum scientiâ, ac longo usu, scriptis illa tradere nequisses; sic neminem, qui eadem penitus persequi velit, absque magno suorum studiorum emolumento a lectione recessurum existimamus. Placuerunt, fateor, inter cætera, quæ Libro 3. Cap. 2. nervosè, ac doctissimè a te proponuntur: etenim insequeris eò loci perniciosarum Febrium fermentum, aut subsistens, aut fugiens a primis in secundas chyli vias, atque ab his in tertias circulantis sanguinis, quartasque excurrentis succi nervei semitas, itaut, quocunque se hostis recipiat, turbas faciat, classicumque canat; armatâ semper Peruviano Cortice manu feliciter profliges, atque prosternas. Quid? quod Arborem immortalitate dignam, in calce libri delineatam, Studiosorum in gratiam posuisti. Scilicet ut ab ejus singulis ramis, ut scribis, non decorticatis (modò memoriæ committantur) totidem quasi hastæ ad confodiendas febres, plerunque exitia-

exitiales, parari facillimè possint. Hæc autem omnia eo quidem judicio ubique rimatus es, ut nihil a stylo tuo (satis alioquin robusto, atque eleganti) excidere videatur, quod non sit vel gravissimorum Virorum auctoritate, vel longo tuo experimento confirmatum. Quamobrem si fortè imprudens quispiam (caveat hîc sibi Excellentissimus Ciccolinus) carpere aliquid tuis in Scriptis ausus fuerit, latrabit semper ille, non mordebit. Neque verò præterii sinè gratâ humanitatis tuæ commendatione locos illos, quibus me, meosque labores officiosè commemoras. Hoc sanè faciet, ut jure multò majori meis in Commentariis æternorum tuorum Operum debeam imminisse. Vale Vir Amicis pariter, & Reipublicæ.

Datum Romæ XIII. Kal. Martii MDCCXIII.

(c) (*Quantâ cautione &c.*) Tantâ cautione, remotioribus præsertim temporibus, Corticem Peruvianum, ut & alia ferme omnia remedia, præscribere consueverat oculatissimus Malpighius, ut fuerim ausus in Therapeutice meâ pag. 29. proferre, suam illi in hoc condonandam esse cautelam, quippe eidem de more quidem familiarem, sed circa usum hujusce Febrifugi fortè nimiam. In citato tamen per Cl. Auctorem Consilio nihil illi condonandum dixerim; neque enim eo casu valde ancipiti quicquam ampliùs ipse proposuissem. Habebit fortasse quid donet illi, aut potiùs quid parcat, sed de excessu, idem Cl. Auctor, qui duas tantùm Chinæ Chinæ drachmas exhibere consuevit; neque tamen repetere: cum contra hîc Malpighius drachmas quinque ad quindecim dies partitis vicibus offerendas proponat. Atque hanc ipsam & mihi iis nonnunquam casibus Lentarum, & Diuturniorum febrium, ex Intermittentium tamen radice, esse Methodum præscribendi Peruvianum Corticem, potest quilibet intueri pag. 116., & 117., imò & a pag. 646. ad 651. ejusdem Therapeutices meæ.

(d) (*Remedia &c.*) Ad hunc Textum petitem ab Opere Posthumo ejusdem Malpighii, & signatè ad primam illius partem respondeo, hîc improbari a Viro illo circumspèctissimo Chinam Chinam, tanquam recensitorum malorum productricem, si ea, ut clarè inquit, fuerit sinè arte adhibita. Adhibeatur itaque ex arte, ut in Tractatu meo sum conatus explicare pro viribus; atque ita, non modò evitantur Recidivæ, Fixationes, & Cachexiæ, quas arte non adhibita metuit (fortassis & supra modum metuit) famigeratissimus Malpighius; sed hæc ipsissima mala, Fixationes nempe, & Cachexiæ, si præextiterint, a Febribus diuturnis invecitæ, eodem Febrifugo unâ, & eâdem operâ sanabuntur. Audiamus in hanc rem, præter Restaurandum. Morginotium, aliosque plures super hac materiâ citatos in Therapeut. meâ pag. 179. 180. 181., & præter historias a me ipso allatas, tum ibidem, tum pag. 175. hist. 11., & pag. 177. hist. 12., audiamus inquam sex Medicos Insignes, ex Inclyto Collegio Mediolanensi, videlicet Jo: Horatium Castilioneum, Jo: Paulum Cambiagum, Hieronymum Cardanum, Franciscum Guadignanum, Sebastianum Calvum, & Christophorum Paravicinum, apud Badum lib. 3. pag. 250.

hæc attestantes ab anno 1658., quo tempore novus adhuc erat in Europâ Peruvianus Cortex. Illorum verba sunt hæc. *Factâ igitur a nobis per decem continuos annos (non per decem dies , aut menses) multiplici experienciâ , omnibus , quibus ex præscripto exhibitus fuit , profuit . Aut enim eos omnino a Febre immunes reddidit unicâ vice assumptus , aut si ex delictis in victus ratione , vel ex aliâ causâ (adderem , si bene ferret Cl. Auctor , qui sapiebat plurimum , - ex non continuato illius usu) Febris rediit , denuò eo assumpto liberi evasere . Mirum dictu ! Lienosi , Cachectici , extinctâ Febri , nullis aliis assumptis remediis , a Cachexiâ , & Lienis infarctibus liberati sunt &c. Nullis , quod sciamus nocumentum attulit &c.* En ergo quomodo China China ex arte illorum solummodo temporum præscripta , & repetita Recidivas faciliè tollebat , & Fixationes intrâ Lienem , & Cachexias ipsas curabat . Idem confirmat senioribus hisce temporibus famigeratissimus Jo: Jacobus Mangetus Bibliot. Medico-Pract. lib. 6. §. 20. pag. mihi 239. his verbis . *Cortex non tantum Febrem , sed nonnunquam etiam Hydropem indè ortum depellit : & quidem in substantiâ ipsâ exhibitus , non Tincturæ specie ; etenim ex eodem Auct. ibidem §. 16. In Substantiâ sumptus efficacior est : certius enim , & citius paroxysmos sistit &c.*

(e) (*Hinc necesse fuit &c.*) Quemadmodum prima pars hujus Textus respicit usum Chinæ Chinæ *sinè arte adhibitæ* , hoc est adhibitæ , vel *Ubi* , vel *Quando* non convenit (quâ de re jam pluries ad fastidium usque) ita secunda hæc pars respicit *Modum* eâdem utendi rationalem . Atque hic animadvertat Lector , quàm parum cautè , quàm parum appositè Cl. Ramazzinus Chinæ Chinæ usum *quemcunque* §. 6. merè empyricum , irrationalem , & amethodicum prædicans , utatur hoc Textu , quem Malpighius , ut satis patet , protulit in eum præcisè finem , ut ejusdem Febrifugi usum , non merè empyricum , sed methodicum , rationalem , & planè jam *tutum* , mediis præparationibus variis , apud Medicos factum ostenderet . Adeoque nil aliud hinc posset inferre noster Auctor , nisi ad summum , necessarias esse præparationes a Malpighio allegatas , ut *tutò* possit China China adhiberi ad eas Febres , ad quas illius actionem pertingere docet experientia , cum in substantiâ nudâ exhibetur .

Licèt autem quò ad istas Remedii præparationes ego experienciâ multiplici ductus possim asserere denuo , quod & asserui in Therapeut. meâ pag. 123. cum Mortono , & Blegnyo ; Efficaciorem scilicet esse substantiam simplicem hujusce Febrifugi , quàm Extracta , & Tincturas illius , ut sentit quoque Lemeryus in cursu Chymico , a Cl. Auctore infra citatus , & in Bibliothecâ Medico -- practicâ , ut annotavimus nuperrimè , Jo: Jacobus Mangetus , aliique ; nihilominus neque renuo rursus admittere , quod in obsequium Viri tam celebris adinisi pag. 121. ejusdem Therapeut. ; posse videlicet *Tincturam* potius , quàm *substantiam* ligneam Corticis , eamque *paulatim* potius , quàm *cumulatim* exhiberi , ubi non magna urgeat necessitas , vel sollicitudo citioris , aut certioris eventus : uno verbo , in *diuturnis* , & *benignioribus* Intermit-

tentibus

tentibus. In *Perniciosis* siquidem, tam Intervallatis, quàm Subcontinuis, etsi quandoque Extracta, & Tincturæ ex usu esse possint, nec inutiliter; haud tamen vereor affirmare, *certiorem* semper esse, *citio-rem*, nec propterea *minùs tutam* curationem, quæ *Substantiâ* Corticis assumptâ obtinetur, quàm quæ obtinetur ope *Tincturæ*, aut *Extracti*: quemadmodum in Libro, cui Titulus, *Oculorum, & Mentis vigiliæ*, pag. 274., auctoritate Mortoni, & propriâ experienciâ fretus, huic eidem Malpighianæ animadversioni respondet Cl. Sbaragli, ejusdem pariter Scholæ Bononiensis Professor, & (quantùm ex ejus Scriptis licet conjicere) Peruviani Corticis administrator neutiquam scrupulosus. Sed & his missis, Malpighius certè temporibus suis ne cogitavit quidem de Febribus hujusmodi lethalibus Chinâ Chinâ curandis, vel de tam validâ illius virtute in extremo etiam earundem Febrium exitio; imò in angustiis *proximæ, certæque* jam necis. Neque enim metum *Recidivarum*, nec *Fixationum*, nec *Cachexiæ*, nec aliorum quorumvis morborum, servato tunc Ægrotante subinde facilè curabilium, in tam gravibus circumstantiis objecisset, satis conscius aurei effati, quod habet Celsus lib. 8. cap. ult. *Nihil interest, an satis tutum præsidium sit, quod unicum est.*

His omnibus de causis, *suam* in Therapeut. meâ, loco citato, *cautelam* dixi *condonandam* Malpighio, Viro sanè, quem libenter & ipse fateor *Sapientissimum*, qualem modò prædicat, qui sibi favorabilem putat, Cl. Ramazzinus. Neque ego propterea tanto Viro, velut crimen aliquod unquam objecerim, quòd ille populari, crebræque praxi minùs addictus, sæpius etiam in otio rurali Sectionibus Anatomicis, præsertim minutioribus, occupatissimus (quibus studiis, utilitate suâ nequaquam carentibus, longè a Medentium, & Ægrotantium turbâ eminenter inclaruit, inaccessa peragrans loca, & *nullius ante Trita pede*) humilioribus hisce, quantumvis æquè saltem utilibus, minùs vacare potuerit, aut potius voluerit. Nullus enim dubito, quin pro suâ ingenuitate, si vixisset in hæc usque tempora, alienæ saltem praxi eam fidem in hoc fuisset adhibiturus, quam anatomicæ illius dexteritati alii adhibere consueverunt. Nec proinde illius ego *curiosam diligentiam* salibus *Aristophanis* *perfricuerim*, ut satis manifestè, dissimulanter licèt, olim perfricare visus est Cl. noster Auctor: & quidem acrioribus, ac unquam perfricuerit illam jisdem temporibus Auctor Dissertationis *De Recentiorum Medicorum studio*. Videtis curiose Lector Dissertationem Cl. Ramazzini De Constitutionibus trium annorum 1692., 93., & 94. §. 58., & 59. pag. 193. Edit. Patavin., ibique Mantissam hanc illi Dissertationi, etsi jam planè absolutæ, pruriente nihilominus calamo eleganter assutam reperies.

(f) (*Malo usu &c.*) Quis quæso de *malo usu*, nedum Peruviani Corticis, sed & aliorum remediorum, puta Phlebotomiæ, Purgationis &c. acria non scribat? Contra *malum* hujusce Febrifugi *usum* scripsi & ego, qui tamen dicor alicubi a Cl. Auctore, *Magnus Chinæ Chinæ virtutum assertor*; scripsere Sydenhamius, imò & Mortonus ipse, alique ferè omnes, innoxii cæteroqui, & saluberrimi hujusmodi Remedii Fauto-

res, ut passim videre est, tam in Scriptis eorum, quàm in ipsâ Therapeutice meâ. Sed quid inde? Opus esset ostendere, *malum* usum, quem damnant auctoritates omnes, tum hoc, tum aliis Criticæ hujus Dissertationis locis adductæ, esse illum *eundem*, quem specie recti usus exercent *Mutinenses Medici*; sive, ut citra fucum loquamur, quem titulo *peculiaris*, ac perutilis *Methodi* proponit, ac laudat eadem Therapeutice mea: *rectum* verò usum illum esse *tantummodo*, quem limitibus arctissimis conclusum ferme ad nihilum tandem redegit Cl. Auctor. Ad hæc oporteret (ut vim probationis haberent eadem auctoritates) oporteret, inquam, ut Scriptores illi *Methodum* ipsam *meam*, in circumstantiis præsertim, in quibus eam *peculiariter* proposui, nedum præcisè damnarent, sed & damnarent *experti*, non rationiis tantum innixi; meque *re ipsâ* falsitatis evincerent, aut vaniloquentiæ. Sed quis, Mortono excepto, aliisve perpauca, Peruvianum Corticem in Perniciosis Febribus a Mercato descriptis, methodicè, ac ex arte fuit unquam, saltem constanter expertus, ante evulgationem Tractatus mei, specialem Methodum, nondumque notam tradentis, ut praxi meæ suam in iisdem Febribus, & circumstantiis æqualiter exercitam, queat opponere experientiam?

Quæ igitur de *malo* hujusce Corticis *usu* generaliter scripta extare dicuntur apud Georgium Baglivum, Nicolaum Lemery, & Theophilum Bonetum in variis Operibus suis, nil probant adversum me, nilque adversus Peruvianum Corticem: cum vix aliquid per transennam apud ipsos legatur de *abuso Antifebrilium omnium* in genere, ut & de *usu* Chinæ Chinæ nonnunquam, ut ajunt explicitè, *intempestivo*; quem quoque *intempestivum* nihilominus etiam admittunt *in curatione coactâ*. Contra verò reperio plurima apud eosdem Auctores de vi, certitudine, & securitate hujusce remedii, quæ aciem legentis Cl. Ramazzini fortasse subterfugerunt, quæque facilè a curiosis Lectoribus possunt adinveniri, ut in sequentibus.

(g) (Apud Georgium Baglivum &c.) Georgius ergo Baglivus, ut aliquid obiter innuam de singulis, Lib. 2. Prax. Med. Cap. 3. pag. mihi 165. hæc habet. *China China est Remedium profectò herculeum in curatione Intermittentium; dummodò tamen* (quæ peritorum omnium cautela est) *non detur, si aderit suspicio inflammationis alicujus visceris, vel abscessus interni; neque in principio, crudis adhuc existentibus humoribus &c.* Item lib. eod. pag. 234. de inutili, ac noxiâ locutus bilis evacuatione in Tertianis -- *Evincit id, inquit, nuperrima Corticis Peruviani, aliorumque Febrifugorum artificialium detectio, quibus prudenter, & tempestivè datis, Febres omnes Intermittentes, a quibuslibet demum causis productæ, felicissimè eliminantur, nullis in medium productis Quæstionibus præparationis, aut evacuationis humorum.* De Remediis denique Specificis agens pag. 242. principem statim locum tribuit Peruviano Cortici, inquiens. *Sint constantia, videlicet Remedia specifica, methodo præscribendi munita, & morbo specificè, ac ferme infallibiliter respondentia, prout est in Intermittentibus Cortex Peruvianus &c.*

Quod si in Tractatu De Fibrâ Motrice , & Morbosâ identidem succenset usui Chinæ Chinæ , perpetuò loquitur cohærenter ad superiùs relata , tùm de illius oblatione ante sublatam , ut clarè semetipsum explicat , *Cacochiliam* , tùm de abusu ejusdem in Febribus *Mesentericis Romanorum* , ut vocat , ex vitio illius visceris non levi proficiscentibus , ac proinde *Symptomaticis* ; adversùs quas nil posse Peruvianum Corticem , communiter notum est , & a me pariter , nedum annotatum , sed & fusiori explicatione declaratum a pag. 594. ad 598. Tractatus mei . Oportet ergo probè dignoscere Febrium species , differentias , & transmutationes , ut pluribus aliis in locis Tyrones docui . Sed hoc (ut ajebam pag. 202. ejusdem Tractatus) quod maximè oportet docere , idipsum est , quod nequit satis doceri . Qui ergo omnes hæc Febrium vicissitudines exactè , quantum licet per observationes , & experimenta , non callet , nunquam erit Corticis opportunus administrator ; remediumque a perito Medico ferè nunquam incassum adhibitum , si fortè bis , aut ter cum successu , quater , aut quinques sinè successu exhibebit . In hos scopulos , in has Syrtes forsitan impegere Scriptores nonnulli , Chinæ Chinæ usui frigidiusculè tantùm plaudentes .

(b) (*Nicolaum Lemerii &c.*) Nicolaus verò Lemeryus in cursu Chymico Part. 2. Cap. 6. de Quinquinâ pag. mihi 454. ait -- *Hoc est Remedium tutius , quod usque adhuc repertum sit adversùs Febrium Intermittentium fermentum &c.* Usus illius primâ oblatione liberalem præcipit , continuatque diminutâ dosi bis in die per octiduum , & semel in die per aliud octiduum ; asseritque , constantem illius repetitionem impedire Febrium recursum , dummodo Æger fuerit antea ritè purgatus ; impurgato enim corpore Chinam Chinam exhibere , minimè tutum existimat . Hac de re vide Therapeut. meam lib. 1. Cap. 9.

(i) (*Theophilum Bonetum &c.*) Quò ad Theophilum denique Bonetum , in variis hujus Auctoris Operibus tot sunt , quæ favent usui Peruviani Corticis , ut cuncta recensere non vacet ; siquidem apud vastorum hujusmodi Collectaneorum Scriptores , qui aliena diversorum generum acervatim referunt in Studentium commodum , quisque reperit facilè quod sibi congruit . In Polyalthæ itaque suo Bonetus Tom. 1. Lib. 1. de Febr. Tit. 5. Cap. 1. de Intermitt. in gen. §. 59. de Chinâ Chinâ hæc habet ex Sponio pag. mihi 221. *Omnium usitatissimum , & certissimum omnium est Febrifugum &c.* , suadetque ex eodem ad præcavendum Febrium recursum dosim liberalem ad uncias usque duas §. 61. ; item ex Saccho hæc addit eodem §. 59. *In his Febribus China Chinæ valde salutaris ab experienciâ probatur &c.* & si revertatur paroxysmus , novâ Chinæ exhibitione supprimitur . Ex Villisio quoque §. 60. sic loquitur pag. 222. *Uusus pulveris Corticis Peruviani hunc morbum (hic intellige Quartanam) certissimè curare perhibetur &c.* Denique (ut plura alia omittam loca tam vasti Operis) ibidem ex Boyle sic concludit . *Si credendum erit magno Digbeo , culpandus potius Medicus , quàm nobilis hæc Medicina , si post hujus exhibitionem unquam revertatur Febris ; nam cum illum consulerem super hac re , sanctè mihi asseveravit , ex 30. , aut 40. circiter Quartanâ*

detentis , quos hoc solo remedio curavit , ne vel duos relapsos fuisse : neque tamen indè crediderim , Cachecticos illos paulò post obiisse , aut Hydropicos . Sed citati Auctores , de inhibendo relapsu adeò solliciti , nesciebant adhuc Theorema practicum Cl. Ramazzini ; videlicet , Optandum esse , ut Febris redeat remedii loco : Medicosque Chinam Chinam præscribentes interdum eludi , Febre amplius non redeunte ; sed tacitè corpus depascente .

Idem Bonetus in Mercurio Compitalitio , ubi de Chinâ Chinâ sermonem habens nihil edit de proprio , sed tantùm Villisii verba transcribit , scilicet lib. 6. De Febre Intermittente in genere , pag. 207. hæc nobis innuit . *Qui eâ ratione (videlicet usu Peruviani Corticis repetito) crebras inducias Quartanæ procurabant , alacres , & viridi ad negotia quæque expediti degebant , cum secus enerves , & pallidi in languorem , & vitiosum corporis habitum redigerentur . Vix unus e centum hoc remedium incassum tentavit : nec tantùm in Febre Quartanâ ; verùm in aliis Intermittentium Speciebus cum fructu adhibetur &c.*

Tandem in Medicinâ Septentrionali felicissimas adducit idem Bonetus Februm curationes , ope Chinæ Chinæ absolutas . Harum tres juvat recensere . Prima legitur Volum. 2. Lib. 5. De Febris Sect. 1. De Medicam. Antifeb. Obser. 5. pag. mihi 177. , estque observatio Erasmi Bartholini , qui primò in se ipso anno 1679. , mox in aliis felix de illâ periculum fecit , ejusque famam illis in Regionibus antea obscuram illustravit ; imò & rationibus validis usum ejusdem eâ ipsâ observatione confirmavit . Et quasi Regionibus illis indecorum putasset , apud alienigenas credi minùs excultum ibidem esse remedium illud , quod non multò ante Europæ innotuerat , hæc addidit . *Celeberrimus Vir Villisius multis experimentis edoctus statuit lib. de Febr. , eximias esse hujus pulveris vires in Febri Quartanâ debellandâ ; id , quod & Nobilissimus Robertus Boyle testatur in diversis editis a se Scriptis . Quare neque nos decuit usum ejus in terris hisce Septentrionalibus salutare fuisse silentio prætermittere , ut optimis rebus honos imprimis habeatur , neque in Medicamentorum cognitione confessa cum ancipitibus , & obscuris confundamus . Et paulò post -- Adeò ut verissimum esse deprehenderim quicquid laudati Auctores (alios enim antea citaverat , præsertim Antymum Conygium , sive Honoratum Fabri) de hoc pulvere bono publico divulgaverunt ; neque in hisce terris minorem esse ejus nobilitatem , quàm in Meridionalibus .*

Observatio altera habetur eâdem Part. 2. Medicin. Septentr. lib. 7. Paraleipom. ad lib. 3. Sect. 3. de Febris Intermitt. , pag. mihi 550. Obser. 19. , estque illa observatio Ferdinandi Friderici Illmer , pariter digna , quæ lustretur ; licèt hìc ob suam prolixitatem omittatur . Ex eâ siquidem non minùs Peruviani Corticis efficacia , quàm inefficacia totius vulgaris Methodi , aliorumque *Antifebrilium* ferme omnium , eo casu inutiliter usurpatorum , clarè deprehenditur .

Sed tertia Observatio , quæ hanc immediatè antecedit pag. 549. , estque Obser. 18. , rem planè conficit . Exhibet hæc Auctorem ipsum , qui eam describit , Theophilum Bonetum Quartanâ laborantem , & in ipso

ipso morbi principio, post sextum videlicet Paroxysmum, Chinâ Chinâ intrâ biduum ad drachmas, non duas tantum pro more, sed sex assumptâ, perfectè sanatum, atque ad calcem Observationis pag. 550. plura de hoc Febrifugo egregiè locutum; inter quæ nonnulla hæc cursum excerpta. *Circa usum istius Febrifugi, notandum, quò simplicius exhibetur, eò efficaciorẽ ejus vim deprehendi; neque consortium aliorum medicamentorum exposcere. Nam neque adjuvante indiget, quod vim illius intendat, cum hætenus nullum adeò efficax antipyreticon innotuerit, hinc ut quicquid in societatem illius venerit, infirmius sit, & inutile: neque corrigente, cum nullum ab ejus usu ex arte exhibitum, experientiâ teste, damnum emergat &c. Si Recidiva succedit, ea vel Ægri intemperantiæ adscribenda, aut quia intempestivè, vel coactè id assumptum est &c. Quid clarius? Quid Cortici favorabilius? Itane illum auctoritatibus Baglivi, Lemerii, & Boneti mulctat Cl. Auctor? Certè & hæc vice Carpathius testem.*

Quid verò si ego, præter responsionem hanc ab iisdem petitam, retaliarem Virum Cl. auctoritatibus quinquaginta forsan Scriptorum supra enumeratorum, tot, & tanta eidem adversa canentium? Quid, si unius Langii Dissertationem? Quid, si solam Mangeti Bibliothecam, vel Medico-practicam, vel Pharmaceutico-medicam cum Auctoribus in eadem, præter a nobis expositos, recensitis, Rajo, Courtine, Goodall, Hulse, Robinson &c. opponerem? Sed pueret, ubi de praxi lis agitur, alio uti teste, quàm experientiâ: maximè cum non de primævâ vulgari Methodo, nec de Febribus tantum diuturnis, de quibus solummodo passim loquuntur Auctores, inter nos sit Quæstio suborta; sed de Methodo recentis, & de usu paucissimis noto, cujus Judicium penès Seculum istud deinceps erit, serosque Nepotes, non penès prægressum. Id unum liceat a Mangeto supra laudato in rem nostram excerpere, Bibliot. Pharmaceutico-med. lib. 17. pag. mihi 697., quod sic habet. *Pro ejus vi febrifugâ (loquitur de Chinâ Chinâ) quidam acriter militarunt, dum alii nobile hoc medicamentum totis impugnarunt viribus, (en igitur quàm facile sit, & simul quàm vanum, notas jam, sed effætas, atque hodie inanes contra illud congerere auctoritates) donec tandem ultimis hisce annis ab omnibus prope Medicinæ Cultoribus, Ægrorum suorum solatium verè expetentibus, non tantum amicè excipitur (en ex adverso quàm facilius sit, sed simul quàm æquius, potiore auctoritate, & experientiâ firmatas, condere pro eodem Pandectas) sed etiam pro Panacææ quadam quasi specie non immeritò salutatur. Cur ergo ultimis hisce annis desit saluberrimam hujusmodi Medicinam ita salutare, qui ante paucos annos, imò ante paucos menses tam humaniter, tamque benignè salutaverat Cl. Auctor?*

S. 44.

Sed forte quis dicet ignotam fuisse novam hanc Methodum Chinam Chinam exhibendi in larga dosi ad uncias, & pluries in die, ac in illius usu persistere donec febris extincta fuerit. At ista Methodus nova non est, (a) licet pro nova venditetur, jamdiu in Germania usui esse cœpit, ut videre est in Epistola responsiva Roberti Bradi ad Thomam Sydenham, ibi enim verba hæc scripta reperio. *Equidem scio quosdam haud infimi subsellii Medicos, qui in magna quantitate, & dosi sæpius repetita eum exhibent; alios item qui ex eodem extracta, infusiones, & ex infusionibus julapia, & emulsiones conficiunt, quibus modis se non tantum intermittentes, sed & continuas quasdam certo curare affirmant.* Profecto hac in re (b) nil inausum, nil intentatum reliquit Medicorum industria, ut etiam excogitarit ex Chinæ Chinæ decocto Clysteres Febrifugos.

(a) (*Licet pro nova venditetur &c.*) **P**RO novâ certè non venditur a me Methodus mea, quam patior libenter, ut appellet quisque pro arbitrio, vel meam, vel alienam, vel ad imitationem alienarum confarcinatam, quemadmodum in Therapeut. meâ lib. 3. Cap. 4. pag. 343. & seq. Posse nihilominus, forsan & debere, novam vocari, habito ad circumstantias quasdam respectu, quæ se tenent tum ex parte Februm curandarum, tum maxime ex parte modi exhibendi Peruvianum Corticem, illumve industri quadam, & inæquali partitione distribuendi, pro ratione angustæ temporis, & imminentis exitii, ne inutiliter administretur, ex eodem Cap. 4. lib. 3. a pag. 343. usque ad 354. luce meridianâ clariùs apparet.

Sed hæc novitas, seu, quod refert, peculiaris utilitas Methodi meæ non consistit in exhibendâ, ut hic inquit Cl. Auctor, Chinâ Chinâ in largâ dosi ad uncias, & pluries in die &c.: hujusmodi enim lata nimium, & indeterminata loquendi forma satis a me exhibita est pag. 331., & 332. Tractatus mei; sed consistit ad summum, ut aliàs recensui, & ut patet ex eodem Opere meo pag. 333., in duabus plus minùs unciis Chinæ Chinæ, intrâ tres hebdomadas assumptis; unâ ex illis ad curationem, alterâ ad præcautionem præscriptâ, in casibus Februm Perniciosarum, ac summè lethalium, ubi major necessariò, quàm in benignioribus impenditur copia Febrifugi. Dosim istâ copiosiore, quæ scilicet pro unâ Ægritudine curandâ, uncias duas longè transcendat Pe-

dat Peruviani Corticis , tanquam abusum a me damnatum vide pag. 336. , & 337. ejusdem pariter Tractatus mei. Distributio autem istiusmodi dosis liberalior est mihi tantummodo in primo Cyatho , sive in primâ Remedii oblatione , in casibus tamen solum maxime urgentibus , & deficiente tempore lentius agendi : tunc siquidem semunciam de more , paulò etiam plus , aut paulò minus , pro affectus , ac temporis exigentiâ præscribo . Atque sita sufflamine itatim imposito Febri præcipiti , reliquum Corticis ad alteram utque unciam , lentiore sensim pro re natâ progressu , consumptum volo . De his omnibus fusè , & ordinatè in eodem Opere meo a pag. 321. usque ad 354. , ubi totum Corticis impendium , & tota simul meæ Methodi novitas abundè perspicitur . Novum quippe revera est , propinare hoc pharmacum in iis circumstantiis , in quibus nulla amplius pharmaca locum habent ; magis novum , propinare tam utiliter ; & maxime novum , hanc utilitatem pendere ab industri quadam modicæ potius , quàm exuberantis tandem quantitatis distributione .

Sed si *Methodus ista nova non est* , & si *jamdiu in Germaniâ* , ut inquit , *usui cœpit esse* , cur illam soli *Mutinæ* sequaci imputat , non verò *Germaniæ* , ut asserit , præeunti Cl. Auctor ? At hallucinatur ille non parum , dum in asserti sui probationem adducit Epistolam Bradii (fallitur & in hoc , quòd *responsivam* vocat , cum sit sciscitatoria ad Sydenham) Robertus enim Bradyus , ut patet ex eâdem Epistolâ , & ex Responsorîâ annexâ Sydenhamii ad ipsum Bradyum pag. 332. , & seq. in Operibus præcitati Sydenhamii , Edit. Pâtav. 1700. , est Professor *Cantabrigiensis* ; verbaque a Cl. Ramazzino hîc recensita scripsit idem Bradyus e *Cantabrigâ* , Urbe , non *Germaniæ* , sed *Angliæ* celeberrimâ , ut videre est loco citato . Crebrò nimis profectò labitur vel inter plana hæc cœspitans Vir Cl. , ut queam ipse tam crebrò dissimulanter connivere . Quòd ille §. 31. *Franciscum* pro *Antonio* extintum , sive occisum voluerit : quòd §. 32. alium quempiam de *Marchione Comitem* fecerit : quòd §. 33. Fernelii Libros De abditis non *Rerum* , sed *Morborum* Causis inscriptos dixerit : quòd denique hoc ipso Paragrapho Epistolam Bradii *Sciscitatoriam* pro *Responsorîâ* sumpserit , & Nationum Medicinam confundens , *Germanicam* Scholam citavit loco *Anglicæ* , vel Germaniam ipsam ad Tamesim , & Camum pro Angliâ collocavit ; id omne illi facillè condonandum dixerim ; quamvis id ipsum alii non ita facillè laturos sint Medici , neque Geographi . Sed quòd morem ejusdem Anglicæ Scholæ , quam mihi , tunc licèt inscio , præeuntem in liberaliori Chinæ Chinæ usu ad Perniciosas Intermittentes pluries asserui in Opere meo , velit ille adscribere insuper Scholæ Germanicæ in contumeliam Methodi meæ , ut scilicet omne illi adimat novitatis decus ; id certè non æquè facillè ferendum mihi : quemadmodum nec bene tuli , nec unquam feram , venditatum falsò ab eodem (puto quidem sinè crimine) pro infaushtë alicubi exhibitò , nullatenus exhibitum , aut propositum Peruvianum Corticem .

Sed quoniam Germanum effinxit invitâ Naturâ Robertum Bradyum , cur saltem illius germana sensa nostro Cortici adeò favorabilia ,
& ex

& ex immediato ejusdem contextu clarè patentia non subdidit Vir integerrimus ? Subdam ego de more proluxior quod de industriâ omisit ille, cùm maximè ipsum juvabat brevitati studens; imò totum, prout jacet, Bradii Textum, a Cl. Ramazzino partim allatum, & partim omissum integrè huc reddam. Sic ergo Thomæ Sydenham Londinensi sub die 30. Decembris anni 1679. scripsit e Cantabrigâ Robertus Bradyus -- *In Sectione primâ Cap. quinto Libri tui paucis egisti de usu Corticis Indici, & ejusdem exhibendi Methodo. Equidem scio quosdam haud infimi subsellii Medicos, qui in magnâ quantitate, & dosi sæpius repetitâ eum exhibent; alios item, qui ex eodem extracta, infusiones, & ex infusionibus julapia, & emulsionem conficiunt: quibus modis se non tantum Intermittentes, sed & Continuas quasdam certò curare affirmant. Magnum procul omni dubio in curandis Intermittentibus est remedium. Ego quidem per 20. plus minus annos dictum Corticem variâ formâ, & multiplici præparatione maximo cum successu exhibendum curavi. Si verò peculiare quippiam de usu hujusce Corticis nosti, vel quid melius progrediente experientiâ fueris edoctus, id ne graveris, precor, in lucem proferre. Hæc omnia e Cantabrigâ Bradyus. In Angliâ ergo, non in Germaniâ, (penès Mortonum saltem, & Sydenhamium) usitata erat Methodus, non quidem eadem, sed nec longè ab- similis a meâ, præscribendi Peruvianum Corticem, ut candidè fassus sum in Therapeutice meâ locis citatis, & alibi. Quodnam autem Bradyo responsum dederit Sydenham, & quâ Methodo se usum dixerit in ministrando Ægrotis Peruviano Febrifugo, satis patet ex Textibus illius a me transcriptis, tum olim in Tractatu meo, tum denuo in hisce Responsionibus Jatro-apologeticis. Quòd si insuper particulam quamdam finalem Responsionis ejusdem Sydenhamii ad Bradyum, pro meliùs dignoscendâ eximiâ vi Corticis ex arte adhibiti, meorumque insimul dictorum explorandâ fide, lustrare libeat; quoniam hæc ipsa Sydenhamii conclusio rebus quoquè meis tam bene congruit, ut mihi fortassis hodie idem de Opere meo liceat affirmare, quod de suo quondam Sydenhamius asseruit; hæc illius verba summatim huc translata haud piget subdere. Si placuisset ad ea animum advertere, quæ annis abhinc quatuor tradideram; quo pacto scilicet Cortex debuerit ministrari, tum postea repeti, Ægro convalescente, viverent fortassis haud pauci eorum, quos jam terra tegit; utut homines vilipendant tenues sanè illos conatus nostros, communi omnium bono dicatos, & monita spreverint ibidem dictata. Hæc eadem itaque mihi sors obtigit a Cl. Ramazzino, cui mea minimè placuerunt vel dono missa. Nullo igitur pretio mercem hanc venditavi, quæ tantum abest, ut illum emptorem habere meruerit, quin potius habuerit contemptorem.*

(b) (Nil inausum &c.) Aulus iste tam insolens præscribendi Clysteres ex Chinæ Chinæ decocto, si apud Cl. Auctorem malè audiat ut enervis, aut parum efficax, eadem quoquè ratione non admodum gloriosè audit apud me pag. 669. Tractatus mei; quamvis non semel & hac viâ mihi usui fuerit idem Peruvianus Cortex. Si verò malè audiat alio nomine; sciat idem noster Auctor, ad ausum hujusmodi, præter

præter Helvetium Facinoris Auctorem, pervenisse quoque e *Scholâ inclytâ Bononiensi* (quæ cæteris, ipso Judice, pro regulâ *Policleti* esse potest) Clarissimum Sbaragli, per superiora, & per inferiora Febrifugum hoc pro casuum exigentiâ in Ægrotantium corpus immittere non renuentem, ut in *Oculorum, & Mentis Vigiliis* pag. 273. Sciat insuper, ad eundem ausum nedum pervenisse in curatione auspiciatissimâ Pueri quinquennis, remedia quævis per os respicientis, sed & Practicis stimulos addidisse ad idem tentamen Georgium Baglivum, quem §. antecedenti citavit Cl. Auctor tanquam Scriptorem usui Chinæ Chinæ ad-versantem. Legatur Casus apud eundem Baglivum lib. 1. *Prax. Med.* Cap. 13. pag. mihi 128. Quid ergo miratur adeò Vir Cl. de *Clysteribus Febrifugis* ex Chinâ Chinâ paratis, qui Moniali cuidam nihil per os assumenti, ad 66. dies per solum Clysterem *Nutrientem*, singulis diebus injectum, vitam se prorogasse refert in suis Constitutionibus Epidemicis Mutinensibus, a pag. 107. usque ad totam pag. 109.? Metuitne forsan, ne qui parantur ex Chinâ Chinâ Clysteres, *Cachexiam* pariant, aut *Hydropem*, eâdem, quâ *Nutrientes* illi alimentum intrudebant viâ? Certè si crebrò, & copiosè repetantur, inflabunt Abdomen: cujusmodi infortunium fortè contigit quadringentis illis militibus prope Manhemium æstiva castra sortitis.

§. 45.

JAm multa habita sunt experimenta permiscendo Chinam cum variis Spiritibus, cum succis corporis animalium, cum succo pancreatico, cum bile, cum sanguine recenter extracto, ad observandum, num aliqua fiat effervescentia, & colorum mutatio. Hujusmodi tentamina, quæcumque ea sint, non improbo, sed dico hac in re non paucas contingere hallucinationes; in Stomacho etenim ex succo acido, qui inibi ex naturæ lege hospitatur, & alchali fixo Chinæ Chinæ fit lucta, & exinde novum concretum, quod ad alias partes demissum, diversas habet vires, quod permixtum cum succo pancreatico, cum bile, cum sanguine, quid operetur scit Deus. Quantum in rerum natura possit mixtio, ex nitri, sulphuris, & carbonis permixtione, unde emergit pulveris pyrii tantarum virium compositio, jam satis notum. Sat celebre est illud Aufonii de Muliere mœcha, quæ Marito zelotypo toxicum dedit, ac postea ut illius vim

vim geminaret , Argentum vivum porrexit , sed antidotum prioris veneni exhibuit.

(*Jam multa &c.*) **N**E quis possit ambigere , utrum ipse petar , & an ventiletur Opus meum in hac Dissertatione Criticâ universâ , placuit Cl. illius Auctori in ipsa quoque Specialia experimenta mea , seu potius tentamina quædam , ad explorandam febrifugam virtutem Corticis aliquando instituta , & pag. 48. mei Operis exposita , nonnihil animadvertere . Et licet ex iis me nihil solidi elicuisse sim fassus ; imò licet in iis nil improbandum se reperisse quodammodo fateatur Vir ipse Cl. ; nihilominus aliquid tandem expiscatur , quod carpat , generaliter inquires , *Hac etiam in re non paucas contingere hallucinationes* : quasi fallax fuisset regula investigandi per hæc tentamina virtutem Corticis , quotiescunque etiam per illa phænomenon aliquod speciale , ac novum innotuisset . Sed ; bonâ ejus veniâ , hallucinatur ille non parum , ordinem philosophandi experimentalem invertens . Ex actione quidem cujuspiam Remedii quid peculiare agentis extra corpus humanum , haud satis certò potest elici conjectura , quòd idem pariter actuum sit intrà corpus humanum , ob tot aliorum , diversorumque succorum commistionem , quibus inficitur , ut pag. quæque 678. Tractatus mei minimè sum veritus confiteri . At verò si illud idem Remedium , nempe in casu nostro China China , certò agat quid peculiare intrà corpus humanum ; scilicet Fermentum febrile nobis occultum certò corrigat , ut certò corrigit ; subinde autem per experimenta extra corpus habita nobis constet (quod tamen nequivit constare) illam succos V. G. insigniter acidos , amaros , aut falsos retundere , eosque omni acrimoniâ Naturæ modum excedente spoliatos , ad dulcedinem quandam reducere ; plurimâ cerè probabilitate , ne dicam evidentiâ , inferri poterit , tum quòd China China humores nostri corporis præter naturam acidos , amaros , aut falsos redditos , vi suâ cogat dulcescere , tum maximè quòd ipsum febrile fermentum ab eâdem retusum , acidum revera sit , amarum , aut falsum .

Aliud ergo est , quærere per experimenta extra corpus instituta Remedium febrifugum ; aliud est , Remedii febrifugi jam reperti quærere vim intrà corpus exercitam , per experimenta illam demonstrantia extra ipsum corpus . Si ex Toxicis , Hydrargyri , & humanæ simul Salivæ permistione , Toxicum ipsum extra corpus humanum dulcescere , suâque acrimoniâ spoliari , aliquando observare potuisset Mulier Mæcha , ab hujusmodi commistione intrà corpus Mariti Zelotypi dubio procul abstinuisset , aliterque cecinuisset Ausonius . Sed & aliter caneret hodie , si Medicos quosdam nosses in usu Chinæ Chinæ parum versatos , qui hoc Febrium *Alexipharmaco* propinato , & Febre depulsâ , aliud paulò post *Pharmacum purgans* exhibent , quo Febrem statim revocant , dum arcere contendunt : exclamaret quippe ; nec forsitan lepidè minùs ,

Et cum Fata volunt , Pharmaca bina nocent .

§. 46.

(a) **E**X permixtione solutionis Vitrioli cum solutione Chinæ Chinæ observavi speciem quandam atramenti, unde suborta mihi suspicio idem fieri in Stomacho ex potione Chinæ Chinæ dum acido permiscetur, sicque fermenti febrilis crasim inverti, ac impotentem fieri ad novos motus febriles excitandos. Neque novum intermittentes febres æstate pervagantes pendere à falso-acido fermento, licet ut plurimum opinio sit (b) a luxuriantē bile progigni. Æstate acida quæq; avide appetimus ac utimur, & fructus hujusce naturæ exquirimus, unde Ventriculi acidum tunc temporis abundare non alienum est credere, quamvis enim in principio febrium intermittentium reici soleat multa bilis, irritamentum prius in Stomacho factum ab acido turgente, vasa cholidoca trahere potest in consensum, veluti fit in nephritica passione; puto ergo Chinam Chinam totam vim suam in Ventriculo exerere, quia video in febre intermittente, alterum paroxysmum, qui expectabatur, omnino sisti, quod certe admirationem facit; in aliis autem locis extra Ventriculum, aut parum, aut nihil operari, seu quia illius virtus sit infracta, seu quia contrarietatem non reperiat, nam ubi febris (c) primo periodica, postea continua facta fuerit, nihil admirandi observo, quod Chinæ Chinæ, licet larga dosi assumptæ, mereatur adscribi, febris enim ad plures dies perstat & paulatim solvitur.

(a) (Ex permixtione &c.) **E**Xperimenta omnia ad Chinæ Chinæ virtutem indagandam tentata, per commissionem illius cum aliis Succis extra humanum corpus, reputat fallacia Cl. Auctor; in Stomacho etenim, aiebat ille Paragrapho antecedenti, ex succo acido, qui inibi ex Naturæ lege hospitatur, & alkali fixo Chinæ Chinæ fit lucta, & exinde novum concretum, quod ad alias partes demissum diversas habet vires, & permixtum cum succo pancreatico, cum bile, cum sanguine, quid operetur scit Deus. Statim

Statim tamen in præfenti Paragrapho horum omnium oblitus, suum ille Experimentum, pari penitus modo institutum adducit, *solutionem* nempe *Vitrioli cum solutione* (rectius dixisset, *cum infusione*) *Chinæ Chinæ permiscens*; suamque indè fidenter deducit hypothesim, quâ modò vult, *Chinam Chinam totam vim suam exerere*, non amplius in sanguine, ut immediatè ante dixerat, sed in *Ventriculo*: in aliis autem locis extra ventriculum, aut parum, aut nihil operari. Illi ergo uni datum sit per contrarias undique semitas adire Corinthum, & quomodolibet propriam sententiam proferre, ac proprium experimentum. Verùm quid proprium illius experimentum dixi, quod ab Ettmüllero, Langio, & aliis fuit ille mutuatus; quodque omnibus *ex infusione Gallarum, & solutione Vitrioli* atramenta conficientibus, ut olim in suis Constitutionibus Epidemicis pag. 121. annotavit Vir ipse Cl., quotidie est obvium? Cum ergo (ut hinc æstimetur pondus experimentorum illius) cum, inquam, tam ex permissione infusionis *Gallarum, Cinnamomi*, aliarumque rerum porosarum, colore quadantenus his similium, quàm ex permissione infusionis *Chinæ Chinæ* cum unâ semper solutione Vitrioli, eadem suboritur Atramenti species (ut factò experimento observavi) eodem quoquè pacto deberet a *Gallarum, Cinnamomi &c.* pulvere *Fermenti febrilis crasis inverti, & impotens reddi ad novos motus febriles excitandos*, ut redditur a *Chinâ Chinâ*, secundum hypothesim Viri Cl.: quod tamen indè sperare foret ridiculum.

(b) (*A luxuriante bile &c.*) *Tertianas Febres Æstate pervagantes a luxuriante bile progigni*, opinabatur Paragrapho 16. hujus Dissertationis ipse Cl. Auctor, ut vidimus: modò non illi arridet amplius, quæ tunc placuit opinio; fortasse quia similem quoquè me fovere sit suspicatus. Cum enim experimenta mea, pro investigandâ *Chinæ Chinæ* actione quondam instituta, ad trutinam revocasset ille Paragrapho antecedenti, ut ea parvi penderet; ex iisque longè faciliorem deduci ipsius *Chinæ Chinæ* nexum cum Bile, quàm cum Lymphâ, Salivâ, Urinâ, aliisque diversis fluidis, ut reor, considerasset; aliqua hinc mihi occasio suspicandi, Virum Cl. me propensum saltem putasse ad statuentiam pro Intermittentium Causâ eandem Bilem. maxime cum pag. 54. Operis mei hæc verba protulerim -- *Quod de Bile, & Oleo constat per experientiam* (sermo ibi est de facili absorptione *Chinæ Chinæ* intrâ Bilem, & Oleum observatâ) *poteest fortasse per conjecturam credi de Fermento febrili; sive ad illud constituendum Bilis concurret, sive aliud Fluidum oleosæ forsitan naturæ particeps*. Sed facile poterat certior fieri, me nusquam determinatè adstruxisse Bilem, ut Causam Intermittentium, si animadvertisset ferè ibidem hæc alia verba, pag. 50. ejusdem Tractatus exarata -- *Parum refert observare quid China China operetur intrâ Bilem qualemcunque, cum nos lateat quinam sit, vel esse possit, ad Causam Intermittentium constituendam Bilis concursus*.

Multò magis id poterat ille dignoscere, si Conjecturas meas omnes de Intermittentium Causis, toto ferme Cap. 6., nec non etiam 8. Libri primi prolatis, & pro imperfectis a me ipso habitas, legere non renuis-

renuisset; ubi nempe me in generalibus tantum quibusdam Theorematibus firmum, in peculiaribus summe hæsitantem deprehendisset. Et jure quidem merito: quemadmodum enim in meo Tractatu, anno 1712. publici juris facto, occultam planè protuli ad ea usque tempora *veram*, & germanam Intermittentium Causam; ita minimè verebor fateri, idem contigisse in hanc usque diem; æquè conscius, Naturam ulli nondum Medicorum liberaliorem, sed æquè avaram ac antea se præbuisse, in pandendo hujusmodi arcano. Tantum abest, ut *Bilem luxuriantem*, aliumve liquorem *determinatè* humani corporis (quamquam eorum aliquem certè peccare necesse sit) hujusmodi criminis reum audeam proferre. In re tam obscurâ sat sit suspiciones nonnullas in eodem Tractatu cunctanter olim enunciasse locis nuper citatis.

Non est igitur cur mihi obtrudat Vir Cl., *Intermittentes æstivas pendere a Salso-acido Fermento*, non a luxuriante bile, atque (ut in contextu) *Chinam Chinam totam vim suam in ventriculo exerere*; siquidem revera hanc litem mecum agere satagat: mihi enim abundè sufficit, quòd eadem China China Fermentum febrile pessundet, sive acidum dicatur illud, sive falsum, sive amarum, sive aliis saporis, aut indolis. Quòd verò Febrifugi actio, incipiendo a Ventriculo, non prætergrediatur secundas Chyli vias; & quòd sanguis (quem in Intermittentibus merè passivè se habere centies dixi) nullam probabiliter judicio meo sensibilem alterationem patiatur ab eodem Febrifugo, jam literis cubitalibus scripsi in ipsâ Therapeutice meâ, iisdem pariter citatis Cap. 6. & 8. Libri primi. Sed quid, si ad componendam litem, quam mihi, non eo, quo forsitan censuit, modo, de hisce revera sentienti, videtur indicare Vir Cl., opinionem Eruditissimi D. Zendrini quispiam in medium adduceret? Cum enim Professor iste pro Intermittentium Causâ Bilem adstruat, sed *Acidam* redditam, & in Duodeno præsertim Intestino suæ dyscrasiæ vires in Chyli damna exercentem; jam ferè cessare deberent Cl. Ramazzini querimonix contra eandem Bilem; quatenus in hujusmodi Hypothesi Causa februm, & acida esset, quamvis constituta in ipsâ bile, & vix infra Ventriculum (quod illi displicere nequit) sedem haberet.

Scio equidem fore, si viveret Vir Cl., ut D. Zendrini sententiam de Februm Intermittentium ortu, & Circuitu minimè admitteret, saltem ut proficiscentem a Viro docto quidem; sed qui de præstantiâ, actione, dosi, & usu Chinæ Chinæ post me nuperrimè scribens, innumera protulit, tum Theorica, tum Practica, Operi meo, sensibusve meis in eodem expositis planè conformia; adeoque Scriptore sibi suspecto: posset nihilominus illum a partium quarumlibet studiis immunem ex hoc saltem agnoscere, quòd in nonnullis aliis, nec parvi quidem ponderis, pari a me facilitate discreparit; licèt consensus, æque ac dissensus sui, prout liberum Philosophum decet, nullam omnino rationem habuerit, aut scrupulosam sollicitudinem. Quòd verò in tot aliis mecum coincidat pro tutelâ, & administratione Febrifugi optimi; id ejusdem Remedii præstantiæ adscribendum omnibus Professoribus notæ, non literariæ amicitix nexui inter nos exinde suborto.

Sepositâ itaque illius auctoritate Clarissimo fortasse Ramazzino suspectâ, seponamus quoque omnem considerationem de quovis concursu Bilis ad Febres Intermittentes, & de quacunque illius dyscrasiâ, & motu, tam fermentativo, quàm progressivo &c.; quem progressivum laudatus D. Zendrinus Circularem statuit, Venarum Meseraicarum ope, fretus experienciâ Reverhorst, aliorumque nonnullorum Anatomicorum, præeunte Borelli ratiocinantis conjecturâ. Eos tamen (ut hoc obiter innuam, unde aliquando speranda solutio non contemnendi Problematis) eos inquam rejecit in suâ Historiâ Hepaticâ anno 1711. editâ accuratissimus Anatomicus, idem pariter & Amicus D. Jo: Baptista Bianchi Part. 1. Cap. 11. §. 11. pag. 52. his verbis -- *Multò minus per venas meseraicas refugitur biliosus hic humor, ut inde per eas in Portam derivatus, hinc per Hepar rursus in Duclum excretorium, & Intestina confluens, Circulationem habeat & suam per viscera Abdominis, æmulam expositæ salivariæ circulationi per viscera, & sanguinem; quantum ferunt Modernorum aliquorum insomnia* (& hic asterisco notat in margine Jo: Alphonsum Borellum, Nuck, & Reverhorst) *Nam præterquamquod in Intestinorum cavitationem non hiant Meseraicæ; nil contra Circuitus leges, & animalem Machinam deformius excogitari potest bilioso hoc motu circulari; ut vel Medicinæ initiatis patet.* Hæc citatus D. Bianchi. Amicus ille mihi; Amicus D. Zendrinus; nec dubito, quin utrique, non minùs quàm mihi, amica futura sit Veritas, quotiescunque eorum alterutri obtingat, illam e tenui, quâ etiamnum obvolvitur, caligine, educere. His ergo dimissis omnibus, mihi potius esset e re, Hypothesim ipsam Cl. Ramazzini de falso-acido Fermento febrili propiùs examinare. Eam nihilominus in pluribus quidem fortasse non contemnendam, sed quæ suos in plurimis aliis patitur Manes, ego hic in obsequium Defuncti minimè vellicabo; ne videar, ut ab exordio jam dixi, velle me luctari cum Larvis.

Id unum rursus disquiram, si liceat; quo nempe jure dicatur hic China China corrigere Fermentum acidum, aut falso-acidum, tanquam Causam Intermittentium Februm, cum ex adverso §. 14. dictum fuerit a Viro Cl.; *humorem atrabilem, seu melancholicum* (qui dubio procul statuitur acidus ab admittentibus hæc, & similia Veterum commenta) *non auscultare huic Febrifugo.* Quòd si verè China China agat in Febres Intermittentes, easque depellat, in quantum Fermenti febrilis falso-acidi morbosam crasim invertit, & ad novos motus febriles excitandos impotentem reddit, totamque vim suam exerit intrâ ventriculum (quem nullo pacto irritat, aut lædit, sed præ amarore suo potius roborat) parum verò, aut nihil operatur in aliis locis extra ventriculum, ut modò conjicit Vir idem Cl.; profectò nescio, quo pacto ea per modum operandi tam blandum, tamque tutum, cujusmodi est simplex immutatio Crasis Fermenti febrilis ventriculo inexistens, possit de tot malis, de tot noxis alibi recensitis suspecta reddi, ac dici sanguinem figere, viscerumque Obstructiones, & Cachexias inducere; cum ad loca extra Ventriculum sita non extendatur, ex ejusdem Viri Cl. effato, illius activitas.

(c) (*Primò Periodica, postea Continua &c.*) Quotiescunque Febris primò Intermittens, mox Continua *recenter* facta (de illâ enim, quæ continuitatem essentialem adepta jam sit, mihi sermo non est) quotiescunque, inquam, Febris hujusmodi post assumptam dosim congruam Chinæ Chinæ, *ad plures adhuc dies perstet, & tantùm paulatim solvatur*; ultrò concedo, nec quicquam admirandi contingere in curatione illius hoc pacto peractâ, nec Chinam Chinam mereri, ut illi adscribatur sanationis gloria, tanquam iners, & effœta ea fuerit; quemadmodum pluries protuli in Tractatu meo, videlicet pag. 556., 557., 593., 635., & 636. Ast in hisce Febribus, *continuè* quidem (ut nuper agebat ex Sylvio Cl. Simonius) Ægrum vexantibus, sed non ideo verè *Continuis*; in quibus nempe viget adhuc primæva Intermittentium conditio, ipsumque adhuc prævalet Periodicarum speciale Fermentum, etsi paroxysmorum confusio veram continuitatem simulet; in hisce inquam Febribus, sive mortem proximam, ratione cujusdam adjuncti perniciosi Symptomatis, sive acutam, malignamque metamorphosim, hinc & mortem quoquè, seriusculè saltem, minitantibus, exhibito, ut decet pro variâ casuum exigentiâ, Peruviano Cortice, non *paulatim*, sed *illico*, nempe intrâ biduum, aut triduum succedit salus, æquè ac fit in veris Intermittentibus, ut latè dixi in responsione ad §. 33. lit. c.

Id autem evenit (ut me rursus nonnihil explicem) quia in istiusmodi febribus per accidens tantùm, hoc est per productiones, aut intempestivas renovationes, & communicationes paroxysmorum *Continuis* redditis, non fermentum quoddam sanguini *ingenitum*, quod Cortici refractarium est, peccat, ut in *Continuis* ab origine talibus; sed illud tantummodo, quod eidem sanguini per crebras, & repetitas vices aliunde accedit, nec tamen qualibet vice integrè absumitur, sed secundùm quasdam sui portiones haudquaquam subactas paulatim in ipso cruore contubernaless agit radices, minimè tamen indigenas; unde assidua, sed præter ordinem incidens, febrium protractio. Hujusmodi idcirco radices nondum firmæ, sive istæ fermenti *extranei* reliquæ sensim aggestæ, haud difficulter evelluntur ope Corticis, etsi fortasse in illas non immediatè ampliùs agat ipsemet Cortex, sed solùm mediatè; quatenus nempe suppetias, unde alimentum trahunt, & quo per interceptionem paroxysmorum sublato arescunt illæ, omnino prohibet, arcet, ac destruit: adeoque consecutione quadam ipsam febrium etiam exitialium *fortuitam* continuitatem quàm citò, ac planè admirabiliter delet, ut fusè, satisque, ut reor, dilucidè explicare hæc omnia conatus sum pluribus in locis Therapeut. meæ, præsertim Cap. 6. & 8. Lib. 1. Cap. 3. Lib. 5., & alibi.

Quòd si miranda hæc non observavit Cl. Auctor; neque mirum mihi, ea non fuisse illi observata: si enim in saniori ætate nullo pacto in Febribus quamcunque continuitatem adeptis, exhibuit unquam Peruvianum Corticem; in juvenili verò nondum mos invaluerat, præsertim apud nos, uti Febrifugo hujusmodi, aut hisce *casibus*, aut hisce *modis*; quandonam quæso potuit ille quicquam *admirandi* observare in hac materia? Si tamen non observavit, aut se observasse non memi-

nit, ne in Curationibus quidem eo mihi socio absolutis; id saltem facile poterat in Historiis meis observare, toto ferme Libro quarto descriptis, ipsosque restitutos Ægrotantes etiamnum bene valentes interrogando pro libito, de *citissimâ* illorum post assumptionem Corticis sanitate acquisitâ, ore ipso tenus certior fieri.

S. 47.

DUm hæc ad Te scriberem, (*a*) *allata est mihi Epistola*, quæ funestum casum Comitis Torricini, Serenissimi Ducis Guastallæ Ministri, referebat. Vir iste parva febre laborare cœpit, ut vix annotationem sensibilem haberet; modico Cassiæ à Medico familiari purgatus est, ac alterantibus ad universalem purgationem disponebatur. Medicus alter majoris autoritatis accessit, qui Chinam Chinam proposuit, ut ægrum ad solitum ministerium, quàm primum remitteret, reposuit alter sibi non satis tutum videri impurgato Corpore hanc febrem velle abolere, sed prævaluit consilium, quod citam sanationem pollicebatur. Exhibita China China, modo in tota substantia, modo in vino infusa, sed parum fausto successu, augebatur enim febris in dies, facta manifeste continua, sed die 20. nequitiam suam aperte prodidit, vocati illico è vicinis regionibus alii Medici, sed Vir ille inter Medicorum controversias misere oppetiit. Casus hujusmodi, hic & illic identidem occurrentes, (*b*) *sive ob remedii* improprium usum, sive ob ejusdem occultam malitiam, in causa sunt, ut Peruvianus Cortex à Doctis Scriptoribus, veluti (*c*) *Willisio, Etmullero*, titulis parum honorificis vocitetur.

(*a*) (*Allata est mihi epistola &c.*) **U**T Mutinam corrigat Cl. noster Auctor, Guastallam plestit; parcitque nemini, ne parcat Cortici. Mihi quoque allata fuit haud absimilis Epistola, funestum videlicet eundem eventum apportans, data sub die 17. Novembris anni 1713., octo nempe vix elapsis diebus ab obitu Nob. illius Viri. Annexa insuper aderat historia Morbi, quotidianum tum Febris, tum Curæ progressum describens, & qua-

quatuor Affidentium Medicorum nomine firmata: quæ quidem in pluribus non exigui ponderis circumstantiis discrepat a narratione summaria Viri Cl. . Meum non est hîc inquirere (mihi etenim, etsi super hac ipsâ re expressè requisito, semper a munere Judicis abstinendum duxi) meum, inquam, non est inquirere solerti indagine intimam naturam, aut speciem illius Febris, neque accidentia omnia eam concomitantia, quæ oblationi Corticis ansam, ut reor, rationalem præbueret. Hujusmodi enim examine minimè prævio, culpâ semper vacare dixerim Corticem etiam inutiliter oblatum; quin & præscribentes Medicos, qui auxilium suapte naturâ tutum, quamvis incassum (ut per sæpe aliis remediis adhibitis fieri solet) rationabiliter tamen tentavere, præeunte Mortono, aliisque Scriptoribus, præsertim in circumstantiis prævisi forsan exitus, cæteroqui etiam funesti: quâ de re Apologeticam propediem edendam esse ab iisdem curantibus Medicis, vel eorum saltem nonnullis, Responsionem ad hæc ipsa Cl. Ramazzini objecta, haud obscurè subaudio. Quæ cum ita sint, nequeo non admirari in Cl. Auctore rem confidentiæ, & animositatis plenam, dum ipsum tam lubricè, tamque præcipiti lapsu irruere intueor in damnatorium illud judicium suum adversus Viros illos egregios curatione functos, quos apertæ redarguere videtur imperitiæ, aut ignorantiae: quasi ex ipsâ Corticis oblatione mors Ægrotantis emerferit; nempe, *vel ob remedii*, ut subdit in contextu, *improprium usum*: en imperitia Praxeos; *vel ob occultam ejusdem malitiam*: en ignorantia Botanices; vi cujus eos fefellit *occulta malitia* Peruvianæ Plantæ, Cl. Auctori, quippe doctiori apprimè nota.

At (bone Deus!) culpari equidem quandoque solet de morte Ægrotantium, etsi sæpius etiam immeritò, Remedium aliquod ex se tumultuosum, & magnum, videlicet in corpora nostra sensibiliter, ac fortiter agens, V. G. Purgatio, aut Venæ sectio, tunc cùm Æger, cæteroqui haud multùm graviter habens, statim a Purgatione, aut Venæ sectione ruit in præceps, ac moritur. Sed cùm ab assumpto remedio nullam molestiam, aut turbationem sensibilem inferente, morbus stadium suum ad plures, & plures dies pro more absolvit, donec Ægrum sensim tabescentem conficiat, ut in casu, de quo agitur; magna profectò confidentia est asserere, ejusmodi remedii culpâ Ægrum periisse: quasi, ut ajebam in Therapeutice meâ, idem sit mori post assumptum, imò longè post assumptum, ac propter assumptum remedium.

Cœpit autem hîc offerri China China in substantiâ ad drachmam tantùm nonâ morbi die; cùm scilicet Febris jam sensibiliter ingravescebat, adeout vererentur Medici, ne oneri diutiùs ferendo par esset Ægrotus; imposuitque terminum remedio in substantiâ oblato dies duodecima. Substituta equidem fuit die 13. tinctura ejusdem Chinæ Chinæ; sed & hæc statim omissa. Interim circa undecimam Febris mitescere visa fuerat, apparentibus in urinâ coctionis signis; itaut in fine duodecimæ Medicus novissimè superaccitus Ægrum a Febre immunem asseruerit. Subinde tamen sensim recrudit morbus, qui vigesi-

mâ tandem die Patientem gravi senio, laboribusque confectum sustulit.

Hæc omnia me docuit recensita curantium Medicorum *omnium* Relatio. Cur igitur lentus, ac serior Ægrotantis interitus Cortici imputatur antea exhibito, cum eidem Cortici recenter oblato non adscribatur unquam, me quoque consentiente, lenta, seriorque sanatio? Cur illi potius hæc culpa tribuitur, quàm Mannæ (fuit enim *Manna* oblata, non *Cassia*) vel sanguinis missioni, aut omissioni illius, quoniam de hoc præsidio Narratio filet, vel Confectionibus, aut Elixiribus calidioribus, vel Bezoartico Lapidi, vel Vino, vel Aquæ, quorum utrumque controvertebatur, vel aliis omnibus, quæ usui fuere, infontibus quidem, ut reor, singulis; sed jure potiori a rigido quopiam Censore culpabilibus? Memini me dixisse aliàs, Corticem Peruvianum tunc solùm forsan obesse posse, cùm suas exerit vires, & Febrem sistit, sed *depuratricem*; quam nempe satiùs esset protrahi diutiùs. At cùm Febrem nequit sistere, ut nequivit hoc casu, cur eam dicamus deteriorem fecisse? Anne meliorem fecisset, quæ Chinæ Chinæ in augmento morbi, absentibus coctionis signis, & tendente ad urinæ vias excretorum motu, præferebatur, aut illi præmittenda proponebatur nova purgatio? Minimè gentium certè. Cortex ergo nec Febrem, nec Ægrum sustulit. Si Febrem fugasset, Cl. Auctor *illam optasset rursus, sed fortiolem, remedii loco*. Non fugavit, nec prohibuit, quin paulò post fortior fieret. Voti ergo compos abundè factus, quid Cortici irascitur, qui & Cardiacis, & Bezoarticis, & Febrifugis Veterum, & Febri ipsi medicatrici locum, ac tempus de more ad curationem sufficiens concessit, forsan & impetravit?

Hæc contigere dum scriberet Vir Clarissimus: dum autem ipse hæc rescriberem; imò potius dum anceps adhuc hærerem, an scripta hæc ante spatium trimestre jam condita promulgarem, *allata est mihi Epistola*, quæ casum, nedum periculosum, sed & præcipitem D. Augustini Tomasii, Plebis Massæ Finalensis Archipræsbyteri referebat. Vir iste die 21. Junii 1715. Tertianâ Febre laborare cœpit, quæ primo accessu *vix sensibilem frigoris annotationem habuit*, eâdemque penitus caruit accessibus subsequenter. Tertio paroxysmo brevem, quam antea præsetulerat, apyrexiam amisit, continua duplex jam reddita, cum anxietate, & inquietudine maximâ, siti inextinguibili, linguâ scabrâ, urinâ crocæ, crassâ, paucâ, & lixiviali; usque tamen periodum servans, exacerbationemque, ac remissionem, quantumvis obscurissimam. Admonitus ego, ut supra, per literas D. Morandi Medici curantis de periculo Decumbentis Viri mihi conjunctissimi, illuc confestim transferor die 29. ejusdem mensis, horâ ipsâ invadentis, seu potius recrudescentis quinti paroxysmi.

Tam gravis fuit hujusmodi exacerbatio, ut inde vita Ægrotantis in manifestum discrimen fuerit adducta: siquidem præter Symptomata prænarrata supervênit sudor circa brachia, collum, & frontem subfrigidus, copiosus, viresque summè dejiciens, qui licet ad femora tandem nonnihil pertingeret; nihilominus Febrem quàm minimùm levabat. Pulsus tunc temporis parvus factus est, celer, & inæqualis, re-

spira-

spiratio anhelosa, urina ferme nulla, subortusque tandem Singultus. Priusquam tamen is patenter se proderet, quod mox contigit, Corticis Peruviani drachmas tres ex Aquâ Card. b. potandas exhibui horâ quintâ pomeridianâ. Sex horis elapsis, mictio copiâ insignis, colore verò, & consistentiâ laudabilis subsecuta est; quod animum addidit ad duas iterum drachmas ejusdem Corticis statim ex Vino tenuiore offendas, horâ nempe noctis tertiâ. Mane horâ undecimâ, nova drachma oblata est pariter ex Vino tenui, & horâ vigesimâ, alia iterum drachma; tandemque, post administratum Eucharisticum Sacramentum, consimilis alia mane diluculo sequenti die, quæ majoris afflictionis dies esse debuerat. Sed dum in usum duceretur remedium, res omnes horridam, quam præsetulerant, faciem adeò insigniter mutare, ut intrâ triduum, eâ scilicet ipsâ die, quâ id futurum prædixeram, Febris abjerit, criticâ simul erumpente urinæ copiâ. Reperitum est nihilominus, post biduum vacationis omnimodæ, idem Febrifugum ad præcautionem, seu (si dicere liceat sinè Cl. Auctoris stomacho) ad *prophylaxim*, quandoquidem omnis jam Febris evanuerat; primò quidem ad drachmas duas, die tertiâ Julii; postmodum ad drachmam tantum, duobus subsequenter diebus: tandemque, interjecto octo dierum spatio, rursus oblatum est Remedium ad drachmas duas die 15. ejusdem mensis, deinde ad Semidrachmam per quatuor dies successivos. Atque ita consumptis trium hebdomadarum curriculo unciis duabus Chinæ Chinæ, Æger, tum statim ab omni Febre liberatus est, tum paulatim ab omni relapsu præservatus.

Cuncta hæc testari possunt Viri Docti, & ingenui Finalenses Medici, D. nempe Morandus curans, & D. Manfredus, qui pro suâ humanitate me ibidem invisit officii causâ, ipsumque Ægrotantem gravissimè habentem, socio sibi adjuncto D. Ignatio de Grossis, Viro nedum literato, & pluribus nominibus spectabili; sed & Medicinæ Theoricæ, ac Practicæ haud parum gnaro. An Scriptis Cl. Ramazzini circa historiam Comitis Torricini calculum facilè sint addituri unanimes Guastallenses Medici, ut mea circa hunc Casum asserta promptè roboraturi sunt, si res exigat, Finalenses; non longa, ut reor dies ostendet.

(b) (*Sive ob remedii &c.*) Hic pedetentim quæso. Duplex hæc fovea, -- *Sive ob remedii improprium usum, sive ob ejusdem occultam malitiam*, - ea non est, ut uno saltu queat tam facilè transigi: distant enim non parum hæc duo ab invicem. Oportet ergo omnino distinguere inter *malum usum*, & *malam occultè naturam*. Primum, quod ex præscribentis imperitiâ procedit, conceditur obesse posse; debitis tamen additis limitationibus, ut pluries effatus sum. Secundum gratis omnino, etsi dubitative, hic prolatum, minimè admittitur: nec nisi cum aliquo propriæ existimationis, ac ingenuitatis detrimento, potest quisquam viriliter asserere, quòd clam, & occultè noceat id, quod evidenter, etiam quandoque cum minùs appositè usurpatur, prodest. Innocentiam intrinsecam Chinæ Chinæ satis me probasse puto toto ferme Libro primo Therapeutices meæ. Sed & post eam editam sanctè testari possum, me in nonnullis casibus planè incurabilibus Morborum

quorundam, non febrilium quidem; sed periodo nihilominus aliquā recurrentium, aut recrudescentium, præsertim de genere convulsivo, experiundi causâ quod a pluribus Classicis Auctoribus suadetur (etsi mihi minùs credulo minùs pariter probaretur) præscripsisse Corticem Peruvianum ad plures dies quotidie, modò ad drachmas duas, modò ad sesquidrachmam, modò ad drachmam, aut semidrachmam; ita ut tractu temporis modici, puta duarum hebdomadarum, consumptæ fuerint unciaæ duæ, aut tres ejusdem Corticis; nihilque incommodi, aut damni Ægrotantes hujusmodi fuisse passos, etsi fuerint imbecilles, consumpti, & ad marasimum usque perducti: imò potiùs eorum nonnullos, non omnes tamen, insignem, & immediatam opem reportasse præter ipsam expectationem meam. Et quamvis, fateor, haud diutinum fuerit levamen istiusmodi, cæteroqui conspicuum; deinceps tamen longè levior, & tolerabilior evasit consueta morbi recrudescencia: eaque ipsa, cùm recurreret, novo semper usu Corticis mitescebat.

Quid simile pluries contigit *D. Comitissæ Barbaræ de Stoffis*, cujus infrequentem æquè ac diuturnam ægritudinem hîc per transennam innuere, haud inopportunum crediderim. Laboravit hæc ad duos annos, necdum tamen laborare desiit peculiari quodam convulsivo Asthmate, cujus paroxysmus statis horis *quotidie* a prandio recurrebat, per octo circiter horas ferociter perseverans, cum ferinâ, siccâque tussi, interceptione loquelæ omnimodâ, contractis digitis, convulsis oculis, tenuisque, brevi, ac interciso ducto, erectâ licet perpetuò cervice, difficulter spiritu. In vigore paroxysmi attonita, & ferme immobilis evadebat; post ejusdem paroxysmi solutionem qualemcunque actorum circa eam immemor, quippe omni ferè sensu tunc destituta. Macilenta proinde reddita erat insigniter (præter morem obesi cæteroqui plurimum habitus sui) quò ad partes omnes supra abdomen, cum articulorum dolore, ac duritie, imò & ossium pectoris nonnullorum distorsione inæquali; tumida æquè insigniter, ut assolent leucophlegmatia affecti, quò ad inferiores. A solo ferme usu Corticis admodum liberali, cùm ampliùs par non esset ferendis paroxysmis, in ipso mortis agone illam constituere sæpe visis, auxilium præsentaneum incantamenti ad instar, ut Galenus loqui consueverat, retulit ea non semel. Redibat tamen, sed admodum mitior, post modicum temporis morbus, irritâ remedii repetitione, a cujus usu propterea, cessante sensim insimul occasione, congruo parito aliis quoque remediis loco, jamdudum cessavit, eo usura tantùm in majoribus, si fortè redirent, angustis. Nunc temporis, in statu licet valetudinario versetur jugiter, atque nonnihil ægriùs sit illi ad vespertas quò ad tussim, & quò ad spirandi modum, nec nisi elatâ cervice queat decumbere in lecto, & quidem ad aliquot tantùm horas; illam tamen, quantumvis adhuc exarnem, sed in artubus pariter inferioribus talem, nec ampliùs tumidam, revixisse dicunt quotquot laborantem videre: quod & ipsa latè fatetur, testaturque cunctis domi, & non rarò extra, matutino tamen tempore, ac festo quoque die, illam invisentibus. Sic citrà omnem noxam, imò non citrà levamen evidens in circumstantiis adeò difficilibus liberaliter usurpatus

patus est Cortex : ut fileam exuberantem hujusce remedii consumptionem, quam in nonnullis Europæ Provinciis fieri notum est, absque eo quod ulla, quod sciamus, reclamet insignis, quæque famam excitet adversam, experientia.

Et ne longè ab hac Urbe recedam, recens aliud hic prostat exemplum in Sene jam ferme nonagenario, *D. Sebastiano de Gherardis*, qui ante biennium Quartanâ Febre correptus, epoto Peruviano Cortice, brevî, & facilè sanatus est. Admiratus ille hujusmodi Pharmacothæon, sponte suâ deinceps, & absque Medici præscripto, identidem cœpit idem remedium assumere: quo in hanc usque diem (parum abest, quin assidue) usus, & in posterum constanter, ut asserit, semper usus, firmiorem sibi suadet se comparasse, & posthac comparaturum valetudinem. Tantùm abest, ut noxam ullam ex *occultâ*, quam metuit Vir Cl., illius *malitiâ* persentiat. Noxa igitur omnis, quæ huic Febrifugo possit attribui, sola erit Februm *immatura* suppressio; quas si quis ideo nunquam supprimendas velit, nisi cùm periculum, ne anceps quidem, sed certum, & inevitabile imminet, parum refert: neque enim quicquam plus a Medico exegerim ex debito officii sui, etsi quid ampliùs consulam ex abundanti cautelâ.

Hujusmodi ergo est, quam hucusque sum persecutus, & quæ toties obiicitur Peruviani Corticis *malitia occulta*, & *perniciæ noxa*. Sed abigatur tandem musca hæc importuna,

Quæ quamvis de pelle Viri sit sæpe repulsa:

Assultat morsura tamen, ———

ut cecinit Homerus; turpisque demum hæc, & malitiam habens minimè occultam (loquor de malitiâ physicâ, nempe de falsitate, non de morali) diluatur objectio, paritate ineluctabili adductâ; sitque judicium apud ipsos Peruviani Corticis Obtrectatores. Eja, sit hoc Febrifugum, vel possit esse *noxium*, tum ob *improprium usum*, tum ob *occultam* simul *malitiam*, credaturque illi inesse hæc ipsa malitia, & hæc noxa, quæ nobis occulta est, cum verè nulla sit, solisque forsan appareat Adversantibus. Quid inde? Illam certè non semper exerit; mille enim saltem homines in unâ hac Urbe, quæ Criticæ hujus Dissertationis subjectum est, & ubi a duodecim annis præsertim, Deo dante, perfectissima, & inculpata viget universalis salubritas; mille inquam ad minùs homines in unâ hac Urbe videre est, ex variis Febris periodicis, a variis itidem Medicis unâ Chinâ Chinâ curatos, modò, a duobus, modò a septem, modò a quindecim, modò a viginti retrò annis; & quidem diversi inter se se temperamenti, ætatis, & sexus, omnes verò etiamnum penitùs incolumes; pluresque etiam illorum ab eâ curatione nullo ampliùs morbo tentatos: argumento satis firmo, & cuicumque socium interroganti facilè obvio, quod remedium istud sæpe sæpius *occultam*, quam dicitur habere, *malitiam* non exerit; imò quod illam (datis etiam vanis probationibus ex adverso allatis) exerit rarissimè, si a septem lustris in hanc usque diem Cl. Ramazzinus, omnia callens hujusce Civitatis in hac materiâ, vix sex, aut septem fallacissimos Casus, minùs, ut autumat, felices, novit colligere,

ligere, aut expiscari; sed eâ sorte, quâ quis Anguillas prehensas sibi e manibus præ lubricitate elabi mox videt. Ergo, infero (etsi paritas hæc sit prorsus injuria Chinæ Chinæ longè magis infanti) infero inquam: ergo ad summum noxia est China China, & ob *improprium usum*, & ob *occultam malitiam*, solummodo ut noxia sunt, & propter *improprium usum*, & propter *malitiam occultam*, seu mavis *patientem*, inter Chirurgica quidem Remedia *Venæ sectio*, inter Pharmaceutica verò *Purgatio*; imò & præter hæc, *Narcotica* omnia, *Diaphoretica* verè talia &c., ut & inter extrinsecus apposita, *Vesicantia*, *Caustica* &c. Ecquis enim tam perfricatæ frontis erit uspiam Professor Medicus, qui hæc audeat inficiari, & Chinam Chinam hisce remediis magis suspectam, aut periculosam asserere?

Si liceret subducere calculum Ægrotantium omnium, quibus obfuit Venæ sectio, & Purgatio, remedia adeò decantata, sed in Morbis quibusdam, præsertim Acutis, adeò controversa, puta in Variolis, in Febribus Peticularibus, & tot aliis, ubi agitur immediatè de Corio humano; præponderaretne, quæso, ratione initâ, illorum clades, quos Chirurghi Phlebotomon, vel Crater Pharmacopolæ, vel etiam obductus auro soporifer Bolus de medio sustulere; an eorum, quos China China iniquè dicitur interemisse? Certè pauci occumbunt, quibus ægrotantibus præscripta non fuerit Venæ sectio, aut Purgatio, quamvis sæpissimè non ob id verè objerint; nonnunquam tamen ob idipsum quoque. Paucos verò ex iis interire observamus, quibus China China exhibetur; nec unquam profectò ob eam assumptam. Patet hoc satis ex Therapeutice meâ, in quâ candidè eorum historias exposui, qui toto Vitæ meæ decursu in difficillimis jam, gravissimisque circumstantiis positi, eoque remedio, frustra illud me præscribente, tractati obijere, cum contra mille subticuerim feliciter eodem sanatos in circumstantiis facilibus: patetque adhuc magis ex Dissertatione ipsius Cl. Ramazzini, tot propitiis casibus a me allatis nil in eâ valentis reponere; res enim ipsa loquitur: tam paucos verò, quodque magis refert, tam vanos adversi exitus oppositis. Cur ergo uni Cortici imputabitur mors paucorum gravissimè certè jam habentium; non ita verò Phlebotomiæ, Purgationi, aut Narcosi mors innumerorum sæpe non tam graviter affectorum? Sed infaustos eventus, quos peperit *Phlebotomia*, aut *Purgatio*, propter assuetudinem *sinè rumore terra obtegit*.

Anne verò, ob fortuitos hujusmodi funestos casus, contra Cathartica, Venæ sectionem, Opium &c. Invektivæ acerbiores erunt ejaculandæ, quàm contra Pisonem, Verrem, aut Catilinam vibravit Cicero? Et tamen non longè absimiles in hac Dissertatione vibrantur contra Corticem Peruvianum; qui nihilominus (etiamsi tractu temporis illum nocere posse pertinaciter quispiam contendat) prodest certè statim ac usurpatur: cum ex adverso Phlebotomia, & Purgatio, quæ ex Cl. Auctore *humani corporis machinam infirmant potius, quàm confirmant*, statim certò debilitent; sitque in ancipiti semper, an in posterum sint profuturæ. Quocunque ergo modo noxia dicatur, aut suspecta China China; cum tamen semper minùs noxia, & suspecta illa sit, aut saltem non

tem non magis, quàm Purgatio, & Venæ sectio; sitque ea sæpius, atque etiam magis, quàm Purgatio, & Venæ sectio proficua (Febres enim quamplurimas perniciosas sæpissime sanat, quas minimè novit sanare Catharsis, aut Phlebotomia) eadem saltem fiduciâ, imò longè majore, debet illa in usum posse revocari, ac revocantur quotidie, secundum rationem quidem, atque utplurimum citra dissidium, celeberrima illa duo, & alia quævis methodica Artis præsidia.

(c) (*Villisio, Ettmullero &c.*) Quàm decenter, quàm candidè virtutem febrifugam, utilitatemque Peruviani Corticis a septem jam lustris fassus sit Ettmullerus pluribus in locis (pro ratione saltem eorum temporum, & proprii usus non adhuc planè completi) vidimus nuper §. 35. Cunctatio illius alicubi nonnulla; tum ob suspicionem *intempestivæ* oblationis, ac præcisè eò quia minùs tutò offeratur remedium *invadente*, quàm *recedente* Accessione; tum ob metum recursus Febrium, ignoratâ posteriorum temporum methodo tunc verè frequentioris; condonanda penitùs Ætati, Tempori, Regioni, & Consuetudini haud satis liberaliter introductæ.

Quàm verò favorabiliter de eodem Cortice Villisius scripserit, etsi ante annos abhinc quadraginta desierit vivere, non est cur per extensum referam; cum non paucos illius textus, ab Erasmo Bartholino, & Theophilo Boneto §. 43. lit. f. in laudem ejusdem Corticis citatos, nuper viderimus. Revera nullus forsan Scriptor primis illis temporibus æquius sensit de hujusmodi Febrifugo, quàm Thomas Villis, unicum tantummodo Febrium reditum, quem nondum inhibere quis norat, hìc illic obtrudens. Interim tamen apertis notis testatur Lib. 6. de Febribus, illud esse *unicum adhuc repertum Febris Quartanæ alexiterion*; *quod nimirum ipsius, aliarumque Intermittentium paroxysmos, saltèm pro tempore, inhibet &c. quod ferè in omnibus paroxysmos tollit &c. ita ut vix unus e centum hoc remedium incassum tentarit &c. quod non tantum in Febre Quartanâ, verùm in aliis Intermittentium Speciebus, quibuscunque nimirum apyrexia quædam intercedit, cum fructu adhibetur &c., quod in quibusdam valde imbecillis, & lecto affixis sinè præviâ pharmaciâ solitariè sumptum effectus laudabiles procuravit &c. quo denique usi non pauci Quartanâ laborantes, alacres, & vividi ad negotia quævis expediti debebant, cum secus enerves, & pallidi in languorem, & vitiosum corporis habitum redigerentur: in quem vitiosum corporis habitum hodie redigi eos autumat noster Auctor, qui hoc Febrifugo in iisdem Quartanis utuntur. Quòd si ergo, ut ahebam paulò ante, tum Villisius, tum Ettmullerus de Febrium recursum perpetuò suspicantes, hujusmodi nihilominus curationem, tunc temporis veluti *palliativam* ab ipsis creditam, non modò non respuebant, sed adittebant libenter, & laudibus prosequiebantur, ubi tantùm *morbi diuturnitas, fractæ vires, appetitus dejectus*, & id genus alia idipsum suassent; quantò libentiùs hodie, si essent in vivis, ipsius Febrifugi usum feliciorè admitterent ad Febres, tum *Intermittentes*, tum *Subcontinuas*, vel *Malignantes*, vel jam *Malignas*, & *perniciales*, nullâque aliâ tandem arte, aliove remedio sanabiles?*

S. 48.

(a) **S**ed ex his, quæ hæcenus de Peruviano Cortice diximus, nolim quis inferat, velle me ex albo Medicaminum Chinam Chinam expungere; absit hoc, habeat suos usus remedium istud, beneficium quod afferre potest, ab illo excipiamus, & malo, quod interdum ex illo consequitur, bene uti discamus; periti Nautæ ventis etiam adversis aliquando portum fortiter occupare norunt. Illius usus sit qualis est Opii, quod magnum est dolorum sedativum: in doloribus nephriticis, cholicis, podagricis, aliisque similibus singulare beneficium ab Opiatis habemus, non quod morbi causam tollant, sed quia gravia symptomata compescant, vigilias scilicet contumaces, & spirituum dissipationem, interim reparatis per somnum viribus, morbi causa auferenda propriis remediis. At quia scimus, quod ubi vis Opii expiravit, redituros pristinos dolores, an rursus altera die repetenda opiata ad prophylaxim? Nemo prudens Medicus id ager, sed ægro petenti, & instanti denuo idem remedium offerri, reluctabitur, ne morbi causam figat, & contumaciorem reddat, Opiata enim ea cautione sunt exhibenda, ut è somno excitare possimus, quem obdormire volumus. Mehercle si papaveris virtus nobis ignota esset, aut Plantam hujusmodi Europa non aleret, ac ex Indiis ad nos deferretur succus concretus, cujus grana tria vel quatuor paucarum horarum spacio dolores quoscunque gravissimos sedarent, ut post aliquem somnum ad analgyfiam devenirent, majori certe admirationi esset talis planta, ex qua haberetur tantarum virium succus, quàm Cortex Chinæ Chinæ, quæ exhibita præsentem febrem non tollit, sed eam quæ altera die erat reditura. Sicuti ergo composita ex Opio à prudenti Medico non exhiben-
tur in

tur in vehementia dolorum, nisi ad obtinendum aliquod intervallum pro virium reparatione, ita ut diximus, ad eundem finem obtinendum admittendus, & laudandus Chinæ Chinæ usus in febribus præsertim intervallatis. (b) *Asst quotidie*, ac pluries in die larga dosi, ut istic fieri solet, in febribus, quæ maligni aliquid præferant, amarioris potionibus Chinæ Chinæ in vino infusæ, miserum ægrum conficere, (c) *id est quod periculosum*, & omnino empiricum existimo.

(a) (*Sed ex his &c.*) **P**ost præmissam Rhetoricam Præfatunculam, concludit tandem medicè Cl. Auctor, omnem usum Chinæ Chinæ, cujus dosim taxavit jam §. 8. ad drachmam unam, vel duas, ad unicam quoquè oblationem restringi debere: neque repetendum esse ad prophylaxim remedium; quemadmodum sedatis per Opium doloribus, *alterâ die rursus repetenda non sunt ad prophylaxim Opiata*. Hac occasione virtutem ejusdem Opii admirabiliorem, & præstantiorem prædicat, ac sit Chinæ Chinæ virtus; cum tamen §. 4. virtutem Opii tantummodò *ephemeram* dixerit; *beneficium verò Chinæ Chinæ non tam paucis diebus claudi*. Insuper haud ignotam hîc nobis supponit virtutem Opii, quippe *Europæi* Papaveris sobolem; ignotam verò virtutem Chinæ Chinæ, quippe *Plantæ Americanæ*; cum tamen æquè ignotus, aut controversus sit modus, quo agit Opium, ac modus, quo agit China China; & æquè notum sit, Chinæ Chinæ virtutem esse Febrifugam, ac esse narcoticam Opii virtutem. Hæc quidem leviora sunt; sed sibi de more contraria. Contrarium nihilominus huic assertioni de non repetendo ad prophylaxim Febrifugo magis est, quod Orat. 3. Jatrici Argumenti docuit idem Cl. Auctor, ut in Collatione Textuum lit. K. L. M.; ubi nempe longè meliorem factam esse ait *Februm doctrinam*, illasque curandi methodum, postquam hujus Febrifugi usus innotuit; nec semel tantum, ut olim, sed plures ad dies illud exhiberi cœptum, donec febrile miasma sit penitus exantlatum. Sed tunc cum ita scripsit, annum licèt agens 75., & *Dogmata hæc Theorica, & Practica studiosæ suggerens Juventuti*, in juvenili tamen adhuc ætate forsan & semetipsum constitutum dicet; quo tempore *Chinam Chinam*, ut alibi vidimus, *habebat in magno pretio, & in eam affectu suo nimis effusè ferebatur*. Missa ergo faciamus, & ut fructus immaturos præservidæ juventutis seponamus quæcunque favens Peruviano Febrifugo scripsit ille ad annum usque 79. ætatis suæ; sitque nobis hæc ultima Dissertatio Prototypus unicus opinionis acceptabilioris Viri Cl. in hac materiâ.

Inquit itaque ille in hoc Paragrapho, *laudandum, & admitterendum esse Chinæ Chinæ usum in Febribus præsertim intervallatis, dummodo ea Opii more semel oblata non repetatur ad prophylaxim; sed tantum*

tantum, ad obtinendum aliquod intervallum pro virium reparatione, unicâ vice usurpetur. Sed neque hoc sufficit: alia namque ad rectum illius usum requiritur necessaria conditio, ex paragrapho 27. depromenda; ut scilicet Medicus, priusquam dolosum istud Febrifugum præscribat ad intervallum illud temporis obtinendum, certitudinem habeat, vel eam sibi comparet, de novo post aliquot dies Febris reditu, aliàs gravissimè erraret. Hic nimirum Medicorum est error (scripsit ille antedicto §. 27.) ut si Chinam Chinam in hunc solum finem præscribant (in hunc autem solum finem licere Chinam Chinam præscribere contendit ille in totâ Dissertatione, ut vidimus, & paulò infra videbimus) ut paucos a paroxysmis dies liberos obtineant, interdum eludantur, Febre amplius non redeunte, sed (en damnum gravissimum) tacitè corpus depascente. Id sibi quondam in Nobili Virgine, quæ non nisi ægrè, ac serò a diutino morbo convaleuit, contigisse refert §. 26., subdens statim citato §. 27. hæc verba -- Non absimiles casus aliàs mihi contingere, ut me poenituerit hoc remedio usum fuisse.

Crediderim autem hæc, & similia illi contigisse eo tantum tempore, quo nimis effusè ferebatur affectu suo in Peruvianum Corticem; exinde tamen ita profecisse, ut in saniori ætate didicerit modum præscribendi remedium istud cum certitudine reditus Febris: secus, deficiente huiusmodi certitudine, caro nimis quis emere aggrederetur breves aliquot dierum inducias, si subesset periculum, ne corpus tacitè depastum iret, Febre amplius non redeunte. Quòd autem ita exinde profecerit Cl. Auctor, ut nonnisi cum certitudine reditus Febris Chinam Chinam in saniori ætate præscriperit, palàm faciunt hæc illius verba, ex §. 8. huc iterum revocata -- In provectiori ergo ætate experientiâ edoctus, & observatis noxis a Chinâ Chinâ prognatis, cautius in illius usu processit, & mediocri solum dosi præscripsi ad drachmam unam, vel duas in Febribus Intermittentibus, quando nimis protractæ ægros fatigarent; in hunc præcipuum finem, ut aliquot dierum induciis impetratis æger recrearetur, & vires resumeret, non sinè spe, imò cum certitudine (hic enim est cardo rei) Febrem redituram &c. Hæc mea est Methodus, quâ in ætate saniori sum usus. Et ex hac Methodo, atque ex hoc dogmate colligo ego, cæteros Medicos, qui de futuro rursus Febris reditu certitudinem non habeant (cujusmodi sunt quotquot in hoc Orbe sunt) etiamsi semel tantum, & dosi unius, vel duarum drachmarum præscribant Peruvianum Corticem, adhuc eo remedio uti non posse sinè trepidatione, & suspitione, ne corpora Egrotantium tacitè depascat Febris latens, nec in apertam flammam forsan amplius eruptura.

Atque ut in epilogum hac occasione contrahatur universa Cl. Viri Sententia, etsi scripserit ille §. 4., & in præsentem confirmarit, se nec contemptui habere, nec parvi facere Peruvianum Corticem, utpote qui non vulgaria commoda præstat in Medicinâ; attamen sensim usum illius ad eas redigit angustias, ut tandem ferme penitus feriantem velit. Etenim, ut ordine recenscam, illum neque proficuum censet in Pueris, neque in Adolescentibus (en pars Virorum non infima) neque

in *Mulieribus* (quæ medietatem saltem constituunt humani generis) præsertim verò *Monialibus*, nec in *Puellis*, quæ apud ipsas educantur, nec in *Nobilibus*, aut *Potentibus Viris*, multòque minùs in *Principibus*. Item nec in *Temperamentis Melancholicis*, nec in *Pituitosis*, nec in *Hominibus corpulentis*, aut *habitu præpingui præditis*, nec in *Regionibus humidis*, aut *aere crasso refertis*, sicut nec *Hyberno tempore*, aut aliâ quavis *Humidâ*, *Australi*, ac *Pluviosâ Constitutione*. His demum omnibus exclusis, *unam tantùm*, vel *duas* ad summum illius *drachmas* concedit alicubi; non quidem innoxie, sed *minori damno* usurpandas: at *semel* duntaxat; cavendo a *repetitione* remedii; easque tandem, ut modò annotavimus, salvâ conditione *certitudinis* de novo Febris reditu secùs nonnisi cum *damno*, vel saltem nonnisi cum *periculo* exhiberentur. Adeòque (si velimus citra fucum sincerè loqui) æquè pro Februm curatione, ac pro earundem præcautione locum habere poterit, imò & debet, gravissimum effatum Viri Cl., Paragrapho finali ab eodem prolatum; videlicet -- *Consilium tandem magis sanum esse, remedium istud naturâ suâ dolosum prorsus omittere*. Hæc est germana Conclusio totius Operis, ut ex supradictis patet; quantumvis *Ex albo medicaminum se minimè expungere velle Peruvianum Corticem*, hoc ipso Paragrapho profiteatur verbo tenus idem Cl. Auctor.

Quòd si revera aberat ab illius animo inauspicatum istud propositum, quemadmodum tam in præsentì, quàm in quarto Paragrapho abundè testatus est; imò si *Beneficium*, quod *China China potest asferre*, ab eâdem libenter est excepturus, & malo, quod interdum ex illâ (sic ait ipse) *consequitur*, bene uti *discere etiamnum satagit*, ut in hoc contextu; cur postea beneficium istud, coarctato supra modum usu remedii, ad nihilum redigit, & quæ largiore usu parta sunt experimenta felicia, tanquam malè, aut temerè parta contemnit? Notum est, Artem Medicam consuevisse ex rebus, quæ nullius suapte naturâ sunt usus; imò & ex deleteriis ipsis Venenis, industri præparationum, & correctionum magisterio, salubria identidem medicamenta, quæ *Dracones* subinde mitigatos vocant, conficere, potiùs quàm illa, etsi vel inutilia, vel absolutè nocentia, planè rejicere. Si ergo Viro Cl. cordi erat *publica solùm utilitas*, ut sequenti Paragrapho latè asserit, cur quæso medicamentum istud, magnâ saltem (quod negari nequit) ex parte saluberrimum, eâ demum parte, quâ noxium reputat, non est conatus ita præparare, atque corrigere, ut dein sinè metu, & suspitione posset ad notos saltem, si non etiam meliores usus adhiberi? Atque ut ad specialia descendam; censebatne Vir Cl. Cortici huic certè *Febrifugo* inesse ulteriùs vim quamdam *figentem*, quâ *Obstructiones*, & *Cachexias* tractu temporis posset inducere? Cur igitur hanc vim sibi notam præparatione aliquâ delere non studuit, intactâ *Febrifugâ*, sibi, ut fatetur, ignotâ, adeòque secundùm illius hypothesim a figente diversâ? Si verò modum eam vim delendi non norat, cur saltem non docuit illam infringere per remedia, volatilitatem aliquam substantiæ Corticis impertiri apta, vel per aperientia peculiarìa commista, vel per hujusce generis alia?

Mehercule si isthæc addere, aut commiscere fortassis erubuit, vel hujusmodi correctionem tentare, ne Remedium suapte naturâ egregium temerare videretur, memor eorum, quæ protulerat in Orat. Jatr. argum., ut in Collatione lit. E. F. G., nempe -- *Solum Peruvianum Corticem*, nobis a divinâ beneficentiâ munus concessum, sinè alterius rei mixturâ, in qualibet Regione, quocunque anni tempore, ætate, sexu, temperamento, Febres saltem recurrentes, atque intervallatas fugare, & exterminare, quamquam non defuerint, qui Hieron hoc picron ex Arbore Vitæ decerptum temerare pertentavit. Opio, aliisque rebus adjectis, ut solitis mangoniis vulgo imponderent -, si inquam ob hæc tam clara effata sua fortassis erubuit, Chinæ Chinæ correctionem per hujuscemodi additamenta tentare, facile semetipsum excusare poterat titulo junioris ætatis; nonnisi enim, ut & nuper innui, 75. annum agebat, cum isthæc conscripsit. In provectiori ergo, & saniori ultimâ ætate longè aliter sentiens, liberè quoque poterat addere, & Orbi pandere quicquid malitiam remedii seriùs detectam valeret infringere. In hoc feracissimo Campo suam longè meliùs, & in majorem proximi utilitatem poterat Minervam exercere; innocuisque experimentis sedulò institutis, docere nos usum Corticis saniozem adhuc, atque certiozem, aut, si ita libeat, etiam tutiozem, potiùs quàm hucusque repertum, tamque utiliter exercitum, inviso Abusus nomine falsò traducere. Satiùs namque fuisset, Remedium simpliciter bonum, etsi quadantenus, ut modò autumat, imperfectum perficere, quàm ex toto proscribere; imò & proscribere, quia nimis efficax, & bonum, nempe quia sæpe non ad tempus tantum, sed perpetuò valet Febrim depellere. Felicia venena Correctorem nacta. Infelix Remedium ultra venena exulare jussum. Sed magis infelix hominum conditio, quos mediâ Chinâ Chinâ morti eripere nefas est in morbis exitialibus, ob metum superstitis obstructionis; cum tamen, eodem metu minimè obstante, liceat passim eodem remedio, ex præscripto ipsius Cl. Auctoris, aliquot tantum dierum inducias impetrare in morbis benignioribus.

(b) (*Ast quotidie &c.*) Omne igitur crimen, admissò, & laudato per Cl. Auctorem Chinæ Chinæ usu pro virium reparatione, omne inquam crimen, si quod est, consistit in largâ dosi ejusdem Chinæ Chinæ, quotidie, ac pluries in die in Febribus, quæ maligni aliquid præferant, exhibitæ: quasi ad libras contuescat illa præscribi (quod tamen liceret, ubi nulla alia prostacket salutis via) & quasi inter libras illius, & inter drachmas ad summum duas, quas semel tantum concedit Vir Cl., non detur medium. Alibi, nempe §. 30., & 33. magis determinatè locutus ille, improbat portionem Chinæ Chinæ ad uncias integras in Vino infusæ pluries in die exhibitam; quo nomine magis in Methodum Talbotii, verè Corticis uncias in copiosâ Vini quantitate acervatim, cumulatimque infundentis animadverteret, quàm in meam, vel in Mortoni, aut Sydenhamii Methodum, qui eam tantummodo, quâ tunc uti opus est, Febrifugi dosim qualibet vice præscribimus. Sed quemcunque petat sugillatio isthæc, vanus est ictus; ea siquidem, quæ subest æquivocatio, apud mulieres tantum, & imperitam plebe-

culam

culam locum habere potest; non apud eos, qui sapiunt. Aliud est infundere in Vino, aliove liquore unciam integram, vel etiam uncias integras (si ita velit) Chinæ Chinæ, & pluries in die portionem debitam, ac modicam illius exhibere: aliud est, uncias easdem integras pluries in die, seu qualibet dosi propinare. Providus Pater Familias plures Vini Congios infundit in Dolio; illud tamen Familiæ distribuit solum ad Lagenas, & Cotylas, ebrietatem cavens.

Hujusmodi tamen Methodum, quâ nimirum una, vel duæ Peruvianæ pulveris uncia, in phialâ vino plenâ infusæ, partitis haustibus exhibentur, quæque in vulgaribus Casibus, & quandoque etiam in arduis, sed nonnihil lentioribus, haud inutiliter solet administrari, neque mihi, ut verum fatear, universaliter loquendo planè probatur, præsertim in Casibus præcipitis exitii: non quidem ob inanes hæc Viri Cl. declamationes, molem universam hyperbolicè commensas; sed ob rationes, quas olim innui in Therapeut. meâ, tum Lib. 1. cap. 7., tum Lib. 3. cap. 3., præsertim a pag. 330. ad pag. usque 333. Id enim est sæpe *ad Sacram Chinæ Chinæ anchoram verè nonnihil tumultuariè confugere*, quod plurimi perpetuò hîc illic factitant exemplo Talbotii, & aliorum, quodque solis nihilominus Empyricis, aliisve parum expertis vix condonandum, dosi per vices quodammodo fortuitâ utentibus. Hinc nanque identidem fit, ut tunc cùm res magis urget, haud satis valida fit; nimis verò, cùm minùs res postulat, dosi remedii. Hæc ipsa dosi magis adhuc incerta redditur, & fortuita ex Muliercularum ut plurimum assidentium socordiâ, liquorem scilicet modò magis, modò minùs turbidum (quicquid clamet Medicus) offerentium; adeoque remedii particulis modò magis, modò minùs imprægnatum. Ex quâ solâ inæqualitate, inverso nonnunquam ordine institutâ, cùm labitur occasio præceps, periclitatur non rarò, nonnunquam & perditur, quæ cæteroqui servari poterat, hominis vita; tumque incassum solummodo dicitur oblatum remedium, cum potiùs dici deberet oblatum & perperam. Medicus ergo Navis hujusce Palinurus, præscribat quoties, & prout opus est, dosim certam, certis quoque temporibus exhibendam, eâ adhibitâ partitione inæquali, & industri, quæ morbi, & temporis exigentiæ respondeat, ut fusè Tyrones docui in Therap. meâ eodem cap. 3., imò & 4. Libri 3.

Ad me igitur, Methodumque meam quod attinet, repeto quod centies dixi; nimirum sesquiunciam circiter, vel uncias duas Chinæ Chinæ, spatio trium hebdomadarum epotas, pro curatione simul, & præservatione sufficere; sive sermo sit de *Subcontinuis Malignantibus*, ubi lenior; sive de *Perniciosis Intermittentibus*, ubi validior requiritur Methodus. Licet enim in Tractatu meo, maximè verò in historiis, identidem de *Methodo validissimâ, de dosi liberali &c.* indefinite sermonem habeam; attamen non alia determinatè uspiam legitur dosi, nec alia debet, aut potest intelligi, quàm supra recensita. Id satis patet vel ex ipso *Indice* ejusdem Tractatus, ubi pag. 711. sub literâ C. hæc prostant. *Curatio præsentanea Febris Perniciosæ non minùs exigit regulariter, quàm drachmas sex Corticis, nec plus quàm un-*

*ciam unam, pag. 323. Integra verò, ac universalis Curatio duabus plus minus unctis perficitur, pag. 336. 337. Me legat ergo locis ibidem citatis curiosus quilibet, ac insuper etiam pag. 332., & 333. ipsiusmet Operis. Totum dosis augmentum penès me, in Casibus tamen solummodo urgentissimis, quando nimirum præ foribus mors est, alterâ die hominem interemptura, totum inquam augmentum dosis tunc consistit in primâ oblatione, a futuro accessu magis remotâ: illam etenim ex quatuor utplurimum drachmis Febrifugi conflata volo; & pluribus etiam, si minor; paucioribus, si major sit ab eodem paroxysmo distantia. Hoc jacto curationis fundamento, rem totam per drachmas deinceps, ac mox etiam per semidrachmas absolvo, usquequo duæ circiter unciae pulveris, trium saltem hebdomadarum decursu, compleantur. Hac unâ Methodo sanati sunt, & ab Orci faucibus erepti *amaris Chinæ Chinæ potionibus*, minimè verò *confecti*, quotquot in historiis retuli.*

(c) (*Id est quod periculosum &c.*) Res periculosa profectò, & valde insalubris est mors. Amara pariter, etsi a Cratere dulci, & ab incruento Medici calamo illa proficiscatur, quocunque tandem modo ab eodem Medico *conficiatur Ægrotus miser*. Sed nec dulce sonat nostratum Medicorum auribus crebrum modulamen illius *Istic*, quo Mutinæ ita de more fieri intonat Cl. Auctor, summâ nobis confidentiâ crimen alienæ internecionis attribuens. Verùm mittamus isthæc, & pacificum nunc Senem in veritatis gremio placidè quiescentem sinamus. Hoc unum liceat reponere, *amaris Chinæ Chinæ potionibus non modò non confici Mutinæ miseros Ægrotantes*, seu, quòd idem est, non modò Methodum meam revera nec *periculosam* esse, nec merè *empyricam*; sed potiùs mirum esse, quòd ea tam confidenter, vel a Viro Cl., vel ab ejus Nepote abusus Relatore diffametur ut talis, & velut merx planè improba, cum nullam unquam quisquam eorum indè prognatam noxam me curante observarit. Sexies illis videre me contigit illam exercentem. Ter vidit Patruus, ut ex Therapeut. meâ pag. 181. hist. 14., pag. 424. hist. 1., & pag. 562. hist. 1. Ter quoque vidit Nepos, ut pag. 416. hist. 11., pag. 444. hist. 9., & pag. 476. hist. 2. Quàm felices, & simul quàm arduæ fuerint illiusmodi curationes, ipsi norunt. Ne unam quidem præter illas, sive faustam, sive infelicem inspexere; imò unam ambo inspexere, ipsis quidem assidentibus, me verò superaccito, ob id solùm infausam, quia ibi Methodus mea nequivit, ut proposueram, administrari, quemadmodum visitur in eâdem Therapeut. pag. 368. hist. 2. Quo ergo pacto ut malam redarguunt Methodum, quam quoties viderunt in usum deductam, semper proficuum novere, nunquam verò frustraneam, aut noxiam? Quòd si aliarum quoque curationum, quas recensui in Opere meo, & quibus ipsi minimè interfuere, exitum omnem investigassent curiosi, nil pariter carpendum reperissent; nec probabiliter reperere, cum non carpsissent.

Quos enim in totâ Dissertatione suâ retulit ex adverso Cl. Auctor Casus parum felices; ii nec sibi constant, nec meis ullo pacto opponuntur;

nuntur; quatenus videlicet nonnulli ex illis Ægrotis a morbo tandem evasere; alii verè vitâ functi Corticem nullatenus potaverunt; & alii pariter tandem obitum passi (fuere autem duo intrâ septem lustra) potaverunt methodo tantùm vulgari, non meâ, de quâ agitur, quippe ex Quartanis Intermittentibus laborantes: atque unus quidem ex his, post septennium inculpatæ valetudinis a Chinâ Chinâ epotâ, obiit demùm ex alio morbo acuto ab origine, mox in Chronicum converso: alter verò ex Chronico pariter, nempe ex Hydrope, ante epotam Chinam Chinam inchoato; præscribente tamen illam Frassono ante annos 37., non me, ut retuli in Therapeutice meâ; ubi *unicum* hunc casum, antequam Viri Cl. Dissertatio mente illius conciperetur, rigidiusculè examinavi pag. 178. hist. 13.

Septem ergo, ut rem minutiùs persequar, vel octo sunt Casus, per Virum Cl. a septem lustris ostiatim quæsit, & nominatim oppositi, dempto casu D. Co: Torricini Guastallæ defuncti, qui me nullatenus tangit, & de quo jam satis §. 47. Duo ex iis Ægrotis, ut nuper agebam, a morbo convalescere, ipso fatente, nempe Virgo in Monasterio S. Mariæ Magdalenæ Mutinæ educata, de quâ in Dissertat. suâ §. 26., & insignis Jurisconsultus, de quo §. 34., ipso pariter fatente restitutus: quibus si tertium Casum addere velit ille, sibi, ut inquit §. 9., visum Patavii in Puellis illis, quarum nomen minimè protulit, quibusque etsi Chinam Chinam exhibuerit Mater, febres nihilominus (non continuato, ut reor, Febrifugo) *usque ad Veris principium perduraverunt*, nil officit; quandoquidem & illæ pariter sanitatem demum sunt affecutæ, & eam frustra ab aliis remediis citiorem quæsierunt. Atque ita jam tres ex adductis a Viro Cl. Ægrotis (*multas* hæc *puellas unius familiæ* pro uno tantùm Casu numerando) sanitatem tandem integram sunt sortiti. Tres alii, qui verè decesserunt e vivis, decessere prorsus jejuni Peruviano Cortice; nempe D. Antonius Guidonius, de quo §. 31., & D. Marchio Fortunatus Cortesius, Dominusque Jo: Altimanus, de quibus §. 32. Duo ergo tantùm supersunt, videlicet D. Comes de Marfciano, de quo §. 21. per septennium ab hausto Cortice strenuè valens, ac tandem ex aliis evidentibus morbis confectus; & D. Co: Jo: Carolus Morandus, de quo §. 20., qui verè post fugatam Cortice Quartanam, in Hydropem antea inceptum ultro progredi minimè desit; sed ad interitum, quò jam tendebat, pertigit anno, si fallor, 1678., vel circiter, me hæsitantem semper relinquens, ut candidè fassus sum in Therapeut. meâ, num hoc casu intrâ annos nunc quidem 37. *singulari*, minùs fausto, fuerit ad leges circumspicientioris Praxeos præscriptus idem Cortex, minimè adeò profuturus Hydropi, a Quartanâ nequaquam producto, sed ab aliis peculiaribus causis. Hi omnes sunt Ægroti, Viro Cl. nedum referente, sed penè dixerim flente, Chinâ Chinâ confecti. Atque ne unus quidem ex recensitis, ex iis scilicet, qui verè Chinam Chinam hausere, illam hausit *Methodo meâ*: quam tamen unam in fine hujus Paragraphi, quem modò expendimus, tanquam in totius Dissertationis epilogo, manifestè traducere satagit Cl. Auctor; sed *Methodo tantùm Vulgari*. Ut pro-

inde hisce exemplis quibuscunque, non mihi uni, sed omnibus vel religiosissimis Chinæ Chinæ fautoribus bellum, inane quidem, nil tale putans indixerit. Sic dum *Fullonem adoritur* Vir Cl., *percutit Fabrum*.

Sed quod majorem ultimo tandem loco incutit admirationem, illud est, quod omnes hosce Casus verè nihili unquam fecerit, aut usui Corticis quicquam officientes putarit ipse, qui modò tanti facere ostentat, Cl. Ramazzinus. Licèt enim asseruerit §. 8. hujusce Criticæ Dissertationis, *se in proveciori etate experienciâ edoctum, & observatis noxis a Chinâ Chinâ prognatis, cautiùs in illius usu processisse*, ac subinde has omnes historias in asserti sui probationem attexuerit; nihilominus hæ ipsæ historiæ, de quarum veritate satis sibi conscius extiterat, minimè obstiterunt, quò minùs in maximas Chinæ Chinæ laudes fuerit effusus in Orationibus Jatr. argum. pluries citatis; imò nec obstiterunt, quò minùs ad ultimos usque annos incolatus sui in hac Urbe, quæ idcirco miratur adhuc novissima illius effata, fuerit usus eodem Febrifugo: & quidem semper fidentiùs, ac liberaliùs, quàm antea.

Atque ut clariùs elucescat hæc veritas, & cuncta ordinatim enucleem, sciat Lector, Virginem in Monasterio S. Magdalensæ educatam ægrotasse, & convaluisse (neque enim obiit) anno 1690.; Jurisconsultum insignem, Dominum nempe Nicolaum de Sanctis, a Secretis Serenissimi Ducis Mutinæ, ægrotasse pariter, & convaluisse anno 1704. Eodem anno 1704. ex Perniciosis Tertianis Febribus, *Chinâ Chinâ nequaquam epotâ*, Fatis cesserunt D. Antonius Guidonius, D. Marchio Cortesius, & D. Jo: Altimanus. Anno 1703. occubuit D. Comes de Marsciano, & circa annum 1678., vel 79. D. Comes Morandus. Cl. autem Ramazzinus post hos morbos, & post hæc funera gressu nedum pari, sed & firmiore in eadem semper praxi procedens, ut Urbi huic universæ notissimum est, Orationes suas Jatrici argumenti, quas Peruviani Corticis quisque diceret Panegyricas, conjunctim edidit anno 1708.; Dissertationem verò *De Contagiosâ Boum Epidemiâ*, anno 1712., immediatè ante editionem Tractatus mei; longè verò *post editionem Synopsis* ejusdem Tractatus: in quâ Dissertatione suâ ferme sibi adoptare visus est argumentum ipsius Therapeutices meæ, sub Prelo tunc existentis. Atque ita quidem, ut ideo putarint nonnulli (temerè tamen) Virum Cl. in eâ Dissertatione, dum meus cuderetur Tractatus editâ, indicare voluisse semetipsum ante me conscium Methodi, quam propediem eram promulgaturus; explosâ verò a me pag. 637. & sequent. Operis mei omni suspicione, quò illi Methodus hujusmodi innotuisset priusquam mihi, ipsum in oppositam partem animum convertisse, acriter impugnando quod sibi ampliùs nequibat asciscere. Sed falluntur quotquot de tam perspectæ dignitatis Viro tam finistrè opinantur. Scripsit ille tunc quæ sentiebat de admirandâ Corticis virtute, ut veritati subscriberet sibi cognitæ, mihiq; plauderet illam promulgaturo. Mox illum facti pœnituit; nequétamen mentem mutavit, sed cor.

Mentem igitur suam (ut revertar unde recessi) ingenuè patefecit ille

ille in prædictâ Dissertatione De Contagiosâ Boum Epidemiâ anno 1712., longè scilicet post sinistros Casus nuperrimè memoratos ; patefecit inquam textu illo insigni aliàs recensito, videlicet -- *Equidem hoc præsidii genus* (loquitur de Chinâ Chinâ) *in Febris periodicis miranda præstat, ac præsertim in Tertianis Intermittentibus Malignis, quæ in ipso impetu accessionis egros interdum necant &c. hoc enim Febrifugum Fermentum illud malignum sive penitus restinguit, sive ita enervat, ut periculum illud tollatur, ne æger in ipso Febris accessu intereat.* Cui textui (ne vel hoc subdiceam) haud satis percipio quomodo quadret textus finalis hujusce Paragraphi, nempe, -- *omnino periculosum esse, amaris Chinæ Chinæ potionibus uti in Febris, quæ Maligni aliquid præferant, quasi benignitas, vel malignitas Fermenti febrilis, contra id quod experimur, reddat Febrem, etsi Intermittentem, Subintrantem, aut Subcontinuum, in primo casu curabilem Cortice, insanabilem in secundo: & quasi non liceat in extremo Vitæ periculo uti Chinâ Chinâ more Opii, & pro Curatione etiam palliati-vâ perperam creditâ (quâ similitudine, ab Opio nimirum, aliisque Narcoticis desumptâ, ipse quoquè sum usus in Therapeut. meâ pag. 31., 355., & alibi) cum tamen ad impetrandas in Febris minimè periculosis aliquot dierum inducias, ex Viri Cl. effato in hoc ipso Paragrapho, admittendus sit, & laudandus Chinæ Chinæ usus; imò cum ex eodem contextu usus illius esse debeat qualis est Opii.* Sed redeamus in viam. Alias ergo noxas sibi observatas post annum 1708. imò post 1712., opus erat recensere Viro Cl., non Historias inanes, longè ante edita Corticis encomia sibi notas, quæ tamen encomiis subinde prolatis non obstitere. Rumor itaque omnis tandem desinet, partim in Puellas Patavinas, quibus anno 1713. empyricè prorsus Chinam Chinam obtulit Mater, & quarum *sanatio* in subsequens Ver dilata fuit, partim in Historiam Co: Torricini eodem anno Guastallæ extincti, Auctori nostro, dum hæc scriberet, communicatam per literas; sed illi satius fuisset, ut reor, hanc quoquè Cicadam alâ nequaquam corripuisse.

Sunt hæc, a Viro Cl. objecta, septem, vel octo Corticis facinora, quæ deprædicantur infauſta. Prodeant ergo in apertum necesse est, non quidem ad ostentationem, nec meæ tantùm defensionis habitâ ratione, sed & publicæ utilitatis, quæ fuere præclara. Verùm hæc jam satis prodire in Therapeutice meâ. Ægrotantium restitutorum series (non hic est sermo de Ægrotis citra grave periculum febricitantibus, qui forent innumeri, sed de *lethaliter* decumbentibus) factâ supputatione omnium hic illic cumulatim descriptorum, seclufis etiam Historiis ab aliis communicatis, numerum implet 74. Horum 64. cujuslibet sexus, temperamenti, ac ætatis, incolumes vivunt adhuc, suntque vivi testes virtutis eximiæ, quam Deus indidit huic remedio. Reliqui ab eo, quo desii scribere, tempore (agitur jam quintus annus, etsi segnior processerit impressio completa totius Operis) obierunt: quatuor quidem jam octogenarii descripti olim, cùm convaluerunt ope Corticis, in eodem Opere pag. 165. hist. 3., pag. 171. hist. 7., pag. 172. hist. 8., & pag. 480. hist. 4.: sex alii virilis, aut inclinantis ætatis, & ex causis planè

evidentibus, sive, ut ajunt, procatarticis, in varios demum morbos delapsi, descriptique pariter quondam, cum Chinâ Chinâ fuere servati, pag. 409. hist. 5., pag. 412. hist. 8., pag. 438. hist. 6., pag. 465. hist. 18., pag. 477. hist. 3., & pag. 497. hist. 12.: omnes verò, tam primo scilicet, quam secundo loco recensiti, post annos, modò *septem*, modò *octo*, modò *sex*, & ad minimum *duos* ab epotâ Chinâ Chinâ, e vivis sublâti, neque illâ in postremis, quibus succubere, ægritudinibus usi.

Unum tamen excipiam, & aliis addam, memoratum olim in citatâ Therapeutice meâ pag. 181. historiâ 14., qui *viginti* ab hinc annis præsentaneo Corticis auxilio a periculosâ Febre feliciter evaserat; sed nuperrimè dum hæc scribere jamdudum desiissem, occubuit, eodem remedio rursus, sed incassum, adhibito. Ne itaque ab ingenuo more meo unquam deflectam, quemadmodum in eo Tractatu lib. 3. cap. 5., & lib. 5. cap. 4. historias omnes defunctorum, quos China China servare nequivit sum fideliter persecutus; ita modò hunc ejusdem sortis eventum, imminente harum Responsionum evulgatione præter expectationem mihi observatum (quandoquidem

Multa cadunt inter calicem, supremaque labra)

candidè recensere, meum existimo. Idem igitur Vir Nobilis D. Geminianus Levizzanus, de quo jam loco citato, paulò ante Æquinoctium Autumnale hujusce anni 1715. duplici Tertianâ Subcontinûa ruri correptus, in Urbem se transfudit; ubi methodicè a me, ut loqui mos est, ab initio tractatus, non modò nil opis ab Arte retulit, sed accessionibus, quæ se mutuò excipiebant, obscurioribus redditis, & ingruelcentibus in dies symptomatis, e Subcontinûa periodicâ ad Acutam, & Continentem febrem jam properanter tendebat. Usque tamen motum levem exacerbationis, & remissionis haud planè contemnendæ servabat eadem Febris: ut proinde Peruviani Corticis usum, non plenâ quidem, sed nec minimâ fiduciâ, fore proficuum crediderim. Illum itaque præscripsi parciore tantùm dosi, ut morbi, remediique vires sensim explorarem; ad drachmam nempe unam per dies quatuor quolibet mane in Aquâ Cardiacâ. Me interim aliò migrante, ad invisendum scilicet Ægrotum Nobilissimum ruri graviter decumbentem, cum postridie reverterer, actionem aliquam Febrifugi salutarem probabiliter percepturus, non sinè admiratione quadam opositum deprehendi, æqualem videlicet, imò & fortiolem, ut suapte naturâ ferebat progressus morbi, Febris quoque progressum agnoscens, perinde ac si Chinam Chinam nullatenus Æger potasset; quem idcirco in novissimâ exacerbatione insigniter soporosâ, & gravi Sacris celeriter muniendum putare Medici, qui vicem meam brevi eo tempore suppleverunt. Admonitus interim ego de levi quidem, sed perceptibili motu, quem Febris adhuc servabat, recolensque memoriâ, quod mihi narratum fuerat contigisse primis morbi diebus (nisi me fefellere adstantes decepti & ipsi) Febrim scilicet, dum ruri ageret Nobilis Patiens, claros Tertianæ duplicis, Subintransantis licet, paroxysmos præ se tulisse, facilè persuasum habui, illam etiamnum de *Subintransantis* potius, etsi gravioris, atque

contu-

contumacioris, quàm de simpliciter Remittentis naturâ participare; adeoque Cortice justâ dosi exhibito curationem illius (quam non aliunde licebat sperare, quoniam frustranea visebantur alia, quæ simul ex usu erant Artis præsidia) esse tentandam. Duas itaque Chinæ Chinæ drachmas summo mane in formâ boli sumendas statim præscripsi, & totidem mane sequenti: quibus oblatis, non modica facta est morbi remissio, & consuetarum exacerbationum abolitio omnimoda, superflite tantum levior Febriculâ vix perceptibili. Hæc tamen cum intra duos, aut tres dies minimè solveretur, ut cæteroqui assolet hisce casibus; imò pertinaciter perstaret, comitante illam voce exili, & facillimâ etiamnum ad somnum, placidum licet, propensione; maximum mihi terrorem incussit: præcipuè cum simul de pondere quodam in regione thoracis toto morbi decursu conquestus fuerit Æger, quamvis sine ullâ unquam difficili respiratione. Fuit autem ejusmodi, qui me tunc corripuit timor, ut actum esse probabiliter de vitâ Ægrotantis facile pronunciaverim, latentem aliquam in præcordiis labem suspicatus, quæ decumbentem Virum sensim esset confectura. Intermisso idcirco ad aliquot dies Febrifugo, in hisce circumstantiis inutili a me credito, & continuatis tantummodo reliquis remediis vulgaribus, pari adhuc passu procedebat superstes Febricula, sed cum tolerantia adeo facili, ut jam non parum spei Adstantes omnes conciperent, & Consanguinei; me tamen apertis notis jugiter reluctante.

Ne verò Febrifugo planè posthabito violenter iterum recandesceret Febris, & reviviscerent Exacerbationes, facile illis postliminium præstitturo foco superflite: & cum inania ex aliâ parte experirer quotquot ad omnimodam Febris extinctionem administrabantur remedia, ad ejusdem Corticis usum iterum transitum feci, præscribendo ad drachmas tres in formam Opiatæ, intra tres tamen dies partitè absumendæ. Quæcunque fuerit eventus causa, ab eo certè tempore levius se habere cœpit Ægrotus quò ad omnia, & quò ad ipsam quoque Febriculam; quæ tamen nunquam integrè obliterabatur. Vox illius cœpit se exere-re, & sonora evadere; spurum quoddam crassum, nonnunquam sub-cruentum, ac identidem ferme semipurulentum facile excerni; somnus de more placidus levamen ferre; urina antea crassa laudabilis fieri; appetitus non modicè redire, ac ferè dixerim nimis: itaut solidos cibos appeteret Æger, & è lecto surgere sibi permitti constanter efflagitaret. In hac rerum tranquillitate cum tamen nunquam planè recederet obstinata Febricula, jamque instaret vigesima morbi dies, Consanguineis, & Amicis illius, qui inter sanos eum planè referebant, mihique, nedum non fidenti, sed & omnino malum exitum metuenti, parum aberat quin illuderent, apertè dixi, me adduci non posse, ut unquam crederem, Ægrotum ab eo morbo evasurum, etsi illum domi ambulantem cernerem; quandoquidem laticæ illiusmodi Febres me vel prope quadragesimum diem aliàs decipere. Nihilominus ne forte, ut aliis videbatur, propitiâ abuterer, Corticem ad semidrachmam in formâ boli ad quatuor adhuc dies continuandum præcepi, tredecim sic illius drachmis toto morbi tempore partitè consumptis. Quod quidem eo

fructu visum est fieri, ut vigesimâ quintâ morbi die Æger mihi cubiculum mane ingredienti nuntiare potuerit, se nocte prægressâ a Febre omnino liberum semetipsum dignovisse, & etiamnum talem se mihi perhibere, ac perfectè jam sanum. Immunem verè tunc a Febre & ipse deprehendi, pronuntiavi, & metum libenter deposui; subdens tamen Uxori sollicitæ, me reapse non reputare levamen illud pro ultimo morbi termino, cujus solutionem seriusculè protrahendam etiamnum censebam; attamen deprehensam febris carentiam tanti ponderis esse apud me, ut jam jam Ægrum in tuto positum crederem, neque ampliùs eum tentari posse, nisi febriculis forsan levioribus, & paulatim facilè recessuris. Revera vespere motu nonnihil sensibili novus accessit febrilis insultus; quo statim terrefactus Æger, se de vitâ desperare palam fatetur, cibum, quem antea benè appetebat, averfans, me tamen illum redarguente de pusillanimitate intempestivâ. Sed heu vana quàm sunt hominum judicia! Mane sequenti gravissimè habentem invenio, & faucibus quasi stertentem, quem pridie tutum putaram. Præscribo tumultuariò plura, sed incassum; nec Cortici locus, aut tempus est, nec ulla mihi ampliùs fiducia. Post meridiem exacerbatur febris cum sopore, & gravi anhelitu. Animæ idcirco iterum consulit, & postridie manè, vigesimâ nempe septimâ morbi die, dum levius habere creditur ab Adstantibus, me ideo statim acciri curantibus, sub eorum oculis spe rursus conceptâ lætantium, sinè stertore, sinè labore ullo placidè expirat.

Recentem hunc eventum, qui minimè successit ex voto, tanquam quid infrequens in hac Praxi (*Omnibus namque Malis Punicis inest aliquod granum putre*) excipe prudens Lector; & ex numerosâ, quæ superest faustorum serie, & ex perspectâ, etiam cum planè tollere morbum nequit, sed tantum mulcere, innocentia remedii, conjice quàm sæpe fidendum sit, quàm rarò cunctandum in usu Peruviani Corticis, ubi præsertim satis patens Febrium indoles, & imminens periculum illius administrationem rationabiliter suadeant. At verò quid hic immoror, librando Casus felices olim relatos, ut eos huic uni, ubi remedium distulit tantum, non prohibuit cladem, vel paucis quibusdam commentitiis, & vanis, a Viro Cl. adductis, longè præponderantes ostendam? Nonne præter sexaginta quatuor in Therapeutice memoratos Ægrotos adhuc superstites, nonne, inquam, septem alios, quasi in defunctorum locum suffectos (neque enim Chinâ Chinâ semel curati immortales fiunt) & septem famosis Casibus a Cl. Auctore oppositis jure merito præferendos, in harum Responsionum decursu recensui, quippe qui post editam eandem Therapeuticen, decubuere, & felicissimam in periculosis circumstantiis sanationem unius Chinæ Chinæ ope fuere sortiti? Ut omnes simul colligam, fuere hi Viri Nobilissimi, D. D. Dux Limatulæ Neapolitanus, Marchio Borda Hispanus, Marchio Gonzaga Mantuanus: item D. D. Jo: Baptista de Carandinis, Paulus Æmilius de Bignardis, Antonius de Zanellis Mutinenses, & Archipræsbiter Massæ Finalensis paulò ante descriptus.

Quòd si alios addere lubeat admirabili hoc Febrifugo recens curatos,

tos, quorum nulla hætenus facta est mentio; in promptu erunt Viri pariter Nobilissimi, *D. D. Marchio Thomas de Obiciis*, & *Comes Fulvius de Rangonis*, ambo ex Tertianâ duplici Subcontinuâ cum symptomatis non parum gravibus, & pejora minitantibus ægrotantes; *Monialis* ferme octogenaria e Cœnobio S. Claræ lecto ferè semper affixa, quæ a Tertianâ Intermittente convalescens, post nonnullos subinde menses e Subcontinuâ iterum longè graviore decubuit; *D. Lucretia Ferraria* ejusdem pariter ætatis, ex Perniciosâ Lethargicâ ad ferreum mortis soporem properans; *D. Claudius de Donnolinis* ex Subcontinuâ Tertianâ in Algidam conversâ ad extremum vitæ planè redactus; *D. Dejanira de Raynaldis Rovighia*, quæ ex Quartanâ triplici Subintrante in Continuum demum soporosam ruebat gradu præcipiti; *D. Alphonsus Tonanus* ex Quartanâ itidem, primò simplici, mox duplici, ac demum continuâ, cum assiduis vomitibus, singultibus, & animi deliquiis gravissimè habens; *D. Joannes Amorosi* jam senex, & ex Algidâ Tertianâ Lipyriam æmulante quàm maximè, & quàm proximè periclitans; *D. Margarita Vaccaria* prope nonagenaria, quæ unoquoque post tertium Febris Tertianæ paroxysmum accessu, in profundissimum soporem cum renovatione Paralysis, quam ante aliquot menses ex Apoplexiâ contraxerat, & a quâ demum evaserat, denuo labebatur, itaut alternis diebus novum veluti levis Apoplexiæ insultum experiri videretur, unâ cum febrili paroxysmo invadentem; tandemque *D. Lavinia de Speramanis* in domo Camporeâ moram trahens, cui Tertianæ primò simplex, mox duplex in Perniciosam migravit ex Catarrho, ut vocant, suffocativo, in vigore accessionis stertorem planè mortiferum intrâ bronchia pulmonis excitante; itaut recurrente bis, aut ter, semperque ferociùs, cum paroxysmis febrilibus horrendo hoc symptomate, Ægra brevè pro conclamata habita fuerit a sacris ipsis Ministris, spiritus exitum quàm mox expectantibus. Quam quidem Perniciosæ Tertianæ speciem a Mercato descriptam, mihi verè nunquam contigit observare, ut in Therapeutice dixi; hanc tamen observavit, curavitque unus ex *Junioribus illis Medicis*, quem Cl. Auctor diceret *recens ex Academiâ venisse*, Corticem præscribens *dosi liberali* (drachmas tamen sex partitè oblatas non excedente) eâ securitate, quâ Magistrum suum operari vidit, eademque pariter securitate Febrim insimul, & exitiale illud Symptoma sustulit, omnibus quotquot aderant, possuntque cuncta testari, non parum stupentibus.

His Ægrotis alii accedere possent inferioris notæ, cujusmodi fuere nescio quis de Famulitio *D. Ducissæ Massensis*, nunc Mutinæ commorantis, nomine *Jacobus*, ex duplici Tertianâ Subcontinuâ Malignante quàm graviter habens; *Jacobus Antonius Corghius* minister in Xenodochio, ex Tertianâ duplici in Subcontinuum acutam permutatâ non modico positus in discrimine; *Christophorus Riccioli* ex Tertianâ duplici Subcontinuâ cum Diarrhœâ immani singultuosus factus, frigidus, & omnimodæ asphyxiæ propinquus; *Antonia Pini* ex Cardiacâ Tertianâ duplici ad Continuum properante cum delirio, luctuosis suspiriis, & voce exili ad obitum vergens; *Ludovica de Manzeris* in

quarto Tertianæ Syncopalis paroxysmo sua cæteroqui proxima prænosces funera ; *Dominicus Doricius* septuagenarius , ex Lethargicâ Perniciosâ Catalepticus jam redditus ; & *Bernardinus de Floranis* , ex Algidâ pariter Tertianâ ad interitum ruens : quos omnes Ægrotos unum hoc Alexiterium ex arte adhibitum promptè restituit ; non me uno quidem , sed & aliis quoquè Medicis illud præscribentibus ; iis nempe , qui *sui jamdudum facti sunt juris* , nec verè dici queunt amplius recens ab Academiâ venisse .

Scio equidem , *Pauperis esse numerare pecus* . At si septem tantum pecudes , & macras , & vetulas pro integro suo grege hucusque ostentavit Cl. Auctor , qui se nobis perhibebat tam divitem ; cur centum pinguissimas , pluresque ex iis adhuc tenellas e grege meo seligere ipse non possim , & digito commonstrare , nec tamen haberi pauperculus ? Quid verò si Febricitantes omnes Viri Cl. , ut finè parabolis loquar , persequi vellem Chinâ Chinâ fortasse curabiles , quibus tandem eâ posthabitâ , vel neglectâ , non Galenus , non Hippocrates , non Celsus , non Ballonius , sed solus *Acesias medicatus est* ? Absit , hoc tamen ut unquam mediter . Hoc igitur , quo nuperrimè recensui , pacto *Mutinæ amaris Chinæ Chinæ potionibus quotidie , ac pluries in die largâ dosi oblatis , in Febris , quæ maligni aliquid præferant , Ægri miseri conficiuntur* . Clamet , pugnet , obstrepat , verbis , cavillationibus , sophismatis , auctoritatibus Vir Cl. , Philologiâ ipsâ , & Arte Rhetoricâ in subsidium vocatâ , ceu qui motum *progressivum* dari pernegabat : ego interim silens ; sed eandem semitam calcans , eodemque *jugiter passu pergens* , responsum faciam .

§. 49.

HÆc habe mi Nepos pro responsione ad primum tuum quæsitum , de quo multa alia haberem dicenda , provocante materia . Scio me hac Dissertatione non multum gratiæ reperturum apud eos , qui communium errorum reprehensionem in propriam calumniam referunt , sed neminem hic nominavi , nec veteris Comœdiæ more volui quemquam perstringere . Mens mihi ad publicum beneficium solum fuit isthæc conscribere , non laudes quærere , eas potissimum , quibus uti solent Scriptores in re Medica , cum aliis Scriptoribus ampullosis titulis laudes cumulando , quæ nec ipsis Medicinæ Parentibus vix convenirent , ut alias similes ab iis exigant . Revera novum non est hoc vitium , sed ad summum devenit .

Suppe.

Suppetit mihi egregium dictum D. Hieronymi in Epistola ad Celantiam, quæ Epistola creditur D. Paulini. *Est sane grande, & subtile artificium, laudare alterum in commendationem sui, & decipiendo, animum sibi obligare decepti.*

(Hæc habe mi Nepos &c.)

S Era. in fundo parsimonia. In calce Dissertationis cessatio Viri Cl. a profusè adhibitâ hucusque libertate, seu majoris licentiâ, ubi præsertim officiosas protestationes ipsum destruit Factum, haud planè satisfacit iis, in quos peculiariter hæc etiamnum cuditur Faba: Communis namque in Republicâ Medicâ perperam vocatur error, qui non modò uni tantùm Mutinensi Scholæ, sed uni duntaxat adscribitur, imputaturque illius parti; ne uni dicam Scholæ meæ, cui fortè largiuscula illa haud malè aptatur appellatio *numerosioris Mutinensium Medicorum partis*, de immodico Chinæ Chinæ usu apud Cl. Auctorem §. I. notatæ. Apud hosce igitur omnes Urbis Mutinensis Professores si multum *gratiæ* fortasse non reperit Vir Censorius, nec plurimum ob id certè meruit reperisse. *Neminem* quidem ex his nominavit ille; sed injurius sibimet ipsi Pictor (respice Paragraphum undecimum Ramazzinianæ Dissertationis Lector, qui supinè non dormis) si cui nec varo, nec valgo, distortis tamen de industriâ cruribus a se depicto, nomen addere necessum putet, ut notum faciat. Me saltem noluit perstringere, qui *veteris Comædiæ more noluit perstringere quemquam*. Ita piè credendum cineribus Viri Cl. Verùm ut quid cineribus dixi? Ipsi viventi credendum; meque jam meæ pœniteat præconceptæ suspicionis: mihi siquidem ipsi de Opere meo, cùm illud primùm ex me recepit humaniter, hæc sub die 12. Septembris 1712. rescripsit linguâ vernaculâ, nisi & hic (quod ægrè admiserim) *non idem sint Scriptura, & Leucæus*. -- *Ho sempre avuto somma venerazione alle cose di V. S. ... sì in voce, come in iscritto, e l'averò sempre usque ad cineres &c. Non ho dubbio, che quest'Opera non sia per esser ricevuta se non con lode da gli Uomini dotti, molto più, che quelle leggende, che sono colle quali taluno si crede d'immortalare il suo nome. Mi rallegro con V. S. che sia entrata nella Classe de' veri Scrittori con un'Opera, che merita nome di Libro, e le rendo per un tal favore infinite grazie &c.* Officiosis hisce verbis, quamvis supra merita commendatus, minimè tamen contra honestatem a Viro ingenuo me deceptum credam, qui nec illum unquam decepi, cùm laudibus promeritis sum prosecutus, neque ab eo antehac recepi unquam, unde me sic deceptum suspicari potuerim.

Ut igitur & huic, & cuicunque graviori notæ defunctum Virum tandem eximamus, dicamus etiamnum, *isthæc*, quæ in præsentî Dissertatione prostant, *ab eo fuisse conscripta* exercendi ingenii, sive, ut dici solet, arguendi gratiâ (qui nobis olim quoquè mos fuit in Disputationibus, cum in hoc Mutinensi Lycæo Medicinam ambo pari munere profiteremur) imò *ad publicum solum*, ut asserit, *beneficium*; illud bene-

beneficium scilicet, quod ex mutuâ ingeniorum collisione solet emergere, eruto indè claro lumine veritatis. Convellendum dubio procul assumpsit ille (quis non videt?) Tractatum meum; non eo tamen fortassis animo, ut everteret, cum verè sentiret, quæ sentio; sed ut *fundus* quodammodo *vice cotis*, vomerem mihi, rastrum, & marram acueret, ad detegendam facilius, effodiendam, & expurgandam ab inquinamentis omnibus veritatem. Ita mentem illius modò lubet interpretari. Suadeamus insuper nobis (ut Nepotem quoquè subtrahamus a notâ Relatoris minùs sinceri) eundem Cl. Auctorem, ut hæc lepidius nobis obtruderet, Dissertationem suam inscripsisse Nepoti forsitan inscio, nec de Chinâ Chinâ quicquam locuto, nec responsum ullum per literas unquam quærenti. Juvat hoc credere; tum quia tantam in Viro modesto, cujusmodi est Nepos defuncti Auctoris, non libet fiduciam arguere, ut numerosiori, forsitan & digniori, Mutinensium Medicorum parti, Peruviano Febrifugo liberaliter, ut decet, utenti, tam facile succensuerit; tum maximè quia abundè jam constat, ipsum longè aliter ac olim de Chinâ Chinâ sentire cœpisse, suamque laudabilem mutationem sententiæ usu ipso practico prodidisse non semel.

Exemplum recens hujusce metamorphoseos ipse nuper aliud acturus ex inopinato deprehendi: cum enim quispiam de Familiâ D. Caroli Foresti a septem circiter diebus febricitaret, illique Cl. Auctoris Nepos Medicinam faceret; mihi constitit ex inspectione fortuitâ Adversariorum Pharmacopœi, dum scilicet meæ cujusdam Schedulæ rationem quærerem, hujusmodi Ægrotanti præscriptam fuisse sub die 16. Julii labentis anni 1715. a memorato curante Viro unciam unam Chinæ Chinæ in vino infusam, & immediatè postridie drachmas tres ejusdem medicaminis in formâ boli; quæ dosis postrema quater renovata fuit in morbi decursu: atque ita unciis duabus, & semis Chinæ Chinæ largâ satis manu, etiam supra morem meum, administratæ, convaluit Æger. Magis adhuc recens Exemplum nuperrimè sum intuitus apud Aulicum Pharmacopolam in Tabulâ Scedularum Medicarum, pro R.R. P.P. Capuccinis ab ipso pariter conscriptarum; ibi enim, sub die 30. Julii proximè elapsi, primò semunciam Chinæ Chinæ descriptam vidi, dein (& quidem immediatè post) unciam unam, quæ subinde fuit pluries repetita. Subsequentibus postmodum mensibus eâdem proportionem rem processisse, admonent Schedulæ peculiare: ut omittam, quæ insuper ex Amicorum, & Pharmacopæorum relatu hac occasione mihi certò innotuere de crebrâ, & liberali oblatione ejusdem Febrifugi, quæ hodie citra ullam hæsitantiam, aut frugalitatem in usu est eidem Cl. Auctoris Nepoti. An ergo censendus ille dosim parciolem, majori urgente periculo aliis usitatam, abusus nomine apud Patrum traduxisse? Saltem si ante biennium, cum nondum Collega noster evaserat, tam sinistrè opinabatur; eo exacto, meliùsque perspectâ utilitate remedii, in meliorem quoquè sententiam, prout hominem ingenuum decebat, tandem devénit. Quod illi quidem gloriosum planè, & ad delendas admissi olim præjudicii notas abundè sufficiens.

Quòd si nimis officiosæ, adeòque affectatæ cuipiam videantur piæ istius-

istiusmodi erga Defunctum Virum , & erga Superstitem meditationes meæ , ut affectatæ viſæ ſunt mihi proteſtationes illius in principio huius Paragraphi , eaſque idcirco ingenuitati meæ minùs cohærentes putet; is , ne candori meo quicquam detrahat , poſthabitis quibuſcunque meis , aut ſemotis , quæ præſtare ſum conatus , officiis; expenſis verò æquâ utrinque lance totius Cauſæ momentis; prout illi videbitur concedens , de Cl. Auctore , de me , ac de integrâ tandem controverſiâ noſtrâ iudicium ferat.

§. 50.

Alterum quaſitum , num ſcilicet ſalubre foret pertentare Corticis Peruviani uſum ad prophylaxim , paucis abſolvam . Suppono Te pro remedio prophylactico non intelligere huius remedii uſum , proſtigata febre , ne amplius redeat , licet enim à Medicis in hoc ſenſu communiter accipiatur , proprius tamen non eſt illius ſenſus , nam ut Joannes Gorraeus in ſuis Definitionibus medicis , nomine prophylaxeos intelligendum eſt remedium illud , quod potius operetur ne morbus aliquis accedat , quàm quod jam proſtigatus redeat , ſed hoc multo ante ſcripſerat Galenus in Commento Aphoriſmi 22. Sectionis ſecundæ , puto igitur ſecundum rationem licere experiri Febrifugum Peruvianum , ſed modica doſi ad aliquod tempus quolibet mane , antequam febrium periodicarum , & continuarum quoque per æſtatem , & autumnum ingruat tempeſtas , nam ex Hippocrate , *Quæ facta tollunt , ante facta fieri prohibent* , quem locum primo adſpectu obſcuriorem egregie exponit Valleſius , purgationes , Venæ ſectiones , ſolita morborum remedia antefacta , ut primo vere , fieri prohibent morbos æſtate , & autumnus . *Quibus convenit Venæ ſectio , vel purgatio , hos Vere purgare , vel Venam ſecare oportet* , ajebat Hippocrates Aphoriſmo 47. 6. Sectionis , in cujus Aphoriſmi expoſitione ajebat Galenus ſe hiſce remediis multos præſervaviſſe graviffimis morbis per autumnum laborare ſolitos ;
hujus

hujus tamen remedii ad prophylaxim usum, si quis velit experiri, exhibendum existimo in iis, qui commodo fruuntur sanitatis statu, nam si quid noxii Chinæ insit, convenienti corporis exercitio facile excutient. At forsan consilium magis sanum erit remedium istud, natura sua dolosum omittere, nam ex Celsi monitu *cavendum ne in secunda valetudine adversa presidia consumantur*. Vale.

Dabam Patavii die 20 Julii 1714.

(*Alterum Quæsitum &c.*) **M**ibi istic nec feritur, nec metitur, aje-
bat apud Plautum Epidicus. Sed ne-
que hic forsitan metet Nepos ipse Viri Cl., aut alius quispiam. Non metam ego, qui nomine *Prophylaxeos* usus sum in Opere meo, intelligendo præcautionem a novo quoque morbi præteriti, sed facile recurrentis insultu; sive proprius hic sit vocis illius sensus, sive communiter adoptatus etiam ut talis. Nihil inquam emolumenti hinc referam, omnium ferè Medicinæ Scriptorum vestigia secutus, & posthac pariter secuturus; hi enim de inhibendo Asthmatis, Epilepsiæ, aut alterius Morbi intervallati recurso locuti, hujusmodi verbum perpetuò usurpavere. Me tamen usque magis firmabit in posterum exemplum ipsum Cl. Auctoris, in hac ipsâ Dissertatione vocem *Prophylaxeos* sub eâdem significatione *bis* usurpantis, nempe nuperrimè §. 48. circa medium, & §. 12. circa finem. Sic & in minimis sibi adversatur, miliumque torno inaniter sculpsit Vir cæteroqui doctissimus. Denique nec metet, aut manipulos colliget Nepos ipse Viri Cl., aut quispiam alius, ob dogmatis incertitudinem, ubi hæc ipsius verba perpendat -- *Puto igitur, secundum rationem licere experiri Febrifugum Peruvianum quolibet mane* (nota hic facilem citra exigentiam repetitionem remedii *malitiam occultam* habentis, & ex §. 48. *alterâ die ad prophylaxim minimè repetendi*) *quolibet, inquam, mane, modicâ dosi, ad aliquod tempus &c.* & paulò post perpendat hæc alia verba, *palinodiam de more canentia*, -- *At forsan consilium magis sanum erit, Remedium istud naturâ suâ dolosum omittere*. -- Hæc ille. *Remedia tamen naturâ suâ dolosa*, qualem contumeliosè vocat Chinam Chinam Vir Cl. ad extrema redactus suæ Antifebrifugæ Dissertationis, nusquam legitur in Genesi, Deum, qui Medicinam condidit, unquam creasse.

Hæc habe mi Lector pro responsione ad objecta Cl. Ramazzini, cujus animadversiones, quantumvis futes, tacitè negligendas minimè credidi; non me quidem perturbante Scripto, acriore licèt, Viri, qui in vivis non est; sed solâ, ut inquit ipse, *provocante materiâ*. Non alia tamen hujus ingenii ex me fortasse posthac habiturus est quispiam, si vel dilaceretur a Cynicis Opus meum, aut aliquam similitatem foventibus. Cum enim nullum amplius ex illius propugnatione commodum Reipublicæ queat emergere; ipse verò nihili faciam labores meos,
nisi

nisi quatenus cessuri sint in bonum ejusdem Reipublicæ; non est, quod in posterum commovear tam facile, animo potius pacato deinceps laturus

————— *rhonchos, & ludibria turbæ*

Nasutæ, & quicquid fingere livor amat.

Id unum vix potis esset animi fortasse mei firmitatem nonnihil inflectere; si nempe utiliore, atque potissimam Tractatus partem, Methodum videlicet Specialem curandi Perniciosas Febres a Mercato descriptas (quæ summa Operis est) quisquam arte clarus refutandam susciperet. Sed quis unquam, qui artem calleat, nudam observationem meam, non ratiociniis suapte naturâ fallacibus, sed constanti innixam experimento, ubi præsertim nullum aliud pro *Curatione* pereuntis hominis planè *coactâ*, sed nihilominus planè tutâ prostat auxilium, aggrediatur refellere? Et quandocunque id etiam contingeret, quâ necessitate cogente aggrederer ipse, observationem, & experientiam meam argumentis, rationibusve tueri, aut auctoritatibus etiam fulcire, cum satis ea semetipsam tueatur, & fulciat? Cætera ejusdem Tractatus, utut non prorsus inania, cuilibet tamen Sophistæ pro arbitrio ventilanda tacitus, & lubens relinquo. Solo diuivis vivente, & novissima Scripta sua pro eximio, quo pollebat, ingenii acumine, etiamnum defenditare volente Cl. Ramazzino, potuisset perennare lis nostra: tunc enim publicæ utilitati, quæ stimulos addidisset, accessisset quoque voluptas mea, ab amœnitate styli resultans Eruditissimi Antagonistæ; cujus aculeos, suo semper melle conspersos, pluries experiri, mihi haud injucundum fuisset; & cui propterea minimè hæsitaissem aptare, quod Joannes Franciscus Picus *De Imitatione* disputans cum Petro Bembo, scriptum reliquit; videlicet -- *Tantum suavis acrimoniæ præseferunt illi ipsi aculei, tantumque me Viri Clarissimi simul & pupugit, & oblectavit oratio; ut iterum pungi cupiam, quo possim iterum oblectari.* Istiusmodi conditione semotâ, præstat filere.

Hucusque igitur per me satis actum in hac materiâ; forsan & nimis: neque idcirco lubet amplius per eandem lineam Serram reciprocare. Etsi verò quæ Stylo Apologetico hætenus reponenda censui, ferme invitus, quippe coactus, & laceffitius addiderim; nihilominus haud planè inutiliter tempus me trivisse rebor, si vel ex Disceptatione hujusmodi, vel ex Therapeutice ipsâ jampridem editâ nonnemo forsan pro exitialium saltem Febrium, de quibus præcipue sermo est, curatione rectius instituendâ, quicquam profecerit; et si per quem profecerit etiam dissimulet: vel si quis alius, me viam præmonstrante, hanc mox arenam ingressus, sed materiam felicius *exhauriens*, præcipuam exinde sibi comparet famam: vel denique si paucis malè feriatis invisus, bene merear tandem de pluribus, & bene cordatis. Adeoque, ut Doctissimi Willisii verbis utar, ex Pharmaceut. Rational. Præfat. ad Lect. de promptis, - *Si leves hi conatus alios ad Studium istud melius excolendum instigarint, quicquid ab invidis, ac malevolis opprobrii metiar (metam potius, vel patiar legendum puto) operæ me meæ neutiquam pœnitebit.*



Dup
adu. du
8
CAROLI IACOBI *m.*

FILII GVILLEMEL,

EX-ORDINARIO PRIMARIOQVE

REGIS MEDICO, DOCTORIS PARISIENSIS,

DEFENSIO ALTERA,

ADVERSVS IMPIAS, IMPV-

ras, & Impudentes tum in se, tum in Principem

Medicinæ Scholam Parisiensem, Anonymi

Copree calumnias ac contumelias.



Oteram meo iure præscribere necessa-
riæ confutationi propudiosæ ac spur-
cissimæ barbariæ tuæ verissima elogia
hæc, Canis Meiuri, fuste plexi, Curti
iam, non Curtandi, Ægri veteris som-
nia, Atra bilis, Phrenitis, Mania, Lyta, Aponoia,
Aгноia, Anoia, Paranoia, Paroinia, Apoborbor-
sis, Apocoprōsis, Apopyōsis: essent hæc tibi & sex-
centa id genus de te tam vera, tam certa, quàm te
tuisque probris digna, pro tua illa infanda & impia
(Lenonis horreo dicere) *Apotheosis*: nisi lenitate &

misericordia aduersus maledicam petulātiā, cando-
re infito & animi æquitate aduersus teterrimum liuo-
rem ac desperationem certare propositum haberem.
Nec aliud tibi pro spurcissimis conuiciis reddidissem,
quàm vnum id verbum, quo Menecratis illius insa-
niam, qui Iouem se literis ad ipsum præscripserat, Rex
Sapientissimus Agesilaus denotauit. Ag. Menecrati
Υγιαίνειν, hoc est sanitatem, seu bonam mentem,
quam ego tibi, Christiano animo imprecor.

Sed vt priorem Defensionem meam quam nec tu,
nec mortalium quisquam mouere, nedum coargue-
re potest, veritas ipsa, & bene sibi conscia mens ex-
pressit, amici exegerunt, Tua, Curte, mala mens, acer-
bitas, importunitasque extorsit: ita hic parebitur à
me non iustissimo dolori, sed necessitati, vt omnes
intelligent, bis prouocatum, bis teterrimis ac indi-
gnissimis calumniis ac contumeliis impetutum, se-
mel, sed quod in perpetuum quæcumque in me ve-
nena deuomeres, satis esset, respondisse, contulisse
in historiam, & meam quæ mihi pro theatro est, &
grauium illustriumq; virorum conscientiam, eorum
quæ te, quæ Auunculum tuum attinerent, quæ reti-
cere non potui, non debui, nisi perfidiosi, prodito-
ris, ingrati, parricidæ, nomina agnoscerem, quæ
omnia suâ sponte in vestrum caput, & certissimum
dedecus reciderunt. Nunc tertium à te immundissi-
ma colluie aspersus, non remaledicam: quod si
ciuile fasque Octauianus Cæsar pronunciauit, at
non faciet Christianus, nedum quietis ac modestis,

Defensio Altera.

omni ut tu pulsa verecundia, maledicet. Sic tecum
agam, ut cum acerbissimo aduersario, ipse nec infe-
stus, nec infensus: & agam teste illo, cui nihil tectum
esse potest æternæ iustitiæ Oculo, veri & certi iudi-
cem, falsi vindicem habiturus. Parcam inimico, ut
fratri: senem admonebo senex: pudoris, modi, ac
modestiae oblitum castigabo, non ut bis puerum, sed
errantem, in viam, si quid potest medicina consilij,
reuocabo: recti, honesti, officiique commonefa-
ciam: ostendam tibi te, ut speculum non fallax, id quod
amicus est: ex illa colluione propudiosæ calumniæ
eruam extrahamque: putorem, pus, ac venenum,
quæ commentationis tuæ nomina sunt, medicabor.
Itaque non vestigia tua sed volutabra persequar, sa-
tis munitus aduersus tetriratem odoris foetidissimi
quem sentina illa exhalat; iam olim dum in Parisiensi
Nosocomio adolescens *miseris succurrere disco*, præ-
munire me necesse habui aduersus corruptissimi
aëris graueolentiam, & nunc obfirmaui stomachum,
id est animum meum, aduersus venenatam purulen-
tiam vomicae illius quæ in scripti tui probrum erupit.
Ea vero prima se statim fronte prodit, & quàm impu-
ra, quàm detestanda est, tam impudenter profilit.
Quis enim vel InCommodus, vel Alæagabalus, quod
aliud turpitudinum Monstrum, Lenonis vnquam A-
pothecæ sin commentus est, aut nominare ausus? Vi-
lem profectò, imò detestandam & execrabilem apud
te esse oportet honestatem omnem, castimoniam,
sanctitatem, qui Lenones (honorem præfamur) con-

secres? perditius omnino quàm olim Athenienses qui Contumeliæ Fanum & Impudentiæ fecerunt, quam impudicis saltationibus, probrosis schematis, nocturnorum sacrorum inuerecundia, lasciuiæque, sui Baptæ concelebrarent: Hos inter tu cordacem saltares, & restim duceres Archibapta, qui sic pudorem ac verecundiam eiuraris Medicus, decoxeris senex, vt nullis non te probris vltro contamines, dum te digna in nos maledicta congeras, nec pensi habeas quidquã vt de infami cœno conuiciorum, in quibus toto corpore volutaris, ornatissimum Ordinem, Hominem cãdidissimum, quem tibi tot repetitis toties maledictis inimicum sumpisti, petulantissimè perfundas. Quàm enim scelestè ipsum horrendo illo nomine appellare audes? nec enim iusti Numinis vindictam, nec legum à me pœnam metuis, tam impudenter illum Empirico Methodicum; Est enim re ac veritate Empiricus, ea nempe experientia peritiaque, quam ratio peperit, diligens ac perspicax obseruatio comperit, vsus confirmavit, Ars & scientia conformavit: quam Medicinæ pedem seu crus alterum aptissimè Galenus appellat, sinistrum nempe, dextrum speculationem ac scientiam, vnde teste Aristotele motus ac progressionis initium fit. Quibus vtrisque Adiutrix humani generis Medicina insistit; Methodicum vero, at non ea de Hæresi quam grauissimis verbis indicto bello & instructa acie disertissimus idem & copiosissimus Galenus profligat: sed Methodicum, quod procedat via, ratione, consilio, iudicioque ad opem hominibus feren-

ferendam, eā videlicet methodo, quam summus ille ipse artifex, perfectissimis ac veluti ex ipsius Hygeiæ scrinio promptis voluminibus XIV. tradidit ac perscripsit: hæc Empiria nostra, hæc methodus, hoc dogma est. Quod æmulari, ac sequi, quod tenere antistite M. Hippocrate, Galeno duce, qui diligenti studio & fideli opera nituntur, bene illi sibi, bene medicæ fidei ac religioni, optimè verò ei, cui se natos sentiunt, humanæ societati consulunt. Qui à regia & consulari via illa delirant, in errorem & ipsi abeunt, & vitas hominum in interitum præcipitant. Quod ego scelus numquam ego Collegio qualicumque vestro utcumque de nobis merito tribuam, etsi nimis heu, nimis multi eius nomine ac autoramento quasi ad gladium emtæ operæ illæ, experimenta per necesse patrant, dum venenum istud indomabile, Stibium inquam, publico exitio venditant, ostentant, propinant, ut, dum improbi cupiditati suæ, incauti & imprudentes errori suo subscribunt, sana, sincera, & casta medicina, sacrum iam bellum contractum habeat aduersus terrestres illos Peiratas: qui, ut est seculi inertia, & prosperum ac felix Scelus, Ars, Virtus, & Sapientia vocatur, quàm impudenter tam impune grassantur.

Non igitur in illa dicendi necessitate mea, in qua res perspectissimas de te, tuoque Auunculo dici oportuit, quidquam à me in Scholam Monspeliensem inclementer dictum est, tametsi calumniarum tuarum culpam non-nullam sustineret, quæ te bac-

chantem furentemque non cohibuisset: curigitur in ea mihi sic temperaui? Quia perculsi, attoniti, & infan- cerebri esse duco, aut proiectę cuiusdam impuden- tię, in vllam gentem nationemue, multò verò minus in veterem ac olim laudatum confessum honestissi- mę professionis; cum semper aliquam multi, aut ali- quot, aut vnus certe aliquis, publicum probrum vir- tute sua redimat, excipiatque aduersus publicam ac- cusationem. Ego vero Medicorum Collegium Mons- peliense, numquam inuerecundę nominem, ex quo sciam insignes ab arte viros extitisse, nec defuturos spero; si moribus potius antiquis, quibus vt & viris stetit, Romana res, quàm nuperis hisce vtantur, si maiorum nostrorum exemplo, vt & nostro, Arabum fæces expurget, Græcorum inuenta, præceptaque ab illis vt plagiariis ac interpolatoribus repetat, vindi- cetque, suis iisque optimis & antiquissimis autori- bus accepta referat, si certissimum deleterium, Sti- bium, humanitatis & religionis memor, tanta certe humani generis pernicię ac interitu edoctum dam- net, pio & orthodoxo anathemate feriat, ad metalli- cas operas vnde natum, quibus accommodum est, sempiterno exilio amander: hoc ego vobis, hoc no- mini Medico vniuerso, ea mente opto & ominor, quā bonis artibus cæteris atque huic in primis salubritati scientiæ iugem sapientiam, & lumen veritatis in dies illustrius apprecor. Sed quid ille synastrismos, si- gnumue stellarum aliquot insignium ad hoc cælum Scholæ Medicinæ Parisiensis, quæ ex quo nata est

Defensio Altera.

7

nonum sine controuersia sæculum agit, Principis ac Reginae urbis authoritatem non minuit, sed amplificauit, dum cum ea crescit augeturque, & Orbi Christiano tot benigna, tot salutaria sidera, perpetua circumactione, ac perenni succedendi vice protulit, profert, & annuente salute proferet ostendetque. Etenim ubi optimæ lex disciplinæ vigeat, ibi suus virtuti honos, ibi optimis artibus sua dignitas constet necesse est, ut quàm excelso exaggeratoque carmine, qua sublimitate spiritus Italiam suam vates maximus salutauit, ea mihi bonis doctisque probantibus & plaudentibus appellanda sit,

Salue magna parens Hygiea,

Magna Virum: tibi res antiquæ laudis & artis,

Ingredior, sacros ausus recludere fontes.

Vnde purioris Medicinæ vis ac potestas in hominum vitam salutemque prodiit. Quos ego fontes paucis abhinc annis publicâ præfixione Thesaurum pro viribus aperire contendi.

Hæc, genus acre virum

Extulit, hæc Marios, Decios, magnosque Camillos.

Imò opiferos & humani generis adiutores conseruatoresque eiusmodi, quos verus ac sapiens æstimator Romanis istis facile anteponat, quibus sua inhumana laus, sui triumphus, tantâ clade humanitatis constiterunt, nostrorum decus cum hominum salute coniunctum sit, & verè ἀδανύμην triumphare possent, non illâ Græcorum sine lacrymis victoriâ, cum ab altera parte tam multi cecidissent, & plures deflerent.

Nostrorum autem maximi qui Stibij virulentiam violentiamq; maximè detestatur. Paucos è veteribus nominabo, quasi si vobis clarissimos Septentriones, aut cæleste veluti vexillum id Pleiadas, aut clarum Orionis ensẽ cælum intuens, intento digito præmonstrem, quorum vtpote benigniorum siderum luce doctrinæ collustrari malim, quàm fulgore imbecillam istam aciem præstingui. Nam vel cælum aspexistis numquam, aut nomine profecto vobis ignoti non sunt, Ruellij, Akakiæ, Goupyli, Guinterij, Syluij, Fernelij, Hollerij, Dureti, Gorraei, Pietraei, Riolani. Ad quæ sidera si caligas, si offunderis, si cæcutis, & vt Lunam cum purissima micat orbe pleno, ceu Lupos & Canes aiunt, allatras, ad tantum splendorem exululas, & caninæ id sit imbecillitatis & inuidentiæ, lupinæ autem malignitatis, at nihilo ipsa minus prænit, præfulgetque, nec candidissimi luminis detrimentum sentit. Tui me interea miseret, qui infirmo & Lunæ obnoxio oblæsoque cerebello speciem illam pulcherrimam, lucemque animanti & vitali naturæ omni, adeoque vel inanimæ ipsi amicissimam, ferre, spectare sine noxa & vlulatu, ea est naturæ infelicitas, non possis. At pergit hæc Magistra inquam, & Regina Scholarum, Medicina Parisiensis, statuta lege, cursuque indeflexo, nec vllis vñquam decrementis senescit, quæ Solem suum, æternam sapientiam, Hippocrateæ ac Galenicæ mentis, vt & bonarum mentium omnium illuminatricem semper aduersa spectet, ei litet pura, pia, solenni prece, Maiorum lege se, more,

re,

re, ac disciplina contineat: ad sua sacra nisi multiplici, graui, seuero, ac religioso examine tentatum probatumque admittat neminem: ambitioni, gratiæ, potentiæ nihil relinquat loci: decus ac decorum, quæ videlicet ex interiore illo fonte recti ac honesti bona mente, promanant, etiam in exteriori habitu, veste ornatuque contineat. Nam & hanc quoque, vt Medicam *Ἀσχημοσύνην* cunctam, ad suam curam ita pertinere magister duxit Hippocrates, vt eam præscripserit: omnem autem *ἀσχημοσύνην* singularis censor grauißimis verbis castigarit. Atque vt Spartam illam vetus historia memorat, quamdiu Lycurgi legibus se tenuerit, tamdiu viguisse, vicisse, Principem Græciæ floruisse: sic hæc constantiâ disciplinæ morisque Maiorum Schola hæc (tantum boni perpetuum esse iube Parens & autor Deus) Schola in quâ Parisiens antiquissimæ laudi suæ, tot sæculorum gloriæ succrescit succeditque, victrix temporum, victrix corruptelarum euerßi sæculi, nouis semper auctibus recens, cui, vt Spartæ illi pro muro ciuium virtus, sic veteris normæ obseruantia sit. Inde illa in Philosophematis seu publicis actibus celebritas, hinc disputandi acumen, & solertia respondendi, hinc acris & incitata iuuenum industria, quæ ne ætate quidem, ex necessitate nimirum officij, ac perpetuitate obeundi muneris, relanguescit. Et cum Senatorem vltra LX. annum, militem præter emerita stipendia, Lex non cogat: ne senibus quidem, vt neque Romanis in Gallico tumultu, vacatio est: æquant cum vitæ spatio curri-

culum industriæ, & illa fit aquilæ (vt prouerbum est) senectû. Canitiem, aiunt, galea premimus. Quod vt in illis vigorem ingenij perferuat, sic in iuuenibus incitat acuitque; Hinc doctrinæ melioris illa perennitas, hinc iudicij maturitas, hinc prænoscenti, præfagienti, prædiscendi Lyncea quædam perspicacitas: ut ex vberi solo veramœnum, diues æstas, & felix autumnus exuberat. Vnde mirum nemini sit, reiectitiis & repulsis ab ea, si dolet intimè: nam præterquam quod væ victis, & victi tristes: ab eiusmodi censura se notatos, expunctos, eiectiones sentiunt, cuius cum perspecta integritas, tum ex magnitudine scientiæ autoritas, non præiudicium modò, sed iudicium sit indignitatis ipsorum & vitij eiusmodi, quod à sacris olim arcebat exclusos: iidem vt deinceps habeantur deteriores, qui repulsi: nisi quem fortassis ignominia sua ita exacerit, vt secundis melioribus, & quasi succidaneâ victimâ litet, qui minùs purè casteque ad tantam Medicorum sacrorum Religionem adierat. Vt stomachari, angere, ringique definatis, si, quæ humani ingenij natura est, maiora semper ac meliora vt appetat, (*tendit in ardua virtus*) egregij quique vestris in Nemæis, Pentathlo, Quinquertione victores, ad hæc Olympia nomen athletæ noui profiteantur, & partam apud vos Doctoris lauream, Scholæ Parisiensis, vt Romani olim triumphatores Iouis sui Capitolini, pedibus subiiciant, recudendos ei se, ac refingendos Lytas Magistrosque summittant: supremum quippe istic gradum, infimo Primi huius inferiorem

rectè putant, eoque se demittunt, ad supremum, legitimi certaminis gradibus prouehendi. Quod nunc iam, cum maxime hæc, inter molestissimi rheumatis incommodum dictare me adigis, eximia cum laude præstat, Clarissimi Regiique Medici, illustri ingenio, summa elegantia doctrinæ, morum suauitate, vitæ dignitate Viri, tanto dignus Patre filius. Nec Scholæ vestræ decus minuit, dum huius, maius videlicet ampliusque agnoscit. Nec ullam sibi, aut Ordini pristino suo iniuriam facit; qui de plebei partibus eques, ex equite Senator à Censoribus conscribi legique studet. Quò enim vocat honos, eò se studia incitant. Euphòis nemo non idem velit, qui modò possit. Istic consistit, quem huc ascendere, vel fortunæ, vel ingenij culpa vetuit: vt aiunt in Græcis artificibus, aulædos esse, qui citharædi fieri non potuerint. Nec sanum quenquam & animosum deterret ille à vertice ad imum descensus ac regradatio; nec à peractis stipēdiis pro euocatione tyrocinium, aut ab isto velut in Albano monte simulacro triumphi, reditio ad Medicū Senatum, & veri ac iusti triumphi ex iusto bello postulatio. Quis enim non *maioribus ire per altum Auspiciis, si qua via sit* præoptet, accenseri melioribus, & eius ad quam aspirauerit laudis culmen contingere? Ita se Scholæ huic arrogandum cooptandumue dare Iacobus ille Syluius, tanta vir celebritate famæ, tanta docendi facultate, dicendique copia, tam egregius inter Regios Professor, gloriæ sibi duxit: Cardanus ambiit, per pauci adepti sunt, nisi qui per legitimæ mili-

tiæ annos meritam & honorificam demum missio-
nem impetrarunt. Ferre solem non potest, qui non
ab vmbra illa & puluere in meram hanc veramque lu-
cem prodire gestiat, non ad huius Ordinis dignitatem
omni studio, omni & animi & industriæ nisu conten-
dat. Et maxima quæque ingenia allicit inuitatque, non
is modò qui hunc Ordinem circumfulget honestatis
splendor & dignitas, sed & ipsa quæ degeneres ab-
sterret difficultas. *Non iuuat è facili lecta corona iugo.* Do-
ctis, delectis, eximiis allegi, adscribi, annumerari stu-
dent. Eò & suas ipsi laudatas artes conferunt, & in
publicæ laudis communionem veniunt. *Ad sacra va-
rum carmen afferunt suum.* Sic planè vt ad lautum & dap-
file conuiuium symbolam quisque confert, ad trium-
phales eas epulas, nemo nisi albatus ornatusque ac-
cumbit. Quæ porro illa pignora, quæue symbolæ?
multiuga eruditio, mores emendati, existimatio
integra & à labe immunis, vtriusque linguæ, vtriusque
sermonis non vulgaris notitia, Hippocratis in primis
& Galeni assiduus & familiaris vsus, ac memoriter me-
mor intelligentia: meliorum artium scientia, præ-
clarissimæ quæque animi dotes: Mathematica ex Pla-
tonis ac Galeni præscripto, subtilitas: Philosophiæ
vniuersa cognitio, Medicorum Theorematum præ-
ceptorumque exquisita & ad vnguem exacta per-
ceptio. Aphorismorum, sententiarum, decretorum-
que quibus Ars continetur, perfecta complexio.
Quibus se ornamentis omnibus, qui non diu, totum-
que excoluerit, frustra huius aditum Musei exam-
biat

biat. Centum possim & amplius, qui prisca & maiorum gentium senatus modus fuit, Doctores nominatim & honoris causâ omnes appellare, quorum nemo est, qui non grauissimæ alicui ciuitati, & præsidio & ornamento esse possit. Cum confessus hic, non quidem Regum, & si medentes, *μέδοντες* sunt, vt de populi Romani publico consilio Thessalus prædica-
bat Cineas, sed totidem Senatorum faciem gerat. Quibus de singulis tacere, vt ille de Carthagine, quàm pauca loqui præstat. Et Scholæ, hoc est honoratæ Parentis, ac Patriæ melioris gloriâ contenti, suam ipsi, vt maior Africanus patri contradere, quam coniunctissimam vim laudum in partes deducere ac distrahere malunt. Nec hodieque deficit eorum virorum, si minus copia, at delectus certè, vt in castris principia sunt, qui post honestissimam complurium annorum, perficiendis perdocendisque melioribus disciplinis impensam operam, emeritum robur, & triariorum firmitatem, ad huius militiæ tyrocinium pertulerunt. Quod institutum, maioribus nostris ita statum ac solemne fuit, nulli vt ad superiorem, quam vocant, facultatem aspirare fas esset, qui non ingenuarum Artium, totiusque adeo Philosophiæ Orbem docēdo percucurrisset. Quod dum ita diligenter Sorbonicorum PP. religio conseruat; & veteris obseruantia nos, & maiorum moris admonet. Qui vtinam retrahatur potius quàm è manibus excidat, neue hac veluti parte Spartanum regnum, quod oraculo vetabatur, claudicet. Sed & illum imprimis non ab vlti-

ma tantum & Hippocratea medicinæ origine, verum & à vetere Parisiensis Scholæ norma atque lege probatissimum morem postliminio reuersum velim, vnumquemque vt Magistrum Doctoremue Medicum, Duo certe discipuli affectentur, ab ejus latere vix discedant, hunc deducant, hunc prosequantur, huius omnibus inspectionibus intersint, ægri & morbi bona malaue prætentent omnia, præjudicentque, ipsius mox judicio approbandi corrigendiue: vtque sic dixerim mederi in medendo discant, vnde parens ille sapientiæ vsus, vnde constantia judicij, & magnæ Artis firma scientia, iuuenibus statim, non lente per pericula, & ancipitia experimenta contingat, in media medicina, medicinæ studentibus, & facientibus eam, non meditantibus. Hinc enim illa Studij Parisiensis Vniuersi, hinc singularum Facultatum decora effulserunt. Quæ vel illustriora in dies, cum rediuiua illa, seuera sanctaque maiorum disciplina reuiuifcent.

Et hoc tantæ dignitatis, doctrinæ, sapientiæ Collegium, inuentus tamen est omnium dedecorum probro coopertus, omnium criminum conscientiam constrictus, qui non modo eiurare, à quo se damnatum sciat, sed indignissimis contumeliis violare auderet, sua, in Scholam Medicorum Parisiensem, quod summæ honorificentiae nomen est, improbitatis, fatuitatis, furiosus ac demens, infanda abomina congereret. Prorsus vt si quis ex spurcissima fæce Peloborus, sacram pompam deducentes, ac thensas, & fer-

cula prosequentes, de suo in quo volutatur cœno conspergat: quem suo illo in vnguento mergendum protinus & suffocandum omnes clament: nemo tamen eò se demittat, lutum vt luto respergat, nemo se inquinet lutuletue, vt cœno regerat cœnum, aut in putorem luti lutum refundat, cum horrore ac nausea omnes aufugiant, subtrahantque nares, oculos, se totos, illi spurcitæ, quam teterimus carnifex non commoueat modò ad prætereuntium molestiam, sed ad iniuriam & contumeliam, effundategerat: quò fœdior, tetrior, inquinatioque ipse, eo turrior ac securior, qui sciat sanum & honestum neminem, in lutum luto decernere. Sic Camarinam, sic Mephitim qui norunt, exhorrescunt, nec adeunt: qui è longinquo sentiunt, refugiunt, imò ac detestantur. *Talis se se halitus atris faucibus effundens. spurco nares contingit odore:* sæuamque exhalat opaca Mephitim, illa tenebricosæ & atrabile percitæ vecordiæ, illa somniandi ac delirandi obscuritas, quæ non modo fumos exhalat inertes, sed & atram prorumpit ad æthera nubem, Turbine fumantem piceo. Quæ de nocturna lymphatione tua, de tuis, non vt Carentis illius, sed vt carentis mente Cronoleri aberrationibus, Poëtæ verbis, haud rudes nec indocti adolescentes inter condiscipulos, vt deinde narrabitur, recinebant. Antrum est Caci, aiebant, stabat acuta filex, ea erat & styli & ingenij vestri durities, præcis vndique saxi. Quid enim nisi lapides loqueris? Speluncæ dorso insurgens, ea est saxea tua, ve-

lut informium saxorum congeries. Dirarum nidis
domus opportuna volucrum: striges, noctuas, bu-
bones, vlulas, barbarismorum, soloecismorum, ab-
furditatum, stultitiarum, stoliditatis omnis, ac vesa-
niæ portenta interpretabantur. Ergo insperata de-
prensus in luce repente, Inclusumque cauo saxo
Cacum te Κακιστον vocabant, atque insueta ruden-
tem: non quô aliud quàm rudas, aut latres, aut vlules,
sed quod solito immaniùs. Desuper Alcides telis pre-
mit, Hercules Alexicacos portentorum domitor, cui
tu nouus labor accessisses? Ille autem, tu anonyme
lucifuga, inquiebant, neque enim fuga iam super
vlla periculi est, in Herculem incidisti. *Faucibus in-
gentem fumum*, ij sunt spurcissimi ganei tui teter-
rimi vapores, halitus, fœtores, Euomit, vt tu vinolen-
tiam virulentiamque Cotyttiorum tuorum: *inuoluit-
que domum caligine cecâ*, quæ tenebricosissimi non
scripti sed somnij tui picea nox est, vt te nec videas
ipse, quis enim demens intelligit? nec te videre quis-
quam possit. *Prospectum eripiens oculis*, glomeratque sub
antro, *Fumiferam noctem*, commistis igne tenebris, ignem
vocabant inflammatum furorem maledictorum tuo-
rum: tenebras, ἀσυντάκτως barbaræ incontextæ lo-
quacitatis amentiam. *Non tulit Alcides animis*, fortis
& monstrorum hostis expurgatorque aliquis, *se seque
per ignem*, per ardorem violentæ phrenitis tuæ, vt for-
tes interdum medici solent, aut robustos adhibent
qui furiatum efferatumque comprimant, *quâ plurimus
undam, fumus agit, nebulâque ingens specus aestuat atrâ*
quod

quod nullus, scio faceret Hercules, si tam atra Caci
quàm tua, tam tetra, tam dira esset: arceret enim te-
tritas, quem flamma non prohiberet. Nam & Bonasi
proluuie aiunt, & aliarum nouo in orbe bestiarum,
feritate graueolentiæ, non retardari tantùm venato-
res: sed qui acrius propiusque insecuti sint, exanima-
ri; Ita tui te, vt harpyiarum foetores tuentur dum fu-
gant, dum contactu omnia foedant immundo. Cæte-
ras adolescentulorum argutias persequi non vacat,
quibus suus tamen debetur locus, vt verborum fœ-
tores cæteris procul indicent proclamentque vt vi-
tent, emendaturi, si aliud omnia quàm menda &
Chironia vlcera sint. *Namque vnum in toto corpore vulnus*
erat, ait ille: Hi autem festiuâ parodiâ, *Vna erat in toto*
corpore barbaries. Quos illi tibi & aptos & aptè positos
versus omnes, pro tuis aptissimis per se illis quidem,
(Lucretianam inuerecundiam, quam tuam impu-
dentiam fecisti, & infamem quam in nos temulen-
tus, furiosus, inhalas, vernaculam popinam exci-
piunt,) sed ineptissime insultis, sed per vltimum
ausum inscitiae tractis, eò quo nolunt vnde refu-
giunt, abhorrentque remetiuntur; Sed habent illi à te
vnde te largius munerentur, erit hæc interim velut
promulsis in antecessum, aut id quod mauis, fustis
libatio, & si eum tu, aut ille te non leuiter libauit,
sufurrabant dicaculi, qui debilis cerebelli tui tuni-
cas inde illa mentis perturbatio furorque, perua-
serit. At quàm exerte ridebant cùm miurum fu-
stem, miurus ipse obtritufque toties appellas: qui

si miurus factus est cædendo tundendo te, supplebitur non difficile, ac robustior ad manum veniet, qui te, sic illi comminabantur, exartuet exossetque. Ego vero illis mitior, non te feriam, sed inter claustra tenebo, tametsi video indignari, fremere, inclamare omnes qui perfusum à te honestissimum chorum cœtumque non ferunt. Quid cessatur? quin impurus et tractitius iste, ut eius exemplar Heliogabalus in cloacam actutum per suum cœnum raptatur, demergitur? Quibus te exemplis nemo est non tui similis, quin te adiudicet. Ego vero quid tibi imprecer nisi breuem aliquam vsuram sanitatis, ut, si vel punctum temporis ad te redieris, intelligas, quàm te merito ipsa honestas, ipsa verecundia, ipsa humanitas, abominetur, expuat, excretur: ut nihil aliud quam spurcitia & nautea sis, ut in cœnũ te penitus immerferis, cœnum factus sis, qui in tantam honestatem lectissimi ordinis resilieris, in te videlicet, ut furiosi plerique, quàm in quenquam, quàm in ipsum me, cuius odio in sentinam abiisti, seuior, efferatior, immanior, cum te sic omni ex parte fœdaris, effero dente laceraris, dum à tua labe profiliret in eos, quod statim eluerunt, dum in celeberrimum Riolanum, in Merletum sapientissimum, in cœstrum, stimulum & terrorem vestrum Patinum, morsum intentas, quem eluserunt, illidis infringisque, quem suis armis tecti derident illi, tu desperatissima rabie ac furore amens in te vertis infelicissime. Quid enim tibi miselle, aut meo aut Primarię Scholæ nomine

gravius irascar, qui sic in te sæuias furiatusque sis, ut tui nos ea capiat misericordia quæ olim æquissimum Principem, quæ in oculis nostris Regum maximum, & hominum clementissimum, qui cum à furioso propius periculum, quàm metum venisset, curadum eum persanandumque commendauit. Quo utinam in te fungi officio queam. Nihil, ita me salus sospitet, faciam libentius, sed non est ut à puero tandem senescere, sic ubi repueraris, à vitio, & morbo ætatis, ab inualetudine motæ mentis, resanescere non magis, ut rem videmus, & Æsonis fabulam, fabulam pueri vocant, quàm à senio, cuiusquam Medæ artibus repubescere. Ita neque te nostra miseratio, minus miserum facit, nec tua nos vesania, fœditas, & amentia turpiores, itaque nec tibi ut aduersario (absentem lædit cum ebrio qui litigat, quid qui cum furioso insuper ac mente capto?) sed qui ab omni spe derelictus sis, relicto tibi te, iniquis & maleuolis si qui sunt, respondebo. Quis enim sui compos tua cronideliramenta, tua phrenitici somnia & cachinnos: nam & risum miserum illum, phrenitis facit, tua furentis probra, conuicia, maledicta, vel ad rem, vel ad hominem quenquam, ne dum ad me in quem cadere non possunt, pertinere putet? Etenim uerò si quid in te sani esset, quæ de te, de Auunculo tuo nimium verè dicta erant, si refellere, diffiteri, pernegare non posses, id quod profecto & tu, & meretriciæ frontis ac linguæ conuiciator meritorius tuus, frustra audeatis, at colorem aliquem ut deprehensæ

miserae perditæque, ut fures ἐπαυλοφώρῳ oppressi, quæreres, quo res non illustrium summorumque hominum modo, sed & publica superstitis aulae, tot denique viuorum & spirantium ciuium conscientia tenentur; lenire contenderes. Nec enim exoleuit, sed penitus infixum est animis, quis tu auunculo tuo quadrupes, quis illustrissimus ille non heros sed Hero aridus, non Archiatros, sed Aniatros, quoad vixit, fuerit, compertusque sit, Hero inquam Regi aridus cum ex pumice aquam facilius quam ex illo præsens remedium eliceret. Ea omnia quæ de vobis tam certa, tam conuicta, contestataque narrare me sæculo, iterata calumniarum importunitate coegisti, fateris videlicet dum taces, dum præteris, & dissimulas, agnoscis palam; Quid enim est quod vel verbo infitiri, ut verbo criminariis, aut mutire possis? Quod si audeas, en paratam aciem testimoniorum quæ te quæ amentia tuæ populares conficiat, obruatque, Maneant igitur quæ ne moueri, quæ nedum reuelli refelliue possunt, quæcumque de vobis prior nostra defensio perpetuæ historiæ filo pertexuit.

At emortui pudoris, ac prostituta impudentia, aut potius incredibilis cuiusdam furoris ac dementia sunt ista, quæ per vltimam desperationem & rabiem ut collectum ex diuturna intemperie putorem ac pus erupisti. Vinolentum esse me? Quod ideo quia turpe est, quia tuum est, quia falsum ementitumque est, conuiciaris, & familiari mentis perturbatione, temulentus, bacchans, furens, ea tela iacis, quæ attingere
me

me ^{ne} ~~vel~~ leuissime quidem possint. Anni sunt xx. & amplius cum foris nec prandeo, nec cœno, ter id si factum, quotidie factum est, & qui hoc me honore honestant viri, vt genere, fortuna, dignitate spectabiles, ita summâ quam tu ignoras, moderatione ac temperantia, domi meæ libenter vt sint, vident illi & sciunt, vino tantum me ὅσον χρῶσαι, vnde aqua tantillum coloretur, & saporis perparum ducat & coloris, vtj. Quod ὅσον χρῶσαι admonebit cōiuratos stibianiatros, non de stibio vt vetus error fuit, sed de sinapi Dioscoridem posuisse voculas illas, exiguum portiunculam Græco prouerbio significantes, quod vocis, nobis, reiecto repulsoque stibio, meliorum codicum fides representat; sed & μόνον εἶναι me, non quia solus, quod Comicum dictum est, sed quia semel, quod Galeni verbum est, vefci soleam, norunt familiares; Ter ille non amplius super cœnam bibebat Octavianus, & cum se largissime inuitabat, senos sextantes non excedebat; Mihi intraternos, qui semis est sextarius, potus est; id non est sitim quærere, aut vini abusum vitæ præmium putare, hinc non est aut labasse sermone, aut quod minus deceat fecisse dixisseue. Nam & eruditis nec austeris, nec quenquam, si emanent læsuris fabulis & quæ, vt apud Atticum pro Anagnoste sint epulæ condiuntur, hinc, vt ait grauissimus scriptor, apparet quantum quisque Tertull. biberit. Nec in eo dissimile quid à me ac lectissimis conuiuis fit, qui plerique parcius etiam, & affuso leuiter vini veluti colore bibunt. Munditia magis quam

luxus est, nihil quod nares corruget, purum & sine labe salillum, omnia fateor (quippe lautis imprimis ac splendidis) elegantiae quàm sordibus propiora. Quæ te, opinor, hircum vinctum nautea, & infimas sordes tuas ac immunditiem, item vt amaracinum suem offendit. Et, quod miserorum est, vt maleuoli sint atque inuideant bonis, esurie miser, ac effertus fame, gulam mihi, quæ te male torquet obiicis, in quo liuorem amarissimum vt in cæteris amentem impudentiam tuam ipse coarguis, dum è spurcissimo barathro deuomis ea, quæ nihil nisi crapula & heu-locrasia sunt, quæ cum omnibus quibus notus sum, auerfer & abhorream. Foras, canem canem te de triuio, de esquiliis qui adsunt clamant, & fustem, fustem expedire famulos actutum iubent. Et ne mihi cum tetra & putida carne, cum spurcissima animante sermo sit, sanos & sapientes quibus aut vsu vitæ, aut arte jam pridem innotui, summos, medios alloquor, sed disertissimi quot fuerunt, quot erunt, verbis longe commodius quam eloquentis cuiusquam, nedum meis. Atque scitote, iudices, eas cupiditates quæ obiiciuntur Guillemeo, atque hæc studia quibus à puero deditus est, non facile in eodem homine esse posse. Fieri enim non potest, vt animus libidini deditus, vino, amore, desiderio, cupiditate, sæpe nimia copia impeditus, hoc quidquid est quod nos facimus in medendo, non modo agendo, verum etiam cogitando possit sustinere; An vos aliam causam esse vllam putatis, cur in tanta laude, tanta gratia,

tanto honore, tam sint pauci, semperque fuerint, qui
tātā, tam diuinæ Artis peritiā præcellant. Obterendæ
sunt omnes voluptates, relinquenda otia delectatio-
nis, ludus, iocus, conuiuium, sermo est pæne fami-
liarium deferendus. An Guillemus si se isti vitæ de-
disset, Regi, adolescens & aulicæ perspicacitati, artem
& industriam suam sic approbasset? Guillemus si
laborem fugeret, si obstrictus voluptatibus tenere-
tur, illa in acie aulicæ dimicationis, aduersus æmulos,
tot annos honestissime versaretur, pararet amicitias,
bona se existimatione quæ omni pretio antiquior
illi semper fuit, ornaret. Regis sui, Regis hominum
suorumque perspectoris acerrimi, & summi Comita-
tus, aulæ procerum dico, gratia & secundissimis iudi-
ciis, tam prosperè, tam inoffense floruisset, Et Rex
minime ille voluptuarius, & osor licentiæ vehemens
ac perpetuus, foueret, non eijceret, amplecteretur,
non expelleret, probaret, non aspernaretur, quem,
non dico, cœno illi tuo immersum, sed quem illi vi-
tiorum contagio affinem suspicaretur, vt ne tot quo-
rum fama laboraret, extrusos abiectosque comme-
morem. Approbe moratum & emendatum esse oportebat,
qui ej placere posset: & qui vinolentum hali-
tum vt nec auunculi tui animam ferre ~~non~~ posset,
odorem afflatumque vitæ solutioris ac nequitiae fere-
bat, multo minùs. At numquam iis ornamentis, iis
præmiis, & ea nominis honorificentia amplificaret
eum, quem tu per tuam illam colluiem immundis-
simi luti raptare conaris, & tuus qui mihi efflictim &

perdite inuidebat, qui me tam male oderat, quàm
 sincere pieque amare debebat, Auunculus: & is quem
 mea apud Regem Dominum fides & gratia tran-
 quillo esse animo non sinebat, R. per fiduciarios, ne
 dicam emissarios illos suos, non me Regis mei ani-
 mo eius intemperantiæ callidè vafreque ementitâ
 famâ, eliceret, extraheretur. At nullus tentauit, quia
 nulla similitudine veri mentiretur, quia fronti suæ
 inuisam litteram K. calumniaris, inureret, quia se in-
 uidiæ ac maleficij palam conuinceret. Regiam Ne-
 mesin quâ multi eo in ausu conflagrarunt, in suum
 caput merito deuocaret, Sciebat enim eos esse mihi
 modestæ ac legitime vitæ testes, qui per calumniam
 officii nomini meo numquam paterentur, & à spurci-
 tie ac purulentia eiusmodi qualis tua est, qualis tu es,
 non Regum modo, sed sanorum & honestorum om-
 nium aures oculiq; longissimè absunt; Atque vt semel
 gloriemur, cum sepius necesse sit. *Me, primis Urbis
 belli placuisse domique, cum magnis vixisse, inuita fatebi-
 tur usque inuidia, & fragili cupiens illidere dentem,
 Offendet solido, & vt Horatio nostro inheream, Prin-
 cipibus placuisse viris non vltima laus est, abunde multi
 Primi, non vnus aut alter vixerunt, viuunt, quos iis-
 dem quibus ille Mæcenatem verbis affari meo iure
 possim, secundum optimum, & in me benignissime
 semper animatum Dominum Regem meum, Sum-
 mum hoc ego duco, Quod placui tibi qui turpi secernis hone-
 stum, Praclaro natum Patre, vita & pectore puro. Si neque
 auaritiam, neque sordes, aut mala lustra, Obiciet vere quis-*
quam

*quam mihi, purus & insons, Vi me caplaudem, si ui-
uo, & charus amicis, Causa fuit pater his. Ipse mihi
custos incorruptissimus. Vir inquam & doctrina & vir-
tute ornatissimus Iacobus Guillemus, Regum Chi-
rurgi F: Regum Chirurgi nepos, quem virum cum
boni & docti omnes, quem medicina omnis, hono-
ris causa meritissimò nominant, tu postremus ma-
stigia, tu insanus cronos onos contemptim imò
contumeliosè appellare ausus es. At qualem &
quantum opificem? qui Græcis Latinisque literis,
Ramo & insignibus quibusque ducibus, qui philo-
sophiæ cognitione non leuiter imbutus, sed peni-
tissime tinctus, ad Hippocratis & Galeni artes venit
Medicorum filius, quò paterna ipsum & auita laus
vocabat. Nemo enim putet manum tantum & nu-
dum quoddam artificium ad illam Iatricæ, eamque
antiquissimam partem Regios maximè Chirurgos
attulisse, sed cum seueriori lege temporibus illis
viueretur, essetque sæculum vt castigatius disciplina,
ita studiorum liberalitate politius, interioribus li-
teris excultum esse oportebat, qui eum locum at-
que munus tueri cum dignitate posset. Igitur à
meliorum artium studiis, dederat se in còtubernium
Ambrosio illi Paræo, cui morum commoditate ac
dexteritate ingenij sic placuit, vt ei pro filio esset,
cui artis mysteria, sic vt heredi futuro aperiret.
Quod pio gratoque animo profecutus est eo in ope-
re, quod ego supra duas editiones magnis auctibus,
& altero pœne tanto auctius seruo, vsque eo dum*

exsculptæ figuræ sint, quæ præceptorum rationem oculis subiiciant. Is decedens, ut ingentem nobis luctum, matri autem mœrorem insolabilem, ita singularis fidei, eximiæ peritiæ, fidelis ac felicitis operæ publicum, quo domesticum leuaretur, desiderium reliquit: rem autem, Deo gratia, & lautam & recte in primis sancteque partam, quam & mulier fortis mater augendo seruauit, nos, vitio culpaue minorem nec fecimus, nec facturi sumus. Et ut matri etiam sua laus, sua commendatio tanquam à filio pia & necessaria, tanquam ab externo & alieno sincera, certa, veraque constet: peruixit vniuiua ad annum nonagesimum suum, matronalis boni & decori totius, ac vitæ melioris prænunciæ *εὐφραδίας* compos. Cujus sanctimonix ac pietati non fucata, tum in egenos benignitati, maximè qui non sponte, nec vitio miseri essent, in temporariam etiam mercedem, diuino munere concessum est, posteritate sua ut viua frueretur à C. & xx. ortis ex se mater consalutaretur: in queis omnibus haberet, ut parcissime loquar, nihil quod accusaret, cum viros amplissimis honoribus præditos, adolescentes optima cum spe, filias neptesque splendidissime nuptas, puellas bonæ magnæque spei destinatas, sui amantes, sui meruentes, ac reuerentes omnes, non sine pia gratulatione ac veneratione autoris Dei videret. Et tu eam, mea scilicet causa, viri sui clienti auunculo tuo supplicasse dicis, quæ ne vitam quidem suam à sceleratissimis latronibus, illis in tenebris Reipublicæ

miseris precibus redimere sustinuisset, quæ nulli mortalium, rei mortalis causa, certo scio, supplex accideret, non se ut suos ve fortunæ riuus inauraret; cuius virilem animum, non maligno quodam errore fortunæ, muliebri corpore inclusum, sed in ea tantum viri, mentis, animi, sensus & iudicii, prudentis cuiusque suffragio, fuisse dicam; ut cum ipsius stirps domusque tam late pateret, latius multo antiqui exempli, priscae grauitatis & Christianæ, sanctimonix fama permanasset, ut optimæ cuique exemplar, sæculo, sexus censura esset. Quæ non metuo ne libentius quam verius commemorasse videar; & paternæ maternæque laudis particulam delibasse, cuius ad nos, Dei virtute non degeneres, hereditas pertineat.

Nunc à meis ad me: non enim ad te, in quo non modo nihil hominis, sed ne sanæ quidem pecudis est, quando vtrumque est necesse, venio. Lenonem, (abominor te, referens ac detestor) furenter, efferratè, rabiosè, vociferaris; Nec mirum, qui mentis tuæ non sis, si quid in te mentis vnquam fuit, qui de laqueo deque saxo tamdiu cogites, vnde falsum testem ipse te præcipitem des; qui constringare, retrahare, reducere à præcipiti exitio, quò te omnes intus receptæ furix agunt, raptantque amentem & cæcum. Nam qui te matris, vxoris, sororis, filix lenonem, nescio quàm verè, quam falsò, sed esto, falso dixerit, veri tamen similis, ut existimant qui me norunt de te dixerit, quàm tu in me furiosè

mentitus es, cuius domi non magis, nisi proximæ necessitudinis mulier visitur, quàm cis Alpheum per Olympia. Quid, si quis furorem tuum non infectans, sed miserans, hæc quibus vilissimi scruti non enim scripti tui: vesania fidem addit, conferciat? Ex quo videlicet Eustis ille capiti tuo, post scelestas calumnias & contumelias tuas impactus fuerit, ita tibi mentem de sua sede ac statu demoram esse præcipite amentia, sic de potestate, de consilio, de ratione exiisse, ut interdum foribus, sæpe parietibus incurres, vagere turbulentus ac væ-pallidus, confistas nusquam, & imaginosa intemperie sic teneare totus, ut quibus angor, mœror, & morbus es, agnati gentilesque, risum inter lachrymas tenere non possint: cum tibi interdum cœnum & pus esse videaris, ac præmetuas ne mantilia linteaue cætera impures ac collutules, Alias, matellionem esse te ac iubere in te mictum ut omnes veniant, per sæpe coprona siue secessum ac stercilinium factum: quo velis domesticas sordes omnes conuerri ac confluere. Quin & aliquando in publicas siue Patroclianas fellas mutatum, blandè inuitare prætereuntes, ut in te tuumque caput, non aliò commeare dignentur ad requisita naturæ scilicet: Nec minus congrua imagine, effractam tibi fuste fuste illo caluam, & assulatim comminutam, cerebrum dissiluisse, nullas eius tibi reliquias, ac ne capituli quidem ad imam ceruiculam superesse. Quæ miserantis animo, non exprobrantis, loquor, monstrosiora non sunt, quam quæ

quæ mastropia tota & productione tua in me es obſcœniſſime Cotytrus Sacerdos eſentitus ; quæ tam nefarie impura ſunt, vt ne à pudente ac verecundo referri quidem poſſint : vt foricario illi & æſchurgo ac ærrheturgo tuo, præterquam quod ea monſtri natura eſt, mandaſſe inſuper videare, vt ſi qua eſſe poſſet tetrior etiam fœdiorque quam harpyiarum fœdiſſima illa ventris prolumes, in eam pure quouis ac putore corruptior exiret, in eam ſe totum verteret, oggereret mihi offunderetque peſtem ſuam eiufmodi, cuius à mentione humana modeſtia abhorreret. Id quod vel tu, vel ille quiſquis eſt tui ſimiliſimus, fateor, effeciſtis. Nemo enim niſi ex eadem infamiæ fæce, non obſultis naribus, auerſis oculis refugit, vos & veſtra abhorrens, indignanſque tantum infandæ æſchurgiæ licere. Nemo vero honeſtus eo minus mundum ornatumque me deputat, quem immundiſſima illa colluies nulla parte attingit, ſed in ſemetipſa redundarit. Nam ad illa minoris abollæ maledicta mendaciaque veſtra, pro me item, vt ad ſæuitiam & immanitatem iſtam, reſ ipſa, & mores mei, lux ipſa meridiana & omnium oculi reſpondent. Inuri me calamitro, quod factum numquam eſt : nec indecoro puluere ſordidus ſum, nec præfeſtinatam, vt multi, nec alteram mihi canitiem accerſo ; nec quiſquam offucias ſemper exoſus eſt magis, vos vt non Muſæ literæque, non ipſa humanitas peius oderit, quam ego, ſimplex munditiis, fucum, et fallax quicquid eſt, averſor, eſte procul

occinebam sapicule, etiam adolescens, este procul Iuuenes, ut femina comiti, *Fine coli modico forma virilis amat*. In veste, quæ ab huius nostri ordinis instituto numquam dissensit, si mihi minus cum homine sanctissimo usurpare licet; paupertatem semper dilexi, numquam sordes, at illud licet, simplicitatem amaui semper, sordes numquam: galericulum seu comam ascititiam apposui numquam, nec capillo mentior, ut tu ore, lingua, manu pollutus mentiris: nec de iis futurus umquam sum; Quos pudet ætatis longæ, quos sancta senectus Offendit: verticem sericea tunica leuiter suffulta ea prætegit, in quo & M. Hippocratis sapientiæ paremus, qui principem illam in homine partem, quæ arx sit & domicilium rationis, pileo protegendam exemplo quoque suo docuit: natiuo & suo capillo cætera muniuntur satis, qui me non deseruit, ut à tuo forsan recaluastri capite, nequam atque improbo jamdiu refugit, ut quoad posset, maleuolam malitiam tuam, ne quem falleret, omnibus denudaret. Si radimur, vetustissimo Christiani delectus mori legique obsequimur, qua districtè cauetur, ut comam sibi demi, barbam radi qui nolint, inuiti detondeantur, deradantur. Sed quid ad te Christianos ritus profanum allégo, qui nefario commento id operam dederis, ut te omnibus apertissimorum probris mendaciorum ac maledictorum contaminatum, sole hoc, luce hac coargueres; cum elatrare, egutgitares ea quæ omnium oculi notitiaque falsi

damnarent, elinquendus vsque ab radicibus, aut confestim in commune id, quod à latendo vel lauando nominant, id quod te imaginare esse, imo es (sæpius iubent quod semel fieri volunt) demergendus. Tum de tuo in me largus scilicet ac effusus, spurcissimam mihi luem tuam vetera stipendia præmiaque affricare conaris, à Iuliuo Chirurgo, qui cū mihi homine nullus vsquam vsus intercessit, curatum: quàm impudenter de morbo, tam falsò de Medico. Pimpinellam ego perspectæ fidei ac peritiæ & mihi amicum, & domi antea meæ assiduū chirurgum adhibui eo in incommodo valetudinis, cuius historiam Guillelmus Verus quasi obsignatis tabulis ac testimoniis consignauit. Nunc vero quando eam mihi necessitatem importunitas tua imponit, referatur paucis. Cum præter morem & modum, & plusquam pro virili parte, illa in Regis ad Villam regiam ægrotatione vigilando, excubando, sedulitate, assiduitate, diurnis nocturnis operis Regi me Domino impendissem, mensium duorum, excubiis vigiliisque ad somnum exui mihi non licuisset, cum laxamenti aliquid & necessariæ remissionis, vexatæ, fessæ, fractæ vires corpusculi desiderarent, vt nos alia ex aliis in fata vocamur, nec sponte licet componere curas, è vestigio vt Rex conualuit, planè quasi ad bella, vt Alexander, & catenatos labores reualuisset, dat se in Rupellanam expeditionem. Partes meæ fuere sequendi, obsequendi. Ibi mihi illo cælo & aëre, qui statiuorum esse castrorum solet, pro quiete quâ tantillum reficerer,

ac respirarem, non geminatus modo, sed multiplex labor incubuit, cum & Regiadessem ex religione officij, & is me à se, ad hos & illos sibi caros, illustres ægros dimittetet. Ferreum esse oportebat, qui tot laboribus non frangeretur, qui tanto in contagio morborum, eâ loci & tempestatis intemperie perstaret incolumis, febrem incidi non localem modo & temporariam, quales vulgo sæuiebant, sed ea malignitate quæ decubitu in mesenterium, abscessum pepererit. Qui se ita demum erupit, vt quam diu contractus fuerat, tam se diu lenteque exsoluerit. Annum pœne id incommodum fuit. Tædebat & diuturnitatis & doloris quicum luctabar assidue. Is me grauis, asper, longinquus, sic extenuauit, sic afflixit, vt quia Dominico ministerio carendum erat, amicorum quoque & familiarium aditu ac consuetudine mihi vltro interdicerem: nulla vt pars vitæ non ingrata esset, quæ omnem ita suauitatem, & vitæ vitam excluderet. Hinc ansam arripuit illa hominis cuiusdam non tam credulitas quam obtrectatio. Cuius ego hominis nomine abstineo, quia eius cõmissi veniam à me olim supplex deprecatus est, & ego me, vt Christianum, vt hominem decet, exorari facile passus, sartam animi læsuram refricare non amo. Ille clanculum primo sparsit, tum in Regis aures insufurrare ausus est fictam à se, per eam & morbi & absentia longinquitatem, citius quam creditam fabulam, quæ in eius statim conuicta dedecus vertit. Ea lues est, quæ in te scilicet inueterauit, qua tu non famam meam, quæ illæsa perstitit, sed

fed te, miser post tanto polluis: & vt palam constet, vt dubium nemini esse possit, tua tua esse, lustra, ganea, prostibula, vitia ventris & gutturis, probri, nequitiae, obscœnitatis, impuritatis, ac spurcitiae omnis non nomina tantum, sed & perpetuas, vt in cœno conuiciorum volutationes, sic omnem illam purulentiam expressisti, vt quæ de tuis illa fœdissimis vlceribus prorumperet, eius tu contagionem atque pestem, vt inimicis, nefarij desperatique quibus inguinaria fluit, allineres, affricares. Rumorem impudentissimum cuius tu annos sex & xx. mortui vespillo es, fouerat mea illa ex dolore corporis, & mœrore animi solitudo; irrupere insignes viri, qui liberius obiurgarunt, quid sic exclusis amicis, & morbum alerem, & in inimicis latus aperirem? ab Aula qui tam absit diu, ei maledicos numquam deesse; Regem quidem nihil credidisse, imò respuisse, ac falsi prædamnasse, verumtamen maleuolos, quæ ne ipsi quidem credant, exsufurrare, dissipare, vt noceant. Parui amicis & curiosis, hoc est minus beneuolis, patui familiaribus, tum memet mihi, & Regis Domini officio reddidi. Meminere qui me inter cæteros amice inuiserunt Illustrissimus Dux Liancurius, Cubicularis tunc Nobilitatis Primicerius, & nobilissimus Sanguinus ordinarius tum comes, nunc Regis ordinarius Diœcetes. Ij, non vt oculis suis crederent, sed vt oculati testes, figmentum impudens contunderent, venerunt, non exploratores, sed fidejussores, visa perspectaque, Regi,

de me secus ne suspicato quidem renunciarunt: extincta est calumnia, cuius tu, ætas iam est sepulta, cadauer, bustuatus canis, tam vesana est maledicentiæ fames, eruisti. Ab eadem est famelici canis inuidia, quod elatras, extractum me conductitiis ædibus, æque Germani claustro, ob licentiam vitæ solutioris. Exquire, latrator maliloque, de vniuerso illo collegio sodalitioue, quæ migrandi mihi ex vetere domicilio causæ fuerint. Cæcos & furdos fuisse illos oportet, annos totos tres & xxx. qui nec viderint, nec audierint, quæ tam peruagata fuisse vis, quam peruulgatus iam est tuus iste furor: si malus est, cur vteris? vt apud summum oratorem est: si bonus, cur accusas? Meritò illi sodalitio quiuis objiceret. Vos eum annos iii. & xxx. solidos non tulistis modo, sed fouistis, amplexi estis, conuictu eius non raro vsi estis: nunc demum post Gallicum Druidarum seculum, tam diu carum, probatum, spectatum vsque, numquam despectum, missum facitis. Absentem, desideratis, reuocaturi si fieri posset, si non commodius multo idque in religiosæ familiæ ædibus habitaret: quod coniunctum vestrum est cum viciniæ honestate atque splendore desiderium; vt eos taceam, quorum nobis tacitam & tectam opem, inspector idem & remunerator Dominus commendat. Vides vt venenata, quæ in nos cæcus furor tuus tela coniicit, ea vitæ meæ Vulcaniis armis repulsa in te, dum præceps & amens, instas vrgesque, resiliant. Pari vecordia & perturbatione mentis, ex Aula di-

missum me ob illos quos de tuo mihi affinxisti mores, calumniatus es. In quo non sycophantam modo te, sed & ceritum lymphatumque traducis; fumos efflas videlicet Cacus, quibus meridianum solem offundas. Nam meridie si lucet, talpis autem & sponte cæcis, hoc est improba se ac misera cæcitate damnantibus mera dies nox est, liquet annos me totos v. & xx. inuito plerumque ac inidente auunculo tuo I. Heroardo ita stetisse, ut malignis oculis veluti lemam is splendor obduceret, me ut circumflaret inuidia, non emoueret, quam assiduitate, sedulitate, ac omni religione officij vincerem; & quò se Regis in me Domini gratia magis intenderet, eò contentius enterer, eam ut fidelibus studiis obsequioque retinerem, augerem, confirmarem. Verumtamen Dei munus est gratia in oculis Regis, maxime si innoxia ea, si bonis vsui sit, ex nemine autem crescat, & homines promereri magis studeat, quam ipsa prouehi. Et illa quidem, ad quam omnium vota aspirant gratia, ne fortuita videri possit, sed iudicium potius quam voluntas, gradibus etiam in me ornando amplificandoque processit. Patri successorem in Chirurghi sui officio libenter vidit, & maiori protinus spei destinavit. Chirurgum primarium, quæ prima se occasio dedit, sponte sua apte, ingemiscente intra inuidam sinum auunculo tuo, fecit. In Scholam Parisiensem nomen dare voluit, ut esset quem Magistrum nostrum Doctorem infulatum, ut gratiosè iucundèque, sic legitimè nominaret. Iis me, nem-

pe gradibus ad Primarij Medici sui dignitatem attollebat. Vt placuisse Regiæ perspicaciæ videatur Romanorum ille mos Principum, inque iis optimi Traiani, qui maiora Comitia tanto ante ordinabat, & quos facturus erat anno suo Consules, in legitimum annum Prætores ab Ædilitate designabat, summum vt honorem, virtutis, industriæ annorumque gradibus caperent; cūius illis spes, eam si rectè factis secundassent, velut legitimis tabulis pacta desponsaque esset; Quod Rex pari deinde benignitate ac iustitia præstitit. Et dissolutum, temulentum, profligatum ac perditum istum, sagacissimus inspector non peruideret, osor vitiorum acerrimus ferret, ab oculis suis abesse numquam pateretur, nec in comitatu solum, sed & conspectu assiduum esse vellet. Neque verò id menses aliquot; Annos v. & xx. totos magnum humani æui spatium: non cessante interim auunculi tui malevolentia, cui honos meus, repulsæ, gratia verò mortis instar esset, cuius tranquillare animum non aliter possem, quam si Domini tam prolixæ, tam certæ in me voluntati obfisterem, Aulâ, imò vita ipsa cedens, vt illius acerbissimum odium implerem, iniquissimæ inuidiæ satisfacerem. At Rex, qui ne tantisper quidem abesse me, ne dum abire pateretur, odiosum ac molestum illum, cuique valetudinis suæ nullam partem crederet, exesse potius & morboniam abscedere iuberet. Cum ei tam diù tam valde spectata esset studij mei assiduitas, vt si me forte non visum, nomina-

tim.

tim; illa inquam honorificentia nominis appella-
ret, M. quidem N. non video, adesse autem certò
scio. Ita perspecta fidelitate dediti deuotique ani-
mi acquiescebat. Et in illa videlicet actuosissima &
exercitatissima Regis vita, cuiquam dare se ludo &
voluptatibus, assiduo eiusmodi, indulgere semet,
ac molli otio fouere liceret; qui in eius Domini ne-
cessario officio versaretur, cui ludus & oblectatio
esset laboriosus, exercitus, ac perpes quidam actus;
qui biduum numquam in vrbe conquirit, quin
liberiores cœlo frui vellet, & vicina rura venatu
scrutari, cui dies, nox, hyems, æstas, sol, puluis, labor,
ventus, imber, nix, ~~per~~ ^{tem}pestas esset! Et vt lynceos
illos Regis oculos effugerem; an etiam inuidos,
obtrectatores, maleuolos, qui loco illi gratiæ, non
magis deesse possunt, quam igni vapor, aut fumus
aliquis. Et, si minus me ab ea effrenatione insitus pu-
dor & Dei metus reuocabat, non metuerem fulmen,
quod Aulicorum terrorem vel maximum esse aiunt;
non saltem frigus, quo tam multi diriguerunt? sic
omnium æmulorum, vt interim maleuolos omittam,
aures oculosque præstrinxissem, vt velut effascinati
nihil viderent, nisi quod mihi commodum esset,
nihil audirent? Sed ipse nimirum sentis nihil, nihil
vides, nihil sapis, qui tela imbellia sine ictu, fru-
straque iacias, quæ statim excepta, in te regeran-
tur, tibi in corpore hæreant: quippe dum alte-
rum licentioris vitæ arguis, petulantis linguæ tuæ
intemperiem coarguis. Ab eodem est tuo cœno

Pelophore, quod imperitum me Chirurgum pipulo differs. Quam ego calumniam non ea exceptione summouebo, quam mihi leges iuraque subministrant, abundè probatum esse quem iudicio suo Princeps probauerit: nec de eius esse fas dignitate dubitari, quem tanta suffragatio, commendatioque prouexerit. Decedam legitima defensione, mea ut vnus, & propria nitar. Pro me namque causam dicent illi mei de Chirurgia commentarij, quos ego per illa videlicet quæ tu licentiæ infimulas tempora, ex meis metipsum obseruationibus & experimentis confeci, quos pietate adductus, ut paternis vestigiis insisterem, eaque imprimerem altius, & iuuandi studio non perfunctoriè conscripsi, in librum Patris mei de Puerperio, deque Puerperarum, quæ consecretanea tractatio est, ac puerorum morbis. Tibi os ferreum occillabit Liber commentarius in Hippocratis aphorismos eos, qui ad antiquissimam & diu solam Medicinæ partem Chirurgiam attinent: inuerecundiam tuam rerundet lucubratio mea de ossibus & musculis: cui labori, si quid Anatomicis lynceis creditur, Momus erit qui obtrectabit, & de sua malignitate ac inscientia confitebitur. Taceo quas habui publicas scholas, lectiones vocant; Non commemoro quas publicè administraui Anatomias, quarum celebritate ac frequentia, cum ad eas omnium Philiatrôn, omnium studiosorum concursus fierent, illa ipsa etiamnum theatra personant. Quo publicæ famæ præconio tantopere sum Regi

meo commendatus, ut perspectum antea probatumque, sponte Regij animi ac iudicij, Primarium sibi Chirurgum esse, annos duo & xxx. vix egressum, iusserit: cum peritiâ suppleri ætatem crederet, & huius suffragium, Regia benignitate impleret. Ab eodem est succo lolliginis, quod Medicinæ scientiam meam detractas: quæ si olim in iuvene floruit, vixit, placuit, ætate certè ac perenni usu studioque imminuta non est. Quis autem pro iuvene me, illa in luce, illa in frequentia, qua maiorem, quàm illustriorem Scholæ celebritas illa non vidit, de universâ Medicina respondebat; Cum vnus starem omnia contra Tela Latinorum? Quis tùm mihi armiger adfuit, quis substes? Quis respondendi partes vicarius excepit? Quem mihi fesso suffeci? Quem substitui? Quis mihi subadiuua optioue succenturiatus est? Non ἀκονιτὶ mihi, non ἀμαχιντὶ laurea illa, tametsi gratis, stetit: non Doctoris emeritum id nomen, neque purpura venale nec auro, citra pulueris tactum atque iactum, non inquam ἀρωγιντὶ partum est. Quod tu nummulatione dum redemptum mentitus es, fecisti quod desperati damnatique Sy-cophantæ solent, ut dùm infamis litera fronti eorum inuritur, iudicum probrum, cum eius quem falso crimine appetierunt insectatione coniungant: crimen se non probasse, eoque damnatos esse succlamant, non quia ipsi improbe impudenterque calumniati sint, sed quod ille iudicium redemerit. Sic autem habe. Non sic ubi gentium (vbi autem, ne id quidem

ignoras) venalis fit, non doctrinæ, sed Doctoris apex, illis in scholæ Parisiensis olympiis, illos apud lectissimos, huius Græciæ, siue Iatricæ Amphictyonas promercalem stare non posse. Contenderit, depugnarit, vicerit oportet, qui magna ista Olympia coronetur. Nam pecuniæ quis locus esse possit, qui ne gratiæ quidem possit? Quanta enim mercede centum & plures eo, graues integrosque corruperis, ut suum tibi dedecus, tantulo emti gratificentur; qui iudicent aduersus animi sui mentem, fidem ac religionem, nec reuocentur ab illa fœditate flagitij, publicæ conscientiæ quæ priuatæ reclamet, incorrupta voce, scholæ verecundia, circumstantis coronæ oculis, auribus, iudiciis? Quid porrò mereri velint, ut alieno se opprobrio frustra onerent; ut eam in se maculam suscipiant, quæ sempiterna hæreat, nullo aut lomento aut trito eluatur? Quid autem sciscitant sentiatue? mutum illum & elinguem, qui nec in acie manum, nec in stadio pedem, nec in palæstra laceratos mouerit, qui ad omnes aduersariorum petitiones velut destitutus in Martio campo stipes steterit, ommutuerit, ac se ne tantillū quidem commorit, ne dum promorit, acrem, fortem, facundum, disertum, in palæstra denique Mercurium, in Musarum choro Apollinem, inter Erasistrateos, Herophileos, Methodicos æmulosque cæteros rediuium quendam Galenum extitisse? Norunt repudiati & repulsi quanti molis sit, quanti negotij, vel primi examinis subire tentamenta, & audere Templi eius fores, non

virgis.

virgis vt priuatarum ædium ostia Romani Magistra-
tus pulsare , sed vel leni tinnitu ac suspensa manu
& anima demulcere. Quot enim te, omni ex parte
meliores potioresue , & cum à facundia , tum à me-
dicâ , quæ Curto tibi curtissima est suppellectile pa-
ratiores , à primò statim aditu abspulsi rejectiq; sem-
piternum sibi exilium consciuerunt , & ad aliam con-
fugêre receptricem exulum ciuitatem , in quam pre-
tio prece cooptarentur ? Quid illos deinde actus ,
illas pugnas , & decretorios , vt in palæstra , congres-
sus conflictusque referam ; in quibus vir & Athleta
palmarius adeoque pacrantiastes , qui se his hella-
nodicis non egregiè probauerit , si vel aureus Midas
venerit , audiet à circumstante studioforum cœtu ,
exesto , & , *procul ô procul esto profane*. Tu verò Pelobo-
lus Coprologus , Æschrologus imus , vel summus ,
de cane , Decanus (quod interdum mali genij no-
men est) quantus sis canis cellarius inueteratus die-
rum malorum , octogenarius sycophanta , cum tuo
Aphodenta , tu quatere foras velut ictus ab Hercule
Cacus , pleno sacculo , vacuo fatuoque isto cerebel-
lo ad oraculum hoc Medicum si adire ausus sis. Nul-
li ergo in hoc Medici Honoris templum nisi per
Virtutis , introitus patet , quâ introductum quâ ad-
missum me ac primo quidē loco atque gradu , ac ve-
lut delectus eius signiferū , ita gloriari mihi fas puto ,
sicum Antistitis Scholæ pia grataq; veneratione , fe-
licitatis meę sensum coniungam. Non ego igitur , aut
alius emir quisquam , quod vno illo quo Deus vendit

omnia, labore venale est. Contra me Rex meus pro Regali sua iustitia, munificentia & benigno in me animo, Ordinarium sibi Medicum ingenti auro-ramento Francorum L. Millibus redemit, bene positum munus suum ac beneficium persæpe ac libenter prædicauit, cum supra vires etiam adniterer, ut eum ne largitatis ac benignitatis suæ vnquam pœniteret. Quæ, ut altrix est sui bonitas, & beneficium suum amat, ibi stare non sustinuit, & in secundo gradu me consistere passa non est, quin, ut Chirurgum primum vltro crearat, Doctorem Medicum Parisiensem, id agens idque cogitans, esse voluerat, Ordinariū Medicum, Extraordinaria liberalitate compararat, Primarium Medicum, non codicillis, sed Diplomaie non *δυναμει*, sed *ἐπερνεῖα*, non titulo tenus ac nomine, sed usu, re, actu, ope, operaque eūmque vnum ac solum, remoto socio esse vellet. Non ita, seuerissimus totius honestatis exactor, si quid ei de sentina illa in quam totum te vnde me perfunderes scilicet, immerfisti, suboleret. Odorabatur autem sagacissime, & si quæ ad illum vel tenuis aura perlaberetur, non credebat statim, qui aulæ susurros, rumusculos, & quæ pia officia vocant, intimè nosset, sed rimabatur perse, expiscabatur, explorabat, compererat; Illicet, exequias ollo quibus commodum est ire, iam tempus est, ollus ex ædibus refertur. Et illam tu tam impudenter, tam impie postremus homuncio, Regiorum Iudiciorum sanctitatem, beneficiorum amplitudinem, gratiæ constantiam, atten-

tando attaminandoque me si posses, imo lacerando
proscindendoque violaris? sed qui veritatis ac ve-
recundiæ iuratus hostis sis, qui vni cotytto impu-
dentiæ ac spurcitæ cultor addictus sis, mortalem à
te majestatem lædi nihil mirum est, qui æternam
& immortalem vsquequaque contemnas, proculces,
proteras, affingendo, ementiendo, pejerando, ve-
nenatum dentem infringas quam possis ex præcepto
veteris calumniatoris, vt si morsum non intimaris, ac
caninum virus exspumes quantum queas; sic ali-
quē me hoplomachum chirurgū, Themisonem aut
Hermocratē medicum criminariis, qui ferali manu,
lethali cura plures occiderim quam sanarim. In quo
solens more tuo facis quod impure ac effrontes mu-
liercule, quæ in rixa iurgioque id cuius sibi consciæ
sunt maledictum statim occupant, effundunt, inge-
runt ne primæ illo conspuantur. Itidem tu, incertum
medicus imperitior, an vespillo funestior, palmas
istas tuas & victorias alienis postibus affigis, quæ se
tuas esse deque valituris & victuris, nisi te carnificem
adhibuissent, partas & relatas clamant. Ego vero qui
Medici fidem operamque, præpotentis Dei vim &
virtutem sanationemque esse sentiam, homo enim
curat, Salus ipse per sanat, numquam Altissimi me-
dicinæ opificis mihi opus arrogavi, in Autorem sem-
per retuli, referamque quoad vixero. Verumtamen
ne in amplissima copia ab illustribus & principali-
bus exemplis testimoniisque decedam, eque his se-
ligam, qui tuos Bithyæ Scythæ, vel Afri Thibij

effascinantes ac mortiferos oculos præstinguant;
En ad quorum nutum contremiscas, qui oris tui duritiam contundunt, calumniam tuam detestantur
Regius ille sanguis Metensium Princeps & Antistes
H. Borbonius, Illustrissimi Suureus, Mortui Maris
Marchio, Dux Liancurius, Polemarchus Auquincourtius, Sanæ Terræ Toparcha, Polemarchi Pater,
is ipse à Firmitate Polemarchus, Buifius, Beringhamus, Buissonius, Tot denique tantique, qui fidam &
& faustam opem hanc tam diu experti, reuocent me
identidem, nec seruare decem annorum propositum
non sinunt; professi non libèter carere cuius consilio
auxilioque, bono cum euentu, sic enim ipsi loquuntur, vti semper sint. Quod honori meo nuperrime
tributum ab illo vt hostium sic ætatis & calculi victore
Polemarcho Estræo non tam gloriator quam lætor.
Qui cum ei curæ se quam egerat Hippocrates, eximendæ sibi per celeberrimum illum Lithotomum
Giraltum lapideæ cōcretionis fortitet, vt omnia semper,
commisisset, adesse sibi me, & in tanto discrimine,
tam periculosæ alea operæ, regi à me valetudinem
suam voluit; euasit diuina ope, octogenarius victor
eualuit, valet, & nos inuicem animi causa bonus &
felix reuifit. Glorias facere videar, si offusum te ac
præstrictum illo, qui me sui admonet, te condemnat,
insignium virorum delectu ac numero insuper
obruam opprimamque Regi Domino, trihus in grauissimis,
& pæne extremis morbis, ita volenti iubentique,
otiose interim spectante ac tacite ingemifcente,

cente, sibi que præmortuo funus indicente auunculo tuo, sic aduigilaui, adstiti, adfui, vt saluus ex iis atque sospes, valetudinem suam secundum propitium numen, curæ, fidei, assiduitati artis meæ, acclamante Aula vniuersa, sæpe sit gratulatus. Cuius antiquæ iam Aulæ superstes quantum est, feliciter expertæ operæ meæ, testimonium aduersum vos magna voce adfirmat. Ab eadem est vitiositate succi, quod aliena me opera, alieno ingenio vti passim elattras. Quod si mihi maxime opus esset, non est autem, condimus enim pro nostris opibus mœnia, & quod apud alterum est Comicum, vt quimus aiunt quando vt volumus non licet, sed & facilem mihi materiam facultatemque naturæ tuæ importunitas & criminum flagitiorumque multitudo largitur, verumtamen, id si necesse haberem, non conducerem emeremque de lapide, id quod fecisse te si nescis, omnes sciunt, vltimos agasones & bastactas, bajulos dico, imo bipedes asinos, & omnium bipedum vilissimos, non furti manifestos, non infami iudicio notatos, non falsi damnatos, non ignominiosos, non Medicis Scholis prohibitos & abstentos, non barbaros solœcistas, non omnium flagitiorum postremos, non omnium probrorum, omnium turpitudinum Copreas, non monstra inscitæ, non ex cœno conuiciorum & spurcissima fæce conflatos, nautea maceratos ac subactos, non qui obscœnas operas conuerrendo luto publicisque sordibus euehendis, locant, non infimorum φεῦ φεῦ operum molitores, non qui conducunt foricas, siccan-

dam eluuiem, sentinā exhauriendam, cloacas repurgandas & quæcumq; vestra nomina dum appellare cogor, abominor. Qui tui, Curte, defensores, tui patroni, dignum patella operculum, & labris similes lactucæ sunt, quos tibi tu, ringendo, latrando, vluando, conuiciando fessus, qui pro te tuum opus conferciendi luti respergendique facerent, corrogasti furrogasti, ne lingua meretricia, ne manus impura cessaret. Ego verò, de me deque scriptis meis arbitrium amicis prudentibus & doctis illis, bonorum & sapientum exēplo permittere soleo, qui nequaquā id in ea sibi id iuris, quod illis ego attribui, sumūt-nam à se intacta, quod ego nolebam, remittunt. Tūm vero acrius elimo castigoque quod minus placet, si quid tamen placet, quod non multa dies & multa litura coercuerit, quale est subitarium & festinatum opus, quod importunitas tua, inuito, & si vtrum vellem liceret, sanequā repugnanti, sed & minus valenti, ac molestū rheuma procuranti expressit, in quo, si quid toto est quod furias tuas extimulet, furorem acuat, rabiem inflammet, Tu voluisti, tu fecisti, tuo capiti fuisti, tu sementim fecisti, multiplicem vt mereres. Tu, in placidum & quietum ferus incurristi, rabidus irruisti: declinarat ille primos furentis incursus; Tu, quam tibi laruam dissimulationis indueras, detraxisti detritam & obduratam frontem nudasti, vt, qui eras, proderes te ac perderes. Auunculi tui per me quidem sepultos ac immotos cineres reuellisti, eruisti, dissipasti, ingrati, perfidi, falsi fallaciæ parricidij alienissi-

mi denique coloris reum postulasti: qui maledicta illa non à se depulit solum, sed in sempiternū dedecus vestrum omnia retulit necessario retuditque. Menses totos septem, ô septimestrem abortum, pus ac venenum, per te inque te, vomica, collegisti, per venenarios vt Iudæi olim per elephanticos passim Galliarum puteos tabo infecere, contraxisti, quod honestati nominis nostri allineres. Quod, contra, sentis, si quid in te sensus reliquum in tanto esse furore potest, tibi tuisque inhæsisse. I nunc, I verbis virtutem illud proteruis. Quod superest, neque te in hanc vitam opifex Deus induxit vt in malignitate, malevolentia, maledicentiaque inueterasceres, contabesceres: neque me, vt fœdissimis probris, vt spurcissimis & impudentissimis conuiciis aures vsque præberem, & ea necesse haberem aut agnoscere, quod grauius est, quàm ferrum in viscera recipere, aut reiicere ac referre, quod si necesse non sit, fas esse non putem: Neque te, annum vltra octogesimum natura perduxit, vt nihil demum saperes nec resipisceres; qui enim sapit is profecto in horas resipiscit. Discipulus enim prioris est posterior dies: & docet diem nox, & dies noctem: & nostri nosmet pœnitent, mutamur in horas, & vt in flumine numquam eadem in aqua manum tingas, sic in eodem homine, si tamen eodem, vix depungas vbi sistas; vt melior tamen sit, cui meliora in dies magis magisque, optimus cui optima constanter placeant; beatissimus & Deo proximus cui semper ea placuerint. Quid autem tam dextro pede conci-

pis, ut te Conatus non peniteat? In se nemo inquit,
 nemo descendit, quin si excutiat sedulo se ac scrutetur,
 multa damnet quæ antea probavit, & quæ probavit
 multa improbet, plura desideret, addat dematque
 sui Censor seuerus ac integer plus de se nemini
 quam credat sibi. Et innumera eiusmodi, quæ sui
 memores, quæ hominis prognari, sapientes magnifice
 prodiderunt, Ac ipsum videlicet sapere, strenue
 resipiscere est. Et, homini profectò nemini Dei munus
 id contigit, quin rectius se ac inoffensius, in hoc
 vitæ breuissimo & impeditissimo curriculo perrexisset
 velit. *Vidi iam Iuuenem, canit ille, premeret cum senior
 ætas, Mærentem vacuos præterijssos dies.* Et vnus-
 cuiusque senis hæc cautio est, & illa, *ô mihi præteritos
 referat si Iupiter annos,* Ut Dæmonum esse non hominū
 & dicatur & sit, malæ mentis illa, mali animi obstina-
 tio, quæ cogitata illos reflectere in melius non sinat,
 eâ obstinata voluntate malitiæ obduruerunt. Debe-
 mur morti nos nostraque, at vita omnis & ipsa mors
 Deo debetur, qui sanabilis fecit nationes hominum,
 & ipsa miserrimi corpusculi conditione admonet, ne
 qui thesaurū, hoc est immortalem animum, eiusque
 dotes tantas, fidem viuam, ac rectam spem beatæ im-
 mortalitatis, in vasis fictilibus feramus, in mortali &
 caduco corpore immortales inimicitias geramus.
 Mecum, ut voles modò ipse tecum (de quo pejus
 omnino, quam de yllo aduersario meritis es) modo
 cum bona mente, cum pudore ac honestate redeas
 in gratiam. Et sera numquam est ad bonos mores via.
 Respice

Respice te aliquando senex, & qui Christianum te non vnum è multis, sed edecumatum, vtinam vere, prædicas, hominem certe memento te; à morte semper homines tantumdem absumus, multo propius senes, proxime vero qui mortalis æui cardinem extremum premit, & cum incetta iuueni hæc vsura vitæ est, tum capulari & decrepito diuturna esse non potest, male de immortalitate sperat, qui de mortalitate moribundus non cogitat. Et tu omnibus probris, contumeliis, maledictis, calumniis conflandis, comminiscendis, conciendis, spargendis, per misellum homulum alterum te, perque cæteras sordes institutorum tuorum, intabescas, immoriare, intereas; & Christiani sensus pars in te vlla sit: Nos vero qui in diem & vix ad horam fortasse viuimus, mortem cui innascimur, immortalitatem quæ credimus, quam speramus æternitatem cogitemus.

FINIS.



LIBRI
DE NATVRA, CAVSIS,
&
LEGITIMA CVRATIONE
Febris pestilentis

HIERONYMI DONZELLINI
Philosophi ac Medici Veronensis,

In quibus etiam de Theriacæ natura ac viribus latius disputatur.

APOLOGIA


Per Eudoxum Philaletem edita aduersus The-
sali Zoili oppugnationes.

Dulce bellum inexpertis.

CVM PRIVILEGIO.



VENETIIS apud Andream Bochinum,
& fratres. M. D. LXXI.



ALBERTVS CIMERLINVS
MEDICVS VERONENSIS
LECTORI CANDIDO.

S. D.



*V*M ANTE aliquot menses excellentissimus D. Hieronymus Donzellinus, cuius summum ingenium, ac splendidissimam doctrinam nemo satis admiratur, rogatus ab excellentissimo Iosepho Valdanio, suam sententiam de natura febris pestilentis, quas pestichias vocant, ac eius remedio epistola compræbensam ad illum misisset, eaq; à multis perlecta, digna illis videretur, quæ in publicam lucem emitteretur; ita apud illum egerunt, ut, quod cupiebant, impetrarent. Quæ autem potissimum causa illum impulerit ad id faciendum, in sua præfatione indicavit. Ea est ut eruditorum hominum iudicio exposita, discuteretur, ac si quid minus rectè dictum in ea esset, duce ratione emendaretur ac corrigere-
tur. Ea itaque edita, multi ad illum literas dederunt, quibus eius sententiam summopere probarunt. aliquot etiam modestè indicarunt, in quibus ab eo dissentirent; & sibi ea in parte satisfieri petebant. Cum autem quæ obiecta erant, non recta illum ferire, ac nisi facile sanabile vulnus inferre viderentur: illis ita respondit, ut integra atq; illæsa permanserit eius sententia. Unus tantum fuit Thessalus Zoilus, qui datis ad illum literis ita arroganter, importunè, ac immodestè egit, ut Donzellinus sua illum responsione non sit dignatus. Huic Eudoxus Philalethes Medicus eius propinquus ac familiaris respondendum duxit. Cæterum cum hoc scriptum ab aliquot Medicis in antiqua medicina doctissimis maximè commendaretur, & in eo quicquid scripsit Donzellinus in suo libello & latius explicaretur, & firmioribus rationibus confirmaretur; ita ut iusta eius apologia meritò censeri posset, visum est illud edere, ac omnibus spectandum proponere: Idq; duplici nomine. cum ut Zoilus aliquando intelligeret suis rationibus fuisse responsum; ac si qui alij de eisdem dubitarent, in eadem ipsi etiam responsione adquiescerent: tum ut melius omnes cognoscerent, quibus rationibus adductus Donzellinus, de illo argumento ita sentiret. Cuius consilij ne quid te lateret, te hic duximus admonendum. Vale.

Errata sic corrigito .

Pag. 2. b. et huiusmodi.	te huiusmodi
Pag. 3. a. et sophistam.	te sophistam
10. a. annone.	annonæ
12. a. futurorum.	futurum.
13. a. putredo consequi.	putredo conco qui.
14. a. coloris.	caloris
15. a. à multo.	à multa
15. b. norant.	norunt,
17. a. infesto.	infecto.
Ibid. originem dicit.	originem ducit.
19. b. in fine vndecimi.	in fine decimi.
22. b. superesse.	superasse;
24. a. fit priuata.	fit ex priuata.

EVDOXVS PHILALETHES

THESSALO ZOILO,

MEDICVS MEDICO,

S. D.



V M proximis hisce diebus officij causa Hieronymum Donzellinum veteri amicitia, & affinitate mihi coniunctum, domi salutarem, is mihi statim in manus dedit epistolam, quam tu ante aliquot dies ad illum miseras: dixitq; eam à domesticis suis sibi redditam fuisse eadem die ante horã, cum è suo propinquo rure rediisset, eamq; vix dum à se fuisse perlectam: cupere autem vt ego quoq; illam viderẽ, & quidnam de ea sentirem indicarem. Ea euoluta, cum longiorem esse intelligerem, quàm vt eo præsente percurrere eam possem, vt domũ mecum eam ferre mihi liceret, ab eo impetraui. Domũ reuersus, eam diligenter legi ac relegi, & vt meum de illa iudicium exactius ferrem, accuratius etiam confideraui. Cum autem Donzellino iam reddenda videretur, illum denuò conueni ac restitui: ac de mea sententia interrogatus, dixi, in eo scripto me animaduertere plus esse peruicaciæ quàm iudicii, plus arrogantiæ quàm doctrinæ, plus deniq; vitii quàm virtutis. Quæ verò tu illi opponis, me leuia ac futilia reputare: ac mirari me, quòd ea veritas in cōtrouerfiam, quæ aperta sunt & cuius obuia, modo deposito liuore & animi pertinacia, diligenter ea & legat & intelligat, quæ ipse scripsit. Vt cūq; autem se res habeat, tuæ epistolæ opus esse omnino respondere. Donzellinus verò contra, se grauiori-

bus negociis occupatum esse, quàm ut possit hoc præstare: & si etiam posset, se tamen nolle cum homine maligno litigare & contendere: neq; bonas horas velle perdere in rixis & contentionibus; se facile videre, & huiusmodi habere cerebrum, ut ne Mercurius quidē cum toto Musarū choro perfanare illud posset: neq; te quærere veritatē, sed tantum litigiis & cauillationibus delectari: ac nolle se eiusmodi hominem sua responsione dignari. Ego verò respōdi, suo illum scripto se obstrinxisse, ut cuius cōtradicienti respōderet. Quare hoc iam non posse legitimè detrectare. Tum ille libellum suum in manus accepit, & hæc verba ex eius præfatione legit. A qua si quis dissentit, nō veto quominus suas rationes in medium producat; non ero pertinax, si meliora afferentur; cedam libenter modo modestia in disputatione adhibeatur; & remota sophistica, ex æquo & bono discēptetur. His perlectis, adiecit. Ego modestiam postulo in scribēdo, at tu vides, qualem modestiam adhibuit in hac epistola. Quare huiusmodi hominum scripta non sum pollicitus me admissurū; si velit litigare alios quærat, me quidem non habebit, qui velit cum eo rixari. Tum ego. Si nemo respondebit, in causa deserta triumphum aget, ac te inopia rationis victum, non respōdere existimabit. Quòd si ea in re tibi obfirmatus est animus, ego profecto non permittā, ut ille putet, se in hac causa superiorē esse. Tam enim mihi facile est eius oppositionibus respondere, ut te vehemēter rogatum velim, mihi licere, magnū hunc gigātem inuadere: fortassis ero paruulus ille Daud, qui colosseum gigātem interfecit. concessit ille, sed ea cōditione, ut intra modestiæ ac moderationis fines me continerem: ac ne committerem, ut in eo meritò repræhendi possem, in quo tu maxime videris repræhendendus. Id verò me facturum recepi, quantum tua merita permittent. Hac venia impetrata,
lætissimum

lætissimum mihi animū sensi, ac putauī diem illum mihi
foelicitissimum illuxisse : quare quemadmodum ille , qui
in arenam descendit cum hoste dimicaturus , gladium,
quo te confodiam, rationem scilicet legitimam verita-
tis parentem in manus accipio, ac te aggredior.

In primis autem illud in vniuersum præfandū reor,
me sentire , tuam epistolā meras tantū nugas, nēnias ac
anilia deliramenta cōtinere, nihil solidi, nihil veri, rixas
tantū & contentiones serere , suo parente dignas.

Te verò insignem esse veteratorem ac vitilitigatorē,
qui cū in bonis literis parum profeceris, egregiis tan-
tū viris laceffendis gloriam tibi studeas comparare:
Quem scopum solū sophistis propositum esse Aristot.
docuit; vt meritō & sophistā appellare possim. Philoso-
phi certē moralis nomine te indignissimum facis ; qui
cuius, quam profiteris, nobilitatis immemor , procaciter
admodū ac intemperanter Donzellini viri eruditissimi
cogitationes figmenta poetica appellare nō es veritus.
Quā verò naturalis philosophiæ, ac medicinæ sis igna-
rus, ex meis confutationibus, quas aduersus tua deliria
afferam, paulopost apparebit. Ne autē incautus in are-
nam descendas, amice moneo, non cum frigido aut ma-
leficiato, sed cum Veronensi tibi negotium fore.

Ne quid aut putes à te rectē aut verē pnuntiātū, singu-
la quę scripsisti aut ineptię aut falsitatis plena sum demō-
straturus, vt nisi pfrictę frōtis fueris, tu teipsum sis con-
demnaturus inscitix, ruditatis, audaciæ, malignitatis.

Si ego Zoile tui similis esse vellem, qui nugis ac nēniis
delectarer, in primis tuum illud rhetoricum artificium
exagitarem, quo vsus es in illa tua insinuatione: cū di-
cis ; perlecto Donzellini libello te tanta fuisse delecta-
tione perfusum, vt in cœlum sis abreptus ac diuinam,
vel melancholicam potius quandam ecstasim passus
fueris : verū vbi à somno aut potius veterno es ex-

perrectus ;

perrectus, te multa in eo deprehendisse, quæ & dubia essent & perplexa: atque ita tuis oppositionibus viam præparasti. Quasi verò non multa hic sint mendacia. cum tu scias, perlecto primùm Donzellini libello, te ad amicum literas dedisse, quibus illum admonebas, nihil te in eo noui inuenisse, sed eadem illū, quæ antea Valdanius, scripsisse: quibus tu minime adquiescebas: vbi igitur est diuina illa ecstasis, vbi præ gaudio in cœlum raptus? At color est rhetoricus (nam tu in ea arte plurimùm vales) quo tu argumentaris. Si Donzellini libellus vsq; adeo est diuinus, quantò ego diuinior, qui repræhendere illum possum? sed paulò post videbis quàm ineptus sis repræhenfor. scilicet, sus Mineruam edocebit. Sed tibi quoq; delicias facis, ac speras te tuis rationibus adducturum esse Donzellinum in tuam sententiã, qua in re ineptissimus es, ac intolerabilẽ præ te fers arrogantiam. scilicet, & nos poma natamus.

Dicis etiam in tua illa admirabili (si dijs placet) insinuatione, te esse veri inuestigatorem & christianum: ad primū dico, satius esse, te ab ea venatione ac labore desistere; in malignam enim animam non intrabit sapientia. ad alterum, credo te fuisse baptizatum, sed ea lotione cuius vis & efficacia non diu in te permanferit; naturæ enim contumacia citò illam excusisti. cùm enim modestia maximè deceat christianos, tu omnium es immodestissimus, ac odij veneno cor habes delibutum.

Illud verò ex te libenter audirem, quid tibi volueris, cùm Donzellinum philosophum appellasti. si philosophi nomine bardum ac stupidū hominem intellexisti; vt vulgus solet, te plebeium facis, ac longe hallucinaris; est enim homo perspicacissimus, & cuius non sis dignus calciamentorum soluere ligamenta. Quòd si per philosophum intelligis eruditum, prudentem, cordatum, ac ingenij luce præditum; cur eius cogitationes vocas figmenta

figmenta poetica? Cùm autem tua epistola Zoile omni rhetorico artificio sit exornata, aduersus ea, quæ in prooemio posuisti, hæc dixisse sat esto: ad reliquas eius partes accedamus. In quibus tractandis, eum ordinem seruabo, vt vbi initio tuas rationes fideliter enarrauero, ad eas mox sim responsurus.

Prima oppugnatio.

MOrbi populares secantur à Donzellino in benignos & malignos, & per malignos exitiosos interpretatur. contra: Malignitas & pernicies sunt diuersa, igitur male illa confundit. ea esse diuersa Galen. docet in prorrheticis, vbi repræhendit Hippoc. Libro. 1.
com. 14. qui pro lethali malignum dixit. Præterea lethalis dicitur, qui aut semper aut plurimum interimit; malignus autem salutis spem penitus non tollit; ergo diuersa. Ad hæc malignitas morem morbi notat, exitium vero crudelitatem & pessima symptomata cum virtute debili. distant igitur à se inuicem illa duo.

Mirabilis est in natura rerum sympathia, vt cùm videmus magnetem ferrum attrahere, philosophi causam scrutati, dixerunt, ob similitudinem illud fieri. Ego itidem dicam, cùm tu in eo libello reperisti malignitatis mentionem, similitudine quadam tui cerebri cum illa te attractum fuisse, vt in eo loco tanquam in proprio elemento, aut sus in cœni volutabro versareris. Galenus appellat Hippocratem bonorum omnium in medicina authorem: & in suis commentarijs non tantum doctrinam, sed etiam sermonis proprietatem sæpius admiratur. Hunc secutus Donzellinus errare nō potuit. Dices, ille liber non est genuinus Hippocratis. Hoc certe nunquam probabis. de eo quidem dubitauit Galenus, non tamen certò affirmauit, illum non esse Hippocratis. Sed quicumque ille fuerit, antiquus & magnus

gnus vir fuit, & Galeno maior atq; præstantior, alioqui eius Librum interpretari nõ esset dignatus. Quis enim indignioris se scriptoris interpretationẽ aggrediatur? Tantum itaq; virum qui sequitur, non errat. At Galenus illum repræhendit. Dico eadem ratione seipsum repræhendisse, qui in primo de crisibus cacoethes accepit pro lethali. Cap. 5. De sputis enim loquens ita dixit. Quando igitur hoc citò apparuerit, morbum facit breuiorem. cùm verò nullo modo educitur, aut crudũ, indicat morbum in longius debere protendi. Si autem prauum educetur sputamen, periculum imminere significat. Si autem etiã cacoethes fuerit, mortem minatur. Hæc autẽ vltima vox minatur, male posita est ab interprete, nam græca litera dicit significat, ne forte in illa voce cauilleris. dicit enim δηλεῖ, non autem ἀπειλεῖ, quo verbo vtitur Galenus, cum vult dicere, minatur.

Licet autem litera declaret, illic cacoethes idẽ significare quod θανατωδὲς, aut ὀλέθριον, ex his tamen quæ paulopost subdit, facile apparet. Quæ tu videre poteris in fine capitis, nam sexies repetit vocem ὀλέθριον, eodem significato, quo antea dixerat κακοηθὲς.

Cacoethes pro lethali accepit, & vsus est etiam alio loco Galenus, initio scilicet Libri de Euchymia, vbi dicit. Quibus horum nihil accidit, interiere omnes ob vehementem & cacoethem febrem. Si omnes interiere, ergo febris cacoethes fuit lethalis. Galenus item in proœmio primi Epidem. dicit. Itaque patet ex vulgarium morborum esse genere eos, qui malignissimi sunt, & pestilentes appellantur.

Ne autem putes Hippocrati in loco ex prorrheticis citato temerè aut inconsideratè excidisse eam vocem κακοηθὲς, pro lethali, accipe alium locum in 2. comment. eiusdem Libri textu 40. vbi eodem significato eam vocem vsurpat; dicit enim. Cordis dolor cū hypochondrio contento,

5
contento, dolorq; capitis, malignum . Hoc autem significare mortale ipse paulopost docet, dicens. An repente hi moriuntur? & Galenus interrogationem tollit in sua interpretatione, affirmans, pculdubio tales morituros.

Vt autem omnem tergiuersandi occasionē tibi adimam, lege secundum textum tertij libri prognosticorū Hippocr.& eius commentarium; nam tanquā in proprio loco vera significatio earum vocum *εὐνήθεις*, & *κακον' θεις*. à Galeno tractatur. Hippocrates dicit; simplicissimæ seu benignissimæ febres cum signis securissimis firmatæ, quarto die, aut citius desinunt. Maleficientissimæ *κακονθειςται*, verò seu malignissimæ, cū pessimis signis factæ, quarto die, aut citius interimunt. Quid dices Zoile, hic tibi omne sublatū est subterfugiū, liber est genuimus Hippocratis, de quo nemo vnquam dubitauit, Galenus non repræhendit, sed ipsemet vsurpat.

Cū igitur & Hippocratem, & Galenum secutus sit Donzellinus in ea diuisione, non erat vt tam intemperanter in illum inuehereris. Vides enim insignem in te esse rerum & verborum inscitiam, cū insigni etiam animi malignitate coniunctam.

Dicis malignitatem Galeno in libro de crisibus significare morbi morem. fateor. sed illud te scire oportebat, quod Aristoteles dixit in elenchis sophisticis, libro tibi familiarissimo, plures esse res, quā verba, atque ideo homines cogi, vt vna voce ad plura significanda vtantur. Quod profectò si ignoras, ad grammaticos merito es relegandus.

Ex his patet, te ineptum esse ratiocinatorē, cū falso colligis, ex quibus vero verius constat, has morborum differentias non parum inter se distare. ex falsis præmissis falsa conclusio sequitur Zoile.

Sed tu resipuisti tandem, addens; nisi forsan nomine quodam communi te vsum fuisse, fatearis; quod postea

B bipartiri

bipartiri adhuc oporteat in malignum in specie, quod non omnem salutis spem tollit, & lethale. Et profectò si tu æquus lector fuisses, in ea responsione adquieuißes, nec mouißes camarinam, sed tu litigijs delectaris, etßi ineptus es litigator.

Ne autem degenerares à natiua animi tui malignitate, quam ipse attulisti diuisionem, licet verissimam, Oestro quodam percitus, culpas ac repræhendis. scilicet vt declares, in te quadrare illud.

Naturam expellas furca, tamen vsq; recurret.

Quid verò tibi in mentem venit Zoile? damnare diuisionem probatis authoribus omnibus familiarè. cum scilicet genus in duas species diuiditur, & quia earũ altera caret nomine, generis nomen illi adcommodatur. Hac vsus est Aristoteles initio prædicamenti de qualitate, cùm dispositionis nomen genericum speciei aptat; cui opponit ex aduerso habitũ. Galenus itẽ in fine 10. de methodo, colliquatium febrium genericum nomẽ specificæ vocis inopia illi adcomodat, q̃ per alium sensibilibiter liquatam substantiã excernit, cui opponit marasmodem febrem ipsam etiam colliquantem, sed insensibilibiter excernentem id, quod liquatur. Iterum Galen. in 1. de acut. curat. comment. 9. Epidemii generalẽ vocem speciei illi opponit, quã pestis nomine designauit. Quare cùm hæc diuidendi ratio sit frequentissima, non erat vt illam accusares. Quid igitur prima hac tua contradictione effeceris, non video, nisi quod animi tui vulnus & incitiam prodidisti.

Tu rãta cõtradicens libidine teneris Zoile, vt furẽtis in modũ quiduis obuiũ arripias ad præliũ, furor arma ministrat. Tanta ẽt scribẽdi voluptate titillaris, vt quĩs ad scribendum sis ineptissimus, scribere tamen velis.

tenet insanabile multos

Scribendi cacoethes.

Hem

Hem audis . opportune mihi accidit hoc carmen. Nam etiam Poetæ, contra id quod tu scripsisti, iudicant cacoethes idem esse quod lethale; dicit enim cacoethes esse insanabile . sed de hoc satis.

Oppugnatio secunda.

DIcis, te non videre rationem, qua Donzellinus collegit, mites morbos, cū vagātur, epidemios vocari; lethales verò pestilentes. Morbos. n. in locis à te citatis ex Hippoc. Epidemijs ab eo describi qui maligni erāt & perniciosi, multiq; ex illis moriebantur. quos tamen (vt tu dicis) Galenus noluit esse pestilentes.

1. Epidem.
commē. 2.
Text. 25.

Vah, vnde nā nobis prodiit tam magnus Gigas, qui non tantum Donzellinum audet oppugnare, sed ipsum quoq; Galenum aggredi non veretur. Quæ enim tanquam Donzellini dicta repræhendis, ipsius Caleni sunt verba primo libro de acutorum curatione, comment. 9. Quod verò dicis, te non videre, hoc vident alij, Veneti scilicet, Patauini, ac Veronenles medici; qui scriptis ad Donzellinum literis, eius sententiā plurimum cōmendarunt, vt intelligere iam possis, in tanta prudentium virorum multitudine, te vnum delirare, ac cæteris vigilantibus, alto sopore oppressum te somniare. Apertè Galenus, apertè etiam illū imitatus Donzellinus loquitur, ac dicit: morbum vnum multis hominibus communē euenire vno tempore. qui, si mitior fuerit, generis nomine epidemius vocetur, si autem perniciosus, pestis: ac pestem definit Epidemiam lethalem. Epidemia igitur est genus. species verò pestis, & mitior popularis morbus. Ex hac doctrina nonne sequitur, mitiores morbos, cū vagantur eodem tempore, esse epidemios. perniciosos verò pestilentes? Si tu non vides qd alii vident, tu proculdubio cæcus es. At dicis, Hippocrates describit morbos perniciosos, qui multos interficiunt,

ficiunt, nec tamen Galenus eos vocat pestilentes. Dico ex pestis definitione à Galeno posita loco citato, si illi morbi, quos describit Hippocrates in epidemiis, & populares sunt & lethales, necessario sequi, illos esse pestilentes. nec aliter posse Galenū dicere, nisi sibi velit repugnare. Et quamuis tu dicas, Galeno non placuisse illos esse pestilentes, locum tamen non indicas, vbi negauerit eos esse pestilentes. Inscitè igitur ac ineptè in fine tuba canis, ac tibiam inflas: nec epidemios omnes esse benignos, nec malignos omnes populares esse pestilentes. Nam, quod intendebas, tu minime probasti. Sed certa est, & insuperabilis Galeni doctrina, quam temere ac frustra conaris oppugnare.

Oppugnatio tertia.

Donzellinus asserit Galenum curasse synochum putridam phlebothomia ad syncopin facta. Te verò dicis nullibi apud Galenum legisse, sed ne quemquam audisse, qui legerit, Galenum tale quid fecisse in synocho putrida, licet illud fecerit in non putrida vsq; ad lipothimiam, non autem syncopin, quæ plurimū inter se distant.

O bellum hoc, potuit dici nil aptius vnquam. Etsi antea mihi dubium non fuit, ex hoc tamen loco certo certius cognoui, te perfunctoriè Galenū perlegisse, aut obliuiosum esse, aut vero tanta contradicendi rabie agitari, vt ea, quæ nosti, dissimules. In eadem pagina Galenus recitat duas historias alteram de synocho nō putrida, de putrida alteram, in vtraque dicit se misisse sanguinem ad lipothimiam; Tu vero impatiens lectionis, priorem legisti tantū. Sed iureconsulti dicunt, stultum esse iudicare, nisi prius tota lege perspecta. Sed tam peruicax es ac importunus, vt omnia temerè facias ac nihil consideratè. Credo Zoile te nunquam legisse, aut
ex nimia

ex nimia cerebri fluxibilitate tibi excidisse. Sed illud intolerabile videri potest, quòd quæ tu ignoras, alios etiam putas ignorare; & ne solus inscitiae noteris, alios etiam in consortium tuæ ruditatis pertrahere nō vereris. Affirmas enim te neminem audiuisse vnquam, qui tale quid legerit apud Galenum. O lepidum caput. Itane magnificè de te sentis Zoile, vt, quod te latet, alios etiam latere putes?

Quò verò magis tuam ignoratiam omnibus patefacias, conaris etiam probare, nequaquam faciendum esse, quod Galenus magna & ratione & ægrotantis vtilitate se fecisse scribit, in synocho scilicet cum putredine non esse faciendam phlebothomiam vsque ad lipothimiam, pro quo duæ à te rationes afferuntur. earum hæc est prior. In synocho putrida (ex Galeni sententia) tantum sanguinis relinquendum est, quod sufficiat, donec morbus finiri possit. Sed si sanguis mitteretur ad lipothimiam non sufficeret. ergo tanta quantitas nō est mittenda. Altera ratio est ista. Neq; obstructio, neq; putredo curatur phlebotomia; ergo tanta sanguinis quantitas non est euacuanda.

9. Meth. 4.

I I. Meth. 14.

Eodē loco.

In primis dico Galenum in loco à te citato vndecimo methodi nūquam vetuisse phlebothomiam ad lipothimiam factā, vt tu dicis. Quod si fecisset, sibi ipsi contrarius fuisset; cū in lib. 9. illud ipse præstiterit, ac proprio etiam opere ac præcepto iusserit faciendum.

Ad rationes tuas dico in eo te hallucinari, q̃ putas facta phlebothomia ad lipothimiam, nō relinqui tantum sanguinis, qui sufficiat ad spacium curationis. quod tamen Galenus iudicauit: alioqui in 9. libro in illo seruo tam copiosam phlebothomiam non fecisset. cur autem ita Galenus iudicarit, ea est ratio. quod in polyhæmis, & polysarcis, in euecticis, in robustissimis uiribus, ac ætate calidiore synochus generatur, atque ideo etiam

9. Meth. 3 & I I. Met.

14.

facta

facta phlebothomia ad lipothimiam, superest adhuc sanguinis copia sufficiens ad morbi finem. sic itaq; primæ rationi sit satisfactum.

Ad alteram rationem dico, Galenū verè dixisse, putredinem & obstructionem propriè ac per se non curari phlebothomia; at per accidens & consequio quodā; tantū abest, vt Galenus negarit, vt potius sæpissimè illud docuerit in eo, 11. a te adducto. lege igitur eius libri caput, 4. licet per totum illum librum sæpius idē repetitur: videbis Zoile futuram putredinem & obstructionem phlebothomia inhiberi, & factam curari, sed ex accidenti: cū solius boni sanguinis copia nimia est in corpore, si fiat phlebothomia, nōne & putredo & obstructio ne fiat impeditur? cū verò fit, aut iam facta est, nonne partim phlebothomia vacuatur, partim humorum agitatione obstructio tollitur, & humores ventilantur ne putrescant & calor venarum temperatur, quo semiputridi emendantur, putridi verò concoquuntur, & à natura expelluntur? nonne hæc omnia beneficia præstat phlebothomia? quæ licet per se ab alijs remedijs fiant, nihil tamen obstat quin per accidens etiam à phlebothomia præstari possint. parū profectò profecit in philosophia ac medicina, qui id quod est per se non potest distinguere ab eo, quod est per accidens. qua vna ratione multa in omni arte ambigua explicantur.

Notare etiam voluisti Donzellinum, qui syncopen dixit, cū lipothimiam dicere debuisset. foelicissimè iam agitur cum mortalibus, nam tertius è cœlo cecidit Cato. non iam ille Censorinus, sed Censorius, ac dignus

Quem veneranda tegat vestis, ac purpura palla.

Etsi Donzellinus Græcis potissimum scriptoribus operam dedit, cū tamen Medicus sit, Medicina autē præter Græcos, multos et habeat authores Arabas ac Barba-

Barbarolatinos, de ea arte benemeritos, oēs sibi duxit
plegendos. scis tu Zoile, qui diu es in illa barbarie enu-
tritus, & Arabas, & Barbarolatinos solitos esse duas il-
las voces confundere, quorum (licet fortassis inuitus,)
vestigia secutus Donzellinus ipse quoque eas confudit.
sed si putas illum ignorare syncopes ac lipothimiæ di-
scrimen, non mediocrem illi iniuriam facis. neque ta-
men puto, te tam inique de illo sentire, de quo viri do-
cti omnes magnificè sentiunt. Quòd si aut tu, aut alius
quispiam de hac re hæsitareret, ego facile possum proba-
re, longè vos decipi aut hallucinari.

Argumentum est à minori ex loco topico. Tu, qui
iuuenis es, & bonarum literarum ac melioris medici-
næ ignarus, illud nosti. ergo multo magis Donzellinus
& senex & in optimarum artium studijs ab ipsa statim
infantia educatus, illud nouit.

Diuinus profectò fuit Donzellinus, qui in sui libelli
præfatione, cum in nostri seculi mores inueheretur, di-
uinavit, non defuturos sophistas & sycophātas, qui eius
scripta cauillarentur ac fuggillarent. sed eo carmine so-
lari se ipsum potest,

Virtus repulsæ nescia sordidæ
Intaminatis fulget honoribus.

Horat. lib.
3. Ode. 2.

Oppugnatio quarta.

Donzellinus dicit, simplicem synochum putri-
dam non esse lethalem; contra. si per putredi-
nem simplicem intelligit leuem, ac paruam,
consentio. si verò simplicem, idest sine venenosa qua-
litate, dicis esse falsum. nam si vehemens fuerit pu-
tredo, licet non venenosa, tamen (vt tu asseris) letha-
lis erit.

Mirabar si quid recti dixisset Amyntas.

Tam stupidus tibi est animus, vt nihil veri possis
percipere

percipere. Synochum putridam grauem morbum esse, ac periculo non vacare, fatetur Donzellinus; quòd verò lethalem negat indignaris, nec tamen probas. Quæ tua ista est authoritas Zoile, vt nullo adducto probato authore in tui dicti confirmationem, tãquam iudex arbitrarius sedes pro tribunali, & tanquam authoritatem habens, sententiam pronuntias, qualem illi iudices, qui de causa nihil intellexerunt.

11. Meth.
14. & 9.
9. Meth. 3. Ego puto Donzellinum maximis rationibus innixū, dixisse, synochum putridam non esse lethale: cū enim Galenus dicat, eam febrem plurimū in polyfarcos & polyhæmos incidere, & rursus repetat hæc verba. porrò supra dictum à nobis est, eiusmodi febres in virtutē imbecillam nō incidere, quippe synochus bene habiti corporis & calentis ætatis propria est. Cū etiam dicat, in hac febre pulsus esse maximos, æquales ac vehementes; minime dubium est Galenum sentire eam febrem non esse sua natura perniciosam, cū tot subsidia habeat ad salutem. Quòd si montes putredinis velis cogitare, illud erit rarissimum, & quod non nisi malignissimus homo in argumentum possit reuocare.

x. prorrh.
14.

Locis supra citatis.

Si Galeni sententia lethalis morbus aut semper aut plurimū interimit, eiusmodi esse synochum te probare oportebat aut experimento, aut testibus, aut rationibus. Tu cū sis iuuenis experimentum adferre non potes, qui fortasse nullum vidisti, cū Galenus paucos viderit. Testes nullos adducis, qui dicant synochum esse lethalem, quinimo Galenus ex his quæ de ea dixit, salubrem facere videtur. At rationem habes, quia vehemens putredo potest interficere; sed vbi tam multa sunt ad salutem subsidia, non facile magna putredo generatur: aut si id aliquando contingat, insolens erit ac rarum. At si morbus esse lethalis debet, semper aut plurimum idem euenire necesse est.

Vides

Vides Zoile quo te rapiat litigandi libido, legisti quidem Galenum, sed Cato dicit; legere & non intelligere est non legere.

Oppugnatio quinta.

Donzellinus non recte damnat phlebothomiam in febre pestilenti. nam id repugnat rationi, & optimorum authorum sententiæ. Si humoris malignitas sit ex obstructione, hæc verò ex multitudine, ratio dicat ut tolli possit obstructio, prius tollendâ multitudinem. Præterea si putredo finiri nō potest nisi coctione; ergo quæ eam impediunt tollenda. ea verò est multitudo, qua natura grauatur, & meatus obstruuntur, igitur secanda vena, ut humorum moles minuatur, & meatus aperiantur.

Sed probatissimi etiam quique scriptores mittunt sanguinem in hoc morbo, Hippocrates, Galenus, Paulus, Aetius, Celsus, Auicēna, oēs denique melioris notæ Medici. turpe est autem à tam grauibus viris dissentire.

Ne quid autem causæ defis, Donzellini etiam rationes, repræhendis. Cum enim dicit, obstare virium imbecillitatem; Respondes, si id obstaret, non esse credendum magnos illos viros id latuisse: quare non id fuisse præcepturos, sed eius contrarium potius.

Addis deinde, duplicem esse imbecillitatem, per oppressionem naturæ viam, per resolutionem alteram, ac sæpè errare medicos, qui alteram pro altera accipiant. In vtraque autem viis phlebothomiam administrari, sed in priori copiosam in posteriori repetitam.

Multo autem minus omittendam phlebothomiā dicis metu agitationis, cum eam non timuerint maximi illi Medici: nec eam usque adeo magnam fieri, ut in pharmacia.

Tandem Donzellinum sui oblitum asseris sibi con-

C tradicere.

tradidere. Cùm enim humorem facientem febrem pestilentem, dixerit esse furiosum, illum tamē phlebothomia nō esse agitandū dicit, sed in quiete permittēdum.

Scribendi rectè, sapere est, & principium, & fons. At nunc,

Scribimus indocti doctiq; poemata pasim.

Scio Zoile cùm scriberes hanc oppugnationem, existimasse te in alijs quidem fore superiorem, in hac verò te gloriose triumphaturum. sed mihi crede vti in alijs fuisti ridiculus, ita in hac eris ridendus.

Relegavit Donzellinus lectores sui libelli ad Galeni libros, ex quibus suam de febre pestilenti sententiam desumpsit. At tu aut illos legere noluisti, aut verò non intellexisti, aut malignè, studio contradicendi garris.

Quo autem melius & clarius hæc disputatio procedat, cogor hic quædam præmittere. In primis autem dico, pestichias vocatas esse morbum epidemium, ac popularē, eodem enim tempore multos præhendit in eodem loco. dico etiam esse perniciosum, quia plures interimit. Id tu negas, cùm Brixia non magna usque adeo ciuitate constanti fama feratur, paucis mensibus mortua esse hominum duodecim millia: cùm eadem die supra centum mortui sint: cùm in eadem vicinia viginti, & eo plura eodem die funera sint exportata: cùm Medici decem aut duodecim vitam cum mortē commutarint.

Sed ex Brixienfibus illis medicis viris excellentissimis, qui superfuerunt, vnus scripsit, ac edidit librum contra Valdanium nostrum Veronensem clarissimum Medicum, in cuius initio scribit, febres illas pasim suā ciuitatem vexasse; quæ verba docent morbum fuisse popularem. Addit deinde, vulgus cùm videret multos interire, & res eiusmodi videre non esset assuetus, valde ægrè tulisse, & conquestum esse de medicis, malè de illis

illis sentiens, ac si non iustam diligētiam adhiberent in cognoscendo, & curando morbo: ita enim vulgus putasse, si medici recte illum cognouissent, & curassent, nō tam multos fore interituros: illum etiam morbum novitatem appellat: quæ omnia declarant & plurimos eo morbo laborasse, & ex illis plurimos periisse. licet igitur aliter postea idem scripserit, verissimum tamen est morbum illum fuisse epidemiam perniciosam: quas tamen pestichias fuisse constat, & eo nomine oēs appellarunt.

Præterea dico hūc morbum ex prava victus ratione ortum habere, non autem ex vlla aeris constitutione. cū n. eo potissimum tēpore grassetur, in quo ingēs est fames & annone penuria, mirum nō est si idem accidat, quod Galenus narrat initio libri de Euchymia; scilicet, quod multi ob inopiam pravis cibis vtentes ægrotent. Galenus enim de pravis & corruptis cibis loquens, dicit. Tales cibos hodie quoq; vrgente fame plures coacti comedere, à putridis ac pestiferis febribus interierunt. Tales enim cibi aut non concoquuntur, sed crudi manent, aut corrumpuntur, aut pessimam cacochymiam ingenerant. Si crudi manent, audi quid dicat Galenus. Maximè autem ad cacochymiam & morbos generādos facit cruditas asidua, siue ea boni, siue mali succi cibos sequatur. Liquet tamen deteriorem esse in mali succi cibis. Qui cū bipartiti sint: in his, qui succū gignunt tenuem, morbi fiunt acuti vnà cum malignis febribus. Hæc Galenus. Quod si corrūpantur: Audi rursus Galenum quid dicat, Nullus. n. ad tātum vnq̃ dementiæ veniat (te vno Zoile excepto) vt ignoret quantum insit in eo mali, si contēti in corpore humores in venenatas (ita enim vertendum est *φάρμακώδεις*) qualitates degenerent. & alibi. At quia humores corporum, & victus prauitate erant putredini obnoxij, hinc febribus pestilentibus origo data est. Si verò cacochymiam ingene-

In fine lib.
de Euchy.
Initio eiusdem lib.

1. de diff.
feb. 4.

Initio lib.
de Euchy.

1. de diff.
feb. 3.

rent, de ea ita Galenus. cum enim plures morbos ex ea
natos recensuisset, in quibus et fuerunt febres quampluri-
mae, tandem dicit. Quibus horum nihil accidit, interiere
omnes aut cum manifesta visceris alicuius inflammatione,
aut ob vehementem & malignam febrem. Per ca-
coethen autem febrem perniciosam & lethalem intellexisse
ex eo apparet, quod dicit, omnes interiisse. Cum
autem verisimile sit in multis fieri etiam plenitudinem
illam, quae vires superat, de ea haec Galenus. In altera
plenitudine, quae ratione potentiae dicitur, citò ad corruptionem
humores deueniunt, quoniam non amplius
superantur, nec concoquuntur probè; cum ea, à qua
conficiuntur, vis inualida existat.

Dices tu hic fortassis: etsi promiscua plebs & pauperes
ex inopia cogantur comedere cacochyma, diuites tamen
boni succi cibos comedunt, nihilominus illi etiam
eodem morbo fuerunt correpti. Respondeo, etsi diuites
euchymos cibos ingerant, ita tamen sunt voraces, ita
intemperantes, ut plurima scateant cruditate, hi praefertim,
qui ciborum varietate utuntur in eadem mensa,
& in otio degunt. Quae autem mala sequantur cruditatem,
paulo ante ex Galeno fuit dictum. ubi etiam asseuerabat
non tantum eam cruditatem esse perniciosam, quae fit in
cibis cacochymis, sed etiam euchymis.

Sed quid dicis, diuites uti cibis euchymis, cum fructibus
horarijs, oleribus, salsamentis, lacticiinijs, fungis, suilla
ac bubula carne, alijsq; huiusmodi se quotidie impleant,
atque ingurgitent: ex qua intemperantia non tantum cruditas,
sed corruptela, pessima cacochymia, obstructio & putredo
generatur: ex qua demum venenati prodeunt humores. Eiusmodi
autem viuendi ratione alij utuntur ob animi fordes, alij ob
voluptatem, alij ut bonis cibis satiati, gulæ & appetentiae,
irritamenta suppeditent. Quare si plebs ex paupertate, di-
uites ex

uites ex vitio & intemperantia eandem sibi perniciem accersunt.

Sed denuo repugnabis dicens. fames anno superiori vniuersam Italiam depopulata est. cur igitur non in tota Italia, sed paucis in locis tantum hic morbus viguit? Dico non ita paucis in locis pestichias fuisse molestas: nam & Venetijs, & Tridenti, & Romæ, & alijs multis in locis plurimi laborarunt. Et cum ex vario solo, ex ventis, ex situ locorum diuerso, cibi etiam cacochymi sint magis aut minus mali, & corpora magis aut minus ad noxiam parata; ex moribus etiam & consuetudinibus, institutis ac viuendi modo, alibi alijs ac diuersis, diuersæ etiam in corporibus dispositiones oriantur, mirum non est, si non ubiq; idem morbus grassetur.

His positis, dico in pestichijs non esse secandam venam. Primò, quia in tali morbo non esset secanda nisi 1. in principio. Probo, quia postea virtus est imbecillior quam vt eam ferre possit: & quia natura postea solet ad cutim extrudere venenatam materiam, & facere exanthemata, à quibus morbus nomen accepit. erumpentibus autem papulis, nemo est, qui dicat, secandam venam, sed imitandam naturam ac cucurbitulas adplicandas. Verum in principio, vt supra fuit positum, crudi humores sunt in prima corporis regione; qui facta phlebothomia rapiuntur ad venas, magno ægrotantium damno. & multis in locis Galenus vetuit phlebothomiam, ea cruditate existente in illis locis. vt libro Therapeutico per phlebothomiã, & 4. de tuenda valetudine. Idem etiã Paulus lib. 2. cap. 36. Secundò, in huiusmodi morbo 2. peccat ferè degrauans plenitudo. De qua Galenus hæc dicit. Si infesta sit degrauans plenitudo, non omnino molienda sanguinis detractio est. fieri enim potest, vt crudus per corpus collectus sit succus, in quo aduertendum diligenter est, quantum valeat robu-
staq;

Therap.
per phleb.
6.

Itaq; sit virtus, & quantum humor ipse sit refrigeratus; nam exoluta ab id genus affectibus virtus, (nota hæc verba,) adhibita sanguinis missione, in extremum malum recidere solët, vt nequaquã postea restitui possint. Quod vbi euenit, periculum non leue consequitur; potissimum si febris accidat statu æstiuo, stomachoq; male affecto. Hæc Galenus. Vires autem esse inualidas in ea plenitudine in loco supra citato, ex primo de differentiis febrium affirmat Galenus. cuius initium. In altera plenitudine, quæ ratione potentiaë dicitur, &c.

Cap. 9. Idem etiam in Therap. per phlebothomiã, cùm dicit. Neq; enim vbi tanta crudorum humorum copia cumulata est, vt secandam venam prohibeat, ratio redarguitur; nam istis virium robur non adest.

3. Tertiò, ex suprapositis ac statutis constat, pestichias esse morbum perniciosum ac sua natura lethalem. De huiusmodi autem morbis Galenus dicit, morituros esse solis prognosticis relinquendos, & 11. methodi. In quo enim desperata omnino salus est, imprudentis consilij fuerit apud vulgum infamare præsidia, quæ multis fuisse salutis. & paulo post. Verùm nos tempora præsidiaq; his scribimus, quos seruari spes est, quãdo ægris, qui insanabiles sunt, ijs nec tempus vllum opportunum, nec præsidium est; Ergo nec phlebothomia. In comment. etiam aphorif. scribit. Nam in morbis exitialibus non modo quando sunt suo vigori vicini, sed etiam in prioribus temporibus nihil mouere oportet. Recordantibus nobis, quòd deploratos non oportet attingere, sed relinquere: & morbi finem tantummodo prænuntiare. Tunc igitur Zoile infamabis auxilium nobilissimũ phlebothomiam? tu morituros phlebothomabis?

O caput anticyris tribus insanabile.

4. Quartò, Galenus initio Libri de Euchymia, laudat eos Medicos, qui in illis febribus pestilētibus ex deprauato

uato victu & cacochymia ortis, sanguinem non mitte-
bant: dicit enim. Cumq; medici nonnulli paucis om-
nino quibusdam sanguinem mittere auderent (nota
auderent) morbi initio, (si quidem non iniuria reme-
dij huiusce vsu reformidabant, propter virium iam
antea factam imbecillitatem) nulli eorum animaduerti
sanguinem profluxisse probum.

Quintò, robur virium potissimum requiritur in phle 5.
bothomia, at in pestichijs desideratur: qui morbus cum
eâdem originē habeat, qualē ille, de quo Galenus paulò
ante dixit, Medicos illos rectè abstinuisse à phlebotho-
mia propter virium imbecillitatem, facilè est videre de
similibus idem esse iudicium. Ex alijs etiam locis ex Ga-
leno superius adductis idem patet: in quibus dicit. In
crudis humoribus, in cacochymia, in humorum corru-
ptela, & in plenitudine grauante vires esse imbecillas,
aut sanè momentaneas: quas tamen Galenus postulat
validas, & in præsens, & in futurorum. Quòd si in hoc
morbo occulta quædam ac perniciofa veneni vis inest,
vt probatum est supra & magis adhuc infra probabi-
tur, minime dubium est, aut esse iam debiles, aut mox
futuras.

Postremò, Galenus, 9. de Methodo, agēs de synocho 6.
dicit. Aufero itaq; ab homine eousq; de industria san- Cap. 4.
guinem, quoad animo linqueretur. maximum planè
vbi vires valentes sunt, continentis febris, remedium.
id quod tum ratione tum experientia didici.

Cùm itaque Donzellinus in suo libello & rationes &
clarissimorum Medicorum experimenta pro suæ sentē-
tiæ confirmatione adduxisset, tu tamen illis nō adquie-
scis. Ego itidem nouas rationes posui, quibus vel inui-
tus cogeris assentiri. Donzellini experientiam ego plu-
rimi facio, cùm annos iam triginta Romæ Illustrissimi
Durantis Cardinalis Medicus familiaris, Venetijs, in
aula

aula Cæsaris, & Veronæ medicinam factitarit: & iam in medicina veteranus dici posfit, plurimosque nobilissimos Medicos nouerit, quorum actiones & praxim diligenter animaduertit.

1. Ethic. 1.
Eodē loco. Cum itaq; finis Medicinæ sit non cognitio, sed actio; ea verò in singulis versetur, quorum iuuenes sunt per etatem inexperti ac imperiti (vt Aristot. dixit) fit etiã, vt ea iudicare non possint. nam (vt idē docuit) vnusquisq; rectè iudicat ea, quæ nouit, & eorū bonus est iudex. Tu verò Zoile cum sis iuuenis, & in singulis nondū sis versatus, ea non potes cognoscere, quare neq; iudicare.

6. Ethic. 9. Omnes etiam in medico prudentiã requirunt: at eam esse in iuvene Aristoteles negauit, cuius rationem assignans, dicit. causa hæc est, quòd etiã in rebus singularibus prudentia versatur, quarum cognitio usu comparatur. Adolescens verò usum rerum non habet, quippe quem temporis longinquitas sit allatura. Rursus audi Cap. 8. quid Aristot. dicat, 6. Ethicorum. Neque verò rerum vniuersarū modò prudentia est, sed debent ei notæ esse etiam res singulares. Ad agendum verò idonea est. In rebus singularibus autem omnis actio versatur. Itaque tum hic nonnulli inscii sunt ad agendum scientibus aptiores, tum in alijs rebus ij, qui sunt usu periti. Nam si quis sciat carnes leues esse ad concoquendum faciles, & salubres, leues autem quæ sint ignoret, bonam valetudinem non efficiet, sed potius efficiet, qui scit auium carnes esse leues & salubres;

Prudentia autem in agendo posita est.

Danda igitur opera est, vt vel vtranque cognitionem habeamus, vel hanc potius quàm illam.

Audis Zoile q̃ magnificat Aristoteles experientiam?

Arrige aures obsecro, nam video te aliquanto stupidiorem.

Sed initio etiã suæ metaphysicæ clariùs adhuc tuam arrogantiam

arrogantiam retundit. qui cùm sis iuuenis, senibus & expertis uis præferri. Sed audi Aristotelem; Ad agendum itaque nihil videtur experientia differre ab arte. Quinimo videmus expertos magis id quod intendunt consequi, quàm illos qui rationem sine experientia tenent. Causa verò est, quòd experientia singularium, ars verò vniuersalium cognitio est, actiones autem ac generationes omnes sunt circa singularia. Non enim hominem, sed Calliam & Socratē sanat, qui medetur. si quis igitur rationem absq; experientia teneat, & vniuersale quidem cognoscat, quod autem sub eo particulare est ignoret, sæpenumero errabit à sanando. Tu igitur Zoile neq; prudens, neq; expertus esse potes cum sis iuuenis, sed tui officij fuerit prudentibus ac expertis auscultare. Solus & artifices, qui facit vsus erit.

Rectè igitur ille, qui dixit. Difficile admodum est benè confidere in Medico iuvene non experto.

Aristoteles in sua Rhetorica dixit, humanum corpus à trigesimo anno ad trigesimum sextum vigere: intellectum verò vim suam maximā obtinere anno quadragesimo nono: septenario scilicet climacterico. Sculariū autem annorum magna semper apud doctos viros fuit autoritas. quare, cùm tu sis iuuenis, multum adhuc tibi potest crescere intellectus; ac tantum tibi deesse putres, quantum ab illius fatalis anni perfectione per ætatem es remotus.

Sed iam tuas rationes expendamus, & ad lapidem lydium illas adfricemus ueritatem scilicet; videamusq; sint ne aureæ, an argentæ, vel potius orichalcum referant, qd Aristoteles in elenchis, de paralogismis dixit.

Primò statuis, tollendam esse multitudinem, vt tollatur obstructio, & putredo cōsequi possit à natura supra residuum fortiore. Optimè sanè ratiocinaris Zoile; sed eorum in censu mihi videris numerandus, de quibus

D Aristoteles

Aristoteles dixit, Ad pauca respicientes de facili enuntiant. Tu vis videri theoreticus & practicus, sed mihi crede, tu es generis neutri. Ne fiat phlebothomia obstat virium imbecillitas, obstat etiam cruditas humorum in prima corporis regione, ut supra fuit demonstratum: quibus presentibus nemo aut veterum aut recentiorum voluit venam secari. Non enim sola indicantia, sed & contra indicantia Galenus iubet observari. Tu verò illa non potuisti peruidere, quia, sub pectore læuo

Nil salit Arcadico iuueni.

Secundò dicis Donzellinum pugnare cum sapientissimorum hominum, quos nominas, sententia. Respondeo, meliorem eorum partem, cum iubet venam secari, loqui de præseruatione, ut Paulus, Aetius, Rufus, & alij multi: qui autem de curatione intelligunt, illi omnes supponunt præcepta generalia alibi tractata, quorum illud potissimū est, quod in phlebothomia virium robur requiritur. Nos autē supra ostendimus, in pestichijs vires esse labefactatas. At tu dicis, si in hoc morbo vires essent debiles, tam graues viros id non latuisset; quare phlebothomiam non præcepissent, sed potius vetuissent. proculdubio illud sciuerunt, & uti supra audiuisti ex initio libri de Euchymia illi Medici propter imbecillitatē virium à phlebothomia abstinebant, & Galenus eos laudat. Quod si id quod in præcepto generali fuit dictum, id semper in singulis capitibus non repetunt, intelligi tamen volunt, etsi vniuersalia semper singularibus non adcommodant. Aliquid enim putant relinquendum lectori, quod suo marte debeat intelligere.

Vides Zoile tuas cogitationes esse insomnia vigilantium, ut Aristoteles solebat appellare: insomnia inquā, non quæ per corneas, sed per eburneas fores transmittantur ac euolent.

Præterea controuersia nostra est de febre pestilenti, quæ est

quæ est citra pestem, & non ex aere, sed ex victu depravato pendet, & pestichix appellantur. At authores à te adducti loquuntur de febre pestilenti, quæ est in peste ex aere, non autem de pestichijs. Quare nihil ad rem faciunt, quæ dicis.

In ea verò parte mihi videris admirabilis, vbi egregiè de duplici virium imbecillitate philosophatus, dicis, te valde vereri, ne Medici sæpè errent in discernenda virium debilitate, quæ fit per oppresionem ab ea, quæ fit per resolutionem. Id verò puto te dixisse & cognouisse, quia fortassis illud tibi iuueni inexperto sæpe usu venit, vt in eo hallucineris. Cùm alijs doctis & exercitatis minimè contingat: quibus promptum est alteram ab altera internoscere.

Tu igitur ex hac tua subtili speculatione vis colligere, in pestichijs curandis errare eos medicos, qui ideo abstinēt à phlebothomia, quia putant vires esse imbecillas per resolutionem, cùm tales sint propter aggrauationem ac multitudinem, quæ per te tolli debet per venesectionem.

Quasi verò coniungi non possint duæ hæ virium imbecillitates, & de facto coniungantur in hoc morbo. Cùm enim prava materia sit cumulata, quæ facit plenitudinem ad vires, & ita vnam imbecillitatem, ex ea etiā sequitur altera. Nam cùm materia, quæ grauat, non sit bonus sanguis, sed prauus humor membris ingratus, sequitur partes esse resolutas, tum ex continua coloris naturalis actione, tum etiam ex vi morbi.

Ac ita vtraque imbecillitas coniungitur, ut in hydrope ac alijs morbis, in quibus & mala & copiosa materia est collecta. quæ uti multa facit imbecillitatem per aggrauationem, uti uerò mala cùm non sit alendis partibus idonea, alteram facit imbecillitatem per resolutionem.

Est præterea tertia causa debilis uirtutis, quæ est pernicies, mala qualitas, ac venenû, quo vires omnes prosternuntur, & spiritus corrumpuntur, ac cor potissimum male afficitur.

Therapen.
per phleb.
6.

Quare facile est videre, nisi quis sit talpa cæcior, in hoc morbo triplicem esse causam imbecillitatis virium; si rectè superius dicta expendantur: quare qui sanguinem mittit, iugulat ægrotantem, vt supra nobis dicebat Galenus. Ego profectò valde vercor, ne sit necesse vt tibi secetur vena, iuxta illud Satyrici.

Currite iam Medici, mediam pertundite venam.

Ex qua scilicet fluat sanguis è cerebro melancholicus. Ad Critonis historiam, dico, si vllò vnquã casu à phlebothomia fuit abstinendum, in hoc maxime fuisse, si Galeni doctrinã sequi velimus. Primo, quia in eo fuit plenitudo vires grauans, vt ibi Galenus dicit: quam totam cum natura à principibus partibus non potuerit ad pedem extrudere, ea regurgitauit ad caput: deinde fuit maligna & cacoethica, vt Galenus docet & tu fateris: quis ergo dubitat vires initio ita fuisse iuualidas, vt nullo pacto phlebothomia conueniret? Deinde morbus fuit ab initio lethalis; aut igitur Hippocrates rudis, qui illum non cognouit, aut si cognouit soli prognostico fuit relinquendus. lethalem fuisse illud docet, quòd secunda die hominem interfecit. Quare si Galenus sua præcepta vult esse rata, cogitur fateri, in eo casu nequaquã faciendã fuisse phlebothomiam. Nulla igitur fuit causa, cur Hippocratem reprehenderet.

Multò verò rationabilius quis mirari potest Galenû: qui dum Hippocratem vult excusare, dicit, illum non semper initio morbi fuisse accersitum, sed morbo iam progresso. Ego libenter interrogarem Galenum, quid per morbi initium intelligat. Ipse enim triplex fecit morbi principium, pro primo morbi insultu; pro primis tribus

bus diebus; & pro ea morbi parte, in qua morbus adhuc est crudus. In historia Critonis, si vult excusare Hippocratem, quia non fuit à principio vocatus, de primo insultu non intelligit, quia nemo Medicum vocat nisi post illum insultum, qui est momentaneus. De secundo etiã minus intelligit, quia in eo fuit vocatus, at excusatio dicit, illũ non initio, sed progressu iam morbo, puta in augmento fuisse accersitum. Criton autem mortuus est secunda die; ergo in principio fuit vocatus, non autem progressu iam morbo. De tertio aut principio non potuisse illũ intelligere, patet, quia citò mortuus est, materia cruda, & ita non euasit illud tertium principium.

Deinde non video quem locum habeat Hippocratis repræhensio, quam facit Galenus; nam illa supponit, Hippocratem fuisse vocatum in principio, & tamen postea dicit, illum venisse progressu iam morbo; quæ verba significant augmentum. Sed hoc etiam falsum est, nam Criton mortuus est in principio siue secundo, siue tertio modo accepto. nullum igitur locum habet neque accusatio, neque excusatio Galeni, imo falsa est in hac saltem Critonis historia.

Vides Zoile tuam infeitiam. Tu arripis verba, res autem non consideras. Id verò accidit, quia tu neophytus es in medicina, & etiam quia,

Frigidus obsistit circum præcordia sanguis.

Dicis postea, cum vires imbecilles sunt ex oppressione, copiosam phlebothomiam esse faciendam. O Zoile, quis vnquam à te tam absurdam vocem expectasset?

Ite malam venti celeres dispergite vocem.

In oppressione virium ob multitudinem boni sanguinis, iubet quidem Galenus copiosam phlebothomiam administrandam. At vbi vires oppressæ sunt à multo quidem, sed cruda, cacochema, maligna materia, vt in hac febre supra probatũ fuit, Galenus dicit hæc verba.

Exoluta

Exoluta enim ab id genus affectibus virtute, si mittatur sanguis, in extremum malum recidunt ægrotantes, ut nequaquam postea restitui possint.

Quid verò tibi in mentē venit Zoile, cum negas, phlebothomiam nō agitare sanguinem in venis? imo maiorem à pharmacia, quàm à phlebothomia fieri humorū agitationē? In te profectò quadrat illud poetæ carmen.

Furor arma ministrat.

9. Metho. 4

Galenus recitat, facta phlebothomia in illo iuvene, qui synochum patiebatur, statim secutam esse alui relaxationem, vomitum, sudores copiosos. Quòd si dices id verum esse in phlebothomia ad lipothimiā facta, in alijs nequaquam. Respondeo, etsi nō tanta fit, fit tamen pro ratione sanguinis euacuati. Idem etiam dicit, phlebothomia ventilari sanguinem, ob motum humorum aperiri obstructions, in phlebothomia seruādam esse rectitudinem κατὰ ἰξιν, ut motus sanguinis fiat ad partē opportunam & à parte læsa: quæ omnia hominibus non prorsus stupidis declarant, magnam per phlebothomiā in sanguine fieri agitationem; Tu solus in media luce palpas tenebras Zoile.

11. Meth.

Quod verò dices in pharmacia, quàm in phlebothomia magis agitari humores in venis existētes: (etsi hæc comparatio nihil ad rem nostram facit) respondeo, si de veterum medicamentis validissimis ac elaterijs intelligis, fieri fortasse potest, ut verum sit, quod dices. Sed si idem intelligi vis de nostris, quibus quotidie vtimur, correctis & castigatis, aut per se clementibus ac benedictis, nego & pernego, ac tu turpiter hallucinaris.

Postremo dices, Donzellinum sui oblitū esse, qui cū dixerit materiā pestichiarū esse furiosam, postea illā dicit nō esse phlebothomia agitandā. Vsq; adeo ne es tam perfictæ frōtis, ut tam inuerecūdè audeas loqui de viro, quem oēs, qui illū norāt, amant, colūt, ac venerātur?

Galenus

Galenus comment. 2. aphorismo, 29. dicit, circa initia eorum morborum, in quibus speramus ægrotū conualiturum, tentandū est afferre maiora remedia, de quibus Hippocrates dixit, si quid videtur mouendū moue. Sunt autem hæc, maximè quidem venæ sectio, nonnunquam verò & purgatio. postrema hæc verba de materia turgente omnes interpretantur, & ita interpretandum docent Hippocrates & Galenus aphorif. 22. & 24. primæ particulæ. Galenus etiam alibi docet morbum quemlibet salubrem oportere decurrere per quatuor tempora. Ex his colligo, cū materia in morbo acuto furit, nō totam furere, sed eius partem tenuiorē tantū & acriorem & calidiorē; reliquam verò, quæ morbum quidē facit, sed non adeo ferox est, quietam in suo foco ac loco permanere. Alioqui sequeretur, euacuata per pharmacum turgente materia, in ipso statim principio morbū salubrem terminari. quod absurdum omnino dictū est. Idem etiam & Hippocr. & Galenus voluerūt. Hic enim dicit aphorif. intelligendū esse de his, qui seruari debēt, cū dicit, in principio morborum, si quid videtur mouendum, moue; in vigore autem quietē seruare melius est. Ecce hic volunt initio materiā euacuari, quæ scilicet furiosa est. Reliquæ autem coctionem expectari, donec per sua tempora absoluantur. Cū igitur Donzellinus dixit, pestichiarū materiā esse furiosā, verè dixit; de ea parte intelligēs, quæ in motu est, furit & agitur. Idem etiam dixit, non esse quiescens venenum agitandum; de reliqua intellexit, quæ reliqua morbi tempora facit, & quietā manet vsq; ad concoctionem & morbi finem, quam ipse antidotis absorberi, discuti, alterari aut à natura adiuta antidotis euacuari, & è corpore tādē superatam vult exturbare.

i. de cris.
& de toti⁹
mor. t.

Vbi hic est cōtradictio Zoile? eam Aristot. in Eléchis uoluit esse eiusdem ad idem, eodem tempore & modo.

Verūm

Verum tam crassum tibi est cerebrum, obtusumq; ingenium, ut ista non intelligas.

Quare tibi amice consuluerim, ut te traderes in Pythagoreorum disciplinam ac scholam, in qua per quinquennium fileres, interimq; operam dares non tantum philosophiæ & medicinæ, quarum omnino es rudis: sed multo magis grammaticæ. nam facile apparet, te in ea quoq; parum profecisse, ut tua scripta non tantum Cleanthis, sed ne Scopæ quidem, Cantalicij aut Macinelli lucernam ne minimum quidem redolere videantur.

Oppugnatio sexta.

DOnzellinus affirmat, Galenū 11. Methodi docere curationem febris putridæ, in qua simplex tantum est putredo; non autem qualitas venenata ac pestilens. Id falsum esse pluribus rationibus probare contendis.

Prima febris pestilens non differt à reliquis putridis nisi magnitudine & excellētia putredinis. ergo qui tractat de omnibus putridis, agit etiā de pestilentibus, quæ eiusdem nature sunt cum illis.

Secunda superfluum est putredini addere qualitatem venenatam, cum sola putredo sufficiat ad hominem interimendum: est enim via in corruptionem & mortem. Si igitur venenum illud est somnium, in pestilenti febre sola est putredo, ergo qui agit de putridis agit etiam de pestilentibus.

Tertia eadem causæ & eadem curatio cōuenit & putridis & pestilentibus, ergo Galenus in eodem libro de illis egit, causæ sunt humorum multitudo, crassities, lentor, prohibita transpiratio. Curatio verò concoctio, euacuatio, ventilatio. Quæ omnia tam his, quam illis videntur conuenire.

Dicis postea, duplicem esse putredinem, vnam quæ fit
ex dictis

ex dictis nunc causis internis: alteram verò, qua aer inquinatus, corruptus, ac venenatus per inspirationē cor inficit, & tanquam veneno vitiat ac labefactat. De priori illa omni actū esse in 11. methodi, de posteriori verò in fine decimi pollicitum esse Galenū, se peculiari quodam libro tractaturum. Quare errare Donzellinum, qui febres pestilentes ex causis internis, & pestilētes ex aere venenato in eodem genere posuit.

Incidit in foueam præceps quam fecerat ante. Et si in omnibus alijs tuis dictis inscitiam tuā plus satis patefecisti, in hac tamen oppugnatione longē magis. Tu nihil aliud crepas quā tuum illud, pestilens qualitas non differt à communi putredine nisi vehementia, magnitudine aut excellentia, maioris tandē ac minoris ratione. Hoc certē fuit Galeni dictum, sed à te prauē ut reliqua omnia intellectum. Neq; enim Galeni sententias ponderas, sed numeras tantū, & per transennam, aut vitrum contemplaris.

Ego Zoile statuo, vehementem putredinem esse venenatam qualitatem, idque ex Galeni sententia. Id tu negas. At ego vi rationum eò te compellam, ut velis nolis illud fatearis. quinimo ex tuis verbis te conuincam.

Quò verò omnis tibi tollatur tergiuersandi occasio, & quoniam insignem in te video ingenij crassitiem, animiq; stuporem, clarioris doctrinæ causa, triplicem facio febrem pestilentem. Prima pendet ex victu deprauato, cacochymia & causa interna. Secunda ex aere corrupto & pernitiōsa qualitate infesto. Tertia ex vtraque causa originem dicit. de quibus omnibus Galenus agit initio libri de febrium differentijs. In omnibus hisce generibus febris pestilentis non solam putredinem, sed deletēriam ac venenatam qualitatem esse dico; idque firmis-
 Cap. 4.

Febres pestilentes primi generis ex cacochymia &
 E causa

causa interna sunt ille, de quibus meminit Galenus initio libri de Euchymia. Illæ item quas nominat libro de differen. febrium primo, dicens. Fit enim & aliquando ob eos, qui sunt in corpore humores, ad putrescendum paratos, cum breuem aliquam occasionem ad febris originem ab ære ambiente acceperit animal.

Secundum genus intelligit eodem in loco, cum dicit, magna aut ex parte oritur febris pestilens ex inspiratione aeris circumstantis à putrescibili euaporatione infecti.

1. de febr.
differ. 4.

Tertij autem generis illa fuit, quam Thucydides descripsit. Nam ut Galenus inquit, vtraq; causa & interna & externa illam genuit. Priorem enim causam notat Galenus, cum dicit; At quia humores corporum ex vitus prauitate erant putredini obnoxij, hinc febribus pestilentibus origo data est. Externam verò & alteram causam ponit, cum dicit. Fortè autem per continuum ex Aethiopia quædã putredinis fluxere cõtagia, ijs, quorũ corpora erant ad patiendũ parata, febriũ causæ futura.

In hisce omnibus antequam demonstrem esse perniciem venenatam, in primis explico, quid sibi velit Galenus cum nominat putredinem excellentem, validã, magnam, vehementem. Galenus 6. de locis affectis: primo de febriũ differentijs, 6. Epidem. 3. de præfagio pulsuũ, vbi agit de vehemēti humorum corruptela, etsi semper eius causam faciat putredinem, non obscurè tamen declarat, per insignem illam putredinem se intelligere venenum. Ut cum agit de concreti sanguinis grumis: vbi graua ac pessima symptomata recensuit, quæ sequuntur sanguinem in grumos conuersum, admirabundus dicit. Ut mirari aliquis possit, quæ nam sit huius euentus causa. Quippe cum omnium, quæ in corpore sunt, sanguis maximè sit familiaris, quomodo ex suis vasis effusus, tanti mali authorem se præstet, ut & putredo partiũ & mortificatio ipsum sequi possit. Cum itaque numerata supra ab

pra ab ipso symptomata ipsi Galeno digna admiratione videantur, & manifestè venenum demōstrent, illud tamen putredinis nomine Galenus appellauit.

In venenum autem verti thyrumboſ, illud etiam docet, quòd eodem in loco Galenus puris mentionem facit, à quo tamen nulla grauiſſima symptomata facta eſſe dicit. Hic itaque putredo Galeno venenum ſignificat.

Cùm verò Galenus agit de vterinis affectibus, & ea ſymptomata recenset, quæ ſequuntur menſtrui aut ſeminis corruptelam, apertè docet, illa in venenum verti. Alioqui locum non haberet illa quæſtio, an ſpōte in nobis gigni poſſit talis corruptio, vt lethalibus venenis æqualem aut ſimilem vim & qualitatem habeat.

Illic tamen Galenus perpetuò putredinem nominat, ſed quam ita interpretatur, vt apertè velit per eam venenum intelligi. putredinem autem vocat, quia ab ea initium habuit corruptela & venenum; Excellens igitur putredo illi eſt venenum.

In duobus verò illis locis vbi per excellentiam putredinis, febres peſtilentes à reliquis differre dicit, ſine cōtrouerſia loquitur de peſtilenti febre & putredine, quæ fit in peſtilentijs ex aere corrupto & contaminato, ac vt tu etiam appellas, venenato. Nominat enim Athenienſem à Thucidide deſcriptam, quam dicit ex Aethiopia per continuum aerem fuiſſe delatam: & diuturnam illam ac magnam ſuæ ætatis peſtilentiam. Tu verò etiam fateris febres peſtilentes ex aere contaminato eſſe venenatas. igitur ſi Galenus illic vocat excellentem putredinem, quæ fit in illis febribus, neceſſario ſequitur per eam intelligere venenum.

Idem etiam Galenus primo de feb. differ. cùm plures peſtilentias recenſuiſſet, tum quās ipſe vidit, tum quās Hippocrates deſcripſit, tādē dicit. Eorum aut ſumma

3. de præſag. pulſ.
6. Epidem.
1.

Cap. 4.

& cephaleon, vt ipsemet Hippocra. ostendit, erat putredo. De pestilēti autem aeris statu in eodem capite, hæc dicit Galenus. In pestilenti verò aeris statu inspiratio potissima est causa. Item. Magna autem ex parte ex inspiratione incipit aeris circumstantis à putrescibili euaporatione infecti. Illam autem infectionem paulopost dicit ex lacuum, paludum, stagnorum aut cadauerū euaporatione prodijisse. Hanc verò euaporationem, 2. de natura humana, dicit; totius substantiæ proprietate, nō simplici aliqua qualitate nostra corpora vitare. Quæ autem totius substantiæ proprietate nos lædūt & corrumpunt deleteria sunt & venenata. Paulus etiā cū lib. 2. cap. 35. nominat putredines pestilentes intelligit venenatas. tum Galenus ad Pisonem, dicit; pestem vti ferā furere, ac nos per anhelitū trahere vim deleteriam. Igitur de primo ad vltimum sequitur, illud cephaleon ad quod omnia, quæ in pestilentijs contingunt, Galenus & Hippocrates redigunt, putredinē scilicet, esse venenū. Et cū dicit, hanc putredinē ab alijs differre per excellentiam, hanc excellentiam constat iam clarius luce meridiana, esse pernitiem ac venenū. Si modo quis in Galeni & Aristotelis consequentijs tractandis sit educatus ac institutus. Tibi verò qui Petri Hispani, Pauli Veneti, aut Tartareti consequentias tantū nosti, fortassis aliter videbitur. Sed talpa cæcior est, qui hæc non videt. Præterea Galen. in fine 10. de methodo dicit, se in alio libro acturū de hecticis pestilētibus, & de putridis pestilentibus. cū aut in eo Libro diligenter sit persecutus ea omnia, quæ pertinent ad exactam earum hecticarum considerationem, quæ à simplici qualitate pendent; certum est si alibi de hecticis est disputaturus pestilētibus, id nō alia de causa facturum, nisi quia vltra caliditatem secum adiunctam habent venenatam pernitiem. ergo cū de putridis diligenter tractarit in vndecimo, non
 alia ratio

alia ratione nouum de pestilentibus putridis tractatum pollicetur, nisi quia illæ supra putredinē includunt venenum, vt etiam hecticæ.

Dices, fateor pestilentes putridas ex aere in pestilentijs, venenum continere. Cui dubium. At qui de illis loquitur Galenus, cū dicit, illas differre ab alijs putredinis excellentia. Illa igitur nihil aliud est q̃ venenum.

Iam verò demonstremus in omnibus generibus feb. pestil. supramemoratis inesse hoc venenum. In primo genere, qd̃ fit ex victus prauitate, illud reperiri, docet Galenus initio Libri de Euchymia: vbi de illa pestilentia, quæ nō ex aere, sed ex caco-chymia originem duxit, scribit in hunc modum. Nullus vnquam ad tantum dementiae venit, vt ignoret, quātum insit in eo mali, si contenti in corpore humores in venenatas qualitates degenerent. Vertendum autem esse venenatas, & non medicamentosas (vt interpres) ex proximè sequentibus patet. & Galenus. 6. de locis affectis cap. 5. per pharmacodes intelligit venenatos, & ita vertit interpres ter aut quater, quatuor tantum aut quinque versuum spacio infra ea verba, quæ incipiunt. Reliquum est, vt inuestigemus, an in animantibus corruptio aliqua nasci possit tam vehemens &c.

In Libro etiam de Theriaca ad Pisonē, in historia de Mithridate sexies vtitur ea voce pharmacū pro veneno.

Eandem etiam Galenus in eo initio Libri de Euchymia tractat quæstionem, quam & in 6. de locis affectis disputauit, de venenis, & de sympathia & antipathia rerū, quæ nullum haberet locum, nisi existimasset ex illa caco-chymia, vnde orta fuit illa pestilētia humores in perniciosam ac venenatam qualitatem fuisse mutatos.

Dicit etiam in eo loco, febres illas pestilētes fuisse lethales vt omnes ex illis interirent; quæ manifestum venenum demonstrant. Vocat etiam Galenus eodē loco eas febres

eas febres pestilentes, cacoethes, quam vocem supra indicauimus Galenum & Hippocratem accipere pro lethali, pernicioso ac venenato.

Secundum verò feb. pestil. genus ex aere scilicet, esse venenatum & tu fateris, & supra à nobis fuit demonstratum. Quare cum tertium genus ex illis duobus constet, quale fuit Thucididis pestilentia, & ea, quæ Galeni ætate diu grassata est, quæ idea illi fuit similis (vt inquit Galenus) patet hoc etiam genus esse venenatum.

Sed iam ad nostram cōclusionem accedamus, quam cum Donzellinus veram, tu falsam dicis. In vndecimo scilicet methodi non tractare Galenum febres pestilentes, sed tantum simpliciter putridas. Hanc autem etsi Dōzellinus in suo libello satis pbauit: ego quoq; nouis rationibus probandā puto, anteq̃ tuas rōnes dissoluā.

Febres pestilentes cuiuscunq; illæ sint generis præter putredinem adiunctam habēt perniciosam qualitatem (vt supra probatum fuit) hoc autem Galenus in eo libro nunquam nominauit: ergo de illa nihil cogitauit. Cum enim illa qualitas peculiarem scopum faciat in curatione, de ea non fuit silendum.

2. Galenus in fine vndecimi de Methodo promittit, se scripturum alium librū de febribus pestilentibus. Certum est aut̃ illum librum non esse vndecimū, dixisset. n. in sequenti libro se de illis acturū: & cum dicat in eodē se disputaturum de febribus colliquantibus, & hecticis pestilentibus, de quibus nō egit in vndecimo, aliū omnino librū ab eo diuersum intelligit: neq; enim verisimile est si Galeno propositū fuisset agere in vndecimo de febribus vllō modo pestilētib. quin eo in loco illud dixisset. sequitur itaq; & in alio lib. illum de eis disputasse, & in vndecimo nequaquā. Dicis tu, in vndecimo egit de pestilentib. ex causa interna, in illo alio verò de pestilētib. ex causa externa. Sed cum Galeno nota fuerit hæc distinctio,

stinctio, quare generaliter dixit de febrib. pestilētib. sine vlla distinctione? Artem diuidendi optimè nouit Galenus; nec verba illi defuerunt, quibus suam sententiā explicaret; vir alioqui loquacissimus & plus satis facūdus.

Si Galenus in vndecimo egisset de febrib. pestilentib. 3. superuacaneus omnino fuisset ille alius liber, quē pmissit. Cūm. n. per te de illis egerit, quæ pēdent à causa interna, illæ autem, quæ fiunt à causa externa, per Galenū à te citatum & interpretatum ab alijs nihil differāt nisi per excellentiam putredinis: sequitur necessariò, per te Galenum egisse de omni febre pestilenti: in quo tamen ne verbum quidem fecit de tali febre. Dices fortassis, Galenum partitum esse duo illa genera febr. pestilent. & in vndecimo egisse de priori, in illo alio verò de posteriori. Id paulò ante refutauimus. sed nunc denuò dicimus, in fine 10. Galenū polliceri librū, in quo agat de omnibus febribus, quæ in pestilentijs contingunt. At in pestilentia Thucididis, & in illa magna, quæ fuit Galeni tēpestate Atheniēsi idea simili, & in ea etiā, quæ describitur initio libri de Euchymia, febres fiebant ex causa interna. ergo in eo de illis egit. ergo nō in 11. vt tu dicis.

Præterea, si per te febris pestilens vtriusq; generis nil aliud est quàm excellenter putrida. ergo de illis vtriusq; egit in vndecimo. ergo alter inutilis. Sed quia putrida simplex siue euithes, & putrida cacoethes sunt diuersæ: Ideo Galenus præter vndecimum in quo de simpliciter putridis, peculiarem pollicetur de pestilentibus, quemadmodum etiam de hec̃ticis diximus.

Vides Zoile quàm ineptus sis ratiocinator, & quam perfunctoriè Galeni dicta legas, & perperam intelligas, ac falsò interpreteris? Tu facis hysteronproteron, qui vis docere, antequam discas.

Iam verò tempestiuum est, vt tuas illas diuinas rationes pensitemus ac diluamus. Id verò tam facile fuerit,

vt non

vt nō manibus, sed pedibus potius illas simus soluturi.
Primæ illius consecutio negatur. Probatio verò inanis est bulla. Nam diuersam esse earum naturam supra demonstraui.

4. Meteor.

In secunda verò quod dicis, superfluam esse qualitatem venenatam, cum sola putredo sufficiat ad mortem ac perditionem. Idem est ac si diceres, in bello necessariae non sunt bombardæ, quia gladij sufficiunt ad homines interimendos. & in ciuitatibus necessariae non sunt cruces, patibula ac suspendia, nam secures ad delinquentium necem sunt satis. Confundis Zoile cum putredine corruptionē, ac si via alia nulla sit ad interitum q̃ putredo. quasi nihil deterius homini accidere possit q̃ putredo. Corruptionem Aristoteles genus facit, putredinem verò speciem. Quæ enim putrescunt corrumpuntur, non contra. Nam ligna, quæ cremantur, non putrescunt. Quare putat ille, res oēs interire & corrūpi, aliàs sensim dissoluta tēperie, inducta q̃ putredine: aliàs tota illius substantia ab externis quibusdam causis offensa.

Frequentissimæ sunt apud Galenum hæ duæ voces, *συνωδων*, & *διαφθορα*. putredo scilicet & corruptela. leuius malum est putredo, quàm corruptela. putredo frequens est & quotidiana, à qua etiam facile homines releuantur. At corruptela cæcam habet perniciem ac venenum, mortem q̃; affert vt plurimum. Tu nihil in homine cogitas putredine deterius: At Galenus *διαφθορα* longè deteriore facit: Si enim putredo est via ad corruptionē, hæc ipsa est corruptio; & illa facile inhibetur, hæc verò nequaquam. Quare à tua illa erronea opinione iam resipisce. neq; enim qualitas illa venenata vana res est, sed quæ præter putredinem, sæpius quàm putes, homini accidat. Quare non sequitur (vt vides) qui egit de putridis egit etiam de pestilentibus. Est enim perniciēs illa ex putredine vltèrius p̃gressa, ortum iam venenum

venenum, quod etiam sine illa oriri potest.

Ego profectò puto te voluisse Hippocratici nomen tibi comparare, cum dicis, in febribus pestilentib. à causa interna nō esse venenum, idem est enim ac si negares illas esse pestilentes: ac omnes morbos communes iudicares esse ex aere. Sed quid Galenus contra Hippocratem scripserit 1. Epid. & 2. de natura humana lege. Qui vnam putredinem epidemiorum, pestilentium, contagiosorum & venenatorum morborum causam esse contendunt, maximis tenebris inuoluti, omnia permiscunt atq; perturbant. Vt qui inuestigandi sollicitudine abiecta, vehementissimos quosq; morbos, nullo delectu vel ad plethoram, vel ad cacochymiā, vel ad obstructionē, proximè verò ad plenitudinē, quæ ex his genita sit referunt. Non aliud q̃ has causas totā diem illos audias intonare ac crepare, ita sanè rumpantur vt ilia Codro. Magna certè pernities ac deleteria plerunq; hominem rapit, alijs quàm eiusmodi causis inquinatum. Brevis certè & compendiaria, sed periculosa nimis isthæc mendendi ratio, quæ solas putredinis causas animaduertit. Verùm vsq; adeò te oblectat, tenet, ac demulcet hæc putredo, vt nihil aliud quàm putredinem spires.

Sed similes habent labra lactucas.

Quæ verò in tertia tua ratione dicis, locum habent in putrida simplici. verùm in pestilenti, in qua inest venenum (vt supra demonstratum fuit) festinādum omnino est, & accommodatis antidotis venenum extinguendū, consumendum, reprimendum est. Alioqui naturam destruit, corrumpit, demolitur, interficit, vt cuius notū est, qui modo non sit in arte medica neophytus, sed veneni vim ac naturam norit. Quòd si hic etiā putas incidendum, attenuandum, aperiendum, euacuādum, concoquendum: nonne summopere laudanda est Donzelini sententia, qui Theriacam exhibet, quæ hæc omnia

F excel-

excellentissimè præstat: præterquam quòd venenū ab-
sorbet, vt Galenus dicit; sanguinem Theriaca bonum
reddit, non quia malam eius qualitatem excernat; sed
quia eius cōtumaciam vincat, & ex inimica amicam fa-
ciat. Lege caput 15. libri de Theriaca ad Pisonē, vide-
bis quater ab eo repetitum, Theriacam dissecare. (ita
enim legendū est, non desiccare, vt textus latinus dicit)
attenuare, diuidere, obstructiones aperire, & mellis ac
aliorum plurium ratione concoquere; aliaq; omnia fa-
cere, quæ tu toties inculcas facienda. Quare vnico au-
xilio facit Donzellinus, quod tu non potes etiam si cen-
tum tibi dilectos syrupos, electuaria, cōfectiones, deco-
cta, iulebos, fomēta, epithemata, emplastra etiam, & ca-
taplasmata adhibueris. vel si omnes pixides, vrceolōs,
ac ollas pharmacopolarum euacuares. Sed stolido non
sapit ista seges. Quod itaque dicis eandem curationem
vtrisque cōuenire, hallucinaris. falsum enim supponis,
quòd scilicet eiusdē sint naturæ & similes. At supra de-
monstrauimus, illas esse diuersas ac dissimiles. Et pesti-
lens qua pestilens est longè aliam curandi rationem at-
que auxilia postulat ac requirit, vt ex dictis patet viden-
tibus, non autem cæcis, vigilātibus, non autem alto ve-
terno oppressis.

Postremò asseris, cū duplex sit putredinis causa, al-
tera interna, externa altera, de omni interna egisse Ga-
lenū in vndecimo, de externa verò in alio tractatu. Su-
pra euicimus firmissimis rationibus, in illo tractatu Ga-
lenum compræhendisse omnes pestilentes, quæ tribus
generibus continebantur. In vndecimo verò de simpli-
ci putrida tractasse. quare non Donzellinus, sed tu er-
ras, qui confundis genera diuersa, cū ipse prudenter
& artificiosè ea separarit.

Scio Zoile, me canere fabulam furdo, sed qui fordi-
dus est, fordescat adhuc.

Vnicus tibi cuniculus remanet, ac latibulum, in quo te tantisper abdas ac tuearis, quominus te iugulet Dözellinus. Cum enim nostra controuersia sit de pestichijs, quas Donzellinus vocat febres pestilentes citra pestem: & quatenus separantur à peste, quartum febr. pestilent. genus dici potest, licet ut primum fiat à causa interna. Tu hic dices, de hoc saltem genere Galenus egit in vndecimo methodi. Cum autem hæ febres per Donzellinum sint venenatæ; igitur in vndecimo methodi egit non tantum de putridis simpliciter, sed etiam de venenatis. Nihil minus Zoile. Tu enim fateris (& ita se res habet) in pestichijs nullam esse colliquationem, quam tamen Galenus febris pestilentis citra pestem symptoma facit inseparabile. 3. Epid. 3. Galenus verò in fine decimi dicit, in eodem libro, in quo de febribus pestilentibus tractabit, se etiam de colliquantibus febribus disputaturum. Quare necessario sequitur, non in vndecimo, sed in illo pmissio libro Galenum de pestichijs ac febre pestilenti citra pestem disputasse. Præterea, ostende locum in vndecimo aut duodecimo methodi, in quo Galenus verba fecerit de febribus colliquantibus. nec tamen symptoma inseparabile fuit ab eo prætermittendum; qui præsertim scriptorum omnium fuit diligentissimus. Quare sequitur Galenum in eo vndecimo, de nullo genere febrium pestilentium sermonem habuisse. Quod tu tamen tam pertinaciter defendere es conatus.

Quod verò supra dictum fuit, in pestichijs non esse colliquationem, quam tamen febris pestilentis Galenus inseparabile facit symptoma, videtur Donzellini sententiam falsam indicare, qui pestichias vocat febrem pestilentem. Quare, ut hæc etiam dubitatio hic obiter tollatur, Dico; etsi pestichia sunt febris pestilens citra pestem ac citra aeris contagium, ut supra probatum fuit; iustissimam tamen esse causam, cur nunc non

10. Meth. in fine.

3. Epid. 3. text. 57. & ægroto. 1. & 8. catastrophe. 7.

Gal. 3. E-
pid. 3. Ae-
groto. 1. &
10. Meth.
in fine. &
8. catato-
pus. 7.

1. Meth. 1.
6. Aphor.
27.

fiat colliquatio, quæ fiebat Galeni tempestate. Cùm.n.
ea tum fiat, quando vrens ac igneus febris calor, nō tan-
tūm pinguedinem, sed etiam carnosam partem corporis
fundit ac liquat; Dico pestichias nunc citius interime-
re, quam earum calor membra colliquare possit. Huius
ratio est non tātūm quòd citò hominem tollunt ac per-
necant; sed quòd nostri seculi tanta est ingluuies, crapu-
la ac intemperantia, vt non tantū venæ repletæ sint mul-
to sanguine, sed ipsę corporis partes ac habitus totę ma-
dent humoribus ac excrementis, quibus depascēdis ac
consumendis occupatur febrilis pestichiarum calor, vt
citius finiantur ad salutem aut ad mortem quam solida-
rum partium colliquatio fieri possit. Atq; hæc est causa
cur pestichiæ nostra tempestate nō faciunt colliquatio-
nem, nec foetorem illum tetrum, qui colliquationibus
necessariò cohæret. Vt Galenus 3. Epidem. 3. ægroto
primo, licet verè sit febris pestilens. Dicit hic aliquis,
eadem ratio Galeni etiam seculo debuit colliquationē
inhibere. Nam sæpe in suæ ætatis mores ac intemperan-
tiam Galenus inuehitur ac debacchatur. Respondeo,
omnem nos omnium seculorum intemperatiam super-
esse; & quamuis ille scriptum reliquerit, suæ tempestatis
crapulam tantam fuisse, vt nullum excessum pati posse
videretur. Illud per hyperbolem à viro intemperantiæ
inimicissimo dictum fuisse aio. Veteres enim ita fuerūt
sobrietatis studiosi, vt cū semel Plato ex Sicilia rediret
in Græciā, suis pro miraculo narraret, se in Italia vidisse
homines, qui bis in die cibo ventrem distenderent. At
nunc nemo est tam prudēs aut sobrius, qui id nō faciat.
Quin non tantūm pueri ac voraces mulieres, sed melior
hominum pars totam diem comedit ac bibit; ac summi
flagitij loco habetur, oblatū cibum aut potū respuere.
Sciunt oēs qualia nunc conuiuia instruantur, & quàm
frequentia. Antiqui coenabant omnes, at non oēs pran-
debant;

debant; sed totam diem negocijs impendebant, vt tradunt historiae; vnde etiam coenae nomen est deriuatum, quæ rem omnibus communem significat. sed de re satis per se manifesta latius non est disputandum: Atque hæc parergi loco dicta sufficiant. Ex quibus facile perspicui potest, quæ Donzellinus scripsit, tam acri iudicio ac ratione fuisse firmata, vt stabili æternitatis robore sint permanfura.

Postremo canis receptui, ac dicis, iam dicta sufficere contra Donzellini libellū. licet multa adhuc supersint, quæ tenue ingenium tuum diuexent ac defatigent; ea autem quamuis compendij gratia dicas, nunc omittenda: per occupationem tamen rhetoricam adiungis. scilicet, vt de maligna tua voluntate satyrici Poetæ illud meritò dici possit.

Et lassata diu nondum satiata recesit.

Ego Zoile etsi te de facie non noui, non leuibus tamē rationibus permotus, iudico te esse melancholicum. Si enim vera sunt, quæ Galenus scripsit in eo libro, cui titulum fecit, Animi mores sequi temperaturam corporis; non obscura certè, sed plurima eius temperamenti & humoris indicia in te elucent. Es enim pertinax, malignus ac veluti Timon ille Lucianicus, misanthropos. Et cū multi sint melancholici, qui falsa quadam imaginatione putāt se esse Reges aut Imperatores, cū nihil sint minus: Tu ex eorum genere mihi videris; cum tumidus, fastuosus, arrogās ac superbus sis, ac omnia te scire putes, qui crassa rerum inscitia labores. Sed obstat, qd Aristoteles scribit melancholicos esse sapientes, cum tu nihil minus. fortassis dici potest, Aristotelem intelligere, cum humor ille est mediocris. Tu verò eo nimis abundas, & ea cacochymia nimis laboras.

Certè si Galeni placita sequi libet, tu es melācholicus, à prædominio eius humoris atrabilarij, quem Galenus

30. part.
probl. 1.

lib. de atra
bile.

dicit

dicat esse similem acerrimo aceto, ita ut fermentet terram. Atque hinc apparet solutio pulcherrimi problematis; Quare Zoilus ita mordax est, & omnes carpit, pugnat ac vellicat, quia scilicet acer ille humor ac mordax est, quo eius turgent hypochondria; atque ideo in eius animum transit corporis vitium. Sed dubium est, an contra potius, iuxta illud,

Corpora nam vitiant animi contagia tandem.

Vt cumque sit, necesse omnino est, animum tuum esse infelicem, qui in aceto perpetuo natat. Etsi autem acetum multos ac magnos habet usus, est putredine tamen originem habuit. Quare mirum non est, si animus tuus, uti ex aceti acrimonia mordet, ita etiam ex eius putredine foetet: etsi tu omnium morborum & contagiorum solam putredinem vis esse causam. Sed contra. Melancholia facit homines timidos. Iuxta illud Hippocratis. Si metus & tristitia diu durant, pathos est melancholicum. At tu es audacissimus, ut magnos etiam viros impetere audeas. Solutio. Duplex est melancholia, altera quae vocatur humor melancholicus, & est faex sanguinis. Haec facit timidos. Altera ex bilis flavae accensione fit ac exustione, quae atrabilis appellatur, & haec audaces facit, ac nonnunquam etiam maniacos & furibundos. Sed satis iam iocati sumus, redeamus ad pensum.

6. Aphor.
22.

Oppugnatio septima.

Donzellinus asserit febrem pestilentem citra pestem non esse ex aere, sed ex prava dieta, licet ea communis sit; contra. Repugnat naturae epidemicorum & pestis, quae ambo fiunt à causa communi.

Si quae superius à me enarrata & probata sunt sciuiſſes Zoile, haec nunquam scripsisſes: quis non satis intelligo quid tibi velis, & ut intelligaris, Delio opus est natatore.

Si Donzellinus febris pestilentis citra pestem statuit causam commune erratum in victu: quo repugnat eius febris

febris naturæ: nonne causam habet communem? Si putas erratum publicum in victu non esse causam publicā, Galenum habes tibi aduersantē, qui initio libri de Euchymia dicit ex victu febres illas pestilentes ortas esse. Idem de febre pestilenti suæ tempestatis, quæ fuit similis Atheniensi, quā primo de febr. differentijs, & 6. epid. dicit ex victu deprauato originē traxisse. Sed in primo de differ. febr. bis in eodem capite dicit, ex prauo ciborum usu oriri febres pestilentes. Idem etiam 2. de natura humana. quid igitur habeas contra Donzellinū non video. Si enim febrem pestilentem ponit morbū communem, illi etiam adsignat causam communem: quam cum tu etiam fatearis Donzellinum posuisse, mirum est te tam vanam oppugnationem posuisse.

Cap. 4.

Text. 3.

Dogmatizas tu deinde, & magistraliter sedens pronūcias dogma sempiternum. Febrem pestilentē citra pestem ego Zoilus dico esse, quæ fit priuata & praua alicuius dieta: & est sporadica.

Melancholizas Zoile, & strenue quidem melancholizas. Morbi sporadici sunt diuersi. Hæc febris vnus est morbus. ergo non est sporadica.

Præterea, morbus sporadicus, & epidemicus, seu pestilens differunt vt priuatum & publicum. ergo febris pestilens non est sporadica nec priuata.

Præterea, cum Galenus huius febris symptoma faciat inseparabile colliquationem: eam mihi ostēde obsecro in tua illa sporadica febre.

Præterea, si Galenus in suo illo promisso libro in 10. methodi, agit de colliquatibus inter pestilentes, nonne agit etiam de ista, cū sit ppriè colliquans? in eo aut libro communes tantum morbi, non sporadici tractantur.

Impegisti Zoile ad illam vocē priuatim, quæ in textu latino habetur, 3. Epide. 3. Idq; ex interpretis errore, & tua græcæ linguę ignoratione. Tu putas, Galenum illic dicere,

Text. 57.

dicere, febres pestilentes citra pestē fieri ex priuata aliquius dieta, atq; ideo inferre esse morbum priuatum, qui vnum aut alterum tantum corripit, non autem sit communis. sed à vera Galeni sentētia longissimè abes. Dic mihi, qui fieri potest vt febris priuata sit pestilēs? Nōne pestis est epidemia? Nonne epidemia est communis? Qui potest igitur febris pestilens esse priuata?

Deinde, si Galenus ita sit intelligēdus, vt tu interpretaris; cum ipse dicat, colliquationem esse symptoma inseparabile huius febris (per te) priuatæ. sequeretur, eam non conuenire alijs febribus pestilentibus: quam tamē & in eadem litera, & infra comment. 72. dicit in magna illa peste omnibus adfuisse, cum tamen non priuata, sed publica febre pestilenti laborarent. Vera igitur Galeni sententia hæc est. In magna hac nostra pestilētia, colliquatio omnes sustulit: quæ eius febris, quæ propriè pestilens vocatur, symptoma est inseparabile. Hæc verò febris propriè pestilens vocata, cū in peste mortales apprehendat, potest tamen etiam sine peste illis accidere. Hæc genuina est Galeni sententia, si græcos codices cōsulas. cuius hæc est summa.

Colliquatio conuenit, & accidit omni febri pestilēti. febris pestilēs cum vt plurimum in peste oriatur; tamen etiam sine peste oriri potest.

Hic non dicit Galenus, eam fieri ex priuata dieta, sed quod priuatim dixit interpretes, propriè est in Græco, & hunc sensum habet. Cum febris generale sit nomē, eius, quæ propriè pestilens vocatur, symptoma inseparabile est colliquatio. Hanc verò, vt dixi, febrem, dicit postea, & cum peste & sine peste posse contingere.

Cū tu Zoile ob fata tibi irata non calleas græcā linguam, cōsule peritos, ac videbis (vt dixi) ad eam vocem priuatim te turpiter imegisse. Quid igitur sit febris pestilens citra pestem fatearis liberè hæctenus te ignorasse.

rasse. ex qua ignoratione prodijt tuum argumentum,
quod iam futilissimum apparet.

Oppugnatio octaua.

Donzellinus dicit, febres pestilentes esse conti-
nentes, & tales ab omnibus iudicari. Contra.
Ego Zoilus sum medicus excellētissimus, & ta-
men hoc nunq̃ obseruauī. Potius verò eius contrarium
apud Hippocr. in Epide. vbi pestilentem constitutionē
describens, dicit, in ea fuisse febres ardētes, quę paribus
diebus habebāt accessiones. ergo non erāt continētes.

lib. 3. cōm.
3. text. 34.
& 36.

Intolerabilis in te est arrogantia Zoile. Igitur, quæ tu
non obseruasti, ea nullibi aut nulla sunt? es ne tu fortas-
sis tam perspicax, vt te nihil fugiat? Infeliciter ageretur
cum alijs venatoribus, si, quæ te fugit præda, nulla esset.
Si tu non obseruasti, cum iuuenis sis inexpertus, obser-
uarunt grauisissimi omnes nostræ ætatis Medici, obserua-
uit Donzellinus; qui Romæ, Venetijs, in multis ciuita-
tibus externis, ac tandē Veronæ populosisima ciuitate
medicinam factitauit; & cum maximis Medicis, ac exer-
citatisimis, ac doctisimis diu versatus est. Vnicuique
autem in sua arte experto credendum est.

Ratio etiā hoc idem docet; nā authore Galeno, syno-
chus est febris, quæ omni mutatione magna vsq; ad iudi-
ciū caret: pestichia aut tales esse depræhēduntur. Quod
si aliter sentis, declaras te earum faciem nunq̃ vidisse.

9. meth. 11

At Hippocrates in quadam constitutione pestilenti,
dicit, febres paribus diebus accessiones habuisse. Scis
tu Zoile, non omnes constitutiones pestilentes esse simi-
les, sed magnam in illis esse diuersitatem. Nostra autem
cōtrouersia est de pestichijs, quas Dōzellinus synochos
appellauit. Hippocratis aut constitutio non fuit pesti-
chia. Præterea Galenus dicit, illud fuisse rarissimum, &
ille vnicus est casus. Non dubito, qua præditus es dili-

G gentia,

gentia, te excusasse omnes libros Epidemiarum, nec ta-
men plures eiusmodi, sed vnicam tantum constitutionē
inuenisti; quam etiam Galenus rarissimam esse dicit.
Theoremata verò medicinalia nō esse sempiternæ veri-
tatis, sed vera vt plurimum Galenus affirmavit 6. Apho-
ris. 58. Vnicum exemplum & singulare tollit quidē vni-
uersale theorema, ac probat non esse perpetuum. Sed
physica; & medica vera esse intelliguntur, etsi non sem-
per, sed vt plurimum talia existant. Quare nec ratione,
nec testibus, aut experimento Dōzellini sententiā con-
futaſti: sed vt in alijs, ita etiam in hac tuam simul & ma-
lignitatem & inscitiam patefecisti.

Oppugnatio nona.

Donzellinus contagium dicit habere latentē ac
venenatam causam: Sed multi sunt morbi con-
tagiosi, in quibus nihil tale existit, vt lepra, pſora,
scabies, pruritus, phthisis; ergo falsū est, quod ille affirmat.

Poteris tu quidem ab eo labore supersedere Zoile; ac
nisi vehemens contradicendi rabies te exagitaret, pro-
culdubio hic siluisses. sed aut dissimulas te intelligere,
quod intelligis, vt ita viam tibi facias ad cōtradicendum:
aut prorsus cæcus es, & in cimmerijs tenebris versaris.

Quod omnibus notissimum est, perspectum habuit
Donzellinus; duo scilicet esse contagiosorum morborū
genera, occultum & latens vnum; manifestum alterum.
Cum autem viri docti cum scribunt, non omnia, quæ in
mentem veniunt scribenda ducant, sed multa supponāt,
tanquam nota; eam diuisionem in animo retinens, sui
syllogismi maiorem propositionē ponit, quæ dicit. Mor-
bi contagiosi occultam, latentem, & venenatam causam
habent; intelligens de contagiosis occultis ac cæcis: cu-
ius indicium est, quod ponens exempla, occulta tantum
nominauit, gallicam luem, elephantiasim, hydropho-
biam.

biam. vt nisi habuiffes animum prorsus cæcū, aut odij veneno delibutum, ex hoc potuiffes facile cognoscere propositionem illam, quæ tanquàm omnibus confessa ponebatur, esse verissimam, & de cōtagiosis occultis accipiendam. subsumit deinde minorem, dicens; lethale autem hanc epidemiā esse contagiosam docet experientia. Nonne sequitur conclusio, quam ipse infert; ergo latentem causam habet hæc epidemia?

Dices, in minori tu ponis hanc epidemiam in occultis; at hoc tibi probandum fuit. ego enim dicam, eam esse in manifestis. Ac ita quod sumis in minori, non fuit positum in maiori.

Dico Dōzellinum, cū in minori eam appellarit lethalem, apertè declarasse in occultis contineri. nam cōtagiosi manifesti lethales non sunt. Eam verò esse lethalem, & ipse supra probauerat, & experiētia etiam docet, & ego etiam supra demonstraui. Quòd verò de putredine longa disputatione philosopharis; in qua tractanda tanquàm in proprio elemento versaris, strenuè quidem curris, sed extra viam. quare omnis tuus irritus est labor. Fateris enim tu quoque in fine occultum contagium sine putredine reperiri, in quo tanquam cardine, tota Donzellini vertitur disputatio.

Quare vides luce meridiana clarius, quàm importuna sit, ac minime quadret tua illa postilla, & in marginē additamentum; quo putas, te ad Elenchum Donzellinum perduxisse. Dicis enim, illum fateri, empycos & tabidos fouere putredinem solam sine veneno, & tamē esse contagiosos. Cū hi morbi inter manifestos numerentur, quid hoc lædit Donzellinum; qui de his non intellexit? Quin si tu micam salis habuiffes domi, ex his, q̄ ipse de his morbis dixit, cū illos esse putridos sine veneno affirmauit; debebas cogitare, illum nō esse tam supinum, vt non videret, id sibi obijci posse;

si vt tu malignè interpretaris, intellexisset. Vsq; adeò ne humiliter de illo sentis, vt qđ tu homo stupidissimus vides, illū putes nō videre, qui omniū est p̄spicacissimus?

Oppugnatio decima.

Donzellinus putat, locum Galeni. 9. de simplic. medicam. cap. de terra Samia esse mutilū, & ex Paulo restituendū. Galeni enim locus de bolo armena tantū loquitur. at Paulus Galenū citans etiā Theriacæ mentionē facit. Dicis, locū non esse mutilum, nam necesse non fuit, quod Paulus citat ex Galeno, ex vnico fuisse desumptum. potuit ex illo loco Paulus accepisse Galeni sententiam de Bolo; ex alio verò de Theriaca. quare non sequitur, locum esse mutilum.

Dici solet, potentia est res ampla, non sequitur tamē, potuit ergo fecit. Galeni locum te ostēdere oportebat, ex quo Paulus de Theriaca sumpisset Galeni sententiā, illis verbis expressam, quæ Paulus ponit. Neq; probas quidq̄, cūm dicis; Dicam. n. Paulum eo loco vnā collegisse, quæ sparsim Galenus ponit. Nā ego similiter dicam, Paulum ex eo tantū loco ea desumpsisse, & locū esse mancum: nam Galeni exemplaria sunt corruptissima: vt norunt qui in illis emendandis operā posuerūt, inter quos Donzellinus non est postremus: qui à Iuntis Græcos codices manuscriptos habuit. Nec video, cur magis tibi, q̄ mihi aut Dōzellino credendū sit: si tua ac mea simplex assertio sit spectāda, nulla rōne adiuncta.

Sed probo, ex illo tantū loco Paulum sumpsisse Galeni sententiam, non ex diuersis. Pauli hæc sunt verba. Galenus aut inquit ad putredines pestilentes armeniacam bolum potu sumptam, similiter & Theriacā è viperis maximè prodesse. Hactenus nonnihil coloris habet, quod dicis, Dicam. n. Paulū &c. Verūm quæ sequuntur, ex vnico illo loco sumpsisse Paulū Galeni sententiā, fidē faciunt

faciunt certissimam. Dicit enim. Atqui in hac Romæ pestilētia dixit Galenus, quibus neutrum horū profuit, omnes interiere. Hæc sunt eadē verba, quæ Galenus habet 9. de simplicibus. tantū in numero variant; cum. n. Galenus singulari Paulus plurali vsus est, quo declarat, locum esse mutilum ac emendandum: & non tantū de bolo, sed etiam de Theriaca loqui.

Vides Zoile quā turpiter hallucineris, & quā longè à scopo aberrant insulsæ tuæ cognitiones? quæ vix locum haberent in Vtopia.

Oppugnatio undecima.

CUm Donzellinus dicit, si cui pestilēti febre affecto theriaca fuit exhibita quæ non seruarit, id eò accidisse, quia conditiones ab eo propositæ nō fuerūt seruatae. maximis difficultatibus se inuoluit. Duo. n. absurda ex eius dictis sequuntur. Prius, quod morbi exitiosissimi fient saluberrimi, si exhibita Theriaca ab illis liberat. Alterum, quod Galenū ac alios veteres Medicos inscitiae arguit, qui cū in constitutionibus pestilentibus Theriacam exhibuerint, non omnes tamen seruatos dicunt, sed eorum aliquos interiisse.

Te supra Zoile iuuenem appellauī, nunc verò cogor puerum in medicina nominare, qui eius prima vix elementa nosti. Ante quā tamen seriò tibi respondeam, libet te interrogare, an Rufi Ephesij magni illius ac vetustissimi medici nomē tibi sit notum. Certè illum Galenus, Paulus, Aetius ac cæteri Græci magnificiunt. Et cū ubiq; honorificam illius faciat Galenus mentionē, tum maximè in cōment. ad 6. Epidem. 1. dicit enim. Sabinus verò Rufusq; Ephesius viri in libris Hippocratis diligentissimè versati, magna profectò admiratione digni sunt. Idem etiam Galenus in libro de atrabile ita illum commendauit.

mendauit. Cæterum inter recentiores optimè de melancholia scriptum est ab Ephesio Rufo, in quo sanè iure dixeris nihil desiderari ijs, qui secundum naturam audientes non contentiose obloqui in primis volunt. Id quod non pauci Iuniorum Medicorum plus nimio affectarunt, hi præsertim, qui se Methodicos vocant. Audis Zoile, quam belle hoc loco ac proprijs coloribus te pinxerit Galenus?

Quorsum hæc inquires? Audi Zoile. Paulus lib. 2. cap. 35. de peste agens ex Rufo, describit medicamentum ad pestem, deinde eius encomium facturum, addit. Rufus dicit. Neminem noui, qui cum hoc potu non fuerit peste superior. Quid dices Zoile? Paulus non reprehendit Rufum, ut tu Donzellinum. Eris ne tu tam audax, ut Paulum & Rufum velis accusare? O lepidum caput.

Dices ne illos ex morbo pessimo facere mitissimum? Atqui audis illos id affirmantes. Si vacaret veteres medicos excutere, quot putas me inuenturum, qui idem quod Rufus dicant? Sed iam disce, quod hætenus ignorasti.

Quoniam omnis motus est contrariorum dissidio ac repugnantia proficiscitur: natura dum mundi hanc vniuersitatem assidue mutationi subiecit, simul eam necessario varijs dissidiorum generibus, quasi seminibus consperfit. Atque ut quatuor rerum primordia, ignem, aquam, terram & aerem contraria instituit, ita & vnicuique, quod ex ijs ortu procescit, aliud quiddam opposuit dissidij lege. Nullus igitur affectus subsistere potest in nobis, cui non pariter contrarium quiddam tanquam remedium natura protulerit, nullaque usquam est remediorum penuria, sed nostra plerumque eorum ignoratio. Nullus toto genere immedicabilis est affectus, sed iccirco duntaxat, aut quod supra modum auctus, omnem præsidiorum vim aspernetur; aut quod imbecillæ

imbecillæ iam vires curationis prolixitati succumbunt. Nihil in hac rerum vniuersitate subsistit, cui nō & simile & contrarium quiddam natura adiunxerit, etiam si nostra diligentia nequit inueniri. Vt igitur morbis ex intemperie contrarias ex intemperie vires; instrumentarijs secundas medicamentorum vires opponimus; Ita fanè occultis totius substantiæ morbis necesse est natura contrarias vires compararit, quæ & ipsæ occultæ sint, & totius substantiæ dissidio illis aduersæ. Etenim tam immanes morbi nūquid proprijs destituti remedijs iacebunt? Siccine naturæ res tantoperè ad vitam necessariæ defecerint? Nihil profectò tale de natura optima rerum parente cogitandum.

Nullum itaq; morbum esse statuo, qui sua natura sit incurabilis. Quòd si qui lethales & exitiosi appellātur, id eò fit, quòd naturæ suæ relictī, ac auxilijs destituti, interimunt. At natura quibus curari possint auxilia dederat; nos verò aut illa ignoramus, aut nō vocamur ad curationem; aut non in tempore; aut quòd vires prostratæ sunt; aut errata à Medicis, ægrotantibus, adstantibus committuntur, aut (vt inquit Hippocrates) externè aliquid irrumpit, quod benè institutum curationis cursum importunè intercipiat.

Sed quod dixi, ne putes verum esse, nisi illud ex Galeno & ratione à me fuerit probatum.

Ego nullum morbi genus tam atrox, vehemens ac perniciosum esse puto, quod non perniciæ à venenis superetur: præsertim ab his, quæ venenata animalia iaculantur. potissimùm verò à viperino. Sed hæc omnia venena suam habere antipathiam & sua auxilia, quibus curentur, ostendam. Igitur per argumentum sumptum ex loco topico, si quod minus videtur inesse inest, ergo & quod magis, sequetur etiam inferiores ac leuiiores morbos curari posse.

Galenus

Galenus de Theriaca ad Pamphilianum hæc scribit. subiungam deinceps alias temporis præscriptiones. alia morborum genera, in quibus si quis theriaca uti voluerit, nunquam frustrabitur. Nam percussis à vipera, vulneratis à serpente, ictis ab aspidē, commorsis à cane rabido, demum læsis ab aliquo animali, quod dentibus, aculeo vel contactu venenum relinquat, recens Theriaca satis superque efficax remedium est. & paulo infra. Eodem etiam modo illis subuenit, qui ex interna causa & incerta consumuntur, tanquam veneno petiti essent. Habes præterea historiam de Mithridate in libro ad Pisonem, qui cum captus bello in Põpei potestatem venisset, nec duci in triumphum vellet; venenum sumpsit; à quo non potuit extinguī; cum eius filia eodem veneno sumpto necarentur. Tandem veneno superstes, insuperabilis ac illæsus, eo ita petenti à Bistoco amico ense fuit interfectus. Eius rei causam reddens Galenus dicit, ob Mithridatiæ antidoti familiarem usum talem eius corpori qualitatem venenis renitentem fuisse additam, ut à venenis pati non posset. In pestilentia verò quid præstet Theriaca, audi quid dicat Galenus ad Pisonem.

Denique Theriaca perinde atque pæonia aliqua medicinali & foris imposita, & intro sumpta, præsentaneum auxilium commorsis à cane rabido præstat; Depræhensaque est mihi vel sola in pestilenti constitutione languentibus posse succurrere; cum nullum aliud auxiliū tam magno malo tunc ita resistere valeat. Nec immerito, cum pestis ipsa ceu fera quædam venenata non paucos aliquot misere perdat, verum totas ciuitates depascatur. immutat enim aerem malo quodam modo, ut homines interficiat, qui cum non respirare non possint, contagiū miseri evadere nequeunt, attrahunt enim in seipsos aerem illum infectū, tanquam præsentaneum venenum. & paulo infra. Ad istum modum arbitror & Theriacam tanquam ignis quiddam

quiddam purificans & ipsa esset, illos quidem qui sani adhuc ipsam biberint, non pmittere, vt pestilentia prorsus capiantur. Illos autem qui iam ægrotent sanare posse, cum aeris inspirati malignitatem commutando, tum corporis temperaturam corrumpi non sinendo. Idem etiam docent ea, quæ scribit ad Pamphilianum de Aeliano medico; qui cum in Italia vniuersa perniciosissima quædam pestis grassaretur, ac omnes valde essent solliciti, solius Theriacæ vsum omnibus persuasit, nam cætera (vt inquit) nihil contulerant. Tunc itaq; ex his, qui ægrotabant quamplures sumpta Theriaca conualuisse: paucos, in quibus vis morbi nimium inualuerat, occidisse: reliquos omnes, quos nondum pestis occupauerat, non modo periculum euasisse, sed ne in morbum quidem incidisse. Deinde hæc addit Galenus. Atq; mirum hoc alicui videri non debet, quando, si haustum venenum superat, pestilentiam quoq; vincere possit. Aer enim est, qui corruptus cum sit homines perimit. Demum (inquit Galenus in eodem libro) vt paucis multa colligam, in quibus alia remedia (vi morbi superata) nihil contulerint, in his Theriaca exhibita, præter omnem expectationem egregiè operatur.

Ne autem putes Galenum existimasse theriacam ad sola venena vtilem esse, sed alijs etiã morbis lethalibus, ac vehementibus saluberrimam esse antidotum. audi rursus quid idem dicat ad Pisonem.

Non solum reptilium morsibus, & venenorum noxis hæc antidotus auxiliatur, sed in maximis etiã alijs ægritudinibus à nobis experta, salutaris medicina repta est.

Diximus exēpli causa de Theriaca, tanq̃ de vno, sed alia etiam plura sunt, quæ idem præstent, scilicet vt perniciosos, magnos ac vehementes morbos curent.

Cum igitur morborum alij leues alij graues ac perniciosi. leues sola natura, nullis adiuta remedijs, curat. de

H quibus

quibus dixit Hippocrates. Naturæ sunt morborum medicatrices. Grauiiores autem ac lethales, si præsidij destituantur, necant, ac ideo perniciosi appellantur. Sed si ars auxilietur, & opportunis remedijs succurrat, curantur.

Dices tu, si res ita se habet, ut morbi omnes sint medicabiles, igitur omnes qui morborum vi pereunt, culpa medicorum pereunt. Bona verba quæso. Culpa est, ubi affectus est perturbatus, aut praua voluntas, aut ignorantia affectata. Verum cum Medici iuxta artis præcepta curant ægrotantes, nec vlla in eis est negligentia, omni vacant culpa. Sed scrupulus adhuc restat. si quis ægrotus extinguitur à morbo, cuius remedium extabat, sed à medico adhibitum non fuit, quia illud ignorauit, nonne omnis in medicum culpa est transferenda? si remedium illud in arte ac libris Medicorum extabat, aut negligentie aut inscitie medicus ille est accusandus. At si remedium nondum inuentum, nec à Deo hominibus reuelatum, excusatione dignus est Medicus; quemadmodum etiam rudis puer, si arithmeticam non nouit; aut adultus, si artem nescit, quam non didicit; aut geometra circuli tetragonismum ignorans.

Ex dictis patet responsio ad tua argumenta. Cum. n. dicis, si Theriaca liberat à morbis lethalibus, ergo morbi lethales sunt saluberrimi: negatur consecutio. Cum probas dicens, salute finiuntur, ergo saluberrimi, hallucinaris Zoile. quod enim morbus sit salubris aut lethalis, non à fine quem aliunde nanciscitur, habet, sed à fine & euentu, qui sponte naturæ fit, sumit.

Etsi igitur morbus exitiosus salute finitur, id artis fit auxilio, à qua salus accersitur. at suæ naturæ relictus ægrotum extinxisset. sua itaque natura morbus meritò lethalis dicitur, licet aliunde salus consequatur.

Ad alterum

Ad alterum argumētum, cūm dicis veteres medicos à Donzellino inscitiae notari, qui in pestilenti statu (exhibita Theriaca) nō omnes seruatos, sed aliquos interijisse dicunt. Respondeo id, quod Galenus in historia Critonis dixit, non semper initio morbi, cūm adhuc res est integra, vocari medicos; sed sæpè progresso & aucto iam morbo, ac viribus collapsis; quo scilicet tempore nullus iam est medicinæ locus. Cūm itaque dicunt aliquos interijisse, deploratos intelligunt: quibus etiam præstitisset antidotum non adhibere, ne infamaretur. Id verò etiam Galenus dixit in loco ad Pamphilianum supraposito. qui habet. Tunc itaq; ex his qui ægrotabant quāplures sumpta Theriaca conualuisse, paucos, in quibus vis morbi nimium inualuerat, occidisse. Cūm verò Dōzellinus dixerit in suo libello; si cui adhibita fuit Theriaca, quem non liberarit, id eò accidisse, quia conditiones ab eo requisitæ, non fuerunt seruatæ, nonne tuum argumentum ridiculum ac futile ostendit? Illi enim in promptu est dicere, aut non bonam Theriacam, aut nō in iusta quantitate, aut non opportunè, aut non præparato corpore, aut nō toties, aut morbo nimis aucto, aut viribus prostratis, propinatam. Quare falsum est, veteres ab eo inscitiae argui; quòd enim aliqui interierint, id factum est defectu earum conditionum, quas requirit, ac ipsi etiam veteres defuisse dicunt, vt paulo ante dictum fuit.

Quid verò tibi venerit in mentem Zoile, satis diuinare non possum, cūm dicis Donzellinum nimio animi affectu & ardore, quo Theriacæ nimis admodum fauet, in scrutanda veritate fuisse impeditum. Declaras profectò te nunq̃ Galeni libros de Theriaca legisse: qui in ea laudanda, ac in cœlum euēhenda, omnes dialecticę locos perlustrauit, ac nullum prætermisit.

Illam enim cōmendat ab Authore, à Cæsaribus ea quotidie vtentibus, à cōponentibus, ab effectis & efficacia, quòd curat, præseruat, corpus imparibile reddit, vitam sanam, longam, hilarem, tràquillam efficiat, q̃ à multis, q̃ à magnis, quod à venenis, q̃ à venenatis animalibus, q̃ à perniciosis, pestilentibus ac peste ipsa liberet, q̃ ciuitati omnium principi Romæ gloriam & existimationē magnam conciliet. dicit enim ad Pamphilianum. Nam rem occultare, quæ ad salutem hominum conducatur, & qua se meritò iactant, qui in vrbe omnium principe degunt, vt & priuatè beneficio & publicè ornamento affecti ab ea antidoto, quæ communis salutis gratia, pro totius ciuitatis conseruatione parata seruatur, rustici admodum mihi esse videtur. Addit postea. Demum, vt paucis multa colligam, in quibus alia remedia, vi morbi superata, non contulerint, in his exhibita Theriaca præter omnium expectationem egregiè operatur.

Pauca quædam attigit Donzellinus in Theriacæ commendationem, tu dicis, illum nimio ardore cōcitatum, veritatem perspicere non potuisse; quid facies Galeno, qui longè plura attulit? dices ne illum esse insanum? si illi multa licuit dicere in laudanda Theriaca, cur pauca dicere Donzellino non concedis? nonne vides tuā accusationem longè magis Galenum quam Donzellinum impetere ac fugillare? Si Donzellinum pro animi tui libidine tractare tibi libuit; parcēdum certè fuerat Galeni manibus. Te igitur Zoile pudeat ac dispudeat, Medicorū principē ac coryphæū repræhēdere ac fugillare.

Non mihi si centum Deus ora sonantia linguis,

Ingeniumq̃; capax, totumq̃; heliconæ dedisset,

Theriacæ memorare queam medicamina veræ.

Quòd verò de Theriaca tam humiliter sentis, vt ægre feras, si quis eam pro dignitate laudet, ea est causa, q̃ tu probam THERIACAM nunq̃ vidisti; neq; eius miracula es expertus.

es expertus. Id quod inter non minima tuæ vitæ infortunia est numerandum: ex quo etiam non exiguū damnum ad tuos egrotātes est peruenturū. perge igitur, ac ut verè sis Galenicus, sola hiera & oxymelle sis contētus.

Restat iam Zoile, cū tua argumenta funditus sint euerfa, ut liuore deposito, sincere iudices, & ab errore resipiscas. facile enim tibi fuerit cognoscere, utrius cogitationes, tuæ ne an Donzellini figmenta poetica meritò sint appellāda. ac mirum profectò fuerit, si iam dubites, te sōniasse, & deliramēta, ac nēnias fabulatū esse.

Non libenter quidem Zoile, sed inuitus feci, q̄ hęc Medicinæ mysteria tibi reuelauī. Cū enim diuinæ Artis sacris vix sis initiatus, nec dum ad eius adyta intromissus, indignus eras cui abstrusiora hęc arcana retingerentur. Mihi itaq; veniam dabunt sacræ artis Antistites, nam aliter excellentissimi Dōzellini diuinas cogitationes tueri non poteram. Ut enim ex abditis Medicinæ penetralibus deductę sunt, ita ex eisdem fuerunt confirmandę.

Alioqui, uti beneficiū dādo accepit, q̄ digno dedit;

Ita beneficium dando perdidit, qui indigno dedit:

Ac beneficium male collocatum maleficium puto.

Ceterum cū ego diligentius considero eas conditiones, quas Galenus in eo requirit, qui cum laude in arte aliqua ac veritate perquirenda versari velit: nullā profectò in te prorsus esse deprehendo. Cū autē illę sint septem, si vna tantū absit, audi quid dicat Galenus. Itaq; si vel vnum horum, quę recēsuimus in illo desideretur, qui ad viam veritatis introducendus est, non erit admodum sperandum, illum posse sui voti compotem fieri. Si vnus tantū conditionis carentia te deploratum facit, cū omnibus careas, deploratissimum esse oportet. Quare certò possum statuere (Galeno iudice) te nomine tantū esse medicum, re autem nihil minus;

Pręsertim

De consti.
artis.

Præsertim cùm illa conditio in te potissimum desideretur, quæ tertia est in ordine apud Galenũ: ea iubet quibusq; optimis suæ tempestatis præceptoribus se auditorem præstare. At tu hac in parte quàm profectò fuisti malè fortunatus: qui antequam per ætatem de rebus ac disciplinis ferre iudiciũ posses, infelici quodam fato in malos præceptores incidisti, qui praua doctrina te ita imbuerunt ac fascinarunt, vt veterem adhuc spires insulsi-
tatem. Verum enim illud est, quod dixit poeta.

Quo semel est imbuta recens, seruabit odorem

Testa diu.

Circunferũtur quædã scripta, ex quibus animadu-
erum est à nostris, te omnia tua deliramẽta desumpsisse.

Macte puer virtutẽ esto, sic itur ad astra.

Dignum patella operculum. & quod dici solet.

κακὸν κοράκιος, κακὸν ὦν.

Cùm itaq; ex natura ac melancholia habeas, quòd sis pertinax ac ceruicosus, ea autem ex disciplina ac præceptoribus fuerit confirmata; mirum non est, si deliria semel imbibita non possis deponere, nec salubriorem cibum ac veriora dogmata admittere. Igitur cùm Galenus initio libri de Euchymia duo faciat medicorum genera, alterum eorum, qui prauè docent, alterũ verò eorum, qui prauè docentur. in priori tu nullum habes locum, qui neq; ex natura, neq; ex industria quidq̃ habes ad docendum subsidij: igitur in posteriori meritò es collocandus, quod cùm Galenus & venia & miseratione dignum iudicarit: nos quoq; ad vtrũq; parati sumus, modo aliquod resipiscẽtiæ specimen edas. Alioqui veniam denegantes, sola te miseratione prosequemur.

Orandus itaq; pro te Deus ille optimus Zoile, vt meliorem posthac tibi mentem donet. Aut si tua prorsus deplorata est salus, preces pro illis fundendæ sunt, qui incidũt in tuas manus, vt illos Deus liberet à malo, sunt enim

enim profectò malè fortunati.

Quò autem magis tua doctrina ac nomen omnibus inclarescat, ac vt veteris illius Thessali ac Zoili fiat immortale, operam dabo, vt Medici omnes per vniuersam Italiam ac Transalpini quoq; hæc scripta legant ac perlegant: quò scilicet intelligant, quàm nostro huic sæculo sit gratulandum, quod talem ac tantum virum protulit in hanc lucem. De tuis verò ciuibus nihil dico, cùm maximè necessarium sit, illos quorum interest, hæc nosce perspectaque habere; scilicet, vt tanquam alterum Apollinem aut Aesculapium te amplectantur, ac tantum patrię thesaurum, ac veluti oraculum, à quo vetus medicina, iamdiu mortua, in vitam reuocatur, dignis ac meritis honoribus prosequantur, colant, suspiciant ac venerentur. Vale.

F I N I S.



2 1 1 1 1

